

Dill' wen dill'
Kob Çhe
Jesucrístona'



New Testament in Zapotec, Cajonos (MX:zad:Zapotec, Cajonos)

Dill' wen dill' Kob Che Jesucrístona'
New Testament in Zapotec, Cajonos (MX:zad:Zapotec, Cajonos)

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

San Mateo	1
San Marcos	50
San Lucas	80
San Juan	130
Los Hechos	167
Romanos	212
1 Corintios	230
2 Corintios	247
Gálatas	258
Efesios	264
Filipenses	270
Colosenses	274
1 Tesalonicenses	278
2 Tesalonicenses	282
1 Timoteo	284
2 Timoteo	289
Tito	293
Filemón	296
Hebreos	297
Santiago	311
1 Pedro	316
2 Pedro	321
1 Juan	324
2 Juan	329
3 Juan	330
Judas	331
Apocalipsis	333

Dill' wen dill' kob daa bzej Matewa'

Dii xoxto' Jesucrístona'
(Lc. 3:23-38)

¹ Dga cho'en dill' nan Jesucrístona' nake' xiin dia che dii Davina' na' dii Abrahama'.

² Abrahama' goke' xa Isaaca', na' Isaaca' goke' xa Jacoba', na' Jacoba' goke' xa Judána' len beñ' bisheeka'. ³ Na' Judána' goke' xa Fáreza' len Zárana', na' xneeka' wlie' Tamar. Na' Fáreza' goke' xa Esróma', na' Esróma' goke' xa Arama'. ⁴ Na' Arama' goke' xa Aminadaba', na' Aminadaba' goke' xa Naasónna', na' Naasónna' goke' xa Salmónna'. ⁵ Na' Salmónna' len Rahaba' gokgake' xaxna' Booza'. Na' Booza' goke' xa Obeda' na' xneena' wlie' Rut. Na' Obeda' goke' xa Isaína'. ⁶ Na' Isaína' goke' xa Davina', na' Davina' goke' xa Salomónna'. Na' xna' Salomónna', beena' bikaa Davina', goke' xool dii Uríaza'.

⁷ Na' Salomónna' goke' xa Roboama', na' Roboama' goke' xa Abíaza', na' Abíaza' goke' xa Ásana'. ⁸ Na' Ásana' goke' xa Josafata', na' Josafata' goke' xa Jorama', na' Jorama' goke' xa Uzíaza'. ⁹ Na' Uzíaza' goke' xa Jotama', na' Jotama' goke' xa Acaza', na' Acaza' goke' xa Ezequíaza'. ¹⁰ Na' Ezequíaza' goke' xa Manaséza', na' Manaséza' goke' xa Amónna', na' Amónna' goke' xa Josíaza'. ¹¹ Na' Josíaza' goke' xa Jeconíaza' len beñ' bisheeka', legaken' zoa kana' bche'byen beñ' Babilóniaka' beñ' Israelka' lalle'ka'.

¹² Na' shlak ni zoagake' Babilóniana' golj Salatiela' xiin Jeconíaza', na' Salatiela' goke' xa Zorobabela'. ¹³ Na' Zorobabela' goke' xa Abiuda', na' Abiuda' goke' xa Eliaquima', na' Eliaquima' goke' xa Azora'. ¹⁴ Na' Azora' goke' xa Sadoca', na' Sadoca' goke' xa Aquima', na' Aquima' goke' xa Eliuda'. ¹⁵ Na' Eliuda' goke' xa Eleazara', na' Eleazara' goke' xa Matánna', na' Matánna' goke' xa Jacoba'. ¹⁶ Na' Jacoba' goke' xa Joséna' beñ' che Maríana', xna' Jesúsza', beena' lekzka' nsi'gake' Cristo.

¹⁷ Na' ka' gok wzoa shda' diaka' wzololenzan dii Abrahama' na' biyoll-lenan dii Davina'. Na' wde zi shda' diaka' bizzololenan dii Davina' axt ka bche'byengake' beñ' Israelka' Babilóniana'. Na' wizak zi shda' diaka' bizzolon ka bche'byengake' legake' Babilóniana' axt ka wzoa Crístona', beena' bsel' Chioza' inabi'e.

Ka golj Jesúsza'
(Lc. 2:1-7)

¹⁸ Ki gok ka golj Jesucrístona': Xnee Maríana' ba nakan ikaa Joséna'ne', na' ka zi' soalene'ne' bi'e, la' Espíritu Santo che Chioza' bene' kwenche bi'e. ¹⁹ Na' Joséna' beena' ba nakan ikeene', nake' to beñ' chon ka cheeni Chioza', na' daa bi goklallee wsi'e Maríana' yel' zto' gokile' choonlalleene' ka kono gakbe'i. ²⁰ Na' shlak chza'lallee gone' dga, to anjl che Xancho Chioza' bli'lawe' le' lo bishgal che'na', na' chi'ene':

—José, xiin dia che dii Daví, bi illebo' ikoo Maríana' daa ba no'e, la' Espíritu Sántona' bene' kwenche bi'e. ²¹ Na' sane' to bi' byodo' na' wsi'ob' Jesús, la' leban' yislab' beñ' yell cheb'ka' lao saaxya che'ka' kwenche bi' kwiayi'gake'.

²² Gok yog' diiki kwenche gok ka wna dii beena' wdixjee daa goll Chioza'ne', chi'e:

²³ To nool wew' wee, na' sane' to bi' byodo',

na' wsi'gake'b' Emanuel.

Na' Emanuel zejín: Chioza' zoalene' cho'.

²⁴ Na' ka biban Joséna', bene' kon ka goll anjl che Xancho Chioza'ne' na' wkee Maríana'.

²⁵ Na' bi wdelle'ne' axt ki wxanche' bi'do'na', na' bsi'eb' Jesús.

2

Wyaj ben' sin'ka' jawiagake' Jesúza'

¹ Jesúza' golje' yell Belénna', daa llia gana' mbani Judeana', kana' chnabia' Heródeza'. Na'ch bal ben' sin', ben' nsed che beljka', za'gake' ka de gana' chla'lə wbillā', bllintegake' Jerusalénna'. ² Na' che'gake':

—¿Gani rey che ben' Israelka', bi'na' ba golj? Nezinto' ba goljb' la' ka de gana' chla'lə wbillā' ble'into' to belj dii bzajniin neto' nan ba goljb', daan ba za'nto' kwenche we'la'onto'b'.

³ Na' ka beni Heródeza' daa wnagake', gokshejlallee, na' lekzka' yog'lol ben' Jerusalénka'. ⁴ Na'ch Heródeza' goxe' yog'lol bxozka' chnabia', na' ben'ka' chli' chsedi ley che dii Moiséza', na' wnable' legake' gan chiyal' galj Crístona', beena' wsel' Chioza' inabi'e. ⁵ Na'ch gollgake'ne':

—Yell Belénna' daa mbani Judeanan' galje', la' kan' bzej to ben' wdixjee daa goll Chioza' le', chi'e:

⁶ Na' li', yell Belén llio' gani mbani Judeani, aga inacho nako' dii liizelozi bibi zakii ladj yellka' zakii llia Judeani; la' lawo'ni ichej to ben' inabi'e, na' gap wwie' ben' Israelka', ben'ka' nak yell cha'.

⁷ Na'ch Heródeza', ka kono gokbe'zi goxe' ben' sin'ka' na' wnable' legake' batyen'an ble'gakile' belja'. ⁸ Na'ch bselee legake' Belénna' na' golle' legake':

—Li shaj, na' li lljadiljyoll bi'do'na', na' kat' yillelileb' na' yidnale nad' kwenche len' sha' llje'lawaab'.

⁹ Na' ka biyoll goll Heródeza' ka', na'ch wza'gake'. Na' belja' daa ble'gakile' kana' zi' sa'gake', zexan xan yabana' llialon lawe'ka', na' ka bllinan gana' zoa bi'do'na', na' na'zə wzoan. ¹⁰ Na' ka bizle'i ben' sin'ka' belja', le bibagakile'. ¹¹ Na'ch ka wyoogake' loo yoonā' ble'gakile' bi'do'na' len xna'b' Maríana'. Na'ch bchek' xibe'ka' na' be'la'ogake'b'. Na' wlelgake' or, na' yal zix, na' lekzka' len nill' che to yag dii chla' zix daa le mirra, na' be'gake'n cheb'. ¹² Ka biyoll be'la'ogake'b', Chioza' bsi'nile' legake' lo yel bishgal che'ka' kwenche bich yidegake' gana' zoa Heródeza'. Daan, bikaagake' nez yoblə ziyajgake' lalle'ka'.

Bxonjgake' wza'gake' Egíptona'

¹³ Ka wde biza' ben' sin'ka', to anjl che Xancho Chioza' bli'lawe' Joséna' lo bishgal che'na' chi'ene':

—Wyas, na' bche' bdo'na' len xna'baa na' li shaj gana' mbani Egíptona'. Na' na'z soale axt kat'ch inia' li' yiza'le. La' Heródeza' yiyilje' bdo'na' kwenche wite'b'.

¹⁴ Na'ch lii wyaste Joséna' na' bchi'e bdo'na' len xna'baa, na' wal-lə wza'gake' zejlen-gake'b' gana' mbani Egíptona'. ¹⁵ Na' wzoagake' na'zə axt ka bllin lla wit Heródeza'. Na' daa gok ka', gok ka goll Xancho Chioza' to ben' wdixjee daa golle'ne', kana' wne': “Nad' binia' bi' cha'na' kwenche biza'b' gana' mbani Egíptona'.”

Ben Heródeza' mandad witgake' bi'do'ka'

¹⁶ Na' ka gokbe'i Heródeza' bi ben ben' sin'ka' ka golle' legake', le blee. Na' bene' mandad witgake' yog'lol bi' byodo'ka' lle' yell Belénna' len yellka' ndil nllagan, bdo' cheenka' axt bi' chop yizi, bsakee ka to yizka' ba gok ble'i ben' sin'ka' belja'. ¹⁷ Na' daa bengake' ka', gok daa wna dii Jeremíaza', beena' wdixjee daa goll Chioza' le', ka wne':

¹⁸ Kwe' wbell na' gakyeshii ben'ka' lle' yella' le Ramá.

Noolka' nak xiin dia che dii Raquela' ni to kono cheengakile' gonxenlall' legake', daa wit bi'do' che'ka'.

¹⁹ Na'ch ka wde wit Heródeza', to anjl che Xancho Chioza' bli'lawe' Joséna' lo yel bishgal che'na' shlak ni zoe' Egíptona', na' chi'ene':

²⁰ —Wyas, bi'che' bi'do'na' len xna'baa na' li yiyaj gana' mbani Israela', la' ba wit be'n'ka' cheengakile' witgake'b'.

²¹ Na'ch wyas Joséna' na' bi'chi'e bi'do'na' len xna'baa na' biyajgake' gana' mbani Israela'. ²² Na' ka wnezi Joséna' Arquelawa' ba chnabi'e lo laz dii xe' Heródeza', na' bllibe' yiyajgake' Judéana'. Na' Chioza' wdixje'ile'ne' lo yel bishgal che'na' yiyajgake' gana' mbani Galileana'. ²³ Na' ka billingake' Galileana' jazoagake' yell Nazareta'. Na' daa jazoagake' na', gok ka wna dii be'n'ka' wdixjee daa goll Chioza' legake' kani'yi che Jesúsza', wngake' wsi'gake'ne' be'n' Nazaret.

3

Juanna', beena' bchoa be'n' nisa'

(Mr. 1:1-8; Lc. 3:1-9, 15-17; Jn. 1:19-28)

¹ Na' do kana', Juan, beena' bchoa be'n' nisa', wyaje' to latj gana' bibi chashj chleb gana' mbani Judeana', na' wdixje'ile' be'n'ka' chdi'a chllag na', ² chi'e:

—Li yiyaj yileni dii malka' chonle, la' ba bllin lla inabia' Chioza', beena' zoa yabana', loo yichjlall'do'lena'.

³ Na' dii Isaíaza', beena' wdixjee daa goll Chioza'ne', wne' che Juanna':

To be'n' gosyee to lo latj ga bibi chashj chleb, na' ine':

“Li se kwas wzenagle che Xanchona'

na' wsalj yichjlall'do'leka' kat' zee.”

⁴ Na' Juanna' bene' xe'na' de xa kamey, na' nchej lsineena' to yid. Na' wdawe' bish'zo len shin baser daa de lyixaa. ⁵ Na' be'n'ka' lle' yell Jerusalénna', na' doxen gana' mbani Judeana' na' yellka' llii gaoz yao Jordánna' jazenaggake' dillaa cho'e. ⁶ Na' bixoadol'gake' saaxya che'ka', na' bchoa Juanna' legake' nisa' loo yao Jordánna'.

⁷ Na' ka ble'i Juanna' zan fariseoka' na' saduceoka' bllingake' lawe'na' kwenche wchoe' legake' nisa', na' golle' legake':

—Le' naklikzle ka be'l znia! ¿Achakile wak wxonjile' yel' zak'zi' daa wsel' Chioza'? ⁸ Li gon ka gakbe'i be'n' nan dii li ba biyaj bilenile. ⁹ Na' bi gakzile bibi yel' zak'zi' ile'ile daa inazle: “Neto' naknto' xiin dia che dii Abrahama'.” Dii li nia' le', axt yajki wak gon Chioza' xiin dia che dii Abrahama'. ¹⁰ Yog'lol-le shi bi chonle ka chiyoollalii Chioza' na' gak chele ka chak che to yag dii chbia dii zix dii bi chak wen, na' lii chhogtegake' axt xanin na' chzal'gake'n lo yi'na'. ¹¹ Dii li nad' chchoa' le' nisa' daa chiya' chilenile, per beena' zi' za' kollaana' napche' yel' wak xench ka nad', na' ni bi zakaa gak' xmose' kwenche galj' xe'le'na'. Len' gone' ka yidsoa Espíritu Sántona' loo yichjlall'do'lena', ka le' chiya' chilenile', na' be'n'ka' bi chiya' chileni wza'lee legake' lo yi' gabila'. ¹² Na' gone' che be'n' yell-lioni ka chon beena' nox' yag xozaa daa chpa'ile' trígonaa' na' kooshawee trígonaa' na' wzeye' beb cheyinna' lo yi'na' daa biga yiyolkzə.

Jesúza' wchoe' nisa'

(Mr. 1:9-11; Lc. 3:21-22; Jn 1:31-34)

¹³ Na'ch wza' Jesúsza' gana' mbani Galileana' wyaje' cho'a yao Jordánna' kwenche wchoa Juanna'ne' nisa'. ¹⁴ Na' ka blline', bi nan cheeni Juanna' wchoe'ne' nisa', san chi'ene':

—Li'lan chiyal' wcho' nad' nisa', na' li'lə za'zo' kwenche wchoa' li' nisa'.

¹⁵ Per Jesúsza' golle'ne':

—Ben goklen bchoa' nad' nisa' la' chiyal' goncho ka nak daa nllia Chioza' bia' goncho. Na'ch bchoe'ne' nisa'.

¹⁶ Na' kon ka biyoll bchoe'ne' nisa' lii bichejte Jesúza' loo nisa' na' lii byaljte yabana' na' ble'ile' Espíritu che Chioza' chetje' ka to palom na' jsoalene' le'. ¹⁷ Na'ch bengakile' shii Chioza' zoa yabana' chi'e:

—Beenin nake' Xiin', beena' chakid', na' le chibaid' le'.

4

Goki dii xiwaa gonan ka wzenag Jesúza' cheyin

(Mr. 1:12-13; Lc. 4:1-13)

¹ Na'ch Espíritu che Chioza' bchi'e Jesúza' to latj ga bibi chashj chleb na' dii xiwaa goklalliin kooyela'n le' gone' ka cheenin.

² Na' ka wde choa lla choa yel bibi wdawe', na' wdone'. ³ Na'ch bllin dii xiwaa kwite'na' gollan le':

—Shi leilo' nako' Xiin' Chios, ben ka yiyak yajki yetxtil.

⁴ Na'ch goll Jesúza':

—Cho'a xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban.”

⁵ Na'ch dii xiwaa bche'n le' Jerusalenna' daa nak yell che Chioza' na' blepan le' yichj yoodo'na' gana' nak sib wal. ⁶ Na'ch gollan le':

—Shi leilo' nako' Xiin' Chios, lla bixit'shki ni. La' Cho'a Xtill' Chioza' nan:

Wselee anj che'ka' gap wwiagake' li',
na' gox'gake' li' kwenche ki koo wchewo' yajka'.

⁷ Na' goll Jesúza' len:

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenchezə xenlalloo shi gone' ka ba wne'.”

⁸ Na'ch stokzə bizche' dii xiwaane' to lo yaa sib wal na' bliin le' yog' yellka' lle' yell-lioni na' yel' zakii cheyinka'. ⁹ Na' gollan le':

—Yog' diiki chle'ilo' gon' li' shi wchek' xibo'na' we'lawoo nad'.

¹⁰ Na'ch goll Jesúza' len:

—Biyaj, Satanás, la' Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

¹¹ Na'ch biza' dii xiwaa kwit Jesúza' na' bllin bal anjlka' be'gake'ne' kon bi byalljile'.

Wzolo Jesúza' choe' cho'a xtill' Chioza' gana' mbani Galileana'

(Mr. 1:14-15; Lc. 4:14-15; 5:1-11; 6:17-19)

¹² Ka beni Jesúza' wloogake' Juanna' lillyana', bizee biyaje' gana' mbani Galileana'.

¹³ Na' bizee yell Nazareta' na' jazoe' yell Capernaúma', to yell xen dii llia cho'a nido'na' gana' mbani yell-lio che dia che dii Zabolónna' na' dii Neftalína'. ¹⁴ Na' daa jazoe' na', gok ka wna dii Isaíaza', beena' wdixjee daa goll Chioza'ne', daa wne':

¹⁵ Ka nak yell-lio daa naki che dia che dii Zabolónna' na' dii Neftalína',

daa llia shlaa yao Jordánna',

gana' xoa nez daa zej cho'a nido'na'

daa llia gana' mbani Galileana',

gana' lle' zan ben'ka' bi nak ben' Israel,

¹⁶ ben'ka' lle' na' gok yichjlall'do'eka' shgasj shchol,

na' Chioza' ba bselee to beeni' xen lawe'ka'.

Lao ben'ka' lle' gana' chnabia' yel' wita'

ba chzeeni' beeni' che Chioza'.

¹⁷ Na' wzolo Jesúza' chyixje'ile' ben' cho'a xtill' Chioza', chi'e:

—Li yiyaj yileni dii malka' chonle, la' ba bllin lla Chioza', beena' zoa yabana', inabi'e loo yichjlall'do'lena'.

*Wlej Jesúza' tap ben' wxen bel kwenche gongake'ne' txen
(Mr. 1:16-20; Lc. 5:1-11)*

¹⁸ Na' ka zej Jesúza' cho'a niso' che Galileana' ble'ile' chop bish' ben' wxen bel chzal'gake' yixja' loo nisa' chzengake' bel'a'. Toe' le Simón na' lekzka' nsi'gake'ne' Pedro, na' beena' sto lie' Andrés. ¹⁹ Na'ch Jesúza' chi'e legake':

—Li da, dino nad', na' kon ka chonle naa chbejle belki loo nisi, ka'kzan gonle yibejle ben' lao dii mala'.

²⁰ Na' ka golle' legake' ka', lii bkwaan'tegake' yixj che'ka' na' zejlengake'ne'.

²¹ Na' zi lat'chga wza'gake' bizle'i Jesúza' zi chop bish' ben', beena' to lie' Jacobo na' beena' sto lie' Juan, ben'ka' nak xiin Zebedewa', lle'gake' to loo barkw chiyonshao'gake' yixja' daa chzengakile' bel'ka'. Na' lekzka' goll Jesúza' Jacóbona' len Juanna' shajlen-gake'ne'. ²² Na' lii bkwaan'tegake' barkwa' len xe'ka' na' janogake' Jesúza'.

*Jesúza' chli' chsedile' ben' zan
(Lc. 6:17-19)*

²³ Na' wda Jesúza' yog' yellka' lia doxen gana' mbani Galileana', chli' chsedile' ben' Israelka' gana' chdop chllaggake' choe'lwillgake' Chioza', cho'e dill' wen dill' kob che yel' wñabia' che Chioza', na' biyone' yog' ben' che'i wde wdeli yillwe'. ²⁴ Na' doxen gana' mbani Síriana' wze dill' daa chon Jesúza', na' jwa'gake' yog'lol ben'ka' che'i wde wdeli yillwe', ben' chey chla, ben' yoo dii xiw', ben' chaz shon, na' ben' net ni'a nee. Na' Jesúza' biyone' legake'. ²⁵ Na' ben' zan inleeb jano le', ben'ka' lle' yellka' mbani Galileana' na' yellka' mbani Decápoliza', na' ben'ka' lle' yell Jerusalénna' na' yellka' sto mbani Judeana', na' ben'ka' lle' yellka' lia shlaa yao Jordánna'.

5

Dill'ka' be' Jesúza' lo yaana'

¹ Ka ble'i Jesúza' ben' zan ba nogake'ne', na'ch wyep'e' to lo yaa, na' wchi'e. Na'ch ben'ka' nakgake'ne' txen jabig'gake' kwite'na'. ² Na' wzolo Jesúza' chli' chsedile' legake', chi'e:

*Ben'ka' zoa mbalaz
(Lc 6:20-23)*

³ —Chakomba ben'ka' chakbe'gakile' chyalljgakile' gaklen Chioza' legake', la' legaken' yillingake' yabana' gana' chñabia' Chioza'.

⁴ Chakomba ben'ka' chbellyesh', la' Chioza' yizoe' legake' mbalaz.

⁵ Chakomba ben'ka' nak ben' gaxjlall', la' wllin lla Chioza' wi'e legake' yell-lioni.

⁶ Chakomba ben'ka' chzelall' gaggake' ben' li ben' shao', la' Chioza' ine' nakgake' ben' wen lawe'na'.

⁷ Chakomba ben'ka' chiyeshii ben', la' ka'kzə yiyeshii Chioza' legake'.

⁸ Chakomba ben'ka' nxi nyech yichjlall'do'eka', la' legaken' ile'gakile' Chioza'.

⁹ Chakomba ben'ka' chon to dii byen soalen ljwellgake' mbalaz, la' ina ben' dii likzan nakgake' xiin Chios.

¹⁰ Chakomba ben'ka' chiya dii chen chle'i daa chongake' ka cheeni Chioza', la' legaken' yillingake' gana' chñabi'e.

¹¹ Chakomba le' kat' chiya dii na ben' chele na' chiya dii chongakile' le', na' kat'ka' chiyiljlall'gake' bittezə dill' wxiye' chele daa chonlilall'le nad'. ¹² Li yiba yizaki, la' yabana' gaple to dii wen dii shao'. La' ka chongakile' le' naa, ka'kzan bchi' bsak'gake' kani'yi dii ben'ka' wdixjee daa goll Chioza' legake'.

*Nakle ka zed' na' ka beeni'
(Mr. 9:50; Lc. 14:34-35)*

¹³ Len' nakle ka zedaa ladj ben' yell-lioki. Zedaa, shi bich zxi'n, aga wakch yiyonchon zxi' ni bich gak wchinchon, na' chchoonchon gana' wlej wshoshj ben' len.

¹⁴ 'Len' nakle ka to beeni' ladj beṅ' yell-lioki. To yell dii llia to lo yaa, zit'lə nla'n, na' bi ngashaan. ¹⁵ Ni biga zoa to beṅ' chxene' kandila' na' chdose'n to dii wkwashaan len, san chzoe'n sibə kwenche wzeeni'n doxen loo yoona'. ¹⁶ Ka'kzan le', li gon to dii byen gonle daa nak wen kwenche ile'i beṅ' na' we'la'ogake' Xacho Chioza' zoa yabana'.

Jesúza' cho'e dill' che ley che dii Moiséza'

¹⁷ 'Bi gaxzile bid' kwenche yikwas' ley daa bzej dii Moisézan' wa daa bli' bsemi dii beṅ'ka' wdixjee daa goll Chioza' legaken'. Bi nakan ka', san bid' kwenche yiyoll gak yog'lol ka na leya' na' daa bli' bsemi beṅ'ka' wdixjee daa goll Chioza' legake'. ¹⁸ Dii li nia' le', shlak bin' te che yabana' len yell-lioni, bi init ni shcho'a dill' daa nllia ley che Chioza' bia' gak, axt ki gakch yog'lol daa bllie' bia' gak. ¹⁹ Daan, nottezə beṅ' chyishje' to daa nllia Chioza' bia' goncho, la'kzi dii bi llialotek, na' shi wliile' beṅ' yoblə gone' ka chone', bitek bi zakee yabana' gana' chṅabia' Chioza'. San beena' gon daa nllia Chioza' bia' goncho na' wliile' beṅ' yoblə gone'n, beenan' gake' to beṅ' zakii yabana' gana' chṅabia' Chioza'. ²⁰ Na' nia' le', aga wak yillinle gana' zoa Chioza' chṅabi'e shi toz ka chonlenle fariseoka' na' beṅ'ka' chli' chsemi leya', chiyaḷ' wzenagchle che Chioza' aga ka legake'.

Bi chiyaḷ' wicho beṅ'

(Lc. 12:57-59)

²¹ Na' lekzka' che' Jesúza' legake':

—Nezkzile goll dii Moiséza' dii xozxto'choka': “Bi chiyaḷ' wito' beṅ'. La' beena' wit to beṅ' chiyaḷ' guete' daa bene' ka'.” ²² Per nad' nia' le', nottez beena' chlee bish' ljwelle'na' chidolee tie' lo yel' zak'zi'na'. Na' lekzka' beena' chzoazi'yee bish' ljwelle'na', beṅ'ka' chṅabia' chiyaḷ' wwiagake' nak gongake' che'; na' beena' chṅie' bish' ljwelle'na' dill' zibia', chidolee wzal' Chioza' le' lo yi' gabiḷa'.

²³ 'Daan, shi ka zjoo daa chzanilo' wi'o Chioza' na' ka illino' gana' chzeygake'n lljadinilo' ngoolall' to bish' ljwello'na' li', ²⁴ na'z bkwaan daa noxoo, zigaate chiyaḷ' lljaye'xeno' bish' ljwello'na', na'tech wak wi'o Chioza' daa chzanilo' wi'one'.

²⁵ 'Shi no cheeni lljtao xya cho' lao joschiska', ben byen yiyoe'xeno'ne' shlak ni de xlatjin. La' shi ba blino' lao beena' wchogbia' cho', na' gone' li' lo na' beena' wseje' li' lillyana'. ²⁶ Dii li nia' li', aga wibeje' li' lillyana' axt ki chixjo' doxen daa chiyaḷ' chixjo'.

Bi chiyaḷ' inelen ljwell beṅ'

²⁷ 'Nezkzile wna dii Moiséza': “Bi chiyaḷ' ineleno' nool bi nak nool cho'.” ²⁸ San nad' nia' le', nottez beena' chwia to noolə na' chza'lalleene' loo yichjlall'do'ena', daa chone' ka' ba benkze' ka chon beena' zoate xoolə'na' na' chnelene' nool yoblə.

²⁹ 'Shi jalawo' de shlina' chonan ka gono' dii mala', naklan wen wtoljo'n na' choono'n. La' wenchan soa tlaaz jalawo'na' aga ka daa yiyaj doxentio' lo yi' gabiḷa'. ³⁰ Na' shi noo de shlina' chonan ka gono' dii mala', naklan wen wchogo'n na' choono'n, la' wenchan soa tlaaz noona' aga ka daa yiyaj doxentio' lo yi' gabiḷa'.

Bi nakan wen yilaa beṅ'ka' nshagna'

(Mt. 19:9; Mr. 10:11-12; Lc. 16:18)

³¹ 'Nezkzile wna dii Moiséza': “Nottez beena' yilaa nool che'na' chiyaḷ' chas to yish we'n dill' nan bilaagake'.” ³² San nad' nia' le' shi to beṅ' byo yilee xoolə'na' la'kzi xoolə'na' bi chnelene' beṅ' yoblə, daa yileene' chone' ka yikaa noola' beṅ' yoblə na' gake' ka to noolə zoalentie' beṅ' che'na' na' chnelene' beṅ' yoblə. Na' beena' yikee noola' nlaa beṅ' che'na', lekzka' chone' ka chon beena' chnelen xool beṅ' yoblə.

Bibi wzoacho de taschiw kat' bin wchebcho

³³ 'Lekzka' nezkzile golle' dii xozxto'leka': “Bi wkwaaanzo' ka'zə daa ba bchebo' lao Xancho Chioza' shi bzoatio' bi bzo' de taschiw.” ³⁴ San nad' nia' le', bibi wzoale de taschiw kat' wcheble lao Chioza'. Bi wzoazle yabana' de taschiw, la' yabana' nakan

gana' zoa Chioza'. ³⁵ Na' ni bi wzoale yell-lioni de taschiw, la' nakan ka gana' nzoa ni'a Chioza'; na' ni Jerusalenna', la' lennan' yell che beena' chnabia' doxen. ³⁶ Na' ni bi wzoazle yichjlana' de taschiw, la' aga wak gonle ka yiyak ni to yish' yichjlana' yish' bez' shi nakan dii gasj wa gonle ka yiyakan dii gasj shi nakan yish' bez'. ³⁷ San kon inale "wakan" wa inale "bi gakan", la' shi chzoale de taschiw bichlā wa nochlā, dii malan' chonan chonle ka'.

Chiyal' gakicho ben'
(Lc. 6:29-30)

³⁸ 'Lekzka' nezczile' wna dii Moiséza': "Shi to ben' wshoshje' tlaa jalawo'na' lekzka' yiyono' che'. Na' shi to ben' wxope' leyo'na', lekzka' yixopo' leye'na'." ³⁹ San nad' nia' le': Bi yizi'o wzon che ben' mala'. Shi no kap' xagoona' tlaa, bi'e daa zi shlaa. ⁴⁰ Shi to ben' chbagoo dii chbagoo che' na' cheenile' ikee xkamiso'na', be'shaze' lente daa nxaoo kolloona'. ⁴¹ Na' shi to ben' wwee li' yoa' che'na' na' gone' byen woon to kilómetro, wza'lentegan chop kilómetro. ⁴² Na' nottezə ben' shi bi inabe' cho', be'n. Na' shi no inabi li' wi'one' shloll bi de cho', bi wllonilo'ne'n.

Chiyal' gakicho ben'ka' chakzbangakile' cho'
(Lc. 6:27-28, 32-36)

⁴³ 'Na' lekzka' nezczile' wnagake': "Goki bish' ljwello'na' na' bwiyi ben'ka' chakzi' chakzbangakile' li'." ⁴⁴ San nad' nia' le': Li' gaki ben'ka' chakzbangakile' le', li' inabi Chioza' gak wen che ben'ka' chsak'zi'gake' le'. ⁴⁵ Shi gonle ka', na'ch inezi ben' nakle xiin Xacho Chioza', beena' zoa yabana'. La' le' chone' ka chla' wbilla' lao ben' mal na' lao ben' wen, na' chone' ka chak yeja' lao ben' chon wen na' lao ben' chon mal. ⁴⁶ Na' shi to ben'ka' nllagzile chakile, aga bi zjanayin, la' ka'klen chon ben' wichixjka' ben'ka' chakile le ben' mal nakgake'. ⁴⁷ Na' shi to ben'ka' nllagzile chwaple chiox, ¿garan de dii wenna' chonle? La' ka'klen chon ben'ka' bi nombia'gake' Chioza'. ⁴⁸ Li' gak dowalj ben' li' ben' shao' ka nak Xacho Chioza' zoa yabana', nake' dowalj ben' li' ben' shao'.

6

Chiyal' gakencho ben'

¹ Bi wli' wzez chele ladj ben' nan nakle ben' wen. La' shi kwenzhezə ile'i benaan chonle daa nak wen, bibi laxjle gon Xacho Chioza', beena' zoa yabana'. ² Na' kat' chaklenle ben'ka' chyallj chchini, bi wzelen dill', ka chon ben' wxiye'ka' gana' chdop chllagcho chole'lwilcho Chioza', wa do yawi nez. Choe'gake' dill' che daa chongake' kwenzche we'la'o ben' legake'. Dii li' nia' le', daa chole'la'o ben' legake', lennan' laxje'ka'. ³ San le', kat' chole'le ben' bi dii chole'lene', bi gonlen ka ile'i ben'. Na' ni to ben' bi ye'lene' bin chonle. ⁴ San li' gaken ben' ka kono gakbe'i. Na' Xachona', beena' chen chle'i daa chonle, gone' laxjle.

Ka chiyal' we'lwilcho Chioza'
(Lc. 11:2-4)

⁵ 'Na' kat' chole'lwil-le Chioza', bi gonle ka ben' wxiye'ka'. Legake' chooll'gake' sechagake' we'lwilgake' Chioza' gana' chdop chllagcho chole'lwilchone' wa ga lle' lla' ben' kwenzche ile'gakile' ka chongake'. Dii li' nia' le', daa chle'i ben' ka chongake', lezannan' laxje'ka'. ⁶ San le', kat' we'lwil-le Chioza', li' yiyoo loo lill-lena' na' li' wsej puerta', na' li' we'lwil Xachona', beena' kono chle'i. Na'ch Xachona', beena' chen chle'i daa chonle, gone' laxjle.

⁷ Na' kat' chole'lwil-le Chioza' aga lilezi dill'ka' inale ka chon ben'ka' bi nombia'gake'ne', la' chakgakile' daa chole'gake' dill' zan na' wzenague' bin che'gake'ne'. ⁸ Bi gonle ka chongake', la' Xacho Chioza' ba nezczile' bi daa chyalljile ka zi' inablālen. ⁹ Kat' we'lwil-le Chioza', kin inale:
Xanto' Chios, ben' zoa yaba,

we'la'oshga yog'lol ben' li'.

¹⁰ Na' inabia'gacho' loo yichjlall'do' yog'lol ben',
kwenche gak lo yell-lioni ka chaklalloo, ka chak yabana'.

¹¹ Ka nak daa choṇo' cheej chaonto' yog' lla, bengachan naanlla.

¹² Wxi'xen chento', ka chon neto' chzi'xennto' bittezə dii choni ben' neto'.

¹³ Bi we'gacho' latj ibixnto' gonnto' daa bi nak wen, san bislagach neto' lo ni'a na' dii mala'.

La' lin' napo' yel' wṇabia', na' yel' wak, na' lin' chidoloo shoo balaan xen zejli kanī. Kan' nakan.

¹⁴ La' shi le' chzi'xenle che ben' shi bi chongakile' le', ka'kzə Xacho Chioza' zoa yabana' si'xene' chele. ¹⁵ San shi le' bi chzi'xen che ljwell-le, ka'kzə Chioza', beena' nak Xale, bi si'xene' dii malka' chonle.

Daa chiyal' goncho kat' zoacho wbas'

¹⁶ 'Kat' zoale wbas', bi gonzle cho'alaolena' nyesh' ka chon ben' wxiye'ka', la' legake' chon cho'alawe'ka' nyesh' kwenche gakbe'i ben' bi neej naogake'. Dii li nia' le', daa gakbe'i ben' daa chongake', lezannan' laxje'ka'. ¹⁷ San le', kat' soale wbas', li wpaa yichjlana' na' li chib li wxis cho'alaolena' ¹⁸ kwenche bi gakbe'i ben' nan zoale wbas'. San toz Xacho Chioza', beena' kono chle'i, ile'ile' daa chonle na' gone' laxje.

Yel' shawaa daa de yabana'

(Lc. 12:33-34)

¹⁹ 'Bi wtop wshagle yel' wni'ana' yell-lioni, la' bal diika' chaljan baka' chlliayi'gakban, na' balan chibia leyin na' chbiayi'gakan, wa choo wbanka' na' chkaagake'n. ²⁰ San li gon ka gat' yel' shao' chele yabana', la' daa de yabana' bi galjan bado' wlliayi'ban, ni bi yibia leyin, ni bi gak sho' wbanna' ikeen. ²¹ La' gana' de yel' shao' chelena', na'kzan se yichjlall'do'lana' wneyi.

Jalaochoki nakgakan beeni' che kwerp chechoni

(Lc. 11:34-36)

²² 'Jalaochoki nakgakan beeni' che kwerp chechoni. Shi jalaochoki chle'gakin kwaslol, doxen kwerp chechoni zoan lo beeni'na'. ²³ Per shi bi chle'i jalaochoki, kwerp chechoni zoan lo yel cholā'. Ka'kzan chak che yichjlall'do'choni. Shi bi chzenagcho che Chioza', ncholi yichjlall'do'choni.

Aga wak goncho yel' wni'ana' txen na' lekzka' gontecho Chioza' txen

(Lc. 16:13)

²⁴ 'Aga ga zoa to ben' wlane' xshin chop ben', la' wakzbanile' beena' to, na' gakchile' beena' sto, wa gone' xshin beena' to do yichj do lallee na' xshin beena' sto gone'n do ki do lallee. Na' ka'kzan chak checho len Chioza', aga wak goncho ka cheenile' shi we'techo latj inabia' yel' wni'ana' cho'.

Bi kwek yichjcho diika' chyalljicho

(Lc. 12:22-31)

²⁵ 'Daan nia' le': Bitek kwek yichjle daa yeej gaole kwenche ibanle, ni xalaanle. La' zak'techlā yel' mban chechona' aga ka daa cheej chaocho, na' zak'tech kwerp chechona' aga ka xalaanchona'. ²⁶ Li wwiakachi byindo'ka' chda xan yabana', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Xacho Chioza' zoa yabana' legakb. ¿Alechlin le', zak'techle aga ka bado'ka' ze lo llazə? ²⁷ Na' ni tole bi gak yischooch yel' mban chelena' zi shloll la'kzi nall inleeb ze le wneyi cheyin.

²⁸ 'Na' ¿biche chi' yichjzle xalaanlena'? Wwiakachile ka chgol yejdo'ka' ze lyixaa, len aga bi llin chongakan ni bi cholgakan do. ²⁹ Per nia' le', ni dii Salomónna', beena' wdapchga yel' shao'ka', bi bllin gak xe'na' xochi ka yejdo'ka'. ³⁰ Na' shi Chioza' none'

yejdo'ka' ze lyixaa xochi, la'kzi nakan de toldezə na'tech chtop ben' len na' chzeye'n, çalechla le', gontechle' wen chele gone' xalaanle la'kzi bitek chajle'le gaklene' le'? ³¹ Na' bi kwek yichjzle inazle: “¿Bin yeej gaocho?” wa “¿Nak goncho gat' xalaancho?” ³² La' ben'ka' bi nonlilall'gake' Chioza' to daazə chi' yichjgake'. Per Xachona', beena' zoa yabana', nezczile' chyalljile yog' diiki. ³³ Na' daa llialote chiyal' wzenagle che Chioza' kwenche inabi'e le', na' gonle kon daa cheenile', na' gonkze' yog' daa chyalljile. ³⁴ Bitek kwek yichjle shi wyaj wdele llaka' zi za' la' to to lla nsa' dii zed cheyin.

7

Bi chiyal' yiya yiyiljcho ben'

(Lc. 6:37-38, 41-42)

¹ Bi yiya yiyiljle ben', kwenche bi yiya yiyilj Chioza' le'. ² La' kon ka chiya chiyiljle ben', ka'kzan yiya yiyilj Chioza' le', na' kon ka gonile ben', ka'kzan goni Chioza' le'. ³ ¿Biche chwiazoz' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? ⁴ Shi bi chle'ilo' kwagaa yoo loo jalawo'na', çnakra gono' yoo bish' ljwello'na': “Benshki yibej' bicha' yoo loo jalawo'na'”? ⁵ ¿Ben' wxiye'! Zigaate bwia cho'na' na'tech wwio' che bish' ljwello'na'.

⁶ Na' bi gonzle byen we'lenle xtill' Chioza' ben'ka' bi chazlall'gake'n, kwenche ki gongakile' le' znia ka chon bekw'ka' chxoxj chtingakb kat' no chonlegakib. Ni bi we'lenle xtill' Chioza' ben'ka' bi cheengakile' wzenaggake'n kwenche ki wlej wshoshjgake' dillaa ka chon kushka' chlej chshoshjgakb daa bi choollall'gakb gaogakb.

Chiyal' inabicho Chioza' gaklene' cho'

(Lc. 11:9-13; 6:31)

⁷ Li inabi Chioza' bin cheenile na' gone'n. Li yiyilj daa cheenile na' yillelilen. Li inə cho'a puerta', na' wsalje'n. ⁸ La' beena' chnabile' ben' daa cheenile', we'kze'n; na' beena' chiyilje' daa cheenile', willelkzile'n; na' beena' chne cho'a puerta', wsaljczgake' sho'e.

⁹ Le' zoa xiinle, shi inabib' le' to yetxtil aga we'leb' to yaj. ¹⁰ Wa shi inabib' le' to bel yaa, aga we'leb' to bel znia. ¹¹ Shi le' naktele ben' mal chak we'le xiinleka' daa nak dii wen, çalechli Xacho Chioza' zoa yabana' ki gone' le' dii wen dii shawaa shi inabilene'n?

¹² Kon ka cheenile goni ben' le', ka'kzan chiyal' gonilene', la' kan' na leya' na' librka' bzej dii ben'ka' wdixjee daa goll Chioza' legake'.

Puert daa nak diido' yid

(Lc. 13:24)

¹³ Li gon byen sho'le cho'a puerta' daa nshop'. La' nlag' puerta' na' zlag' nak neza' daa zej gana' chbiayi' ben', na' ben' zan choogake'n. ¹⁴ Per ka nak neza' daa zej yabana' gana' lljazoalencho Chioza', nakan to nez les, na' to chopchga ben' chillelgakile'n.

Daa chbia lo yaga' chli'n bi yag daa

(Lc. 6:43-44)

¹⁵ Li wsak' kwenche bi shajle'le che ben'ka' chonz ka chyixjee daa che' Chioza' legake', na' chonz kwingake' ben' wen ben' gaxjlall', per ben' malzgakan na' chlliai'y'gake' ben', ka chon to ba znia. ¹⁶ Ka ile'ile ka nsa' chegake' na' gakbe'ile non nakgake'. La' nezczile aga wishibcho uvana' to lo yag yesh' na' lekzka' aga wishibcho yixwewa' to lo yag yesh' yaa. ¹⁷ Ka'kzan yag wenna' chbian dii wen, na' yaga' daa bi nak wen chbian dii bi nak wen. ¹⁸ La' yaga' daa nak dii wen aga wbian dii bi nak wen, na' yaga' daa bi nak dii wen aga wbian dii nak wen. ¹⁹ Yog' yag dii chbia dii bi nak wen, chchoggake'n na' chzeygake'n. ²⁰ Daan, wakbe'kzile ka nsa' che ben'ka'.

Aga yog' ben' yilline' yabana' gana' zoa Chioza' chnabi'e

(Lc. 13:25-27)

²¹ 'Aga yog' ben'ka' na nad': "Xan', Xan'", yillingake' yabana' gana' chnabia' Chioza', lete ben'ka' chongake' ka cheeni Xa' Chioza', beena' zoa yabana'. ²² Kat'ka' illin llana' yizia' kwent che ben', zangake' inagake' nad': "Xan', Xan', neto' wdixjeento' daa wno', na' kon yel' wak cho'na' bibejnto' dii xiw'ka' yoo ben' na' bennto' dii zan yel' wak." ²³ Na'ch yepgakee: "Biga bembia' le'. Li kwas ka'lə, le' ben' wen dii mal."

Chop ben' bengake' twejyoo
(Lc. 6:47-49; Mr. 1:22)

²⁴ 'Daan, nottez beena' chzenag cho'a xtilaani na' chone' ka nia', nake' ka to ben' sin', beena' ben lille'na' to lo yaj. ²⁵ Na' ka gok yejsiwaa, bgol yaoka', na' wzechga be'na' nan wllig'gakan yoonā', per bi billeen daa chi'cha leninna' lo yaja'. ²⁶ Per beena' cheni cho'a xtilaani na' bi chone' ka nia', nake' ka beena' bi chajni, beena' bxe lille'na' lo yoxa'. ²⁷ Na' ka gok yejsiwaa, bgol yaoka', na' wzechga be'na' na' bllig'gakan yoonā' na' wlliai'tekzan. ²⁸ Na' ka biyoll be' Jesúza' dillii, bibani ben'ka' ka chli' chsedile', ²⁹ daa bli' bsdile' legake' lega ben' za'len yel' wnabia', aga ka chli' chsedi ben'ka' chzajni legake' leya'.

8

Jesúza' biyone' to ben' che'i léprana'
(Mr. 1:40-45; Lc. 5:12-16)

¹ Na' ka biyetj Jesúza' lo yaana', ben' zan zinogake'ne'. ² Na' kwite'na' bllin to ben' che'ile' lepra', na'ch bchek' xibe' lawe'na', chi'ene':
—Xan', nezid' wak yikwaso' yillwe'ni chak' shel' guenilo'.
³ Na'ch Jesúza' bxoā neena' yichje'na', chi'ene':
—Cheenid'x. Na' naate yikwasa'n.
Na' kon ka golle' ka', lii biyakteyi beena'. ⁴ Na'ch che' Jesúza'ne':
—Ni to kono yoo ka nak daa ba ben' cho'. Lete wyaj lao bxoza' kwenche ile'ile' ba biyakilo', na' jwa' daa chiyal' lljoo lao Chioza' ka nllia dii Moiséza' bia' goncho kwenche inezi ben' ba biyakilo'.

Biyon Jesúza' xmos xan soldadka'
(Lc. 7:1-10)

⁵ Ka billin Jesúza' yell Capernaúma' lii bllinte to xan soldad lawe'na', na' got'yoile'ne', ⁶ chi'ene':
—Xan', xmosaa die' lillaa, na' net tlaa kwerp che'na' na' le chey chle'.
⁷ Na'ch che' Jesúza'ne':
—Na' sa' yiyonee.
⁸ Na' che' xan soldadka'ne':
—Xan', aga zakii nad' kwenche shoo loo yoo lillaa. Kon ben mandad yiyakile' na' wiyakkzile'. ⁹ Nia' ka' la' zoa ben' chnabia' nad', na' nad' lekzka' chnabia' soldad cha'ka'. Kat' chep' toe': "Wyaj ni", na' chaje'; na' kat' chep' stoe': "Da ni", na' chide'; na' kat' chizep' xmosaa: "Ben dga", na' chone'n.
¹⁰ Ka beni Jesúza' cho'a xtilleena', bibanile' na' chi'e ben'ka' nogake' le':
—Dii li nia' le', bigan' lljtia' to ben' Israel ben' gonlilallee nad' ka chonlilall' beeni nad'. ¹¹ Na' nad' nia' le', ben' zan ben' zaak doxen yell-lioni gonlilall'gake' nad' na' lljazoalengake' txen dii Abrahama', dii Isaaca' na' dii Jacoba' yabana' gana' chnabia' Chioza'. ¹² Na' ka nak ben'ka' wlej Chioza' nan lljazoagake' gana' chnabi'e, zane' wzalee gana' shgasj shchol, gana' kwellyesh'gake' na' gaoyaaaxaj leye'ka' daa le gakshejlall'gake', daa bi goongakile' inabi'e legake'.
¹³ Na'ch che' Jesúza' xan soldadka':
—Biyaj lillo'na', na' gak ka cheenilo' daa chajli'o cha'.
Na' lo lla lo gorzə biyaki xmose'na'.

Biyon Jesúza' tobiin che Pédróna'
(Mr. 1:29-31; Lc. 4:38-39)

¹⁴ Na'ch wyaj Jesúza' lill Pédróna', na' ble'ile' de tobiin che'na' yo'e dii lana'. ¹⁵ Na' bex' Jesúza' neena' na' bicheje' dii lana'. Na' lii wyastie' bene' dii wdaogake'.

Jesúza' biyone' zan ben'ka' bi shao'
(Mr. 1:32-34; Lc. 4:40-41)

¹⁶ Na'ch ka ba chxoá wbillá, jwa'gake' ben' zan gana' zoa Jesúza', ben' yoo dii xiw'ka', na' shcho'azə dillaa bi'e bichejgakan. Na' lekzka' biyone' yog' ben' bi shao'. ¹⁷ Gok ka' kwenche gok ka' wna dii Isaíaza', beena' wdixjee daa goll Chioza'ne', daa wne': "Le' bikee yillwe'ka' che'icho na' bene' ka bigaa yel' chey chla chechona'."

Ben'ka' cheengakile' ljanogake' Jesúza'
(Lc. 9:57-62)

¹⁸ Na' ka ble'i Jesúza' ben' zan inleeb ba nechjgake'ne', bene' mandad telene' ben'ka' nakgake'ne' txen shlaa nisdona'lə. ¹⁹ Na' wbig' to ben' chli' chsedi leya', chi'ene':

—Maestro, cheenid' sa'len' li' gattezə shajo'.

²⁰ Na'ch che' Jesúza'ne':

—Bez'ka' nongakb yech ga chiyoogakb, na' byindo'ka' non lilldo'gakb, san nad', Ben' Bsel' Chioza' Yell-lioni, bibi lill' de.

²¹ Na' bchej sto ben' nake' Jesúza' txen na' chi'ene':

—Xan', wza'len' li' gattezə shajo' ka yiyoll guet xa'na'.

²² Na'ch goll Jesúza'ne':

—Da, dino nad'. Wikwash'kzə ljwell ben' wetka'.

Jesúza' bkweze' be'na' lo nisdona'
(Mr. 4:35-41; Lc. 8:22-25)

²³ Na'ch wyoo Jesúza' loo barkwa' len ben'ka' ba nakgake'ne' txen. ²⁴ Na' shlak zej barkwa' wtese'. Na' wzolo wzechga be'na' lo nisdona', na' wzolo chas chataan na' biyoll nisa' loo barkwa'. ²⁵ Na'ch ben'ka' nak Jesúza' txen jasangake'ne', na' che'gake':

—jXan', bisla cho'! jBa chbe'cho yel!

²⁶ Na'ch che' Jesúza':

—¿Berache chlleblikzle? ¿Biche bi nxenilall'le nad' kwaslo?

Na'ch wyase' bsheshlene' be'na' len nisdona', na' wlezkakan. ²⁷ Na' ben'ka' lle'len Jesúza' loo barkwa' bibangakile' ka bene', na'ch che' ljwellgake':

—¿Noran nak beeni, lla? Axt be'na' na' nisdona' chzenaggakan che'.

Chop ben' Gadara yoogake' dii xiwaa
(Mr. 5:1-20; Lc. 8:26-39)

²⁸ Na' ka bllin Jesúza' yell-liona' mbani Gadárana' daa lia shlaa nisdona', chop ben' yoogake' dii xiw'ka' bchejgake' loo kapsanta' jatilgake'ne'. Na' daa le zniagake' aga no chak te lo neza' chde gana' zoagake'. ²⁹ Na' besyaagakan che'gakan Jesúza':

—¿Biche za'zo' gani zoanto', Jesús, Xiin Chios? ¿Aba za'zelo' zidsak'zi'o neto' la'kzi bin' illin lla sak'zi'nto'?

³⁰ Na' gaoz lle' ba zan kush chaogakb. ³¹ Na'ch got'yoi dii xiw'ka' Jesúza', che'gakan le':

—Shi yibejo' neto' loo yichjlall'do' ben'ki, we'gacho' latj yiyoonto' kushka'.

³² Na'ch goll Jesúza' legakan:

—Wakkzan. Li yiyoo shka'.

Na'ch bichej dii xiw'ka' na' biyoogakan kushka', na' kushka' lii bxonjtegakb na' jabixgakb to cho'a yaa na' bxoptegakb loo nisdona' na' wche'gakb yel.

³³ Na'ch ben'ka' chap kushka' bixonjdogake', na' ka billingake' lalle'ka' gollgake' ben' yellka' doxen ka gok che ben'ka' yoo dii xiw'ka'. ³⁴ Na'ch wza' yog' ben' yellka' zjatilgake' Jesúza', na' ka ble'gakile'ne' got'yogakile'ne' yiyaje' gan yoblə.

9

Jesúza' biyone' to ben' net tlaa kwerp che'na'

(Mr. 2:1-12; Lc. 5:17-26)

¹ Na' biyoo Jesúza' to loo barkw, na'ch bilag'gake' shlaa nisdona' na' billine' yell che'na' gana' wzee. ² Na' bllinlengake' to ben' net ni'a neena' lawe'na', nxoagake'ne' to lo daa. Na' gokbe'i Jesúza' le nonlilall'gake'ne', na'ch golle' ben' we'na':

—Btiplaloo, xiin', ba biyakxen xto'loona'.

³ Na'ch bal ben'ka' chli' chsedi leya' che' ljjwellgake': “Ba chonz kwin beeni ka Chioza' daa ne' ka'.” ⁴ Na' gokbe'i Jesúza' daa wza'lall'gake', na' chi'e legake':

—¿Bi'che chza'lall'zle ka'? ⁵ ¿Achakile chyalljchid' yel' wak xench yep' beeni: “Ba bizi'xen' saaxya cho'na'”, ka daa yepée: “Biyas na' bigoo nez”? ⁶ Na' wliid' le', nad', Ben' Bsel' Chioza', nap' yel' wñabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

—Biyas, bitob daa cho'na', na' biyaj lillo'na'.

⁷ Na'ch biyas beena' net ni'a neena' na' ziyaje' lille'na'. ⁸ Na' ka ble'i ben'ka' ka gok, bibangakile', na' be'la'ogake' Chioza' daa bi'e yel' wak xenna' to ben' yell-lío.

Wlej Jesúza' Matewa' kwenche gone'ne' txen

(Mr. 2:13-17; Lc. 5:27-32)

⁹ Ka biza' Jesúza' na', ble'ile' to ben' wichixj, lie' Mateo, chi'e gana' chchixje'. Na' chi'ene':

—Da, dino nad'.

Na'ch lii wzolla'te Matewa' janoe'ne'.

¹⁰ Na' shlak chi' Jesúza' lill Matewa', bllin ben' zan wichixjka' na' zan ben' zeyi cheyi bi nsa' chegake' wen, wche'gake' cho'a mesa' wdaolengake' Jesúza' len ben'ka' nakgake'ne' txen. ¹¹ Na'ch ka ble'i fariseoka' chaolen Jesúza' ben'ka', na'ch wñabgakile' ben'ka' nakgake'ne' txen, che'gake':

—¿Bi'che chaolenz maestro cheleni ben' wichixjki len ben'ki bi nsa' cheyin wen?

¹² Na' beni Jesúza' daa goll fariseoka', na'ch chi'e legake':

—Aga ben'ka' shawaan chyalljgakile' wen rmecha' san ben'ka' bi shawaan chyalljgakile'ne'. ¹³ Li yiyaj na' li lljased bin zeji Cho'a Xtil' Chioza' gana' nan: “Nad' cheenchid' yiyeshii ljjwell-le, aga ka daa witle bayix'ka' kwenche we'la'ole nad'.” Aga bid' ni che ben'ka' nak ben' li ben' shao', san bid' ni che ben' saaxyaka'.

Wñabgakile' Jesúza' bi'che bi chzoa ben'ka' nakgake'ne' txen wbas'

(Mr. 2:18-22; Lc. 5:33-39)

¹⁴ Na'ch ben'ka' nak Juanna' txen jabig'gake' kwit Jesúza' na' wñabgakile'ne' che'gake':

—Neto' na' fariseoka' zeyi chento' chzoanto' wbas'. Na' ¿bi'che ben'ka' nakgake' li' txen bi chzoagake' wbas'?

¹⁵ Na'ch che' Jesúza' legake':

—Kat' chak to wishagna' ben'ka' chdi'a chllag lill ben' byona' aga chdagake' nyesh', san cheej chaogake'. Na' ka'kzan ben'ki nakgake' nad' txen, cheej chaogake' naa zoalen' legake', per wllin lla wkwas ben' nad' kwite'ka', kana'chan soagake' wbasaa.

¹⁶ Ni to kono chida' lat' lech' kob lee lech' gola', la' kat' shechan na' yibe' lech' koba' na' wsho'chan dii gola' na' gana' nlló' gakchan dii xench. ¹⁷ Na' aga no chгаа vino daa zi' bchejte loo yid gola', la' wchez' yid gola' na' laljə vinona', na' ka vinona' ka yida' kwiayi'gakan. San chiyal' shall vino daa zi' bchejte loo yid koba' kwenche ni ton bi kwiayi'.

Jesúza' biyone' xiin' Jairona' len noola' jexee xe'na'

(Mr. 5:21-43; Lc. 8:40-56)

¹⁸ Na' ni choe'te Jesúza' dill', ka bllin to beṇ' wṇabia' na' bḥek' xibe'na' lao Jesúza', chi'ene':

—Shintg wit to bi' nool cha'; per shi li' sa'gacho' na' wḥoa noona'b' na' yibam'.

¹⁹ Na'ch lii wzolla'te Jesúza' zejlene' beṇ'ka' nakgake'ne' txen lill beṇ' wṇabia'na'. ²⁰ Na' ka zejgake' lill beṇ' wṇabia'na' jano to noolə legake', na' ba gok shllin yiz chzoe' wbaa. Na'ch wbiguee koll' Jesúza' beḥee xe'na', ²¹ la' chakile': “Kon shel' ba beḥaa xe'na' wiyakkzid'.” ²² Na' biyeḥj Jesúza' na' ka ble'ile' noola' chi'ene':

—Btiplaloo, xiin', ba biyakilo' daa chonlilaloo nad'.

Na' lii biyakteyi noola'.

²³ Na' ka bllin Jesúza' lill beṇ' wṇabia'na' ba lle' beṇ'ka' chkwel bllaja' na' beṇ' zan ba chosyaagake' chbellgake'. ²⁴ Na'ch che' Jesúza' beṇ'ka':

—Li yillesh ni. Aga witba'n san cheszbaan.

Per bxill-ligake'ne'. ²⁵ Na' ben Jesúza' byen billeshgake', na' wyo'e na' beḥee na' bi' nool weta' na' lii biyasteb'. ²⁶ Na' yog' yellka' llia gaoz wze dill' daa bene'.

Biyon Jesúza' chop beṇ' lchol

²⁷ Na' ka biza' Jesúza', chop beṇ' lchol janogake'ne'. Na' chosyaagake' zilljə che'gake':

—iBiyesh'lall'gachi neto', xiin' dia che dii Daví!

²⁸ Ka biyoo Jesúza' loo yoona', beṇ' lcholka' jabig'gake' kwite'na'. Na'ch che' Jesúza' legake':

—¿Achajle'le wak gon' ka ile'ile?

Na'ch goll beṇ' lcholka'ne':

—Awe, Xannto', wak gono' ka ile'into'.

²⁹ Na'ch beḥ' Jesúza' jalawe'ka' na' golle' legake':

—Daa chonlilall'le nad' na' gak ka cheenile.

³⁰ Na'ch bile'gakile'. Na' Jesúza' golle' legake':

—Li gon byen kono ye'le ka'.

³¹ Per ka biza'gake' kwite'na' lii wzolotegake' choe'gake' dill' doxen gana' mbani yella' daa ben Jesúza' chegake'.

Biyon Jesúza' to beṇ' bi chak ine

³² Shlak chiza' beṇ'ka' gok beṇ' lchol, bllin beṇ' yoblə lao Jesúza' nche'gake' to beṇ' bi chak ine daa yo'e dii xiwaa. ³³ Na' kon ka bibej Jesúza' dii xiwaa yoo beena' na' binie'. Na' bibani beṇ'ka' lle' na', nagake':

—Ni shlin bin' ile'icho yell Israeli to yel' wak ka dga ba ben beeni.

³⁴ Per fariseoka' che'gake':

—Beeni chibeje' dii xiw'ka' kon yel' wak che daa chṇabia' legakan.

Chyallj beṇ' zan gongake' xshin Chioza'

³⁵ Na' wda Jesúza' yog' yellka', ka yell xen ka yelldo', chli' chsedile' to to gana' chdop chllag beṇ' Israelka' choe'lwillgake' Chioza'. Wdixje'ile' legake' dill' wen dill' kob che yel' wṇabia' che Chioza' na' biyone' beṇ' che'i bittezə yillwe'. ³⁶ Na' ble'i Jesúza' beṇ' zan zejlengake'ne' na' biyeshile' legake', la' gokbe'ile' ka nyesh'lazan chak chegake', ka xil' ba kono xanin zoa. ³⁷ Na'ch golle' beṇ'ka' nakgake'ne' txen:

—Dii li nia' le', beṇ'ka' zi' gonlilall'gake' Chioza' zaklebgakile' to dii wlliachga to lo yell-lío, na' chyallj no yizi' yilapan, per to chopchga wen llinka' zoa. ³⁸ Na' li inabi Xancho Chioza' wzanche' beṇ'ka' wtopgake' beṇ'ka' gonlilall'gake'ne'.

10

Jesúza' wleje' shllin beṇ'ka' gakgake' postl che'
(Mr. 3:13-19; Lc. 6:12-16)

¹ Na'ch biti'a Jesúza' beñ'ka' shllin wleje' na' bi'e legake' yel' wñabia' kwenche gak yibejgake' dii xiw'ka' yoo beñ', na' yiyongake' beñ' che'i bittezə yillwe'.

² Na' kin le postlka' shllin: zigaate wleje' Simónna', beena' lekzka' che'gake' Pedro, len beñ' bishee Andréza', na'tech Jacóbona' len beñ' bishee Juanna', beñ'ka' nak xiin Zebedewa', ³ na'ch Felípena', Bartoloména', Tomáza', Mateo, beñ' wichixja', Jacobo xiin Alfewa', Tadewa', ⁴ Simón, beena' bsi'gake' Zelote, na' Jud Scariota', beena' bene' Jesúza' lo na' beñ' malka'.

Bsel' Jesúza' postlka' shllin je'gake' cho'a xtill' Chioza'
(Mr. 6:7-13; Lc. 9:1-6)

⁵ Na'ch bsel' Jesúza' beñ'ka' shllin je'gake' cho'a xtill' Chioza', na' chi'e legake':

—Bi shajle yellka' gana' zoa beñ'ka' bi nak beñ' Israel, ni bi shajle yellka' lia gana' mbani Samáriana'. ⁶ San li shaj gana' lle' beñ' Israelka', beñ'ka' nak ka xil' ba wnit. ⁷ Li shaj li lljtixjee ba zoa gaoshosh inabia' Chioza' beena' zoa yabana' loo yichjlall'do' beñ'. ⁸ Li yiyon beñ'ka' bi shao' na' beñ'ka' che'i lepra, li yisban beñ' ba wit, na' li yibej dii xiw'ka' yoo beñ'. Na' ka beñ' Chioza', bene' le' yel' waka' ka'z, ka'kzan le' bibi wchixjle yiyonle beñ'.

⁹ Na' bi wa'le mech de or, de plat ni de cobre. ¹⁰ Na' ni bi gal'le no yixj les, ni bi gox'le zi shkwe' xale, ni zi shkwe' xel-le, ni bi gox'le yag bar, la' to wen llin chidolee yeej gawe'.

¹¹ Na' kat' illinle to to yell xen wa yeldo'zə, chiljle to beñ' nsa' che' wen, na' yigaanle lille'na' na' na'tezə soale ax̄t ka illinch lla yiza'le. ¹² Na' ka sho'le lille'na' ye'lene': "Chioza' wzoe' le' mbalaz." ¹³ Na' shi dii li beñ'ka' lle' na' nakgake' beñ' wen, wakkzə daa ye'le legake'; san shi bi nakgake' beñ' wen, na' aga wakan. ¹⁴ Na' gattezə illinle shi kono wleb le' na' ni bi wzenaggake' chele, na' yiza'le lill beena' wa yella' gana' gongakile' le' ka' na' yishible bishtena' lia ni'aleka'. ¹⁵ Dii li nia' le', kat' illin lla wchoglo Chioza' che beñ', yel' zak'zi' xench ile'chi beñ' yellka' gana' gongakile' le' ka' aga ka beñ' yell Sodómana' na' yell Gomórrana'.

Yel' zak'zi'ka' yen ile'i beñ'ka' nak Jesucristona' txen

¹⁶ Nad' chselaa le' ka xildo' ladj ba zniaka'. Na' chiyał' gake beñ' sin' na' beñ' wen. ¹⁷ Wsak'gale, la' wchey beñ' lljwee le' lao beñ'ka' chñabia' na' wit chingake' le' gana' chdop chllagcho choe'lwilcho Chioza'. ¹⁸ Na' lljwa'gake' le' lao beñ' wñabia' xenka' daa chonlilall'le nad', na' ka' gak we'lenle legake' cho'a xtillaana' na' ka'kzə beñ'ka' bi nakgake' beñ' Israel. ¹⁹ Na' kat' gongake' le' lo na' beñ'ka', bi sele wñeyi naklə inale wa bi inale, la' ka gal' inele, Chioza' wxoe' dillaa cho'a lol'leka'. ²⁰ La' aga len' inele, san Espíritu che Xacho Chiozan' gone' ka inele.

²¹ Beena' zoa beñ' bishee leteze' gone'ne' lo na' beñ'ka' witgake'ne', na' beena' zoa xiine' gone'b' lo na' beñ' wite'b'. Na' soa beñ' yizoshi'e xaxneena' na' gone' legake' lo na' beñ'ka' witgake' legake'. ²² Yog'lol beñ' gatzbangakile' le' daa nonlilall'le nad', per beena' so sakile' bittezə daa yen ile'ile' ax̄t kat' guete', beenan' gat' yel' mban che' zejli kani. ²³ Shi to yell yilaggake' le', li yiyaj yell yoblə. La' dii li nia' le' bilan' yiyoll tale yog'lol yellki mbani Israeli kat' illin lla yiyed' nad', Beñ' Bsel' Chioza'.

²⁴ To beñ' chsed aga zak'che' ka beena' chli' chsedi le', na' ka'kzə to wen llin aga zak'che' ka xane'na'. ²⁵ Na' beena' ni chsed yibaile' gake' ka beena' chli' chsedi le', na' ka'kzə wen llinna', yibaile' gake' ka xane'na'. Nad' nak' xanle, na' shi nagake' cha' non' txen dii xiwaa daa le Bezlo, ¿alelə ki inagake' chele ka'?

¿Non chiyał' illebcho?
(Lc. 12:2-9)

²⁶ Bi illeble beñ'ka' biya dii wchi' wsak'gake' le'. La' daa kono nezi naa, wllin lla ila'lawin, na' aga ga de to dii ngash' dii bi illin lla ila'lawin. ²⁷ Diika' chli' chsedid' le' do ngash'zə, li we'n dill' ladj lkwe' beñ'. Na' diika' nia' le' to le'zə, li wzenin yog'lol beñ'. ²⁸ Bi illeble

ben'ka' cheengakile' witgake' le', la' kwerp chele na'zan witgake', aga bi gak gongakile' yichjlall'do'lena'. San Chiozan' chiya'l illeble, la' len' wakə wlliyee kwerp chelena' len yichjlall'do'lena' lo yi' gabila'.

²⁹ 'La'kzi wak si'cho chop byindo' kon to sintabdo', ni tob bi guet shi Xacho Chioza' bi wi'e latj. ³⁰ Na' ka nakle le', axt yish' yichjlana' nabe'. ³¹ Daan bi chiya'l illeble, la' zak'ch le' aga ka ba zan byindo'ka'.

Ben'ka' chchebgake' lao ben' nan nombia'gake' Jesúza'

(Lc. 12:8-9)

³² 'Beena' we' dill' lao ben' ine' nake' nad' txen, ka'kzə nad' yep' Xa'na' zoa yabana' nake' nad' txen. ³³ Na' beena' bi chcheb lao ben' nan nake' nad' txen, ka'kzə nad' yep' Xa'na' zoa yabana' bi nake' nad' txen.

Ni che Jesúza' gak ben' choplə

(Lc. 12:51-53; 14:26-27)

³⁴ 'Bi gakzile bid' lo yell-lioni kwenche gon' ka soalen ljwell ben' mbalaz. Aga daan bid', san bid' kwenche wxia' wdil. ³⁵ Daa bid' na' yidil-len ben' byona' xe'na' na' noola' yidil-lene' xneena', na' beena' zoa xoolille' yidil-lene' le'. ³⁶ Na' ben'ka' zoa toz yoo gakzbani ljwelle'.

³⁷ 'Beena' chakchile' xe'na' wa xneena' aga ka nad', bi chidolee gake' nad' txen, na' ka'kzə shi chaktechile' xiine'na' ka nad', lekzka' bi chidolee gake' nad' txen. ³⁸ Beena' bi chzani yel' mban che'na' yen ile'ile' bittezə kwenche gone' ka nia', bi chidolee gake' nad' txen. ³⁹ Na' beena' chakile' shel' kono wchi' wsak' le', beenan' kwiayee. San beena' chzani yel' mban che'na' yen ile'ile' bittez daa nonlilallee nad', beenan' gat' to yel' mban che' zejli kani.

Ben'ka' soagake' mbalaz yabana'

(Mr. 9:41)

⁴⁰ 'Beena' wlebe' le', nad'kzan chlebe'. Na' beena' wlebe' nad' lekzka' Chioza', beena' bsel' nadaan, chlebe'. ⁴¹ Beena' wlebe' to ben' chyixjee daa che' Chioza'ne', lenkzen' ikee ka laxj beena' chyixjee daa che' Chioza'ne'. Na' lekzka' beena' wlebe' to ben' chone' daa nak shli daa chibaile' nake' ben' li ben' shao', lekzka' lene'n ikee ka laxj beena' chon daa nak shli. ⁴² Na' beena' we' la'ch' lat' nis yeej ben'ki nakgake' nad' txen, dii li nia' le', de laxje'.

11

¹ Na' ka biyoll goll Jesúza' ben'ka' shllin bin chiya'l gongake', na'ch bizee na', na' jali jasedile' ben' na' jtixje'ile' legake' cho'a xtill' Chioza' yellka' llia gana' mbani Galileana'.

Ben'ka' bsel' Juana' wicho' nisa'

(Lc. 7:18-35)

² Na' Juanna' beena' chchoa ben' nisa', ba die' lillyana'. Ka wnezile' daa chon Crístona', na'ch bselee chop ben'ka' nakgake'ne' txen gana' zoe'. ³ Na' janabgakile'ne' che'gake':

—¿Alin' beena' ba llia bia' yid'?, ¿anti chiya'l kweznto' sto ben' yoblə?

⁴ Na'ch che' Jesúza' legake':

—Li yiyaj na' li lljayell Juanna' daa chenile nia' na' daa chle'ile chon'. ⁵ Li lljayelle' chon' ka chle'i ben' lcholka', na' chiza' ben'ka' bi chak sa', na' chiyaki ben'ka' che'i lepra, na' chiyeni ben' kwellka', na' chisban' ben'ka' ba wit, na' chyixje'id' ben' yesh'ka' dill' wen dill' kob che Chioza'. ⁶ Chakomba beena' chajle' cha' na' bi chakchoplallee.

⁷ Na' ka biza' ben'ka' bsel' Juanna', na'ch wzolo Jesúza' be'lene' ben'ka' lle' na' xtill' Juanna', chi'e legake':

—¿Nakran nsa' che beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e? ⁸ Shi bi nakan ka', ¿nakran nak beena' jawiale? ¿Ato

ben' nakw xalaane' dii le nakə? Bi nakan ka'. La' nezkzile ben'ka' nakw xalaangake' dii le nak zoagake' loo yoo lill ben' wñabia'ka'. ⁹ ¿Nakrakzan nak beena' jawiale? ¿Ato ben' chyixjee daa che' Chioza'ne'? Dii li kan' chone', na' chontechle' ka ben'ka' chyixjee daa che' Chioza' legake'. ¹⁰ La' che beenin cho'e Cho'a Xtill' Chioza' dill' daa nan:

Wselaa beena' kwialo lawo'na',

na' chixji'e xtilloona' kwenche soa ben' wzenaggake' cho' kat' illino'.

¹¹ Dii li nia' le', ladj yog' ben' yell-lioki, ni toe' bin' ichej gake' ben' zak'chi' aga ka Juanna' beena' chchoa ben' nisa'. Per nottezə beena' choe' latj inabia' Chioza' yichjlall'do'ena', zak'teche' aga ka Juanna'.

¹² 'Kon ka wzolo Juanna' bchoe' ben' nisa' axt naanlla, zoa ben' chsej chllongake' kono wleb yel' wñabia' che Chioza'*. ¹³ Librka' daa bzej dii ben'ka' wdixjee daa goll Chioza' legake' na' leya' bzej dii Moiséza' wdixjeegakan che yel' wñabia' che Chioza', na' lekzannan' cho'e Juanna' dill' naa blee. ¹⁴ Na' shi cheenile shajle'le dga nia' le', lekzen' Elíaza', beena' nagake' yid kwenche chixji'e cho'a xtill' Chioza'. ¹⁵ Ka le' chenile dga nia', li sen wneyi.

¹⁶ ¿Bera ka wsaklebid' le' mbanle naa? Le' chonle ka bi'do'ka' lle' gana' chak yaana' na' chosyaagakb' che' ljjwellb': ¹⁷ "Bkwellnto' bbleja' na' bi byaale, na' belnto' daa chon nyesh' na' ni bi wchellkzle." ¹⁸ La' Juanna' bi weej wdawe' dii wen dii shao', na' wñagake' che': "Dii xiwaan yo'e." ¹⁹ Na'ch wdena' bid' nad' nak' Ben' Bsel' Chioza' Yell-lioni, na' cheej chaw', na' nagake' nak' to ben' waoxat na' to weezo, na' lekzka' nagake' non' txen ben' wen dii malka' na' ben' wichixjka'. Per yel' sin' che Chioza' chli'lawin ka chsa' che ben'ka' chzenaggake' che'.

Yellka' gana' bi bzenaggake' che Jesúza'

(Lc. 10:13-15)

²⁰ Na'ch wzolo Jesúza' bsheshlene' ben' yellka' gana' bli'che' yel' waka', daa bi biyaj bilengakile' xtoleeka'. Na' wne':

²¹ —iNyesh'laz gak chele, le' ben' yell Corazín! iNyesh'laz gak chele, le' ben' yell Betsaida! La' shel' ben'ka' lle' yell Tírona' na' yell Sidónna' ble'gakile' yel' wakka' ba ble'ile, lii biyaj bilenteljagakile' xtoleeka', na' gokwljagake' lech' zeshaa na' bllaagake' dena' yichje'ka' daa le gokyesh'gakile', shel'ka'. ²² Na' daa bi biyaj bilenile, ba nia' le', llana' wchoglo Chioza' che ben', dii walch sak'zi'le aga ka ben' Tíroka' na' ben' Sidónka'. ²³ Na' le' ben' Capernaúm, ¿achakile willinle yabana'? Aga willinle na', san latj gana' sak'zi'len yillinle. La' shel' ben' Sodómaka' ble'gakile' yel' wakka' daa ba ble'ile, balja biyaj bilengakile' saaxya che'ka' na' ni ndia yella', shel'ka'. ²⁴ Daan nia' le', kat' illin lla wchoglo Chioza' che ben', dii walch sak'zi'le aga ka ben' Sodómaka'.

Mbalaz soa ben'ka' gonlilall'gake' Jesúza'

(Lc. 10:21-22)

²⁵ Na' lo gora' wne Jesúza', chi'e:

—Xa, li' nako' xan yabana' na' yell-lioni, choe'lawaa li' daa bkwashilo' ben' sin'ka' diika' ba bliilo' ben'ka' bibi chajni. ²⁶ Beno' ka', Xa, la' kan' wyazlaloo.

²⁷ Na'ch goll Jesúza' ben'ka':

—Xa'na' bene' lall' na' yog'lol' daa chon'. Na' ni to kono nombia'yen' nad' lete Xa'na', na' lekzka' kono nombia'yen' Xa'na' lete nad' nak' Xiine' len ben'ka' cheenid' gon' ka gombia'gake'ne'. ²⁸ Li gonlilall' nad', yog'le le' ba chjshiaile na' nakle ka ben' ntakw nchej to dii zii dii zshab, na' nad' gon' ka yizi'lall'le. ²⁹ Li gon ka nia', na' li wzenag daa chzajniid' le', la' nad' nak' ben' gaxjlall' na' gon' ka gat' yel' wixi'lall' chele. ³⁰ Daa nia' le' gonle aga nakan dii bi gak gonle, na' daa chli' chsedid' le' bi nakan dii bi so sakile.

* **11:12** Zoa ben' chsej chllongake' kono wleb yel' wñabia' che Chioza': dga nakan to dii lallj. Lekzka' bal ben'ka' nsed nagake' versiculoni zejjin: zoa ben' chongake' axt ga zeelo chakgake' kwenche inabia' Chioza' legake'.

12

Ben'ka' nak Jesúza' txen wdishjgake' trígona' llana' chombaangake'
(Mr. 2:23-28; Lc. 6:1-5)

¹ To lla sabd, llana' chombaan ben' Israelka', wdelen Jesúza' ben'ka' nakgake'ne' txen to ga naz to ben' trígona', na' ben'ka' zejlengake'ne' wzolo wdishjgake' trígona' na' wdaogake'n. ² Na' ka ble'i fariseoka' daa chon ben'ka', na'ch che'gake'ne':

—Bwia ka chon ben'ki nakgake' li' txen, chongake' daa bi chiyał' goncho llani chom-
baancho.

³ Na'ch che' Jesúza' legake':

—¿Abin' wlable ka ben dii Davina' len ben'ka' nakgake'ne' txen ka wdongake'? ⁴ Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bꝑozka' de lsens gaogake'. ⁵ ¿Abin' wlable leya' gana' nan aga bi xya nakan che bꝑozka' la'kzi chongake' llinna' loo yoodo'na' llaka' chombaanchcho? ⁶ Na' nia' le', ladjleni zoa to ben' zak'che' aga ka yoodo'na'. ⁷ Bilja wyajniile bi zeji Cho'a Xtill' Chioza' daa na: “Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'.” La' shel' le' wyajniilen, aga waole xya che ben' bi nap dol', shel'ka'. ⁸ Nad', Ben' Bsel' Chioza' Yell-lioni, chꝑabi'a lao llani chombaanchcho.

Jesúza' biyone' to ben' llana' chombaan ben' Israelka'
(Mr. 3:1-6; Lc. 6:6-11)

⁹ Na'ch biza' Jesúza' latja', na' biyaje' gana' chdop chllag ben' Israelka' choe'łwillgake' Chioza'. ¹⁰ Na' ladj ben'ka' len to ben' net tlaa neena'. Na' fariseoka' chwiagake' nakla ka si' sengake' kwenche gaogake' xya che Jesúza', na'ch wꝑabgakile'ne', che'gake':

—¿Beran na leya'? ¿Ade lsens yiyoncho to ben' bi shao' llani chombaanchcho?

¹¹ Na'ch che' Jesúza' legake':

—Shi nole zoa to xil' chele na' ixopb to loo yech llaki chombaanchcho, ¿abi yibejleb? ¹² Na' jzak'techlæ benecha' aga ka xilaa! Daan de lsens goncho daa nak wen llaki chombaanchcho.

¹³ Na'ch golle' beena' net tlaa neena':

—Bli noona'.

Na' ka bli neena' lii biyakten ka nak daa zi shlaa. ¹⁴ Na' ka biza' fariseoka' gana' chdop chllaggake', be'gake' dill' nak sho' xꝑezi witgake' Jesúza'.

Daa wna dii Isaíaza' che Jesúza'

¹⁵ Ka gokbe'i Jesúza' daa cheengakile' gongake', na' bizee ziyaje' gan yoblæ. Na' ben' zan inleeb janoe'ne' na' biyone' yog' ben'ka' bi shao'. ¹⁶ Na' golle' ben'ka' biyone' bi we'gake' dill' daa chone'. ¹⁷ Daa bene' ka', billinin ka wna dii Isaíaza', beena' wdixjee daa goll Chioza'ne', kana' wne':

¹⁸ Beenin nake' wen llin cha', beena' ba wlej',
na' le chakidee na' chazlallaa ka chone'.
Na' wzoa' Espíritu cha'na' loo yichjlall'do'ena',
na' chixje'ile' ben'ka' lle' yell-lioni ka cheenid' gongake'.

¹⁹ Bi gakdil-lene' ben',
na' ni bi gosyee wi'e dill' yawi nez.

²⁰ Aga wisyoll wistoe' chishje' yaxtila' daa ba chashjæ.
na' aga wisole' mesha' daa ba chiyol,
axt ki gone' gan wli'lao yel' li yel' shao' che'na'.

²¹ Na' ben' lle' doxen yell-lioni gongake' lez len' gaklene' legake'.

Nagake' che Jesúza' chibeje' dii xiw'ka' kon yel' wak cheyinna'
(Mr. 3:19-30; Lc. 11:14-23; 12:10)

²² Jwa'gake' lao Jesúza' to ben' yo'e dii xiw' na' bi chle'ile' ni bi chak inie'. Na' bibej Jesúza' dii xiwaa yo'e, na' bile'ile' na' gokte binie'. ²³ Yog'lol ben'ka' bibangakile' ka nak daa bene', na' chisne':

—¿Aaga beenin xiin dia che dii Davina', beena' chbezcho, lla?

²⁴ Ka beni fariseoka' dillaa choe' ben'ka', na' che'gake':

—Aga bi yel' wak nap beeni. San yel' wak che Bezlona',* daa chnabia' dii xiw'ka'zan, chibejile' diika'.

²⁵ Na' gokbe'i Jesúza' daa chza'lall' fariseoka', na'ch chi'e legake':

—Shi gana' chnabia' to ben' na' tilgake' to lezgake' na' gakgake' choplə, na' kwiayi' gana' chnabi'e, na' ka'kzə shi to yell wa ben' lle' toz yoo gakgake' choplə aga wdiagake'. ²⁶ Ka'kzə Satanáza', shi yibej ljwell dii xiwiinka' yoo ben', aga wdia yel' wnabia' cheyinna', shel'ka', la' to lezgakannan' chidil-len kwingakin. ²⁷ Le' nale chibej' dii xiwaa yoo ben' kon yel' wak che Bezlona'† daa chnabia' legakan. ¿Shera ben'ka' nakle txen? ¿Alezkka' lennan' chibejlengake' dii xiw'ka' yoo ben'? Daa bi nakan ka', na' chli'n nakllejile. ²⁸ Na' shi nad' chibej' dii xiw'ka' kon yel' wak che Espíritu che Chioza' zejin ladjleni ba bla' yel' wnabia' che Chioza'.

²⁹ 'Aga no gak sho' lill to ben' wal na' kwane' dii de che' shi bi wcheje'ne' zigaate. Na'chan gak kwane' lille'na'.

³⁰ 'Beena' bi chone' nad' txen, len' chakzbanile' nad'; na' beena' bi chaklene' nad' kwenche wzenag ben' che Chioza', len' chsej chlone' wzenaggake'.

³¹ 'Na' nia' le', wizi'xen Chioza' yog' saaxya chelena' na' yog'te dii mala' daa chbell chnele, san shi inele zban che Espíritu Sántona' na' cheyi diika' chone', aga wizi'xen Chioza' chele. ³² Na' shi no ine cha', nad', Ben' Bsel' Chioza' Yell-lioni, lekzka' wizi'xen Chioza' che', san beena' ine che Espíritu Sántona', aga wizi'xene' che' naa zoe' yell-lioni ni kat' illin llana' wchogloe' che ben'.

*Kon ka nak yaga', ka'te nak daa chbian
(Lc. 6:43-45)*

³³ 'Nezicho yaga' daa nak wen chbian dii wen, na' yaga' daa bi nak wen aga bi dii wen chbian. Kon ka nak yaga', ka'te nak daa chbian. ³⁴ ¿Le' ben' wen dii mal! ¿Nakra gonle inele daa nak dii wen daa nakle ben' mal? La' yog' dill' daa chchej cho'a lol'chona' za'n loo yichjlall'do'chona'. ³⁵ Beena' nak ben' wen cho'e dill' wen, daa yoo dii wenna' loo yichjlall'do'ena'; na' beena' nak ben' michian bi cho'e dill' yejni'alallii, daa yoo dii michianna' loo yichjlall'do'ena'. ³⁶ Na' nad' nia' le', kat' illin lla yizi' Chioza' kwent che yog' ben', kanan' yidele kwent che yog'te dill'ka' kontele wnele. ³⁷ La' shi le' choe'le dill' wen, na'ch ina Chioza' bibi dol' naple; per shi le' bi choe'le dill' wen, na' wchogloe' chele sak'zi'le.

*Wnabi ben' malka' Jesúza' wli'e to yel' wak
(Mr. 8:12; Lc. 11:29-32)*

³⁸ Na'ch bal' fariseoka' na' ben'ka' chli' chsedi leya' che'gake' Jesúza':

—Maestro, cheeninto' ile'into' gono' to yel' wak kwenche gakbe'into' shi Chiozan' bselee li'.

³⁹ Na' che' Jesúza' legake':

—Le' nakle ben' mal na' ben' bi chzenag che Chioza' chnable ile'ile' yel' waka' kwenche wli'n shi Chiozan' bselee nad', per aga wliid' le' daa cheenile. Lete ile'ile' to dii nak ka yel' wak daa ben Chioza' che dii Jonáza'. ⁴⁰ La' Jonáza' wyo'e shonə lla shonə yel loo lee bel xenna', na' ka'kzə nad', Ben' Bsel' Chioza' Yell-lioni, shon lla shon yel igaana' loo bana'.

⁴¹ Kat' illin lla wchoglo Chioza' che ben' yell-lioni, kanan' dii ben' Níniveka' gaogake' xya chele, le' zoale naa, la' legake' biyaj bileni saaxya che'ka' kana' wdixje'i dii Jonáza' legake'

* **12:24** Bezlo: lezkannan' Beelzebú de xtil na' nakan sto le Satanáza'. † **12:27** Bezlo: lezkannan' Beelzebú de xtil na' nakan sto le Satanáza'.

cho'a xtill' Chioza'. Na' nad', zak'techid' aga ka dii Jonáza' na' bi chzenagle cha'. ⁴² Na' lekzka' llana' kat' wchoglo Chioza' che ben' yell-lioni, noola' wñabia' yellka' lle' do lli'lə gawe' xya chele, le' zoale naa, la' len' wzee zit' nllēb bidzenague' dill' sin' daa wñe dii Salomónna'. Na' nad', zak'techid' aga ka dii Salomónna' na' bi chzenagle cha'.

Dii xiwaa daa chiyoo ben'

(Lc. 11:24-26)

⁴³ 'Kat' chichej dii xiwaa yoo ben', na' chdan gana' bibi chashj chleb chyiljan gana' yizi'lalliin. Na' kat' bi chllelin gana' yizi'lalliin, ⁴⁴ na'ch chakin: "Yiyaach' dii yoblə gana' bichejkz'." Na' kat' yillinan gana' bichejan, nakan ka to yoo desh dii nxi nloa. ⁴⁵ Na'ch lljaxi'n zi gall dii xiw'ka' nakch dii malch aga ka len, na' sho'gakan beena'. Na' gaktech mal che beena' aga ka gok che' dii nech. Ka'kzan gak che ben' malka' lle' naa.

Bllin xna' Jesúza' len ben' bisheeka' gana' zoe'

(Mr. 3:31-35; Lc. 8:19-21)

⁴⁶ Ni choe'lente Jesúza' ben'ka' dillaa ka bllin xneena' len ben' bisheeka' goklall'gake' wshaljlangake'ne' na' wzegake' lesh' chyoonaa'. ⁴⁷ Na' goll to ben' Jesúza':

—Xñoona' len ben' bishooka' zegake' lesh' chyoonaa' cheengakile' wshaljlangake' li'.

⁴⁸ Na' che' Jesúza' beena' golle'ne' ka':

—¿Noran xna'na' na' noran ben' bishaaka'?

⁴⁹ Na'ch bli'e ben'ka' nakgake'ne' txen na' chi'e:

—Ben'kin xna'na' na' ben' bishaaka'. ⁵⁰ La' nottezə beena' chon ka cheeni Xa'na' zoa yabana', beenan' nake' ben' bishaa, ben' zan' na' xna'.

13

Jempl che to ben' goz goon

(Mr. 4:1-9; Lc. 8:4-8)

¹ Na' lo llana'tezə wza' Jesúza' yoonaa' gana' zoe' na' jchi'e cho'a nisdona'. ² Na' daa bdop ben' zan gana' chi'e, na' wyepe' jshie' to loo barkw. Na' yog' ben'ka' bdop bllag wzegake' cho'a nisdona'zə. ³ Na'ch bseese zan jemplka' kwenche bli' bsdile' legake', chi'e:

—To ben' goz goon wzee zeje' goza'. ⁴ Na' ka zej chzalee binna', bxop balan cho'a neza' na' bllin byinka' wdaogakban. ⁵ Na' zi balan bxop ladj yajka' gana' bitek chi' yona', na' lobe' bilaan daa bi wyazan zitj. ⁶ Na' ka wña'n wbillaa', bkwedan na' wbillten daa bitek bde loinna'. ⁷ Na' zi balan bxop ladj yag yesh'ka', na' bgol yag yesh'ka' na' bi be'gakan latj igolgakan. ⁸ Na' zi balan bxop lo yo wenna', na' wllia chgan. Balan wllia to guiyoo, na' zi balan wllia guiyon na' zi balan wllia shichoa. ⁹ Ka le' chenile dga nia', li sen wñeyi.

Jesúza' bzajniile' biche chzoe' jemplka'

(Mr. 4:10-12; Lc. 8:9-10)

¹⁰ Na' ben'ka' nak Jesúza' txen jabig'gake' kwite'na', wñabgakile'ne':

—¿Biche chseeso jemplka' kat' chli' chsedilo' ben'?

¹¹ Na' che' Jesúza' legake':

—Chioza' cho'e latj inezile ka nak yel' wñabia' che'na' daa kono nezi. Na' ben'ka' bi nak nad' txen, bi cho'e latj inezgakile'n. ¹² La' beena' ze wñeyi shajniile' Cho'a Xtill' Chioza', zizikli shajni'chile'n. Na' beena' bi se wñeyi shajniile'n, na' gal-lallee daa ba wyajniile' lat'. ¹³ Daan chseesaa jemplka' kat' chzajniid' legake'. La' ben'ka' chwiategake' na' bi chakbe'gakile' bin zeji daa chon', na' chengakile' daa chña' na' bi chajni'gakile' bin zejin, daa bi chajle'gake' cha'. ¹⁴ Na' daa chongake' ka', chillinin ka wna dii Isaíaza' ka wdixji'e daa goll Chioza'ne', daa na:

La'kzi yengakile', aga wyajni'gakile' bi zeji daa yengakile'.

Na' la'kzi ile'gakile', aga wakbe'gakile' bi zeji daa ile'gakile'.

¹⁵ La' yichjlall'do'eka' nchol nntin,

na' chongake' ka beṅ' ndap naguin
 na' ka beṅ' nshod' jalawin.
 Shel' bi chongake' ka', na' shajni'gakile' daa chzajniid' legake'
 na' chazan loo yichjlall'do'eka'
 na' yiyaj yilengakile' dii malka' chongake',
 na' yiyongakee sto beṅ' wen.

¹⁶ 'Per chakomba le' chakbe'ile bi zeji diika' chle'ile chon' na' chajniile diika' chli' chsedid'. ¹⁷ Dii li nia' le', zan dii beṅ'ka' wdixjee daa goll Chioza' legake' na' zan dii beṅ'ka' bsa' cheyin wen lao Chioza' goklall'gake' ile'gakile' ka dga chle'ile naa, na' bi ble'gakile'n. Na' goklall'gake' yengakile' ka dga chenile naa na' bi bengakile'n.

Bizajni Jesúza' legake' bi zeji jempl che beṅ' goz goona'
 (Mr. 4:13-20; Lc. 8:11-15)

¹⁸ 'Li wzenag bin zeji jempl che beṅ' goz goona'. ¹⁹ Beena' cheni cho'a xtill' Chioza' daa chzajniin le' che yel' wṅabia' che'na', na' bi chajniile'n, nake' ka cho'a neza' gana' bxop binna' daa wdao byindo'ka', la' dii xiwaa chikwasan cho'a xtill' Chioza' daa wyoo loo yichjlall'do'ena'. ²⁰ Na' beena' cheni cho'a xtill' Chioza' na' le' chibaile' chlebe'n, nake' ka ladj yajka' gana' bxop binna' ²¹ daa bitek bi loin bde na' bi bdian. La' kat' bi chak che' wa chchi' chsak' beṅ' le' ni che cho'a xtill' Chioza', na' lii chbejte yichje'n. ²² Na' beena' cheni cho'a xtill' Chioza' per chi' yichje' diika' chak che' na' chzelall'tie' yel' wni'ana', na' chsej chllongakan gon xshin cho'a xtill' Chioza' lo yel' mban che'na'. Beenan' nake' ka daa bla' ladj yag yesh'ka' daa bi be'gakan latj igolan. ²³ Per beena' cheni cho'a xtill' Chioza' na' chajniile'n na' chone' ka nan, nake' ka yo wenna' gana' bxop binna', na' balan wllian to guiyoa, balan do guiyon, na' zi balan wllian shichoa.

Jempl che yixaa daa bla' ladj trígona'

²⁴ Na' bsees' Jesúza' sto jempl, chi'e legake':

—Yel' wṅabia' che Chioza' nakan ka to beṅ' goze' bin wenna' lo yell-lío che'na'. ²⁵ Per wal chela' shlak chese', wyaj to beṅ' chakzbanile'ne' jeze' ladj trígona' daa nak xenin, na' ka biyoll bene' ka' bizee. ²⁶ Na' ka bgol trígona' na' wllian, na' lekzka' bgolte xeninna' ladjinna'. ²⁷ Na' wyaj wen llinka' jellgake' xaninna': “Beṅ'do', ¿aaga bin wenna' jezo' lo cho'na'? ¿Gara wza' xeninna' lenzan ladjinna', lla?” ²⁸ Na' che' xaninna' legake': “Nochod' beṅ' chakzbanile' nad' jene' ka'.” Na' goll wen llinka' le': “¿Acheenilo' shajnto' lljalall'nto'n?” ²⁹ Na' chi'e legake': “Bi lljalall'len, la' nxoll lente trígona' wllall'le. ³⁰ San igol-lenchan trígona', na' kat' illin lla yichoggake'n, na' yep' beṅ'ka' zigaate yilall'gake' xeninna' na' gongake'n shlen wej kwenche sheyan, na'tech yitopgake' trígona' na' yigooshaogake'n loo lillinna'.”

Jempl che sa mostásana'

(Mr. 4:30-32; Lc. 13:18-19)

³¹ Na' lekzka' bzoa Jesúza' sto jempl, chi'e:

—Yel' wṅabia' che Chioza' nakan ka sa mostásana' daa goz to beṅ' lo yell-lío che'na'. ³² La'kzi sa mostásana' nakan liizelozi diido' yid lao bichlæ sa yix' kwan, kat' chla'n na' chgolan na' chakan dii xench aga ka yix' kwanka' sto, na' axt byindo'ka' chon lillbka' lo xozinna'.

Jempl che levadúrana'

(Lc. 13:20-21)

³³ Na' lekzka' bzoe' sto jempl, chi'e:

—Yel' wṅabia' che Chioza' nakan ka levadúrana' daa chchix to noolæ shona rob yezja' kwenche yisgolan kwa che yetxtila'.

Jesúza' bchine' jemplka'
(Mr. 4:33-34)

³⁴ Jesúza' toshiizi bchine' jemplka' ka bi'e dill' ladj lao lkwe' ben'. ³⁵ Na' daa ben Jesúza' ka', billinin daa wdixjee to ben' daa goll Chioza'ne', ka wne':
Wchin' jemplka' ka we'len' ben' dill'.
We'len' ben' dill' cheyi daa konon' inezi dezd kana' bxe bsilte Chioza' yell-lioni.

Bizajnií Jesúza' bi zeji jempl che yixaa daa bla' ladj trígona'

³⁶ Na' bisa' Jesúza' ben'ka' lle' na', na' biyo'e loo yooná'. Na' ben'ka' nakgake'ne' txen jabig'gake' kwite'na' che'gake'ne':

—Bizajnií neto' bi zeji jempl che xen trígona'

³⁷ Na' goll Jesúza' legake':

—Kin zejin: Nad', Ben' Bsel' Chioza' Yell-lioni, zaklebid' beena' goz trígona'. ³⁸ Na' doxen yell-lioni zaklebin gana' goz beena' trígona'. Na' ben'ka' choe'gake' latj chnabia' Chioza' yichjlall'do'eka' zaklebgakile' trígona'. Na' ben'ka' choe'gake' latj chnabia' dii xiwaa yichjlall'do'eka' zaklebgakile' xen trígona'. ³⁹ Na' dii xiwaa zaklebin ben' mala', beena' jez ladj trígona' daa nak xenin. Na' llana' chilapgake', zaklebin llana' kwiayi' yell-lioni. Na' anjlka' zaklebgakile' ben'ka' chizi' chilap trígona'. ⁴⁰ Na' ka chitopgake' daa nak xen trígona' kwenche wzeygake'n, ka'kzan gak che ben'ka' chnabia' dii xiwaa yichjlall'do'eka' ka illin lla kwiayi' yell-lioni. ⁴¹ Nad', Ben' Bsel' Chioza' Yell-lioni, wselaa anjl cha'ka' kwenche yitopgake' ben' wen dii malka' na' ben'ka' chzechgake' ben' yoblə gongake' dii mala'. ⁴² Na' wzal'gake' legake' lo yi' gabila' gana' kwellyesh'gake' na' gaoxaxj leye'ka' daa le gakshejlall'gake'. ⁴³ Na' ben' li ben' shao'ka' sho'gake' balaan choo balaan xen yabana' gana' chnabia' Xacho Chioza'. Ka le' chenile dga nia', li sen wneyi.

Jempl che mecha' ngash'

⁴⁴ Yel' wnabia' che Chioza' nakan ka to mech xen dii ngash' to lo yell-lío che ben' gana' to ben' jadi'en. Na' na'tezə bikwasheen, na' chibaile' jayet' jadie' yog' dii de che' kwenche bizi'e yell-liona' gana' ngash' mecha'.

Jempl che to perla dii zak'chga

⁴⁵ Yel' wnabia' che Chioza' zaklebin to ben' chone' delgens che perla dii zak'chga. ⁴⁶ Na' ka bllelile' to dii liizelozi zakii, na'ch jayet' jadie' yog' dii de che' kwenche wxi'en.

Jempl che yixj che bela'

⁴⁷ Yel' wnabia' che Chioza' zaklebin to yixj che bel. Ben'ka' chzen bela' chzal'gake' yixja' loo nisdona' na' chzenan zan kwen bel. ⁴⁸ Na' kat' chilla' yixja' na' chibegake'n cho'a nisdona' na' chbe'gake' chibegake' belka' nak wen na' chgooshao'gake'b to loo llom, na' baka' bi nak wen, chchoongake'b. ⁴⁹ Kan' gak che benecha' ka illin lla kwiayi' yell-lioni. Anjlka' yibegake' ben' wenka' ladj ben' malka', ⁵⁰ na' wzal'gake' ben' malka' lo yi' gabila' na' kwellyesh'gake' na' gaoxaxj leye'ka' daa le gakshejlall'gake'.

Dii koba' na' dii gola'

⁵¹ Na'ch che' Jesúza' ben'ka' nakgake'ne' txen:

—¿Azajniile yog' daa ba bli' bsedid' le'?

Na'ch che'gake'ne':

—Awe, zajniinto'n.

⁵² Na' chi'e legake':

—Beena' chli' chsedi leya' na' nzedile' che yel' wnabia' che Chios, beena' zoa yabana', zaklebile' to xan yoo ben' ngooshawee dii zan dii zakii, ka dii kob na' ka dii gol, na' chbeje'gakan chchine'gakan.

Jesúza' biyaje' Nazareta'
(Mr. 6:1-6; Lc. 4:16-30)

⁵³ Ka biyoll bsees' Jesúza' jemplka', na' bizee. ⁵⁴ Na' ka billine' yell Nazareta' gana' bgole', na' bli' bsdile' beṅ' Israelka' chdop chllag gana' choe'lwíllgake' Chioza'. Na' bibani beṅ'ka', che'gake':

—¿Gara jxi' beeni yeḷ' sin' che'na', na' nak chak chone' yeḷ' wakka'? ⁵⁵ ¿Aaga xiin karpintera'zan na' xneena' lie' María? Na' ¿aaga beṅ' bishee Jacóbona', Joséna', Simónna' na' Júdaza'? ⁵⁶ Na' beṅ' zane'ka' zoagake' lallchoni. ¿Gara jasede' yog'loḷ diiki chli' chsedile', lla?

⁵⁷ Na' daa bi wyajle'gake' che' Jesúza', na' golle' legake':

—To beṅ' chyixjee daa che' Chioza'ne', gattez chgoogake'ne' balaan san lall lille'na' aga no chgoo le' balaan.

⁵⁸ Na' aga bitek yeḷ' wak beṅ' Jesúza' yell Nazareta' daa bi wyajle'gake' che'.

14

Betgake' Juanna', beena' bchoa beṅ' nisa'

(Mr. 6:14-29; Lc. 9:7-9)

¹ Na' do kana', Heródeza', beena' chṅabia' gana' mbani Galileana', benile' ka nak daa chon Jesúza'. ² Na' golle' beṅ'ka' chon xshine'na':

—Beenan' dii Juanna', beena' bchoa beṅ' nisa'. Ba bibane' ladj beṅ' wetka', daan chak chone' yeḷ' wakka'.

³ La' kana' ni mban dii Juanna', Heródeza' bselee beṅ' bex'gake'ne' na' wloogake'ne' lillyana' ni che' Herodíaza' xool beṅ' bisheena', beena' le Felipe. ⁴ La' dii Juanna' golle' Heródeza':

—Bi nakan wen nkoo xool beṅ' bishoona'.

⁵ Na' daa golle'ne' ka' goklall' Heródeza' wite'ne', per bi biyaxjile' daa bllebe' beṅ'ka' chajle' daa nak Juanna' to beṅ' chyixjee daa che' Chioza'ne'. ⁶ Per ka wya'i Heródeza' yiz, bi' nool wew' che' Herodíaza' byaab' lao beṅ'ka' lle' lṅina'. Na' daa le biyoolallii Heródeza' ka byaab' ⁷ axṭ bzoe' Chioza' de taschiw bchebe' wi'eb' bittezə dii inabib' le'. ⁸ Na' kon ka bzajnii xna'baab' bem', na' che'b' Heródeza':

—Yichj Juanna', beena' chchoa beṅ' nisa', cheenid' goṅo'n nad' to lo plat llilj.

⁹ Na' gokyeshii Heródeza', per daa ba bcheble' lao yog' beṅ'ka' goxe' lṅina' wi'eb' kon daa inabib' le', benshaze' byen we'gake'b' daa wṅabb'. ¹⁰ Na' bselee beṅ' jachoggake' yichj Juanna' loo lillyana'. ¹¹ Na' bliagake'n to lo plat llilj na' be'gake'n bi' nool wewaa na' be'baan xna'baa.

¹² Na'ch beṅ'ka' wdalen Juanna' txen wyajgake' jaxi'gake' kwerp che'na' na' bkwash'gake'n. Na' wdena' jellgake' Jesúza' ka gok.

Jesúza' bwawe' gayaa mil beṅ'

(Mr. 6:30-44; Lc. 9:10-17; Jn. 6:1-14)

¹³ Na' ka wṅezi Jesúza' daa gok che' Juanna', bizee gana' zoe' na' biyo'e to loo barkw ziyaje' gana' kono beṅ' lle'. Na' ka wṅezi beṅ'ka' lle' yellka' llii gaozə cho'a nisdona' galan zej Jesúza', na'ch wloogake' nez janogake'ne'. ¹⁴ Na' ka bichej Jesúza' loo barkwa', ble'ile' beṅ' zan inleeb ba lle' na', na' biyeshile' legake' na' biyone' beṅ'ka' bi shao'. ¹⁵ Na' ka ba wlle', na'ch beṅ'ka' nak Jesúza' txen jabig'gake' kwite'na', che'gake'ne':

—Ba wlle' naa, na' gani lle'cho kono zoa wit' dii gaocho. Goll beṅ'ki yiyajgake' yellka' llii gaozə kwenche' lljxi'gake' dii gaogake'.

¹⁶ Na' che' Jesúza' legake':

—Bi chonan byen yiyajgake'. Len', li we' dii gaogake'.

¹⁷ Na' che'gake'ne':

—Gay'chga yetxtil na' zi chopchga beḷ' noa'nto' ni.

¹⁸ Na' che' Jesúza' legake':

—Li goṅshkin ni.

¹⁹ Na'ch golle' beṅ'ka' kwe'gake' lo yixa'. Na' bexee yetxtilka' gay' na' bel'ka' chop na' blis lawe'na' yabana' na' bi'e Chioza' yel' choṅken. Na'ch bxoxje' yetxtilka' na' bi'en beṅ'ka' nakgake'ne' txen kwenṅche be'gake' che che beṅ'ka'. ²⁰ Na' wdao yog'loḷ beṅ'ka' aṅt ka beljgakile'. Na' ka bidaogake', na'ch bitopgake' diika' bgaan, na' biyakan shllin' xet'. ²¹ Na' beṅ' byoka' wdao gokgake' ka do gayaa mil, na' bi blabgake' noolka' na' bi'do'ka' wdao.

Jesúza' wzee lo nido'na'
(Mr. 6:45-52; Jn. 6:16-21)

²² Ka wde dga bigoo Jesúza' beṅ'ka' nakgake'ne' txen to loo barkw kwenṅche yilag'gake' shlaa nido'na' to lezgake', na' le' bigaane' kwenṅche bisee beṅ'ka' bdop bllag. ²³ Na' wde bisee beṅ'ka', na'ch wyepe' to lo yaa kwenṅche jelwille' Chioza' toze'. Na' ni zetie' lo yaana' ka goḷ. ²⁴ Na' barkwa' gana' ziyoo beṅ'ka' nakgake'ne' txen ba zejan gchol' nido'na'. Chakan to ki to ka'lə daa chas chat' nisa', na' be'na' bi cho'en latj yiyajan shlich. ²⁵ Na' zbalz biyetj Jesúza' lo yaana' na' bizee tlo nido'na' zeje' gana' zejlagake'. ²⁶ Na' ka ble'i beṅ'ka' non Jesúza' txen zeje' tlo nisa', le bllbegake' na' aṅt besyaagake', nagake':

—iBa za' to yel bṅen!

²⁷ Na' lii wṅete Jesúza' legake', chi'e:

—Bi illeble. Nad'kzan'.

²⁸ Na'ch wṅe Pédrona' chi'e:

—Ḳan', shi lin', ben ka gak saa lo nisi kwenṅche yid' kwito'na'.

²⁹ Na' che' Jesúza'ne':

—Dashka'.

Na'ch bchej Pédrona' loo barkwa' na' wzoloe' chzee tlo nisa' nan shaje' kwit Jesúza'.

³⁰ Per ka gokbe'ile' zechga be'na', na' bllbe' na' lii wzolote chbi'e yel, na'ch besyee chi'e:

—iḲan', bisla nad'!

³¹ Na' lii biyoṅ'te Jesúza' neena', chi'ene':

—¿Berache gokṅopzilo'? ¿Biṅche bi nṅenilalloo nad' kwasloḷ?

³² Na' kon ka biyoogake' loo barkwa' na' bgan be'na'. ³³ Na' beṅ'ka' bgaan loo barkwa', be'la'ogake' Jesúza' na' gollgake':

—Dii li, lin' Xiin Chioza'.

Jesúza' biyone' beṅ'ka' bi shao' gana' mbani Genesareta'
(Mr. 6:53-56)

³⁴ Na' ka blag'gake' shlaa nido'na' na' bllingake' gana' mbani Genesareta'. ³⁵ Na' beṅ' Genesaretk' biyombia'gake' Jesúza' na'ch bzengakile' beṅ' yellka' lle' gao nan ba bllin Jesúza'. Na' jwa'gake' yog' beṅ'ka' bi shao' lawe'na', ³⁶ na' got'yogakile'ne' wi'e latj la'ch' goṅ' beṅ' we'ka' xe'na', na' yog' beṅ'ka' bex'gake'n biyakgakile'.

15

Daa chxinj yichjlall'do' beṅecha'
(Mr. 7:1-23)

¹ Bal fariseoka' na' beṅ'ka' chli' chsedi leya', wza'gake' Jerusalenna' na' wyajgake' lao Jesúza', wṅabgakile'ne':

² —¿Biṅche beṅ'ki nakgake' li' txen bi chongake' ka wyoolo dii xozxto'choka'? La' bi chixis chiyib neeka' ka zi' gaogake'.

³ Na' wṅabi Jesúza' legake' chi'e:

—¿Biṅche chyishjle daa nllia Chioza' bia' gonle na' zechle wṅeyi chonle ka ben dii xozxto'choka'? ⁴ La' kin wna Chioza': “Li gap xaxṅa'le balaan”, na' “Beena' ine zban che xe'na' wa xṅeena', chiyal' guete'.” ⁵ Per le', nale wak ye' beṅ' xaxṅeena': “Bi gak gaklen' le', la' yog' daa nap' ba nṅheb' wi'an Chioza'.” ⁶ Na' beena' yee xaxṅeena' ka', cho'allalene' daa nale bi chonan byen gaklene' legake'. Na' daa chonle ka', chonile daa nllia Chioza'

bia' goncho ka to dii bibi zakii kwenche nole diika' wyoolo dii xozxto'choka'. ⁷ ;Le' ben' wxiye', le' wen gan! Kwaslōl inleeb be' dii Isaíaza' xtill'le, ka wne':

⁸ Ben'ki choe'la'ogake' nad' de cho'a lol'zgake',

la' aga do yichj do lall'gaken' choe'la'ogake' nad'.

⁹ Bibi zjanayin chonzgake' ka ben' choe'la'o nad';

na' diika' chli' chsedgakile' nakgakan che ben' yell-lioz.

¹⁰ Na' wne Jesúza' ben'ka' lle' na', golle' legake':

—Li wzenag dga inia' le' na' li shajniin. ¹¹ Aga daa cheej chao benaan chxinj chlenan yichjlall'do'ena', san dill'ka' chchej cho'enan', lennan' chxinj chlenan yichjlall'do'ena'.

¹² Na'ch ben'ka' nak Jesúza' txen wbig'gake' kwite'na', gollgake'ne':

—¿Azakbe'ilo' gokzi'chgayi fariseoka' ka bengakile' wno' ka'?

¹³ Na'ch goll Jesúza' legake':

—Nottezə ben' bi chzenague' che Xa'na' zoa yabana', yiyol yinite', na' gak che' ka chak che to yag dii chlall' ben' do loyin. ¹⁴ Jwayishazi fariseoka', la' nnit ncholgakilen'. Na' nezicho shi to ben' lchol wchi'e sto ljwell lcholé', choptie' ljabix.

¹⁵ Na'ch Pédróna' golle' Jesúza':

—Bizajni neto' bi zejin jempla' daa ba bseesoo.

¹⁶ Na'ch goll Jesúza' legake':

—¿Alezkka' lenle bin' shajniile bi zejin daa ba wnia'? ¹⁷ ¿Abi nezile nan daa cheej chaocho chjche'n loo leechona' na'tech chiden? ¹⁸ Per ka nak daa chnecho, lennan' chalj chxen loo yichjlall'do'chona'. Na' shi chnecho dii bi nak wen, lennan' chxinj chlenan cho'.

¹⁹ La' loo yichjlall'do' benechan' chalj chxe diiki bi nak wen: yel' chon xya, yel' chnelen ljwellin, yel' wban, yel' chyiljall' che ben', na' yel' chbell chne che ben'. ²⁰ Diikin chxinjan yichjlall'do' ben', aga daa bi chixis chiyib neena' ka zi' gawen'.

To noolə bi nak ben' Israel ben'ilallee Jesúza'

(Mr. 7:24-30)

²¹ Na' biza' Jesúza' wyaje' gana' mbani yell Tírona' len yell Sidónna'. ²² Na' to noolə cananea zoe' gana' mbani yellka' wbigue' kwite'na' na' wnie' zilljə, chi'ene':

—Xan', Xiin dia che dii Daví, biyesh'lall'gachi nad', la' bi' nool cha'na' yoob' dii xiwaa na' le chsak'zi'n leb'.

²³ Per Jesúza' bikzə bi golle' noola'. Na'ch ben'ka' nakgake'ne' txen wbig'gake' kwite'na' gollgake'ne':

—Goll nooli yiyaje', la' kon chosyee zidnoe' cho'.

²⁴ Na'ch goll Jesúza':

—Bsel' Chioza' nad' kwenche gaklen' to ben' Israelka'zə, ben'ka' nak ka xil'ka' wnit.

²⁵ Na'ch noola' jabigee kwit Jesúza' na' bchek' xibe'na' lawe'na' chi'ene':

—;Xan', goklengach nad'!

²⁶ Na'ch che' Jesúza'ne':

—Bi nakan wen yikaacho yel' wawa' chao bi'do' chechoka' na' we'chon bekw'ka'.

²⁷ Na'ch noola' chi'ene':

—Lekzilo', Xan', per chak chao xikw'choka' diika' chxop lo yona'.

²⁸ Na'ch goll Jesúza'ne':

—;Noolə, nonlilall'likzo' nad'! Na' gak ka cheenilo'.

Na' katena' lii biyakteyi bi' nool che'na'.

Jesúza' biyone' ben' zan

²⁹ Na' biza' Jesúza' na', na' billine' cho'a nido' che Galileana' na' wyepé' to lo yaa jchi'e.

³⁰ Na' ben' zan bllin lawe'na' nche'gake' no ben' bi chak sa', no ben' lchol, no ben' bi chak ine, no ben' nxinj, no ben' chak bichlə yillwe'. Na' bzoagake' legake' lao Jesúza' na' biyone' legake'. ³¹ Na' hibani ben'ka' ka gok, la' ben'ka' bi chak ine wnegake', na' ben'ka'

nxinj biyagkake', na' ben'ka' bi chak sa' wza'gake', na' ben' l'cholka' ble'gake'. Na'ch yog'lol ben'ka' be'la'ogake' Chios, beena' choe'la'o ben' Israelka'.

Jesúza' bwawe' tapa mil ben'

(Mr. 8:1-10)

³² Na'ch gox Jesúza' ben'ka' nakgake'ne' txen, na' golle' legake':

—Le chiyeshid' ben'ki, la' ba gok shon' lla zoalengake' cho' ni, na' aga bi de dii gaogake'. Na' bi cheenid' yisangakee daa bin' gaogake', la' nxoll ikwidgake' tneza'.

³³ Na' che' ben'ka' nakgake'ne' txen:

—Per ¿ga lljxi' cho dii gao yog'lol ben'ki?, la' gani lle'cho kono zoa wit' dii gaocho.

³⁴ Na'ch wñabi Jesúza' legake', chi'e:

—¿Zi bal'chga yetxtil' chechoka' de?

Na' che'gake'ne':

—De gall yetxtilka' na' sto chop bel.

³⁵ Na'ch goll Jesúza' ben'ka' kwe'gake' lo yona'. ³⁶ Na' bexee yetxtilka' gall na' belka' na' bi'e Chioza' yel' choxken, na' bxoxje'n bi'en ben'ka' nakgake'ne' txen kwenche be'gake' che che ben'ka'. ³⁷ Na' yoguee wdao ax't ka beljgake'. Na' wdena' bitopgake' dii lao'ka' bichoonan, gokten zi gall xet'. ³⁸ Na' ben' byoka' wdao nakgake' tapa mil, na' bi blabgake' noolka' ni bi'do'ka' wdao. ³⁹ Na' biyoll bisa' Jesúza' legake', biyo'e to loo barkw len ben'ka' nakgake'ne' txen na' biyajgake' gana' mbani yell Magdálana'.

16

Fariseoka' na' saduceoka' wñabgake' Jesúza' gone' to yel' wak

(Mr. 8:11-13; Lc. 12:54-56)

¹ Fariseoka' len saduceoka' jawiagake' Jesúza' na' wñabgake'ne' gone' to yel' wak dii ile'gake' kwenche wli'n shi Chiozan' bseleene'. ² Na' goll Jesúza' legake':

—Shlle'na' chwiale xan yabana' na' nale: “Le yillaa wx'e, la' le nlatjcha.” ³ Na' shi chibe'cha shzila' na' nale: “Wak yeja' la' ba bibe'cha.” Le' chakbe'ile shi gak zey' wa gak yej daa chwiale ka nak xan yabana', per aga chakbe'ile bin zeji diika' chon Chioza' llaki zoacho naa. ⁴ Le' nakle ben' mal na' ben' bi chzenag che Chioza', chñable ile'ile' to yel' wak kwenche wli'n shi Chioza' bselee nad', per bi wliid' le' daa chñable. Lete ile'ile sto yel' wak ka daa ben Chioza' che dii Jonáza'.

Na' wde goll Jesúza' legake' ka', na' bizee kwite'ka' ziyaje'.

Dill' wxiye' che fariseoka' zaklebin levadúrana'

(Mr. 8:14-21)

⁵ Na' ka bllingake' shlaa nido'na', ben'ka' nakgake'ne' txen gol-lall'gake' wa'gake' yetxtila'. ⁶ Na' goll Jesúza' legake':

—Wsak'gale bi shajle'le dill' wxiye' che fariseoka' na' saduceoka', daa zaklebi levadúrana'.

⁷ Na' che' ljwellgake':

—Daa gol-lall'cho wa'cho yetxtilan' ne' cho' ka'.

⁸ Na' gokbe'i Jesúza' daa che' ljwellgake' na' golle' legake':

—¿Biche nazle bibi yetxtila' bia'le? ¿Biche bi nxenilall'le nad' kwas'lo? ⁹ ¿Abikzan' shajniile ka nak diika' chon'? ¿Abi chjadinile kana' wdao gayaa mil ben' kon gay'zə yetxtilka' na' bal' xet' dii bixjka' bitople? ¹⁰ Na' ¿shera kana' wdao tapa mil ben' kon gallzə yetxtilka'? ¿Abi chjadinile bal' xet' dii bixjka' bitople? ¹¹ ¿Biche che yetxtila'lə wyajnzile ka wnia' wsak'gale che levadura che fariseoka' len saduceoka'?

¹² Na' kana'ch wyajni'gake' nan aga che levadura che yetxtilan' chi'e legake' wsak'gake' san diika' chli' chsedi fariseoka' len saduceoka'lan.

Pédrona' chi'e Jesúza'n nake' Crístona'
(Mr. 8:27-30; Lc. 9:18-21)

¹³ Na' ka bllin Jesúza' len beṇ'ka' nakgake'ne' txen gana' mbani yell Cesarea che Filípona', na'ch chi'e legake':

—¿Non na beṇ' yell-liona' nak', nad', Beṇ' Bsel' Chioza' Yell-lioni?

¹⁴ Na' che'gake'ne':

—Baḷe' nagake' nako' dii Juanna', beena' bchoa beṇ' nisa', na' zi baḷe' nagake' nako' Elíaza', na' zi baḷe' nagake' nako' dii Jeremíaza', na' baḷe' nagake' nako' sto beṇ' chyixjee daa che' Chioza'ne'.

¹⁵ Na'ch chi'e legake':

—¿Shera le'? ¿Nora nale nak'?

¹⁶ Na' Simón Pédrona' chi'ene':

—Lin' Crístona', Xiin Chios yaa Chios banna'.

¹⁷ Na' Jesúza' chi'ene':

—Chakomba li' Simón, xiin Jonás, la' aga nochlan bzajni li' daa ba wno'. Xa'na' zoa yabanan' ba bzajniile'n li'. ¹⁸ Na' nad' nia' li', lin' lio' Pedro, daa zeji yaj, na' gako' ka to yaj wal na' lin' wchin' kwenche gono' ka shanch beṇ'ka' gonlilall'gake' nad', na' ni yel' wita' bi yizoin wlliyi'n beṇ'ka' ba wlej' kwenche nakgake' lall' na'. ¹⁹ Na' gon' li' yel' wñabia' daa zaklebi to xiinya dii chsaljan yabana' gana' chñabia' Chioza'. Na' diika' ino' bi chiyal' gon beṇ' yell-lioni, lekzka' ina Chioza' zoa yabana', na' diika' ino' wak gongake', lekzka' ina Chioza' zoa yabana'.

²⁰ Na' goll Jesúza' beṇ'ka' nakgake'ne' txen ni to kono ye'gake' len' Crístona', beena' bsel' Chioza' inabi'e.

Jesúza' bi'e dill' witgake'ne'
(Mr. 8:31–9:1; Lc. 9:22-27)

²¹ Na' lo llana' wzolo Jesúza' bzajniile' beṇ'ka' nakgake'ne' txen daa lia bia' gak che'. Golle' legake' chonan byen yiyaje' Jerusalénna' kwenche gake' lo na' beṇ' golka' chñabia' na' lo na' bñozka' chñabia' na' lo na' beṇ'ka' chli' chsedi leya', na' le wsak'zi'gake'ne', na' chonan byen witgake'ne' na' ka gak shon' lla yibane' ladj beṇ' wetka'. ²² Na'ch Pédrona' wleje' Jesúza' ladj beṇ'ka' chi'ene':

—Xan', jbat gak cho' ka ba wno'!

²³ Na' biyechj Jesúza' chi'e Pédrona':

—Kwas ka'lə, Satanás. Cheenzilo' bi gon' daa lia bia' gon' daa bi yoo yichjo' daa cheeni Chioza', san daa nak che yell-liozan yoo yichjo'.

²⁴ Na' che' Jesúza' beṇ'ka' nakgake'ne' txen:

—Shi no cheeni gon nad' txen, chiyal' wsanlall' kwine', na' izani yel' mban che'na' yen ile'ile' bittez ni cha', na' gone' ka chazlallaa. ²⁵ La' beena' bi chzani yel' mban che'na', beenan' kwiayi', san beena' chzani yel' mban che'na' yen ile'ile' bittez ni cha', beenan' gat' to yel' mban che' zejli kani. ²⁶ ¿Bera zjanayin gap beṇ' yog'te dii de yell-lioni, shi le' kwiayee? Aga bi de wi'e lo laz yel' mban che'na' kwenche bi kwiayee. ²⁷ La' nad', Beṇ' Bsel' Chioza' Yell-lioni, yiyed' len anjl cha'ka' zinsa' balaan xen che Xa' Chioza'. Kana'chan chixj' to to beṇ' kon ka dii bene'. ²⁸ Dii li nia' le', bal-le lle'le ni, ni mbanle ile'ile yel' wñabia' cha'na', nad', Beṇ' Bsel' Chioza' Yell-lioni.

17

Biyak Jesúza' nlla'lə
(Mr. 9:2-13; Lc. 9:28-36)

¹ Ka wde xop lla, bche' Jesúza' Pédrona', na' Jacóbona' len beṇ' bishee Juanna', na' to lezgake' wyajlene' to lo yaa xen. ² Na' ka lle'gake' lo yaana', gok Jesúza' nlla'lə lawe'ka'. Wyep wyeeni' cho'alawe'na' kakzə wbillə, na' xe'na' nakwe' gokan xtil llyish axt chey

cheeni'n. ³ Na' ben'ka' lle'lengake'ne' ble'gakile' dii Moiséza' na' Elíaza' chshaljlengake' Jesúza'. ⁴ Na'ch Pédróna' golle' Jesúza':

—Xan', le mbalaz zoacho ni. Shi cheenilo', gon' shon ransh, ton cho', ston che Moiséza' na' ston che Elíaza'.

⁵ Na' ka golle' ka', betj to bej dii chey cheeni' na' bkwashaan legake', na' loo beja' bengakile' che' Chioza':

—Beenin Xiinaa, beena' chakid', na' chazlall'chga' ka chone'. Li wzenag che'.

⁶ Na' ben'ka' nak Jesúza' txen, ka bengakile' wne Chioza', le bblebchgage' na' to bdoszgage' lo yona'. ⁷ Na' wbig' Jesúza' kwite'ka' bexee legake', chi'e:

—Li yiyas. Bi illeble.

⁸ Na' ka bilis yichje'ka', koch no ben'ka' ble'gakile', stochga Jesúza'.

⁹ Na' ka biza'gake' lo yaana' goll Jesúza' legake':

—Ni to kono ye'le ka nak dga ba ble'ile axt kat'ch nad', Ben' Bsel' Chioza' Yell-lioni, ba biban' ladj ben' wetka'.

¹⁰ Na'ch ben'ka' nak Jesúza' txen che'gake'ne':

—¿Beraçhe naz ben'ka' chli' chsedi leya' zigaate Elíazan' yiyed?

¹¹ Na' goll Jesúza' legake':

—Dii li ka nakannan', zigaate Elíazan' yiyede' yigwee xnezi yog'lolte. ¹² Per nad' nia' le', ba biyed Elíaza', na' bi gokbe'gakile' shi len'. Na' bengakile'ne' kon ka wnazan chegake'. Na' ka'kzan gongakile' nad', Ben' Bsel' Chioza' Yell-lioni.

¹³ Na' gokbe'gakile' nan che Juanna', beena' bchoa ben' nisan' cho'e dill'.

Jesúza' biyone' to bi' chaz shon

(Mr. 9:14-29; Lc. 9:37-43)

¹⁴ Na' ka billingake' gana' lle' lla' ben', na'ch bchej to ben' jabigee kwit Jesúza' na' bçhek' xibe'na' lawe'na', chi'ene':

¹⁵ —Maestro, biyesh'gachi bi' cha'ni. Chazb' shon na' le' chzak'zi'b'. Zan shii ba bzala'n leb' lo yi'na' na' lekzka' loo nisa'. ¹⁶ Na' ba jwa'b' lao ben'ka' nakgake' li' txen na' bi gok yiyongake'b'.

¹⁷ Na' goll Jesúza':

—¿Zi'tegalə chelena', le' ben' mal na' ben' bi chajle'! ¿Zi ka'k'tek chiya' soalen' le'? Na' ¿zi ka'k'tek chiya' soid' le'? Li da diwa' bi' xkwidaa ni.

¹⁸ Na'ch bsheshlen Jesúza' dii xiwaa yoob' na' bichejan. Na' katena' biyakib'.

¹⁹ Na' ka biyoll gok ka', ben'ka' nak Jesúza' txen bshaljlengake'ne' to lezgake', gollgake':

—¿Biçhe bi gok yibejnto' dii xiwaa yoo bi' xkwidaa?

²⁰ Na' goll Jesúza' legake':

—Bi gok yibejlen, la' bi chajle'le Chioza' gone' ka yichejan. Dii li nia' le', shel'ka' yel' chajle' chelena' nakan la'ch' ka sa mostásana' daa nak diido'zə, wakte ye'le yaani: “Bkwas ni na' jsoa gan yoblə”, na' wkwasan ka'lə. Aga ga de to dii bi gak gonle shel'ka' chajle'le che Chioza'. ²¹ Kwenche gak yibejle dii xiwaa ka daa bibej' bi' xkwidaa, chiya' soale wbas' na' soaçheçhle we'llwill-le Chioza'.

Sto shii wdixjee Jesúza' witgake'ne'

(Mr. 9:30-32; Lc. 9:43-45)

²² Na' shlak chdalen Jesúza' ben'ka' nakgake'ne' txen gana' mbani Galileana', golle' legake':

—Nad', Ben' Bsel' Chioza' Yell-lioni, gak' lo na' ben' malka'. ²³ Na' witgake' nad', na' ka gak shon lla yiban' ladj ben' wetka'.

Na' ka golle' legake' ka', le gokyesh'gakile'.

Jesúza' wdixje' daa chiya' gaxj che yoodo'na'

²⁴ Na' ka billin Jesúza' len ben'ka' nakgake'ne' txen Capernaúma', ben' Israelka' ben'ka' chchixj che yoodo'na' jawiagake' Pédróna', na' wñabgakile'ne':

—¿Achyixj maestro chelena' daa chidol'cho we'cho che yoodo'na'?

²⁵ Na' goll Pédróna' legake':

—Awe, chyixje'n.

Na' ka biyoo Pédróna' loo yoona' gana' zoagake', Jesúza' bkwialoe' dillaa chi'e:

—¿Nak ka chakilo', Simón? Ben'ka' chñabia' yell-lioni, ¿aben' wlall che'kan' chchixjgake'?, ¿awa ben' zit'kan'?

²⁶ Na' billii Pédróna' xtilleena':

—Ben' zit'kan' chchixjgake'.

Na' goll Jesúza'ne':

—Zejin ben' wlall che'ka' bi chonan byen chixjgake'. ²⁷ Per kwenche bi wshaachogake', wyaj cho'a nisdona' na' wza'loo daa chzenilo' belá'. Na' bel' necha' seno' wxoo cho'aba' na' loo cho'aba' yillelilo' to mech. Waktekzin lljtixjo' che choptecho.

18

Ben'ka' nak Jesúza' txen gokdilgake' nogaken' nak ben' zak'chi

(Mr. 9:33-37; Lc. 9:46-48)

¹ Na' do kana'kzə, ben'ka' nak Jesúza' txen jabig'gake' kwite'na' che'gake'ne':

—¿Noran nak ben' zak'chi ladj ben'ka' chñabia' Chioza'?

² Na' wñe Jesúza' to bi'do' na' bzie'b' ladje'ka'. ³ Na'ch chi'e legake':

—Dii li nia' le', beena' bi yiyak yichjlall'do'ena' ka che bi'do'ni kwenche inabia' Chioza' le', bi lene' ben'ka' chñabia' Chioza'. ⁴ Daan beena' wlexj yichje' wzenague' che Chioza' ka chlexj yichj bi'do'ni chzenagb' che xaxna'baa, beenan' zak'chi ladj ben'ka' chñabia' Chioza'. ⁵ Na' beena' wlebe' to bi'do' ka bi'do'ni daa chonlilallee nad', nad'kzan chlebe'.

Xoll ibixcho lao dii mala'

(Mr. 9:42-48; Lc. 17:1-2)

⁶ Nottez beena' wchixe' to ben' zi' chzolo chonlilallee nad' gone' dii mala', naklan wen wwal'gake' yene'na' to yaj che molin na' lljlekgake'ne' yel loo nisdona' aga ka daa wchixe' ben' lao dii mala'. ⁷ ¡Nyesh'laz che ben' yell-lioki!, la' biga iyallji daa gonan ka wxinj wlexgake'. Per ¡nyesh'lazch gak che beena' gon ka wxinj wlen ben' yoblə!

⁸ Na' shi noona' wa ni'ona' gonan ka ibixo' lao dii mala', naklan wen wchogo'n na' choono'n, la' wenchlan bi de noona' tlaa wa ni'ona' tlaa yillino' kwit Chioza' aga ka daa yiyaj doxentio' lo yi' gabilá' daa biga yiyol. ⁹ Na' shi daa ile'ilo' kon jalawo'na' gonan ka ibixo' lao dii mala', naklan wen wlechjo'n na' choono'n, la' wenchlan yillinleno' tlaaz jalawo'na' kwit Chioza' aga ka daa yiyaj doxentio' lo yi' gabilá'.

Jempl che xilaa wnit

(Lc. 15:3-7)

¹⁰ Bi gonile nakzi ni to ben'ki zi' wzolo chonlilall' nad'. La' nia' le', anjl che'ka' toshiizi zoagake' lao Xa'na', beena' zoa yabana'. ¹¹ La' nad', Ben' Bsel' Chioza' Yell-lioni, bid' kwenche yisla' ben'ka' yoo nez daa williayi'n legake'.

¹² ¿Nak chakile? Shi to ben' lle' to guiyoa xil' che' na' nit tob, ¿abi wkwaane' baka' taplalj twalj na' shaje' lljadilje' bana' wnit? ¹³ Na' shi yillelile'b, lech yibaile' cheb aga ka che baka' taplalj twalj baka' lle' tozga. ¹⁴ Ka'kzan Xacho Chioza' zoa yabana' cheenile' ni to ben'ki zi' wzolo chonlilall' nad' bi kwiayi' shel'ka'.

Chiya' si'xencho che ben'ka' nakcho txen chonlilall'cho Chioza'

(Lc. 17:3)

¹⁵ Shi to ben' nakle txen nonlilall'le Chioza' gone' to dii mal cho', je'lene' dill' to li' to le' daa bene' cho'. Shi ba bzenague' cho', ba beno' gan bizoaleno'ne' wen. ¹⁶ Per shi bi

wzenague' bin yoone', na'ch wchi'o sto chop ben' kwenche gakgake' taschiw che daa yoone'. ¹⁷ Na' shi ni ka' bi wzenague' chele, wak ye'le yog' ben'ka' nakle txen nonlilall'le Chioza' ka nak daa ba bene' kwenche we'lengake'ne' dill'. Na' shi ni che ben'ka' bi wzenague', na'chan gonilene' ka to ben' bi nonlilall' Chioza' wa ka to ben' wichixj.

¹⁸ Na' dii li nia' le', diika' inale bi gon ben' yell-lioni, lekzka' ina Chioza' zoa yabana', na' diika' inale wak gon ben' yell-lioni, lekzka' ina Chioza' zoa yabana'.

¹⁹ Na' lekzka' nia' le', shi chople idili xtill'lana' yell-lioni kat' bi inable lao Xa' Chioza', beena' zoa yabana', na' gone' daa inabile'ne'. ²⁰ La' gana' chdop chope' wa shone' choe'la'ogake' nad', na'kz zoa' ladje'ka'.

²¹ Na' wbig' Pédrona' kwit Jesúza', chi'ene':

—Xan', ¿bal shii chiyal' yizi'xen' che bish' ljwella' shi bi dii mal chone' cha'? ¿Azeelo gall shii?

²² Na' che' Jesúza'ne':

—Aga nia' li' zeelo gall shii yizi'xeno' che bish' ljwello'na', san nia' li' chiyal' yizi'xeno' guiyon shin' chopə shii.*

Jempl che beena' bi bizi'xen che bish' ljwelle'na'

²³ Yel' wñabia' che Chioza' zaklebin to ben' wñabia' beena' bizi' kwent che mecha' daa chal' wen llin che'ka'. ²⁴ Na' ka wzoloe' chizi'e kwent che to toe', jwa'gake' to wen llin che'na' beena' chal' dii xen inleeb. ²⁵ Per aga bi mech nap beena' kwenche yiyixje' daa chbaguee, na' xane'na' bene' mandad wit' wdegake'ne' do xiin do xoole' na' yog'lol dii de che' kwenche yiyaxj xyana' daa llie'. ²⁶ Na' beena' chbag' mecha' bchek' xibe'na' lao xane'na', chonyeshee, chi'e: “Xan', wdapgach yel' chxenlall' cha', wiyixjkz' doxen daa chbagaa cho'.” ²⁷ Na' xane'na' biyeshile'ne', na' bene' ka'z doxen daa chalee che', na' bisane'ne'. ²⁸ Per le', ka bicheje' lill xane'na', billague' sto wen llin ben' chal' lat'do' xmeche', na' lii bniztie' yene'na' chi'ene': “¿Biyon xmechaa daa chaloo!” ²⁹ Na' bchek' xib beena' lawe'na' na' chonyeshee, chi'ene': “Wdapgach yel' chxenlall' cha', wiyixjkz' doxen daa chbagaa cho'.” ³⁰ Na' bi goonile', san lii wyajtie' ji'ene' part kwenche wloogake'ne' lillyana' axt ki yiyixjche' doxen daa chalee che'. ³¹ Na' ka ble'i wen llinka' sto ka bene', na' gokyesh'gakile' na' jayellgake' xane'ka' doxen ka bene'. ³² Na' wizax xane'na' le', chi'ene': “Ben' mal inleeb nako'. Nad' ben' ka'z doxen daa chaloo cha' daa benyeshoo lawa'. ³³ Ka'kzan nan chiyal' yiyeshilo' bish' ljwello'na' chal' cho', ka biyeshid' li'.” ³⁴ Na' daa le' bllaachga xane'na', bene'ne' lo na' ben'ka' wdixjgake'ne' lillyana' na' wit chingake'ne' axt ki yiyixjche' doxen daa chalee.

³⁵ Na'ch goll Jesúza' legake':

—Ka'kzan goni Xa'na' beena' zoa yabana' le' shi bi si'xen che ljwell-le do yichj do lall'le.

19

Bi chiyal' yilaa ljwell ben'ka' nkaa cheyin

(Mr. 10:1-12; Lc. 16:18)

¹ Na' ka biyoll be' Jesúza' dill'ki, bizee Galileana' na' biyaje' gana' mbani Judeana' daa llia shlaa yao Jordánna'. ² Na' ben' zan zjanogake'ne', na' na' biyone' ben'ka' bi shao'.

³ Na' wbig' bal' fariseoka' lao Jesúza' daa goklall'gake' wi'e dill' dii wchixa'n le', na' che'gake'ne':

—¿Ade lsens yilaa xool ben' ni che bizə diido' chone' dii bi chiyoolallee?

⁴ Na'ch che' Jesúza' legake':

—¿Abin' wlable gana' nan ka wxe wzil yell-lioni Chioza' bene' benecha', ben' byo na' noolə? ⁵ Na' wne': “Daan, wlaa ben' byona' xaxneena' kat' ikaa che', na' soalene' xoolena'

* **18:22** Guiyon shin' chopə shii: bal' yishka' nyoj de dill' griegona' nan gall shii de guiyonshin'. Per chopten zejín toshiizi chiyal' yizi'xecho che ben'.

gakgake' toz.” ⁶ Na' bich nakgake' chop, san ba nakgake' toz. Na' daan bi chiyal' yilaa xool ben', la' Chiozan' ba btile' legake'.

⁷ Na' gollgake'ne':

—Na' ¿biche ben dii Moiséza' mandad kat' to ben' yilaa xoolena' chiyal' wlise' to yish dii we'n dill' bich nake' xoolena' na' wak yichoonene'ne'?

⁸ Na' goll Jesúza' legake':

—Yel' widenag chelenan' be' dii Moiséza' latj yilaa xool-lena'. Per ka ben Chioza' ben' nechka', bi gokan ka'. ⁹ Nad' nia' le', shi nool chelena' bi chdalene' ben' yoblə, bi chiyal' yilaalene' na' yikaale nool yoblə, la' shi ka' gonle, na' chonle ka beena' zoalente xoolena' na' chdalene' noolə yoblə.

¹⁰ Na' ben'ka' nakgake'ne' txen gollgake'ne':

—Shi ka' nak che beena' chshagna', naklan wen kono wshagna'.

¹¹ Na' goll Jesúza' legake':

—Aga yog' ben' chajni'gakile' dga, lete ben'ka' chon Chioza' ka shajni'gakile'n. ¹² La' de dii chllonan wshagna' ben'. Bal' ben' bi chshagna'gake' daa bi nak kwerp che'ka' wen ka chaljtegake', na' zi bale' bi chshagna'gake' daa bxinj benecha' kwerp che'ka'. Na' zi bale' bi chshagna'gake' daa cheenchgakile' gongake' xshin Chioza'. Beena' wlebe' dga, na' gonin che'.

Jwa'gake' bi'do'ka' lao Jesúza'

(Mr. 10:13-16; Lc. 18:15-17)

¹³ Na' wyaj ben' jwa' bi'do' che'ka' lao Jesúza' kwenche wxoa neena' yichjb'ka' na' we'lwille' Chioza' ni chegakb'. Per ben'ka' nakgake'ne' txen bsheshlengake' ben'ka' zjwa' bi'do'ka'. ¹⁴ Na' goll Jesúza' legake':

—Li we' latj yid bi'do'ki lawa'ni, bi wllonle, la' Chioza' chnabi'e loo yichjlall'do' ben'ka' nak ka legakb'.

¹⁵ Na' ka biyoll bxoa na' Jesúza' yichj bi'do'ka', na'ch bizee ziyaje' gan yoblə.

To bi' wew', bi' wni'a, bshaljlem' Jesúza'

(Mr. 10:17-31; Lc. 18:18-30)

¹⁶ Na' bllin to bi' wew' lao Jesúza' che'b' le':

—Maestro, ¿bi dii wennan' chiyal' gon' kwenche gat' to yel' mban cha' zejli kani?

¹⁷ Na'ch goll Jesúza' leb':

—¿Biche chnabzilo' nad' che daa nak wen? Toz Chioza' nake' ben' wen. Na' shi cheenilo' gat' to yel' mban cho' zejli kani, chiyal' gono' diika' bllia Chioza' bia' goncho.

¹⁸ Na' goll bi' wewaane':

—¿Bera diika' chiyal' gon', lla?

Na' che' Jesúza':

—Bi wito' ben', bi soaleno' nool bi nak nool cho', bi kwano' bi de che ben', bi chiljlalloo bizə gon ino' che ben'. ¹⁹ Wdap balaan xaxnoona' na' goki bish' ljwello'na' ka chaki kwino'.

²⁰ Na' che' bi' wewaane':

—Yog' diika' chon' kana' naktia' bi'do'. ¿Berachan ni chyallj gon'?

²¹ Na' goll Jesúza' leb':

—Shi lekzilo' cheenilo' gako' dowalj ben' li ben' shao', biyaj jayet' yog' dii de cho' na' xmechinna' wyoon ben' yesh'ka', na' yido' gono' nad' txen. Na' kat' yillino' yabana' na' gon Chioza' li' yel' shawaa.

²² Na' ka beni bi' wewaa dga, nyesh' inleeb gokib' na' biza'b', la' bi' wni'a nleban nakb'.

²³ Na' goll Jesúza' ben'ka' nakgake'ne' txen:

—Dii li nia' le', lallj inleeb chonan che ben' wni'ana' yilline' yabana' gana' chnabia' Chioza'. ²⁴ Sto shii nia' le', lobe'ch te to kamey to xan yesh' aga ka to ben' wni'a yilline' yabana' gana' chnabia' Chioza'.

25 Na' bibangakile' ka wne', na' che' ljwellgake':

—¿Notg gak yillin lao Chioza', shka'?

26 Na' bwia Jesúza' legake', na' golle':

—Ni to beñ' yell-liona' bi gak gone' dga, san Chioza' yog'lolte chak gone'.

27 Na' che' Pédrona'ne':

—Neto' ba wlej yichjnto' yog' dii de chento' kwenche naknto' li' txen. ¿Bin gonnto' gan?

28 Na' che' Jesúza' legake':

—Dii li nia' le', kat' illin lla yikob yog'lol dii de, nad', Beñ' Bsel' Chioza' Yell-lioni, kwi'a inabi'a gana' sho'a balaan xen wal, na' le', shllintele, nakle nad' txen kwe'le kwitaa kwenche inabia'lenle nad'. Na' yizi'le kwent shllin kwente yell che beñ' Israelka'. 29 Na' nottez beena' ba wlej yichje' lille'na', beñ' bisheeka', beñ' zane'ka', xaxneeka', wa xiin xooole', wa yell-lio che' ni cha', Chioza'kzə wi'ene' dii zak' dii xen inlebch aga ka daa wlej yichje', na' lekzka' wi'ene' to yel' mban zejli kañi. 30 Per beñ' zan nakgake' beñ' zakii, wllin lla bich bi sak'gake', na' beñ' zan bi nakgake' beñ' zakii, wllin lla gagkake' beñ' zakii.

20

Jempl che wen llinka'

1 Na' wna Jesúza':

—Yel' wnabia' che Chioza' chzaklebin daa gok che to xan yell-lio beena' naz yag uvana'. Na' shzildo' wzee zeje' zjtilje' wen llinka' kwenche ljengake' llinna' gana' naze' yag uvaka'. 2 Na' bgaangake' dill' chixje' legake' che lla, na'ch bselee legake' gana' ljengake' llinna'. 3 Na' ba gok shon gor chon beñ' nechka' llinna' ka wyaje' dii yoblə gana' chak yaana', na' ble'ile' lle' beñ' bibi llin de gongake'. 4 Na'ch chi'e legake': “Li shaj li lljen llinna' gana' naz' yag uvana' na' chixj' le' daa chidol'le.” Na' wza'gake' zejgake' llinna'. 5 Na' do ka gobill wizaje' dii yoblə, na' lekzka' chida shonə, bizllelile' beñ' yoblə ljengake' llin che'na'. 6 Na' do ka chida gay', wizaje' dii yoblə na' bizle'ile' beñ' lle'zgake'. Na'ch chi'e legake': “¿Biche bi benle llinna' naanlla?” 7 Na' goll beñ'ka'ne': “La' ni to kono bche' neto' llinna'.” Na' golle' legake': “Li shaj, lla, li lljen llinna' gana' naz' yag uvana'.” 8 Na' ka wzeles yela' na' che' xan yag uvana' beena' ngoo lo nee llinna': “Biyax wen llinka' na' wdixjgake'. Zigaate beñ'ka' zi' wyoo llinna' chixjo', na' yiyoll-lin beñ'ka' wzolo nech.” 9 Na' bene' kon ka goll xane'na', na' wdixje' zigaate beñ'ka' wyoo llinna' do ka chida gay'. Na' wdixje' to toe' che llakzə. 10 Na' ka gol' chixje' beñ'ka' wyoogake' llinna' shzildo', gokgakile' wxoache' laxje'ka'. Per bich bi bxoe' san che llachokzə wdixje' legake'. 11 Na' ka ba nox'gake' laxje'ka', wzologake' biz chon chnagake' che xan llinna', 12 na' gollgake'ne': “Do lla wzento' lo bana' bennto' xshino'na' na' toz ka wdixjo' neto' len beñ'ka' zi' wyoo, na' zi' tgorchga bengake' llinna'.” 13 Na' che' xan llinna' toe': “Bish'dawaa, aga bi laxjo' chzeshaa. ¿Aaga bgaancho dill' che llan chixj' li? 14 Wkaa laxjo'na', na' biyaj. Nad' cheenid' chixj' beñ'ka' wyoo llinna' ba wle'ch ka to daa ba wkoo. 15 Jwayishaz nad' bi gonid' xmechaa. ¿Anti chakziilo' daa chonid' beñ' wen?”

16 Na' ka wde bzoa Jesúza' jempli, na' chi'e beñ'ka':

—Ka'kzan beñ' zan nakgake' beñ' zakii, wllin lla bich bi sak'gake', na' beñ' zan bi nakgake' beñ' zakii, wllin lla gagkake' beñ' zakii.

Sto shii wdixjee Jesúza' witgake'ne'

(Mr. 10:32-34; Lc. 18:31-34)

17 Ka ziyaj Jesúza' Jerusalénna' wñie' to beñ'ka' shllinzə, chi'e:

18 —Naa ba ziyajcho Jerusalénna', gana' gongake' nad', Beñ' Bsel' Chioza' yell-lioni, lo na' bxozka' chñabia' na' lo na' beñ'ka' chli' chsedi leya', na' wchoglogake' witgake' nad'.

19 Na' gongake' nad' lo na' beñ'ka' bi nak beñ' Israel kwenche wtitgakile' nad' na' wit

chingake' nad', na'tech wda'gake' nad' lee yag cruza', per ka gak shon lla yiban' ladj ben' wetka'.

Daa wñab xña' Jacóbona' len Juanna' lao Jesúsza'
(Mr. 10:35-45)

²⁰ Na' Jacóbona' len Juanna', ben'ka' nak xiin Zebedewa', wbig'lengake' xneeka' kwit Jesúsza', na' xneeka' b'chek' xibe'na' lawe'na' wñabile'ne' to goklen. ²¹ Na' goll Jesúsza'ne':

—¿Bera goklenan cheenilo' gon' cho'?

Na' golle'ne':

—Cheenid' gongacho' goklen kweko' bi' cha'ki shlaa wej kwito'na' kat'ka' illin lla inabi'o.

²² Na' goll Jesúsza'ne':

—Ni bi nezile bin chñable. ¿Awizoile wtil-le yel' zak'zi'na' ka daa wtil' na' gak chele ka daa gak cha'?

Na' gollgake'ne':

—Wizokzinto'n.

²³ Na' goll Jesúsza' legake':

—Lekzile wtil-le ka daa wtil', na' gak chele ka daa gak cha', per daa nale kwe'le shlaa wej kwitaa bi nak lo na' gon' ka nale, san Xa'n'an' ba mbeje' ben'ka' wi'en.

²⁴ Na' ben'ka' zi shi, bllaagake' Juanna' len Jacóbona' daa wñabgake' kwe'gake' kwit Jesúsza'. ²⁵ Na' bitop Jesúsza' legake', na' chi'e:

—Nezkzile zoa ben' wñabia' na' ben' zakii che to to yell na' chongakile' kon daa nazan chegake' ben' yell che'ka'. ²⁶ Per aga kan' chiyal' gonle. Shi nole cheenile gake ben' mbejlawin chiyal' gake ka to ben' chon xshin ben'. ²⁷ Na' shi nole cheenile gake ben' zakii, chiyal' gake ka ben' ndoo lla yel chone' xshin ben'. ²⁸ Ka nak nad', Ben' Bsel' Chioza' Yell-lioni, aga bid' kwenche gaklen ben' nad', san bid' kwenche gaklen' ben' na' wi'a yel' mban cha'ni kwenche yisla' ben' zan lao saaxya che'ka'.

Jesúza' biyone' chop ben' lchol
(Mr. 10:46-52; Lc. 18:35-43)

²⁹ Na' ka biza' Jesúsza' yell Jericóna' len ben'ka' nakgake'ne' txen, ben' zan inleeb janogake'ne'. ³⁰ Na' cho'a neza' chi' chop ben' lchol, na' ka bengakile' bide Jesúsza' kwite'ka' na'ch besyaagake', che'gake':

—¿Xan', xiin dia che dii Daví, biyesh'lall'gachi neto'!

³¹ Na' ben'ka' zejlen Jesúsza' bsheshlengake' legake' kwenche nan kwe'gake' lliz, per zizikla besyaachgake', che'gake':

—¿Xan', xiin dia che dii Daví, biyesh'lall'gachi neto'!

³² Na'ch wlez Jesúsza' na' wñie' ben' lcholka', na' chi'e legake':

—¿Beran cheenile gon' chele?

³³ Na'ch che' ben' lcholka'ne':

—Xan', bengach ka ile'into'.

³⁴ Na' biyesh'lallii Jesúsza' legake' na' bexee jalawe'ka'. Na' katena' gok ble'gakile' na' janogake' Jesúsza'.

21

Bllin Jesúsza' Jerusalénna'
(Mr. 11:1-11; Lc. 19:28-40; Jn. 12:12-19)

¹ Na' ka ba zoa yillingake' Jerusalénna', bllingake' cho'a yell Betfagéna' daa llia kwit Yaa Olívoza'. Na' wlej Jesúsza' chop ben'ka' nakgake'ne' txen na' bselee legake' yella'. ² Na' chi'e legake':

—Li shaj yella' daa lliia shlaana'. Na' ile'ile to burr ba noolə da'b yag na' nche' to xiindo'b. Na' wsell-leb wche'legakb nilə. ³ Na' shi no bi ina le', na' ye'lene': “Xannto'nan' chyalljile' legakb, na' lii yidsantento'gakb.”

⁴ Na' daa gok ka', billinin ka bzej dii beena' wdixjee daa goll Chioza'ne' daa wne':

⁵ Li ye' ben'ka' lle' yell Siónna':
“Li wwia, ba za' ben' wnabia' chelena',
nake' ben' gaxjlall' na' llie' to burrdo';
xiin to ba choa' yoa'.”

⁶ Na' wza' ben'ka' nakgake'ne' txen zejgake' yelldo'na' gana' bsel' Jesúza' legake' na' bengake' kon ka golle' legake'. ⁷ Na' jxi'gake' burra' len xiinba' na' bche'gake' legakb kwit Jesúza'. Na'ch bxoagake' xe'ka' koll'bka', na'ch wllia Jesúza'b zeje' Jerusalénna'. ⁸ Na' ben' zan wdixjgake' xe'ka' tneza', na' zi bale' bhoggake' no zin na' wdixjgake'n tneza' gana' zeje'. ⁹ Na' ben'ka' llialo lao Jesúza', na' ka'kzə ben'ka' nogake'ne', wzologake' chosyaagake', nagake':

—iWe'la'ocho beeni nak xiin dia che dii Davina'! iGonleeyshga Xancho Chioza' beeni ba bselee! iLi da we'la'ocho Chioza' zoa yabana'!

¹⁰ Na' ka wyoo Jesúza' yell Jerusalénna', na' yog' ben'ka' lle' na' bllesh bcheengake', nagake':

—iNoraz beeni bla' ni, lla?

¹¹ Na' ben'ka' che'gake':

—Beenin Jesúza' ben' Nazareta' yell daa mbani Galileana', beena' chyixjee daa che' Chioza'ne'.

Bishesh Jesúza' ben'ka' chit' chde lesh' chyoodo'na'

(Mr. 11:15-19; Lc. 19:45-48; Jn. 2:13-22)

¹² Na' wyoo Jesúza' lesh' chyoodo'na' na' bisheshe' yog' ben'ka' chit' chde na'. Na'ch bishi'e mes che ben'ka' chsha' mecha' na' bzoles bzolline' gana' chi' ben'ka' chit'gake' palomka'. ¹³ Na' ka wde bene' ka' chi'e legake':

—Cho'a xtill' Chioza' nan: “Lillaa nakan ga choe'lwill ben' nad”, na' le', ba nonzlen ka to ga chdop chllag wban.

¹⁴ Na' shlak zoa Jesúza' yoodo'na', bal ben' lcho' na' ben' bi chak sa'gake' wen bllingake' lawe'na', na' biyone' legake'. ¹⁵ Na' bxo'zka' chnabia' na' ben'ka' chli' chsedi leya' le bllaagake' ka ble'gakile' yel' wakka' chon Jesúza', na' bengakile' chosyaa bi'do'ka' lesh' chyoodo'na', che'gakb': “iWe'la'ocho beeni nak xiin dia che dii Davina'!” ¹⁶ Na' gollgake' Jesúza':

—iAchenilo' ka na bi'do'ka'?

Na' chi'e legake':

—Awe, chenkzid'. iAbin' wlable Cho'a Xtill' Chioza' gana' na:
Chchino' cho'a loll' bi' xkwid'do'ka' na' bdo'ka' ni chall' chxop
kwenche chol' chnegakb' li' ka chiyal' we'la'o ben' li'?

¹⁷ Na'ch bicheje' ladj ben'ka', na' bizee yell Jerusalénna' ziyaje' yell Betániana' gana' wdie' yel.

Jesúza' bene' ka wbill to yag yixwew

(Mr. 11:12-14, 20-26)

¹⁸ Na' betiyo biza'gake' shzildo' yell Betániana' kwenche biyajgake' yell Jerusalénna' dii yoblə, na' tneza' wzolo chdon Jesúza'. ¹⁹ Na' ble'ile' to yag yixwew dii zoa cho'a neza', na' jawie' shi llian. Per zeelo xlaguinna'z lliia. Na' golle'n:

—iBatch kwio' yixwewa'!

Na' katena' lii wbillte yaga'. ²⁰ Na' ka ble'i ben'ka' nakgake'ne' txen ka gok, le bibangakile', na' che'gake'ne':

—iBerache lii wbilltelikazə yag yixwewa'?

²¹ Na'ch che' Jesúza' legake':

—Dii li nia' le', shi nonlilall'le Chioza' na' bi gakchoplall'le, aga daazan gak gonle, san wakte ye'le yaani: “Bkwás, na' jsoa loo nisdona'”, na' gak ka ye'len. ²² Na' yog' daa inabile Chioza' ka we'llwill-lene' gonkze'n kon shi nonlilall'lene'.

Yel' wnabia' che Jesúza'

(Mr. 11:27-33; Lc. 20:1-8)

²³ Na' wyaj Jesúza' dii yoblə yoodona' kwenche jali' jasedile' ben'ka'. Na' shlak chli' chsedile' legake', bxozka' chnabia' na' ben' golka' chnabia' ben' Israelka' bllingake', na' che'gake'ne':

—¿Nora lsens cheyi chono' diiki? ¿No ben' li' yel' wnabia'na'?

²⁴ Na' goll Jesúza' legake':

—Lekzka' de to dii cheenid' inabid' le'. Na' shi le' inale nad' daa inabid' le', na' inia' le' no lsens cheyi chon' yog' diiki. ²⁵ Li inashki nad', ¿noran bsel' Juanna' kwenche bidchoe' ben' nisa'? ¿AChioza' anti ben' yell-lioni?

Na' wzologake' chakguedgake' to lezgake', nagake':

—Shi ye'chone' Chioza' bseleene' na'ch ine' cho': “¿Biche bi wyajle'le che', lla?” ²⁶ Na' shi ye'chone' ben' yell-liona' bselee Juanna', le xoll bi goni ben'ki cho', la' yog'lolé' chajle'gake' Chioza' bselee Juanna' kwenche bidtixji'e daa golle'ne'.

²⁷ Na'ch che'gake' Jesúza':

—Bi nezinto' non bsel' dii Juanna'.

Na' goll Jesúza' legake':

—Lekzka' nad', aga wnia' le' nora lsens cheyin chon' diiki.

Jempl che chop xiin ben'

²⁸ Na' goll Jesúza' legake':

—¿Bi ka inale cheyi dga wseesaa? To ben' zoa chop xiine', na'ch golle' bi'na' to: “Xiindawaa, wyajgach jen llinna' gana' nazcho yag uvana'.” ²⁹ Na' che' xiine'na'ne': “¿Bi sha'!” Per na'tech biyajib' na' wyajkzb' jem' llinna'. ³⁰ Na' wyaj xabaa jelle' bi'na' sto ka golle' bi' bish'baa, na'ch goll bi'na'ne': “Wakkzə xa, na' sha'.” Per bi wyajb'. ³¹ Li inashki, ¿nora bi'ka' chop ben ka cheeni xab'ka'?

Na' goll ben'ka'ne':

—Bi'na' golle' ka' dii nech.

Na'ch che' Jesúza' legake':

—Dii li nia' le', ben' wichixjka' na' noolə wdaka', lelgaken' zigaate we'gake' latj inabia' Chioza' legake' aga ka le'. ³² La' ka bid Juanna' bchoe' ben' nisa', bidzajniile' le' ka chiyal' soa kwezle, per le' aga wyajle'le che', lete ben' wichixjka' na' nool wdaka'chgan wyajle'gake' che'. Na' le' naalla, la'kzi gokbe'ile ba chajle'gake' che', aga biyaj bileni saaxya cheleka' na' shajle'le che'.

Jempl che wen linka' nak ben' mal

(Mr. 12:1-12; Lc. 20:9-19)

³³ Li wzenag jempli sto. Wzoa to ben' biyaze' yag uva lo yell-lío che'na' na'ch wlo'en leej, na'tech benschawee to ga wsigake' uvaka'. Na' lekzka' bene' to yoo sibə gana' kwia beena' gap wwien'.

'Na'tech bene'n lo na' to chop ben' na' wzee zeje' zit'. ³⁴ Na' ka gol' yishibgake' uvaka', na'ch bselee to chop wen llin che'na' gana' lle' ben'ka' chapgake' yag uvaka' kwenche lljaxi'gake' uvaka' daa chidolee. ³⁵ Per ka bllingake' gana' lle' ben'ka' chapgake' yag uvaka', na'ch bex'gake' ben'ka' bllin, toe' bet wdingake'ne', na' stoe' bettekzgake'ne' na' beena' sto btakwgake'ne' yaja'. ³⁶ Na'ch bsel' xan yag uvaka' zanch wen llin che'ka' aga ka to ben'ka' bselee dii nech, per ben'ka' chap yag uvaka' bengakile' legake' ka bengakile' ben' nechka' bllin.

³⁷ Na'ch xan yag uvaka' bselee kwinkz xiine'na', chakile': "Wapgake' balaan bi' cha'ni na' we'gake'b' daa chido_laa." ³⁸ Per beñ'ka' chap yag uvaka' ka ble'gakile' xiine'na', na'ch che' l'jwelle': "Bi'nin xiin xan yag uvaki na' leban' yigaanlem' yog' dii nape'. Li da witchob' kwenche yigaanlencho daa gaki cheb'." ³⁹ Na'ch beñ'gake'b' bibejgake'b' gana' lle' yag uvaka' na' betgake'b'.

⁴⁰ Na' Jesúza' chi'e beñ'ka' lle' na':

—¿Nakra ka chakile gon xan yag uvaka' che beñ'ka' chapgake'n ka illine' kwine'?

⁴¹ Na' che' beñ'ka':

—Ba nakten wite' legake' na' bi yiyeshile' legake' daa nakgake' beñ' mal. Na' yiyone' yell-lío che'na' lo na' beñ' yoblə, beñ' yiyoe'gake'ne' daa chido_lee kat' yishibgake'n.

⁴² Na' goll Jesúza' legake':

—¿Abigan' wlable Cho'a Xtill' Chioza' gana' na:

Yaja' daa bi wyoolall' wen yooka',

leyen'lannan' yaja' daa ba nchejcha yoonā.

Dgan ben Xancho Chioza'

na' nakan to dii yibanicho?

⁴³ Daan nia' le', kon ka gon xan yag uvaka' yiyone' yell-lío che'na' lall' na' beñ' yoblə, beñ' gongake' ka cheenile', ka'kzan gon Chioza' chele. Kwej yichje' le', na' beñ'ka' wzenaggake' che', si'gake' banez yel' wñabia' che'na'. ⁴⁴ Na' ka nak yaja', nottezə beñ' lljchaze' lawinna' kwiayee, na' shi idakwan beñ', axt wshoshjan le'.

⁴⁵ Na' ka biyoll bzenag bxo_zka' chñabia' na' fariseoka' jemplki bzoa Jesúza', na'ch gokbe'gakile' chegake'n chñie'. ⁴⁶ Na'ch goklall'gake' gox'gake'ne', per bi biyaxjgakile', la' bllebgake' beñ'ka' lle' na' daa chajle'gake' Jesúza' nake' to beñ' chyixjee daa che' Chioza'ne'.

22

Jempl che to wishagna'

¹ Na' Jesúza' bseesile' legake' sto jempl, chi'e:

² —Yel' wñabia' che Chioza' chzaklebin to beñ' wñabia', beñ' bene' to lni che xiine'na' ka bshagna'b'. ³ Na' bselee wen llin che'ka' lljanegake' beñ'ka' ba bye', per beñ'ka' bye' bi goongakile' shajgake'. ⁴ Na'ch bizselee zi shkwen wen llin che'ka' chi'e legake': "Li lljell beñ'ka' ba bya' yid lni che bi' cha'na' ba de daa gaocho. Ba betgake' goon cha'ka' na' nochlə baka' le nak, na' ba de yel' wawa'. Li lljellgake' yidgake' kwenche yeej gaocho." ⁵ Per beñ'ka' ba bye' bi bengake' kwent daa goll wen linka'. Toe' wyaj jawia' yell-lío che'na' na' stoe' wzee zeje' delgens che'na'. ⁶ Na' beñ'ka' sto beñ'gake' wen llinka' na' biya dii bengakile' legake' axt ka witgake'. ⁷ Na' le bllaachga beñ' wñabia'na', na'ch bselee soldad che'ka' kwenche jetgake' legake' na' bzeygake' yell che'ka'. ⁸ Na'ch chi'e wen llin che'ka' sto: "Ba gok daa yeej gaocho, na' wentelan bi wlen beñ'ka' bya'. ⁹ Na' li shaj lyell na' li wche' kon no beñ' yillagle tneza' kwenche yidgake' yeej gaogake'." ¹⁰ Na'ch wza' wen llinka' zejgake', na' jxi'gake' kon no beñ' billaggake', ka beñ' wen ka beñ' mal. Na' billa'cha lill beñ' wñabia'na'.

¹¹ Na' ka wyoo beñ' wñabia'na' chwie' beñ'ka' ba ndop nllag, na' ladj beñ'ka' len to beñ' bi nakw xe'na' daa chiya_l' gakwe' gana' chak wishagna'na'. ¹² Na' goll beñ' wñabia'na'ne': "Bish'dawaa, ¿nakra gok wyoozo' na' bi nakw xo'na' daa chiya_l' gako' kwenche leno' gani chak wishagna'ni?" Na' beena' bikzə bi billet-lallee yeene'. ¹³ Na'ch che' beñ' wñabia'na' beñ'ka' chde yel' wawa': "Li wchej ni'a na' beeni na' li yibeje' na' li wzalee gana' shgasj shcho_l, gana' kwellyeshee na' gaoxaxj leye'na' daa le gakshejlallee." ¹⁴ La' beñ' zan nak beñ'ka' chax chñab Chioza', per balchgagake' kweje' gakgake' lall' nee.

Wñabgakile' Jesúza' shi chiya_l' chixjgake' daa chñab beñ' wñabia'na'
(Mr. 12:13-17; Lc. 20:19-26)

¹⁵ Na' biza' fariseoka', na' wloogake' xnezi naklə gongake' kwenche we' Jesúza' dill' dii wchixa'n le'. ¹⁶ Na'ch bsel'gake' bal' ben'ka' nakgake'ne' txen na' zi bal' ben'ka' nak Heródeza' txen kwenche wyajgake' lao Jesúza' na' jellgake'ne':

—Maestro, nezinto' nako' ben' li ben' shao' na' chli' chsedilo' ben' che nez li che Chioza' kon ka nakan, na' bi chshoo cho'a xtilloona' lao nottezə ben', la' bi chwio' nō nakgake'.

¹⁷ Daan cheeninto' inagacho' neto' nak ka chakilo': ¿Achiyal' chixjcho daa chnab ben' wñabia' Césara', anti bi chiyal' chixjchon?

¹⁸ Na' gokbe'i Jesúza' aga do lall'gaken' gollgake'ne' ka', na'ch chi'e legake':

—Le' ben' wxiye', aga dii leilen nale ka'. ¹⁹ Li wli'shki nad' to mech daa chyixjile ben' wñabia'na'.

Na' be'gake'ne' to mech. ²⁰ Na' goll Jesúza' legake':

—¿Nora cho'alawin na' no leyin da' lee mech?

²¹ Na'ch che'gake'ne':

—Che ben' wñabia', Césaran'.

Na' che' Jesúza' legake':

—Na'len, li we' Césara' daa naki che', na' lekzka' li we' Chioza' daa naki che'.

²² Na'ch bibangakile' daa goll Jesúza' ka'. Na' biza'gake' kwite'na' ziyajgake'.

Saduceoka' wñabgake' nak gak kat' yiban ben' wetka'

(Mr. 12:18-27; Lc. 20:27-40)

²³ Na' lo llana'kzə saduceoka', ben'ka' bi chajle'gake' yiban ben' wetka', wyajgake' lao Jesúza', na' wñabgake'ne':

²⁴ —Maestro, dii Moiséza' wne' shi to ben' byo guete' na' kono xiine' wzoa, ben' bisheena' chiyal' yikee xool dii ben' bisheena' kwenche soa xiin dia che dii ben' weta'.

²⁵ Na' ki gok che gall bish' ben' nakgake' neto' txen. Ben' necha' bshagnee, na' wite' na' kono xiine' wzoa, na' ben' bishee, ben' wchopina', bikee xoole'na'. ²⁶ Na' lekzka' wit ben' wchopina' na' kono xiine' wzoa. Na' ka'kzə wit ben' wyonina' na' axt biyate ben'ka' gall wit. Na' ni togake' bi wzoa xiingake'.

²⁷ Na' ka wde wit yog'lole' na'ch lekzka' wit noola'. ²⁸ Na' kat' yiban ben' wetka', naa, ¿nora ben'ka' gall bish' gaki xoole' noola'? la' yog'lolen' wkaagake'ne'.

²⁹ Na'ch che' Jesúza' legake':

—Naklejjilen daa bi nezile ka na Cho'a Xtill' Chioza', na' ka nak ye'l' wak che'na'. ³⁰ La' kat' yiban ben' wetka', koch no yikaa ljwellin, ni koch no wit' wde xiinin, san yiyakgake' ka anjlka' lle' yabana'. ³¹ Na' ka nak daa yiban ben' wetka', naa, ¿abin' wlable daa wna kwín Chioza', gana' nan: ³² “Nad nak' Chios che Abrahama', Isaaca' na' Jacoba'”? Na' bi nake' Chios che ben' wet, san nake' Chios che ben' ban, la' lao Chioza' mban ben'ki.

³³ Na' ka beni ben'ka' lle' na' daa wna Jesúza', le bibangakile' ka chli' chsedile'.

Daa lliarote daa bllia Chioza' bia' goncho

(Mr. 12:28-34)

³⁴ Ka wnezi fariseoka' ba wleklli Jesúza' saduceoka', na'ch wyajgake' kwite'na'. ³⁵ Na' to beena' chli' chsedi leya' wñabile' Jesúza' kwenchezə wchixeene', chi'e:

³⁶ —Maestro, ¿beran lliarote nllia leya' bia' goncho?

³⁷ Na' Jesúza' golle'ne':

—“Chiyal' gakilo' Xancho Chioza' do yichj do lalloo na' axt ga zeelo chajniilo'.” ³⁸ Dgan liizelozi chonte na' llialon lawi yog' diika' nllia leya' bia'. ³⁹ Na' de wchopina' nakan katekzə dii necha', na' nan: “Chiyal' gakilo' bish' ljwello'ka' ka chaki kwino'.” ⁴⁰ Na' diiki chop chejin doxen ka na leya' len diika' bzej dii ben'ka' wdixjee daa goll Chioza' legake'.

Crístona' nake' xiin dia che dii Davina'

(Mr. 12:35-37; Lc. 20:41-44)

⁴¹ Na' shlak ndop nllag fariseoka' kwit Jesúza' ⁴² wñabile' legake':

—¿Nak ka chakile che Crístona', beena' inabia'? ¿No xiin dia cheyin nake'?

Na' che'gake'ne':

—Xiin dia che dii Davinan'.

⁴³ Na' che' Jesúza' legake':

—Na' ¿berache ben Espíritu Sántona' ka goll dii Davina'ne': “Xan”’? La' kin na daa bzeje':

⁴⁴ Xancho Chioza' golle' Xan'na':

“Wche' kwit' de shlini,

shlak wzoa' xni'ona' ben'ka' chakzbani li'.”

⁴⁵ Na' shi kwin dii Davina' golle' Crístona': “Xan”’, ¿berache nazle nake' xiin dia che', shka'?

⁴⁶ Na' ni toe' bi gok yilliigake' xtilleena'. Na' zeelo kana' koch no biyaxji bi inabgakile'ne'.

23

Jesúza' chawe' xya che fariseoka' na' ben'ka' chli' chsedi leya'

(Mr. 12:38-40; Lc. 11:37-54; 20:45-47)

¹ Na'ch Jesúza' golle' ben'ka' nakgake'ne' txen len ben'ka' lle' na', chi'e:

² —Ben'ka' chli' chsedi leya' na' fariseoka' nak lo na'gake' wzajni'gakile' ben' daa bzej dii Moiséza'. ³ Na' chiyal' wzenagle chegake' kat' chzajni'gakile' le' leya' na' gonle ka nan. Per bi gonle ka chongake', la' legake' bi chongake' ka nagake' chiyal' gonle. ⁴ Dii zan dii che'gake' ben' chiyal' gongake', na' nakan ka to yoa' xen dii chwa'gake' ben' dii kono so saki, na' legake' bikz bi chda na'gake' kwenche gaklengake'. ⁵ Na' yog' diika' chongake' chongake'n kwenchezə ile'i ben' ka chongake' na' we'la'ogake' legake'. Na' kajdo'ka' nak de yid daa yoo lat' Cho'a Xtil' Chioza' daa chda' loxgue'ka' na' daa chche' neeka' chongake'n dii xench aga ka che ben' yoblə, na' chtonchgabe' lox xe'ka' aga ka che ben' yoblə. ⁶ Na' kat' chajgabe' lnika', le chibagakile' kwe'gake' gana' chbe' ben'ka' zakii, na' lekzka'yen' chjengake' gana' chdop chllaggake' choe'lwillgake' Chioza'. ⁷ Na' le chibagakile' gap ben' legake' balaan kat' chillaggake' legake' ga lle' lla' ben' na' ye'gake' legake': “maestro”.

⁸ 'San le', bi we'le latj ina ben' le' “maestro”, la' toz nadaan nak' Maestro chele na' yog'le nakle ka bish' ljwellin. ⁹ Na' kono ye'le “xa” lo yell-lioni, la' toz Chioza', beena' zoa yabana', nake' Xale. ¹⁰ Ni bi we'le latj inagake' le' “maestro”, la' toz nad', Cristo, nak' Maestro chele. ¹¹ La' beena' nak ben' gaxjlall' na' chaklene', beenan' nake' ben' zak'chi ladjlena'. ¹² Na' beena' chon kwine' ben' zakii, Chioza' gone'ne' ben' bibi zakii. Na' beena' chon kwine' ka ben' bibi zakii, Chioza' gone'ne' ben' zakii.

¹³ 'iNyesh'laz gak chele, le' chli' chsedile' leya' na' le' fariseo, daa nakle ben' wxiye'! La' chsej chllonle gombia' ben' yel' wñabia' che Chioza', na' ni bi choe'le latj inabi'e le', ni bi choe'le latj che ben'ka' cheengakile' inabi'e legake'.

¹⁴ 'iNyesh'laz gak chele, le' chli' chsedile' leya' na' le' fariseo, daa nakle ben' wxiye'! La' chkaale lill nool wizebka' na' choe'lwill-le Chioza' ssha nleb kwenche gaki ben' nakle ben' wen. Na' daa chonle ka', Chioza' wsak'zi'che' le' aga ka ben' yoblə.

¹⁵ 'iNyesh'laz gak chele, le' chli' chsedile' leya' na' le' fariseo, daa nakle ben' wxiye'! Chdale to ni to na' chyilje ben' wsede' daa chli' chsedile. Na' kat' chllelilene' chónlene' ben' malch aga ka le' na' chlliayi'chlene' axt choplə ka to ba mbiayi'le.

¹⁶ 'iNyesh'laz gak chele, le' nakle ka ben' lchol, ben' chakile' wak wchi'e sto ben' lchol! La' nale: “Shi to ben' wchebe' to dii gone' na' wzoe' yoodo'na' de taschiw kwenche gone' daa bchebe', bi chonan byen gone'n.” Na' chiznale: “Shi wzoe' de taschiw ora' daa de loo yoodo'na', na'chan chiyal' gone' daa bchebe'.” ¹⁷ 'Le' nakle ka ben' lchol daa bi nteyile! ¿Abi chakbe'ile zak'ch yoodo'na' aga ka ora'? La' yoodo'nan' chonan kwenche ora' de lo'inna' nakan che Chios. ¹⁸ Na' lekzka' chiznale: “Shi to ben' wchebe' to dii gone' na' wzoe' de taschiw gana' chzeygabe' bayix'ka' chitgabe' kwenche choe'la'ogake' Chioza', bi chonan byen gone' daa bchebe'. Per shi wzoe' de taschiw bayixaa chxoagake' lawinna',

na'chan chiyal' gone' daa b̄chebe'." 19 ¡Le' nakle ka ben' l̄chol daa bi chajniile! ¿Abi chakbe'ile' gana' chzeygake' bayix̄aa chzanile we'le Chioza' zak'chan aga ka bayix̄aa chzeygake' lawinna'?, la' gana' chzeygake'b chonan leb ba che Chios. 20 La' beena' ch̄cheb wi'e to dii wi'e na' chzoe' de tas̄chiw gana' chzeygake'b, aga toz lennan' chzoe' de tas̄chiw, san lekzka' len yog' daa xoa lawinnan'. 21 Na' beena' ch̄cheb wi'e to dii wi'e na' chzoe' de tas̄chiw yoodo'na', aga toz yoodo'nann' chzoe' de tas̄chiw, san lekzka' len Chiozan' daa nakan lill xlatje'. 22 Na' lekzka' beena' ch̄cheb wi'e to dii wi'e na' chzoe' de tas̄chiw yabana', aga toz yabanan' chzoe' de tas̄chiw, san len Chiozan' daa nakan gana' ch̄nabi'e.

23 ¡Nyesh'laz gak chele, le' chli' chsedile leya' na' le' fariseo, daa nakle ben' wxiye'! Choe'le Chioza' diézmona' axt len yixweja', aníza', na' cominna', per bi chonle daa lliálotech daa nllia Chioza' bia' goncho. Dii lliálotech goncho daa nak sh̄li, yiyesh'lalicho ben', na' gonlilall'cho Chioza' do yichj do lall'cho. Diikin chiyal' gonle, per lekzka' bi chiyal' wsanle gonle diika' sto. 24 ¡Le' nakle ka to ben' l̄chol ben' chakile' wak w̄chi'e sto ben' l̄chol! Na' chonle ka to ben' chone' byen chibeje' to bi'a lesdo' loo yel' wao che'na' na' bi chakbe'ile' chebe' to kamey.

25 ¡Nyesh'laz gak chele, le' chli' chsedile leya' na' le' fariseo, daa nakle ben' wxiye'! Nakle ka xig' yeen dii nxi nyech kolliinna' per lo'inna' bi nxe bi nzak' nakan, daa chonle ka chaki ben' nakle ben' wen per le chzelall'le bi dii de che ben' na' chbanlen. 26 Na' le' fariseo, ¡nakle ka ben' l̄chol daa bi chajniile! Li yiyaj yileni daa chonle kwenche gakele ben' wen ka chaki ben' nakle, na'ch gakele ka xig' yeen dii nxi nyech ka loolə ka koll'lin.

27 ¡Nyesh'laz gak chele, le' chli' chsedile leya' na' le' fariseo, daa nakle ben' wxiye'! La' nakle ka to lill ben' wet dii nyebgake' yiw' na' n̄la' lawinna' xochi, per lo'inna' lle' lla'n llit wetka' na' bichlə dii zban. 28 Kan' nakle le' daa chonle ka chaki ben' nakle ben' li ben' shao' per loo yichjall'do'lena' lle' lla'n de wxiye' na' dii mal.

29 ¡Nyesh'laz gak chele, le' chli' chsedile leya' na' le' fariseo, daa nakle ben' wxiye'! Chonshao'zle gana' bkwash'gake' dii ben'ka' wdixjee daa goll Chioza' legake' kani'yi, na' chonle xochi gana' bkwash'gake' nochlə ben'ka' gok ben' li ben' shao'. 30 Na' nale: "Shel'ka' neto' ba zoanto' kana' wzoa dii xoxzto'nto'ka' aga bennto' legake' txen ka betgake' dii ben'ka' wdixjee daa goll Chioza' legake'." 31 Per kwinzkzlen chli'le nakle toz ben'ka' betgake' dii ben'ka' wdixjee daa goll Chioza' legake' kani'yi, la' toz ka chonlenle legake'. 32 ¡Na' li yisyoll li yisto li gon dii mala' daa bi biyoll gon dii xoxzto'leka'!

33 ¡Le' nakle ka bel' z̄nia! Bi gakele shi wilale lo yi' gabila'. 34 Daan wselaa ben' chixje'gakele' le' daa yepgakee. Wselaa ben' sin' ben' chajniil kwenche wli' wsedgakele' le' cho'a xtillaana'. Per balgake' witle, na' balgake' wda'le lee yag cruza', na' balgake' wit chinle gana' chdop chllagle choe'lwill-le Chioza', na' zi balgake' lljalagle to to yellka' gana' illingake'. 35 Na' daa gonle ka', yidobile yel' wit che yog'lol ben' li ben' shao'ka' bet dii xoxzto'leka', wzolozin dii Abela' beena' gok ben' li ben' shao', axt dii Zacaríaza', xiin Berequíaza', beena' betgake' latja' daa de cho'a yoodo'na', kwit gana' chzeygake' bayix̄'ka'. 36 Dii li nia' le', ka le' zoale naa chidol'le sak'zi'le che yog' daa ben dii xoxzto'leka'.

Jesúza' gokyeshile' che ben' Jerusalénka'
(Lc. 13:34-35)

37 ¡Le' ben' Jerusalén, le' chitle ben'ka' chyixjee daa che' Chioza' legake', na' chlliale yaj ben'ka' chselee chixje'gakele' le' cho'a xtilleena'! ¡Zan shii goklallaa gon' chele ka chon jeda' chiyellb xiindo'bka' xan xilba', na' bi goklall'le! 38 Na' naa ba wlej yichj Chioza' le', na' gani lle'le idesh iloan. 39 Na' nia' le', bich ile'ile nad' axt kat'ch illin lla inale: "¡Gaklenshga Xancho Chioza' beeni ba bselee!"

24

Jesúza' bi'e dill' yiyinj yoodo'na'

(Mr. 13:1-2; Lc. 21:5-6)

¹ Na' ka bichej Jesúza' loo yoodo'na' kwenche yiyaje' gan yoblə, ben'ka' nakgake'ne' txen jabig'gake' kwite'na' na' wzologake' choe'lengake'ne' dill' ka xochi nak yoodo'na'. ² Na'ch che' Jesúza' legake':

—Yog' dga chle'ile naa, dii li nia' le' wllin lla kat' yiyinj doxenan, ni to yaj bich igaan koll' ljwellin.

Diika' gak kat' ba zoa te che yell-lioni

(Mr. 13:3-23; Lc. 21:7-24; 17:22-24)

³ Na'ch biyajgake' lo Yaa Olívoza', na' ka chi' Jesúza' lo yaana' na'ch wbig' ben'ka' nakgake'ne' txen na' xochitezə wñabgakile'ne', che'gake':

—Cheeninto' ino' neto' batran gak daa ba wno'. ¿Nakran gak kat' ba zoa yiyedo' dii yoblə na' kat' ba zoa te che yell-lioni?

⁴ Na'ch che' Jesúza' legake':

—Wsak'yen'gale kwenche kono siye'z le'. ⁵ La' ben' zan ichej inazgake': “Nadaan Crístona'.” Na' ben' zan shajle'. ⁶ Na' yenile chak wdil to ni to na', per bi gakshejlall'le. La' dii chiyal'kz gakan, per aga ba bllin lla te che yell-lionin kat' ba chak ka'. ⁷ La' yidil-len ljwell yellka' na' ben' wñabia'ka' yidil-len ljwellgake', na' kwe' yillwe', kwe' wbin, na' zan yell gak bedxo' wal. ⁸ Kat' ba chak diiki, shinz chzolo ka nak daa yen ile'i ben' yell-lioki.

⁹ Na'ch gongake' le' lo na' ben'ka' wchi' wsak' le', na' witgake' le', na' yog' ben' yell-lioki gakzbangakile' le' daa nonlilall'le nad'. ¹⁰ Na' kat' ba chak diiki ben' zan bich gonlilall'gake' nad', na' gakzbani ljwelle' na' gon ljwellgake' lo na' ben' malka'. ¹¹ Na' ichej zan ben' gonzgake' ka ben' chyixjee daa che' Chioza' legake', na' ben' zan shajle'. ¹² Na' daa kwe'chachga dii mala', ben' zan bich gaggakile' Chioza' ni bish' ljwelle'ka'. ¹³ Per beena' soachech gonlilallee nad' axt ka yiyoll diika' yen ile'ile', beenan' gat' to yel' mban che' zejli kañi. ¹⁴ Na' ka nak dill' wen dill' kob che yel' wñabia' che Chioza', chonan byen lljtixjeegake'n doxen yell-lioni kwenche yog'lol ben' yengakile'n, na' kana'chan te che yell-lioni.

¹⁵ Dii Daniela', beena' wdixjee daa goll Chioza'ne', bzeje' cheyi daa soa loo yoodo'na' daa wñitan balaan cheyinna', na' chiyal' sele wneyi bin zejlin. Na' kat' ile'ile'n loo yoodo'na' ¹⁶ kanan' ben'ka' zoa Judeana' chiyal' wxonjgake' shajgake' yaa yaoka'. ¹⁷ Na' beena' llia koll' lille'na' ni bich gal' yiyetje' lljaleje' dii de loo yoo lille'na'. ¹⁸ Na' beena' chda lyixaa ni bich gal' yiyaje' lille'na' lljaxe' xe'na'. ¹⁹ Nyesh'laz gak che noolka' noa' na' noolka' chwall' chxop llana' gak ka'! ²⁰ Li inabi Chioza' kwenche llana' wxonjile dga bi gakan kat'ka' chbe' dii zaga' wa to lla sabd, llana' chombaancha. ²¹ La' yel' zak'zi' wal inleban nak daa yen ile'ile, daa konon' yen ile'kzi dezd ka wxe wzil yell-lioni axt naa, na' kat' ba wde gokan kochno yen ile'i ka len. ²² Na' shi Chioza' bi wzeshee llaka' gak ka', kono yila, shel'ka'. Per wzesheen daa chakile' ben'ka' ba wleje' kwenche nakgake' lall' nee.

²³ Na' llaka' chak ka' shi no ina le': “Li wwia, ni ze Crístona”, wa ine' le': “Na' zie”, bi shajle'le. ²⁴ La' wchej ben' siye'gake', inazgake': “Nadaan Crístona”, wa “Nadaan chyixji'a daa na Chioza”. Na' lekzka' gongake' dii gonan ka yibani ben', na' gongake' yel' wak xen kwenche siye'gake' ben', axt shel' wxegakile' siye'gake' ben'ka' ba wlej Chioza' nakgake' lo nee. ²⁵ Na' naa ba bzenid' le' ka nak daa zi' gak. ²⁶ Daan shi no inaz le': “Crístona' zoe' latja' gana' bibi chashj chleb”, bi shajle; wa shi no inaz le': “Loo yoona' zoe”, bi shajle'le. ²⁷ La' kat' nad', Ben' Bsel' Chioza' Yell-lioni, zizaa dii yoblə, gak ka chak kat' chep yes na' chzeeni'n doxen xan yabana'. ²⁸ La' gana' de ba weta' nan' chllag llodka'.

*Kat' yiyed Jesucristona'**(Mr. 13:24-37; Lc. 21:25-33; 17:26-30, 34-36)*

²⁹ 'Na' kate yiyoll yel' zak'zi'ka', lii gakte shgasj shchol' lao wbillla' na' bewaa bich wzeeni'n na' beljka' ixopgakan, na' yog' diika' llia xan yabana' inibgakan. ³⁰ Na'ch yog' ben' lle' yell-lioni ile'gakile' nad', Ben' Bsel' Chioza' Yell-lioni, zizaa ladj bejka' kon yel' wak na' balaan xen. Na' yog' ben'ka' lle' doxen yell-lioni kwellyesh'gake'. ³¹ Na' ka kwell trompeta' zillj wselaa anjl cha'ka' zbii zkaan yell-lioni kwenche yitopgake' ben'ka' wlej Chioza' nak lall' nee.

³² 'Na' li wwia ka chak che yag yixwewa': kat' ba chzolo chibia xlaguinna', na' chakbe'ile ba zoa yiyoo la'o linna'. ³³ Ka'kzan, kat' ile'ile ba chak yog' diika' ba wnia' le' gake, na' gakebe'ile ba zoa gaoshosh te che yell-lioni. ³⁴ Dii li nia' le', aga ba wit ben'ki zoa naa kat' gak yog' diiki llia bia' gake. ³⁵ Yabana' na' yell-lioni te chegakin, san cho'a xtilaana' biga te cheyin na' gak ka nan.

³⁶ 'Kono nezi bi lla bi gor te che yell-lioni, ni anjlka' lle' yabana', ni nad' nak' Xiin Chioza'. Toz Xa' Chioza' nezile'n.

³⁷ 'Na' ka gok kana' wzoa dii Noéna', ka'kzan chak kat' nad', Ben' Bsel' Chioza' Yell-lioni, yiyed' dii yoblə. ³⁸ La' ben'ka' wzoa kana' zi' gak yej ziw' wala', cheej chaogake', na' chshagna'gake' na' no choe'gake' yel' wishagna' che xiine'ka' axt llana' wyoolen dii Noéna' xiin xooole'na' loo barkwa'. ³⁹ Na' ben'ka' bi wyoo bi gokbe'gakile' bin gak axt ka wzolo chak yejsiwaa na' bia' nisa' yog'gake'. Na' ka'kzan ni to kono gakebe'i kat' nad', Ben' Bsel' Chioza' Yell-lioni, zizaa. ⁴⁰ Kana'n, gana' lle' chop ben' lyixaa, toe' yichi'a na' beena' sto yigaane'. ⁴¹ Na' gana' lle' chop noolə chotgake', toe' yichi'a na' stoe' yigaane'.

⁴² 'Daan li se kwas kwezle nad' nak' Xanle, la' bi nezile bi lla bi gor zizaa. ⁴³ Li shajni'kachi dga, shel' xan yoona' nezile' bi gor illin ben' wbanna' lille'na', aga wes yele' kwenche bi wi'e latj sho' wbanna' lille'na'. ⁴⁴ Na' daan, li soatezi soa kwezle nad', Ben' Bsel' Chioza' Yell-lioni, la' kat' bilə nonle lez, tokonganzi zizaa.

*Jempl che wen llinka', beena' chon wen na' beena' bi chon wen**(Lc. 12:41-48)*

⁴⁵ 'Na' li gak ka to wen llin ben' chajni' na' chone' daa chiya' gone' na' kat' chza' xane'na' chone' lall' nee lille'na' kwenche wi'e dii yeej gao wen llinka' sto gor cheyin. ⁴⁶ Chakomba wen llinna' daa chilalile' chone' daa chidolee gone' kat' yillin xane'na'. ⁴⁷ La' dii li nia' le', xane'na' gone' lall' nee yog' dii de che'. ⁴⁸ Per shi wen llinna' nake' ben' mal na' gakile': "Wllaljachkzi xan'na' yilee." ⁴⁹ Na' soloe' wit chine' wen llinka' nak lall' nee na' yeej gaolene' weezoka'. ⁵⁰ Na' llana' bi nonyen'le' lez, tokonganzi yillin xane'na'. ⁵¹ Na' daa bi chone' wen, na' wsak'zi'ene' ka sak'zi' ben' wxiye'ka' gana' kwellyesh'gake' na' gaoxaxj leye'ka' daa le gakshejlall'gake'.

25*Jempl che shi bi' nool wew'ka'*

¹ 'Yel' wñabia' che Chioza' chzaklebin daa gok che shi bi' nool wew' wyaj to wishagna', na' bex'gakb' kandil cheb'ka' jlezgakk' bi' byona' lill noola'. ² Na' gay'gakb' nteyi na' zi gay'gakb' bi nteyi. ³ Bi'ka' bi nteyi kontele wza'len kandil cheb'ka', per bich bex'gakb' seta' yigaagakba'n. ⁴ Na' bi'ka' nteyi, bex'gakb' kandil cheb'ka' na' bex'tegakb' seta' yigaagakba'n. ⁵ Na' bi' wishagna'na' wlle'ib' na' bi' nool wew'ka' chbez gokxwesgakk' na' wtesgakk'. ⁶ Na' do ka chel besyaa to ben', chi'e: "iBa za' bi' wishagna'na', li sho' lljatilchob'!" ⁷ Na' wyas bi' nool wew'ka' wzologakb' chiyonshao' kandil cheb'ka'. ⁸ Na' bi' nool wew'ka' bi nteyi gollgakk' bi'ka' zi gay': "Li gon'gach neto' lat' set chelena' la' ba chibill chento'ni." ⁹ Per bi'ka' nox' seta' che'gakk': "Bi gonnto'n, kwenche ki iyalljichon ganga. Wenlə li shaj li lljxi' chelena' gana' chiteen." ¹⁰ Na' shlak zejgakk' zjxi'gakk' seta', bllin bi' wishagna'na' na' bi'ka' nox' seta' wyoolengakb' ben'ka' loo yoona' gana' chak

wishagna'na', na'ch wyej puerta'. ¹¹ Na' ka billin bi' nool wew'ka' jxi' seta', wnegakb' xan yoona' che'gakb': "¡Ben'do', bsaljgach shoonto'!" ¹² Per xan yoona' chi'e legakb': "Bi wsalj', la' bi nombi'a le'."

¹³ Na'ch che' Jesúza' ben'ka':

—Ka'kzə le', chiyal' se kwasle, la' aga nezile bi lla bi gor zizaa.

Jempl che ben'ka' bgaanlen xmech xane'ka'

¹⁴ 'Yel' wñabia' che Chioza' zaklebin dga wseesaa. To ben' wzee zeje' zit', na' ka ba zoa see, goxe' wen llin che'ka' na' bene' lall' na'gake' xmeche'na' kwenche gonlengake'n delgens.

¹⁵ 'Na' toe' bi'e gayaa mil mech de or, na' stoe' chopo milan, na' beena' sto bi'e to milan. Bi'e to toe' kon ka dii chakile' wak gonlengake' llinna'. Na'ch wzee zeje'. ¹⁶ Na' beena' bi'e gayaa milan, benlene'n llin na' bene' gan zi gayaa milan. ¹⁷ Na' lekzka' beena' bi'e chopo milan, benlene'n llin na' bene' gan zi chopo milan. ¹⁸ San beena' bi'e to milan, jtene' to yech na' bkwashen.

¹⁹ 'Na' ka ba gok ssha na' billin xane'ka', na' goxe' to togake' kwenche bidegake' kwent lawe'na'. ²⁰ Na'ch zigaate beena' bi'e gayaa mil mech de or blline' lawe'na', chi'ene': "Xan', ni de de gayaa mila' beño' nad', na' ni de zi gayaa mil daa benlena'n gan." ²¹ Na' che' xane'na'ne': "Le wen beno', to wen llin wen inleeb nako', beno' ka chiyal' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'." ²² Na'ch wdena' bllin wen llinna' bkwaanlene' chopo mil, chi'ene': "Xan', ni de de chopo mila' beño' nad', na' ni de zi chopo mil daa benlena'n gan." ²³ Na'ch che' xane'na'ne': "Le wen beno', to wen llin inleeb wen nako', beno' ka chiyal' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'." ²⁴ Per ka bllin wen llinna' bkwaanlene' to mil, na' golle' xane'na': "Xan', nezid' nako' ben' znia, na' to chizi'zo' banez daa chon ben' yoblə. ²⁵ Na'chan blleb' gonditj' xmecho'na', daan wden' to yech na' bkwashaan. Ni de xmecho'na', bikaagachan, la' chekzo'n." ²⁶ Na'ch che' xane'na'ne': "Ben' lia, bikz bi llin yejni'alallii chono'. Nezteilo' to chizi'z' banez daa chon ben' yoblə. ²⁷ Na' daa nezilo' kan' chon', ¿berache ki joo xmechaa gana' chon yichjin shlak bi wzoa? Shel' beno' ka', na' naa ba biyed' yiyono'n lente yichjinna', shel'ka'." ²⁸ Na'ch golle' ben'ka' lle' na': "Li yikaa mecha' daa bkwaanlene' na' li we'n beena' nap shi milan. ²⁹ La' kan' nakan, beena' chgone' llin daa yoo lo nee, gonche' lall' nee dii xench axt gat' kwe'chile'; san beena' bi chgone' llin daa yoo lo nee, axt daa ngoo lo nee lat' yidoyo. ³⁰ Na' wen llinni bi yejni'alallii, li wzalee gana' shgasj shchol, gana' kwellyeshee na' gaoxaxj leye'na' daa le gakshejlallee."

Ka gak kat' wchoglo Jesúza' che ben'

³¹ 'Kat' ziza' nad', Ben' Bsel' Chioza' Yell-lioni, len balaan xen cha'na' na' yog' anjl cha'ka', na' wli'a yel' wñabia' choo yel' wñabia' xen cha'na'. ³² Na' yog' ben' lle' doxen yell-lioni yidopgake' lawa'na', na' gon' che cheləgake' ka chon to ben' chape' bayix' chone' chelə xil'ka' na' chelə shibka'. ³³ Na' wzoa' shlaa de shli cha'ni ben'ka' zaklebi xil'ka' daa chonlilall'gake' nad', na' ben'ka' zaklebi shibka' daa bi benlilall'gake' nad', wzoagakee shlaa de robes cha'ni. ³⁴ Na' nad', ben' wñabia', yep' ben'ka' lle' shlaa de shli cha'ni: "Li da, ka le' ba ben Xa' Chioza' ka gak wen chele, na' si'le banez daa ba nonshawee chele ka bxe bsiltie' yell-liona'. ³⁵ La' ka wdon', bwaole nad'; na' ka wbilid', benle dii wee'; na' ka wda' ka ben' zit', bleble nad' lill-lena'. ³⁶ Na' ka byallj xalaana', benle dii gokw', na' ka bi shawaa, bidwiale nad'; na' ka gotaa lillyana', bidwiale nad'." ³⁷ Na' yog' ben' li ben' shao'ka' inagake' nad': "Xan', ¿batran ble'into' li' chdono' na' bwaonto' li'? ¿Batran ble'into' li' chbililo' na' bennto' daa weejo'? ³⁸ ¿Batran ble'into' li' chdo' ka ben' zit' na' blebnto' li' loo yoo lillnto'na'? ¿Batran ble'into' li' chdo' bibi xalaano' de na' bennto'n? ³⁹ Na' ¿batran gokbe'into' bi shawoo wa gotoo lillyana' na' bidwianto' li'?" ⁴⁰ Na' nad', ben' wñabia',

yepgakee: “Dii li nia' le', yog' daa benle che ben'ka' byallj bchini, ben'ka' nak ben' bishaa na' ben' zan', la'kzi bi nakgake' ben' zakii, nad'kzan benile ka'.”

⁴¹ Na'ch yep' ben'ka' lle' shlaa de robesi: “Li kwas ka'la, le' wen dii mal. Lo yi' gabila' daa chal' zejli kani chidol'le yiyajle gana' ba non Chioza' sak'zi' dii xiwaa len anjl cheyinka'. ⁴² La' ka wdon' bi benle dii gaw'; na' ka wbilid' bi benle dii yeej'. ⁴³ Na' ka wda' ka ben' zit', aga bleble nad' loo yoo lill-le. Na' ka byallj xalaana', aga bi benle; na' ka bi shawaa wa gotaa lillyana', aga bidwiale nad'.” ⁴⁴ Na' inagake' nad': “Xan', ¿batran wdono', wa wbililo', wa wdoo ka ben' zit', wa bibi xalaano' got', wa bi shawoo, wa gotoo lillyana' na' bi goklennto' li?” ⁴⁵ Na' yepgakee: “Dii li nia' le', daa bi goklenle ben'ka' byallj bchini, ben'ka' nak ben' bishaa na' ben' zan', la'kzi bi nakgake' ben' zakii, nad'kzan bi goklenle.” ⁴⁶ Na' ben' malkan' yiyajgake' gana' tegake' yel' sak'zi'na' zejli kani, na' ben'ka' nak ben' li ben' shao' soalengake' nad' zejli kani.

26

Wloogake' xnezin gox'gake' Jesúza' (Mr. 14:1-2; Lc. 22:1-2; Jn. 11:45-53)

¹ Na' ka biyoll be' Jesúza' yog' dill'ka', na'ch golle' ben'ka' nakgake'ne' txen:

² —Ba nezkzile zi chop llazan chyallj gal' lni Paskwa', na' nad', Ben' Bsel' Chioza' Yell-lioni, gak' lo na' ben'ka' witgake' nad' lee yag cruza'.

³ Na'ch bxoza' chnabia' na' ben'ka' chli' chsedi leya' na' ben' golka' chnabia' ben' Israelka' bdopgake' lill bxoza' choo bxoza' xenna', beena' le Caifás. ⁴ Na' wloogake' xnezin gox'gake' Jesúza' xochizi, ka ki gakbe'i ben', na' witgake'ne'. ⁵ Na' che' ljwelle':

—Bi gox'chone' shlak chal' lni'na' kwenche bi wta wnecho ben'.

To noolə bwazje' set zixa' yichj Jesúza' (Mr. 14:3-9; Jn. 12:1-8)

⁶ Na' ka zoa Jesúza' Betániana' len ben'ka' nakgake'ne' txen, wyajgake' lill to ben' le' Simón, beena' gok yillwe' daa le lepra. ⁷ Na' shlak chi' Jesúza' cho'a mesa', bllin to noolə noxee to lmet de yaj xochi na' yollan set dii chla' zix' dii zak' mech xen, na'ch bwazje'n yichj Jesúza'. ⁸ Na' ka ble'i ben'ka' nak Jesúza' txen daa ben noola', le bllaagake' na' che' ljwelle':

—¿Bi'che benditjz beeni seta? ⁹ Shel' bet'chokle'n, la' dii xen zakaan, na' bi'e xmechinna' ben' yesh'ka', shel'ka'.

¹⁰ Na' beni Jesúza' ka choe'gake' dill', na' golle' legake':

—¿Bi'che chnezle che nooli? La' daa ba bene' cha' nakan dii wen. ¹¹ Ka nak ben' yesh'ka', toshiizi soagake' ladjlena', san nad', aga toshiizi soalen' le'. ¹² Daa ba bwazj nooli nad' set zixa', bene' ka' kwenche gakshao' zega kwerp cha'ni kat' wkwash'gake' nad'. ¹³ Na' dii li nia' le', gatteza' we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' ljadingakile'ne'.

Juda' bdie' Jesúza' lo na' bxoza' chnabia' (Mr. 14:10-11; Lc 22:3-6)

¹⁴ Na'ch beena' le Jud Scariot, beena' nak txen ben'ka' shllin, wyaje' lao bxoza' chnabia'. ¹⁵ Na' golle' legake':

—¿Ka'k' chixjle nad' shi gon' Jesúza' lo na'le?

Na'ch wdixjgake'ne' shichoa mech plat. ¹⁶ Na'ch lo llana'tez wzolo Juda' chinoe' nakan gone' kwenche gone' Jesúza' lo na' ben'ka'.

Xancho Jesúza' wdaolene' ben'ka' nakgake'ne' txen xshe'na' (Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Lla nech che lni Paskwa', llana' chaogake' yetxtila' daa bi nchix levadúrana', ben'ka' nak Jesúza' txen wyajgake' kwite'na' che'gake'ne':

—¿Ga cheenilo' lljasini'anto' xshe' che l̄ni Paskwi?

¹⁸ Na'ch che' Jesúza' legake':

—Li shaj yell Jerusalénna', na' beena' yillagle ye'lene': “Maestrona' ne' ba zoa gak daa llia bia' gak che', na' lillo'na' cheenile' wsini'anto' daa gaolennto'ne' xshe' che l̄ni Paskwi.”

¹⁹ Na'ch beṅ'ka' nakgake'ne' txen bengake' kon ka golle' legake', na' jasini'agake' xshe' che l̄ni Paskwa'.

²⁰ Na' ka gol, wche'len Jesúza' beṅ'ka' shllin cho'a mesa'. ²¹ Na' shlak chaogake' che' Jesúza' legake':

—Dii li nia' le', tole gonle nad' lo na' beṅ'ka' chakzi' chakzbani nad'.

²² Na' ka golle' legake' ka' le gokyesh'gakile' na' to toe' che'gake'ne':

—Xan', ¿anadaan gon' ka', lla?

²³ Na'ch che' Jesúza' legake':

—Beena' ba bleejlene' nad' yetxtil che'na' loo yeeṅa', beena'kzan' gone' nad' lo na' beṅ'ka' chakzi' chakzbani nad'. ²⁴ Ka nak nad', Beṅ' Bsel' Chioza' Yell-lioni, wit beṅ' nad' kon ka na Cho'a Xtill' Chioza', per jnyesh'laz gak che beena' gone' nad' lo na' beṅ'ka'! jNaklan wen shel'ka' bi golje'!

²⁵ Na'ch Juda', beena' wdie' Jesúza' lo na' beṅ'ka', chi'ene':

—Maestro, ¿anadaan gon' ka'?

Na'ch che' Jesúza'ne':

—Kan' ba wno'z.

²⁶ Na' shlak chaogake', beṅ' Jesúza' yetxtila' na' bi'e Chioza' yel' choṅken, na' bxoxje'n na'ch bi'en beṅ'ka' nakgake'ne' txen, chi'e:

—Li gao dga. Lennan' kwerp cha'ni.

²⁷ Na'tech beṅee to kop dii yoll vino, na' bi'e Chioza' yel' choṅken na' bi'en legake', na' golle':

—Yog'le li yeej dga yoll loo kopi, ²⁸ la' lennan' xchen'na' daa gon ka gak li dii koba' bcheb Chioza' gone'. Na' laljan kwenche yiyakxen saaxya che beṅ' zan. ²⁹ Na' nia' le', ni zeelo cheejlen' le' nis uvani. Aga weejcha'n axt kat'ch illin lla soacho txen gana' chṅabia' Xa' Chioza', kana'chan yeejlana'n le' dii yoblá.

Jesúza' chi'e bi wcheb Pédrona' shi nombi'ene'

(Mr. 14:26-31; Lc. 22:31-34; Jn. 13:36-38)

³⁰ Na' ka bidaogake', beṅake' be'la'ogake' Chioza' na'ch biyajgake' lo yaa Olívoza'. ³¹ Na' ka ziyajgake', che' Jesúza' legake':

—Yog'le kwej yichjle nad' naanlle'. La' kin na Cho'a Xtill' Chioza': “Wit' beena' chap xil'ka' na' illeshlesgakb.” ³² Per ka yiban' ladj beṅ' wetka', yiyaa Galileana' lljalez' le'.

³³ Na'ch che' Pédrona'ne':

—La'kzi yog' beṅ'ki kwej yichjgake' li', nad' bi kwej yichj' li'.

³⁴ Na'ch che' Jesúza'ne':

—Dii li nia' li', naanlle' shon shii bi wchebo' shi nombi'o nad' ka zi' kwell shikwteza'.

³⁵ Na' Pédrona' chi'ene':

—La'kzi guetlencia' li', biga inia' bi nombi'a li'.

Na' ka'kzə goll yog'loḷ beṅ'ka' nakgake'ne' txen.

Jesúza' be'lwille' Chioza' latja' le Getsemaní

(Mr. 14:32-42; Lc. 22:39-46)

³⁶ Na' ka bllinlen Jesúza' beṅ'ka' nakgake'ne' txen latja' le Getsemaní, na'ch golle' legake':

—Nizə li kwe' shlak shaa daa ka'lə llje'lwil' Chioza'.

³⁷ Na' bchi'e Pédrona' na' chop bish'te xiin Zebedewa', na' wzolo chakyeshile' dii wal inleeb. ³⁸ Na' golle' legake':

—Axt chaklikazid' lii guettia' daa le chakyeshii yichjlall'dawaani. Li igaan nizə na' bi guesle.

³⁹ Na' blee legake' zi lat' na' bchek' yichje'na' lo yona' na' be'lwille' Chioza', chi'e:
—Xadawaa, shi wakan, bengach ka ikwas dga yen ile'id', per aga gak ka cheenid', san gak ka cheenilo'.

⁴⁰ Na'ch biyaje' gana' lle' ben'ka' shon, na' ble'ile' ba chesgake'. Na' golle' Pédrona':
—¿Abikzə bchejlat'gaile la'ch' tgor kwezle nad' bi guesle? ⁴¹ Bi guesle. Li we'lwill Chioza' kwenche bi we'zle latj gon beli chenna' le' gan. Aga ki cheeni yichjlall'do'lena' gonlen per beli chenna' bi chizoin.

⁴² Na'ch wyaje' de wchop shii jelwille' Chioza', chi'e:

—Xadawaa, shi ba naktēn idil illag' dga, gakkzə ka cheenilo'.

⁴³ Na' ka billine' dii yoblə lekzka' cheslagake' daa bi wzogakile' bishgala'. ⁴⁴ Na' bikzə bisbane' legake', na' wzee sto shii jelwille' Chioza' de wyon shii na' golle'ne' ka ba gollkze'ne'. ⁴⁵ Na'ch biyaje' gana' bgaan ben'ka', na' golle' legake':

—¿Ani chestkile? Ba bllin gor nad', Ben' Bsel' Chioza' Yell-lioni, gak' lo na' ben' saaxyaka'. ⁴⁶ Li chas na' li sho'. Ba za' beena' wdie' nad' lo neeka'.

Bex'gake' Jesúsza'

(Mr. 14:43-50; Lc. 22:47-53; Jn. 18:2-11)

⁴⁷ Bilan' yiyoll yee Jesúsza' ka' ka bllin Juda' beena' nak txen ben'ka' shllin, nchi'e ben' zan ben'ka' bsel' bxozka' chnabia' len ben' golka' chnabia' ben' Israelka'. Na' nox'gake' no spad na' no yag. ⁴⁸ Na' Juda' ba bzajniile' ben'ka' nchi'e nakan gone' wli'e beena' gox'gake', golle': "Kon beena' wnop', len gox'le."

⁴⁹ Na' ka bllinlene' ben'ka' kwit Jesúsza', lii wbig'tie' lawe'na' chi'ene':

—¿Chiox naa, maestro!

Na'ch bnope'ne'. ⁵⁰ Na' Jesúsza' golle'ne':

—Bish'dawaa, ben daa zidyeno'.

Na'ch lii wbig'te ben'ka' bex'gake' Jesúsza'.

⁵¹ Na' ka bex'gake'ne', to beena' nake'ne' txen wleje' spad che'na' na' wdine'n xmos bxoz choo bxoz xenna', bchogtie' tlaa nague'na'. ⁵² Na'ch goll Jesúsza'ne':

—Bigoosha' spad cho'na', la' yog' ben'ka' chitgakile' ben' yesya, lekzka' len guetgakile'.

⁵³ ¿Achakile bi gak inabid' Xa'na' gaklene' nad' na' lii wsel'tie' anjl zan inleeb, shel'ka'? ⁵⁴ Per shi ka' gon', ¿nakra gak yillini Cho'a Xtill' Chioza' gana' nan chonan byen gak ki?

⁵⁵ Na'ch goll Jesúsza' ben'ka' ba nox'gake'ne':

—¿Achakile' no wban no nad' za'lenzle no spad no yag kwenche gox'le nad'? Yog' lla bli' bsedid' ben' loo yoodo'na', ¿biche bi bex'le nad' shlak bli' bsedid' ben' na'? ⁵⁶ Per daa chonle ki, chillinin ka na Cho'a Xtill' Chioza' daa bzej dii ben'ka' wdixjee daa golle' legake'.

Na'ch yog'lol ben'ka' nak Jesúsza' txen bxonjgake' na' bkwaan'gake' toze'.

Jwa'gake' Jesúsza' lao ben'ka' chnabia' ben' Israelka'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Na' ben'ka' bex'gake' Jesúsza' jwa'gake'ne' lill Caifáza', beena' nak bxoz choo bxoz xen, na' lille'na' ba ndop nllag ben'ka' chli' chsedi leya' na' ben' golka' chnabia'. ⁵⁸ Na' Pédrona' janoe' Jesúsza' de zit'lə, bllintie' lesh' chyoo che bxoz choo bxoz xenna' na' jche'lene' ben'ka' chap yoodo'na' kwenche ile'ile' ka gak che Jesúsza'.

⁵⁹ Na' bxozka' chnabia' len ben'ka' chnabia' ben' Israelka' wdiljgake' ben' chiljlallee che Jesúsza' kwenche wchoglogake' guete'. ⁶⁰ Na' la'kzi ben' zan ben'ka' biya dii biyiljlall'gake' che Jesúsza', aga bidili cho'a dill' che'ka', axt ki bllin chop ben' ⁶¹ be'gake' toz dill', che'gake':

—Ki wna beeni: "Nad' wak yichinj' yoodo' che Chioza' na' shon llazə yiyontia'n dii yoblə."

⁶² Na'ch wzolla' bxoz choo bxoz xenna', golle' Jesúsza':

—¿Abikz bi ino' cheyi dga nagake' cho'?

⁶³ Na' Jesúza' bikzə wñie'. Na'ch che' b̄xoz choo b̄xoz xenna'ne':

—Chios yaa Chios banna' soe' de tas̄chiw. Wnashki neto' shi lin' Crístona', beena' nak Xiine'.

⁶⁴ Na' goll Jesúza'ne':

—Awe, kan' nakan. Na' lekzka' nia' le', wle'ile nad', Beñ' Bsel' Chioza' Yell-lioni, kwi'a sh̄laa de sh̄li che Chioza', beena' zeelo nap yel' wak choo yel' wak xenna', na' lekzka' ile'ile nad' zizaa ladj bejka' ze xan yabana'.

⁶⁵ Na'ch bsho' b̄chez' xa b̄xoz choo b̄xoz xenna'. Na' daa bene' ka', bli'e nan le bllee, na' wne:

—¡Kwinle ba benile naz beeni nake' Xiin Chioza'! Bich chyalljicho beñ' gao xya che'.

⁶⁶ ¿Bi ka inale?

Na'ch gollgake'ne':

—Chiyal' guete'.

⁶⁷ Na'ch bllaa xeneeka' cho'alao Jesúza' na' wdap' wlall'gake'ne'. ⁶⁸ Na' che'gake'ne':

—Shi lin' Crístona', wnashki non wdap' wlall' li'.

Pédrona' bi b̄chebe' shi nombi'e Jesúza'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' shlak chak ka', Pédróna' chi'e lesh' chyooná' ka bllin to noolə wen mandad kwite'na' chi'ene':

—Lenon' nako' txen Jesúza', beñ' Galileana'.

⁷⁰ Na' lao yog' beñ'ka' lle' na', aga b̄cheb Pédróna' shi nake' Jesúza' txen, na' golle' noola':

—Bi nezd' bin no'.

⁷¹ Na' ka ziyaje' cho'a puerta' bizle'i sto beñ' yoblə le' na' chi'e beñ'ka' lle' na':

—Len beenin nake' txen Jesúza', beñ' Nazareta'.

⁷² Na' lekzka' aga biz̄cheb Pédróna' shi nake' Jesúza' txen, bzoatie' Chioza' de tas̄chiw, chi'ene':

—Bi nombi'a beena'.

⁷³ Na' gokzə xtít na' jabig' beñ'ka' lle' na' kwit Pédróna' na' che'gake'ne':

—Dii likzan lenon' nako' legake' txen, la' lii nakbia'te ka chshaljo'.

⁷⁴ Na'ch wzolo Pédróna' chone' zñia, chi'e:

—¡Dii bal̄kzan nia' bi nombi'ane'! ¡Chioza' wsak'zi'e nad' shi chziye'zan'!

Na' biyoll wne' ka' lii wchellte shikwteza'. ⁷⁵ Na'ch jadini Pédróna' daa goll Jesúza'ne': “Shon shii bi w̄chebo' shi nombi'o nad' ka zi' kwell shikwteza'.” Na'ch biza' Pédróna' chbellyeshee.

27

Jwa'gake' Jesúza' lao Pilátóna'

(Mr. 15:1; Lc. 23:1-2; Jn. 18:28-32)

¹ Na' ka wyeeni', yog'lol̄ b̄xozka' chñabia' na' beñ' golka' chñabia' beñ' Israelka' bengake' toz dill' witgake' Jesúza'. ² Na' b̄chejgake'ne' jwa'gake'ne' lao Pilátóna' beena' chñabia' gana' mbani Judeana'.

Wit Juda'

³ Juda', beena' bene' Jesúza' lo na' beñ'ka', ka gokbe'ile' ba nakan witgake' Jesúza' na' wdao bdiachgan le'. Na'ch wyaje' lao b̄xozka' chñabia' na' lao beñ' golka' chñabia' jasane' shichoate mech de plata' daa be'gake'ne'. ⁴ Na' chi'e legake':

—Le malchga beñ' daa bdiat' to beñ' bibi dol' nape' lo na'lena'.

Na' legake' che'gake'ne':

—¿Bera kwent che neto'? Li'z nezdilo' bin beno'.

⁵ Na' jaza' Juda' mecha' loo yoodo'na', na' tech jayet kwine' jaloo do yene'.

⁶ Na' b̄xozka' chñabia' bitopgake' mecha' na' che' ljwellgake':

—Bi gak yiyonchon toz mech che yoodo'na', la' nakan dii ba nap xya.

⁷ Na' be'gake' dill' yizi'gakile' mecha' to yell-lío dii le Yell-lío che Ben' Wen Yes' gana' wkwash'gake' ben' zit'ka'. ⁸ Daan ax̄t naanlla yell-liona' len Yell-lío Chen. ⁹ Na' daa gok ka', billinin ka wna dii Jeremíaza', beena' wdix̄jee daa goll Chioza'ne', ka wne': "Bikaagake' shichoa mech plat daa b̄chogbia' ben' Israelka' zak' beena'. ¹⁰ Na' kon len wxi'gakile' Yell-lío che Ben' Wen Yesaa, kon kana' wna X̄ancho Chioza' nad'."

Bllin Jesúza' lao Pilátona'

(Mr. 15:2-5; Lc. 23:3-5; Jn. 18:33-38)

¹¹ Ka bllin Jesúza' lao Pilátona', na'ch che' Pilátona'ne':

—¿Alin' ben' w̄nabia' che ben' Israelka'?

Na' che' Jesúza'ne':

—Kan' ba wno'.

¹² Na' shlak b̄xozka' ch̄nabia' na' ben' golka' ch̄nabia' ben' Israelka' chaogake' xya che', bibi dill' billi'e legake'. ¹³ Na'ch goll Pilátona'ne':

—¿Abi chenilo' diika' chaogake' xya cho'?

¹⁴ Per Jesúza' ni to diika' chaogake' xya che' ni sh̄cho'a dill' bi billi'e, na' le bibanchgayi Pilátona'.

B̄choglogake' guet Jesúza'

(Mr. 15:6-20; Lc. 23:13-25; Jn. 18:38–19:16)

¹⁵ Na' ben' w̄nabia'na' yooloe' yog' yiz chisane' to ben' de lillyana' lla l̄ni Paskwa', kon beena' inab yog' ben' yell yisane'. ¹⁶ Na' de to ben' lillyana', ben' le zeyi che' nake' ben' mal, na' lie' Barrabás. ¹⁷ Na' ka ndop nllag ben' yellka', che' Pilátona' legake':

—¿No ben'ki cheenile yisan'?, ¿aBarrabáza', awa Jesúzi, beeni nsi'gake' Cristo?

¹⁸ Golle' legake' ka' la' gokbe'ile' daa chakxe'gakile' Jesúzan' jwa'gake'ne' lawe'na'.

¹⁹ Shlak chi' Pilátona' gana' chone' yel' joschisa', bsel' xoolena' to rson, chi'ene': "Bi gaklebiló' ben'ka' chao xya che beena', la' aga bi dol' che' de, la' nll'e'yi w̄neid' to yel che', na' le bsheban nad'."

²⁰ Per b̄xozka' ch̄nabia' na' ben' golka' ch̄nabia' ben' Israelka' wlooyel'gake' ben'ka' lle' lla' na' inabgake' yisane' Barrabáza' na' gone' mandad guet Jesúza'. ²¹ Na' Pilátona' sto shii w̄nabile' legake':

—¿No ben'ki chop cheenile yisan'?

Na' ben'ka' che'gake'ne':

—¿Bisan Barrabáza'!

²² Na' che' Pilátona' legake':

—Na' ¿bera ka gonid' Jesúzi beeni nsi'gake' Cristo?

Na' yog'lóle' che'gake'ne':

—¿Bdee lee yag cruza'!

²³ Na' che' Pilátona' legake':

—Per ¿bera dii malan' ba bene'?

Na' legake' zizikli chosyaadiagake', che'gake'ne':

—¿Bdee lee yag cruza'!

²⁴ Na' ka gokbe'i Pilátona' bich bi de gone' daa zizikchli ba chaklleshgakile', bene' mandad j̄xi'gake' nisa' kwenche binee lao yog' ben'ka', na' chi'e':

—Aga bi dol' nap' nad' daa guet beeni. Len' gak xbag'lene'.

²⁵ Na' yog'lól ben'ka' che'gake'ne':

—¿Neto' len xī̄nto'ka' idobinto'ne'!

²⁶ Na'ch bisan Pilátona' Barrabáza', na' bene' mandad bet wdingake' Jesúza' na' bene'ne' lo na'gake' kwenche wda'gake'ne' lee yag cruza'.

²⁷ Na' soldadka' b̄che'gake' Jesúza' gana' chon Pilátona' yel' joschisa' na' biti'agake' yog'lól soldadka' nakgake' txen. ²⁸ Na'ch wdingake' xa Jesúza' na' bwakwngake'ne' to lech'

xna ka che to ben' wñabia'. ²⁹ Na' bengake' to bxoön de xis yesh' na' bllingake'n yichje'na' ka to corona, na' nee de shlina' bgox'gake'ne' to bar. Na'ch bçhek' xibe'ka' lawe'na' na' btitjgakile'ne' che'gake':

—i Toshiizi sechgayi che beeni chñabia' ben' Israelka'!

³⁰ Na'ch no chlla' xeneeka' le', no chikaagake' bara' daa bgox'gake'ne' na' chyingake'n yichje'na'. ³¹ Na' ka wde btitjgakile'ne' na'ch biyিংake' lechaa bwakwgake'ne' na' biwakwgake' xe'na' nakwkze'. Na'ch bçhe'gake'ne' kwenche wda'gake'ne' lee yag cruza'.

Bda'gake' Jesúza' lee yag cruza'

(Mr. 15:21-32; Lc. 23:26-43; Jn. 19:17-27)

³² Na' ka ba chchejgake' cho'a yell Jerusalénna', billaggake' to ben' Cirene, ben' le Simón, na' bengake' byen bi'e yag cruz che Jesúza'.

³³ Na' ka' bllingake' latja' le Gólgota, na' zejin Latj che llit yichj ben' wet. ³⁴ Na' nan wweejgake' Jesúza' vino daa nchix' to dii zla', per ka bnixe'n, bi goonile' yeeje'n.

³⁵ Na' ka biyoll bda'gake'ne' lee yag cruza', soldadka' bengake' to wyitj kwenche got'bia' nogake' yidol' xa Jesúza'. ³⁶ Na'tech wche'gake' wdapgake'ne'. ³⁷ Na' yichj yag cruz che'na' bda'gake' to dii choe'n dill' biche nda'gake'ne' na', na' nan: "Beenin Jesúza', ben' wñabia' che ben' Israelka'."

³⁸ Na' lekzka' bda'gake' chop ben' wban shlaa wej kwit yag cruz che Jesúza'. ³⁹ Na' ben'ka' chde gana' dee, chta yichje'ka' na' chgoogake'ne' belban, ⁴⁰ che'gake'ne':

—Li' wno' yichinjo' yoodo'na' na' shon llazə yiyontio'n, i bsla kwino' lee yag cruzi shi leilo' nako' Xiin Chios!

⁴¹ Na' lekzka' bxozka' chñabia' na' ben'ka' chli' chsedi leya', na' fariseoka' len ben' golka' chñabia' btitjgakile'ne', che' ljuwelle':

⁴² —Gok bisle' ben' yoblə per bi chak yisla kwine'. Shi leile' len' ben' wñabia' chechona', cho' ben' Israel, yiyetjshkile' lee yag cruza' naa kwenche shajle'cho che'. ⁴³ Nxenilallee Chioza'. Yislashkile'ne' naa shi leile' chakile'ne', la' wne' nake' Xiin Chios.

⁴⁴ Na' axt wbanka' da' lee yag cruza' kwite'na' lekzka' biya dii che'gake'ne'.

Wit Jesúza'

(Mr. 15:33-41; Lc. 23:44-49; Jn. 19:28-30)

⁴⁵ Na' do ka gobill kat' bichol doxen yell-lioni axt do ka chida shonch biyeeni'. ⁴⁶ Na' do ka chida shonə besyaa Jesúza' zilljə, ne':

—Elí, Elí, ¿lama sabactani? —na' zejin: Chios cha', Chios cha', ¿biche ba wlej yichjzo' nad'?

⁴⁷ Na' bal ben'ka' lle' na', bengakile' ka wne', na'ch che'gake':

—Elíazan' chaxe', beena' wdixjee daa goll Chioza'ne' kani'yi.

⁴⁸ Na' toe' lii zejdotie' jxi'e to dii bleeje' loo vino daa nak zichj zla', na'ch bzoe'n to lo xis na' jazoe'n cho'a Jesúza' kwenche yeeje'n. ⁴⁹ Na' ben'ka' sto che'gake':

—Jwayishkile'na', la'shki shi wid Elíaza' kwenche yidsle'ne'.

⁵⁰ Na' ka biyoll besyaa Jesúza' zilljə dii yoblə, na' wite'. ⁵¹ Na' ka wite', lechaa ze loo yoodo'na' lii bchez'ten gokan choplə. Na' gok to bedxo' na' wlaa yajka'. ⁵² Na' lekzka' axt biyalj gana' bgash' ben' wetka'. Na' zan ben' wetka', ben'ka' ben'ilall' Chioza', bibangake' sto shii ⁵³ na' bichejgake' gana' bgash'gake'. Na' ka bibanch Jesúza', biyoogake' yell Jerusalénna', na' ben' zan ble'gakile' legake'.

⁵⁴ Na' xan soldadka' len ben'ka' chaplene' Jesúza' le bblebgake' ka wxo' na' bichlə diika' gok. Na' wngake':

—Dii likzan Xiin Chios beeni.

⁵⁵ Na' zan noolka' wno Jesúza' dezd gana' mbani Galileana', ben'ka' goklengake'ne' che bi dii byalljile', lle'gake' de zit'lə bwiagake' doxen ka gok. ⁵⁶ Na' ladje'ka' len María, ben' yell Magdálana', na' María beena' nak xna' Jacóbona' len Joséna', na' xna' ben'ka' nak xiin Zebedewa'.

*Bkwash'gake' Jesúza'**(Mr. 15:42-47; Lc. 23:50-56; Jn. 19:38-42)*

⁵⁷ Na' ka chzeles yela' bllin to beñ' wni'a lie' José, beena' nak beñ' yell Arimatea na' goke' txen Jesúza'. ⁵⁸ Na' wyaje' lao Pilátona' janabe' kwerp che Jesúza', na' Pilátona' bene' mandad biyoe'gake'ne'. ⁵⁹ Na' bikaa Joséna' kwerp che Jesúza' na' bitobe'ne' to lech' xtil. ⁶⁰ Na' jlo'ene' to loo ba kob dii zi' benschawee to lee yaj. Na'tech bdee to yaj xen cho'ayinna'. Na'ch bizee. ⁶¹ Na' María, beñ' yell Magdálana', len Maríana' sto wche'gake' cho'a bana'.

Beñ'ka' wdap cho'a ba che Jesúza'

⁶² Na' betiyo, llana' chombaañ beñ' Israelka', wyaj bꝑozka' chꝑabia' len fariseoka' lao Pilátona', ⁶³ che'gake'ne':

—Beñ'do', ba jadininto' ka wna dii beñ' wxiye'na' kana' mbane', wne' yiyon lla yibane' dii yoblə ladj beñ' wetka'. ⁶⁴ Na' bsel'gach beñ' lljtape' gana' bkwash'gake'ne' axt ka gakch shon lla kwenche bi shaj beñ'ka' nakgake'ne' txen do wal chel lljalejgake' kwerp che'na', na' tena' ye'gake' beñ': “Ba bibane' dii yoblə ladj beñ' wetka'.” La' shi ba bengake' ka', na'ch gongake' to dii wxiye' walch aga ka dii necha'.

⁶⁵ Na'ch che' Pilátona' legake':

—Na' lle' soldadka', li wche'gake' kwenche gapgake'n axt ga zeelo gakgake'.

⁶⁶ Na'ch wyajlengake' soldadka' na' bsejchachgake' gana' da' yaja' nkwasha'n cho'a bana'. Na'ch bzoagake' soldadka' kwenche gapgake'n.

28*Biban Jesúza' ladj beñ' wetka'**(Mr. 16:1-8; Lc. 24:1-12; Jn. 20:1-10)*

¹ Na' ka wde lla sabda', llana' chombaangake', ni bal lla nech che xmanna' sto, wyaj María nool Magdálana', len Maríana' sto jawiagake' cho'a bana'. ² Na' wzolo to bedxo' xen wal daa betj to anjl che Xancho Chioza' yabana', na' ka blline' cho'a bana' na' bikwase' yaja' daa nsejan cho'a bana' na' willie' lawinna'. ³ Na' anjla' chey cheeni'e kakzə ga chep yes na' xe'na' nakan xtil inleeb. ⁴ Na' ka ble'i soldadka' le' axt bxiztitgake' daa le bllibgake' na' axt witgake' shlet. ⁵ Na'ch che' anjla' noolka':

—Bi illeble. Nezd' Jesúzan' chiyiljle, beena' wit lee yag cruza'. ⁶ Koch no de ni. Ba bibane' kon ka wne'. Li dakachi wwiale gani wdixjgake'ne'. ⁷ Na' li yiyajdo li lljayell beñ'ka' nakgake'ne' txen: “Ba bibane' ladj beñ' wetka' na' ba ziyaje' Galileana' lljaleze' le', na' na'kzə ile' ilene'.” Na' ba wnia' le' ka'.

⁸ Na'ch biza'do noolka' cho'a bana' chllebgake' na' le chibagakile' zjadixje'gakile' beñ'ka' nak Jesúza' txen daa goll anjla' legake'. ⁹ Na' ka ziyajgake', bli'lao Jesúza' legake' na' bwape' legake' chiox. Na' jabig'gake' kwite'na' na' wdel'gake' ni'ena' be'la'ogake'ne'.

¹⁰ Na' che' Jesúza' legake':

—Bi illeble. Li lljayell beñ' bishaaka' shajgake' Galileana' na' ile'gakile' nad' na'.

Wxi' laxj soldadka' kwenche bi we'gake' dill' biban Jesúza'

¹¹ Na' ka biza' noolka', bal soldadka' wdap gana' bkwash'gake' Jesúza' biyajgake' yell Jerusalenna' jayellgake' bꝑozka' chꝑabia' yog' diika' gok. ¹² Na'ch wyaj bꝑozka' chꝑabia' je'lengake' beñ' golka' chꝑabia' dill' naklə ka gongake' daa goll soldadka' legake'. Na' ka biyoll be'gake' dillaa, na'ch be'gake' soldadka' mech xen, ¹³ che'gake':

—Inatezle wal chel shlak chesle, beñ'ka' nak Jesúza' txen bidlejgake' kwerp che'na'.

¹⁴ Na' shi ba binezi Pilátona' dga, neto'kzə lljazajniinto'ne' nakan gok kwenche bibi gonile' le'.

¹⁵ Na'ch soldadka' beꝑ'gake' mecha' na' biza'gake' jazegake'n dill' kon ka gollgake' legake'. Na' axt naanlla beñ' Israelka' ni nagake' ka'.

Jesúza' golle' legake' we'gake' xtilleena' doxen yell-lioni
(Mr. 16:14-18; Lc. 24:36-49; Jn. 20:19-23)

¹⁶ Na' wyaj beṅ'ka' shnej, beṅ'ka' nak Jesúza' txen, Galileana' kwenche yillaggake' Jesúza' lo yaana' gana' golle' legake'. ¹⁷ Na' ka ble'gakile' Jesúza', be'la'ogake'ne', per balgake' gokchoplall'gake'. ¹⁸ Na'ch jabig' Jesúza' kwite'ka', chi'e legake':

—Ba non Chioza' lo na' inabi'a yabana' na' yell-lioni. ¹⁹ Daan, li shaj doxen yell-lioni, li lljali' lljasedi yog' beṅ' kwenche gakgake' nad' txen. Na' wchoale legake' nis daa ba nonlilall'gake' Xacho Chioza', na' nad', Xiine', len Espíritu Sántona'. ²⁰ Na' wli' wsedile legake' gongake' yog' diika' ba ben' mandad gonle. Na' nad' soalen' le' toshiizi axt ka te che yell-lioni.

Dill' wen dill' kob daa bzej Márcona'

Juanna', beena' bchoa ben' nis

(Mt. 3:1-12; Lc. 3:1-9, 15-17; Jn. 1:19-28)

¹ Ki wzolo dill' wen dill' kob che Jesucristona', beena' nak Xiin Chioza'.

² Gok ka wna dii Isaíaza', beena' wdixjee daa goll Chioza'ne':

Wselaa to ben' kwialoe' lawo'na',

wi'e xtilloona' kwenche ba lle' ben' wzenague' cho' kat' illino'.

³ To ben' wnie' zilljə to lo latj gana' bibi chashj chleb, chi'e:

“Li se kwas wzenagle che Xanchona' na' wsalj yichjlall'do'leka' kat' zee.”

⁴ Na' bllin Juanna' latja' gana' bibi chashj chleb. Bchoe' ben' nis, na' wdixje'ile' ben' chiyal' yiyaj yilengakile' na' choagake' nis kwenche yizi'xen Chioza' saaxya che'ka'. ⁵ Na' yog' ben'ka' lle' gana' mbani Judeana' na' ben'ka' lle' yell Jerusalénna' jazenaggake' dillaa cho'e. Na' bixoadol'gake' saaxya che'ka', na' bchoa Juanna' legake' nis loo yao Jordánna'.

⁶ Na' xa Juanna' gokan de xa kamey na' bchej lsineena' to yid. Na' wdawe' bish'zo na'ch shin baser dii de lyixaa. ⁷ Na' wdixje'ile' ben'ka' cho'a xtill' Chioza', chi'e:

—Zi' za'lə beena' napch yel' wak xench ka nad', na' ni bi zakaa gak' xmose' kwenche wlechj' xe'le'na'. ⁸ Nad' ba bchoa' le' nisa', san le', gone' ka yidsoa Espiritu che Chioza' loo yichjlall'do'lena'.

Jesúza' wchoe' nisa'

(Mt. 3:13-17; Lc. 3:21-22)

⁹ Na' kana'yen' Jesúza' wzee yell Nazareta' daa lliá gana' mbani Galileana' na' wyaje' cho'a yao Jordánna' gana' bchoa Juanna'ne' nisa'. ¹⁰ Na' shlak chichej Jesúza' loo nisa', ble'ile' byalj yabana' na' betj Espiritu che Chioza' jsoalene'ne' na' ble'ile' Espirituna' ka to palom. ¹¹ Na' bengakile' wne Chioza' yabana', chi'e Jesúza':

—Lin' nako' Xiin', chakchgaid' li' na' le' chibaid' li'.

Dii xiwaa goklalliin kooyela'n Jesúza' gone' ka cheenin

(Mt. 4:1-11; Lc. 4:1-13)

¹² Na' lii bche'te Espiritu che Chioza' le' latja' gana' bibi chashj chleb. ¹³ Na' wzoe' na' choa lla ladj ba zniaka', na' Satanáza' daa chnabia' dii xiw'ka' goklalliin kooyela'n le' gone' ka cheenin. Na' ka wde, jaklen anjka' le'.

Wzolo Jesúza' choe'lene' ben' xtill' Chioza' gana' mbani Galileana'

(Mt. 4:12-17; Lc. 4:14-15)

¹⁴ Biyoll wloogake' Juanna' lillyana', Jesúza' wyaje' gana' mbani Galileana' na' je'lene' ben' dill' wen dill' kob che Chioza', ¹⁵ chi'e:

—Ba bllin lla inabia' Chioza' loo yichjlall'do'lena'. Li yiyaj yileni dii malka' chonle na' li shajle' dill' wen dill' kob che'na'.

Jesúza' goxe' tap ben' wxen bel

(Mt. 4:18-22; Lc. 5:1-11)

¹⁶ Shlak ngoo Jesúza' nez cho'a nido' che Galileana', ble'ile' Simónna' len ben' bishee Andréza', chzal'gake' yixj daa chzengakile' belka' loo nido'na', la' lennan' noni xshingake'.

¹⁷ Na' goll Jesúza' legake':

—Li da, dino nad'. Na' ka chonle chbejle belka' loo nisi, ka'kzan gonle yibejle ben' lao dii mala'.

¹⁸ Na' ka biyoll golle' legake' ka', lii bkwaan'tegake' yixja' daa chzengakile' belka' na' zejle'ngake'ne'.

¹⁹ Ka ba wza'gake' zi lat', ble'i Jesúza' Jacóbona' len ben' bishee Juanna', ben'ka' nak xiin Zebedewa', lle'gake' loo barkwa' chiyonshao'gake' yixja' daa chzengakile' bel'ka'. ²⁰ Na' lii wnetie' legake', na' bkwaan'gake' xe'ka', beena' le Zebedeo, len ben'ka' chaklen legake' loo barkwa', na' wyajlengake' Jesúza'.

Jesúza' bibeje' dii xiwaa yoo to ben'
(Lc. 4:31-37)

²¹ Na' bllingake' yell Carpernaúma'. Na' lla sabda', llana' chombaan ben' Israelka', wyaj Jesúza' gana' chdop chllaggake' choe'lwillgake' Chioza' na' wzoloe' chli' chsedile' legake'.

²² Na' bibani ben'ka' lle' na' ka chli' chsedile' Jesúza', la' bli' bsdile' legake' lega ben' nap yel' wñabia', na' bi chli' chsedile' ka ben'ka' chli' chsedile' leya'. ²³ Na' ladj ben'ka' chdop chllag gana' chli' chsedile' legake', len to ben' yo'e dii xiwaa, na' besyaan, che'n:

²⁴ —jwayi neto', Jesús, ben' Nazaret! ¿Abido' kwenche wliayoo neton'? Nad' nombi'a li' na' nezid' nako' dowalj ben' li' ben' shao' che Chios.

²⁵ Na' Jesúza' bsheshlene'n, chi'e:

—jLizə wzoa! jBichej loo yichjlall'do' beeni!

²⁶ Na' dii xiwaa wchoonan beena' na' bchix btojan le' na' bichejan chosyaadian. ²⁷ Na' yog' ben'ka' lle' na' bibangakile', na' che' ljwellgake':

—¿Bi dii kob dga chli' chsedile' beeni, lla? jNakbia' nape' yel' wñabia', la' axt len dii xiw'ka' chsheshlene' na' chzoagakan xtillee!

²⁸ Na' lii wzete dill' doxen gana' mbani Galileana' ka nak daa chon Jesúza'.

Jesúza' biyone' tobiin che Simón Pédróna'
(Mt. 8:14-15; Lc. 4:38-39)

²⁹ Na' biza' Jesúza' gana' chdop chllaggake' na' biyajlene' Jacóbona' len Juanna' lill Simónna' na' Andréza'. ³⁰ Na' tobiin che Simónna' die' yo'e dii la. Na' gollgake' Jesúza' daa chak che'. ³¹ Na' wbiguee gana' die' na' bexee neena' blise'ne'. Na' lii bichejte dii lana' na' wzoloe' bene' daa wdaogake'.

Jesúza' biyone' ben' zan
(Mt. 8:16-17; Lc. 4:40-41)

³² Na' ka ba wxoa wbilla', jwa'gake' lao Jesúza' yog' ben'ka' bi shao' na' ben'ka' yoo dii xiwaa. ³³ Na' yog' ben'ka' lle' yella' bdi'a bllaggake' cho'a yoona' gana' zoe'. ³⁴ Na' Jesúza' biyone' ben' chak wde wdeli yillwe'. Na' lekzka' bibeje' dii xiw'ka' yoo ben', na' bi bi'e latj inegakan daa nombia'gakan le'.

Jesúza' cho'e cho'a xtill' Chioza' gana' mbani Galileana'
(Lc. 4:42-44)

³⁵ Na' Jesúza' wyase' ni bal, na' bcheje' yella' jelwille' Chioza' ga kono ben' lle'. ³⁶ Na' wyaj Simónna' len ben'ka' nakgake'ne' txen jadilgake'ne', ³⁷ na' ka billelgakile'ne' na'ch gollgake'ne':

—Yog'z ben' chiyilgake' li'.

³⁸ Na' che' Jesúza' legake':

—Li sho' yellka' sto, diika' llia gaozə, kwenche lekzka' llje'len' cho'a xtill' Chioza' ben'ka' lle' na', la' ni cheyinnan' bid'.

³⁹ Na' wda Jesúza' yog' yellka' llia doxen gana' mbani Galileana' choe'lene' ben'ka' cho'a xtill' Chioza' yog' gana' chdop chllag ben' Israelka' choe'lwillgake' Chioza', na' bibeje' dii xiw'ka' yoo ben'.

Jesúza' biyone' to ben' chak yillwe' daa le lepra
(Mt. 8:1-4; Lc. 5:12-16)

⁴⁰ To ben' chak yillwe' daa le lepra blline' lawe'na' na' bchek' xibe'na' lawe'na', chi'e:

—Shi cheenilo', wak yikwaso' yillwe'ni chak'.

41 Na' biyesh'lallii Jesúza'ne', na' b̄xōa neena' yichje'na' chi'e:

—Cheenid'x. Na' n̄aate yikwasa'n.

42 Na' katena' lii bikwaste léprana' na' biyakile'. 43 Na' Jesúza', chi'ene':

44 —Kono yoo dga ba ben' cho'. San wyaj jali'lawo' lao b̄xōza', na' jwa' daa chiya'l' lljoo lao Chioza' ka nllia dii Moiséza' bia' goncho kwenche inezile' ba biyakilo'.

45 Per ka bizee, wzoloe' bi'e dill' lao yog'lol' ben' daa gokə. Na' daa bene' ka', bich gok sho' Jesúza' ka n̄la'zə yellka', san bigaane' ga kono ben' lle'. Per bia'kzə wyaj ben' za' wde wdeli yell jawiagake'ne'.

2

Biyon Jesúza' to ben' net ni'a neena'

(Mt. 9:1-8; Lc. 5:17-26)

1 Wde to chop lla, Jesúza' billine' sto shii yell Capernaúma'. Na' ka w̄nezi ben'ka' lle' na' ba billine' yoonā' gana' wzoe', 2 na' bdi'a bllag ben' zan inleeb loo yoonā' axt bich chaki lesh' chyoonā' she'gake'. Na' bli' b̄sedile' legake' cho'a xtill' Chioza'. 3 Na' bllin tap ben' n̄lengake' to ben' net ni'a neena'. 4 Na' daa bi gok illingake' gana' zete Jesúza' daa lle' ben' zan inleeb, na' wzologake' bsaljgake' koll' yoonā' na' b̄letjgake'ne' do daa che'na'. 5 Na' ka gokbe'i Jesúza' chajle'gake' che', golle' ben' we'na':

—Xiin, ba biyakxen saaxya cho'ka'.

6 Na' chi' bal' ben'ka' chli' chsedi leya', na' wza'lall'gake': 7 “¿Berache naz beeni ka? Chonz kwine' ka Chioza'. Kono zoa sto ben' gak yizi'xen saaxya che ben', san toz Chioza' gak yizi'xene'n.” 8 Na' lii gokbe'teyi Jesúza' daa chza'lall'gake', na' w̄nabile' legake', chi'e:

—¿Berache chza'lall'zle ka? 9 ¿Achakile chyalljchid' yel' wak xench yep' beeni: “Ba bizi'xen' saaxya cho'na”, ka daa yepee: “Biyas na' bigoo nez”? 10 Na' wliid' le', nad' Ben' Bsel' Chioza' nap' yel' w̄nabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

11 —Nia' li', biyas, bitob daa cho'na', na' biyaj lillo'na'.

12 Na' lii biyastie' bitobe' daa che'na' na' bizee chwiate ben'ka' lle' na'. Na' yog'zgake' bibani na' be'la'ogake' Chioza', che'gake':

—Bigan' ile'icho ka dga.

Jesúza' goxe' Levína' kwenche gake'ne' txen

(Mt. 9:9-13; Lc. 5:27-32)

13 Na' wyaj Jesúza' sto shii cho'a niso'na' na' ben' zan janogake'ne', na' bli' b̄sedile' legake'. 14 Na' wde Jesúza' gana' chi' Levína', xiin Alfewa', ch̄chixje' daa chkaa ben' Rómaka'. Na' chi'ene':

—Da, dino nad'.

Na' wzolla' Levína' janoe'ne'.

15 Na' to shii Jesúza' len ben'ka' nakgake'ne' txen cheej chaogake' lill Levína', na' zan ben' w̄ichixjka' na' ben'ka' zeyi chegake' nakgake' ben' mal cheej chaolengake'ne', la' ben' zan ba nak ben'ka' no le'. 16 Na' bal' fariseoka', ben'ka' lekzka' chli' chsedi leya', ka ble'gakile' cheej chaolen Jesúza' ben'ka', na' gollgake' ben'ka' nakgake'ne' txen:

—¿Berache cheej chaolenz beena' chli' chsedi le' ben' w̄ichixjka' na' ben' malka'?

17 Na' ka beni Jesúza' che'gake' ka', na'ch chi'e:

—Ben'ka' zoa shi'a shao' aga no wen rmech chyalljgakile', san ben'ka' bi shawaan chyalljgakile'ne'. Ka'kzə nad', aga bid' ni che ben'ka' nak ben' li ben' shao', san ni che ben' malkan' bid'.

Wnabgakile' Jesúza' biche bi chon ben'ka' nakgake'ne' txen wbasaa

(Mt. 9:14-17; Lc. 5:33-39)

18 To shii ben'ka' nak Juanna' txen na' ben'ka' nak fariseoka' txen chzoagake' wbas'. Na' bal' ben' wyajgake' lao Jesúza' na' che'gake'ne':

—Ben'ka' nak Juanna' txen na' ben'ka' nak fariseoka' txen chzoagake' wbas'. ¿Berache ben'ka' nakgake' li' txen bi chongake'n?

¹⁹ Na' che' Jesúza' legake':

—¿Awak soa ben'ka' chaxe' to ga chak wishagna' wbasaa shlak chak lnina'? Bi gakan, la' shlak zoalen beena' chshagna' legake' aga wak soagake' wbasaa. ²⁰ San wllin lla kat' yikwas ben' beena' chshagna' ladje'ka', kana'chan soagake' wbasaa.

²¹ 'Ni to ben' bi chida' chichollee lee lech' gola' lat' lech' kob, la' lech' koba' yibe'n kat' chibe'n na' zizikli wchez'chan lech' gola', na' dii xench gak gana' nchez'. ²² Ni biga zoa ben' chguee vino koba' loo yid golka', la' vino koba' wchezaan yid gola' na' kwiayi' vino koba' lente yid gola'. Na' daan, chiya' sholl vino koba' loo yid koba'.

Ben'ka' non Jesúza' txen chyishjake' do che trígona' llana' chombaangake'

(Mt. 12:1-8; Lc. 6:1-5)

²³ Na' to lla sabd, llana' chombaän ben' Israelka', wdelen Jesúza' ben'ka' nakgake'ne' txen to ga naz to ben' trigo, na' wzolo ben'ka' nakgake'ne' txen wdishjake' trígona' wdaogake'n. ²⁴ Na' goll fariseoka'ne':

—¿Berache chonz ben'ki nako' txen daa bi chiya' gongake' llani chombaäncho?

²⁵ Na' golle' legake':

—¿Ani shlin bin' wlable daa ben dii Davina' to shii kon ben'ka' nakgake'ne' txen ka byallj daa gaogake'? ²⁶ Kana' nak Abiatar' bꞑoz choo bꞑoz xen, wyoo Davina' gana' nongake' lill xlatjə Chioza' na' wdoyoe' yetxtila' daa naki che Chioza' na' wdaolene'n ben'ka' nakgake'ne' txen, la'kzi toz bꞑozkan' chiya' gaogake'n.

²⁷ Na' lekzka' golle' legake':

—Chioza' wleje' llani chombaäncho kwenche gaklenen benecha', aga bꞑe bsile' benecha' kwenchezə we'la'ogake' llani chombaänchon. ²⁸ Daan, nad', Ben' Bsel' Chioza' Yell-lioni, chñabi'a lao llani chombaäncho.

3

Beena' net neena' tlaa

(Mt. 12:9-14; Lc. 6:6-11)

¹ Na' sto shii wyaj Jesúza' gana' chdop chllaggake' choe' lwillgake' Chioza' na' ladj ben'ka' lle' na' len to ben' net neena' tlaa. ² Na' chwiayen'gake' shi wiyon Jesúza'ne' lla sabda', llana' chombaangake', kwenche gaogake' xya che'. ³ Na' che' Jesúza' beena' net neena' tlaa:

—Wzolla' na' wze gchol' ben'ki.

⁴ Na'ch wñabile' ben'ka' ndop nllag na':

—¿Beran na leya' chiya' goncho lla sabdka'? ¿Agoncho daa nak wen, anti goncho daa nak mal? ¿Ayislacho ben', anti witchone'?

Na' kokzno billii xtilleena'. ⁵ Na' ka chwie' ben'ka' lle' na', bllee na' gokyeshile' daa nakgake' ben' lall'do' chech, na' chi'e beena':

—Bli noona'.

Na'ch bli na' beena' na' lii biyakteyin. ⁶ Na' bichej fariseoka' na' wzologake' chgoogake' xñezin len ben'ka' non Heródeza' txen kwenche witgake' Jesúza'.

Ben' zan bdop bllag cho'a nido'na' gana' chda Jesúza'

⁷ Na' biza' Jesúza' gana' zoe' na' zejlene' ben'ka' nakgake'ne' txen cho'a nido'na' na' ben' zan ben' Galiléaka' wnogake' legake'. ⁸ Na' ben' zan ben'ka' lle' gana' mbani Judeana', na' yell Jerusalénna', na' gana' mbani Idumeana', na' ben'ka' lle' shlaa yao Jordánna' na' yellka' ndil' nllag yell Tírona' na'ch yell Sidónna', ka wñezgakile' chon Jesúza' dii zan ye' wak, na' wyajgake' jawiagake'ne'. ⁹ Na' daa lle' ben' zan inlleb, golle' ben'ka' nakgake'ne' txen yisbig'gake' to barkw gana' lljshie' kwenche bi idakwyill' ben' be ben' zilka' le'. ¹⁰ La' ben' zan inlleb ba biyone' na' yog' ben'ka' bi shao' chdi'a chllaggake' lawe'na' kwenche

gox'gake'ne' na' yiyakgake'. ¹¹ Na' dii xiw'ka' yoo bal ben'ka', ka chle'gakin Jesúza', chongakan ka chchek' xib ben'ka' lawe'na' na' chosyaagakan, che'gakan:

—Lin' nako' Xiin Chioza'!

¹² Na' Jesúza' bsheshlene'gakan kwenche bi inagakan ka' ga lle' lla' ben'.

Jesúza' chbeje' shllin postlka'

(Mt. 10:1-4; Lc. 6:12-16)

¹³ Ka biyoll ben Jesúza' diika', na' wleje' bal ben'ka' wyazlallee gake'ne' txen na' wyajlengake'ne' to lo yaa. ¹⁴ Na' wleje' shllin ben'ka' kwenche talengake'ne' txen na' kwenche wselee legake' lje'gake' cho'a xtill' Chioza', na' bsi'e legake' postl. ¹⁵ Na' bi'e legake' yel' wnabia' kwenche yiyongake' ben'ka' bi shao' na' yibejgake' dii xiw'ka' yoo ben'. ¹⁶ Ben'kin wleje' shllin: Simónna', beena' bisi'e Pedro; ¹⁷ Jacóbona' len ben' bishee Juanna', ben'ka' nak xiin Zebedewa', (ben'ka' bsi'e Boanerges, daa zeji ben' nak ka yi' wziw' dii chashj chtin); ¹⁸ na' Andréza', Felípena', Bartoloména', Matewa', Tomáza', Jacóbona', xiin Alfewa', Tadewa', Simón, beena' wlen cananistka', ¹⁹ na'ch Jud Scariota', beena' bene' Jesúza' lo na' ben' malka'.

Wnagake' che Jesúza' bchine' yel' wak che dii xiwaa

(Mt. 12:22-32; Lc. 11:14-23; 12:10)

²⁰ Na' Jesúza' len ben'ka' nakgake'ne' txen biyajgake' gana' zoagake'. Na' daa bizdi'a bizllag ben' zan inleeb, ni bi gok latj gaogake'. ²¹ Ka wnezi ben'ka' nak bish' ljwell Jesúza', wyajgake' nan lljaxi'gake'ne', la' gokgakile' ba chaktonte'n.

²² Na' lekzka' ben'ka' chli' chsedi leya', ben'ka' zaak Jerusalénna', nagake' che':

—Bezlo daa chnabia' dii xiw'kan' yo'e, na' yel' wak cheyinnan' chisheshile' dii xiw'ka'.

²³ Na' gox Jesúza' legake' na' bzoe' to jempl lawe'ka', chi'e:

—¿Nakra gon Satanáza' yibej ljwell dii xiwiinna'? ²⁴ Ben'ka' lle' toz yell shi til-len ljwellgake' na' gake'ne' choplə, aga ssha soagake'. ²⁵ Na' ben'ka' lle' toz yoo shi illaa ljwellgake' na' gake'ne' choplə, aga ssha soagake'. ²⁶ Na' shi Satanáza' na' dii xiw'ka' nak lall' na'yin yiyakdilgakan na' gake'ne' choplə, bi idiagakan, san ba bllin lla kwiayi'gakannan', shi naa.

²⁷ 'Kono gak sho' loo yoo lill to ben' wal na' kwane' bi de che' shi bi wcheje'ne' zigaate, na'chan wtesh wloe' loo lille'na'.

²⁸ 'Dii li nia' le', Chioza' yizi'xene' yog'lol saaxya na' yog'lol dii mal daa chbell chne ben' che'; ²⁹ san beena' ine zban che Espíritu Sántona', biga yizi'xene' che', na' toshiizi gak xbagee cheyi daa wchell wnie' che'.

³⁰ Golle' legake' ka' daa wnagake' che' dii xiwaan yo'e.

Xna' Jesúza' na' ben' bisheeka'

(Mt. 12:46-50; Lc. 8:19-21)

³¹ Na'ch bllin xna' Jesúza' len ben' bisheeka', wzegake' lesh' chyoonna' na' bsel'gake' ben' janegake'ne'. ³² Na' ben'ka' chi' kwit Jesúza' gollgake'ne':

—Ba chiylj xnoona' li' len ben' bishooka'.

³³ Na' chi'e legake':

—¿Anezile noran xna'na' na' ben' bishaaka'?

³⁴ Na' chwie' ben'ka' chi' kwite'na' na'ch chi'e:

—Ben'kin xna'na' na' ben' bishaaka'. ³⁵ Nottezə beena' chon ka cheeni Chioza', len ben' bishaana', ben' zanna' na'ch xna'na'.

4

Jempl che to ben' goz goon

(Mt. 13:1-9; Lc. 8:4-8)

¹ Sto shii wzolo Jesúza' bli' bsedile' ben' cho'a nido'na', na' daa bdop bllag ben' zan inleeb jshie' to loo barkw daa chi' cho'a nido'na', na' ben'ka' bdi'a bllag wlle'gake' cho'a nido'na'. ² Na' dii zan dii bli' bsedile' legake' na' bchine' jemplka', na' golle' legake':

³—Li wzenag dga. To ben' goz goon wzee zeje' goza'. ⁴ Na' ka zej chzalee binna', balan bxop cho'a neza' na' bllin byinka' wdaogakban. ⁵ Na' zi balan bxop ladj yajka', gana' bitek bi yo chi'. Na' tolbe' bilaan, daa bi chi'tekan yona'. ⁶ Per ka bla' wbillan, bkwedgakan. Na' daa bi bde loinna', wbillan. ⁷ Na' zi balan bxop ladj yag yesh'ka' na' yag yesh'ka' bi be'gakan latj igolgakan na' bibi wllian. ⁸ Na' zi balan bxop gana' chi' yo wenna', na' bgolgakan na' le wlliangakan. Balan wllia shichoa wej, na' zi balan guiyon wej, na'ch to guiyoa wej.

⁹ Na' chi'e legake':

—Ka le' chenile dga nia', li sen wneyi.

Jesúza' bzajniile' legake' biche chseeesee jemplka'

(Mt. 13:10-17; Lc. 8:9-10)

¹⁰ Na' ka bgaan stoz Jesúza', ben'ka' wlle' gaoshosh kwite'na' len ben'ka' shllin, wñabgakile'ne' bi zeji jempla' daa bseesile' legake'. ¹¹ Na' chi'e legake':

—Chioza' cho'e latj inezile daa kono wñezi che yel' wñabia' che'na'. Per ben'ka' bi chzenag che', chseesid' legake' jemplka' ¹² kwenche la'kzi ile'tegakile' ka chon', bi shajni'gakile' bi zejin, na' la'kzi yentegakile' xtilaana', bi shajni'gakile'n, kwenche bi yiyaj yilengakile' lao Chioza' na' bi yizi'xene' chegake'.

Jesúza' bizajniile' bi zeji jempla'

(Mt. 13:18-23; Lc. 8:11-15)

¹³ Na' chi'e legake':

—Shi bi chajniile jempli, ¿nakra gonle shajniile diika' sto? ¹⁴ Beena' chaz zaklebile' beena' choe' cho'a xtill' Chioza'. ¹⁵ Zoa ben' chengakile' cho'a xtill' Chioza' na' kat' ba bengakile'n, lii zejte dii xiwaa chikwasan daa loo yichjlall'do'eka'. Na' chak chegake' ka gok che binna' daa bxop cho'a neza'. ¹⁶ Zi balgake' chak chegake' ka gok che binna' daa bxop ladj yajka' na' aga bi logakin bde. La' ka chengakile' cho'a xtill' Chioza' chiba chizak'gakile' chzenaggake'n ¹⁷ per shlollchga chajle'gake'. Na' kat' bi chen chle'gakile' ni che cho'a xtill' Chioza', lii chbej yichjtegake'n. ¹⁸ Zi balgake' chak chegake' ka gok che binna' daa bxop ladj yag yesh'ka'. Chengakile' cho'a xtill' Chioza', ¹⁹ per chi' yichjgake' diika' chak chegake', na' zetegake' wneyi che yel' wni'ana' na' chzelall'tegake' yog'lolte daa de yell-lioni. Na' legakannan' chsej chllongakan gon xshin cho'a xtill' Chioza' loo yichjlall'do'eka'. ²⁰ Na' zoa zi bal ben' chengakile' cho'a xtill' Chioza' na' chajle'gake' do yichj do lall'gake', na' chon xshinin loo yichjlall'do'eka'. Na' chak chegake' ka binna' bxop lo yo wenna' daa wllia shichoa wej, na' guiyon wej na'ch to guiyoa wej.

Jempl che to kandil

(Lc. 8:16-18)

²¹ Na' lekzka' chi'e legake':

—Biga zoa ben' chxene' kandila' na' chdose'n to dii wkwashaan len wa chni'en xan xlague'na', san chzoe'n sibə kwenche wzeeni'n doxen loo yoona'. ²² Na' lekzka' yog'lolte dii ngash' naa wllin lla yila' lawin, na' daa kono nezi naa wllin lla inezibenaan. ²³ Le' chenile dga nia', li sen wneyi.

²⁴ Na' lekzka' chi'e legake':

—Li se wneyi cheyi dga chzenagle. Na' shi gonle ka dii le, Chioza' wzajni'chile' le' dii xench. ²⁵ Beena' chzenag, zizikchli shajni'chile', na' beena' bi chzenag, axt daa ba benile' lat' yiyal-lallee.

Jempl che binna' daa chgol

²⁶ Na' lekzka' chi'e legake':

—Yel' wñabia' che Chioza' zaklebin daa chak che binna' chaz ben'. ²⁷ Beena' chaz chaan, chila' daa chaze' na' chgolan la'kzi chese' wa chechj chdaze', ka'kzə shi wal wa tella, na' ni bi nezile' nak chak chgolan. ²⁸ Lo yell-lioni chla' daa chaz ben': zigaate chila'n, na' chgolan, na' chzen do, na'tech chbian. ²⁹ Na' kat' ba gol daa chbian, na' chizi' chilape'n.

Jempl che sa mostásana'

(Mt. 13:31-32; Lc. 13:18-19)

³⁰ Lekzka' che' Jesúza' legake':

—¿Bera ka wsaklebicho yel' wñabia' che Chioza', lla? wa ¿bera ka jempl wchincho wsaklebichon? ³¹ Yel' wñabia' che Chioza' nakan ka sa mostásana' daa chazgake'. La'kzi lennan' binna' daa liizelozi nesh'ch, ³² kat' ba bla'n na'ch chgolan na' chakan dii xench ka yog'te yix' kwan yoblə, na' chak xoziiinka' dii xen axt byindo'ka' wak lljshiakakban na' sho'gakb xol cheyinna'.

Jesúza' bchine' jempl ka bli' bsedile' ben'

(Mt. 13:34-35)

³³ Dii zan jempl bchin Jesúza' ka bli' bsedile' ben'ka' cho'a xtill' Chioza', bene' kon ga zeelo wyajni'gakile'. ³⁴ Na' toshiizi bzoe' jemplka' lao ben'ka' bdi'a bllag, na' toz ben'ka' nakgake'ne' txen bizajniile' bi zejin yog' diika'.

Jesúza' bkweze' to yejpe' wal lo nido'na'

(Mt. 8:23-27; Lc. 8:22-25)

³⁵ Na' ka gol, golle' ben'ka' nakgake'ne' txen:

—Techo shlaa nido'ni.

³⁶ Na' biza'gake' kwit ben'ka' bdi'a bllag na' biche'gake' Jesúza' loo barkwa' daa chi' cho'a nido'na', na' lench barkw yoblə ziyajlengake'. ³⁷ Na' wze to yejpe' wal na' wzolo nido'na' chas chataan axt ba chiyollan loo barkwa', na' ba wzolo chbe'n yel. ³⁸ Na' ba de Jesúza' chese' xaninna' nkogtie' to dii nkogue', na' jasangake'ne' che'gake':

—¿Maestro! ¿Abikzə chakbe'ilo' ba chbe'cho yel?

³⁹ Na' wyase' bsheshlene' be'na', na' chi'e nido'na':

—Lliz wzoa.

Na' wlez be'na' na' wche'lli nido'na'. ⁴⁰ Na' golle' ben'ka' nakgake'ne' txen:

—¿Biche' chllbzle? ¿Abikzan' gonlilall'le nad'?

⁴¹ Na' le bllebgake', na' che' ljwellgake':

—¿Nora beeni, lla?, axt be'na' na'ch nido'ni chzoagakan xtillee.

5

Bibej Jesúza' dii xiwaa yoo ben' Gadárana'

(Mt. 8:28-34; Lc. 8:26-39)

¹ Na'ch bllingake' gana' mbani Gadárana' daa llia shlaa nido'na'. ² Na' ka bichej Jesúza' loo barkwa', na' wbig' to ben' yo'e dii xiwaa. Na' beeni bcheje' loo kapsanta' ³ gana' none' ka lill xlatje'. Na' kono gok wchej le', ni gdenna' bi ben llin. ⁴ Zan shii bchejgake' ni'a neena' gdenka', na' tolbe'do' chchogue'gakan, na' kono wzoyi le'. ⁵ Ka wal ka tella chechj chde' yaa yaoka' na'ch kapsanta' chosyaadie' na' chgoyoe' yajka' chon kwine' zi'. ⁶ De zit'lə ble'ile' zej Jesúza' na' bxonjdoe' jatile'ne' na' jachek' xibe'na' lawe'na', ⁷ na' besyee zillj, chi'e:

—¿Bi wlalli' cho' kon nad', Jesús, Xiin Chios, ben' choo ben' xen! Chat'yoid' li', ¡bcheb lao Chioza' bi wsak'zi'o nad'!

⁸ Gollan ka' daa goll Jesúza' len:

—¿Dii xiw', bichej loo kwerp che beeni!

⁹ Na' goll Jesúza' len:

—¿Bin lio'?

Na' che'n:

—Legiónan lia', la' zannto' nak.

¹⁰ Na' got'yochgain Jesúza' bi wseleegakan gan yoblə. ¹¹ Na' gaozə kwit yaana' gana' lle'gake', lle' zan kush chaogakb. ¹² Na' got'yoi dii xiw'ka' le', che'gakan:

—Bsel' neto' gana' lle' kushka' na' be' latj yiyoonto' legakb.

¹³ Na' bi'e latj chegakin, na' bichejgakan jayoogakan kushka'. Na' nakgakb ka chop mil, na' wzologakb chxonjdogakb jabixgakb loo nisdona', na' jche'gakb yel.

¹⁴ Na' ben'ka' chap kushka' ziyajdogake' jayellgake' ben'ka' lle' yella' na' ben'ka' lle' lyixaa daa ble'gakile', na' ben' zan jawia daa gok. ¹⁵ Na' ka bllingake' gana' ze Jesúza', ble'gakile' beena' wyoo dii xiw'ka' chi'e kwite'na' ba biyakw xe'na' na' ba biyeen biyeeniile', na' bllebgake'. ¹⁶ Na' ben'ka' ble'i daa gok che beena' wyoo dii xiw'ka' na' daa gok che kushka', be'gake'n dill' lao ben'ka' bllin. ¹⁷ Na' got'yogakile' Jesúza' yiyaje' gan yoblə.

¹⁸ Ka chiyoo Jesúza' loo barkwa', beena' wyoo dii xiw'ka' got'yoile'ne' wi'e latj shajlene'ne'. ¹⁹ Per bi bi'e latj, san chi'ene':

—Biyaj lillo'na' gana' lle' bish' ljwello'ka', na' jayellgake' ka nak diiki ba ben Xancho Chioza' cho' na' ka ba biyesh'lallile' li'.

²⁰ Na'ch biza' beena' na' jaye' dill' doxen gana' mbani Decápoliza' daa ben Jesúza' che', na' yog' ben' bibani.

Biyon Jesúza' noola' bex' xe'na' na' lekzka' xiin Jairona'
(Mt. 9:18-26; Lc. 8:40-56)

²¹ Ka billinlen Jesúza' barkwa' shlaa nisdona', na' bdi'a bllag ben' zan cho'a nisdona' gana' billine'. ²² Na' bllin to ben' le' Jairo, nake' to ben'ka' chgoogake' xnezi diika' chon ben' Israelka' gana' chdop chllaggake' choe'llwillgake' Chioza'. Na' ka blline' gana' ze Jesúza', bchek' xibe' lawe'na' ²³ na' benyesh'chgue', chi'e:

—Ba chet bi' cha'na'. Ben goklen sho'gach wxoa noona' yichjbaa kwenche yiyakib' na' ibanchb'.

²⁴ Na' wyajlen Jesúza' le', na' ben' zan inleeb nogake'ne' axt bdakwyillgake'ne'. ²⁵ Na' ladj ben' zan walka' len to noolə ba gok shllin yiz chzoe' wbaa. ²⁶ Dii zan dii ba ben ble'ile' lao ben' wen rmechka', na' ba blliyee yog' dii de che' na' bi gokkze' rmech, san gokxinlile'. ²⁷ Na' ka benile' xtill' Jesúza', jni'e ladj ben' zan walka' no le' na' jexee xe'na'. ²⁸ La' gokile': “La'ch' xe'na' shel' ba bexaa, na' yiyakid'.” ²⁹ Na' katena' wlez wbaana' na' gokbe'ile' ba bigaa yillwe' che'na'. ³⁰ Na' gokbe'i Jesúza' bchej yel' wak che'na', na' biyechje' chi'e ben'ka':

—¿Noran bex' xa'na'?

³¹ Na' ben'ka' non le' txen che'gake'ne':

—Ben' zan walan ndakwyill li'. ¿Biche nazo': “Non ba bex' nad”?”

³² Na' ze Jesúza' chwie' ben'ka' lle' kwite'na' kwenche inezile' non bex' le'. ³³ Na'ch noola', daa ba gokbe'ile' biyakile', de chall chllebzile' wdie' na' bchek' xibe'na' lawe'na' na' golle' le' doxen daa ba gok che'. ³⁴ Na' che' Jesúza'ne':

—Xiin', daa chonlilalloo nadaan ba biyakilo'. Biyaj mbalaz daa ba bigaa yillwe'na' bsak'zi' li'.

³⁵ Na' ni chshaljte Jesúza' ka bllin to chop ben' wza' lill Jairona', chi'ene':

—Ba wit bi' cho'na'. Bich gonilo' maestroni zed.

³⁶ Na' bi ben Jesúza' legake' kwent, na' golle' Jairona':

—Bi illebo'. Kon bxenilall' nad'.

³⁷ Na' bi bi'e latj shajlen ben' yoblə le', lete Pédróna' na' chop bish'te, Jacóbona' na'ch Juanna'. ³⁸ Na' ka bllingake' lill Jairóna', ble'ile' le chakyeshii ben'ka' lle' na' na'ch chbellgake' na' le chosyaagake'. ³⁹ Na' jabigüee gana' lle'gake' na' golle' legake':

—¿Berache chonzle dane na' chbellzle? Aga ba wit bi'do'nan', san cheszbaan.

⁴⁰ Na' bxillgakile' Jesúza'. Na' bisheshe' yog'lóle' na' wyoolene' xaxna'baa na' ben'ka' zejlene' txen gana' de bi'do'na'. ⁴¹ Na' bexee na'baa na' golle'b':

—Talita, cumi* —na' zejín: Bi' nooldo', nia' li' biyas.

⁴² Na' bi' nooldo'na' lii biyasteb' na' bidab', la' ba gokkzib' shllín yizan. Na' bibanchgayi ben'ka' lle' na'. ⁴³ Na' Jesúza' bene' mandad kono ye'gake' daa gok, na' golle' legake' we'gake' dii gao bi'do'na'.

6

Billin Jesúza' yell Nazareta'

(Mt. 13:53-58; Lc. 4:16-30)

¹ Na' biza' Jesúza' biyaje' lalle'na', na' ben'ka' nakgake'ne' txen zejlengake'ne'. ² Na' ka bllin lla sabda', llana' chombaán ben' Israelka', wyaje' gana' chdop chllaggake' choe'lwillgake' Chioza' na' wzoloe' bli' bsedile' ben'ka' lle' na'. Na' zan ben'ka' bzenag xtilleena' bibangakile', na' che'gake':

—¿Gara jasedz beeni diiki, lla? ¿Gara za' yel' sin' che beeni, na' yel' wakka' chone', lla? ³ ¿Aaga beenin karpintera', beena' nak xiín Maríana', na' ben' bish' Jacóbona', Joséna', Júdaza' na'ch Simónna'? Na' lekzka' ben' zane'ka' zoagake' lallchoni.

Na' bi wyajle'gake' che'. ⁴ Na' che' Jesúza' legake':

—To ben' chyixjee daa che' Chioza'ne', gattez chgoogake'ne' balaán, san lall lille'na' aga no chgoo le' balaán.

⁵ Na' aga bitek yel' wak gok gone' na', lete xonjchga ben' we'ka' bxoá neena' yichje'ka' na' biyone' legake'. ⁶ Na' bibanile' daa bi chajle' ben'ka' che'. Na' wde' bli' bsedile' ben'ka' lle' to to yellka' lia gaozá yell Nazareta'.

Jesúza' bselee ben'ka' shllín llje'gake' cho'a xtil' Chioza'

(Mt. 10:5-15; Lc. 9:1-6)

⁷ Na' wnie' ben'ka' shllín, na' bselee chop weje', na' bi'e legake' yel' wnabia' kwenche yibejgake' dii xiw'ka' yoo ben'. ⁸ Na' golle' legake' bibi gox'gake' kat' koogake' nez; bi chiyal' wa'gake' yixj ga koo xshinlaze'ka', ni dii gaogake', ni mech, san twejz yag bar gox'gake'. ⁹ Na' shkwe'z xelgake' wlej, na' zi shkwe'z xe'ka' gawk. ¹⁰ Na' chi'e legake':

—Yooná' gana' illinle, na'z soale axt ka illinch lla yiza'le. ¹¹ Na' yella' gana' bi wlebgake' le' ni bi wzenaggake' chele, ka yiza'le na', yishible bishtena' lia ni'aleka' kwenche gakbe'gakile' aga wenan chongake' bi chlebgake' cho'a xtil' Chioza'. Dii li nia' le', kat' illin lla wchoglo Chioza' che ben', ben'ka' lle' yella' gana' bi wlebgake' le', ile'gakile' yel' zak'zi' xench aga ka ben'ka' wille' yell Sodómana' na' yell Gomórrana'.

¹² Na' wza'gake' zjtixje'gakile' ben' chiyal' yiyaj yilengakile' saaxya che'ka'. ¹³ Na' bibejgake' zan dii xiw'ka' yoo ben', na' bshongake' lat' wej seta' yichj ben'ka' bi shao' na' biyakgakile'.

Betgake' Juanna', beena' bchoa ben' nis

(Mt. 14:1-12; Lc. 9:7-9)

¹⁴ Na' Heródeza', beena' wnabia' gana' mbani Galileana', benile' yog' daa chon Jesúza', daa le ba zeyi che'. Bal ben'ka' che'gake':

—Dii Juanna', beena' bchoa ben' nisan' ba biban, daan chone' yel' wakka'.

¹⁵ Zi bale' che':

—Elíazan' ba biyed.

* **5:41** Talita, cumi: dill'ki nakgakan dill' arameo.

Na' zi bale' che':

—Nake' beṇ' chyixjee daa che' Chioza'ne', ka beṇ'ka' wzoa kani'yi.

¹⁶ Ka beni Heródeza' dill'ki, na' chi'e:

—¿Beenan' dii Juanna', beena' ben' mandad wchog yichje'na! ¿Ba bibane' ladj beṇ' wetka'!

¹⁷ La' kwın Heródeza' bene' mandad beṅ'gake' Juanna' na' bseje'ne' lillyana' daa bseshlene'ne' daa bikee Herodíaza', xool beṇ' bishee, Felípena'. ¹⁸ Juanna' golle'ne':

—Xya nleeb nakan bikoo xool beṇ' bishoona'.

¹⁹ Na' bllaa Herodíaza' Juanna' na' goklallee wite'ne', per bibi gok gone' ²⁰ daa chlleb Heródeza' Juanna', daa nezile' nake' to beṇ' li beṇ' shao' beṇ' nak lall' na' Chioza', na' bi bi'e latj no bi goni le'. Na' la'kzi chakchoplallee che dill'ka' cho'e, bibaile' bzenague' che'.

²¹ Per ka wyayi Heródeza' yiz, bene' to lni na' goxe' beṇ'ka' chṇabia', na' xan soldadka', na' beṇ'ka' mbejlawin gana' mbani Galileana'. Na' got' xlatjin gon Herodíaza' ka cheenile'.

²² Na' bi' nool wew' che Herodíaza' byaab' lao beṇ'ka' lle' lnina', na' le bibayi Heródeza' len beṇ'ka' chaolene' ka byaab'. Na' golle'b':

—Wṇab bittezə cheenilo' na' goṇa'n.

²³ Na' bchebe' wi'eb' daa cheenib', la'kzi axṭ gashj gana' chṇabi'e wi'eb'. ²⁴ Na' bichejb' janabib' xṇa'baa:

—¿Bera ka inab', lla?

Na' che' xṇa'baa:

—Wṇab yichj Juan wichoa nisa'.

²⁵ Na' lii biyooteb' gana' chi' Heródeza', na' che'b':

—Cheenid' yichj Juanna' to lo plat llilj ṇaate.

²⁶ Na' le gokyeshii Heródeza', per daa ba bcheble' lao yog' beṇ'ka' goxe', bi goklallee wllonile'b' daa chṇabib' le'. ²⁷ Na' lii bsel'tie' to soldad jachogue' yen Juanna' loo lillyana'

²⁸ na' bllie' yichje'na' to lo plat. Na' bi'en bi' nool wewaa na' leb' be'baan xṇa'baa.

²⁹ Ka wṇezi beṇ'ka' nak Juanna' txen, na' jaxi'gake' kwerp che'na' na' jakwash'gake'ne'.

Bwao Jesúsza' gayaa mil beṇ'

(Mt. 14:13-21; Lc. 9:10-17; Jn. 6:1-14)

³⁰ Ka billin postlka' gana' zoa Jesúsza', na' gollgake'ne' yog' diika' jengake' na' daa jali' jasedgakile' beṇ'. ³¹ Na' che' Jesúsza' legake':

—Li sho' shajcho ga kono beṇ' lle' kwenche yizi'lall'lat'cho.

Golle' ka' daa le chdia chllag beṇ' zan lawe'ka', na' ni bi chak latj gaogake'. ³² Na' wyoogake' to barkw wyajgake' ga kono beṇ' lle'. ³³ Na' beṇ' zan ble'gakile' ka wza'gake' na' biyombia'gake' legake', na' wza'do beṇ'ka' lle' to to yell zejdogake' gana' illin barkwa' na' nechlagake' bllin. ³⁴ Na' ka bichej Jesúsza' loo barkwa' ble'ile' ba bdi'a bllag beṇ' zan inleeb na' biyesh'lallile' legake' daa nakgake' ka xil'do', ba kono xanin zoa. Na' wzoloe' dii zan dii bli' bsedile' legake'. ³⁵ Na' ka wlle', beṇ'ka' nakgake'ne' txen wbig'gake' lawe'na' che'gake'ne':

—Ba wlle' naa, na' gani lle'cho kono zoa wit' dii gaocho. ³⁶ Goll beṇ'ki yiyajgake' ranshka', na' yellka' llia gaozə kwenche lljxi'gake' daa gaogake'.

³⁷ Na' che' Jesúsza' legake':

—Len', li we' dii gaogake'.

Na' che'gake'ne':

—¿Nakra gonnto' lljxi'nto' yetxtilka' gao yog' beṇ'ki? la' wyejljain che chop guioa lla che laxj beṇ'.

³⁸ Na' che' Jesúsza' legake':

—Li lljawia ka'k' yetxtilka' naple.

Na' ka wṇezgakile' ka'ka'n de, na' che'gake'ne':

—De gayaan, na' zi chop beṇ'.

³⁹ Na'ch goll Jesúza' legake' kwekgake' xonj wej ben'ka' lo yixa'. ⁴⁰ Na' wche' to guiyoa wejgake' na' shiyon wejgake'. ⁴¹ Na' beḅ' Jesúza' yetxtilka' gay' na' belka' zi chop na' blis jalawe'na' yabalə bi'e Chioza' yel' choḅken, na' bxoxje' yetxtilka' bi'en ben'ka' nakgake'ne' txen kwenche be'gake' che che ben'ka'. Na' lekzka' yog'gake' be'gake' belka'. ⁴² Na' yog'lolgake' wdaogake' ka beljgakile'. ⁴³ Na' postilka' bitopgake' yetxtilka' len belka' bichoonan, na' biyakan zi shllin xet'. ⁴⁴ Na' ben'ka' wdao, to ben' byoka'zə gokgake' gayaa mil.

Jesúza' wzee lo nido'na'

(Mt. 14:22-27; Jn. 6:16-21)

⁴⁵ Na' ka wde, bigoo Jesúza' ben'ka' nakgake'ne' txen loo barkwa' kwenche yibialogake' lawe'na' yiyajgake' Betsáidana' daa llia zi shlaa nido'na', shlak bisee ben'ka' bdi'a bllag na'. ⁴⁶ Na' ka biya ben'ka' billesh, na' wyaje' lo yaana' jelwille' Chioza'. ⁴⁷ Na' ka goḷ, ba zej barkwa' gchoḷ nido'na' na' stoz Jesúza' bgaane' gana' biza'n. ⁴⁸ Na' ble'ile' le chllaglogaken' daa za' be'na' gana' zejləgake'. Na' ni bal wlo'e nez tlo nido'na' zeje' gana' ziyajlgake'. Na' ba zoa yidie' lawe'ka' ⁴⁹ ka ble'gakile'ne' zeje' tlo nido'na' na' gokgakile' yel bḅenzan. Na' besyaagake' ⁵⁰ daa le bllebake' daa ble'gakile'. Na' lii wnetie' legake', chi'e:

—Bi illeble, nad'kzan.

⁵¹ Na' biyep'e' loo barkwa' na' wche'lli be'na'. Na' le bibangakile', ⁵² la' aga ba wyajni'gakile' yel' waka' daa bene' che yetxtilka' daa gokgake' ben' lall'do' wal.

Jesúza' biyone' ben'ka' bi shao' gana' mbani Genesareta'

(Mt. 14:34-36)

⁵³ Na' ka biyoll wdegake' lo nido'na' na' bllingake' yell-lío daa mbani Genesareta', na' bda' barkw che'ka' yag cho'a nido'na'. ⁵⁴ Ka bchejgake' loo barkwa', lii biyombia'te ben' Genesaretka' Jesúza'. ⁵⁵ Na' wdadogake' doxen gana' mbani lalle'ka' btopgake' ben' bi shao', na' lo daazə nḅoagake' legake' chjwa'gake' legake' gana' neḅgakile' bllin Jesúza'. ⁵⁶ Na' gattezə chaje' laa yelldo'ka' laa yell xenka', wa laa ranshka', chyixigake' ben'ka' bi shao' tneza' gana' chdie'. Na' chat'yogakile'ne' wi'e latj goḅ'gake' la'ch' xe'na'. Na' yog' ben'ka' gok beḅ'gake'n biyakgakile'.

7

Diika' chxinj chlenan yichjlall'do'chona'

(Mt. 15:1-20)

¹ Fariseoka' len zi bal ben'ka' chli' chsedi leya', ben'ka' zaak Jerusalenna', bllingake' lao Jesúza'. ² Na' ka ble'gakile' bal ben'ka' nak Jesúza' txen bi bixis biyib neeka' ka zi' gaogake', na' wdaogake' xya chegake'. ³ (La' fariseoka' len yog'z ben' Israelka' ni nogake' daa bli' bsemi dii xozxtoe'ka' legake' nan bi gak gaogake' shi bin' yixis yiyib neeka'. ⁴ Na' ka chiyoll chajgake' lao yaana' shi bi yixis yiyib neeka' bi gak gaogake'. Na' lekzka' chixis chiyibgake' diika' cheej chaogakile'. Na' dii zanch diika' yoologake' chongake'.) ⁵ Na' fariseoka' len ben'ka' chli' chsedi leya' wḅabgakile' Jesúza', che'gake':

—¿Bi'che bi chon ben'ki nako' txen ka bli' bsemi dii xozxto'choka' cho'?, la' bi chixis chiyib neeka' kat' cheej chaogake'.

⁶ Na' che' Jesúza' legake':

—Kwasloḷ inleban wḅe dii Isai'aza' chele, le' ben' wxiye', kana' bzeje' daa na: Ka nak ben'ki, de cho'a dill'zan choe'la'ogake' nad', na' aga choe'la'ogake' nad' do yichj do lall'gake'.

⁷ Bibi zjanayin chongake' ka choe'la'o nad'; na' daa chli' chsedgakile' nakan dii chyiljlall'z ben'.

⁸ Na' le' chbej yichjle daa nllia Chioza' bia' gonle kwenche gonle daa chyiljlall' ben' yell-lioni.

⁹ Na' lekzka' golle' legake':

—Chzoale ka'lə daa nllia Chioza' bia' gonle kwenche gonle daa bli' bsemi dii xoxto'leka' le'. ¹⁰ Moiséza' wne': “Li koo xaxna'ləna' balaan”, na' “Beena' ine zban che xaxneena' chiyal' guete’.” ¹¹ Na' le' choe'le latj yee beñ' xaxneena': “Bi gak gaken' le', la' yog' dga de cha' ba ncheb' wi'an Chioza'.” ¹² Na' daa nale ka', bich chonle byen gaken beñ' xaxneena'. ¹³ Na' daa chonle ka', chzoale cho'a xtill' Chioza' ka'lə kwenche chonle daa bli' bsemi dii xoxto'leka' le'. Na' dii zanch ka dga chonle.

¹⁴ Na' wne Jesúsza' yog' beñ'ka' lle' na', na' golle' legake':

—Li wzenag dga inia' le', na' li shajniin: ¹⁵ Aga daa cheej chao beñ' yell-lionin chxinj chlenan le'. San daa chalj chxe loo yichjall'do'enan' chxinj chlenan le'. ¹⁶ Ka le' chenile dga nia', li sen wneyi.

¹⁷ Na' ka bikwase' kwit beñ'ka' lle' na' biyo'e loo yoonā' gana' zoagake', na' beñ'ka' nakgake'ne' txen wñabgakile'ne' bi zejin daa golle' beñ'ka'. ¹⁸ Na' golle' legake':

—¿Ani le' bi chajniilen? ¿Abi chajniile aga daa cheej chao beñaan chxinj chlenan le'? ¹⁹ La' aga loo yichjall'do'enan' illinan, san loo li'enan' lljche'n, na'tech yichejan.

Na' daa golle' ka', zejin bittezə yel' wao wak yeej gaocho. ²⁰ Na' lekzka' golle':

—Daa chchej loo yichjall'do' beñ' yell-lioni, lennan' chxinj chlenan le'. ²¹ La' loo yichjall'do'ekan' chalj chxe diiki bi nak wen: yel' chza'lall' mal, yel' chnelen ljwellin, yel' chiyit ljwellin, ²² yel' wban, yel' wzelall', yel' wen dii mal, yel' wxiye', yel' wenlen kwerp cheyinna' daa bi nxe bi nzak', yel' xe', yel' wyilj wzan dill' che beñ', yel' chep cha'lall', na' yel' nchol' nnti. ²³ Yog'lol' dii malki chalj chxegakan loo yichjall'do' beñ' na' chxinj chlegakan legake'.

To noolə bi nake' beñ' Israel benlilallee Jesúsza'

(Mt. 15:21-28)

²⁴ Na' biza' Jesúsza' gana' wzoe' na' ziyaje' gana' mbani yell Tírona' na'ch yell Sidónna'. Na' blline' to yoo na' bi goklallee no inezin, per bi gok wkwashee. ²⁵ Na' to noolə, beñ' zoa to bi' nool che' yoob' dii xiwaa, ka wnezile' bllin Jesúsza', lii wyajtje' jachek' xibe'na' lawe'na'. ²⁶ Na' noola' nake' beñ' griego, na' golje' gana' mbani Sirofeníciāna'. Na' got'yoile' Jesúsza' yibeje' dii xiwaa yoo bi' nool che'na'. ²⁷ Na' goll Jesúsza' le':

—Yog'zə beñ' zigaate chwawe' xiine'ka'. La' bi nakan wen koyochō daa chao xiinchoka' na' wzal'chon lao bekw'ka'.

²⁸ Na' che' noola' le':

—Lekzilo'n, beñ'do', per bekw'ka' chbe'gakb xan mesa' na' chitopgakb blaaka' chxop.

²⁹ Na'ch golle'ne':

—Ni che dillii ba bi'o, biyaj mbalaz. Ba bichej dii xiwaa yoo bi' cho'na'.

³⁰ Na' ka billin noola' lille'na', ble'ile' bi' nool che'na' deb' lo blaga' na' ba bichej dii xiwaa wyoob'.

Biyon Jesúsza' to beñ' kwell na' bi chak inetie'

³¹ Na' biza' Jesúsza' gana' mbani Tírona' na' bidie' yell Sidónna' na' billine' gana' de nido' che Galileana', gana' mbani Decápoliza'. ³² Na' jwa'gake' lawe'na' to beñ' kwell na' leyi bi cha'yen' inie', na' got'yogakile'ne' wxoa neena' yichje'na'. ³³ Na' bche' Jesúsza'ne' ka'lə gana' kono lle', na' bne' xbene'na' loo nague'na', na' bllaa xeneena' lo xbene'na', bshile'n lo lol' beena'. ³⁴ Na' blis jalawe'na' cha'lə, wkaalallee, na' golle'ne':

—¡Éfata! —zejin: ¡Byalj!

³⁵ Na' lii byaljte nague'na', na' gok bita lolleena' na' bishalje' wen. ³⁶ Na' che' Jesúsza' beñ'ka' ble'i kono ye'gake' ka'. Na' la'kzi golle' legake' ka', zizikli bezegake'n dill'. ³⁷ Na' le' bibangakile', che'gake':

—Yog'lol'te chak gon beeni, chiyone' beñ'ka' bi cheni, na' beñ'ka' bi chak ine, chone' ka chnegake'.

8

Jesúza' bwawe' tapa mil ben'
(Mt. 15:32-39)

¹ Do kana', ben' zan inleeb bdop bllag. Na' daa bibi de yeej gaogake', wne Jesúza' ben'ka' nakgake'ne' txen chi'e legake':

²—Chiyeshid' ben'ki, la' ba gok shon lla zoalengake' nad' na' bibi de yeej gaogake'. ³ Na' shi yiselaa legake' bi neej naogake', xoll ichol-lall'gake' tneza', la' balgake' za'gake' zit'.

⁴ Na' ben'ka' nakgake'ne' txen che'gake'ne':

—¿Gatg lljxi'cho dii gao yog' ben'ki?, la' gani lle'cho kono zoa wit' dii gaocho.

⁵ Na' che' Jesúza' legake':

—¿Ka'k' yetxtilka' noa'le?

Na' che'gake'ne':

—Gallan.

⁶ Na' bene' mandad kwe' ben'ka' lo yona', na' bexee gallte yetxtilka', na' ka biyoll bi'e Chioza' yel' choxken, na' bxoxje'n na' bi'en ben'ka' nakgake'ne' txen kwenche chisgake' che che ben'ka'. ⁷ Na' lekzka' nox'gake' zto chop bel. Na' bi'e Chioza' yel' choxken, na' golle' ben'ka' nakgake'ne' txen we'gake' che che ben'ka'. ⁸ Na' yog'lolgake' weej wdaogake' axt ka belgakile', na' bitopgake' zi gall xet' diika' bichoonan. ⁹ Ben'ka' weej wdao gokgake' ka tapa mil. Na' Jesúza' bisee legake' ¹⁰ na' bizee biyoolene' ben'ka' nakgake'ne' txen loo barkwa' na' ziyajgake' gana' mbani Dalmanútana'.

Fariseoka' goklall'gake' gon Jesúza' to yel' wak lawe'ka'
(Mt. 16:1-4; Lc. 12:54-56)

¹¹ Na' bllin fariseoka' na' wzologake' chakguedlengake' Jesúza'. Na' daa goklall'gake' wchixgake'ne', wñabgakile'ne' gone' to yel' wak lawe'ka' kwenche gakbia' shi Chioza'kzan bseleene'. ¹² Na' Jesúza' axt wkaalallee, golle':

—¿Berache le' zoale naa chñabzle gon' to yel' wak dii ile'ile'? Dii li nia' le', aga bi yel' wak gon' ile'ile'.

¹³ Na' bizee kwite'ka', na' biyo'e loo barkwa' sto shii ziyaje' shlaa niso'dna'.

Dill' wxiye' che fariseoka' zaklebin levadúrana'
(Mt. 16:5-12)

¹⁴ Na' ben'ka' nak Jesúza' txen gol-lall'gake' wa'gake' yetxtil che'ka', na' tlish'chga dii noa'gake' loo barkw che'ka'. ¹⁵ Na' che' Jesúza' legake':

—Wsak'gale bi shajle'le dill' wxiye' che fariseoka' na' che Heródeza', daa zaklebi levadúrana'.

¹⁶ Na' ben'ka' nakgake'ne' txen che' ljwellgake':

—Daa bi bi'acho yetxtilan' ne' ka'.

¹⁷ Na' gokbe'i Jesúza' dillaa choe'gake', na' golle' legake':

—¿Berache chakzile daa bi bi'ale yetxtilan' nia' ka'? ¿Abin' shajni'kzile' ni bin' gakbe'ile ka nak diika' chon'? ¿Abin' iyalj yichjlall'do'lenan'? ¹⁸ Zoate jalaoleka' na' bi chle'ile, na' zoate nagleka' na' bi chenile'. ¿Abi chjadinile ka ben'? ¹⁹ Kana' bxoxj' gay' yetxtilka' na' wdao ben'ka' gaya' mil, ¿bal' xet' diika' bichoonan?

Na' gollgake'ne':

—Shllinan.

²⁰—Na' kana' bxoxj' gall yetxtilka' na' wdao ben'ka' tapa mil, ¿bal' xet' diika' bichoonan?

Na' che'gake'ne':

—Zi gallan.

²¹ Na' che' Jesúza' legake':

—¿Ana' ni ka' bin' shajni'kzile?

Jesúza' biyone' to ben' lchol'yell Betsáidana'

²² Na' bllingake' yella' le Betsaida, na' beṅ'ka' lle' yella' jwa'gake' to beṅ' l̄choḷ' lao Jesúza' na' got'yogakile'ne' goḡ'gache'ne'. ²³ Na' beḡ' Jesúza' na' beṅ' l̄choḷa' na' wleje'ne' yella'. Na' blle' xeneena' jalawe'na' na' b̄xoā neena' yichje'na', na' wṅabile'ne' shi ba chle'ile'.

²⁴ Na' che' beṅ' l̄choḷa':

—Chle'id' xonj beṅ', na' nakgake' ka yag dii chza'.

²⁵ Na' Jesúza' beḡee jalawe'na' sto shii, na' biyakile'. Na' ble'ile' kwasl̄ol̄ yog'l̄ol̄te. ²⁶ Na' bisel' Jesúza'ne' sh̄l̄icha lille'na', chi'ene':

—Bi lljayoo dill' yella'.

Pédrona' bi'e dill' Jesúzan' nake' Crístona'
(Mt. 16:13-20; Lc. 9:18-21)

²⁷ Na' biza'len Jesúza' beṅ'ka' nakgake'ne' txen wyajgake' yellka' mbani Cesarea de Filípona'. Na' shlak ngoogake' nez, wṅabile' legake', chi'e:

—¿Non na beṅ' nak'?

²⁸ Na' che'gake'ne':

—Balgake' nagake' lin' dii Juanna', beena' bchoa beṅ' nisa', na' zi balgake' nagake' lin' Elíaza', na' zi balgake' nagake' nako' sto beṅ' wdixjee daa goll Chioza'ne' kani'yi.

²⁹ Na' chi'e legake':

—Shera le', ¿nora nale nak'?

Na' che' Pédróna':

—Lin' Crístona', beena' n̄cheb Chioza' wselee.

³⁰ Na' che' Jesúza' legake' kono ye'gake' ka'.

Jesúza' cho'e dill' guete'
(Mt. 16:21-28; Lc. 9:22-27)

³¹ Na' wzolo Jesúza' bli' b̄sedile' legake' nan le', Beṅ' Bsel' Chioza' Yell-lioni, chonan byen sak'zi'e dii xen, na' beṅ' golka' ch̄n̄abia' na' b̄xozka' ch̄n̄abia' na'ch beṅ'ka' chli' ch̄sedi leya' gakzbangakile'ne', na' chonan byen witgake'ne' na' yibane' ka gak shon̄ lla. ³² Na' bshaljl̄lene' legake' kwasl̄ol̄ daa gak che'. Na'ch wlej Pédróna'ne' ka'l̄ə na' wzolo golle'ne' bi koo cho'e daa. ³³ Na' biyeḡhj Jesúza' chwie' beṅ'ka' nakgake'ne' txen, na' bsheshlene' Pédróna', chi'ene':

—¿Kwas ka'l̄ə, Satanás!, l̄a' bi chajniilo' daa cheeni Chioza' gone', san de yell-liozan chajniilo'.

³⁴ Na' wṅe Jesúza' beṅ'ka' nakgake'ne' txen len beṅ'ka' lle' na', na' chi'e:

—Shi no cheeni gake' nad' txen, chiyaḷ' wsanlall' kwine' na' izanile' yel' mban che'na' yen ile'ile' bittez ni cha', na' gone' ka chazlallaa. ³⁵ L̄a' beena' bi chzanile' yel' mban che'na', beenan' kwiayi', san beena' chzanile' yel' mban che'na' ni cha' na' ni che dill' wen dill' kob cha'na', beenan' gat' to yel' mban che' zejli kani. ³⁶ Bibi zjanayin gap beṅ' yog'l̄ol̄ daa de yell-lioni, shi le' kwiayee. ³⁷ Na' aga zakii chixje' kwenche yisla yel' mban che'na'. ³⁸ Nottezə beena' chido'i wchebe' nombi'e nad' wa wi'e cho'a xtillaana' lao beṅ' saaxyaka' beṅ'ka' bi chon̄l̄ilall' nad', ka'kzə nad', Beṅ' Bsel' Chioza' Yell-lioni, yiyii yido'id' le' kat' yiyedlen' anj̄l̄ cha'ka' na' zinsa' balaan̄ xen che X̄a' Chioza'.

9

¹ Na' lekzka' golle' legake':

—Dii li nia' le', bal-le lle'leni, ni mbanle ile'ile ka ch̄n̄abia'len Chioza' yel' wak xen che'na'.

Jesúza' biyake' nlla'l̄ə
(Mt. 17:1-13; Lc. 9:28-36)

² Wde xop lla, Jesúza' wyaje' to lo yaa sibə, na' b̄chi'e Pédróna', Jacóbona' na'ch Juanna'. Na' lawe'ka' biyake' nlla'l̄ə. ³ Na' xe'na' axt chep cheeni'n, na' biga zoa beṅ' chibe'n xtil

inleeb ka gokan. ⁴ Na' ble'gakile' Elíaza' na'ch dii Moiséza' chshaljengake' Jesúza'. ⁵ Na' che' Pédróna' Jesúza':

—Maestro, jwen inleeb zoacho ni! Gonnto' twej ransh chele, to cho', to che dii Moiséza', na' sto che Elíaza'.

⁶ Kon bi billet-lallee golle', daa chlleebchagake'. ⁷ Na' wze to bej bkwashaan legake', na' loo beja' wne Chioza', chi'e:

—Beenin xiinaa, na' le chakidee. Li wzenag che'.

⁸ Na' ka bwiagake' gana' wlle' ben'ka' shon, stoz Jesúza' ze.

⁹ Na' shlak chiyetjgake' lo yaana', goll Jesúza' legake' kono ye'gake' daa ble'gakile' axt kat'ch le', Ben' Bsel' Chioza' Yell-lioni, ba bibane' ladj ben' wetka'. ¹⁰ Na' daa golle' ka', ni to kono ben' yoblə gollgake' daa ben ble'gakile', la'kzi wñabi ljwellgake', bi zejín daa golle' yibane' ladj ben' wetka'. ¹¹ Na' wñabgakile' Jesúza', che'gake'ne':

—¿Biche naz ben'ka' chli' chsedi leya' nan zigaate Elíazan' yiyed?

¹² Na' chi'e legake':

—Dii li, Elíaza' yide' zigaate yidgwee xnezi yog'lolte. ¿Abi nezile biche Cho'a Xtill' Chioza' nan Beena' Bsel' Chioza' Yell-lioni chonan byen sak'zi'chgue' na' gakzbani ben' le'? ¹³ Na' nia' le', ba biyed Elíaza', na' bengakile'ne' daa nazan chegake', kon ka na Cho'a Xtill' Chioza' gongake' che'.

Biyon Jesúza' to bi' yoo dii xiw'
(Mt. 17:14-21; Lc. 9:37-43)

¹⁴ Na' ka billingake' gana' lle' ben'ka' sto, ben'ka' nakgake'ne' txen, na' ble'gakile' lle' ben' zan inleeb kwite'ka', na' len bal ben'ka' chli' chsedi leya' chakguedlengake' legake'. ¹⁵ Na' ben'ka' lle' na' ka ble'gakile' Jesúza', bibangakile' na' wza'dogake' jawapgake'ne' chiox. ¹⁶ Na' chi'e legake':

—¿Bi cheyin chakguedlenile ben'ka'?

¹⁷ Na' to beena' len ladj ben'ka' lle' na' chi'ene':

—Maestro, ni ba nchi'a bi' cha'ni lawo'ni, la' yoob' to dii xiw' na' chllonan ineb'.

¹⁸ Gattezə chdab' dii xiwaa choxa'n leb' na'ch chchoonan leb' lo yona'. Na' chbia bllin' cho'abaa, na' chaoxaxj leybaa na' chzecha kwerp che'baa. Na' ba gosh' ben'ki nako' txen yibejgake' dii xiwaa yoob', per bi chakgake'.

¹⁹ Na' che' Jesúza' legake':

—¿Le' ben' bi chajle! ¿Zi' ka'k'tek chiya' soalen' le'? ¿Zi' ka'k'tek chiya'loid' le'? Li lljxi'shkib' ni.

²⁰ Na' jwa'gake'b' lawe'na'. Na' ka ble'i dii xiwaa Jesúza', benan ka wyazb' shona'. Na' billeeb' lo yona' na' wbix wto'lb' na' wllia bllin'na' cho'abaa. ²¹ Na' wñabi Jesúza' xabaa, chi'e:

—¿Bstrate wzolo chakb' ki?

Na' che' xabaa:

—Kana' nakteb' bi'do' chakb' ka'. ²² Na' zan shii ba bzal' dii xiwaab' lo yi'na' na' loo nisa' kwenche witan leb'. Na' shi wak yiyono'b', biyesh'lall'gachi neto' na' goklengach neto'.

²³ Na' che' Jesúza':

—¿Biche nazo' shi wak'?, la' beena' chonlilall' Chioza' aga bi dii lallj gat' che'.

²⁴ Na' besyaa xabaa, chi'e:

—Chonlilallaane'. ¿Goklen nad' gonlilall'chee!

²⁵ Na' ka ble'i Jesúza' ba chdop chllag ben' zan inleeb, na' bsheshlene' dii xiwaa, chi'en:

—Dii xiw', lin' chono' kwenche bi cheni bi'ni ni bi chak ineb', nad' nia' li', bichej, na' bich gak yiyoo sto shii.

²⁶ Na' besyaa dii xiwaa, na' bxizan leb' zibia' wal na' bichejan, na' gotb' ka bi' wet. Na' ben' zan wñagake': “Ba with'.” ²⁷ Na' bex' Jesúza' na'ba' kwenche bisolleeb'.

²⁸ Na' ka biyoo Jesúza' to loo yoo, ben'ka' nakgake'ne' txen wñabgakile'ne' to lezgake', che'gake':

—¿Berache bi gok yibejnto' dii xiwaa?

²⁹ Na' chi'e legake':

—Kwenche gak yichej dii xiw' ka dga, chiya' soale wbas' na' we'lwill-le Chioza'.

Jesúza' sto shii cho'e dill' guete'

(Mt. 17:22-23; Lc. 9:43-45)

³⁰ Na' biza'gake', na' bidegake' gana' mbani Galileana'. Na' Jesúza' bi goklallee no inezi gan zoagake' ³¹ daa chzajniile' ben'ka' nakgake'ne' txen. Na' chi'e legake':

—Nad', Ben' Bsel' Chioza' Yell-lioni, gon ben' nad' lo na' ben' malka' na' witgake' nad', na' ka gak shon' lla, yiban' ladj ben' wetka'.

³² Na' bi wyajni'gakile' daa chi'e legake', na' bi biyaxjgakile' inabgakile'ne' biçe che'ze' ka'.

¿Noran zak'chi?

(Mt. 18:1-5; Lc. 9:46-48)

³³ Na' billingake' yell Capernaúma'. Na' ka billingake' gana' zoagake', na' chi'e legake':

—¿Bi cheyin chakguedzle shlak zingoocho neza'?

³⁴ Na' ni togake' bi wne, daa gokguedgake' che noyen'gaken' nak ben' zak'chi. ³⁵ Na' wche' Jesúza' na' goxe' ben'ka' shllin, chi'e legake':

—Shi nole cheenile gakle ben' zakii, chiya' gon kwinle ka wen llin che ben'.

³⁶ Na'ch bzoe' to bi'do' ladje'ka'. Na' blene'b' chi'e legake':

³⁷ —Nottezə ben' wlebe' to bi'do' ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'.

Beena' bi chakzbani cho', txenkzan nake' cho'

(Lc. 9:49-50; Mt. 10:42)

³⁸ Na' che' Juanna' le':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben' na' blonnto' gone' ka', la' bi nake' cho' txen.

³⁹ Na' che' Jesúza':

—Bi wllonle gone' ka', la' beena' chzetj lia'na' kwenche chone' yel' wak, aga wak inie' zban cha'. ⁴⁰ La' beena' bi chakzbani cho', txenkzan nake' cho'. ⁴¹ Na' nottezə beena' gone' le' la'ch' lat' nis yeejle daa nakle nad' txen, dii li nia' le', de dii si'e banez.

Diika' gon ka ibixcho lao dii mala'

(Mt. 18:6-9; Lc. 17:1-2)

⁴² Nottezə beena' gon ka ibix to ben' zi' chzolo chonlilallee nad', naklan wen wwal'gake' yene'na' to yaj che molinna' na' lljazal'gake'ne' loo nido'na' aga ka daa gone' ka ibix ben' lao dii mala'. ⁴³ Na' shi noona' chonan ka ibix' lao dii mala', bchogan. Wenchlan bi de noona' tlaa yillino' kwit Chioza' aga ka daa yiyaj doxentio' lo yi' gabila' daa biga yiyol, ⁴⁴ gana' ni bzogaa bi chet ni biga chiyol yi'na'. ⁴⁵ Na' shi ni'ona' chonan ka chono' to dii mal, bchogan. Wenchlan bi de ni'ona' tlaa yillino' kwit Chioza' aga ka daa yiyaj doxentio' lo yi' gabila', ⁴⁶ gana' ni bzogaa bi chet ni biga chiyol yi'na'. ⁴⁷ Na' shi jalawo'na' chonan ka chono' to dii mal, wlejan. Wenchlan bi de jalawo'na' tlaa yillino' gana' zoa Chioza' chnabi'e aga ka daa yiyaj doxentio' lo yi' gabila', ⁴⁸ gana' bi chet bzogaa ni biga chiyol yi'na'.

⁴⁹ 'Ka yog'te diika' chzangakile' choe'gake' Chioza' chgoogake'n zed', ka'kzan yog'te ben'ka' nonlilall' nad' yen ile'gakile' yel' zak'zi'na' yell-lioni. ⁵⁰ Zedaa nakan dii wen, per shi bich nakan zxi', aga wakch yiyonchon zxi' dii yoblə kwenche wchinchon. Chiya' soalen ljwell-le mbalaz, na' shi gonle ka', nakle ka yel' wao daa yoo zed' na' sian.

10

*Bi chiyaḷ' yilaa beṅ'ka' nshagna'**(Mt. 19:1-12; Lc. 16:18)*

¹ Biza' Jesúza' Capernaúma' ziyaje' gana' mbani Judeana' na' lo yell-liona' daa de shḷaa yao Jordánna'. Na' bizdi'a bizllag beṅ' zan lawe'na' na' wzoloe' chli' chsedile' ḷegake' kon ka ba yooloe' chone'. ² Na' baḷ fariseoka' wbig'gake' lawe'na', na' kwenḷchezə wchixgake'ne' wṅabgakile'ne' shi de lsens yilaa xool beṅ'. ³ Na' chi'e ḷegake':

—¿Bin bllia dii Moiséza' bia' gonle?

⁴ Na' che'gake'ne':

—Dii Moiséza' bi'e latj yichoon beṅ' byona' xool'e'na' na' wi'ene' to yish daa cho'e dill' ba bilaagake'.

⁵ Na' che' Jesúza' ḷegake':

—Dii Moiséza' bllie' bia' gonle ka' daa nakle beṅ' widenag. ⁶ Per dii nech ka wxe wzil yell-lioni, Chioza' “bene' beṅ' byona' na'ch noola'.” ⁷ “Daan, beṅ' byona' wḷee xaxṅeena' kwenḷche soalene' xool'e'na' ⁸ na' gakgake' toz.” Na' bich nakgake' chop, san ba nakgake' toz. ⁹ Na' beṅ'ka' ba non Chioza' toz, ni to beṅ' yell-lio bi chiyaḷ' yilee ḷegake'.

¹⁰ Ka billingake' yoonaa' gana' zoagake', beṅ'ka' nakgake'ne' txen wṅabgakile'ne' cheyi daa golle' ka'. ¹¹ Na' che' Jesúza' ḷegake':

—Beena' yilee nool che'na' na' yishagnee nool yoblə, chone' ka beena' zoakzə nool che' na' chdalene' nool yoblə. ¹² Na' shi noola' yilee beṅ' che'na' na' yikee beṅ' yoblə, chone' ka beena' zoakzə beṅ' che' na' chdalene' beṅ' yoblə.

*Jesúza' chonleeye' bi'do'ka'**(Mt. 19:13-15; Lc. 18:15-17)*

¹³ Na' baḷ beṅ' jwa'gake' bi'do' che'ka' lao Jesúza' kwenḷche wxoa neena' yichjb'ka' na' gonleeye' ḷegakb'. Na' beṅ'ka' nakgake'ne' txen wzologake' chsheshlengake' beṅ'ka' zjwa' bi'do'ka'. ¹⁴ Na' ka ble'i Jesúza' chsheshlengake' beṅ'ka', bllie' na' chi'e ḷegake':

—Li we' latj yid bi'do'ki lawa'ni, bi wllonle, la' Chioza' chṅabi'e loo yichjlall'do' beṅ'ka' nak ka ḷegakb'. ¹⁵ Dii li nia' le', beena' bi yiyak yichjlall'do'ena' ka che' bi'do'ki kwenḷche inabia' Chioza' le', bi yilline' gana' zoa Chioza'.

¹⁶ Na' blene' bi'do'ka', na' bḷoxa neena' yichjb'ka' na' benleeye' ḷegakb'.

*To bi' wew', bi' wni'a, bshaljlem' Jesúza'**(Mt. 19:16-30; Lc. 18:18-30)*

¹⁷ Ka ba chiza' Jesúza' yigwee nez, bllindo to bi' wew' bḷhek' xibbaa lawe'na' che'bee:

—Maestro, li' nako' beṅ' wen. ¿Beran chiyaḷ' gon' kwenḷche gat' to yel' mban cha' zejli kaṅi?

¹⁸ Na' che' Jesúza' ḷeb':

—¿Berache nazo' nad' beṅ' wen? Toz Chioza' nake' beṅ' wen. ¹⁹ Ba nezkzilo' daa nllia Chioza' bia' goncho: “Bi wito' beṅ', bi soaleno' nool bi nak nool cho', bi kwano', bi chiljlalloo bizə gon ino' che' beṅ', ni bi siyoo, na' wdap balaan xaxṅoo.”

²⁰ Na'ch che'bee:

—Maestro, kana' naktia' bi' xkwid' chon' yog' diika'.

²¹ Na' bwia Jesúza' ḷeb' kon yel' chaki, chi'e:

—Stozə daa chyallj gono': jayet' yog' dii de cho' na' be'n beṅ' yesh'ka', na' gat' to yel' shao' cho' yabana'. Na' da dino' nad'.

²² Na' gokyeshii bi' wni'ana' ka golle'b' ka'. Na' ziyajb' chakyeshib' daa nakb' bi' wni'a xen inleeb.

²³ Na' bwia Jesúza' beṅ'ka' lle' na', na' chi'e beṅ'ka' nakgake'ne' txen:

—¿Lallj inleeb chonan che' beṅ' wni'aka' we'gake' latj inabia' Chioza' ḷegake'!

²⁴ Na' bibani beṅ'ka' nakgake'ne' txen daa golle' ka'. Na' chizi'e ḷegake':

—Le' xiindawaa, chonan lallj che beṅ' wni'ana' yilline' yabana' gana' chṅabia' Chioza'.
²⁵ Lobe'ch te to kamey to xan yesh' aga ka to beṅ' wni'a yilline' yabana' gana' chṅabia' Chioza'.

²⁶ Ka bengakile' golle' ka', zizikli bibangakile', na' che' ljwellgake':

—¿Notg gak yillin lao Chioza', shka'?

²⁷ Na' bwia Jesúza' legake' chi'e:

—Ni to beṅ' yell-lío bi gak gone' dga, per Chioza' aga bi dii lallj che' de, la' yog'loṽte chak gone'.

²⁸ Na' Pédróna' chi'ene':

—Neto' ba wlej yichjnto' yog'loṽ dii napnto' kwenche nonnto' li' txen.

²⁹ Na' che' Jesúza':

—Dii li nia' le', nottezə beṅ' ba bzanile' no lille', no xaxnee, no beṅ' bishee, no beṅ' zane', no xiin xoole', no yell-lío che' ni cha' nad' na' ni che dill' wen dill' kob cha'na', ³⁰ lo yell-lioni Chioza' yiyo'ene' dii zanch ka diika' wlej yichje', no lille', no beṅ' bishee, no beṅ' zane', no xiine', no yell-lío che' la'kzi chiya dii wsak'zi' beṅ' le', na' illin lla gat' to yel' mban che' zejli kaṅi. ³¹ Per beṅ' zan nakgake' beṅ' zakii naa, wllin lla bich bi sak'gake', na' beṅ' zan bi nakgake' beṅ' zakii, wllin lla gakgake' beṅ' zakii.

De wyon shii Jesúza' cho'e dill' guete'

(Mt. 20:17-19; Lc. 18:31-34)

³² Ka ziyajgake' Jerusalénna', na' zillialo Jesúza' lao beṅ'ka' nakgake'ne' txen. Na' le chibangakile', na' beṅ'ka' zinoch le' le chllebgake'. Na' bche' Jesúza' beṅ'ka' shllin ka'la' na' wzoloe' cho'e dill' lawe'ka' daa gak che', ³³ chi'e legake':

—Ba gokbe'kzile' ba ziyajcho Jerusalénna', na' nad', Beṅ' Bsel' Chioza' Yell-lioni, gongake' nad' lo na' bxoza' chṅabia' na' beṅ'ka' chli' chsedi leya', na' wchoglogake' cha' guet' na' gongake' nad' lo na' beṅ' zit'ka'. ³⁴ Na' wtitgakile' nad', na' wlla' xeneeka' nad', na' wit chingake' nad', na' witgake' nad'. Na' ka gak shon lla yiban' ladj beṅ' wetka'.

To dii wṅab Jacóbona' len Juanna' lao Jesúza'

(Mt. 20:20-28)

³⁵ Na' Jacóbona' len Juanna', beṅ'ka' nak xiin Zebedewa', wbig'gake' lao Jesúza' che'gake'ne':

—Maestro, cheeninto' gongacho' goklen gono' dga inabinto' li'.

³⁶ Na' chi'e legake':

—¿Beran cheenile' gon' chele?

³⁷ Na' che'gake'ne':

—We'gacho' latj kwe'nto' shlaa wej kwito'na' kat' solo inabi'o gana' de balaan xen cho'na'.

³⁸ Na' che' Jesúza' legake':

—Aga nezile' bin chṅable. ¿Awzoile' wtil-le ka yel' zak'zi'ka' idil illag' na' gak chele ka gak cha'?

³⁹ Na' che'gake'ne':

—Wzointo'n.

Na' che' Jesúza' legake':

—Dii li, wtil-le ka yel' zak'zi'ka' idil illag' na' gak chele ka gak cha'. ⁴⁰ Per daa nale kwe'le shlaa wej kwitaa bi nak lo na' gona'n, san beṅ'ka' ba mbej Chiozan', gakan chegake'.

⁴¹ Ka beni beṅ'ka' zi shi, na' bllaagake' Jacóbona' na'ch Juanna'. ⁴² Na' wṅe Jesúza' legake', chi'e:

—Nezkzile beṅ'ka' chṅabia' yell-lioni na' beṅ'ka' zakii chongake' byen chzenag beṅ' chegake'. ⁴³ Per aga kan' chiya' gonle. Shi nole cheenile' gakle beṅ' mbejlawin chiya' gon kwinle ka wen llin che beṅ'. ⁴⁴ Na' shi nole cheenile' gakle beṅ' zakii, chiya' gakle ka beṅ' ndoo lla yel chone' xshin beṅ'. ⁴⁵ La' nad', Beṅ' Bsel' Chioza' Yell-lioni, aga bid'

kwenche gaklen ben' nad', san bid' kwenche gaklen' ben' na' wi'a yel' mban cha'na' kwenche yisla' ben' zan lao saaxyana'.

Jesúza' biyone' ben' lchola' le Bartimeo
(Mt. 20:29-34; Lc. 18:35-43)

⁴⁶ Na' bllingake' Jericóna', na' ka ba chichej Jesúza' yella' kon ben'ka' nakgake'ne' txen na' len ben' zanch zinogake'ne', na' chi' to ben' lchol cho'a neza' cheenile' no we' le' mech, na' lie' Bartimeo, xiin to ben' le Timeo. ⁴⁷ Na' ka benile' nan Jesús, ben' Nazaretan', wdena', na' wzoloe' chosyee, chi'e:

—¡Jesús, xiin dia che dii Daví, biyesh'lall'gachi nad'!

⁴⁸ Na' ben' zan bsheshlengake'ne' daa chosyee, na' zizikli chosyaache', chi'e:

—¡Xiin dia che dii Daví, biyesh'lall'gachi nad'!

⁴⁹ Na' wlez Jesúza' chi'e:

—Li inie'.

Na' wnegake'ne', che'gake':

—Btiplaloo, wzolla', ba chnie' li'.

⁵⁰ Na' bzalee ka'lə lechaa nxoə kolleena' na' wzollee jsie' lao Jesúza'. ⁵¹ Na' wnable'ne', chi'e:

—¿Bin cheenilo' gon' cho'?

Na' che' ben' lchola'ne':

—Maestro, cheenid' ile'id'.

⁵² Na' che' Jesúza'ne':

—Wak yiyajo'. Daa ba benlilaloo nad', ba biyakilo'.

Na' katena' lii ble'teile' na' wnoe' Jesúza'.

11

Ka billin Jesúza' Jerusalénna'
(Mt. 21:1-11; Lc. 19:28-40; Jn. 12:12-19)

¹ Ka ba zoa yillingake' Jerusalénna', na' wdegake' gaozə gana' llia yell Betfagéna' na' yell Betániana', kwit Yaa Olívoza', na' Jesúza' bselee chop ben'ka' nakgake'ne' txen, ² chi'e legake':

—Li shaj yella' daa llia gaozə, na' ka illinle na', ile'ile to burr chbando', ba konon' kwia, da'b yaga'. Na' wsell-leb wche'leb nilə. ³ Na' shi no inaz le': “¿Berache chsellzleb?”, na' ye'lene': “Xanchonan' chyaljile'b xtit, na' yiyontie'b.”

⁴ Na'ch wyaj ben'ka' bselee, na' ble'gakile' to burr da'b to cho'a yoo gana' chde neza', na' bsellgake'b.

⁵ Na' ben'ka' lle' na' wnabgakile' legake':

—¿Bin chonle? ¿Biche chsellzleb?

⁶ Na' gollgake' legake' daa goll Jesúza', na' be'gake' latj bche'gake'b. ⁷ Na' bxoagake' xe'ka' koll' burra' na' jasangake'b lao Jesúza', na' wllie'b. ⁸ Na' ben' zan bshiljgake' xe'ka' tneza', na' zi bale' bchoggake' no zin na' wdixjgake'n tneza'.

⁹ Na' ka ben'ka' llialo lao Jesúza' ka ben'ka' nogake'ne', chosyaagake', nagake':

—¡Li we'la'o Chioza! ¡Gonleeyshga Xancho Chioza' beeni ba bselee! ¹⁰ ¡Gonleeyshga Xancho Chioza' yel' wñabia' che beeni zee lo dia che dii xozxto'cho Davina! ¡Li da we'la'ocho Chioza' zoa yabana'!

¹¹ Na' wyoo Jesúza' yell Jerusalénna' na' zeje' gana' zoa yoodo'na'. Na' ka biyoll bwie' doxenten na' ziyaje' Betániana' len ben'ka' shllin, daa ba wlle'.

Bllaa Jesúza' daa bibi dii zix llia yag yixwewa'
(Mt. 21:18-19)

¹² Na' betiyo ka biza'gake' Betániana', wdon Jesúza'. ¹³ Na' zit'lə ble'ile to yag yixwew llia xlaguinna', na' jawie' shi lekzka' llian yixwewa'. Na' ka blline' zeelo xlaguinna' llia, la' aga tiemp che yixwew kana'. ¹⁴ Na'ch golle' yaga':

—iBatch kwio' dii gao beñ'!

Na' beni beñ'ka' nakgake'ne' txen ka golle'n.

Jesúza' bisheshe' beñ'ka' chit' chde lesh' chyoodo'na'

(Mt. 21:12-17; Lc. 19:45-48; Jn. 2:13-22)

¹⁵ Na' ka billingake' Jerusalénna', Jesúza' wyo'e lesh' chyoodo'na' na' wzoloe' bishesh bicheene' beñ'ka' chit' chde na' beñ'ka' cha'o chzi'. Na' bishi'e mes che beñ'ka' chshaa mecha' na' bzoles bzolline' gana' chi' beñ'ka' chit'gake' palomka'. ¹⁶ Na' bi bi'e latj no sho'lench dii wit' wdie' lesh' chyoodo'na'. ¹⁷ Na' wzoloe' chli' chsedile' beñ'ka' lle' na', chi'e:

—Cho'a Xtill' Chioza' nan: “Lilla'na' nakan ga choe'lwill yog'te beñ' lle' doxen lo yell-lioni nad'”, per le', ba nonzlen ka to ga chdop chllag wban.

¹⁸ Na' ka beni bxozka' chñabia' na' beñ'ka' chli' chsedile' leya' ka wne', wzologake' wdiljll'gake' nak gongake' witgake'ne', daa le chllibgake'ne', la' yog' beñ' chibangak-ile' ka chli' chsedile' legake'. ¹⁹ Na' ka gol, biza'len Jesúza' beñ'ka' nakgake'ne' txen Jerusalénna'.

Wbill yag yixwewa'

(Mt. 21:20-22)

²⁰ Na' betiyo shzila' ka wdegake' gana' zoa yag yixwewa', ble'gakile' ba wbill ax̄t loinna'. ²¹ Na' jadini Pédróna' daa goll Jesúza' yaga' na' chi'ene':

—Maestro, bwiakachi, yag yixwewa' daa bsheshleno'. Ba wbillan.

²² Na' che' Jesúza' legake':

—Li gonlilall' Chioza'. ²³ Dii li nia' le, nottezə beena' yee yaani: “Bkwas ka'lə na' jsoa loo niso'na'”, na' bi gonchoplallee, san shajli'e, na' gak ka ine'. ²⁴ Daan nia' le', bittezə inable kat' we'lwill-le Chioza', li shajle' ba nakkzan gone'n, na' ikaalen. ²⁵ Na' kat'ka' choe'lwill-le Chioza', li si'xen che bish' ljwell-lena' shi bi chone' chele kwenche Xalena' beena' zoa yabana' si'xene' saaxya cheleka'. ²⁶ La' shi le' bi si'xen che ljwell-le, lekzka' Xalena', beena' zoa yabana', bi si'xene' saaxya cheleka'.

Yel' wñabia' che Jesúza'

(Mt. 21:23-27; Lc. 20:1-8)

²⁷ Na' billingake' Jerusalénna' sto shii, na' shlak chda Jesúza' lesh' chyoodo'na', wbig' bxozka' chñabia', len beñ'ka' chli' chsedile' leya' na' beñ' golka' chñabia', ²⁸ na' che'gake'ne':

—Wnashki neto', ¿nora lsens cheyi chono' diiki? ¿No beñ li' yel' wñabia'na' kwenche chono' diiki?

²⁹ Na' che' Jesúza' legake':

—Lekzka' nad', de to dii inabid' le'. Na' shi le' inale nad' daa inabid' le', na' inia' le' no lsens cheyin chon' yog' diiki. ³⁰ ¿Noran bsel' Juanna' kwenche bidchoe' beñ' nisa'? ¿AChiozan' bseleene', anti beñ' yell-liona'zan? Li inashki nad'.

³¹ Na'ch choe'len ljwellgake' dill', che'gake':

—Shi ye'chone' Chioza' bseleene', lobe' ine' cho': “¿Berache ki wyajle'le che', lla?” ³² Na' bite gak yize'chone' nozə beñaan bseleene'.

Bi biyaxjgakile' ye'gake'ne' ka' daa bllebgake' beñ' yellka', la' yog'zgake' yoo yichjgake' Juanna' goke' to beñ' wdixjee daa goll Chioza'ne'. ³³ Na' gollgake' Jesúza':

—Bi nezinto'.

Na' che' Jesúza' legake':

—Lekzka' nad', bi inia' le' no beñ nad' yel' wñabia'na' chon' diiki.

12

Jempl che wen llinka' ben'ka' nak ben' mal
(Mt. 21:33-46; Lc. 20:9-19)

¹ Na' wzolo Jesúza' bseesile' legake' to jempl, chi'e:

—To ben' biyaze' yag uva. Na' wlo'en leeja', na' beshawee gana' wsigake' uvaka', na' bene' to yoo sibə, gana' kwia beena' gap wwie'n.

'Na'tech bene'n lo na' to chop ben' na' wzee zeje' zit'. ² Na' ka bllin lla yishibgake' uvaka', bselee to wen llin che'na' lao ben'ka' chap yag uvaka' kwenche lljaxi'e daa chidolee. ³ Per ben'ka' bex'gake' wen llin che'na', na' bet wdingake'ne' na' bilaggake'ne' to ka che'. ⁴ Na' xan yag uvaka' bselee sto wen llin che' lawe'ka', na' blaagake' yichje'na', na' chiya dii bengakile'ne'. ⁵ Na'ch bselee stoe', na' betgake'ne'. Na'tech bselee zanch ben' yoblə; na' balgake' bengakile' zibia', na' zi balgake' betgake'.

⁶ 'Na' ni chgaan bi'na' nakyen' xiine', bi'na' le chakile'. Na' bseleeb', la' gokile': "Wapgake' balaan bi' cha'ni." ⁷ Na' ben'ka' nak lo na'gake' yag uvaka' che' ljwellgake': "Bi'nin gaki cheb' dga chapcho. Li da witchob', na' gakin checho." ⁸ Na' bex'gake'b' na'ch betgake'b' na' bibejgake' kwerp chebaa gana' lle' yag uvaka'.

⁹ Na' wnabi Jesúza' legake':

—¿Beraka chakile gon xan yag uvaka'? De de shaje' na' lljete' ben'ka' na' yiyone' yell-lio che'na' gana' lle' yag uvaka' lo na' ben' yoblə.

¹⁰ ¿Abigan' wlable Cho'a Xtill' Chioza'?, gana' na:

Yaja' daa bi wyoolall' wen yooka',
leyen' lannan' yaja' daa ba nchejcha yoona'.

¹¹ Dgan ben Xancho Chioza' na' nakan to dii yibanicho.

¹² Na'ch goklall'gake' gox'gake' Jesúza' daa gokbe'gakile' bchine' jempla' daa bi chajle'gake' che'. Per daa chllebgake' ben'ka' ndop nllag, biza'gake' bibi bengakile'ne'.

Janabgakile' Jesúza' shi chiyal' chixjgake' daa chnab ben' Rómaka'
(Mt. 22:15-22; Lc. 20:20-26)

¹³ Na' bsel'gake' lao Jesúza' bal fariseoka' na' zi bal ben'ka' nak Heródeza' txen, kwenchezə kweyjelgakile'ne' na' lljadaogake' xya che'. ¹⁴ Na' wyajgake' lawe'na', che'gake'ne':

—Maestro, nezinto' dillaa choo nakan dii li. Na' biga chshoo cho'a xtilloona' lao nottez ben', la' bi chwio' shi no nakgake'. San chli'o nez li che Chioza' kon ka nakan. Wnashki neto': ¿Achiyal' chixjcho daa chnab beena' chnabia' Rómána', anti bi chiyal' chixjchon?

¹⁵ Na' gokbe'i Jesúza' aga do lall'gake'n che'gake'ne' ka', na'ch chi'e legake':

—¿Berache chyiljall'zle wchixle nad'? Li gonshki ni to mech kwenche ile'ida'n.

¹⁶ Na' be'gake'ne'n, na' che' Jesúza' legake':

—¿Nora cho'alawin na' no lein da' lee mechi?

Na' che'gake'ne':

—Che beena' chnabia' Rómanan'.

¹⁷ Na' che' Jesúza' legake':

—Na'len li we' beena' chnabia' Rómána' daa naki che', na' lekzka' li we' Chioza' daa naki che'.

Na' le bibangakile' daa golle' legake'.

Wnabgakile' Jesúza' nak gak kat' yiban ben' wetka'
(Mt. 22:23-33; Lc. 20:27-40)

¹⁸ Na' wyaj bal saduceoka' lao Jesúza'. Na' daa nagake' bich yiban ben' wetka', wnabgakile'ne' dga:

¹⁹ —Maestro, ley daa bzej dii Moiséza' nan shi to ben' byo guete' na' yigaan xoolena' wizeb na' kono xiingake' wzoa, ben' bisheena' chiyal' yikee nool wizeba' kwenche soa

xiin dia che dii ben' bisheena'. ²⁰ Na' to shii wzoa gall bish' ben'. Na' ben' necha' bshagnee, na' wite' na' kono xiine' wzoa. ²¹ Na' ben' wchopina' bikee noola', na' lekzka' wite' na' kono xiine' wzoa. Na' ka'kzə gok che ben' wyonina'. ²² Na' gall bish'te ben'ki wzoalengake' noola' na' kono xiingake' wzoa. Na' ka wde wit yog'lolgake', lekzka' wit noola'. ²³ Na' kat' yiban ben' wetka', ¿norayen'en' gak ben' che noola', lla? la' gall bish'tegaken' wkaagake'ne'.

²⁴ Na' che' Jesúza' legake':

—Naklejjilen, daa bi nombia'le Cho'a Xtill' Chioza' ni ye'l' wak che'na'. ²⁵ Kat'ka' yiban ben' wetka', koch no ikaa ljjwellin, ni koch no wit' wde xiinin, san yiyakgake' ka anjlka' lle' yabana'. ²⁶ Na' ka nak daa yiban ben' wetka', ¿abin' wlable daa bzej dii Moiséza' gana' cho'en dill' che yagdo'na' chal', na' goll Chioza' dii Moiséza': “Nadaan Chios che Abraham'a, Isaaca', na'ch Jacoba'”? ²⁷ Na' bi nake' Chios che ben' wet, san nake' Chios che ben' ban. Dii xen inleeb naklejjile.

Daa llialach lao diika' bllia Chioza' bia' goncho

(Mt. 22:34-40)

²⁸ Na' beni to ben' chli' chsedi leya' ka golle' legake'. Na' daa gokbe'ile' le wen billie' xtilleeka', na' wñabile'ne':

—¿Beran lliachte nllia leya' bia' goncho?

²⁹ Na' che' Jesúza'ne':

—Daa lliachte lao diika' nllia Chioza' bia' goncho, len daa na: “Li wzenag, le' ben' Israel, Xancho Chioza' zeelo nake' Chios. ³⁰ Goki Xano' Chioza' do yichj do lalloo, axt ga zeelo chajniilo', na' do ka nak fuerz cho'na'.” ³¹ Na' de wchopina' nakan ka dii necha': “Chiyal' gakilo' bish' ljjwello'na' ka chaki kwino'.” Bich de dii zak'chi ka diiki.

³² Na' beena' chli' chsedi leya' chi'ene':

—Kakzan nakan, Maestro. Dii li kan' nakan: toz Chiozan' zoa, na' bichga zoa ka le'.

³³ Na' daa gakicho Chioza' do yichj do lall'cho, na' axt ga zeelo chajniicho, na' do ka nak fuerz chechona', na' gaki bish' ljjwellchona' ka chaki kwinchona', zak'chan aga ka yog'lolte bayix'ka' chitgake' na' chzeygake'b lao Chioza'.

³⁴ Na' ka gokbe'i Jesúza' kayen'nan billii beena' xtilleena', na' chi'ene':

—Zi lat'zə chyalljilo' kwenche inabia' Chioza' yichjlall'do'na'.

Na' koch no biyaxji inabchile'ne'.

Crístona' nake' xiin dia che dii rey Davina'

(Mt. 22:41-46; Lc. 20:41-44)

³⁵ Na' shlak chli' chsedi Jesúza' ben'ka' lesh' chyoodo'na', na' chi'e legake':

—¿Berache nazə ben'ka' chli' chsedi leya' nan Crístona', beena' ba mbej Chioza' inabi'e, nake' xiin dia che dii Davina'? ³⁶ La' kwin dii Davina' bi'e dill' daa goll Espíritu che Chioza'ne', kana' wne':

Xancho Chioza' golle' Xan'na':

“Wche' kwit' de shlini,

shlak wzoa' xni'ona' ben'ka' chakzbani li'.”

³⁷ Len kwin dii Davinan' golle' Crístona': Xan', ¿berache nazgake' Crístona' nake' xiin dia che dii Davina'?

Na' ben' zanka' ndop nllag bibagakile' xtilleena'.

Jesúza' chawe' xya che ben'ka' chli' chsedi leya'

(Mt. 23:1-36; Lc. 11:37-54; 20:45-47)

³⁸ Na' ka chli' chsedi Jesúza' ben'ka', chi'e legake':

—Wsak'gale bi gonle ka ben'ka' chli' chsedi leya'. Le chibagakile' gon xe'ka' dii ton, na' cheengakile' yog'zə ben' gaggake' legake' balaan ladj lkwe' ben'. ³⁹ Na' gana' chdop chllagcho choe'lwillcho Chioza' le chibagakile' kwe'gake' gana' chbe' ben'ka' zakii, na'

ka'kzə chongake' ga de yel' wao. ⁴⁰ Na' lekzka' chkaatezgake' lill nool wizebka', na' kwenche ina ben' le shlichə zej ben'ki lao Chioza', chongake' ka choe'lwill Chioza' ssha nleb. Na' daa chongake' ka', ba nakten ile'chgakile' yel' zi' walch.

Daa bzani to nool wizeb, bi'en Chioza'
(Lc. 21:1-4)

⁴¹ To shii chi' Jesúza' gaozə gana' chgoogake' mech che yoodo'na' na' chwie' ben'ka' chgoogake' mecha'. Na' ben' zan ben' wni'aka' wloogake' mech xen. ⁴² Na' bllin to nool wizeb, ben' yesh', wlo'e chop sintabdo'. ⁴³ Na' wne Jesúza' ben'ka' nakgake'ne' txen, chi'e legake':

—Dii li nia' le', nool wizebi ba be'che' dii xench aga ka yog'te ben'ka' wloo mech xench.

⁴⁴ La' yog'gake' daa chichoonzannan' be'gake', san le', naktie' nool yesh', ba wlo'e doxen daa nape' la'kzi chyalljile'n.

13

Jesúza' bi'e dill' wllin lla kwiayi' yoodo'na'
(Mt. 24:1-2; Lc. 21:5-6)

¹ Ka chichej Jesúza' lesh' chyoodo'na', to ben'ka' nakgake'ne' txen chi'ene':

—Maestro, bwiakachi ka xochi nak yajki na' yooki.

² Na' che' Jesúza' le':

—Ka nak yooki chwiale naa, wllin lla kwiayi' yogaan na' ni sto yaj bich kwia koll' ljwellin.

Diika' gak kat' ba zoa te che yell-lioni
(Mt. 24:3-28; Lc. 21:7-24; 17:22-24)

³ Na' ziyajgake' lo Yaa Olívoza' gana' nla' yoodo'na'. Na' shlak chi' Jesúza' na', Pédrona', Jacóbona', Juanna', na'ch Andréza' wñabgakile'ne' to lezgake':

⁴ —Cheeninto' ino' neto' batran gak daa ba wno'. ¿Bera ka ile'into' gak kwenche inezinto' nan ba zoa gaoshosh gakan?

⁵ Na' che' Jesúza' legake':

—Bi we'le latj no siye' le'. ⁶ La' ben' zan ichej na' inazgake': “Nadaan Crístona”, na' ben' zan shajle'.

⁷ Na' ka yenile chak wdil' to ni to na', bi illeble. La' chonan byen gakgakan, per aga ba bllin lla te che yell-lionin. ⁸ La' yidil'-len ljwell yellka' na' ben' wñabia'ka' yidil'-len ljwellgake'. Na' zan latj gak bedxo', na' gat' wbin, na' kwe' wdil' wishesh. Kat' ba chak diiki shinz chzolo ka nak daa yen ile'i ben' yell-liokin.

⁹ Wsak'gale, la' gongake' le' lall' na' ben'ka' chñabia' cho' ben' Israel, na' wit chingake' le' gana' chdop chllagcho choe'lwillcho Chioza'. Na' daa nakle nad' txen, lljwa'gake' le' lao ben' wñabia' xenka' na' lao nochlə ben'ka' chñabia', na' ka' gak we'le xtilaana' lawe'ka'.

¹⁰ Na' ka zi' te che yell-lioni, chiya' illilj dill' wen dill' kob cha'na' doxen yell-lioni. ¹¹ Na' kat' ba zjwa'gake' le' lao ben'ka' chñabia', bi sele wneyi bin ye'le legake', san daa wzajni Chioza' len' inele, la' aga tobia'lall'zlen inele, san Espíritu Sántonan' ine. ¹² Beena' zoa ben' bish' golje', leteze' gone'ne' lo na' ben'ka' witgake'ne', na' beena' zoa xiine', leteze' gone' xiine'na lo na' ben'ka' witgake'ne', na' bal' ben', xiine'ka'tezə gongake' xaxneeka' lo na' ben'ka' witgake' legake'. ¹³ Na' yog'zə ben' gakzbangakile' le' daa nonlilall'le nad'. Per beena' so saki bittez dii yen ile'ile' axt ka yiyoll diika' yen ile'ile', beenan' gat' to yel' mban che' zejli kani.

¹⁴ Na' kat' ile'ile' ba zoa daa nak dii zban inleeb latja' gana' bi chiya' soan, na'ch ben'ka' lle' Judeana' chiya' wxonjgake' shajgake' lo yaaka'lə. (Le' chlable dga, li shajniin.) ¹⁵ Na' beena' llia koll' lille'na' ni bi gal' yiyetje' lljaleje' dii de loo lille'na'. ¹⁶ Na' beena' chda lyixaa, ni bich gal' yiyaje' lille'na' kwenche lljadoyoe' xe'na'. ¹⁷ Nyesh'laz gak che noolka'

noa' na' noolka' chwall' chxop llana' gak ka'! ¹⁸ Li inabi Chioza' bi gak dga kat'ka' chbe' dii zaga', ¹⁹ la' yel' zak'zi' wal inleban nak daa yen ile'ile, daa konon' yen ile'kzi dezd ka bxe bsil Chioza' yell-lioni ax̄t naa, na' kat' ba wde gokan kochno yen ile'i ka len. ²⁰ Na' shi Xancho Chioza' bi wzeshee llaka' gak ka', kono yila shel'ka'. Per wzesheen daa chakile' ben'ka' ba wleje' nakgake' lall' nee.

²¹ Na' kat' gak diika', shi no ina le': "Li wwia, ni ze Crístona", wa ine', "Li wwia, na' zie", bi shajle'le. ²² La' wchej ben' siye'gake' inazgake': "Nadaan Crístona", na' ben' chonz ka chyixjee daa che' Chioza'ne', na' wli'gake' no yel' wak kwenche siye'gake' ben', ax̄t shel' wxegakile' siye'gake' ben'ka' ba wlej Chioza' nakgake' lo nee. ²³ Wsak'gale. Ba bzenid' le' ka nak yog' diiki zi' gak.

Kat' yiyed Crístona' dii yoblə

(Mt. 24:29-35, 42-44; Lc. 21:25-36)

²⁴ Na' kat' ba biyoll wde yel' zak'zi'ka', lii yicholte lao wbilla' na' beo'do'na' bich wzeeni'n. ²⁵ Na' beljdo'ka' ixopgakan na' yog' diika' llia xan yabana' inibgakan. ²⁶ Na' ile'gakile' nad', Ben' Bsel' Chioza' Yell-lioni, zizaa ladj bejka' kon yel' wak choo yel' wak xen cha'na' na' balaan cha'na'. ²⁷ Na' wselaa anjl cha'ka' tap laate yell-lioni ax̄t gana' zeelo chiyollan kwenche yitopgake' ben'ka' nak lall' na'.

²⁸ Li wwia ka chak che yag yixwewa': kat' chzolo chigaan na' chibia xlaguinna', na' chakbe'ile ba zoa yiyoo la'o linna'. ²⁹ Ka'kzan, kat' ile'ile ba chak yog' diiki ba wnia' le' gak, na' gakbe'ile ba zoa gaoshosh te che yell-lioni. ³⁰ Dii li nia' le', aga ba wit ben'ki zoa naa kat' gak yog' diiki. ³¹ Yabana' na' yell-lioni te chegakin, san cho'a xtillaana' aga wde bi gak ka nan.

³² Na' kono nezi bi lla bi gor gak diiki, ni anjlka' lle' yabana', ni nad' nak' Xiin' Chios. Toz Xa' Chioza' nezile'n.

³³ Li wsak', na' li se kwas, na' li we'llwill Chioza', la' bi nezile bat illin lla gakan. ³⁴ Nakan ka ben to ben' ba zoa see shaje' to yell zit', na' golle' ben'ka' chon xshine'na' gapgake' lille'na'. Na' to togake' bene' lall' na'gake' daa gongake', na' golle' beena' chap cho'a leej che'na' bi guetlalleen. ³⁵ Li se kwas, la' bi nezile bat yila' xan yoona'; shi yilee chaldo'zə, wa yilee chel, wa kat' chbell tezka', wa yilee cheeni'lesdo'. ³⁶ Shi tokonganzə yilee na' yido'ile' le' bich ze kwasle. ³⁷ Dga nia' le', lekzka' yog'lol benaan chep' ka', li se kwas.

14

Wloogake' xnezin gox'gake' Jesúza'

(Mt. 26:1-5; Lc. 22:1-2; Jn. 11:45-53)

¹ Chyallj zi chop llazə gal' lni Paskwa', kana' chaogake' yetxtila' bi yoo lewadúrana', na' bxoza' chnabia' na' ben'ka' chli' chsedi leya' biyiljall'gake' naklə siye'gake' Jesúza' kwenche gox'gake'ne' na' witgake'ne'. ² Na' che' ljwellgake':

—Bi gox'chone' lo lina' kwenche bi wsees wcheencho ben' yell.

Bwazj to noolə set zixa' yichj Jesúza'

(Mt. 26:6-13; Jn. 12:1-8)

³ Ka zoa Jesúza' Betániana', wyaje' lill beena' le Simón, beena' gok yillwe' daa le lepra. Na' shlak chi'e cho'a mesa', bllin to noolə noxee to lmet de yaj xochi yoollan set zix de nardo na' dii xen zakaan. Na' wdishje' yen lmeta' na' bwazje' set zixa' yichj Jesúza'. ⁴ Na' bal ben'ka' lle' na' bllaagake', na' che' ljwellgake':

—¿Berache benditjz nooli set zixa'? ⁵ Shel' bet'chokle'n na' bi'e mecha' ben' yesh'ka', la' zakaan che shon guiyoa lla che laxj ben'.

Na' bsheshlengake' noola' daa bene' ka'.

⁶ Na' che' Jesúza':

—Bibi ye'lene'. ¿Berache chsheshlenzlene'? Daa ba bene' cha' nakan dii wen. ⁷ Ka nak ben' yesh'ka', toshiizi soagake' ladjlena', na' wak gaklenle legake' kat'ka' cheenile'; san nad', aga toshiizin soalen' le'. ⁸ Ka nak nooli ba bene' daa zeelo gok bene'. Ba bwazje' nad' set zixa' kwenche gakshao'zega kwerp cha'ni kat' wkwash'gake' nad'. ⁹ Dii li nia' le', gattezə we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingakile'ne'.

Juda' chchebe' gone' Jesúza' lo na' ben' malka'

(Mt. 26:14-16; Lc. 22:3-6)

¹⁰ Na' Jud Scariota', beena' nake' txen ben'ka' shllin, wyaje' lao bxoza' chnabia' kwenche gone' Jesúza' lo na'gake'. ¹¹ Na' ka golle' ka', bibagakile' na' bchebgake' we'gake'ne' mech. Na' wzolo Juda' chinoe' nakan gone' kwenche gone' Jesúza' lo na'gake'.

Lle'na' zeelo wdaolengake' Jesúza'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Na' lla nech che lnina' kat' chaogake' yetxtila' daa bi nchixa' levadúrana', llana' chitgake' xil'do'na' chaogake' lni Paskwa', ben'ka' nak Jesúza' txen wnabgakile'ne':

—¿Ga cheenilo' lljasini' anto' xshe' che lni Paskwi?

¹³ Na' bselee chopgake', chi'e legake':

—Li shaj yell Jerusalénna' na' yillagle to ben' byo zino'e to chee nis, na' lljanólene'. ¹⁴ Na' gana' yiyo'e, li yee xan yoona': “Maestrona' ne': ¿Garan zoa yoona' gana' gaolene' ben'ka' nakgake'ne' txen lle' lni Paskwi?” ¹⁵ Na' wliile' le' to yoo xen dii llia shkwia cha'lə ga ba nonshao'tie'. Na' nan' wsini'ale daa gaocho xshe'na'.

¹⁶ Na' wza' ben'ka' bselee, wyajgake' yella'. Na' gok kon kayen' golle' legake'. Na' bsini'agake' daa gaogake' lle' lni Paskwa'.

¹⁷ Na' ka gol billinlen Jesúza' ben'ka' shllin yoona'. ¹⁸ Na' shlak chi'gake' cho'a mesa' chaogake', goll Jesúza' legake':

—Dii li nia' le', tole chi'le ni chaolenle nad' gonle nad' lo na' ben'ka' chakzi' chakzbani nad'.

¹⁹ Na' gokyesh'gakile', na' wzolo to togake' chnabgakile'ne':

—¿Anadaan gon' ka', lla?

²⁰ Na' che' Jesúza' legake':

—Ladjleni, ka le' nakle shllin chleejenle nad' yetxtila' loo yeeni, len beena' gon ka'.

²¹ Ka nak nad', Ben' Bsel' Chioza' Yell-lioni, wit ben' nad' ka na Cho'a Xtill' Chioza'. Per nyesh'laz gak che beena' gone' nad' lo na' ben'ka'. Naklan wen shel'ka' bi golje'.

²² Na' shlak chaogake', bex' Jesúza' yetxtila' na' bi'e Chioza' yel' choxken, na' bxoxje'n na' bi'en legake', chi'e:

—Li gao dga. Lennan' kwerp cha'ni.

²³ Na' bexee kopa', na' bi'e Chioza' yel' choxken na' bdie'n lawe'ka' na' yog'lolgake' weejgake' daa yollan. ²⁴ Na' chi'e legake':

—Lennan' xchen'na' daa gon ka gak li dii koba' bcheb Chioza' gone'. Na' laljan kwenche gaklenan ben' zan. ²⁵ Dii li nia' le', bichga yeej' xis uvana' axt ki illin lla yeeja'n gana' chnabia' Chioza'.

Jesúza' golle' bi wcheb Pédróna' shi nombi'ene'

(Mt. 26:30-35; Lc. 22:31-34; Jn. 13:36-38)

²⁶ Na' ka biyoll belgake' be'la'ogake' Chioza', na'ch wyajgake' lo Yaa Olívoza'. ²⁷ Na' che' Jesúza' legake':

—Yog'le le' kwey yichjle nad'. La' Cho'a Xtill' Chioza' nan: “Wit' beena' chap xil'ka', na' guesles xil'ka' chape'.” ²⁸ Per kat' ba biban' ladj ben' wetka', na' yiyaa Galileana' lljalez' le'.

²⁹ Na' che' Pédrona'ne':

—La'kzi yog' ben'ki choonlall'gake' li', nad' bi gon' ka'.

³⁰ Na' che' Jesúza'ne':

—Dii li nia' li', naanyel ka zi' kwell teza' de wchop shii, shon shii wi'o dill' nan bi nombi'o nad'.

³¹ Na' zeyid Pédrona' chi'ene':

—La' guetlencia' li', biga inia' bi nombi'a li'.

Na' yog'zgake' che'gake'ne' ka'.

Be'lwill Jesúza' Chioza' gana' le Getsemaní

(Mt. 26:36-46; Lc. 22:39-46)

³² Na' wyajgake' to latj gana' le Getsemaní, na' che' Jesúza' ben'ka' nakgake'ne' txen:

—Nizə li kwe' shlak llje'lwill' Chioza'.

³³ Na' bchi'e Pédrona', Jacóbona', na'ch Juanna', na' wzoloe' chakyeshile' na'ch chakch-gaile' dii wal inleeb. ³⁴ Na' chi'e legake':

—Axt chaklikazid' lii guettia' daa le chakyeshii yichjlall'dawaani. Li igaan nizə na' bi guesle.

³⁵ Na' wzee zi lat' kwite'ka', na' bchek' xibe'na' lo yona' na' be'lwille' Chioza' chi'ene' shi wak ten ka'zə daa wtile'. ³⁶ Na' chi'e:

—Xadawaa, aga bi dii lallj cho' li' de. Bislagach nad' lawi dga ba zoa idil illag'. Per aga gak ka cheenid', san gak ka cheenilo' li'.

³⁷ Na' biyaje' gana' lle'gake' na' ble'ile' ba chesgake'. Na' chi'e Pédrona':

—Simón, ¿Aba cheson? ¿Abikzə bchejlat'gailo' la'ch' tgor bi gueso'? ³⁸ Bi guesle, li we'lwill Chioza' kwenche bi we'zle latj gon beli chenna' le' gan. Aga ki cheeni yichjlall'do'chona' gonchon per beli chenna' bi chizoin.

³⁹ Na' wyaje' sto shii jelwille' Chioza', na' toz ka golle'ne'. ⁴⁰ Na' ka billine' gana' lle'gake', na' bizle'ile' chizesgake', la' jalawe'ka' bi chizoyin bishgala'. Na' bibi billelgakile' ye'gake'ne'. ⁴¹ Na' ka billine' de wyon shii, chi'e legake':

—¿Ani cheskzle? Ba gok. Ba bllin gor nad', Ben' Bsel' Chioza' Yell-lioni, gak' lo na' ben' saaxyaka'. ⁴² Li chas. Li sho'. Ba za' beena' gone' nad' lo na'gake'.

Bex'gake' Jesúza'

(Mt. 26:47-56; Lc. 22:47-53; Jn. 18:2-11)

⁴³ Ni choe'te Jesúza' dill' ka bllin Juda', beena' wlen ben'ka' shllin, lene' ben' zan ben'ka' bsel' bxozka' chnabia' len ben'ka' chli' chsedi leya' na'ch ben' golka' chnabia', nox'gake' spad, na' no yag. ⁴⁴ Na' Juda', beena' bene'ne' lo na' ben'ka', ba be'le' dill', chi'e:

—Beena' wnop', len' gox'le, na' wche'lene'.

⁴⁵ Na' ka bllingake', jabiguae lao Jesúza' na' chi'ene':

—¡Maestro!

Na'ch bnop'e'ne'. ⁴⁶ Na' lii bex'tegake' Jesúza' bche'gake'ne'.

⁴⁷ Na' to beena' len na' wleje' spad che'na' bchogue' shlaa nag xmos bxoz choo bxoz xenna'. ⁴⁸ Na' che' Jesúza' legake':

—¿Berache za'zle nox'le no spad no yag kwenche gox'le nad' ka to no ben' wban? ⁴⁹ Yog' lla wzoa' ladjlena' bli' bsedid' loo yoodo'na', na' biga bex'le nad'. Per chonan byen gak ka na Cho'a Xtill' Chioza'.

⁵⁰ Na' yog'lol ben'ka' ben Jesúza' txen wchoonlall'gake'ne' na' bxonjgake'.

Bi' xkwidaa bixonj

⁵¹ Na' to bi' xkwid' nob' le' ndobb' to lech'. Na' ka bex'gake'b' ⁵² bsam' lechaa ndobb' na' bxonjb' gal'yidzb'.

Bdegake' Jesúza' lao ben'ka' chnabia' ben' Israelka'

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Na' jwa'gake' Jesúza' lao b̄xoz choo b̄xoz xenna', na' bdi'a yog'lol b̄xozka' chñabia' na' beñ' golka' chñabia' na'ch beñ'ka' chli' chsedi leya'. ⁵⁴ Na' zit' zit'lə jano Pédrone'ne' blintie' lesh' lill b̄xoz choo b̄xoz xenna'. Na' wche'lene' beñ'ka' chap yoodo'na' chbillgake' cho'a yi'na'.

⁵⁵ Na' b̄xozka' chñabia' na' yog'lol beñ'ka' chñabia' beñ' Israelka' lle' na' chiyiljyollgake' ga si' sengake' kwenche wchoglogake' che Jesúza' guete', per bi bllel dii gao xya che'. ⁵⁶ La'kzi beñ' zan chiya de wxiye' che'gake' che', bi bidili cho'a dillaa choe'gake'. ⁵⁷ Balgake' wzolla'gake' chziye'gake' na' chaogake' xya che', che'gake':

⁵⁸ —Neto' ba beninto' ne': “Nad' wchinj yoodo'ni dga ben beñ' yell-lioki. Na' ka gak shon lla yilis' ston na' aga beñ' yell-lionichan gone'n.”

⁵⁹ Na' la'kzi wxiye'gake', bi bidili cho'a xtilleeka'.

⁶⁰ Na' b̄xoz choo b̄xoz xenna' wzollee ladj beñ'ka' na' chi'e Jesúza':

—¿Abikz bi ino' cheyi dga na beñ'ki cho'?

⁶¹ Na' Jesúza' wzie' lliz bibi gollkze'. Na' b̄xoz choo b̄xoz xenna' chizi'ene':

—¿Alin' Crístona', Xiin Chioza'?

⁶² Na' che' Jesúza'ne':

—Awe, nadaan. Na' ile'ile nad', Beñ' Bsel' Chioza' Yell-lioni, chi'a de shli che Chioza', beñ' yeñ' wak choo beñ' yeñ' wak xenna', na' lekzka' ile'ile' zizaa ladj bejka' ze xan yabana'.

⁶³ Na' b̄xoz choo b̄xoz xenna' bsho' bchez' xe'na' kwenche chli'n nan le chllee. Na' chi'e:

—Bich chyaljicho beñ' gawe' xya che beeni. ⁶⁴ Kwinle ba benile ka chñie' che Chioza'. ¿Nakra gonchon?

Na' yog'lolgake' bchoglogake' che' nan chiyañ' guete'.

⁶⁵ Na' balgake' wzologake' chlla'gake'ne' xeneeka'. Na' bsejgake' jalawe'na' na'ch chgap' chball'gake'ne', na' che'gake'ne':

—Wnashki, non bet li'.

Na' beñ'ka' chap yoodo'na' wdap'gake' xague'na'.

Bi bcheb Pédrone' shi nombi'e Jesúza'

(Mt. 26:69-75; Lc. 22:56-62; Jn. 18:15-18, 25-27)

⁶⁶ Na' Pédrone' zie' lesh' chyoono' de lli'lə ka bllin to noolə, beñ' nak xmos b̄xoz choo b̄xoz xenna'. ⁶⁷ Na' ka ble'ile' Pédrone' chbille' cho'a yi'na', na' wzie' chwie'ne' chi'e:

—Lenon' nako' txen Jesús, beñ' Nazareta'.

⁶⁸ Na' bi bcheb Pédrone', san chi'e:

—Bi nombi'a beena', ni bi nezid' bi dillaan choo.

Na' bicheje' na' jazie' cho'a leeja'. Na' wchell to tez. ⁶⁹ Na' ble'i noola'ne' sto shii, na' golle' beñ'ka' sto:

—Beenin lene' beñ'ka' nak Jesúza' txen.

⁷⁰ Na' sto shii bi bchebe' nake'ne' txen. Na' ka gok zi shloll, beñ'ka' lle' na' gollgake'ne' sto shii:

—Dii li lenon' nako'ne' txen, la' nakbia' nako' beñ' Galilea.

⁷¹ Na' Pédrone' wzoloe' chone' zñia, chi'e:

—Chioza' gone' yeñ' zi' cha' shi chziye'zan nia' bi nombi'ane'.

⁷² Na' katena' lii wchellte teza' de wchop shii. Na' jadini Pédrone' daa goll Jesúza'ne': “Ka zi' kwell teza' de wchop shii, na' gak shon shii bi wchebo' shi nombi'o nad'.” Na' wzoloe' chbelle'.

15

Bdegake' Jesúza' lao Pilátone'

(Mt. 27:1-2, 11-14; Lc. 23:1-5; Jn. 18:28-38)

¹ Na' ka wyeeni' bidi'a b̄xozka' ch̄n̄abia' len beñ' golka' ch̄n̄abia', na' beñ'ka' chli' chsedí leya' na'ch yog'lol beñ'ka' ch̄n̄abia'gake' yell Israela'. Na' b̄chejgake' Jesúza' jwa'gake'ne' lao Pilátona'.

² Na' w̄n̄abi Pilátona'ne', chí'e:

—¿Alin' nako' beñ' w̄n̄abia' che beñ' Israelka'?

Na' che' Jesúza'ne':

—Kan' ba wno'.

³ Na' b̄xozka' ch̄n̄abia' dii zan dii chaogake' xya che'. ⁴ Na' che' Pilátona'ne' sto shii:

—¿Abibi in̄akzo'? Bwialat', dii zan dii chaogake' xya cho'.

⁵ Na' bibi goll Jesúza'ne'. Na' bibani Pilátona' daa bibi golle'ne'.

B̄choglogake' guet Jesúza'

(Mt. 27:15-31; Lc. 23:13-25; Jn. 18:38–19:16)

⁶ Na' kat' chal' ln̄ina', Pilátona' chisane' to beñ'ka' nseje' lillyana', beena' in̄ab beñ' yellka' wsane'. ⁷ To beñ' le Barrabás die' lillyana' len beñ'ka' benlene' xyana' daa b̄xegake' wdila'.

⁸ Na' bdi'a bllag beñ' yellka', na' che'gake' Pilátona' gone' ka chonkze' yog' yiz. ⁹ Na' che' Pilátona' legake':

—¿Acheenile yisan' beñ' w̄n̄abia' ch̄leni, le' nakle beñ' Israel?

¹⁰ La' chakbe'ile' nan b̄xozka' ch̄n̄abia' daa chakxe'zgakile'nen' jwa'gake'ne' lawe'na'.

¹¹ Na' b̄xozka' ch̄n̄abia' bta b̄negake' beñ'ka' lle' na' kwenche in̄abgake' yisane' Barrabáza'.

¹² Na' che' Pilátona' legake':

—Na' bera cheenile' gonid' beena' nale nake' beñ' w̄n̄abia' chele, le' beñ' Israel.

¹³ Na' besyaagake' che'gake':

—¿Bdee lee yag cruza'!

¹⁴ Na' che' Pilátona' legake':

—¿Bera dii malan' bene'?

Na' zizikli besyaagake' che'gake':

—¿Bdee lee yag cruza'!

¹⁵ Na' daa goklall' Pilátona' yigaane' wen lao beñ'ka' lle' na', bisane' Barrabáza'. Na' bene' mandad wit ch̄ingake' Jesúza', na'tech bene'ne' lo na' beñ'ka' wda'gake'ne' lee yag cruza'.

¹⁶ Na' b̄che' soldadka' Jesúza' lesh' chyooná gana' chon Pilátona' yeñ' joschisa', na' biti'a bishaggake' yog' soldadka' lle' na'. ¹⁷ Na' bwakwgake'ne' to lech' x̄na, na' bengake' to b̄xoon de xis yesh' na' bllingake'n yichje'na' ka to corona. ¹⁸ Na' wzologake' chosyaagake' nagake':

—¿Soashga beñ' w̄n̄abia' che beñ' Israelka' mbalaz!

¹⁹ Na' wdingake' xisa' yichje'na', na' bllaa x̄eneeka' le', na' b̄chek' xibe'ka' lawe'na' bengake' ka beñ' chgwee balaan. ²⁰ Ka biyoll btitjgakile'ne', bikwasgake' lech' x̄nana' daa b̄xoagake' kolleena' na' biwakwgake'ne' xe'na'kzə. Na' wlejjgake'ne' kwenche lljada'gake'ne' lee yag cruza'.

Bda'gake' Jesúza' lee yag cruza'

(Mt. 27:32-44; Lc. 23:26-43; Jn. 19:17-27)

²¹ To beñ' yell Cirene lie' Simón, x̄a Alejándrona' na' Rúfona', zizee lyixaa. Na' ka billague' legake', bengake' byen bi'e yag cruz che Jesúza'.

²² Na' b̄che'gake' Jesúza' latja' le Gólgota, na' zejín: Latj che llit yichj beñ' wet. ²³ Na' bshabgakile'ne' vino daa n̄chixə mírrana', per bi weeje'n. ²⁴ Na' bda'gake'ne' lee yag cruza'. Na' soldadka' bengake' to wyitj kwenche yilaagake' xe'na' na' ikaagake' daa yidol' to togake'.

²⁵ Na' chida ga kana' bda'gake'ne' lee yag cruza'. ²⁶ Na' yichj yag cruz che'na' bda'gake' to dii cho'en dill' b̄iche nda'gake'ne' lee yag cruza', nan: “Beenin beñ' w̄n̄abia' che beñ' Israelka'.” ²⁷ Na' bda'lengake'ne' ch̄op beñ' wban, toe' wda' kwite' de sh̄lina', na' stoe'

kwite' de robesa'. ²⁸ Na' billinin ka na Cho'a Xtill' Chioza' daa nan: “Ble'gakilene' ka to beñ' mal.”

²⁹ Na' beñ'ka' chde na', chñelegakile'ne', na' chta yichje'ka' che'gake':

—Lin' wnazo' yichinjo' yoodo'na' na' lo shon llazə yiyono'n, ³⁰ bislashki kwino' na' biyetj lee yag cruza'!

³¹ Na' lekzka' chon b̄xozka' chñabia' len beñ'ka' chli' chsedi leya', chñelegakile'ne', che'gake':

—Beñ' yoblə gok bisle', na' bi chak yisla kwine'. ³² Shi leile' len' Crístona', beñ' wñabia' chechona', cho' beñ' Israel, yiyetjshkile' lee yag cruza' naa kwenche ile'teicho na' shajle'cho che'.

Na' axt len beñ'ka' da'lene' lee yag cruza' chñelegakile'ne'.

Ka wit Jesúza'

(Mt. 27:45-56; Lc. 23:44-49; Jn. 19:28-30)

³³ Ka bllin gobill, doxen yell-liona' biçhol, bllinte chida shon. ³⁴ Na' chida shon besyaa Jesúza' zillj, chi'e:

—Eloí, Eloí, ¿lama sabactani? —na' zejin: Chios çha', Chios çha', ¿biche ba wlej yichjzo' nad'?

³⁵ Na' bal beñ'ka' lle' na' bengakile' daa wne' na' che'gake':

—Li wzenag, ba chaxe' Elíaza'.

³⁶ Na' zejdo toe' na' bleeje' to dii chzi' nisa' gana' yollə vino daa zichj zla' na' bzoe'n to lo xis kwenche bzoe'n cho'ena' xope'n, na' chi'e:

—Jwayishkile'na', wwiashkicho shi wid Elíaza' yiletje'ne'.

³⁷ Na' besyaadia Jesúza', na'ch wite'. ³⁸ Na' ka wite', lechaa ze loo yoodo'na' bcheza'n gokan çhoplə. ³⁹ Na' beena' chñabia' soldadka' zie' lao Jesúza', ka benile' besyee na' ble'ile' ka gok wite', na' chi'e:

—Dii li beenin Xiin Chioza'.

⁴⁰ Lekzka' zi bal noolka' lle'gake' de zit'lə chwiagake'. Na' ladje'ka' len María beñ' Magdálana', na' Saloména', na'ch María, beena' nak xna' Joséna' len Jacóbona', beñ' neshaa. ⁴¹ Noolkin wnogake' Jesúza' na' goklengake'ne' kana' zoe' gana' mbani Galileana'. Na' lekzka' len zanch noolka' beñ'ka' wyajlengake'ne' Jerusalénna'.

Bkwash'gake' Jesúza'

(Mt. 27:57-61; Lc. 23:50-56; Jn. 19:38-42)

⁴² Na' llana' gok ka' nakan llana' chsini'a beñ' Israelka' che llana' chombaangake'. Na' ka gol, ⁴³ bllin José beñ' Arimatéana', beena' nak txen beñ'ka' chñabia' beñ' Israelka', na' lene' none' lez beena' wsel' Chioza' inabi'e. Na' biyaxjile' wyaje' lao Pilátona' janabe' lsens yiletje' kwerp che Jesúza'. ⁴⁴ Na' bibani Pilátona' daa ba wite'. Na' goxe' beena' chñabia' soldadka' kwenche inabilene' shi dii likzan ba witen'. ⁴⁵ Na' ka che' beena' chñabia' soldadka' ba wite' na' wxenlallee, na' bi'e lsens biletj Joséna' kwerp che'na'. ⁴⁶ Na' wxi' Joséna' to lech' de lino na' biletje' kwerp che Jesúza' na' bitobe'ne' lechaa. Na' jlo'ene' to loo blej, na' bisejile'n to yaj xen. ⁴⁷ Na' María beñ' yell Magdálana', na' María, xna' Joséna', chwiayen'gake' gana' jlo'ene'.

16

Biban Jesúza' ladj beñ' wetka'

(Mt. 28:1-10; Lc. 24:1-12; Jn. 20:1-10)

¹ Na' ka wde lla sabda', llana' chombaän beñ' Israelka', María beñ' Magdálana' len Saloména', na'ch María, xna' Jacóbona', wxi'gake' diika' chlā' zix kwenche willa'gake'n

* 15:34

kwerp che Jesúza'. ² Na' lla nech che xmanna', shinzə chla' wbilldo'na', wyajgake' cho'a ba che'na'. ³ Na' ka zejgake' che' l'jwellgake':

—¿Nora gaklen cho' wkwase' yaja' daa chi' cho'a ba che'na', lla?

⁴ Per ka bllingake', ble'gakile' bich chi' yaj xenna' cho'a bana'. ⁵ Na' ka wyoogake' loo bana', ble'gakile' chi' to beñ' xkwid' de shli che bana' nakwe' to lech' llyish dii ton. Na' le blleb noolka'. ⁶ Na' chi'e legake':

—Bi illeble. Le' chiyilje Jesús, beñ' Nazareta', beena' bda'gake' lee yag cruza'. Ba biban beena', bich zoe' ni. Li wwiakachi gana' wdixjgake'ne'. ⁷ Li yiyaj lao beñ'ka' nakgake'ne' txen na' len lao Pédrone', na' li lljayellgake': “Ba ziyaje' zjaleze' le' Galileana', na' na' yile'ile'ne' sto shii, kon ka wne' le'.”

⁸ Na'ch bichej noolka' loo bana' ziyajdogake' axt chxiztitgake' daa le chllebgake'. Na' kono bi gollgake' daa le blleb'gake'.

Bli'lao Jesúza' María beñ' yell Magdálana'
(Jn. 20:11-18)

⁹ Na' ka biban Jesúza' ladj beñ' wetka' lla nech che xmanna' shzildo', zigaate bli'lawe' María beñ' yell Magdálana', beena' bibej Jesúza' gall dii xiw'ka'. ¹⁰ Na' Maríana' wyaje' lao beñ'ka' wdalen Jesúza' txen. Na' ka blline' lawe'ka' le chakyesh'gakile' na' chbellgake', na' golle' legake' ba biban Jesúza'. ¹¹ Na' ka beni beñ'ki mban Jesúza' na' ba ble'teyi Maríana'ne', bi wyajle'gake'.

Bli'lao Jesúza' chop beñ'ka' nakgake'ne' txen
(Lc. 24:13-35)

¹² Ka biyoll gok ka', chop beñ'ka' nak Jesúza' txen ngoogake' nez zejgake' lyixaa, na' bli'lawe' legake' na' nake' nlla'la. ¹³ Na' biyajgake' gana' lle' beñ'ka' sto, jayellgake' legake' ba ble'gakile'ne', na' ni chegake' bi wyajle'gake'.

Jesúza' golle' beñ'ka' nakgake'ne' txen we'gake' xtilleena' doxen lo yell-lioni
(Mt. 28:16-20; Lc. 24:36-49; Jn. 20:19-23)

¹⁴ Na' wdetech, bli'lao Jesúza' beñ'ka' shnej shlak chi'gake' chaogake'. Na' bsheshlene' legake' daa bi chajle'gake' na' daa nakgake' lall'do' chech, la' bi wyajle'gake' che beñ'ka' ble'gakile'ne' ka wde bibane'. ¹⁵ Na' chi'e legake':

—Li shaj doxen yell-lioni, li lljtixje'i yog'lol beñ' dill' wen dill' kob cha'na'. ¹⁶ Beena' shajle' na' choe' nisa', gat' yel' mban che' zejli kani, san beena' bi shajle', chogbi'a kwiayee. ¹⁷ Na' diikin gon beñ'ka' nonlilall' nad': wchingake' lia'na' yibejgake' dii xiwaa yoo beñ'; na' inegake' dill' kob dii bi nombia'gake'; ¹⁸ na' shi gonzin gox'gake' no bel' wa yeejgake' dii nak yierb, aga bi gakkakile'. Na' lekzka' wxoa neeka' yichj beñ' we'ka' na' yiyakgakile'.

Biyep Jesúza' yabana'
(Lc. 24:50-53)

¹⁹ Ka biyoll bshaljlene' legake', Xancho Jesúza' biyep'e yabana' na' jachi'e kwit Chioza' shlaa de shlina'. ²⁰ Na' beñ'ka' nakgake'ne' txen wyajgake' doxen jtixje'gake' cho'a xtilleena' na' Xancho Jesúza' goklene' legake' bengake' yel' wakka' kwenche wyajle' beñ' dillaa be'gake' nakan dii li.

Dill' wen dill' kob daa bzej Lúcaza'

Dga bzej Lúcaza' na' bseleen lao Teófilona'

¹ Ben' zan ba goklall'gake' wzejgake' to to diika' ba gok ladjnto'ni ² kon ka wna ben'ka' bli' bsemi neto', ben'ka' ble'gakile' daa gok dezd nech na' gok lo na'gake' be'gake'n dill'. ³ Na' ka'kz nad', ba wñabyoll' nakyen'an gok dezd nech. Na' chakid' nakan wen wzej' li', Teófilo, kon ka gok to to diiki, ⁴ kwenche inezilo' daa ba bli' bsemi'gakile' li' nakan dowalj dii li.

Wdixjee anjla' galj Juanna'

⁵ Kana' chñabia' rey Heródeza' gana' mbani Judeana' wzoa to ben' wlie' Zacarías, goke' toz bñozka' nonlen dii Abíaza'. Na' xoole', Elizabeta', lezkka' goke' xiin dia che dii bñoz Aarónna'. ⁶ Na' chop xooltie' chongake' wen lao Chioza', na' chongake' yog'lojte daa nllie' bia'. ⁷ Na' aga no xiingake' wzoa daa nak Elizabeta' nool will; na' ba naktegage' ben' gol.

⁸ Na' to shii ka bidol' bñozka' nak Zacaríaza' txen gongake' xshin Chioza' daa nak lo na'gake', ⁹ bengake' to wyitj, ka yoologake' chongake', kwenche got'bia' noe' yidol' lljlo' llen yala' loo lill xlatj Xancho Chioza'. Na' bidol' Zacaríaza' gone'n. ¹⁰ Na' shlak chgwee llen yala' loo yoodo'na', ben' zan bgaan chyoole' choe'llwillgake' Chioza'. ¹¹ Na' bli'lao to anjl che Xancho Chioza' Zacaríaza', na' anjla' zie' shlaa de shlina' gana' chzeygake' yala'. ¹² Ka ble'i Zacaríaza' anjla', bikzə bi billet-lallee gone' daa le bllebe'. ¹³ Na' anjla' chi'ene':
—Bi illebo' Zacarías, la' Chioza' ba bzenague' daa chñabilo'ne', na' xoolo' Elizabeta' sane' to xiino' na' wsi'ob' Juan. ¹⁴ Na' yibachgailo' kat' galjb', na' lezkka' ben' zan yibayi, ¹⁵ la' xiino'na' gakb' to ben' zakii lao Chioza'. Bi chiyal' wñixb' vino wa bichlə dii gonan ka sollib', na' Espíritu Sántona' soloe' inabi'e yichjlall'do'baa ka zi' galjləb'. ¹⁶ Na' yigoob' ben' zan xiin dia che Israela' lo xnez Chioza', beena' nak Xangake'. ¹⁷ Na' kwialob' lao Xanchona', na' soalen Espíritu che Chioza' le'b' ka wzoalene' Eliaza', na' gapb' yel' wak ka daa wdape'. Na' ye'b' ben'ka' bi zoalen xiine'ka' wen, yizoagake' mbalaz. Na' gom' ka wzenag ben'ka' bi cheeni wzenaggake' dill' sin' che ben'ka' zej shli lao Chioza'. Na' diikin gom' kwenche kat' za' Xanchona' na' gonlilall'gake'ne'.

¹⁸ Na'ch che' Zacaríaza' anjla':

—¿Nakra gak inezid' shi lezkzilo'n?, la' ba nak' ben' gol na' lezkka' nool cha'na'.

¹⁹ Na'ch che' anjla'ne':

—Nadaan anjl Gabriela', na' chon' xshin Chioza', na' kwine' bselee nad' kwenche zaa zidnia' li' dill' wenni. ²⁰ Na' daa bi wyajli'o daa wnia' li', idap shi'ona'. Bich gak inio' axt kat'ch illin lla gak yog' dga ba wnia' li'.

²¹ Na' ben'ka' lle' chyoole' chbezgake' yichej Zacaríaza', goklejjgakile' daa wllaile' loo yoodo'na'. ²² Na' ka bicheje' bich chak inie', senzə chone', na' gokbe'gakile' nan nochodan' bli'lao le' loo yoodo'na'.

²³ Na' ka biyoll ben Zacaríaza' daa llia bia' gone' yoodo'na', na'ch biyaje' lille'na'. ²⁴ Na' ka wde gok diiki, na' bia' xoole', Elizabeta'. Na' lao gay' beo' bichkzə ga bcheje', na' wne':
²⁵ “Xancho Chioza' ba goklene' nad' kwenche bich sia' yel' zto' lao ben'.”

Wdixjee anjla' galj Jesúza'

²⁶ Na' ka gok xop beo' noa' Elizabeta', bsel' Chioza' anjla' le Gabriel yella' le Nazaret daa llia gana' mbani Galileana', ²⁷ gana' zoa to nool wew' lie' María. Na' Maríana' ba nakan wshagna'lene' to ben' le José, na' Joséna' nake' xiin dia che dii rey Davina'. ²⁸ Na' wyoo anjla' gana' zoa Maríana' na' chi'ene':

—¡Chwap' li' chiox, nool, beñ' ba goklen Chioza' kwenche gak dii wen cho'! Xanchona' zoalene' li', na' ba benleeyche' li' aga ka yog'lołte nool.

²⁹ Na' Maríana' bibanile' daa golle'ne' ka', na' gokile' berache naz beeni nad' ka'. ³⁰ Na' che' anjla' le':

—Bi illebo' María, la' Chioza' ba wleje' li' kwenche gone' to dii wen cho'. ³¹ Na' naa woo to bdo' na' kat' galjb' na' wsi'ob' Jesús. ³² Na' gakb' to beñ' zakii na' ye'gake'b' Xiin Chios, beena' nak liizelozi beñ' choo beñ' xen. Na' Xancho Chioza' gone'b' to beñ' wñabia' ka dii xozxto'b' Davina' ³³ kwenche toshiizi inabia'b' le' beñ' Israel, le' nakle xiin dia che dii Jacoba', na' yel' wñabia' che'baa bi yiyoll yidon.

³⁴ Na'ch wñabi Maríana' anjla', chi'ene':

—¿Nakra gakz wa', lla?, la' aga no beñ' byo zoalen'.

³⁵ Na'ch che' anjla' le':

—Espíritu Sántona' yidsoalene' li', na' yel' wak che Chioza', beena' nak liizelozi beñ' choo beñ' xen, soalenan li'. Na' bi'do'na' galj gakb' lall' na' Chioza' na' ye'gake'b' Xiin Chios. ³⁶ Lekzka' dialla cho' Elizabeta' ba no'e, la'kzi ba nake' beñ' gol. Na' la'kzi chaki beñ' nake' nool will, ba gok xop beo' no'e. ³⁷ Aga bi de dii bi chak gon Chioza'.

³⁸ Na'ch che' Maríana' anjla':

—Xmos Xancho Chiozan' nak', na' wak gone' cha' kon ka ba wno'.

Na' biza' anjla' gana' zoa Maríana'.

Jawia Maríana' Elizabeta'

³⁹ Na' lii wza'te Maríana' wyaje' to yell dii lliá yaa yao che Judeana'. ⁴⁰ Na' blline' lill Zacaríaza' na' bwape' Elizabeta' chiox. ⁴¹ Na' ka bwap Maríana' le' chiox, gokbe'i Elizabeta' bxit' bdo'na' loo li'ena'. Na' wzolo wñabia' Espíritu Sántona' loo yichjlall'do'ena', ⁴² na' wñie' zillj, chi'ene':

—Chioza' ba benleeyche' li' ladj yog'loł nool, na' lekzka' bdo' cho'na'. ⁴³ ¿Nora nak' nad' zidwia'zə xna' Xan'na' nad', lla? ⁴⁴ La' kon ka bwapo' nad' chiox, lii bxit'te bdo' cha'ni loo li'ani daa chibaib'. ⁴⁵ Chakomba li' wyajli'o ka wna anjla', la' yog' daa wna Xanchona', aga wde bi gakan.

⁴⁶ Na'ch wna Maríana':

Do yichj do lallaa choe'lawaa Xancho Chioza'.

⁴⁷ Chibayi yichjlall'dawaani lao Chioza', beena' chisla nad'.

⁴⁸ Ba biyesh'lallile' nad' nak' xmose',
naa solo yog' beñ' ine' nad': “Chakomba li'.”

⁴⁹ La' Chioza', beena' nap yel' wak choo yel' wak xen, ba bene' dii wen inleeb cha'.

Nake' liizelozi beñ' li beñ' shao',
⁵⁰ na' chiyesh'lallile' yog'te beñ'ka' chall chlebgake'ne'.

⁵¹ Dii zakii nleeb ba benlene' yel' wak che'na'.

Ba bchinj bselle' yog'loł daa nan gon beñ'ka' chep cha'lall'.

⁵² Ba bikwase' yel' wñabia' che beñ' wñabia'ka',
na' beñ'ka' ble'gakile' nakzi, Chioza' ba bene' legake' beñ' zakii.

⁵³ Na' beñ'ka' chbil chdon, ba bzesh bzeljile' legake' kon dii wen dii shao' che'na',
na' bilague' beñ' wni'aka' to ka cha'gake'.

⁵⁴ Ba goklene' cho' beñ' Israel, cho' nakcho xmose',
na' toshiizi chiyesh'lallile' cho',

⁵⁵ kon ka bchebe' gone' che dii xozxto'cho Abrahama'
na' yog' beñ' zizaak lo dia che'na'.

⁵⁶ Na' Maríana' bgaane' ka do shon beo' lill Elizabeta', na'ch bizee ziyaje' lille'na'.

Golj Juanna'

57 Na' ka bllin lla wxan Elizabeta', wxane' to bi' byodo'. 58 Na'ch ka wnezi ben' wlill che'ka' na' ben' dialla che'ka', wyajgake' bibalengakile'ne' daa ba biyeshii Xancho Chioza' le'. 59 Na' ka gokib' to xman, jloogake'b' sen daa ne' circuncisión, na' goklall'gake' wsi'gake'b' Zacarías ka le xabaa. 60 Na' che' xna'baa:

—¿Bi gakan! Juanan chiya! wsi'nto'b'.

61 Na' gollgake'ne':

—¿Biche wsi'zo'b' ka'? La' aga no dialla cho' le ka'.

62 Na'ch bengake' sen kwenche wñabgake' xabaa bi cheenile' wsi'e bdo'na'. 63 Na'ch wñabe' to yagla'do' kwenche bzeje'n, na' daa bzeje' nan: “Juanan wsi'nto'b'.” Na' yog' ben'ka' bibani. 64 Na' lii gokte bine Zacaríaza', na'ch wzoloe' choe'lawee Chioza'. 65 Na' ben' wlill che'ka' bllebgake' ka nak daa gok, na' yog' yellka' lle' ladj yaa yao che Judeana' wze dill' ka gok. 66 Na' yog' ben'ka' beni ka gok, gokgake':

—¿Noran gak bi'do'ni, lla?

Wnagake' ka', la' nakbia' zoalen Xancho Chioza' leb'.

Daa wna Zacaríaza'

67 Na' Espíritu Sántona' wñabi'e yichjlall'do' xab' Zacaríaza' na' bi'e cho'a xtil' Chioza', wne':

68 Choe'lawaa Xanchona', beena' nak Chios checho, cho' ben' Israel, la' ba bide' ladjchoni, cho' nakcho ben' yell che', kwenche yisle' cho' lawi dii mala'.

69 Na' ba bselee to ben' nap yel' wak xen yisle' cho', na' zee lo dia che dii Davina', beena' gok xmose'.

70 Ba chak ka bchebe' gone' kani'yi daa golle' dii ben'ka' wdixjee cho'a xtilleena', ben'ka' gok lall' nee.

71 Bchebe' yisle' cho' lao ben'ka' bi chle'shii cho', na' lao yog' ben'ka' chakzi' chakzbani cho'.

72 Na' golle' dii xozxto'choka' yiyeshile' legake', na' bi gal-lallee ka nak diika' bchebe' gone'.

73 Ki nak daa bcheb Chioza' gone' che dii xozxto'cho Abraham'a':

74 Bchebe' yisle' cho' lao ben'ka' bi chle'shii cho' kwenche we'la'ochone' na' bibi wwall wsheban cho',

75 na' gon kwincho lall' nee na' goncho ka yiyoolallile' shlak mbancho.

76 Na'ch Zacaríaza' chi'e bdo' che'na':

Na' li', xiindawaa, ina ben' li' ben' chyixjee daa na Chioza', beena' nak liizelozi ben' choo ben' xen.

Na' kwialozego' lao Xanchona' kwenche wzenaggake' che' kat' zee.

77 Wzenilo' ben' wlall chechoka' daa chiya! gongake'

kwenche yizi'xen Chioza' saaxya che'ka' na' yisle' legake' bi tegake' lo yel' zak'zi'na'.

78 La' Chios chechona' chakile' cho' na' chiyesh'lallile' cho',

na' wselee to ben' za' yabana' nsee to beeni' che yichjlall'do' ben' yell-lioni

79 kwenche sho' beeni'na' loo yichjlall'do' ben'ka' chda gani nak shgasj shcho! ni che dii mala' daa nsa' yel' wit,

na' wliile' cho' nez li che'na' na' soacho mbalaz.

80 Shlak bgol Juanna', ben Chioza'ne' ben' wal. Na' wzoe' to latj gana' bibi chashj chleb axt ka bllin lla wzoloe' be'lene' ben' Israelka' cho'a xtil' Chioza'.

2

Golj Jesúza'

(Mt. 1:18-25)

1 Kana' chñabia' César Augústona', bene' byen ibab bal ben' lle' to to yell doxen yell-liona' gana' chñabi'e. 2 Na' ka wbabgake' dii nech, beena' le Cirenio nake' gobernador

che Síriana'. ³ Na' benan byen biyaj yog' beñ' yell che chegake' kwenche jada' lie'ka'. ⁴ Na' daa nak Joséna' xiin dia che dii Davina', bizee yell Nazareta' daa lia gana' mbani Galileana', na' biyaje' yell Belénna' gana' golj dii Davina', daa lia gana' mbani Judeana'. ⁵ Na' kwenche ibabgake' biyaje' yell Belénna' len Maríana', beena' ba nakan ikee. Na' Maríana' ba no'e. ⁶ Na' shlak zoagake' Belénna', bllin lla sane'. ⁷ Na' wxane' to bi' byodo' nakb' bi' nech, na' btobe'b' lechaa na' wdixje'b' gana' chao bayix'ka', la' bich bi latj bllel gana' chigaan beñ'.

Jtixje'i anjla' beñ'ka' chap xil'ka' ba golj Jesúza'

⁸ Na' lle'na' goljb', gaozə yell Belénna' lle' xonj beñ' chapgake' xil' che'ka'. ⁹ Na' gokxe to anjl che Xancho Chioza', na' yel' chey cheeni' che Xanchona' bzeeni'n gana' lle'gake', na' le bllebgake'. ¹⁰ Na' che' anjla' legake':

—Bi illeble, la' ziditixje'id' le' dill' wen dill' koba' daa gonan ka yibachgayi yog' beñ'.

¹¹ La' naa yell che dii Davina' ba golj beena' yisla le' lao dii mala'. Na' len' Xancho Crístona', beena' chbezle wsel' Chioza'. ¹² Na' kwenche yillelileb', ki nak gana' deb': deb' gana' chao bayix'ka' na' ndobb' lech'.

¹³ Na' ka biyoll goll anjla' ka', lii bllinte anjl zanch kwite'na', na' choe'la'ogake' Chioza', nagake':

¹⁴ We'la'ocho Chioza' zoa yabana'!

Mbalaz beñ'ka' zoa yell-lioni, beñ'ka' ba bli'yi Chioza' yel' goklen che'na'.

¹⁵ Na' ka biza' anjlka' ziyajgake' yabana', na'ch che' ljwell beñ'ka' chap xil'ka':

—Li yidoshki Belénna', li sho' diwiashki daa ba gok, daa ba wdixje'i anjl che Xanchona' cho'.

¹⁶ Na'ch ziyajdogake' Belénna' na' bllingake' gana' zoa Maríana' len Joséna', na' bdo'na' deb' gana' chao bayix'ka'. ¹⁷ Na' ka biyoll ble'gakile'b', na' be'gake' dill' lao beñ' wllall che'ka' daa goll anjla' legake' che bdo'na'. ¹⁸ Na' yog' beñ'ka' beni ka wna wap xil'ka' bibangakile' ka dillaa be'gake'. ¹⁹ Na' Maríana' kon ka biyoll bzenague' dill'ka' na' bgaanan loo yichjlall'do'ena', na' gokile' bera zejín dga. ²⁰ Na'ch ziyaj wap xil'ka' choe'la'ogake' Chioza' daa ba ben ble'gakile' yog' daa goll anjla' legake'.

Jwa'gake' Jesúza' yoodo'na'

²¹ Na' ka gokib' to xman, wloogake'b' sen daa le circuncisión, na' bsi'gake'b' Jesús kon ka goll anjla' Maríana' kana' zi' weeb'.

²² Na' kon ka na ley che dii Moiséza' gongake', wlezzgake' ka bzaa llaka' bixi biyech Maríana' len bdo' che'na', na'ch wyajlengake'b' Jerusalénna' kwenche jengake'b' lo na' Xancho Chioza'. ²³ Bengake' ka', la' ley che Xanchona' nan: “Bi' byo nech che yog'lo' beñ', chiyal' gongake'b' lo na' Chioza'.” ²⁴ Na' jaake' je'la'ogake' Xancho Chioza' jengake' ka na leya' daa nan chiyal' witgake' chop ngolbex wa chop palom.

²⁵ Na' kana' jwa'gake' Jesúza' yoodo'na', zoa to beñ' le Simeón Jerusalénna'. Nake' to beñ' chon dii wen dii shao' na' choe'lawee Chioza', na' chbeze' batan wsel' Chioza' beena' gaklene' beñ' Israelka'. Na' zoalen Espíritu Santo che Chioza' le'. ²⁶ Na' Espíritu Sántona' ba bzenile'ne' nan aga wete' shi biñ' ile'ile' Crístona', beena' chbezgake' wsel' Xancho Chioza' kwenche inabi'e. ²⁷ Na' Espíritu Sántona'kz bseleene' yoodo'na', na' na' zie' ka bllinlen xaxna' Jesúza' leb' kwenche gongakile'b' ka na leya'. ²⁸ Na'ch bñen Simeónna' leb' na' be'lawee Chioza', chi'e:

²⁹ Chios cha', be' latj guet' mbalaz naa,

la' ba beno' daa bchebo' gono' cha', nad' nak' xmoso'.

³⁰ La' ba ble'id' beena' yisla neto',

³¹ beena' ba bseloo lao yog'lo' beñ' yell-lioki.

³² Len' kwee beeni'na' loo yichjlall'do' beñ'ka' bi nakgake' beñ' Israel. Na' gone' ka neto' beñ' Israel sho'nto' balaan, neto' naknto' yell cho'.

³³ Na'ch Joséna' len x̄na'ba bibangakile' ka nak daa wna Simeónna' cheb'. ³⁴ Na'ch w̄nabi Simeónna' Chioza' gaklene' legake', na' chi'e Maríana', x̄na' Jesúza':

—Ba n̄hogbi'a Chioza' che bi'do'ni gom' kwenche zan beñ' Israelka' kwiayi'gake' na' lekzka' zane' yila. Na' wliib' beñ' ka nak yeł' wak che Chioza', na' beñ' zan inegake' zban cheb' na' bi shajle'gake' cheb', ³⁵ na'ch gakbia' ka chza'lall' beñ' loo yichjlall'do'eka'. Na' ka nako' li', loo yichjlall'do'na' gakan ka'kzə ga chaz to spad ka ile'ilo' daa illaglob'.

³⁶ Na' lekzka' yoodo'na' zoa to nool goldo', beñ' chyixjee daa che' Chioza'ne', na' lie' Ana. Nake' xiin̄ dii Fanuela' na' xiin̄ dia che dii Asera'. Beñ' xkwid'ze' bshagnee, na' gall yizchga wzoalene' beñ' che'na' ka wite'. ³⁷ Nake' noolə wizeb na' ba gokile' taplał tap yiz. Na' toshiizi zoe' yoodo'na', na' ka wał ka tella zoe' choe'lawee Chioza', na' tlızi chzoe' wbas' na' choe'lwille'ne'. ³⁸ Na' lekzka' wbiguee kwite'ka' na' bi'e Chioza' yeł' choxken daa ba bselee beena' gaklene' beñ' Israelka'. Na' bi'e dill' che Jesúza' lao beñ' Jerusalénka', beñ'ka' chbez wsel' Chioza' beena' yisla legake' lao dii mala'.

Biyajgake' Nazareta'

³⁹ Na' ka biyoll bengake' yog' daa nllia ley che X̄ancho Chioza' bia', na'ch biyajgake' lalle'ka' daa le Nazaret daa llia gana' mbani Galileana'. ⁴⁰ Na' Jesúza' bgolb' na' zejch gokb' bi' wal na' bi' sin', na' le goklen Chioza' leb'.

Jesúza' jashajlem' beñ' sin'ka' yoodo'na'

⁴¹ X̄axna' Jesúza' chajgake' Jerusalénna' yog' yiz kat' chal' In̄i Paskwa'. ⁴² Na' ka goki Jesúza' shllin̄ yiz, wyajlengake'b' In̄ina' kon ka yoologake'. ⁴³ Na' ka wde In̄ina' biza' x̄axna'baa, na' bi gokbe'gakile' bigaan̄ Jesúza' Jerusalénna'. ⁴⁴ Gokgakile' do ladj beñ'ka' ziyajlengake' zilem', na' kon bigootezgake' nez do lla. Na' ka biyiljgake'b' ladj beñ' dialla che'ka' na' beñ'ka' nombia'gake' ⁴⁵ aga billelgakile'b'. Na' bibiigake' jadjiljgake'b' Jerusalénna'.

⁴⁶ Na' ka gok shonə lla billelgakile'b' yoodo'na', chi'b' ladj beñ'ka' chli' chsedi leya' chzenagb' xtillieka' na' chn̄abib' legake' che daa choe'gake' dill'. ⁴⁷ Na' yog' beñ'ka' chzenag xtill'baa chibangakile' yeł' chajni che'baa na' ka chilliib' xtill' beñ'ka' chli' chsedi leya'. ⁴⁸ Na' ka ble'i x̄axna'baab' bibangakile'. Na'ch che' x̄na'baa:

—Xiindawaa, ¿biçhe benzilo' neto' ka'? X̄o'ni na' nad' ba gokshejlall'chgainto' biyiljnto' li'.

⁴⁹ Na'ch che' Jesúza' legake':

—¿Biçhe chiyljzle nad'? ¿Abi nezile chiyał' soa' lill X̄a'na'?

⁵⁰ Na' aga wyajni'gakile' bi zejch daa gollb' legake'.

⁵¹ Na'ch Jesúza' biyajlem' legake' Nazareta' na' bzenagb' chegake' toshiizi. Na' x̄na'baa aga gol-lallee diika' gok. ⁵² Na' Jesúza' zejch bgolb' na' wdapchb' yeł' sin', na' Chioza' bibachile'b', na' lekzka' bibayi beñ' leb'.

3

Juanna', beena' bchoa beñ' nis

(Mt. 3:1-12; Mr. 1:1-8; Jn. 1:19-28)

¹ Na' ka gok shin' yiz chn̄abia' César Tibériona', na' Poncio Pilátona' chn̄abi'e gana' mbani Judéana', na' Heródeza' chn̄abi'e gana' mbani Galileana', na' beñ' bishee Felípena' chn̄abi'e gana' mbani Ituréana' len Traconítana', na' Lisániaza' chn̄abi'e gana' mbani Abilíniana', ² na' Anáza' len Caifáza' nakgake' b̄xoz choo b̄xoz xen che beñ' Israelka'. Na' kana'yen' w̄ne Chioza' Juanna', xiin̄ Zacaríaza', kana' zoe' to latj gana' bibi chashj chleb. ³ Na'ch wyaj Juanna' jte' doxen yell-liona' de cho'a yao Jordánna' na' wdixje'ile' beñ' chiyał' yiyaj yilengakile' na' choagake' nis kwenche yizi'xen Chioza' chegake'. ⁴ Bene' kon ka bzej dii Isaíaza' gana' nan:

To beñ' gosyee latja' gana' bibi chashj chleb, na' ine':

“Li se kwas wzenagle che Xanchona'
na' wsalj yichjlall'do'leka' kat' zee.

⁵La' le' gone' ka chon beñ' chillee ga nak xitj yao,
na' ka beñ' chchinj yaa kwenche chileshe'n.

Na' chilie' yog'lol nez dii nyok nlew,
na' chillee xitjka' chi' lo neza'.

⁶Na' yog'lol beñ' ile'gakile' ka gon Chioza' yisle' beñ' lawi dii mala'.”

⁷Na' beñ' zan chllin lao Juanna' kwenche wchoe' legake' nisa', na'ch kat' chllingake'
lawe'na', chi'e legake':

—Le' naklikzle ka beñ' znia! ¿Achakile wak wxonjile' yel' zak'zi' daa wsel' Chioza'? ⁸Li
gon ka gakbe'i beñ' nan dii li ba biyaj bilenile'. Na' bi gakzile bibi yel' zak'zi' ile'ile daa
inazle: “Neto' naknto' xiin dia che dii Abrahama'.” Ni inia' le' axt yajki wak gon Chioza'
xiin dia che dii Abrahama'. ⁹Yog'lol-le shi bi chonle ka chiyoollalii Chioza' na' gak chele
ka chak che to yag dii choe' dii zix dii bi nak wen, na' lii chhogtegake'n na' chzal'gake'n
lo yi'na'.

¹⁰Na' beñ'ka' chzenag xtill' Juanna' che'gake'ne':

—¿Beran chiyal' gonnto', shka'?

¹¹Na'ch che' Juanna' legake':

—Beena' de chop kwe' xe', chiyal' wi'e shkwe' che beena' bi de che'. Na' beena' de dii
cheej chawe', chiyal' gaolene'n beena' bi de cheyin.

¹²Na' lekzka' bllin bal beñ' wixhixjka' kwenche wchoa Juanna' legake' nisa', na'
wnabgakile'ne':

—Maestro, ¿beran chiyal' gonnto', shka'?

¹³Na'ch che' Juanna' legake':

—Bi wixhixjle dii xenchlæ ka to daa chiyal' wixhixjle.

¹⁴Na' lekzka' bal beñ'ka' nak soldad wnabgakile'ne':

—¿Shera neto', beran chiyal' gonnto' shka'?

Na'ch che' Juanna' legake':

—Bi wwall wsheble beñ' kwenche ikaazle bi de che', ni bi wtobilene' dii bi nak ka'. Li
gon banez laxjlæna'.

¹⁵Na' beñ' zan yoo yichjgake' ila' Crístona', beena' wsel' Chioza' kwenche inabi'e, na'
yog'ze' goggakile' Juanna'ljan Crístona'. ¹⁶Na' Juanna' golle' legake':

—Zi' za' beena' napch yel' wak xench ka nad'. Na' nad' ni bi zakaa gak' xmose'
kwenche wlechj' xele'na'. Nad' chchoa' le' nis daa chiyaj chilenile, san len' gone' ka
yidsoa Espíritu Sántona' loo yichjlall'do'læna', na' beñ'ka' bi chiyaj chileni, wselee legake'
lo yi' gabila'. ¹⁷Na' daa gon Crístona' che beñ' chzaklebin ka daa chon beena' nox' yag
xoz' daa chpa'ile' trígona', na' yitope' trígona' kooshaween na' wzeye' beb cheyinna' lo
yi'na' daa biga yiyolkzæ.

¹⁸Kan' nak diika' bzajni Juanna' beñ'ka', na' dii zanch dill' dii be'lene' legake' kana'
bi'e dill' wen dill' kob che Chioza'. ¹⁹Na' Juanna' lekzka' bsheshlene' Heródeza', beena'
wnabia' Galileana', daa bikee Herodíaza', xool beñ' bishee Felípena', na' che bichlæ dii
malka' ba bene'. ²⁰Na'ch Heródeza' benche' bish' ljwell dii malka' ba bene' daa wlo'e
Juanna' lillyana'.

Wchoa Jesúza' nisa'

(Mt. 3:13-17; Mr. 1:9-11)

²¹Kana' chchoa Juanna' beñ' nisa', len Jesúza' bchoe'n. Na' shlak choe'lwill Jesúza'
Chioza', byalj yabana' ²²na' betj Espíritu Sántona' jsoalene'ne', na' ble'gakile' Espírituna'
ka to palom. Na' bengakile' shii Chioza' za'n yabana', chi'e:

—Lin' nako' Xiin', chakchgaid' li' na' le chibaid' li'.

*Ben'ka' nak dia che Jesucristona'**(Mt. 1:1-17)*

²³ Na' do shichoa yizi Jesúza' ka wzoloe' bene' yog' daa lliá bia' gone'. Na' yog' ben' wnagake' xiiñ Joséna'. Na' Joséna' goke' xiiñ Elína', ²⁴ Elína' goke' xiiñ Matata', Matata' goke' xiiñ Levína', Levína' goke' xiiñ Mélquina', Mélquina' goke' xiiñ Jánana', Jánana' goke' xiiñ Joséna'. ²⁵ Joséna' goke' xiiñ Matatíaza', Matatíaza' goke' xiiñ Amóza', Amóza' goke' xiiñ Nahuma', Nahuma' goke' xiiñ Éslina', Éslina' goke' xiiñ Nagaina'. ²⁶ Nagaina' goke' xiiñ Maata', Maata' goke' xiiñ Matatíaza', Matatíaza' goke' xiiñ Semeina', Semeina' goke' xiiñ Joséna', Joséna' goke' xiiñ Judána'. ²⁷ Judána' goke' xiiñ Joánana', Joánana' goke' xiiñ Résana', Résana' goke' xiiñ Zorobabela', Zorobabela' goke' xiiñ Salatiela', Salatiela' goke' xiiñ Nérina'. ²⁸ Nérina' goke' xiiñ Mélquina', Mélquina' goke' xiiñ Ádina', Ádina' goke' xiiñ Cosama', Cosama' goke' xiiñ Elmodama', Elmodama' goke' xiiñ Era'. ²⁹ Era' goke' xiiñ Josuéna', Josuéna' goke' xiiñ Eliezera', Eliezera' goke' xiiñ Jorima', Jorima' goke' xiiñ Matata'. ³⁰ Matata' goke' xiiñ Levína', Levína' goke' xiiñ Simeónna', Simeónna' goke' xiiñ Judána', Judána' goke' xiiñ Joséna', Joséna' goke' xiiñ Jonánna', Jonánna' goke' xiiñ Eliaquima'. ³¹ Eliaquima' goke' xiiñ Meleana', Meleana' goke' xiiñ Mainána', Mainána' goke' xiiñ Matátana', na' Matátana' goke' xiiñ Natánna'. ³² Natánna' goke' xiiñ Davina', Davina' goke' xiiñ Isaína', Isaína' goke' xiiñ Obeda', Obeda' goke' xiiñ Booza', na' Booza' goke' xiiñ Salmónna', Salmónna' goke' xiiñ Naasónna'. ³³ Naasónna' goke' xiiñ Aminadaba', Aminadaba' goke' xiiñ Arama', Arama' goke' xiiñ Ezroma', Ezroma' goke' xiiñ Fáreza', Fáreza' goke' xiiñ Judána'. ³⁴ Judána' goke' xiiñ Jacoba', Jacoba' goke' xiiñ Isaaca', Isaaca' goke' xiiñ Abrahama', Abrahama' goke' xiiñ Taréna', Taréna' goke' xiiñ Nacora'. ³⁵ Nacora' goke' xiiñ Seruga', Seruga' goke' xiiñ Ragauna', Ragauna' goke' xiiñ Pelega', Pelega' goke' xiiñ Hebera', Hebera' goke' xiiñ Sálana'. ³⁶ Sálana' goke' xiiñ Cainánna', Cainánna' goke' xiiñ Arfaxada', Arfaxada' goke' xiiñ Sema', Sema' goke' xiiñ Noéna', Noéna' goke' xiiñ Lameca'. ³⁷ Lameca' goke' xiiñ Matusalénna', Matusalénna' goke' xiiñ Enoca', Enoca' goke' xiiñ Jareda', Jareda' goke' xiiñ Mahalaleela', Mahalaleela' goke' xiiñ Cainánna'. ³⁸ Cainánna' goke' xiiñ Enóza', Enóza' goke' xiiñ Seta', Seta' goke' xiiñ Adánna', na' Adánna' goke' xiiñ Chioza'.

4*Dii xiwaa goklalliin kooyela'n Jesúza' gone' ka cheenin**(Mt. 4:1-11; Mr. 1:12-13)*

¹ Ka biza' Jesúza' cho'a yao Jordanna', Espíritu Sántona', beena' chñabia' loo yichjall'do'ena', bñhi'ene' latja' gana' bibi chashj chleb. ² Na' na' wzoe' choa lla, na' dii xiwaa goklalliin kooyela'n le' gone' ka cheenin. Na' shlak wzoe' na' ni lat' bibi wdawe', na' ka gok choa lla, wdone'. ³ Na'ch che' dii xiwaane':

—Shi leilo' nako' Xiiñ Chios, goll yaji yiyakan yetxtil.

⁴ Na'ch che' Jesúza':

—Cho'a Xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban chegake'.”

⁵ Na'ch ka wde, bñche' dii xiwaa Jesúza' to lo yaa sib wal, na' tolbe'do' bliin le' yog' yellka' lliá yell-lioni. ⁶ Na'ch che'n le':

—Goñ' li' doxen yel' wñabia'na' na' yel' zakiina' daa de che yog' yellki, la' ba nakin cha' na' wak wi'an kon no cheenid'. ⁷ Na' goña'n li' shi wñchek' xibo'na' we'lawoo nad'.

⁸ Na' che' Jesúza':

—Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

⁹ Na'ch ka wde, bizche' dii xiwaa Jesúza' Jerusalénna' na' blepan le' yichj yoodo'na' gana' nakch sib wal, na' gollan le':

—Shi leilo' nako' Xiin Chios, lla bxit'shki ni. ¹⁰ La' Cho'a Xtill' Chioza' nan:
Chioza' wselee anjl che'ka' gap wwiagake' li',

¹¹ na' gox'gake' li'

kwenche ki koo wchewo' yajka'.

¹² Na'ch che' Jesúza':

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenche
xenlalloo shi gone' ka ba wne'.”

¹³ Na' ka bi gok kooyel' dii xiwaa Jesúza' gone' ka cheenin, na'ch bkwasan kwite'na'
shloll.

Wzolo Jesúza' bi'e Cho'a Xtill' Chioza' Galileana'

(Mt. 4:12-17; Mr. 1:14-15)

¹⁴ Jesúza' billine' gana' mbani Galileana' ziyoochgue' yel' wak che Espíritu Sántona',
na' doxenzə na' wze dill' daa chone'. ¹⁵ Na' chjali' chjasedile' ben' Israelka' gana' chdop
chllaggake' choe'lwillgake' Chioza', na' yog' ben' nagake' le xochi cho'e dill'.

Billin Jesúza' yell Nazareta'

(Mt. 13:53-58; Mr. 6:1-6)

¹⁶ Na'ch biyaje' Nazareta', yella' gana' bgole'. Na' ka bllin lla sabda', llana' chombaan
ben' Israelka', wyaje' gana' chdop chllaggake' choe'lwillgake' Chioza' kon ka yooloe'
chone'. Na'ch wzollee lawe'ka' kwenche blabe' Cho'a Xtill' Chioza'. ¹⁷ Na' be'gake'ne'
yisha' daa bzej dii Isaíaza', beena' wdixjee daa goll Chioza'ne', na' ka bzeshe'n blabe'
gana' na:

¹⁸ Espíritu che Xancho Chioza' zoalene' nad',

na' Chioza' ba bzoe' nad' zidye'len' ben' yesh'ka' dill' wen dill' kob che'na'.

Ba bselee nad' kwenche zidtip' lall' ben'ka' chakyeshii yichjlall'do'eka',

na' zidtxije'id' ben' wak yisell yilaagake',

na' gon' ka ile'i ben' lcholka',

na' gaklen' ben'ka' chchi' chsak' ben' legake',

¹⁹ na' wi'a dill' ba bllin lla gaklen Xanchona' ben' yell-lioki.

²⁰ Ka biyoll blabe' yisha' na'ch bitobe'n na' biyo'en beena' ngoo lall' neen, na' bibi'e.
Na' yog' ben'ka' lle' na' shin chizozgakile' chwiagake'ne'. ²¹ Na' wzoloe' cho'e dill', chi'e:

—Naa billinin ka na Cho'a Xtill' Chioza' dga ba benile.

²² Na' yog' ben'ka' lle' na' che' ljwellgake' le chon beeni, na' chibangakile' ka xochi cho'e
dill'. Na' che' ljwellgake':

—¿Aaga beenin xiin Joséna'?

²³ Na'ch che' Jesúza' legake':

—Wnaljale cha' ka dillaa de: “Wen rmech, biyon kwino'.” Na' lekzka' wnaljale nad':
“Daa beninto' beno' Capernaúma' lekzka' benshkin lallchoni.”

²⁴ Na' be'che' dill' chi'e legake':

—Dii li nia' le', to ben' chyixjee daa che' Chioza'ne' aga no shajle' che' yell che'na'. ²⁵ Na'
nia' le', zan nool wizeb wlle' gani mbani Israeli kana' wzoa Elíaza', beena' wdixjee daa
goll Chioza'ne', kana' aga bi yej gok shon yiz yoo gashjə na' wche'chga wbinna' doxen
gani mbani Israeli. ²⁶ Na' bi bsel' Chioza' Elíaza' kwenche gaklene' nool wizebka' lle'
ni, san bseleene' to yell zit' daa le Sarepta, daa llia gaozə yell Sidónna', gana' goklene'
to nool wizeb zoa na'. ²⁷ Na' lekzka' gok kana' wzoa dii Elisewa', beena' wdixjee daa goll
Chioza'ne'. Ben' zan ben' Israelka' che'gakile' yillwe' daa le lepra, per ni toe' bi biyone'.
Toz ben' Síriana' biyone', beena' le Naamán.

²⁸ Na' yog' ben'ka' lle' gana' chdop chllaggake' le bllaagake' daa wna Jesúza' ka'. ²⁹ Na'
lii wzolla'tegake' bibejgake' Jesúza' yella', na' bche'gake'ne' to ga ze bdiñj xen wal,
goklall'gake' ljachixgake'ne'. ³⁰ Per Jesúza' bicheje' ladje'ka' na' ziyaje'.

Bibej Jesúza' dii xiwaa yoo to ben'
(Mr. 1:21-28)

³¹ Jesúza' wyaje' Capernaúma', sto yell daa lia gana' mbani Galileana', na' bli' bsedile' ben'ka' lla sabda', llana' chombaən ben' Israelka'. ³² Na' bibangakile' ka chli' chsedi Jesúza', la' bli' bsedile' legake' lega ben' nap yel' wñabia'.

³³ Na' gana' chdop chllaggake', len to ben' yoo dii xiwaa na' bgosyaan le' zillj wal, chi'e:

³⁴ —jwayi neto', Jesús, ben' Nazaret! ¿Abido' kwenche wliayoo neton'? Nad' nombi'a li', na' neqid' nako' liizelozi ben' li ben' shao' che Chios.

³⁵ Na'ch bsheshlen Jesúza' dii xiwaa, golle'n:

—jLizə wzoa! jBichej!

Na' chwiate ben'ka' bchix btoł dii xiwaa beena', na' bichejan na' bikzə gayile' bi goki.

³⁶ Na' yog' ben'ka' lle' na' bibangakile', na' che' ljwellgake':

—¿Naktekan nak cho'a xtill' beeni, lla? Ka chneze' chillesh dii xiw'ka' yoo ben' daa napchgue' yel' wñabia' na' yel' wak.

³⁷ Na' doxen na' wze dill' ka nak daa chon Jesúza'.

Biyon Jesúza' tobiin che Simón Pédróna'
(Mt. 8:14-15; Mr. 1:29-31)

³⁸ Na' biza' Jesúza' gana' chdop chllaggake' na' biyaje' lill Simónna'. Na' tobiin che Simónna' bi shawee, yoochgue' dii lana', na' wñabgakile' Jesúza' gaklene'ne'. ³⁹ Na'ch wbig' Jesúza' kwite'na' gana' die' na' bsheshlene' dii lana' na' bichejan. Na' lii biyaste noola' wzoloe' bene' dii weej wdaogake'.

Jesúza' biyone' ben' zan
(Mt. 8:16-17; Mr. 1:32-34)

⁴⁰ Na' ka ba chxoá wbillá, ben'ka' lle' na' jwa'gake' lao Jesúza' ben'ka' chak wde wdeli yillwe'. Na' bxoá neena' to togake' na' biyakgakile'. ⁴¹ Na' bibeje' dii xiwaa yoo ben' zan, na' ka bichejgakan chosyaagakan zillj inleeb, che'gakan:

—Lin' nako' Xiin Chioza'.

Na'ch bsheshlen Jesúza' legakan. Bi bi'e latj inegakan la' nezgakin len' nake' Crístóna', beena' chbez ben' Israelka' wsel' Chioza' inabi'e.

Wda Jesúza' bi'e Cho'a Xtill' Chioza' Galileana'
(Mr. 1:35-39)

⁴² Ka wyeeni', bchej Jesúza' yella' na' wyaje' ga kono lle'. Per ben' yellka' biyiljgake'ne', na' ka bllingake' kwite'na', goklall'gake' wzag'gake'ne' kwenche yigaañlene' legake'.

⁴³ Na'ch goll Jesúza' legake':

—Lekzka' chiyal' chixje'id' ben'ka' lle' yell yoblə ka nak yel' wñabia' che Chioza', la' daan bselee nad'.

⁴⁴ Na' wda Jesúza' wdixji'e cho'a xtill' Chioza' to to gana' chdop chllag ben' Israelka' choe'lwillgake' Chioza'.

5

Wxengake' bel' zan
(Mt. 4:18-22; Mr. 1:16-20)

¹ To shii bllin Jesúza' cho'a nido' che Genesareta' na' bllin ben' zan wal axt bdakwyillgake'ne', daa cheengakile' wzenaggake' cho'a xtill' Chioza'. ² Na' ble'i Jesúza' chop barkw chi'gakan cho'a nido'na'. Ba bichej ben' wxen bel'ka' na' ba chiyibgake' yixj che'ka'.

³ Na'ch wyoo Jesúza' loo barkw che Simónna', na' wñabile'ne' wllig' zilateen loo nido'na'. Na' wche' Jesúza' loo barkwa' na' wzoloe' bli' bsedile' ben'ka'. ⁴ Na' ka biyoll bli' bsedile' legake', na'ch chi'e Simónna':

—Wyajlen barkwi gana' zitj na' wzal'le yixj chelena' kwenche senle bel'ka'.

⁵ Na'ch che' Simónna':

—Maestro, do yel ba bennto' llinna' na' ni tlish'b bi bdo_linto', per shi kan' no', wzal'chnto' yixjki.

⁶ Na' ka bzal'gake' yixj che'ka', wxenan bel zan inleeb. Na' ka nan yibejgake' yixja' wzolo chcheza'n. ⁷ Na' blaa neeka' ben'ka' lle' loo barkwa' sto kwenche jaklengake' legake'. Na' ka bllin ben'ka', na'ch bissha'chagake' chopte barkwka' axt ba chakgakan ka dii kwe' yel. ⁸ Ka ble'i Simón Pédróna' ka gok, bchek' xibe'na' lao Jesúza' na' chi'ene':

—Bikwasgach kwitii Xan', la' ben' saaxyaz nad'.

⁹ Golle'ne' ka' daa bibanile', na' ka'kzə ben'ka' lene' bibangakile' daa bdo_l' bel zan inleeb. ¹⁰ Na' lekzka' bibani Jacóbona' len Juanna' xiin Zebedewa', la' lengaken' nakgake' txen Simónna'. Na' che' Jesúza' Simónna':

—Bi illebo'. Kon ka chono' naa chbejo' belki loo nisi, ka'kzan gono' yibejo' ben' lao dii mala'.

¹¹ Na' ka billinlengake' barkwka' cho'a niso'na', na'zə bkwaangake'n len xshinlaze'ka' na'ch janogake' Jesúza'.

Biyon Jesúza' to ben' chake' yillwe' daa le lepra

(Mt. 8:1-4; Mr. 1:40-45)

¹² Na' shlak zoa Jesúza' to yell, bllin to ben' lawe'na' chak doxen kwerp che'na' yillwe' daa le lepra. Na' ka ble'ile' Jesúza', bchek' xibe'na' lawe'na' na' bchek' yichje'na' axt lo yona' na' got'yoile'ne', chi'ene':

—Xan', nezid' wak yikwaso' yillwe'ni chak' shi cheenilo'.

¹³ Na'ch Jesúza' bxoā neena' yichj beena', na' chi'ene':

—Cheenid'x. Na' naate yikwasa'n.

Na' kon ka golle' ka' lii biyakteyi beena'. ¹⁴ Na'ch che' Jesúza'ne':

—Kono yoo ka ba ben' cho'. Lete wyaj lao bxoā' kwenche ile'ile' ba biyakilo', na' jwa' daa chiya' lljoo che Chioza' daa nllia dii Moiséza' bia' kwenche inezi ben' ba biyakilo'.

¹⁵ Na' la'kzi golle'ne' ka', zizikchli wzeyi che', na' ben' zan bdop bllaggake' kwenche bzenaggake' cho'a xtilleena' na' kwenche biyone' bittezə yillwe' dii chakgake'. ¹⁶ Per Jesúza' yooloe' chaje' ga kono ben' chak kwenche chjelwille' Chioza'.

Biyon Jesúza' to ben' net ni'a neena'

(Mt. 9:1-8; Mr. 2:1-12)

¹⁷ To lla ka chli' chsedi Jesúza', xonj fariseoka' na' ben'ka' chli' chsedi leya', na' ben'ka' za' yog' yellka' daa mbani Galileana' na'ch daa mbani Judeana' na' lekzka' ben' za' yell Jerusalénna', chi'gake' chzenaggake' dill' daa cho'e. Na' yel' wak che Chioza' wzoalenan Jesúza' kwenche gok biyone' ben'ka' bi shao'. ¹⁸ Na'ch bllin to chop ben' n_lengake' to ben' net ni'a neena' n_{xo}agake'ne' to lo daa. Goklall'gake' sho'lengake'ne' loo yoonā' kwenche lljwa'gake'ne' lao Jesúza', ¹⁹ per bi gok sho'lengake'ne' daa nyichachga ben'ka' loo yoonā'. Na'ch wyepgake' koll' yoonā'lə na' bkwasgake' dexka' kwenche gok bletjgake'ne' do daa che'na' ladj ben'ka' lle' na' kwenche blline' lao Jesúza'. ²⁰ Na' ble'i Jesúza' le n_{xen}ilall'gake'ne', na'ch chi'e ben' we'na':

—Bish'dawaa, ba biyakxen saaxya cho'ka'.

²¹ Na'ch ben'ka' chli' chsedi leya' na' fariseoka' wza'lall'gake', chakgakile': “¿Nora beeni chonz kwine' ka Chioza'? ¡La' toz Chiozan' chak chizi'xene' saaxya che ben'!”

²² Na' gokbe'i Jesúza' daa wza'lall'gake', na'ch golle' legake':

—¿Berache chza'lall'zle ka'? ²³ ¿Achakile chyalljchid' yel' wak xench yep' beeni: “Ba bizi'xen' saaxya cho'na'”, ka daa yepee: “Biyas na' bigoo nez”? ²⁴ Na' wliid' le', nad', Ben' Bsel' Chioza', nap' yel' w_nabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

—Naa nia' li', biyas, bitob daa cho'na' na' biyaj lillo'na'.

²⁵ Na' lii biyaste beena' chwiate beṅ'ka' lle' na', bitobe' daa che'na' bizee ziyaje' lill-le' choe'lawee Chioza'. ²⁶ Na' yog'loḷ beṅ'ka' bibangakile' na' be'la'ogake' Chioza', na' do chllebzgake' che'gake':

—Naanlla ba ble'icho dga chonan ka chibanicho.

Gox Jesúza' Levína'

(Mt. 9:9-13; Mr. 2:13-17)

²⁷ Ka biza' Jesúza', na' ble'ile' to beṅ' wiçhixj lie' Leví, chi'e gana' chçhixjgake'. Na' chi'ene':

—Da, dino nad'.

²⁸ Na'ch lii wzolla'te Levína', wlej yichje' xshine'na' na' janoe' Jesúza'.

²⁹ Na' Levína' bene' to lni xen che Jesúza' lille'na'. Na' wyaj beṅ' zan beṅ' wiçhixjka' na' zi baḷ beṅ' yoblə wdaogake' txen. ³⁰ Na' fariseoka' na' beṅ'ka' chli' chsedi leya' wzologake' chakdil-lengake' beṅ'ka' nak Jesúza' txen, che'gake':

—¿Berache cheej chaolenle beṅ' wiçhixjka' na' beṅ' malka'?

³¹ Na'ch che' Jesúza' legake':

—Beena' zoa shi'a shao' aga no wen rmech chyalljile', san beena' bi shawaan chyalljile'ne'. ³² Aga bid' ni che beṅ'ka' nak beṅ' li beṅ' shao', san bid' kwenche yep' beṅ' saaxyaka' chiyaḷ' yiyaj yilengakile'.

Wnabgakile' Jesúza' che wbasaa

(Mt. 9:14-17; Mr. 2:18-22)

³³ Na' wnabgakile' Jesúza', che'gake'ne':

—Beṅ'ka' nak Juanna' txen na' beṅ'ka' nak fariseoka' txen zekizezi chzoagake' wbas' na' choe'lwillgake' Chioza'. Na' ¿berache beṅ'ki nakgake' li' txen bi chzoagake' wbas'?

³⁴ Na' chi'e legake':

—Kat' de to yel' wishagna', aga wak gonle byen beṅ'ka' chdop chllag soagake' wbasaa shlak zoalengake' bi'na' chshagna'. Na' ka'kzan beṅ'ki nakgake' nad' txen, cheej chzoagake' naa zoalen' legake'. ³⁵ Per wllin lla wkwas beṅ' nad' ladje'ka', kana'chan soagake' wbasaa.

³⁶ Na' lekzka' bzoe' sto jempl, chi'e legake':

—Ni to beṅ' bi chçhogue' xa kobe'na' na' chideen lee xe' dii gola'. La' shi gone'n ka', na' wlliyee dii koba', na' dii gola' aga wnelebin lech' koba'. ³⁷ Na' ni kono chgaa vinona' daa zi' chchejte to loo yid golə. La' shi no gon ka', vino koba' wçhezaan yid gola' na' chopten kwiayi'. ³⁸ San vino koba' chiyaḷ' shollan loo yid koba'. ³⁹ Na' lekzka' to beṅ' ba yooloe' cheeje' vino gola' aga weenile' yeeje' dii koba', daa chziachile' dii gola'.

6

Wdishjgake' do che trígona' lla sabda'

(Mt. 12:1-8; Mr. 2:23-28)

¹ To lla sabd, llana' chombaṅ beṅ' Israelka', wdelen Jesúza' beṅ'ka' nakgake'ne' txen to ga naz beṅ' trígona', na' beṅ'ka' zejlengake'ne' wzolo wdishjgake' trígona' na' wxobgake'n wdaogake'n. ² Na' baḷ fariseoka' gollgake' legake':

—¿Biçhe chonzle daa bi chiyaḷ' goncho llani chombaṅcho?

³ Na'ch che' Jesúza' legake':

—¿Abiṅ' wlable gana' cho'en dill' ka ben dii Davina' len beṅ'ka' nakgake'ne' txen ka wdongake'? ⁴ Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bçozka' de lsens gaogake'. Na' lekzka' bi'en beṅ'ka' nakgake'ne' txen.

⁵ Na' lekzka' chi'e fariseoka':

—Nad', Beṅ' Bsel' Chioza' Yell-lioni, chṅabi'a lao llani chombaṅcho.

*Biyon Jesúza' to ben' lla sabda'**(Mt. 12:9-14; Mr. 3:1-6)*

⁶ Na' sto lla sabd, llana' chombaän ben' Israelka', wyaj Jesúza' gana' chdop chllaggake' choe'lwilgake' Chioza' na' wzoloe' chli' chsedile' legake'. Na' ladj ben'ka' len to ben' net nee de shlina'. ⁷ Na' fariseoka' na' ben'ka' chli' chsedile' leya' lle'gake' chwiayen'gake' shi wiyon Jesúza' beena' llana' chombaängake', kwenche gaogake' xya che'. ⁸ Na' gokbe'i Jesúza' daa chza'lall'gake', na'ch golle' beena' net tlaa neena':

—Wzolla' na' wze gchola'.

Na'ch wzolla' beena', wzie' gchola'. ⁹ Na'ch goll Jesúza' ben'ka':

—Ni inabid' le': ¿Beran na leya' chiyal' goncho lla sabdka'? ¿Agoncho dii wenna' anti goncho dii mala'? ¿Ayislacho ben' anti witchone'?

¹⁰ Na'ch bwia Jesúza' legake', na' chi'e beena' net tlaa neena':

—Bli noona'.

Na'ch bli neena' na' biyakin. ¹¹ Na' fariseoka' na' ben'ka' chli' chsedile' leya' le bllaagake' na' choe'gake' dill' nak ka gongake' che Jesúza'.*Wlej Jesúza' postlka' shllin**(Mt. 10:1-4; Mr. 3:13-19)*

¹² Na' wyaj Jesúza' to lo yaa kwenche jelwille' Chioza', na' do yel be'lwille'ne'. ¹³ Ka wyeeni', goxe' ben'ka' nakgake'ne' txen na' ladj ben'ka' wleje' ben'ki shllin na' bsi'e legake' postl: ¹⁴ Simónna' beena' bsi'e Pedro, len ben' bishee Andréza', na' Jacóbona', Juanna', Felípena', Bartoloména', ¹⁵ Matewa', Tomáza', Jacobo xiin Alfewa', Simónna', beena' bsi'gake' Zelote, ¹⁶ Judas, ben' bish' Jacóbona'* na' Jud Scariota', beena' bene' Jesúza' lo na' ben' malka'.

*Bli' bsemi Jesúza' ben' zan**(Mt. 4:23-25)*

¹⁷ Na'ch biyetjlen Jesúza' legake' lo yaana' na' billingake' to ga nak lesh'. Na' na' lle' ben' zan inleeb, ben' zaak doxen gana' mbani Judeana' na' yell Jerusalénna', na' ben' zaak cho'a nisdona' gana' mbani yell Tírona' na' yell Sidónna'. ¹⁸ Wyajgake' kwit Jesúza' kwenche wzenaggake' xtilleena' na' yiyakgake' bi yillwe' dii chakgake'. Na' lekzka' biyaki ben'ka' chsak'zi' dii xiw'ka' legake'. ¹⁹ Yog'z ben' goklall'gake' idi'gake' Jesúza' daa ba nezgakile' chchej yel' wak che'na' na' chiyaki yog' ben'.

*Ben'ka' zoa mbalaz na' ben'ka' bi zoa mbalaz**(Mt. 5:1-12)*²⁰ Na'ch bwia Jesúza' ben'ka' nakgake'ne' txen, na' chi'e legake':

—Chakomba le' nakle ben' yesh' daa chleble yel' wñabia' che Chioza'.

²¹ 'Chakomba le' chbil chdonle naa; wllin lla yesh yeljile.

'Chakomba le' chbell-le naa; wllin lla yixill-le.

²² 'Chakomba le' shi chakzbani ben' le', shi bi chongake' le' txen, shi biya dii nagake' le', na' shi chongakile' le' nakzi ka chongakile' to ben' wen dii mal ni cha', nad', Ben' Bsel' Chioza' Yell-lioni. ²³ Li yibayi, na' li soa mbalaz kat' ba chongakile' le' ka', la' yabana' gaple to dii wen dii shao'. La' ka'kzə beni dii xozxtoe'ka' ben'ka' wdixjee daa goll Chioza' legake' kani'yi.

²⁴ 'Nyesh'laz gak chele, le' nakle ben' wni'a, la'kzi le wen chak chele naa.²⁵ 'Nyesh'laz gak chele, le' de dii cheej chaole naa, la' wllin lla ibil idonle.

'Nyesh'laz gak chele, le' chytij chxill-le naa; wllin lla kwellyesh'le.

²⁶ 'Nyesh'laz gak chele, le' choe'la'o yog' ben' le', la' ka'kzə be'la'o dii xozxto'leka' dii ben'ka' benzə ka chyixjee daa che' Chioza' legake'.

* **6:16** Ben' bish' Jacóbona': ben'ka' nsemi nagake' chiyal' inan xiin Jacóbona'.

Chiyal' gakicho ben'ka' chakzbani cho'
(Mt. 5:38-48; 7:12)

²⁷ 'Le' chzenagle naa, nia' le', li gaki ben'ka' chakzbani le'. Li gonigake' wen. ²⁸ Li inabi Chioza' gone' ka gak wen che ben'ka' chyishj bia' blag' chele. Li inabi Chioza' gaklene' ben'ka' chiya dii nagake' chele. ²⁹ Shi no kap' xag'lana' tlaa, li wze daa zi shlaa. Na' shi no koyo xachel-lena', li we'tega len xkamislana'. ³⁰ Nottezə ben' shi bi inabe' chele, li we'n. Na' ka', shi no ikaa bi de chele, bi yinabzilene'n. ³¹ Li goni ben' kon ka cheenile gongakile' le'.

³² 'Shi to ben'ka' nllagzile chakile, ¿garan de dii wenna' daa chonle? La' ka'klen chon ben' saaxyaka'. ³³ Lekzka' shi to ben'ka' chonzi le' wen chiyonile wen, ¿garan de dii wenna' chonle? La' ka'klen chon ben' saaxyaka'. ³⁴ Na' shi choe'le bi choe'le ben' daa nezile yigwee wzonna', ¿garan de dii wenna' daa chonle? La' ka'klen chon ben' ssaxyaka', choe'gake' bi choe'gake' daa nongake' lez wigoogake' wzon che'ka'. ³⁵ Na' le', naalla, chiyal' gakile ben'ka' chakzbani le', na' gonle wen chegake'. Na' shi we'le dii we'le legake', bi gonle lez yiyongake'n. Shi ka' gonle, Chioza' yiyone' dii xench chele, na' inezi ben' nakle xiiñ Chios, beena' nak ben' choo ben' xen, la' le' chone' wen che ben'ka' bi choe' le' ye! choxken na' ben' wen dii malka'. ³⁶ Chiyal' yiyeshii ljwell-le ka chiyeshii Xacho Chioza' yog' ben'.

Bi wwia wyile bi chon ben'
(Mt. 7:1-5)

³⁷ 'Bi wwia wyile bi chon ben', kwenche bi gon Chioza' xya chele. Bibi wtobile' ben', kwenche bi gaple dol' lao Chioza'. Li si'xen che ljwell-le, na' Chioza' si'xene' chele. ³⁸ Li we' ben' bi chyalljile' na' Chioza' yiyone'n. Na' yiyonchle' dii xench, ka chon ben' chzanile' do yichj do lallee kat' bi wi'e, chzoayaa chzoalline'n. La' kon ka chonle chzanile' we'le ben' bi de chele, ka'kzan goni Chioza' le'.

³⁹ Na' bzoa Jesúza' to jempl, chi'e legake':

—Nezicho bi gak to ben' lchol wchi'e sto ben' lchol, la' choptegake' lljabixgake' to loo yech. ⁴⁰ Na' beena' chsed bi gak ine': "Chonch' ka beena' chli' chsedile' nad'." Kat'ch yiyoll yido wsede', kana'chan gake' ka beena' bli' bsdile'ne'.

⁴¹ '¿Biçhe chwiazó' biçha' yoo loo jalao bish' ljwello'na' na' bi chile'ilo' kwagaa yoo loo jalawo'na'? ⁴² Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': "Ben'shki yibej' biçha' yoo loo jalawo'na'?" ¡Ben' wxiye! Zigaate bwia cho'na' na' tech wwio' che' bish' ljwello'na'.

Daa chbia to yag chli'n bi yag daa
(Mt. 7:17-20; 12:33-35)

⁴³ 'Biga zoa to yag wen na' kwiazan dii bi nak wen, ni biga zoa to yag dii bi nak wen kwiazan dii nak wen. ⁴⁴ Ka ile'icho daa chbia to yag, na' chnezicho bi yag daa. Yag yeshaa aga wbian yixwewa', na' lekzka' yag bisgaana' aga wbian uvana'. ⁴⁵ Ka'kzan beena' nak ben' wen, choe' dill' wen, la' loo yichjlall'do'enan' yoo dii wenna'. Na' beena' nak ben' mal, cho'e dill' dii nak mal, la' loo yichjlall'do'enan' yoo dii mala', la' yog' daa chnecho chchejan loo yichjlall'do'chona'.

Chop ben' bengake' twej yoo
(Mt. 7:24-27)

⁴⁶ '¿Berache nazle nad' "Xan', Xan'", na' bi chonle daa nia' le'? ⁴⁷ Ni inia' le' no zaklebi beena' chone' nad' txen na' chzenague' cha' na' chone' ka nia'. ⁴⁸ Zaklebile' beena' ben to yoo. Zigaate wdene' zitj wal na' wleke' leninna' lo yaja'. Ka wde yawa' na' wyoon le'inna', aga bizoyin yisheen daa, la' chi'cha leninna' lo yaja'. ⁴⁹ Na' beena' cheni cho'a xtillaana' na' bi chone' ka nia', zaklebile' beena' ben lille'na' lo yona' na' bibi lenin wleke'. Na' ka wde yawa' wyoon le'inna', lii billeeten na' wlliayi'tekkan.

7

Biyon Jesúza' xmos xan soldadka'
(Mt. 8:5-13)

¹ Ka biyoll be'len Jesúza' beñ'ka' dill', biyaje' Capernaúma'. ² Na' yella' zoa to beñ' Roma beñ' chñabi'e to guiyoa soldad, na' zoa to xmose' lille'na', beena' le chakile', na' chake' to yillwe' dii chonan ka witan le'. ³ Na' ka beni xan soldadka' choe'gake' xtill' Jesúza', na'ch bselee bal beñ' golka' chñabia' Israela' kwenche lljet'yogakile'ne' lljayene' beena' bi shao'. ⁴ Na' ka bllin beñ' golka' kwit Jesúza', got'yogakile'ne', che'gake':

—Xan soldadka' chidolee gakleno'ne', ⁵ la' le chakile' cho' beñ' Israel na' len' bene' yoonā gana' chdi'anto' choe'lwillnto' Chioza'.

⁶ Na'ch wyajlen Jesúza' legake'. Na' ka ba zoa yillingake' lille'na', xan soldadka' bselee bal beñ' nllaguile' kwenche jellgake' Jesúza' dill'ki:

—Xan', bi sio' wneyi yido', la' bi chido'aa shoo loo lillii. ⁷ Daan bi biyaxjid' yid' kwin' yidtil' li'. La'ch' to chop cho'a dill' shel' ino' na' yiyakile'. ⁸ La' zoa no chñabia' nad', na' lekzka' chñabi'a soldad cha'ka'. Na' kat' chep' toe': “Wyaj ni”, na' chaje'. Na' kat' chep' stoe': “Da ni”, na' chide'. Na' kat' chep' xmosaa: “Ben dga”, na' chone'n.

⁹ Na' ka beni Jesúza' xtill' beena' na' bibanile', na' biyechje' bwie' beñ'ka' zjanogake'ne', na' chi'e legake':

—Dii li, ni to beñ' Israel bin' illag' beñ' gonlilall'likze' nad' ka chonlilall' beeni nad'.

¹⁰ Na'ch ziyaj beñ'ka' bsel' xan soldadka', na' ka billingake' lille'na' ble'gakile' ba biyaki xmose'na'.

Bisban Jesúza' xiin to nool wizeb bi' ba wit

¹¹ Ka wde, na' wyaj Jesúza' sto yell dii le Naín kon beñ'ka' nakgake'ne' txen na' lench zan beñ' yoblā. ¹² Na' ka bllingake' cho'a yella', ble'gakile' zjakwash' beñ'ka' to bi' wet. Na' bi'na' wit nakb' bi' tlish', na' xna'baa nake' noolā wizeb. Na' beñ' zan beñ' yellka' zjakwash'gake'b'. ¹³ Na' ka ble'i Xancho Jesúza' noola', na' biyeshile'ne', chi'ene':

—Bi kwello'.

¹⁴ Na'ch jabigüee bexee gana' xoa bi' weta', na' wlez beñ'ka' n'engake'b'. Na' golle' bi' weta':

—Bi' xkwid', nia' li', jbiyas!

¹⁵ Na' bi' weta' lii bibanteb' na' bibe'b' na' wzolo chineb', na' biyon Jesúza'b' lo na' xna'baa. ¹⁶ Na' ka ble'i beñ'ka' daa bene', yog'lolze' blleb na' wzologake' choe'la'ogake' Chioza', nagake':

—Ladjchoni ba bla' to beñ' zakii beñ' chyixjee daa che' Chioza'ne'.

Na' lekzka' nagake':

—Chiozan' ba blee kwenche gaklene' cho' nakcho yell che'.

¹⁷ Na' doxen gana' mbani Judeana' na' yellka' lia gaozə wne'zgakile' daa ben Jesúza'.

Beñ'ka' bsel' Juanna' lao Jesúza'
(Mt. 11:2-19)

¹⁸ Na' beñ'ka' nongake' Juanna' txen jayellgake'ne' yog' diika' chon Jesúza'. Na'ch Juanna' wnie' chope' ¹⁹ na' bselee legake' gana' zoa Jesúza' kwenche janabgakile'ne' shi leyen'en' beena' lia bia' yid wa shi chiyal' kwe'zgake' sto beñ' yoblā. ²⁰ Na' ka bllin beñ'ka' bsel' Juanna' kwit Jesúza', che'gake'ne':

—Juanna', beena' chchoa beñ' nisa', bselee neto' kwenche zidñabinto' li' shi li'yen'kzan nako' Crístona', beena' chbeznto' wsel' Chioza' kwenche inabi'e, wa shi chiyal' kwe'znto' stoe'.

²¹ Na' shlak zegake' na', biyon Jesúza' beñ' zan beñ' chak yillwe', na' lekzka' bibeje' dii xiw'ka' yoo beñ', na' bene' ka ble'i beñ' zan beñ' l'cholka'. ²² Na'ch che' Jesúza' beñ'ka' bsel' Juanna':

—Li yiyaj na' li lljayell Juanna' daa ba ben ble'ile. Li lljayelle' ben' l'cholka' chle'gakile', na' ben'ka' bi chak sa' chza'gake', na' ben'ka' chak yillwe'na' daa le lepra chiyakgakile', na' ben' kwellka' chengakile', na' chiban ben' wetka', na' chyixje'id' ben' yesh'ka' dill' wen dill' kob che Chioza'. ²³ Chakomba beena' chajle' cha' na' bi chakchoplallee.

²⁴ Na' ka biza' ben'ka' bsel' Juanna', Jesúza' bi'e xtil' Juanna' lao ben'ka' lle' na', chi'e:

—¿Nakra nak beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e? ²⁵ Na' shi bi nake' ka', ¿nakran nak beena' jawiale, shka'? ¿Ato ben' nakwe' lech' dii zakii? La' nezczile ben'ka' nakw lech' dii zakii, na' naptegake' bittezə dii chzelall'gake', zoagake' lill ben' wñabia'ka', aga zoagake' latja' gana' bibi chashj chleb. ²⁶ Na' ¿nakran nak beena' jawiale, shka'? ¿Ato ben' chyixjee daa che' Chioza'ne'? Dii li kan' chone', na' chontechle' ka to ben' chyixjee daa che' Chioza'ne'. ²⁷ La' che beenin cho'e Cho'a Xtil' Chioza' dill' gana' nan:

Wselaa beena' kwialo lawo'na',

na' chixji'e xtilloona' kwenche soa ben' wzenaggake' cho' kat' illino'.

²⁸ Na' nia' le', lao yog'lolte ben' yell-lioni, ni to konon' ichej ben' zak'teche' ka Juanna'. Per nottezə beena' choe' latj inabia' Chioza' loo yichjlall'do'ena', zak'teche' ka Juanna'.

²⁹ Na' yog'lol ben'ka' bchoa Juanna' nisa', no ben' wichixjka' na' zan ben' yoblə, ka bengakile' daa wna Jesúza', gokbe'gakile' dill' li dill' shao' nak cho'a xtil' Chioza'. ³⁰ Na' fariseoka' na' ben'ka' chli' chsedi leya' bi goongakile' wchoa Juanna' legake' nisa', ni bi goklall'gake' gon Chioza' dii wenna' cheenile' gone' chegake'. ³¹ Na'ch goll Xancho Jesúza' legake':

—¿Bi ka wsaklebid' le' mbanle naa? ¿No ka inia' nakle? ³² Nakle ka bi'do'ka' chbe' gana' chak yaana' na' chosyaagakb' che' ljwellb': “Bkwellnto' bbleja' na' bi byaale, na' belnto' dii chon nyesh', na' ni bi wchell-le.” ³³ La' bid Juan wichoa nisa', na' bi chawe' yetxtil ni bi cheeje' vino, na' nale che': “Dii xiwaan yo'e.” ³⁴ Na'ch bid' nad', Ben' Bsel' Chioza' Yell-lioni, na' chle'ile cheej chaw', na' nale cha': “Le ben' waoxat nak beeni na' cheejtie', na' nllagteile' ben' saaxyaka' na' ben' wichixjka'.” ³⁵ Per yel' sin' che Chioza' chli'lawin ka nsa' che ben'ka' chzenaggake' cheyin.

Jesúza' wyaje' lill Simónna', beena' nak fariseo

³⁶ To fariseo wñie' Jesúza' kwenche gaogake' lille'na'. Ka blline' na' wchi'e cho'a mesa'.

³⁷ Na' to noolə wda zoa yella', ka wñezile' zjtao Jesúza' lill farisewa', na'ch wyaje' noxee to lmet de yaj xochi na' yollan set zix. ³⁸ De chbellzile' jabigüee xñi'a Jesúza' na' bisbisile' ñi'ena' nis xchell che'na'. Na' bisbillile'n yish' yichje'na', na' bnope'n na' bwazje'n set zixa'. ³⁹ Na' farisewa', beena' wñie' Jesúza' lille'na', ka ble'ile' ka chon noola', na' gokile': “Shel'ka' dii li nak beeni to ben' chyixjee daa che' Chioza'ne', wakbe'ile' nan nooli chox' ñi'ena' nake' ben' saaxya.” ⁴⁰ Na'ch che' Jesúza' farisewa':

—Simón, de to dii cheenid' inia' li'.

Na' che' Simónna':

—Wna, Maestro.

⁴¹ Na'ch che' Jesúza':

—Chop ben' chbag'gake' mech che to ben' chon yichjin. Toe' chbaguee gay' guiyoa mech plat*, na' stoe' chbaguee shiyonan. ⁴² Na' ni toe' bi bllelgakile'n yiyixjgake'n. Na'ch xan mecha' benxenlallee daa chal'gake' che'. Wnashki nad', ¿no ben'ka' chop gakchile'ne'?

⁴³ Na'ch che' Simónna':

—Chakid' beena' chbag' dii xench.

Na' che' Jesúza'ne':

—Lekzilo', kan' nakan.

* **7:41** Mech plat: dill' griegona' nan denario, na' nakan to mech dii zak' che shlla llin.

⁴⁴ Na'ch bwia Jesúza' noola' na' chi'e Simónna':

—Bwiakachi nooli. Ka wyo'a loo lillo'ni bi beño' nisa' kwenche chib ni'ani, per nooli ba wdibile' nis xchell che'na' ni'ani na' bisbillile'n yish' yichje'na'. ⁴⁵ Bi bnopo' nad', per nooli kon ka wyo'a chnoptezi chnope' ni'ani. ⁴⁶ Bi wdebo' yichjii set, per nooli ba bwazje' set zixa' ni'ani. ⁴⁷ Daan nia' li', la'kzi dii zan saaxya ba ben nooli, ba biyaxngakan daa le chakchgaile' nad'. Na' beena' lat'zə biyaxxen che', lekzka' lat'chga chakile' nad'.

⁴⁸ Na'ch golle' noola':

—Ba biyaxxen saaxya cho'ka'.

⁴⁹ Na' beñ'ka' chi'lengake' Jesúza' txen wzologake' che' ljwellgake':

—¿Nora beeni, lla, axt saaxyaka' chizi'xene'?

⁵⁰ Na' Jesúza' chi'e noola':

—Daa chonlilaloo nad', ba bilo' lao yel' zak'zi'na'. Biyaj mbalaz.

8

Noolka' goklengake' Jesúza'

¹ Ka wde dga, wda Jesúza' zan yell xen na' zan yelldo', chyixji'e dill' koba' nan Chioza' chñabi'e loo yichjlall'do' beñ'ka' chzenag che'. Na' postl che'ka' shlin chdalengake'ne' txen. ² Na' lekzka' len bal noolka' ba biyone'. Bale' bibeje' dii xiw'ka' wyoogake', na' zi bale' gokgake' yillwe' na' biyone' legake'. Na' ladje'ka' len Maríana', noola' nsi'gake' Magdalena, beena' bibej Jesúza' gall dii xiw'ka'. ³ Na' lekzka' len noola' le Juana, xool Chúzana', beena' ngoo lo nee chap chwie' lill Heródeza'. Na' len Susánana', na' zanch noolka' beñ'ka' jano Jesúza' na' bchingake' dii de chegake' kwenche goklengake'ne'.

Jempl che to beñ' goz goon

(Mt. 13:1-9; Mr. 4:1-9)

⁴ Beñ' zan bllesh to to yell jawiagake' Jesúza', na' ka bdop beñ' zan wal na'ch bseesile' legake' to jempl, chi'e:

⁵ —To beñ' goz goon wzee zeje' goza'. Na' ka zej chzalee binna', balan bxop cho'a neza' na' blej bshoshj beñ' len, na' bllin byinka' wdaogakban. ⁶ Na' zi balan bxop ladj yajka' gana' bitek chi' yona', na' ka bla'gakan to wbillzgakan, la' aga bi gop' de gana' bxopan. ⁷ Na' zi balan bxop ladj yag yesh'ka', na' ka bla'gakan aga be' yag yesh'ka' latj igolgakan.

⁸ Na' zi balan bxop lo yo wenna', na' le bgolgakan na' axt do to guiyoa wej wllia to ton.

Na' ka biyoll bseesee jempla', na'ch wñie' zilljə chi'e:

—Le' chenile dga nia', li sen wñeyi.

Bzajnií Jesúza' biche chzoe' jempla'

(Mt. 13:10-17; Mr. 4:10-12)

⁹ Na'ch wñab beñ'ka' nakgake'ne' txen bi zejin jempla' daa bseesee. ¹⁰ Na' che' Jesúza' legake':

—Chioza' cho'e latj inezile daa kono nezkzi, ka chñabi'e loo yichjlall'do' beñ'ka' chzenagake' che'. Na' beñ'ka' sto chseesid' legake' shgal' jempl, la' la'kzi chle'gakile' bin chon', kon chongake' ka beñ' bi chle'i. Na' la'kzi chengakile' bin nia', aga chajni'gakile'n.

Bzajnií Jesúza' bi zeji jempl che beñ' goz goona'

(Mt. 13:18-23; Mr. 4:13-20)

¹¹ 'Kin zeji jempl che beñ' goz goona': cho'a xtill' Chioza' nakan ka binna' daa goze'. ¹² Na' zoa beñ' chzenaggake' cho'a xtill' Chioza', na' lii ze'te dii xiwaa chikwasan daa kwenche bi shajle'gake' na' kwiayi'gake'. Chak chegake' ka gok che binna' daa bxop cho'a neza'. ¹³ Na' zoa beñ' chibagakile' chzenaggake' cho'a xtill' Chioza' na' chlebgake'n, per kat' chak bi chak chegake' na' chbej yichjgake'n. Chak chegake' ka gok che binna' bi bde loinna' daa bxopan lo yaja'. ¹⁴ Na' zoa beñ' chzenague' cho'a xtill' Chioza', per chi'ch yichjgake' daa chak chegake' na' che yel' wni'ana', na' che bichlə dii chzelall'gake', na'

bi chakchagake' lo xnez Chioza'. Chak chegake' ka gok che binna' bxop ladj yag yesh'ka'.
 15 Na' zoa ben' chzenaggake' cho'a xtill' Chioza' do yichj do lall'gake' na' chongake' ka nan, na' chzo chzakgakile' bittezə dii chak chegake'. Ben'kin chak chegake' ka gok che binna' bxop lo yo wenna' daa le wllia.

Jempl che to kandil

(Mr. 4:21-25)

16' Biga zoa to ben' chxene' kandila' na' chdose'n to dii wkwashaan daa wa chzoe'n xan xlague'na', san chzoe'n sibə kwenche ile'i ben'ka' sho' loo yoonā'. 17 Na' lekzka' yog'lolte dii ngash' nāa, wllin lla yila' lawin, na' daa kono nezi nāa, wllin lla inezi beṇaan.

18 'Li wzenag dga nia' le' nāa. Beena' chzenag zizikchli shajni'chile', na' beena' bi chzenag, daa ba bzenague' lat', yog'lolan yiyal-lallee.

Xna' Jesúza' len ben' bisheeka'

(Mt. 12:46-50; Mr. 3:31-35)

19 Na'ch bllin xna' Jesúza' len ben' bisheeka' gana' zoe', na' bi gok ibig'gake' kwite'na' daa lle' ben' zan. 20 Na' wbig' to ben' golle' Jesúza':

—Xnoona' len ben' bishooka' lle'gake' lesh' chyoonā' na' cheengakile' wshaljlengake' li'.

21 Na' goll Jesúza':

—Ben'ka' chzenaggake' cho'a xtill' Chioza' na' chongake' ka nan, legaken' nakgake' xna' na' ben' bishaa.

Jesúza' bkweze' to be' wal lo nido'na'

(Mt. 8:23-27; Mr. 4:35-41)

22 To lla wyoo Jesúza' to loo barkw len ben'ka' nakgake'ne' txen na' golle' legake':

—Techo shlaalə nido'ni.

Na'ch wza'gake'. 23 Na' shlak ngoo barkwa' nez, wtes Jesúza'. Na'ch wze to be' wal lo nido'na' na' wzolo chas chat' nisa' na' biyollan loo barkwa', na' zi lat'zə nan kwe'n yel.

24 Na' jasangake' Jesúza', che'gake'ne':

—¡Maestro! ¡Maestro! ¡Ba chbe'cho yel!

Na' wyas Jesúza' na' bsheshlene' be'na' len nido'na'. Na' wlezkakan, bich bi gok.

25 Na'ch golle' legake':

—¿Abi chonlilall'kzle nad'?

Na' legake' le chllebgake' na' le chibangakile' na' che' ljwellgake':

—¿Nora beeni lla?, axt be'na' na' nido'na' chzenaggakan che'.

Bibej Jesúza' dii xiwaa yoo to ben' Gadara

(Mt. 8:28-34; Mr. 5:1-20)

26 Na'ch bllingake' yell-lío che ben' Gadáraka', daa llia shlaa nido'na' ndil yell-lío che Galileana'. 27 Ka bichej Jesúza' loo barkwa' jabig' to ben' Gadara kwite'na'. Ba wlla yo'e dii xiw'ka', na' bich bi xalaane' nakw, ni bich zoe' lille', san kapsanta' noni lille'. 28 Na' ka ble'ile' Jesúza', besyee na' jachek' xibe' lawe'na', na' zillj inlleb chi'e:

—Jwayiz nad', Jesús Xiin Chios, ben' nak liizelozi ben' choo ben' xen. Ben goklen bi wsak'zi'o nad'.

29 Gollan ka' daa ba chon Jesúza' byen yichejan. Ba wlla chnabi'an le' na' la'kzi chchejgake' ni'a neena' gdenna', lobe' chchogue'n. Na' dii xiwaa chtadon le' na' chjsoe' ga kono ben' lle'. 30 Na' che' Jesúza':

—¿Bin lio'?

Na' chi'e:

—Legiōnan lia'.

Golle' ka', la' zanannan' yo'e. 31 Na' got'yogakin Jesúza' bi wseleegakan gana' kwiayi'gakan. 32 Na' gaozə zoa to yaa gana' lle' kush zan chaogakb. Na' dii xiw'ka'

wzeyidgakan wnabgakin Jesúza' wi'e latj yiyoogakan kushka', na' bi'e latj. ³³ Na'ch bichej dii xiw'ka' yoo beena' na' biyoogakan kushka'. Na' lii goklleshtegakib na' jabixgakb to cho'a bdiñj na' jshoogakb loo nisa' na' witgakb.

³⁴ Na' beñ'ka' chap kushka' ka ble'gakile' daa gok, biyajdogake' jazengakile'n beñ'ka' lle' yella' na' beñ'ka' lle' lyixaa. ³⁵ Na'ch bllesh beñ'ka' jawiagake' daa gok. Na' ka bllingake' kwit Jesúza', na' chi' beena' wyoo dii xiw'ka' kwite'na'. Ba biyakw xalaane'na' na' ba biyeen biyeeniile'. Na' bllebgake'. ³⁶ Na' beñ'ka' ble'gakile' daa gok, gollgake' beñ'ka' zi' bllin nakan gok biyaki beena' wyoo dii xiw'ka'. ³⁷ Na' yog'lol beñ' Gadáraka' got'yogakile' Jesúza' yizee lalle'ka' daa le chllebgake' ka bene'. Na' biyo'e loo barkwa' ziyaje'. ³⁸ Na' beena' bichej dii xiw'ka' got'yoile' Jesúza' wi'e latj shajlene'ne'. Per Jesúza' chi'ene':

³⁹ —Biyaj lillo'na' na' jaye' dill' ka nak dii wen dii shawaa daa ba ben Chioza' cho'.

Na'ch biyaj beena' jayee dill' doxen yella' ka nak dii wen dii shawaa daa ben Jesúza' che'.

Biyon Jesúza' noola' bexee xe'na' na' lekzka' xiin Jairona'

(Mt. 9:18-26; Mr. 5:21-43)

⁴⁰ Ka billin Jesúza' shlaa nisdo'na', le chiba chizaki beñ'ka' lle' na', la' yog'zgake'n chbezgake' le'. ⁴¹ Na'ch bllin to beñ' le Jairo, nake' to beñ'ka' chgoo xnezi cheyi diika' chon beñ' Israelka' gana' chdop chllaggake' chole'willgake' Chioza'. Na' bchek' xibe'na' lao Jesúza' na' got'yoile'ne' shaje' lille'na', ⁴² daa ba chakshwet bi' nool che'na'. Nakb' to bi' tlish' tyaj, na' ka do shllin yizib'. Na' shlak zej Jesúza' beñ' zan janogake'ne' axt bdakwyillgake'ne'.

⁴³ Na' ladj beñ'ka' zjano Jesúza' len to noolə ba gok shllin yiz chzoe' wbaana'. Na' ba blliyee yog' dii de che' daa chajtezi chaje' lao beñ' wen rmechka', na' ni to kono gok yiyon le'. ⁴⁴ Na'ch wbiguee koll' Jesúza' bexee xe'na', na' katena' lii biyakteile'.

⁴⁵ Na'ch goll Jesúza' beñ'ka' zjano le':

—¿No beena' ba beñ' nad'?

Na' ni to kono bcheb. Na'ch goll Pédrone'ne':

—Maestro, beñ'kin chdakwyillgake' li' na' chllig'gake' li' to ki to ka'lə. ¿Biche nazo': "Non ba beñ' nad'?"

⁴⁶ Na' che' Jesúza' legake':

—Nochodan' ba beñ' nad', la' gokbe'teid' bchej ye'l' wak cha'na'.

⁴⁷ Na' noola', ka gokbe'ile' aga wak wkwashée, do chllebbe' jachek' xibe'na' lao Jesúza'. Na' lao yog'lol beñ'ka' lle' na', golle' biche beñ'ze' xe'na' na' daa beñeen lii biyakteile'.

⁴⁸ Na'ch goll Jesúza'ne':

—Xiin', daa chonlilalloo nadaan biyakilo'. Biyaj mbalaz.

⁴⁹ Ni choe'telə Jesúza' dill' ka bllin to beñ' wzee lill Jairona', na' jelle'ne':

—Ba wit bi' cho'na'. Bich gonilo' Maestroni zed.

⁵⁰ Na' ka beni Jesúza', na' golle' Jairona':

—Bi illebo'. Wyajle' cha', na' wiyakkzi bi' cho'na'.

⁵¹ Na' ka bllingake' lille'na', aga be' Jesúza' latj sho' beñ' yoblə, lete Pédrone', Jacóbona', Juanna' na' xaxna' bi' weta'zə. ⁵² Yog'lol beñ'ka' lle' lill Jairona' chbellgake' daa ba wit bi'do'na'. Na' goll Jesúza' legake':

—Bi kwell-le, aga witbaan, cheszbaan.

⁵³ Na' bxill-ləgake' che', la' nezgakile' ba witbaan. ⁵⁴ Na'ch beñ' Jesúza' na' bi' wetdo'na' na' wnie' zilljə, chi'e':

—Biyas, bi'do'.

⁵⁵ Na'ch bibam' na' lii biyasteb'. Na' goll Jesúza' legake' we'gake' dii gaob'. ⁵⁶ Na' xaxna'baa le bibangakile', na' che' Jesúza' legake' ni to kono ye'gake' daa gok.

9

Ben'ka' shllin jtixje'gake' cho'a xtil' Chioza'
(Mt. 10:5-15; Mr. 6:7-13)

¹ Na' bitop Jesúza' ben'ka' shllin, na' bi'e legake' yel' wak na' yel' wñabia' kwenche yibejgake' yog'lol dii xiw'ka' yoo ben' na' yiyongake' ben' che'i yillwe'. ² Na' bselee legake' kwenche lje'gake' dill' ka nak yel' wñabia' che Chioza', na' yiyongake' ben'ka' bi shao'. ³ Na' chi'e legake':

—To ka chazlen li shaj. Bi gox'le yag bar, bi wa'zle yixj ga koo xshinlazle, bi wa'le dii gaole, ni mech, na' ni zi shkwe' xale. ⁴ Na' yooná' gana' illinle, na'tezə soale ax̄t ka illinch la yiza'le. ⁵ Na' yella' gana' bi wlebgake' le', kat' yiza'le, yishible bishtena' lliá n̄i'aleka' kwenche gakbe'gakile' aga wenan chongake' bi chlebgake' cho'a xtil' Chioza'.

⁶ Na'ch wza' ben'ka' nakgake'ne' txen na' wyajgake' to to yell wdixje'gake' dill' wen dill' kob che Chioza' na' biyongake' ben'ka' bi shao'.

Wit Juanna', beena' bchoa ben' nisa'
(Mt. 14:1-12; Mr. 6:14-29)

⁷ Heródeza', beena' wñabia' gana' mbani Galileana', benile' yog' daa chon Jesúza'. Na' chakile' nora beena', la' bal ben' nagake' dii Juan wichoá nisan' ba bibane' dii yoblə. ⁸ Na' zi bale' nagake' Elíazan' ba bila' dii yoblə. Na' zi bale' nagake' nochod' dii ben'ka' wdixjee daa goll Chioza' legake' kani'yin ba biban ladj ben' wetka'. ⁹ Na' Heródeza' wne':

—Nad' ben' mandad wchog yen dii Juanna'. ¿Noraz beena' chenzid' nagake' chiya dii chone', lla?

Na' le goklall' Heródeza' ile'ile' Jesúza'.

Jesúza' bwawe' gayaa mil ben'
(Mt. 14:13-21; Mr. 6:30-44; Jn. 6:1-14)

¹⁰ Na' ka billin postilka' shllin, na' gollgake' Jesúza' yog'lol diika' jengake'. Na'ch bchi'e to lezgake' yella' le Betsaida. ¹¹ Na' ka wnezi ben'ka' ba zej Jesúza', na'ch wloogake' nez zjanogake'ne' na' ka bllingake' lawe'na', blebe' legake' na' bzajniile' legake' ka nak yel' wñabia' che Chioza', na' biyone' ben'ka' bi shao'.

¹² Na' ka ba wille', ben'ka' shllin jabig'gake' kwit Jesúza' na' gollgake'ne':

—Goll ben'ki yiyajgake' yellka' wa no ranshdo'ka' lliá gaozə ljadiljgake' dii gaogake' na' ga guesgake', la' ga ni zoacho bikzə bi de.

¹³ Na' che' Jesúza' legake':

—Len', li we' dii gaogake'.

Na'ch che'gake'ne':

—Gay'lish'tgui yetxtilki napcho na' zi chopchga bel, lechozə shi willjxi'chnto' che yoguee.

¹⁴ Gollgake'ne' ka' la' ka do gayaa mil ben' byoka' lle' na'. Na'ch che' Jesúza' ben'ka' shllin:

—Li ye'gake' kwe' shiyon wejgake'.

¹⁵ Na' bzoagake' xtillee na' wlekgake' ben'ka'. ¹⁶ Na'ch bex' Jesúza' yetxtilka' gay' na' belka' chop. Na' blis jalawe'na' yabana' bi'e Chioza' yel' choxken, na' bxoxje'n na' bi'en ben'ka' nakgake'ne' txen na'ch be'gake' che che ben'ka'. ¹⁷ Na' yog'gake' wdao ka beljakile', na' diika' bichoonan bitopgake'n biyakten shllin xet'.

Pédrona' bi'e dill' nan Jesúza'n beena' wlej Chioza' inabi'e
(Mt. 16:13-19; Mr. 8:27-29)

¹⁸ To shii ka choe'llwill Jesúza' Chioza', na' lle' ben'ka' nakgake'ne' txen, na' wñabile' legake':

—¿Non na ben'ka' nak'?

¹⁹ Na' che'gake'ne':

—Ba_{le}' nagake' nako' dii Juan wichoa nisa', na' zi ba_{le}' nagake' nako' Elíaza', na' zi ba_{le}' nagake' nako' to be_n' wdix_jee daa goll Chioza'ne' kani'yi, na' ba bibane' ladj be_n' wetka'.

²⁰ Na'ch chi'e legake':

—Shera le', ¿nora nale nak'?

Na'ch che' Pédrona'ne':

—Lin' Crístona', beena' n_{cheb} Chioza' wse_{lee}.

²¹ Na'ch goll Jesúza' legake' ni to kono ye'gake' ka'.

Goll Jesúza' postl che'ka' wit be_n' le'

(Mt. 16:20-28; Mr. 8:30-9:1)

²² Na' chi'e legake':

—Kon ka nchogbia' cha', nad', Be_n' Bse_l' Chioza' Yell-lioni, biya dii w_{chi}' wsak'gake' nad'. Na' be_n' golka' ch_nabia' wzoagake' nad' ka'lə na' ka'kzə b_xozka' ch_nabia' na' be_n'ka' chli' chsedi leya'. Na' chonan byen witgake' nad', na' ka gag sho_n lla yiban' ladj be_n' wetka'.

²³ Na'ch golle' yog'l_{ole}':

—Shi no cheeni gon nad' txen, chiyal' wsanlall' kwine' na' izanile' yel' mban che'na' yen ile'ile' bittez ni cha', na' gone' ka chazlallaa. ²⁴ La' beena' bi chzani yel' mban che'na' yen ile'ile' bittez ni cha', beenan' kwiayi'. San beena' chzani yel' mban che'na' ni cha', beenan' gat' to yel' mban che' zejli kani. ²⁵ Bibi zjanayin gap be_n' yog'l_{ol} daa de yell-lioni, shi le' kwiayee. ²⁶ Nottezə be_n' chiyi chido'i nad' na' che cho'a xtilaana', ka'kz nad', Be_n' Bse_l' Chioza' Yell-lioni, yiyi yido'id' le' kat' yiyed' kon balaan xen cha'na', na' che Xa' Chioza' na' che anjl che'ka'. ²⁷ Na' dii li nia' le', ba_l-le lle'le ni, ni mbanle kat' wli' Chioza' yel' w_nabia' che'na'.

Jesúza' biyake' nlla'lə

(Mt. 17:1-8; Mr. 9:2-8)

²⁸ Ka gok do to xman wna Jesúza' ka', na'ch wyaje' to lo yaa kwenche jelwille' Chioza' na' b_{chi}'e Pédrona', Juanna' na' Jacóbona'. ²⁹ Na' shlak choe'lwille' Chioza', biyak cho'alawe'na' nlla'lə, na' biyak xe'na' xtil axt chey cheeni'n. ³⁰ Na' gokxe chop be_n' bshaljlengake'ne', toe' dii Moiséza' na' beena' sto Elíaza'. ³¹ Na' yel' chey cheeni'na' nechjan legake'. Na' chshaljlengake'ne' che ka nak yel' wita' ile'ile' Jerusalénna'. ³² Na' Pédrona' len Juanna' na' Jacóbona' le chakxwesgake', per bendiplall'gake' bi wtesgake', na'ch ble'gakile' yel' chey cheeni' che Jesúza' na' che be_n'ka' zi chop bllin kwite'na'. ³³ Na' ka ba chikwas dii Moiséza' na' Elíaza' kwit Jesúza', Pédrona' golle' Jesúza':

—Maestro, je wen zoacho nizə! Gonnto' sho_{nə} ransh, to cho', to che dii Moiséza' na' sto che Elíaza'.

Na' ni bi gokbe'i Pédrona' bin golle'. ³⁴ Na' ni choe'tie' dill', ka wze to bej gana' lle'gake' na' bkwashaan legake'. Na' le b_llebgake' ka gokbe'gakile' ba yoogake' loo beja'. ³⁵ Na' loo beja' bengakile' shii Chioza', chi'e legake':

—Beenin xiinaa, na' le chakidee. Li wzenag che'.

³⁶ Na' ka wde goll Chioza' legake' ka', na' ble'gakile' stozə Jesúza' ze. Na' ni to kono gollgake' daa ben ble'gakile'.

Biyon Jesúza' to bi' wew'yoo dii xiwaa

(Mt. 17:14-21; Mr. 9:14-29)

³⁷ Betyo, ka biyetjgake' lo yaana', be_n' zan wal jatilgake' legake'. ³⁸ Na'ch ladj be_n'ka' wne to be_n' byo zillj, chi'e Jesúza':

—Maestro, ben goklen bwiagach bi' cha'ni, la' tlish' tyajchgabaan zoa. ³⁹ Dii xiwaa choxa'n leb' na' tokonganz chosyaab', na' chonan ka chazb' sho_n axt chbia bllin' cho'abaa. Na' chiya dii chonin leb', na' aga cheenin wसान leb'. ⁴⁰ Ba got'yoid' be_n'ki nakgake' li' txen yibejgachgake' dii xiwaa yoob', na' bi gokgake' yibejgake'n.

⁴¹ Na'ch che' Jesúza':

—¿Zi'tegalə chelena', le' beṇ' mal na' beṇ' bi chajle!' ¿Zi ka'k'tek chiyaḷ' soalen' le'? Na' ¿zi ka'k'tek chiyaḷ' soid' le'? Da diwa' bi' cho'na' ni.

⁴² Na' ka zej bi'na' kwit Jesúza' na' wchoon dii xiwaa leb' lo yona' na' wyazb' shoṇa' sto shii. Na'ch bsheshlen Jesúza' dii xiwaa na' bichejan, na' biyakib'. Na' biyone'b' lall' na' xabaa. ⁴³ Na' yog' beṇ'ka' lle' na' bibangakile' daa ble'gakile' yel' wak xen che Chioza'.

Sto shii wdixjee Jesúza' witgake'ne'

(Mt. 17:22-23; Mr. 9:30-32)

Na' shlak chibani yog' beṇ'ka' ble'i daa ben Jesúza', na' golle' beṇ'ka' nakgake'ne' txen:

⁴⁴ —Li wzeyen' nagle dga inia' le': gongake' nad', Beṇ' Bsel' Chioza' Yell-lioni, lall' na' beṇ'ka' chakzi' chakzbani nad'.

⁴⁵ Na' bi wyajni'gakile' bin golle', la' ni ngashaan lawe'ka' kwenche bi shajni'gakile'n. Na' bllebgake' inabgakile'ne' bi zej in daa golle' legake'.

¿Noran zak'chi?

(Mt. 18:1-5; Mr. 9:33-37)

⁴⁶ Na' wzolo chakdil'-len ljwellgake' nogaken' nak beṇ' zak'chi. ⁴⁷ Ka gokbe'i Jesúza' daa chza'lall'gake', na'ch wdoyoe' to bi'do' na' bzie'b' kwite'na'. ⁴⁸ Na' chi'e legake':

—Nottezə beṇ' wlebe' laa to bi'do'zə ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'. Na' beena' chaki bibi zakee lao yog'le, len' nake' beṇ' zak'chi ladjlena'.

Beena' bi chakile' cho' zi', txenkzan nake' cho'

(Mr. 9:38-40)

⁴⁹ Na'ch goll Juanna'ne':

—Maestro, ba ble'into' to beṇ' chzetje' lio'na' kwenche chibeje' dii xiw'ka' yoo beṇ'. Na' blonnto' gone' ka', la' bi nake' cho' txen.

⁵⁰ Na' che' Jesúza' legake':

—Bi wllonle gone' ka', la' beena' bi chakile' cho' zi', txenkzan nake' cho'.

Jesúza' bsheshlene' Jacóbona' len Juanna'

⁵¹ Na' ka ba zoa yiyaj Jesúza' yabana', na'ch btoblallee yiyaje' Jerusalénna'. ⁵² Na' bselee beṇ' wllialozegagake' na' wyajgake' to yell daa mbani Samáriana' jtiljgake' gana' yigaane'. ⁵³ Na' beṇ' Samáriaka' bi blebgake'ne' daa nezgakile' Jerusalénna'lan yiyaje'. ⁵⁴ Na' chop beṇ'ka' nakgake'ne' txen, Jacóbona' len Juanna', ka ble'gakile' ka ben beṇ' Samáriaka', na' che'gake' Jesúza':

—Xan', ¿acheenilo' inabinto' Chioza' wselee yi'na' kwenche sheytega beṇ'ki?

⁵⁵ Na' biyechj Jesúza' bsheshlene' legake', chi'e:

—Aga nezile non chṇabia' yichjlall'do'lana' nazle ka'. ⁵⁶ Nad', Beṇ' Bsel' Chioza' Yell-lioni, aga zaa kwenche wlliyaa yel' mban che beṇ', san zaa kwenche yisla' yel' mban che'kan'.

Na'ch biyajgake' yell yoblə.

Beṇ'ka' goklall' ljano Jesúza'

(Mt. 8:19-22)

⁵⁷ Na' ka zejgake' tneza', to beṇ' chi'e Jesúza':

—Xan', cheenid' sa'len' li' gattezə shajo'.

⁵⁸ Na' che' Jesúza'ne':

—Zoa yech ga chiyo bez'ka', na' byindo'ka' non lilldo'gakb, san nad', Beṇ' Bsel' Chioza' Yell-lioni, biga de yigaan'.

⁵⁹ Na'ch che' Jesúza' sto beṇ':

—Da dino nad'.

Na' beena' chi'ene':

—Xan', ben goklen be' latj zigaate lljakwashaa xa'na'.

⁶⁰ Na'ch che' Jesúza'ne':

—Bibi gakilo', wikwash'kzə ljwell beŋ' wetka'. San li', jtixje'i beŋ' ka nak yel' wŋabia' che Chioza'.

⁶¹ Na'ch sto beŋ' yoblə chizi'e Jesúza':

—Xan', cheenid' sa'len' li' per zigaate be' latj lljalaaach' dill' bish' ljwell'ka'.

⁶² Na' che' Jesúza'ne':

—To beŋ' chwaane' goon, aga wak wwie' gozkoll'lə. Na' ka'kzan nakan che beena' noe' nad', shi bi nchoglallee aga wak gone' ka cheeni Chioza'.

10

Jesúza' bselee guiyon shlin beŋ' jtixje'gake' cho'a xtilleena'

¹ Na' ka wde dga, Jesúza' wleje' zi guiyon shi beŋ'* na' bselee chop weje' wllialogake' lawe'na' kwenche llje'gake' cho'a xtilleena' yellka' gana' lia bia' shaje'. ² Na' golle' legake':

—Dii li nia' le', dii xen wal daa yizi' yilaple de, na' to choptgui wen llinka' zoa. Na' li inabi Chioza', beena' nak xan llinna' wsel'stoe' wen llinka' kwenche yizi' yilapgake'n. ³ Li shajshki naa, nad' chselaa le' ka xil'do' ba zej ladj ba zŋia. ⁴ Bi wa'le ga koo xshinlazle, ni mech, ni zi shkwe' xel-le; na' bi shazile wwaple beŋ' chiox tneza'. ⁵ Na' ka sho'le to lill beŋ', zigaate wwaplene' chiox, ye'lene': “Soashgale mbalaz, le' zoale yooni.” ⁶ Na' shi zoa beŋ' cheenile' soe' mbalaz, na' yel' mbalaza' yigaanlenan le'. Na' shi bi cheenile', na' yibiilenan le'. ⁷ Na' yoonā' gana' illinle na'tezə yigaanle na' yeej gaole kon bi gongake' le', la' to wen llin chiyal' ikaa laxje'. Na' bi lljsoale to to yoo. ⁸ Kat' illinle to yell ga wlebgake' le', yeej gaotezle bittezə dii gongake' le'. ⁹ Na' yiyonle beŋ'ka' bi shao' yella', na' ye'le legake': “Yel' wŋabia' che Chioza' ba bla'n laoleni.” ¹⁰ Na' shi illinle to yell ga bi wlebgake' le', li yide lyell, li ye'gake': ¹¹ “Axt bishte che yell cheleni wllia ni'anto'ni chibibnto'n kwenche gakbe'ile aga wenan chonle bi chleble cho'a xtil' Chioza'. Na' li koosha yichjle dga inanto' le', yel' wŋabia' che Chioza'n ba bla'n laoleni.” ¹² Na' nia' le', beŋ'ka' lle' yellka' gana' bi wlebgake' le', dii xench nak yel' zak'zi'na' ile'gakile' aga ka beŋ' yell Sodómaka' llana' wchoglo Chioza' che beŋ'.

Ben'ka' bi bzenag xtil' Jesúza'

(Mt. 11:20-24)

¹³ 'iNyesh'laz gak chele, le' beŋ' yell Corazín na' le' beŋ' yell Betsaida! La' shel' gok yel' wakka' yell Tírona' na' Sidónna' ka diika' ba gok ladjlena', kana'telja biyaj bilengakile' saaxya che'ka', na' ba wche'gake' bwazjgake' dena' yichjlaogake' na' gokwgake' lech' zeshaa, kwenche wli'gake' nan ba biyaj bilengakile' daa chongake', shel'ka'. ¹⁴ Kat' illin lla wchoglo Chioza' che beŋ', yel' zi' xench ile'ile aga ka beŋ' yell Tíroka' na' beŋ' yell Sidonka'. ¹⁵ Na' le' beŋ' yell Capernaúm, bi gonle lez yillinle yabana', la' Chioza' wzalee le' gana' sak'zi'le.

¹⁶ Na'ch che' Jesúza' beŋ'ka' bselee:

—Beŋ'ka' chzenaggake' chele, cha'kzan chzenaggake'. Na' beŋ'ka' bi chlebgake' le', nad'kzan bi chlebgake'. Na' beena' bi chlebe' nad', lekzka' bi chlebe' Chioza', beena' bsel' nad'.

Billin beŋ'ka' guiyon shi

¹⁷ Na' beŋ'ka' guiyon shi† le chibagakile' ka billingake' kwit Jesúza', na' che'gake'ne':

—Xan', ax̄t dii xiw'ka' chilleshgakan ka chzetjnto' lio'na'.

¹⁸ Na'ch che' Jesúza' legake':

—Ble'id' Satanáza' daa chŋabia' dii xiw'ka' bxopan yabana' ka chxop to yi' wziw'.

¹⁹ Nad' ba beŋ' le' yel' waka' kwenche la'kzi gad' no bel zŋia wa no bexjoni' le' aga bi

* 10:1 † 10:17

gakile', na' wlej wshoshjtele yog' daa chon dii xiwaa. ²⁰ Per bi yibaile daa chisheshle dii xiw'ka', san li yibayi daa ba da' lлена' lee libra' de yabana'.

Jesúza' bibaile'

(Mt. 11:25-27; 13:16-17)

²¹ Na' katena' Espíritu Sántona' bene' ka bibachgayi Jesúza', na' wne':

— Xa, li' nako' Xan yabana' na' yell-lioni, na' choe'lawaa li' daa ba bliilo' ben'ka' bibi chajni' daa bi bliilo' ben' sin'ka' na' ben'ka' nteyi. Kan' ba wyazlaloo gono', Xa.

²² 'Xa'na' ba none' lall' na' yog'te dii de. Na' ni to kono nezi noyen'an' nak' nad' Xiine'; toz Xa'na' nezile'n. Na' ni to kono nezi noyen'an' nak' Xa'na'; toz nad' Xiine' nezid', na' chon' ka inezi ben'ka' cheenid' inezgakile'n.

²³ Na'ch biyechje' bwie' ben'ka' nakgake'ne' txen, chi'e legake':

—Chakomba ben'ka' chle'gakile' diika' chle'ile naa. ²⁴ Nia' le' ka', la' zan ben'ka' wdixjee daa goll Chioza' legake' na' zan ben' wñabia'ka' goklall'gake' ile'gakile' diiki chle'ile naa, na' bi ble'gakile'n. Goklall'gake' yengakile' dga chenile naa, na' bi bengakile'n.

To ben' Samaria bene' to dii wen

²⁵ Na'ch wbig' to ben' chli' chsedi leya' wñabile' Jesúza' kwenchezə inezile' shi wak yillii Jesúza' xtilleena', na' wñabile'ne':

—Maestro, ¿bin chiya' gon' kwenche gat' to yel' mban cha' zejli kani?

²⁶ Na'ch che' Jesúza'ne':

—¿Bin na leya' chiya' goncho? ¿Bi na daa chlabo'?

²⁷ Na'ch beena' chli' chsedi leya' chi'e:

—“Chiya' gakicho Xancho Chioza' do yichj do lall'cho, do ka nak fuerz chechona', na' axt ga zeelo chajniicho; na' gaki bish' ljwellcho ka chaki kwincho.”

²⁸ Na'ch che' Jesúza'ne':

—Kayen'nan nakan ka ba wno'. Shi gono' ka nan, na' gat' to yel' mban cho' zejli kani.

²⁹ Na' beena' bi goklall' wñit kwine', na'ch chi'ene':

—¿Noran bish' ljwell'?

³⁰ Na'ch che' Jesúza'ne':

—To ben' ziyo'e nez daa ziza' Jerusalénna' daa ziyaj Jericólə, na' bchej wbanka' tneza' wlangake' yog'te diika' zino'e axt len xe'na' daa nakwe' goljgake', na' bet wdingake'ne', sto chdoaze' bengake', na' bixonjgake'. ³¹ Na' shintk gok ka' ka wde to bxo'z lo neza'. Na' ka ble'ile' beena' de na', to wdeze' ka'lə. ³² Na' lekzka' wde to ben' nake' xiin dia che dii Levína'. Na' ka ble'ile' chto' beena' na', lekzka' to wdeze' ka'lə. ³³ Na' sto ben' Samaria lekzka' zeje' tneza' ka ble'ile' beena' chto' na', na' biyeshile'ne'. ³⁴ Na' jabigüee kwite'na', na'ch bllie' lo we'na' set na'ch vino, na' bcheje'n. Na' bilepe'ne' koll' bayix' che'na', bichi'ene' to yoo gana' wdape'ne'. ³⁵ Na' betiyo, ka ba zoa yiza' ben' Samáriana', wleje' chop mech plat†, na' bi'en xan yoona' kwenche gap wwie'ne' zan lla, na' chi'ene': “Wdap bwiagach beeni, na' shi bi gaki mechi chkwaan', na' yiyixja'n kat' zizaa dii yoblə.”

³⁶ Na' ¿nora ben'ki shon' chakilo' beni bish' ljwell beena' wlan ben' wbanka'?

³⁷ Na' beena' chli' chsedi leya' chi'ene':

—Beena' biyeshile'ne'.

Na' che' Jesúza'ne':

—Lekzka' li', kan' chiya' gon'.

Jesúza' jawie' Mártana' na' Maríana'

³⁸ Na' shlak ngoo Jesúza' nez, blline' to yelldo' na' to noolə le Marta blebe'ne' lille'na'.

³⁹ Na' zoa to ben' bil Mártana' lie' María, na' Maríana' wchi'e lao Jesúza' chzenague' dillaa

† 10:35 Mech plat: dill' griegona' nan denario, na' nakan to mech dii zak' che shlla llin.

cho'e. ⁴⁰ Na' Mártana', dechga daa gone' na' wzeche' wneyi cheyin, na'ch wyaje' kwit Jesúza', chi'ene':

—Xan', goll-lat' ben' bila'ni gaklene' nad'. Toz' ndakw' yog' mandadka'.

⁴¹ Na' che' Jesúza'ne':

—Marta, Marta, chi'chga yichjo' na' zechgo' wneyi cheyi diika' gono'. ⁴² Per toz daa de nakan dii lialoch na' Maríani ba wleje'n, na' kono gak yikaan lawe'na'.

11

Bli' Jesúza' nak we'lwillgake' Chioza'

(Mt. 6:9-15; 7:7-11)

¹ Shlin choe'lwill Jesúza' Chioza' to latj, na' ka biyoll be'lwille'ne', to beena' nake'ne' txen golle'ne':

—Xan', bli'yi neto' nakan chiyal' we'lwillnto' Chioza', ka ben Juanna' bli' bsedile' ben'ka' bengake'ne' txen.

² Na'ch che' Jesúza' legake':

—Kat' we'lwill-le Chioza' kin inale:

Xanto' Chios, ben' zoa yaba,
we'la'oshga yog'lol ben' li'.

Na' inabia'gacho' loo yichjlall'do' yog'lol ben'

kwenche gak lo yell-lioni ka chazlalloo, kon ka chak yabana'.

³ Ka nak daa choño' cheej chaonto' yog' lla, bengachan naanlla.

⁴ Wxi'xen chento', ka chon neto' chzi'xennto' bittezə dii choni ben' neto'.

Bi we'gacho' latj ibixnto' gonnto' daa bi nak wen, san bislagach neto' lo ni'a na' dii mala'.

⁵ Na'ch che' Jesúza' legake':

—Inatezcho shi zoa to ben' nllaguile na' do chel shajle lille'na' na' ye'lene': “Ben' bish'dawaa, ben' shloll nad' shon yetxtil, ⁶ la' ba bla' lilla'na' to ben' nllaguid', zee zit', na' bikzə bi de cha' wshabidee.” ⁷ Na'ch beena' yoo loolə lii inatie' le': “Bi gonzilo' nad' zed, ba nsejl' lillii na' ba delen' bi' cha'ki. Aga wak chas' gon' daa chyaljilo'.” ⁸ Na' nia' le', la'kzi nllagteile'ne', bi chase' wi'ene' daa chnabile'ne'. San shi seyide' inabe'n, chen ki cheenile' chase' wi'e yog' daa chyaljile. ⁹ Daan nia' le': Li inabi Chioza' bin cheenile na' gone'n. Li yiyiljan na' willelkzilen. Li wtankw lee puerta', na' wsaljkze'n. ¹⁰ La' beena' chnabile' to bi chnabile' ben', cho'ene'n; na' beena' chiyilje' bi chiyilje', chillelkzile'n; na' beena' chtankwe' to lee puert, na' chsaljkzgake'n.

¹¹ Ka chak chele le' nakle ben' chisgol chischoo bi'do', ka inabi xiinlena' le' yetxtila', aga we'leb' to yaj. Wa shi inabib' le' to bel gaob', aga we'leb' to bel znia. ¹² Wa shi inabib' le' to llit gaob', aga we'leb' to bexjoni'. ¹³ Le' naktele ben' mal, chak we'le xiinleka' daa nak dii wen. ¡Na' Xacho Chioza' zoa yabana' nakteche' ben' wench! Na' wi'e Espiritu Santo che'na' soe' loo yichjlall'do' yog' ben' inabe'ne'.

Nagake' Jesúza' chibeje' dii xiw'ka' kon yel' wak che Bezlona'

(Mt. 12:22-30; Mr. 3:19-27)

¹⁴ Jesúza' chibeje' to dii xiw' yoo to ben' bi chak inie', na' ka bichejan na'ch gok binie'. Na' ben'ka' lle' na', bibangakile' daa bene'. ¹⁵ Na' bale' che'gake':

—Kon yel' wak che Bezlona', daa chnabia' dii xiw'kan', chibeji beeni dii xiw'ka'.

¹⁶ Na' zi bale' wñabgakile'ne' gone' to yel' wak dii ile'gakile' kwenche wli'n shi Chioza'kzan bseleene'. ¹⁷ Na' ba nezli Jesúza' daa chza'lall'gake', na'ch chi'e legake':

—Shi ben'ka' lle' to yell gakgake' choplə na' til-len ljwellgake', na' kwiayi' yella', shi naa. Na' lekzka' shi ben'ka' lle' toz yoo til-len ljwellgake', aga ssha soagake' toz. ¹⁸ Na' ka'kzə Satanáza' na' dii xiw'ka' yoo lo na'yin, shi gakgakan choplə na' kwiayi' yel' wñabia'

cheyinna'. Nia' le' ka' daa nale yel' wak che Bezlonan* chibejid' dii xiw'ka' yoo ben'.
 19 Shi chibej' dii xiwaa yoo ben' kon yel' wak che Bezlona',† ¿sheralə ben'ka' nakle txen?
 ¿Alezkza' lennan' chibejlengake' dii xiwaa yoo ben'? Daa bi nakan ka', chli'n nakllejilen.
 20 Na' daa chibej' dii xiwaa yoo ben' kon yel' wak che Chioza', lennan' chli'n ba bla' yel'
 wñabia' che Chioza' ladjleni.

21 'Kat' to ben' wal nape' dii gonile' zn̄ia na' chape' lille'na', aga no gak lljtoyo dii de che'.
 22 Per shi illin sto ben' walch til-lene'ne', na' gone'ne' gan, na'ch yigoyoe' yog' daa none'
 lez wñiaile', na' kwantie' yog' daa yoo loo lille'na' na' wi'e lat' wej che ben'ka' nakgake'ne'
 txen.

23 Beena' bi nake' nad' txen, chakzbanile' nad'. Na' beena' bi chaklen kwenche wzenag
 ben' cho'a xtil' Chioza', len' chsej chllone' wzenaggake'n.

Chillin dii xiwaa sto shii gana' bichejan

(Mt. 12:43-45)

24 'Kat' chichej to dii xiw' dii yoo ben', na' chjadan ga bibi dekzə na' chyiljan gana'
 yizi'lalliin. Na' shi bi chllelin gana' yizi'lalliin na'ch chakin: "Yiyaachkz' dii yoblə gana'
 bichejkz'." 25 Na' ka chillinan gana' bichejan, nakan ka to loo yoo dii nxi nloa na' nakan
 xochi. 26 Na'ch chza'n chjxi'n zi gall dii xiw'ka' daa nakch dii malch aga ka len, na' yogaan
 choogakan beena'. Na' chaktechlə mal che beena' aga ka gok che' dii nech.

Chakomba beena' chzenag cho'a xtil' Chioza'

27 Na' shlak che' Jesúza' ka', to noolə zie' ladj ben'ka' lle' na' wñie' zilljə, chi'e:
 —¡Chakomba noola' wxane' li' na' bwall b̄xope' li'!

28 Na' che' Jesúza'ne':

—¡Mbalazch ben'ka' chzenaggake' cho'a xtil' Chioza' na' chongake' ka nan!

Ben'ka' bi chajle' che Jesúza' wñabgake' wli'e to yel' wak

(Mt. 12:38-42; Mr. 8:12)

29 Na' bdi'a bllagch ben'ka' kwit Jesúza' na' golle' legake':

—Le' zoale naa, nxiñj yichjlall'do'leka'. Chñable wliid' le' to yel' wak, na' aga wliid'
 le' daa cheenile. Lete ile'ile to dii nak ka yel' waka' daa ben Chioza' che dii Jonáza'.
 30 Daa gok che Jonáza' bli'n yel' wak che Chioza' lao ben' Níniveka'. Kakzə nad', Ben' Bsel'
 Chioza' Yell-lioni, wli'a yel' wak che Chioza' laolena', le' zoale naa. 31 Na' llana' wchoglo
 Chioza' che ben', na' yiban noola' wñabia' do lli'lə, na' gawe' xya chele lao Chioza', le'
 zoale naa, in̄e' chiya' sak'zi'le. La' noola', zit' wal wzee bidzenague' dill' sin'na' daa be'
 dii Salomónna', na' nad' zoa' ni, nak' ben' zak'chi ka dii Salomónna', na' bi chzenagle cha'.
 32 Na' lekzka' llana' wchoglo Chioza' che ben', na' yiban ben' Níniveka' na' gaogake' xya
 chele lao Chioza', le' zoale naa, in̄agake' chiya' sak'zi'le. La' legake' biyaj bileni saaxya
 che'ka' ka be'len Jonáza' legake' cho'a xtil' Chioza', na' nad' zoa' ni, nak' ben' zak'chi ka
 dii Jonáza', na' bi chzenagle cha'.

Jalaochona' nakan ka to yi' che kwerp chechona'

(Mt. 5:15; 6:22-23)

33 Na' lekzka' chi'e legake':

—Biga zoa ben' chxene' to kandil na' chzoe'n to ga ngash' wa wdoseen to dii wk-
 washaan len, san chzoe'n sibə kwenche ile'i ben'ka' sho' loo yoonā'. 34 Jalawo'ka' nakan
 ka to yi' che kwerp cho'na'. Shi jalawo'na' nakan wen, doxen kwerp cho'na' zoan lo
 beeni'na'. San shi bi chle'i jalawo'na', kwerp cho'na' zoan lo yel cholā'. 35 Na' bsak' wze
 wñeyi kwenche ki lwaa to' lo beeni'na', tazo' lo yel cholā'lə. 36 Shi doxen kwerp cho'na'
 yoon beeni', na' ni to dii shgasj shchol bi yoon, na' ile'ilo' kwaslōl ka chle'ilo' kat' ze to yi'
 chzeeni'n doxen.

* 11:18 Bezlonan': lekzannan' Beelzebú de xtil na' nakan sto le Satanáza'. † 11:19 Bezlona': lekzannan' Beelzebú de xtil na' nakan sto le Satanáza'.

Jesúza' chsheshlene' fariseoka' na' ben'ka' chli' chsedi leya'
(Mt. 23:1-36; Mr. 12:38-40; Lc. 20:45-47)

³⁷ Na' ka biyoll be' Jesúza' dillaa, na' bche' to fariseo le' lljtawe' lille'na'. Na' wyoo Jesúza' lille'na' na' wchi'e cho'a mesa'. ³⁸ Na' farisewa' bibanile' ka ble'ile' bi bina' Jesúza' ka yoologake' chongake' ka zi' gaogake'. ³⁹ Na'ch che' Xancho Jesúza'ne':

—Le' fariseo nakle ka xig' yeen dii nyib xise' tcho'a tlawin na' lo'inna' besjan. Chaki ben' le' ben' wen nakle, len le' chibaile chkaale bi de che ben' na' chibaile chonle bichlā dii mal. ⁴⁰ ¡Le' ben' bi nteyi! ¿Abi chakbe'ile Chioza', beena' ben' kwerp chechoni, lekze'n bene' yichjall'do'choni? ⁴¹ Li izani bi de chele, li we'n ben' bibi de che', na'ch yixi' yiyech yichjall'do'lēna'.

⁴² ¡Nyesh'laz gak chele, le' fariseo! Choe'le Chioza' lat' wej† no yixwej, no kwanirod na' bichlā yix' kwan dii mbekle. Na' bi chonle daa nak shlichā na' bi chakteile' Chioza'. La' daayen'an llialloch gonle per lekzka' bi wsanle kwejle daa chnab Chioza'.

⁴³ ¡Nyesh'laz gak chele, le' fariseo! Le' chibaile kwe'le gana' chbe' ben'ka' zakii gana' chdop chllagcho choe'lwillcho Chioza', na' cheenile yog' ben' kwee le' balaan ga lle' lla' ben'.

⁴⁴ ¡Nyesh'laz gak chele, daa nakle ben' wxiye'! Nakle ka to ba che ben' wet dii bi nla' lawinna' dii bi chle'i ben' na' chaj chdegake' lawinna', ni bi chakbe'gakile' bin naki loolā.

⁴⁵ Na'ch to beena' chli' chsedi leya' golle' Jesúza':

—Maestro, daa no' ka' len neto' chzoazi'yoo.

⁴⁶ Na' goll Jesúza':

—¡Lekzka' nyesh'laz gak chele, le' chli' chsedile leya'! Dii zan dii che'le ben' chiyal' gongake', na' nakan ka to yoa' xen dii chwa'le legake' dii kono soyi, na' le' bikz bi chda na'le kwenche gakenle legake'.

⁴⁷ ¡Nyesh'laz gak chele! Le' chonshao'zle cho'a ba che dii ben'ka' wdixjee daa goll Chioza' legake', ben'ka' bet dii xozxto'leka'. ⁴⁸ Na' daa chonle ka' zejín chonle txen dii xozxto'leka' ka nak daa bengake'. La' legaken' betgake' ben'ka', na' le' chonshao'le cho'a ba che'ka'.

⁴⁹ Na' daan, lo yel' sin' che Chioza' wne': “Wselāa ben' chixjee daa yepēe na' len ben' wi'e cho'a xtillaana', na' bale' witgake' na' zi' bale' biya dii gongakile'ne'.” ⁵⁰ Na' le' zoale naa, lenle ile'ile ka yel' zi'na' ile'i ben'ka' blalj xchen dii ben'ka' wdixjee daa goll Chioza' legake', wzolozan ka wxē wzil yell-lioni. ⁵¹ Le' zoale naa, lenle chidol'le sak'zi'le ni che yel' wit che dii Abela' axt dii Zacaríaza', beena' betgake' cho'a yoodo'na' kwit gana' chzeygake' bayix'ka'.

⁵² ¡Nyesh'laz gak chele, le' chli' chsedile leya'! La' nazle chsedile ben' che Chioza', per ni le' bi cheenile wzenagle daa nan, na' chllontele shajni ben'ka' chzenagan.

⁵³ Na' ka goll Jesúza' ka', ben'ka' chli' chsedi leya' na' fariseoka' zizikli bllaagake' na' wzologake' chongakile'ne' zed wal wñabgakile'ne' chiya dii nak lallj, ⁵⁴ goklall'gake' we' Jesúza' dill' dii wchixa'n le'.

12

Dill' wxiye' che fariseoka' zaklebin levadúrana'

¹ Na'ch bdop bllag ben' zan inleeb gana' zoa Jesúza' axt chdakw ljwellgake', na' wzoloe' zigaate be'lene' ben'ka' nakgake'ne' txen dill', chi'e:

—Wsak'gale bi shajle'le dill' wxiye' che fariseoka' daa zaklebi levadúrana'. ² La' daa kono nezi naa, wllin lla inēzi beñaan, na' yog'lol daa ngash' naa, wllin lla ila' lawin. ³ Na' yog' daa chakile kono beni daa wnale, wllin lla inēzgakile'n. Na' daa wnale ka yoole loolā nsejshoshle yoona', axt gosya'i ben' wzie'n dill'.

† 11:42 Lat' wej: literalmente la décima parte.

Beena' chiya' illebcho
(Mt. 10:26-31)

⁴'Le' nllaguid', nia' le' bi illeble beñ'ka' witgake' le', la' kachokzan zeelo gak gongakile' le'. ⁵Per ni inia' le' non chiya' illeble: li illeb Chioza', la' ka yiyoll yikee yel' mban chelena' lekzka' nape' yel' wñabia' wzalee le' lo yi' gabi'la'. Len', li illeb.

⁶'Nezicho wak si'cho gay' byindo' kon chop sintabdo'. La'kzi aga bitek zak'gakb, ni tob bi mbej yichj Chioza'. ⁷Na' ka'kzə le', axt to to yish' yichjlēna' mbab. Na' bi illeble, la' zak'chle aga ka zan byindo'ka'.

Ben'ka' chchebgake' nakgake' Crístona' txen
(Mt. 10:32-33; 12:32; 10:19-20)

⁸'Na' nia' le', beena' wcheb lao beñ' nake' nad' txen, lekzka' nad', Ben' Bsel' Chioza' Yell-lioni, wi'a dill' lao yog'lol' anjl che Chioza', yepgakee beeni nake' nad' txen. ⁹San beena' bi wcheb nake' nad' txen, lekzka' nad', wi'a dill' lao yog'lol' anjl che Chioza', yepgakee beeni bi nake' nad' txen.

¹⁰'Na' beena' biz gon ina cha', nad', Ben' Bsel' Chioza' Yell-lioni, wizi'xen Chioza' che', san beena' ine zban che Espíritu Sántona', aga wizi'xen Chioza' che'.

¹¹'Kat' lljwa'gake' le' lao beñ'ka' chñabia' gana' chdop chllagcho choe'llwill-cho Chioza', wa lao beñ' chchogbia' che beñ' wa lao joschis, bi sele wneyi naklə yilliile cho'a xtill' beñ'ka' wa bin inale. ¹²La' kat' inele, Espíritu Sántona'kzan wzajniile' le' daa chiya' inale.

Dii nxolla' nsa' yel' wni'ana'

¹³Na' ladj beñ'ka' ndop nllag wne to beñ', golle' Jesúsza':

—Maestro, gollgach beñ' bishaana' gone' daa chido' ikaa che dii xanto'na'.

¹⁴Na' che' Jesúsza'ne':

—¿Nora bzoa nad' ladjlēni ka to beñ' chon yel' joschis che beñ' wa beñ' chlāa bi dii de che beñ'?

¹⁵Na' lekzka' chi'e:

—Li wsak' kwenche bi selall'le gat'ch bi gat' chele, la' aga dii kan' llialo lo yel' mban chelena'.

¹⁶Na'ch bzoe' to jempl, chi'e legake':

—Wzoa to beñ' wni'a na' dii zan bizi' bilape' lo yell-lío che'na'. ¹⁷Na'ch chakile': “¿Nakra ka gona'n naa? Biga de kooshawaa dga bizi' bilap'.” ¹⁸Na'ch wne': “Ba nezid' bi gon'. Yichinj' yoona' gana' chgooshawaa daa chizi' chilap' na' yiyona'n dii xench, na' kooshawaa daa bizi' bilap' na' bichlə dii de cha'. ¹⁹Na'ch zan yiz yizia' banez che daa ngooshawaa, na' yizi'lallaa na' yeej gaw', na' soa' mbalaz.” ²⁰Na' goll Chioza'ne': “Li', beñ' bi nteyi, naanlle' gueto' na' daa ngooshawoo, nola cheyi gakan.” ²¹Kan' gak che beena' chtop chshag yel' wni'ana', na' bibi zakee lao Chioza'.

Chioza' chap chwie' beñ'ka' nak xiine'
(Mt. 6:25-34)

²²Ka wde dga, Jesúsza' golle' beñ'ka' nakgake'ne' txen:

—Naa nia' le': Bi sele wneyi che daa yeej gaole, ni bi sele wneyi che xalaanlena'. ²³La' zak'techlə yel' mban chelena' aga ka daa yeej gaole, na' zak'tech xkwerplena' aga ka xalaanlena'. ²⁴Li wwiakachi bechjka', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Chioza' legakb. Na' le', naa, zak'techle aga ka bado'ka' ze lo llazə. ²⁵Ni tole bi gak yischoochle yel' mban chelena' ni zi tgor la'kzi nall inleeb selen wneyi. ²⁶Shi dga nak diido'zə bi chak gonlen, ¿berache zezle wneyi che bichlə dii yoblə?

²⁷Li wwiakachi ka chgol yejdo'ka', len aga bi llin chongakan ni bi cholgakan do. Na' nia' le', ni Salomónna', beena' wdapchga yel' shao'ka', bi bllin gak xe'na' xochi ka yejdo'ka'. ²⁸Shi Chioza' none' xochi yejdo'ka' ze lyixaa, la'kzi xtitchgan mbanan na'ch

wtop ben' len wlli'en lo yi'na', ¿alechlin ki gone' chele, la'kzi bitek chajle'le gaklene' le'?
²⁹ Na' daan bi setekle wneyi ga sa' daa yeej gaole. ³⁰ La' ben'ka' bi nonlilall'gake' Chioza' to daazə chinogake'. Per le', Chioza' nake' Xale, na' nezile' chyalljilen. ³¹ Li se wneyi wzenagle che Chioza' kwenche inabi'e le', na' gonkze' yog' daa chyalljile.

Yel' shao' daa de yabana'

(Mt. 6:19-21)

³² 'Bi illeble. La'kzi bi nyanle, Xacho Chioza', yel' ben' wen che'na', chaklallee yillinle inabia'lenlene' gana' chnabi'e. ³³ Li wit' wde bi de chele, na' li gaklen ben' bibi de cheyin. Shi ka' gonle, na' gat' yel' shao' chele dii bi te cheyin yabana' gana' bi gak kwan wbanna'n, ni bi iteban. ³⁴ Na' gana' de yel' shao' chelena', na'kzan se yichjlall'do'lena' wneyi.

Chiyal' se kwascho ka yiyed Jesúza'

³⁵⁻³⁶ Na' lekzka' chi'e legake':

—Li gakto ka wen llinka', ben'ka' chbezgake' xane'ka' yilline' daa zeje' to ga chak wishagna'. Na' toshiizi chi'gake' chbezgake'ne' na' nox'tegake' yi' che'ka' kwenche kate wtankwe' lee puerta' lii wsaljtegake'n. ³⁷ Chakomba wen llinka' chbezgake' kat' yillin xane'ka', la' dii li nia' le', kwine' kweke' legake' cho'a mesa' na' wi'e dii gaogake'. ³⁸ Chakomba ben'ka' chbezgake' yillin xane'ka' la'kzi yilline' do chel wa do zbalzə. ³⁹ Na' chiyal' shajniile dga, shel'ka' to xan yoo inezile' bi gor illin wbanna' lille'na', wbe'noe'ne' na' bi wi'e latj sho'e lille'na' kwane'. ⁴⁰ Ka'kzan le' chiyal' sele wneyi toshiizi kwezle nad', Ben' Bsel' Chioza' Yell-lioni, la' tokonganza yiyed'.

Wen llinna' chon wen na' beena' bi chon wen

(Mt. 24:45-51)

⁴¹ Na'ch wñabi Pédróna' Jesúza', chi'ene':

—Xan', ¿ato neto'zan no' ka', anti che yog' beñaan no' ka'?

⁴² Na'ch goll Xancho Jesúza':

—¿Nakra chakile chon to wen llin wen, ben' nezi nak gone' llinna', shi xane'na' gone' lall' nee yog'te ben'ka' zoa loo yoo lille'na' kwenche wweej wwawe' legake' gor cheyin?
⁴³ Chakomba wen llinna' chilalile' chone' daa nak lall' nee ka yillin xane'na'. ⁴⁴ Dii li nia' le', xane'na' gone' lall' nee yog'lol' dii de che'. ⁴⁵ Na' shi wen llinna' gakile': “Akza naa yila' xan'na'”, na'ch soloe' gonile' zban wen llinka' sto, ka nool ka ben' byo, na' soloe' yeej gawe' na' sollile'. ⁴⁶ Na' tokonganzi yillin xane'na' llana' bi none' lez, na' wdie'ne' to yel' zi' wal kon ka ba nchogloe' gak che ben'ka' bi chongake' daa chiyal' gongake'.

⁴⁷ 'Ben' wen llinna' nezi bin cheeni xane'na' gone', na' bi chone'n ni bi zie'n wneyi, na' wit chinchga xane'na' le'. ⁴⁸ Per beena' bi nezi bin cheeni xane'na' gone', na' chone' dii chonan ka wsak'zi' xane'na'ne', agalə wsak'zi'teke'ne'. La' beena' be'lenyenee dill' nakan gone', chonan byen gonyenee ka bzajniile'ne'. Na' beena' ba bene' lall' nee gone' dii zan dii cheenile' gone', chonan byen gone' yog'lolte diika' bene' lall' nee.

Gak ben' chopla ni che Jesúza'

(Mt. 10:34-36)

⁴⁹ 'Daa bid' yell-lioni nakan ka inacho yin' bidxen'. Na' cheenchgaid' shel' naate ba chal'ninan. ⁵⁰ Biya dii yen ile'id', na' le ba chakyeshid' ax't ni illini llana'. ⁵¹ ¿Achakile bid' yell-lioni kwenche gon' ka soalen ljwell ben' mbalaz? Aga kan', san daa bid' illaa ljwellgake' na' gakgake' chopla. ⁵² La' naa, shi to yoo lle' gayee, na' gakgake' chopla, shone' til-lengake' ben'ka' chop, na' ben'ka' zi chop til-lengake' ben'ka' zi shonə. ⁵³ Xa bi' byona' til-lene'b', na' leb' til-lem' xabaa. Na' xna' bi' noola' til'lene'b', na' leb' til-lem' xna'baa. Na' noola' til-lene' xoolille'na', na' xoolille'na' til-lene' le'.

Bi chajni'gakile' bi zejín daa chon Jesúza'

(Mt. 16:1-4; Mr. 8:11-13)

⁵⁴ Na' lekzka' che' Jesúza' ben'ka' lle' na':

—Kat' chle'ile ziza' beja' gana' chxoalə wbillə, lii natele: “Wakə yeja”, na' kayen' chak.
⁵⁵ Na' kat' chde be'na' daa za' lli'lə, na' nale: “Le zey'chga yizak”, na' kayen' chak. ⁵⁶ Le' ben' wxiye! Kat' chle'ile bin chak xan yabana' na' lo yell-lioni nezile beran gak. ¿Biçhe bi chakbe'ile bin zeji daa chon Chioza' llaki zoacho n̄aa?

Chiyal' yiyoe'xencho ben'ka' chao xya çecheo
 (Mt. 5:25-26)

⁵⁷ ¿Biçhe ki chiyilje to kwinzle daa nak dii li dii shao'? ⁵⁸ Shi no chao xya çeche na' wchi'e le' lao joschiska', li gon byen yiyoe'xenlene' tneza'. La' shi lljwee le' lao beena' chchogbia' che ben', na' le' gone' le' lo na' beena' wseje' le' lillyana'. ⁵⁹ Na' nia' le', aga wichejle lillyana' ax̄t ki chixjle doxen daa chiyal' chixjle.

13

Chiyal' yiyaj yilenicho dii malka' choncho

¹ Na' lo llana'tezə bllin bał ben' lao Jesúza' gollgake'ne' ka ben Pilátona' bene' mandad betgake' bał ben' Galiléaka' ka chitgake' bayix'ka' choe'la'ogake' Chioza'. Na' xçhene'ka' biyakan toz kon xçhen bayix'ka' betgake'. ² Na' che' Jesúza' legake':

—¿Achakile ben' Galiléaka' betgake' nakchgake' ben' malch aga ka nochlə ben' wllall che'ka'? ³ Nia' le' bi nakan ka'. Shi le' bi yiyaj yilenile dii malka' chonle, lekzka' yog'le kwiayi'. ⁴ Shera ben' Jerusalénka' shin'shonə, ben'ka' wit daa bdakwgake' yoo siba' daa zoa Siloéna', ¿achakile' napchgake' dol' aga ka ben' wllall che'ka'? ⁵ Nia' le' bi nakan ka'. Na' shi le' bi yiyaj yilenile dii malka' chonle, lekzka' yog'le kwiayi'.

Jempl çe yag yixwewa' daa bi wllia

⁶ Na'ch bzoa Jesúza' to jempl, chi'e ben'ka':

—To ben' zoa to yag yixwew lo yell-lío che'na' gana' naze' yag uvaka', na' wyaje' jawie' shi llian yixwewa', na' ka blline' ni tlish' bi llian. ⁷ Na'ch chi'e beena' chap yell-lío che'na': “Ba gok shon̄ yiz chidwia' shi llian yixwewa', na' ni to bibi chbian. Bchogchoklan, la' n̄anchokzan yell-lioni.” ⁸ Na' beena' chape' yell-lío che'na' chi'e: “Xan', zi' zoashkin zi twiz na' wçheen' xaninna' na' wlla'n ben'na'. ⁹ Shera shicholə wbian. Na' shi bi wlliakzan, na' wçhogo'n.”

Biyon Jesúza' to noolə llana' chombaan ben' Israelka'

¹⁰ Na' to lla sabd, llana' chombaan ben' Israelka', chli' chsedi Jesúza' ben'ka' chdop chllag gana' choe'llwillgake' Chioza'. ¹¹ Na' len to noolə ba gok shin'shon̄ yiz n̄lew dii xiwaa le', na' bichkzə gok yizie' sh̄li. ¹² Na' ka ble'i Jesúza'ne' wnie'ne' na' golle'ne':

—Noolə, ba bikwas yillwe' cho'na'.

¹³ Na'ch bxoə neena' koll' noola' na' katena' lii bizetie' sh̄lichə, na' wzoloe' choe'laweē Chioza'. ¹⁴ Na' beena' chgoo x̄nezi cheyi diika' chongake' gana' chdop chllaggake' bllee daa biyon Jesúza' noola' llana' chombaangake', na'ch chi'e ben'ka' lle' na':

—De x̄op lla goncho llinna', na' bittezə llaka' yidle kwençe yiyakile, na' bi gonle lez yiyakile' llani chombaanchō.

¹⁵ Na'ch che' X̄ancho Jesúza' legake':

—Le' ben' wxiye', ¿abi wsell-le goon çecheka' wa burr çecheka' lljaweejlegakb nisa' llani chombaanchō? ¹⁶ Nooli nake' xiin̄ dia çe dii Abrahama', na' ba gok shin'shon̄ yiz Satanáza' daa ch̄nabia' dii xiw'ka' nonan le' ka ben' n̄cheje'. ¿Ana' chakile bi nakan wen biyonee llani chombaanchō?

¹⁷ Na' ka goll Jesúza' ka', yog' ben'ka' chakzbangakile'ne' biyii bido'gakile', na' yog' ben'ka' sto bibagakile' daa ble'gakile' yeł' wakka' chone'.

Jempl che sa mostásana'
(Mt. 13:31-32; Mr. 4:30-32)

¹⁸ Na'ch wna Jesúza':

—¿Nakra ka nak yel' wñabia' che Chioza', lla? Na' ¿bera ka wsaklebida'n? ¹⁹ Zaklebin sa mostásana' daa goz to beñ' lo yell-lío che'na', na' ka bla'n na' bgolan gokan to yag xen na' axt byiñdo'ka' ben lillbka' lo xoziiinna'.

Jempl che levadúrana'
(Mt. 13:33)

²⁰ Na' lekzka' chize' Jesúza':

—Dga sto wsaklebida'n yel' wñabia' che Chioza'. ²¹ Zaklebin levadúrana' daa chçhiç to noolə shona rob yezj kwenche yisgolan kwa che yetxtila'.

Chiyal' sho'cho puertdo'naz
(Mt. 7:13-14, 21-23)

²² Shlak ziyaj Jesúza' Jerusalénna', bidie' yell yelka' na' yelldo'ka' na' bli' bsdile' beñ'.

²³ Na' bchej to beñ' wñabile'ne', chi'ene':

—Maestro, ¿ato chopchga beñ' yila bi kwiayi'gake'?

Na'ch che' Jesúza'ne':

²⁴ —Li gon byen sho'le cho'a puert daa nak diido'zə kwenche soalenle Chioza'. La' beñ' zan gaklall'gake' sho'gake'n, na' bi gak sho'gake'. ²⁵ Na' ka solla' xan yoona' wseje' puerta', na' le', igaanle cho'a puerta' wtankwle le'inna' na' ye'lene': "Beñ'do', bsaljgach kwenche sho'nto'." Na' xan yoona' ine' le': "Bi nombi'a le' ni bi nezid' ga beñ' le'." ²⁶ Na'ch ye'lene': "Weej wdaolennto' li' txen, na' bli' bsdilo' neto' yell chento'na'." ²⁷ Na'ch ine' le': "Bi nombi'a le', ni bi nezid' ga beñ' le'. Li lljayaak do na'lə yog'lol-le le' beñ' wen dii mal." ²⁸ Na' kwellchgale axt gaoxaxj leylena' daa le gakshejlall'le ka ile'ile dii Abrahama', dii Isaaca', dii Jacoba' na' yog' dii beñ'ka' wdixjee daa goll Chioza' legake' lle'gake' yabana' gana' chñabia' Chioza', na' le', bi gok yiyoole. ²⁹ Na' wde wdeli beñ' lle' zbii zkaan yell-lioni yillingake' yabana' gana' chñabia' Chioza' na' kwe'gake' gaogake'. ³⁰ Na' bal beñ' bi nak beñ' zakii naa gakgake' beñ' zakii, na' beñ'ka' nak beñ' zakii naa bich gakgake' beñ' zakii.

Wchell Jesúza' ni che beñ' Jerusalénka'
(Mt. 23:37-39)

³¹ Na' lo llana'tezə bllin bal fariseoka' kwit Jesúza' na' che'gake'ne':

—Biyaj gan yoblə. Cheeni Heródeza' wite' li'.

³² Na' che' Jesúza' legake':

—Li yiyaj na' li lljayell beñ' wxiye'na': "Nin soa' to chop shon lla kwenche yibej' dii xiw'ka' yoo beñ' na' yiyon' beñ' bi shao', na' sheelo diika' chon'." ³³ Chonan byen kooch' nez naa, wxə len willj kwenche yiyaa Jerusalénna' gana' chitgake' beñ'ka' chyixjee daa che' Chioza', la' agagan' witgake' legake' gan yoblə.

³⁴ 'iLe' beñ' Jerusalén, chitle beñ'ka' chidtxjee daa che' Chioza' legake', na' yaja' chitile beñ'ka' chselee choe'gake' cho'a xtilleena'! Dii zan shii goklallaa yitop' le' ka chon jeda' chiyellb xiñdobka' xan xilba', na' le' bi goonile'. ³⁵ Li koo yichjle dga inia' le', Chioza' kwej yichje' gani zoale. Na' nia' le', aga wle'chile nad' axt kat'ch illin lla inale: "¿Gaklenshga Xancho Chioza' beeni ba bselee!"

14

Jesúza' biyone' to beñ' yo'e yi

¹ To lla sabd, llana' chombaən beñ' Israelka', wyaj Jesúza' jtawe' lill to fariseo, beñ' chñabia', na' fariseoka' sto china' chinogake'ne'. ² Na' lawe'na' ze to beñ' yo'e yi. ³ Na'ch Jesúza' wñabile' fariseoka' na' beñ'ka' chli' chsedi leya', chi'e legake':

—¿Ade lsens yiyoncho to ben' bi shao' llani chombaancho, anti bi den?

⁴ Na' legake' bikzə bi gollgake'ne'. Na'ch Jesúza' bexee beena' yoo yina' na' biyone'ne', na' golle'ne':

—Wak yiyajo'.

⁵ Na'ch chi'e fariseoka':

—Shi to burr chele wa to goon chele ixopb to loo yech to lla chombaancho, ¿abi yibejleb katena' la'kzi nakan llana' chombaancho?

⁶ Na' bikz bi billel-lall'gake' ye'gake'ne'.

Ben'ka' chaxgake' to ga chak wishagna'

⁷ Na' ble'i Jesúza' ka chon ben'ka' wdaolene' lill farisewa', wche'gake' gana' chbe' ben'ka' zakii. Na'ch bseese to jempl, chi'e legake':

⁸ —Kat' no gax le' to ga chak wishagna', bi kwe'le gana' chbe' ben'ka' zakii. La' shera shi ila' ben' zak'chi ka le', ⁹ na' beena' goxe' le' ine': “Wzolla' kwenche kwe' beeni gani chi'o.” Na'ch do chido'zile yizolla'le na' lljache'le xanteyin. ¹⁰ Na' bi gonle ka'. San kat' no gax le', chiyal' lljche'le xanteyin kwenche kat' ila' beena' goxe' le' na' ine': “Bish'dawaa, nilə wda kwi'o gani zak'chi.” Na' ka' sho'le balaan lao ben'ka' chi'lenle cho'a mesa'. ¹¹ La' beena' chon kwine' ben' choo ben' xen, Chioza' gone'ne' ben' bibi zakii; na' beena' chakile' bibi zakee, Chioza' gone'ne' ben' choo ben' xen.

¹² Na' lekzka' che' Jesúza' beena' goxe'ne' lille'na':

—Kat' cheenilo' wwawo' ben', bi gaxo' ben' zoalanzo' wen, no ben' bishoo, no ben' dialla cho', ni no ben' wlill cho', ben' nake' ben' wni'a, la' legake' lekzka' wak yigoogake' wzonna' yiwaogake' li' ka beno' chegake'. ¹³ Aga kan' gono', san byi ben' yesh', ben' net ni'a nee, ben' bi chak sa' wen na' ben' lchol. Ben'kan' chiyal' gaxo', ¹⁴ na'ch so' mbalaz. La' ben'kan' aga wak yigoogake' wzon cho', san Chiozan' yigwee wzon cho'na' llana' kat' yisbane' ben' wenka' ladj ben' wetka'.

Jempl che to ben' ben to lni xen

¹⁵ Na' to beena' chi'lene' Jesúza' cho'a mesa', ka benile' wne' ka', na' chi'ene':

—¿Chakomba ben'ka' lljadaogake' gana' chnabia' Chioza'!

¹⁶ Na'ch che' Jesúza'ne':

—Wzoa to ben' bene' to lni xen, na' goxe' ben' zan kwenche shajgake' lille'na' lljtaogake'. ¹⁷ Na' ka gol' gaogake', bselee to wen llin che'na' jelle' ben'ka' ba bye': “Li dagach, la' ba gok daa gaocho.” ¹⁸ Na' yog' ben'ka' janie' wzologake' chche'gake' dill'. Toe' golle'ne': “Zi' bizi'a lat' yell-lio na' chonan byen lljawia'n. Ye'gacho'ne' si'xene' bi gak yid'.” ¹⁹ Na' beena' sto chi'ene': “Zi' bizi'a gay' kwe' goon na' chonan byen wwia' shi wak gaangakb. Ye'gacho'ne' si'xene' bi gak yid'.” ²⁰ Na' beena' sto chi'ene': “Zi' bshagna', na' bi gak yid'.” ²¹ Na'ch biza' wen llinna' jayelle' xane'na' yog' daa goll ben'ka' le'. Na'ch bllaa xane'na' na' chi'e wen llin che'na': “Lobe' jta lyell na' bche' kon no ben' yillago', no ben' yesh', no ben' net ni'a nee, no ben' lchol, na' no ben' bi chak sa' wen.” ²² Na' ka jasane' ben'ka' jatope', na'ch chi'e xane'na': “Xan', ba ben' ka wno', na' ni dech latj sho' ben'.” ²³ Na'ch che' xane'na': “Wyaj do yawi nezka' na' ben byen yid ben'ka' yillago' kwenche yilla' loo lilla'ni. ²⁴ Na' nia' le', ka nak ben'ka' bya' dii nech, ni toe' bi gaogake' daa ba bsini'a.”

Yel' zak'zi'na' yen ile'icho ni che Jesucristona'

²⁵ Ben' zan zjanogake' Jesúza', na'ch biyechje' chi'e legake':

²⁶ —Shi nole cheeni gakle nad' txen, chiyal' gakchile nad' aga ka xaxna'le, xool-le, xiinle, ben' bish'le, ben' zanle, na' ax't yel' mban chelena'. Shi bi gakile' nad', aga wak gakle nad' txen. ²⁷ Na' lekzka' beena' bi chzanile' yel' mban che'na', gak bittezə dii gak che', kwenche gone' daa chazlallaa, aga wak gake' nad' txen. ²⁸ Shi nole cheenile gonle to yoo sib wal, zigaate chiyal' wwiale ka'k' gaki na' shi waki xmechlena' sheeloin. ²⁹ La' shi

ba wlekwle leninna' na' tena' bich bi de wzeeloilen, na' yog' beṅ'ka' ile'gakile' bi biyollan wxillgakile' le'. ³⁰ Na' inagake': "Kon wdishj beena' len yoonā' na' bi goki xmeche'na' wzeeloē'n." ³¹ Na' ka'kz to beṅ' wṅabia', shi cheenile' tiḷ-lene' sto wṅabia' yoblə, na' lekzka' chiyal' wsakee shi wzoī shi mil beṅ'ka' nape' tiḷ-lengake' beena' nap galja mil beṅ'. ³² Na' shi gakbe'ile' bi soi beṅ'ka' nape', na' zi' illinlə beṅ' wṅabia'na' sto, wselee to chop beṅ' lljellgake'ne': "Bizə tiḷcho." ³³ Na' ka' le', shi bi choonlall'le yog' dii de chele, aga wakə gake nad' txen.

Kat' bich zxi' zedaa
(Mt. 5:13; Mr. 9:50)

³⁴ Zedaa nakan dii wen, na' shi bich zxi'n aga wakch yiyonchon zxi' dii yoblə kwenche wchinchon. ³⁵ Ni bi gak wchinchon lwaa ben', san choonchon. Na' le' chenile dga nia', li sen wṅeyi.

15

Jempl che xilaa wnit
(Mt. 18:10-14)

¹ Yog' beṅ' wiḥixjka' na' beṅ' saaxyaka' jabig'gake' kwit Jesúza' kwenche bzenaggake' dillaa cho'e. ² Na' fariseoka' na' beṅ'ka' chli' chsedi leya' wzologake' biz chon chnagake' che Jesúza', che'gake':

—Chlebtezə beeni beṅ' saaxyaka' na' chaolenteze' legake'.

³ Na'ch bzoa Jesúza' to jempl, golle' legake':

⁴ —Shi tole naple to guiyoa xil' na' nit tob, na' wkwaanle baka' taplalj twalj lyixaa na' lljadiljle bana' wnit, na' axt kon ka yillelb gonle. ⁵ Na' ka yillelb, yibaile yixoaleb yaaxizlena'. ⁶ Na' ka yillinle lill-lena' wtope beṅ'ka' nllaguile na' beṅ' wlill cheleka', na' ye'le legake': "Li yibaleni nad', la' ba billeg xil' cha'na' bana' wnit." ⁷ Na' nia' le', ka'kzan chibayi Chioza' len anjl che'ka' yabana' kat' to beṅ' wen dii mal chiyajile' saaxya che'na' aga ka taplalj twalj beṅ'ka' bi chonan byen yiyajgakile'.

Jempl che mecha' wnit

⁸ Wa shi to noolə de shi mech plat che' na' nit ton, na' wxene' yi' che'na' na' wloe' loo lille'na' na' yiyilje'n axt ki yillelile'n. ⁹ Na' ka yillelile'n na' wtope' noolka' nllaguile' na' beṅ' wlill che'ka', na' yee legake': "Li yibaleni nad', la' ba billeg mech cha'na' daa wnit." ¹⁰ Na' nia' le', ka'kzan chibayi Chioza' len anjl che'ka' kat' chiyaj chileni to beṅ' saaxya.

Jempl che bi'na' benditj xmech xabaa

¹¹ Na' lekzka' che' Jesúza' legake':

—To beṅ' wzoa chop xiine', ¹² na' bi' neshaa gollb' xabaa: "Xa, bla daa de cho' na' ben nad' daa chiyal' ikaa." Na'ch bla xabaa daa de che' na' bi'en legakb'. ¹³ Na' aga wlla, biyit' bide bi' neshaa daa bi'eb', na' mecha' daa bex'b' cheyin wyajlema'n to yell zit' na' jenditjba'n na' jem' kon daa nazan cheb'. ¹⁴ Na' ka biyoll benditj xmechbaa wche' to wbin xen yella' gana' chdab', na'ch wzolo chdeb' wbinna'. ¹⁵ Na' wyajb' janabb' llinna' gom' lao to beṅ' yella' gana' chdab', na' beena' bseleeb' lyixaa gana' nlee kushka' kwenche jtapb' legakb'. ¹⁶ Na' daa le' chdom' goklall'b' gaob' daa chao kushka', na' ni len bi be'gake'b'. ¹⁷ Na' gokib': "Beṅ' zan wen llin che xa'na' lle' na' chichoonzan dii cheej chaogake', na' nad', ba chetid' wbinni. ¹⁸ Ba ziyaachoklə kwit xa'na' na' yeppee: Xadawaa, ba bxiñj' blen' lao Chioza' na' lawo'na'. ¹⁹ Bich chidolaa gak' xiino', san beni nad' ka nottezə wen llin cho'ki." ²⁰ Na'ch biza'b' ziyajb' lill xabaa.

'Na' zi dii xench yillim' lillbaa ble'i xabaa leb' na' biyesh'lallile'b'. Na'ch zejdoe' jatile'b' na' wdele'b' na' bnope'b'. ²¹ Na'ch che'b' xabaa: "Xadawaa, ba bxiñj' blen' lao Chioza' na' lawo'na', bich chidolaa gak' xiino'." ²² Na' xabaa chi'e wen llin che'ka': "Lobe'zə li lljlej tgot lech' daa liizelozi nakch na' li wwakwba'n, na' lekzka' li wllin to niy xbemaa na' li wllin yel

ni'abaa. ²³ Na' li lljxi' me'do'na' mbejchlawin, li witb kwenche gaochob na' goncho to lni, ²⁴ la' xiindawaani gok cheb' ka bi' ba wit, na' naa ba bila'b' mbam'. Gok cheb' ka bi' wnit, na' naa ba billelb'." Na'ch wzologake' bengake' lnina'.

²⁵ Na' ka wzolo lnina', xiine' bi' necha' chdab' lyixaa. Na' ka billim' gaozə lillbaa, benib' chkwell wikwellka' na' chakte wiyaana'. ²⁶ Na'ch wneb' to wen llinka' na' wñabibee bin chak lillbaa. ²⁷ Na' wen llinna' chi'e: "Bi' bishoonan' ba bila', na' ben xo'na' mandad betgake' me'do'na' mbejchlawin daa bila'b' shi'a shao'." ²⁸ Na' xiine' bi' necha' bllaab' na' bi goonib' yiyoob'. Na'ch bchej xabaa got'yoile'b' kwenche yiyoob'. ²⁹ Na'ch che'b' xabaa: "Nezkzilo' ba gok zan yiz chon' yog' daa no', na' ni shlin bin' chishj' cho'a xtilloona'. Na' bigan' gon' nad' la'ch' to shibdo' kwenche wit'b yeej gaolem' bi'ka' nllaguid'. ³⁰ Na' naa bila' xiino'ni biyit' bideb' yog' daa bi'ob' na' benditj' xmecho'na' kon noolə wdaka', na' ba betzo' me'do'na', bana' le nak, ni cheb'." ³¹ Na'ch che' xabaa: "Xiindawaa, li' zoaleno' nad' toshiizi, na' yog' bi' de cha' chekzo' daa. ³² Per chonan byen naa yibaicho na' goncho lnini, la' ba bila' bi' bishooni. Ba gok cheb' ka bi' ba wit, na' naa ba bila'b' mbam'; gok cheb' ka bi' wnit, na' naa ba billelb'."

16

Jempl che wen llinna', beena' benditj daa de che xane'na'

¹ Na' lekzka' goll Jesúza' ben'ka' nakgake'ne' txen:

—Wzoa to ben' wni'a nape' to wen llin che', na' bene' lo nee yog' dii de che'. Na' wyaj bal' ben' jellgake'ne': "Le chonditj beena' daa beno' lo nee." ² Na'ch wne xane'na' le', chi'ene': "Ba benid' ka nagake' chono', na' chiyał' yidio' kwent diika' ngoo lo no', la' bich gon' xshino'na'." ³ Na'ch chaki wen llinna': "¿Nakra gona'n naa, bich gon' xan'na' llinna' gon'? Bi soid' gon' llin wal, na' chido'id' yep' ben' yiyesh'gakile' nad' gongake' lat' wej xmech'. ⁴ Ba nezid' nak gon' kwenche wleb' ben' nad' lille'ka' kat' bich gat' llin cha'na'." ⁵ Na'ch goxe' to to ben'ka' chal'gake' che xane'na', na' ben' necha' wñabile'ne', chi'ene': "¿Ka'k' chaloo che xan'na'?" ⁶ Na' beena' chi'e: "Chalaa to guiyoa medid* set." Na'ch chi'ene': "Ni de yisha', lobe'zə wche' na' bda'n shiyonzannan' chaloo." ⁷ Na' ka wde, wñabile' beena' sto, chi'ene': "¿Shera li'? ¿Ka'k' chaloo?" Na' beena' chi'ene': "Chalaa to guiyoa gush trigo." Na'ch chi'ene': "Ni de yisha' na' bda'n taplalj gushzannan' chaloo." ⁸ Na' xan' wen llinna' be'lawee wen llin mal che'na' daa biyiljlallee naklan gone'n. La' ben'ka' zech wneyi che daa chak lo yell-lioni, chiyiljlall'chgake' nak soalen ljwellgake' wen kwenche ile'shii ljwellgake', aga ka ben'ka' ba yoo beeni' che Chioza' loo yichjlall'do'eka'.

⁹ Na' nia' le', li wchin yel' shawaa de chele yell-lioni kwenche gaklenle ben', na' kat' ba wde che yel' shawaa, Chioza' wlebe' le' soalenlene' zejli kañi.

¹⁰ Na' beena' chon ka chiyał' kon lat' daa nak lall' nee, ka'kzan gone' shi bichlə dii xench koo lall' nee. Na' beena' bi chon ka chiyał' kon daa nak lall' nee, ka'kzə gone' shi bitekchlə dii xench koo lall' nee. ¹¹ Shi bi chonle ka chiyał' kon yel' shawaa de yell-lioni, bi gonzle lez ikaale yel' shawaa de yabana'. ¹² Na' shi bi chonle ka chiyał' kon yel' shawaa nak lall' na'le yell-lioni, ¿nakra gon Chioza' gone' le' yel' shawaa daa gaki chele?

¹³ Aga ga zoa to ben' wlane' xshin chop ben', la' wakzbanile' beena' to, na' gakchile' beena' sto, wa gone' xshin beena' to do lallee na' xshin beena' sto gone'n nakzi. Aga wak gonle ka cheeni Chioza' shi le chzelall'le yel' wni'ana'.

¹⁴ Na' fariseoka' le chzelall'gake' mecha', na' ka bengakile' dillaa choe' Jesúza', bxill-gakile'ne'. ¹⁵ Na'ch che' Jesúza' legake':

—La'kzi nale nakle ben' wen, Chioza' nezile' nakan nak yichjlall'do'lena'. La' daa chaki ben' yell-lioni nakan dii lliyalote, leyen'lannan' chakzbani Chioza'.

* 16:6 Medid: to to medidki gokan ka do 37 litr.

Leya' na' yel' wñabia' che Chioza'

¹⁶ Na' lekzka' che' Jesúza':

—Leya' na' daa bli' bñedi dii beñ'ka' wdixjee daa goll Chioza' legake', legakannan' wñabia'gakan axt ka bllin lla bid Juanna'. Na' ka bid Juanna', wzolo chzenag beñ' dill' wen dill' kob che yel' wñabia' che Chioza', na' chongake' to dii byen kwenche inabi'e loo yichjlall'do'eka'.

¹⁷ Dii li nia' le', lobe'ch te che yabana' len yell-lioni, aga ka daa tegonz shcho'a daa na leya'.

Bi chiyal' yilaa beñ'ka' nshagna'

(Mt. 19:1-12; Mr. 10:1-12)

¹⁸ Shi to beñ' byo yilee xoolē'na' na' yikee noolə yoblə, chone' ka chon beena' zoate nool che'na' na' chdalene' noolə yoblə. Na' beena' yikee noola' bilaa beñ' che'na' le', lekzka' chone' ka chon beena' zoalente nool che'na' na' chdalene' noolə yoblə.

Ben' wni'ana' na' Lázarona'

¹⁹ Na' chize' Jesúza' beñ'ka':

—Wzoa to beñ' wni'a na' chakwe' shgal' lech' dii wen na' yog' lla chaoshawe'. ²⁰ Na' lekzka' wzoa to beñ' yesh' wlie' Lázaro, na' lliā we'na' doxen kwerp che'na'. Na' tlizi chjchi'e cho'a yoo che beñ' wni'ana', ²¹ gokile' gawe' la'ch' blaaka' chxop xan mes che'na', na' axt bekw'ka' chleegakb we'na' llie'. ²² Na' bllin lla wit beñ' yeshaa, na' biche' anjl che Chioza'ne' kwenche jazoalene' dii Abrahama'. Na' lekzka' wit beñ' wni'ana' na' bkwash'gake'ne'. ²³ Na' dii beñ' wni'ana' chdezi'chgue' gana' lle' beñ' wetka', na' blis jalawe'na' na' zit'lə ble'ile' dii Lázarona' chi'e kwit dii Abrahama'. ²⁴ Na'ch wñie' zilljə chi'e: “Xadawaa Abraham, biyesh'gachi nad' na' bsel' Lázarona' kwenche wleejlat' xbene'na' loo nisa' na' yidshone'n lo lollaani, la' le chllaglochgan' lo yi'ni.” ²⁵ Na' Abrahama' chi'ene': “Xiin, jadini ka mbalaz gok cho' shlak wbano' yell-liona', na' Lázaroni aga bi dii wen gok che'. Na' naa chizi'e banez ni, na' li' chzak'zi'o. ²⁶ Na' ziznakan sto, ze to bdiñj xen gcholi, na' aga wak te beñ'ki yidgake' gana' lle'le, na' beñ'ka' lle' na' aga wak tegake' yidgake' gani zoanto.” ²⁷ Na'ch che' beñ' wni'ana'ne': “Chñabid' li' shka', xadawaa Abraham, ben goklen bsel'gach Lázarona' lill xa'na' ²⁸ gana' zoa zi gay' beñ' bishaaka', llje'lene' legake' dill' kwenche bi lengake' yiyedgake' gani de yel' zak'zi'ni.” ²⁹ Na' Abrahama' chi'ene': “Napkzgake' daa bzej dii Moiséza' na' daa bzej dii beñ'ka' wdixjee daa goll Chioza'. iNa' chiyal' wzenaggake'n!” ³⁰ Na' che' beñ' wni'ana'ne': “Aga wakan, xadawaa Abraham, san shel' to beñ' ba wit yibane' na' yiyaje' lljaye'lene' legake' dill', na' wiyaj wilengakile' saaxya che'ka'.” ³¹ Na' che' Abrahama'ne': “Shi bi chzenaggake' daa bzej dii Moiséza' na' daa bzej dii beñ'ka' wdixjee daa goll Chioza', lekzka' aga wyajle'gake' la'kzi yiban to beñ' wet.”

17*Bi goncho ka ixop beñ' yoblə gone' dii mala'*

(Mt. 18:6-7, 21-22; Mr. 9:42)

¹ Na'ch che' Jesúza' beñ'ka' nakgake'ne' txen:

—Bia'kzə de dii gon ka ixop beñ' gone' dii mala', per inyesh'laz gak che beena' wchixe' beñ' yoblə gone' dii mala'! ² Wenlan shel' wwal'gake' yene'na' to yaj che molin na' lljazal'gake'ne' loo niso'na' aga ka daa wchixe' to beñ'ki chajle'gake' cha'. ³ Daan, li wsak'.

'Shi to bish' lljwell-le gone' mal chele, li wsheshlene', na' shi yiyajile' daa bene' chele, li yizi'xen che'. ⁴ La'kzi axt gall shii shlla gone' bi gone' chele, na' gall shiite ine' le': “Chiyajid' daa ben' cho”, chiyal' yizi'xenle che'.

Daa gak gon to beñ' chajle'

⁵ Na'ch goll postlka' Xancho Jesúza':

—Goklen neto' gon_lilall'chnto' Chioza'.

⁶ Na'ch che' Xancho Jesúza' legake':

—Shel' yel' chajle' chelena' nakan la'ch' ka nak sa mostásana', daa nak diido'zə, wak ye'le yag xen wala': “Blall'shki, na' jsoa loo niso' na'lə”, na' gon yaga' daa ye'len, shel'ka'.

Daa chiya' gon to wen llin

⁷ 'Shi nole zoa to wen llin chele na' zizee lyixaa jawaane' goonna' wa jtapeeb, aga we'lene': “Biyoo, na' wche' kwenche gawo'.” ⁸ Aga we'lene' ka', san ye'l-lene': “Bsini'a daa gaw' xshe'na', na' wze wneyi kwenche wdio' daa yeej gaw', na'techlə yeej gawo'.”

⁹ Na' ni bi we'lene' yel' choxken daa ba bene' daa che'lene' gone'. ¹⁰ Lekzka' le', kat' ba biyoll benle yog' daa non Chioza' mandad gonle, chiya' inale: “Neto' bi chizo chizakinto' gonnto' yog'lolten, shinchga bizointo' ba bennto' daa chonan byen gonnto'.”

Biyon Jesúza' shi ben' chak yillwe' daa le lepra

¹¹ Na' shlak zjada Jesúza' Jerusalenna', wdie' gana' ndil yell-lioka' mbani Samáriana' na' Galileana'. ¹² Na' ka blline' to cho'a yelldo', bllesh shi ben' chakgake' yillwe' daa le lepra kwenche lljatilgake'ne', na' de zit'lə wzegake' ¹³ besyaagake' zilljə, che'gake'ne':

—Jesús, Maestro, biyesh'lall'gachi neto'!

¹⁴ Na' ka ble'i Jesúza' legake', na' golle':

—Li shaj lao bxozka' kwenche ile'gakile' le'.

Na' shlak zejgake' bigaa yillwe' che'ka'. ¹⁵ Na'ch toe' bibi'e ka gokbe'ile' ba biyakile', na'ch axt chosya'ile' choe'lawee Chioza'. ¹⁶ Na' bchek' xibe'na' lao Jesúza' na' bdose' lo yona' kwenche bi'ene' yel' choxken. Na' beena' ben ka' nake' ben' Samaria. ¹⁷ Na'ch che' Jesúza':

—¿Aaga shigaken' biyaki? ¿Garan ben'ka' zi ga? ¹⁸ ¿Atochga ben' zitiin bibi'e choe'lawee Chioza'?

¹⁹ Na'ch che' Jesúza' beena':

—Bizolla' na' biyaj. Ba biyakilo' daa wyajli'o cha'.

Yel' wnabia' che Chioza'

(Mt. 24:23-28, 36-41)

²⁰ Na'ch wnabi fariseoka' Jesúza' batran solo inabia' Chioza' lo yell-lioni. Na' chi'e legake': —Ka nak yel' wnabia' che Chioza', aga nakan ka to dii ile'tekzicho. ²¹ Aga no ina: “Ni chnabia' Chioza'”, wa “Na' chnabi'e”, la' ladjlenikzan ba bla' yel' wnabia' che'na'.

²² Na'ch chi'e ben'ka' nakgake'ne' txen:

—Wllin lla kat' gakkall'le la'ch' zi shlla ile'chile inabi'a, nad', Ben' Bsel' Chioza' Yell-lioni, na' aga wle'chile nad'. ²³ Na' ichej ben' ine': “Ni zoe'”, wa “Na' zoe'.” Na' bi shajle, ni bi gonle ben'ka' txen. ²⁴ La' ka chak kat' chep yes, chzeeni'n doxen xan yabana', ka'kzan gak llana' kat' zizaa, nad', Ben' Bsel' Chioza' Yell-lioni. ²⁵ Na' chonan byen zigaate biya daa yen ile'id', na' ben'ki zoa naa wzoagake' nad' ka'lə. ²⁶ Kon ka gok kana' wzoa dii Noéna', ka'kzan gak kat' ba zoa illin lla yiyed' dii yoblə, nad', Ben' Bsel' Chioza' Yell-lioni. ²⁷ Kana' wzoa dii Noéna', ben' yell-lioka' cheej chaogake', chshagna'gake', na' choe'gake' yel' wishagna' che xiine'ka' bllinte llana' wyoo dii Noéna' loo barkwa'. Na' wzolo chak yejsiwaa yell-lioni axt billa'cha lawinna' nisa', na' blliyai'n yog'lole'. ²⁸ Na' lekzka' wizak kana' wzoa dii Lota'. Cheej chaogake', chiya'o chidegake' bi de chegake', na' chaz chaangake', na' chon lillgake'. ²⁹ Per ka bchej dii Lota' yell Sodómana', Chioza' bletje' yi'na' xan yabana' nchixan daa ne' azufre na' betan yog' ben' yell Sodómaka'. ³⁰ Na' ka'kzan gak llana' kat' yiyed', nad', Ben' Bsel' Chioza' Yell-lioni.

³¹ 'Llana' zizaa, shi to ben' llie' yichj lille'na' na' xshinlaze'na' den loo yoo che'na', bi yiyetize' kwenche lljaleje'n. Na' shi to ben' zeje' lyixaa, bi yiyajze' lille'na'. ³² Li lljadini ka gok che dii xool Lota'. ³³ Beena' bi chsanlall' yel' mban che'na', beenan' kwiayi'; san beena' chsanlall' yel' mban che'na', beenan' gat' to yel' mban che' zejli kani.

³⁴ 'Na' nia' le', lle'na' kat' zizaa, chop ben' die' toz blag, toe' yichi'a na' stoe' yigaan.
³⁵ Na' gana' lle' chop noolə chotgake', toe' yichi'a na' stoe' yigaan. ³⁶ Na' chop ben' byo chongake' llin lyixaa, toe' yichi'a na' beena' sto yigaane'.

³⁷ Na'ch wñabgakile'ne':

—¿Garan gak dga, Xan'?

Na' chi'e legake':

—Gana' de ba weta', nan' chdop chllag llodka'.

18

Jempl che to nool wizeb na' to ben' wen yel' joschis

¹ Na' bzoa Jesúza' to jempl kwenche bli' bsedile' legake' bi lljshyagakile' we'lwillgake' Chioza'. ² Chi'e legake':

—Wzoa to ben' wen yel' joschis to yell, na' bi chall chllebe' Chioza', ni bibi chakile' shi bi chiyoolallii ben' ka chone'. ³ Na' yella' wzoa to noolə wizeb na' chajtezi chaje' lawe'na', chi'ene': “Bensha yel' joschis cha'ni.” ⁴ Na' ssha ba gok chaje' lawe'na' na' bikzə chone' bin chi'ene', na' bllin lla kat' chakile': “La'kzi bi chall chlleb' Chioza' na' ni bibi chakid' shi bi chiyoolallii ben' ka chon', ⁵ gonch' yel' joschis che nooli kwenche bich yidyembeguile' nad'.”

⁶ Na' Xancho Jesúza' chi'e legake':

—Li wzenag ka ben ben' wen yel' joschisa', beena' bi chall chlleb Chioza'. ⁷ ¿Achakile Chioza' bi gaklene' ben'ka' ba wleje' nakgake' lall' nee, ben'ka' choe'lwillgake'ne' ka wal ka tella? ¿Awllaile' gaklene' legake'? ⁸ Bi nakan ka', san nia' le' katena' gaklene' legake'. Per kat' zizaa, nad', Ben' Bsel' Chioza' Yell-lioni, ¿alle'ch ben' nonlilall' nad' yell-lioni, lla?

Jempl che to fariseo na' to ben' wichixj

⁹ Na' bzoa Jesúza' sto jempl che ben'ka' chakgakile' nakgake' ben' wen lao Chioza' na' chongakile' ben' yoblə nakzi. Na' wne':

¹⁰ —Chop ben' wyajgake' yoodo'na' kwenche je'lwillgake' Chioza'. Toe' nake' fariseo na' beena' sto nake' ben' wichixj. ¹¹ Na' farisewa' zie' chshalj chshon che kwine', chi'e: “Chios cha', choxkeno' bi chon' ka chon ben' yoblə, bi chzi' chban', bi nak' ben' wen dii mal, agagan' kwey yichj' nool cha'na' kwenche soalen' nool yoblə, na' ni bi chon' ka chon ben' wichixji. ¹² Chop shii to xman chzoa' wbas', na' lawi yog' daa chon' gan chbej' daa chidoḷoo ikoo.”* ¹³ Na' ben' wichixja', zit'lə wzie' na' ni bi biyaxjile' wlis lawe'na' wwie' yabana', san chballee cho'a lcho'ena' chi'e: “¿Chios cha', biyesh'gachi nad' daa nak' ben' saaxya!” ¹⁴ Na' nia' le', Chioza' bzenague' che ben' wichixja' na' bizee biyaje' lille'na' ba biyakxen saaxya che'na'. San bi bzenague' che farisewa'. La' beena' chon kwine' ben' choo ben' xen, Chioza' gone'ne' ben' bibi zakii. Na' beena' chakile' bibi zakee, Chioza' gone'ne' ben' choo ben' xen.

Benleey Jesúza' bi'do'ka'

(Mt. 19:13-15; Mr. 10:13-16)

¹⁵ Na' lekzka' ben' zan jwa' bi'do' che'ka' lao Jesúza' kwenche bxoā neena' yichjb'ka' na' wñabile' Chioza' gaklene'gakb'. Na' ka ble'i ben'ka' nakgake'ne' txen, bsheshlengake' legake'. ¹⁶ Na' Jesúza' goxe' bi'do'ka', na' chi'e ben'ka' nakgake'ne' txen:

—Li we' latj yid bi'do'ki lawa'ni, bi wllonle, la' Chioza' chñabi'e ḷoo yichjlall'do' ben'ka' nak ka legakb'. ¹⁷ Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

To ben' zakii ben' nak ben' wni'a be'lene' Jesúza' dill'

(Mt. 19:16-30; Mr. 10:17-31)

¹⁸ To ben' zakii wñabile' Jesúza', chi'ene':

* **18:12** Daa chidoḷoo ikoo: literalmente la décima parte.

—Maestro, li' nako' beṅ' wen. Wna nad' beran chiyal' gon' kwenche gat' to yel' mban cha' zejli kani.

¹⁹ Na'ch che' Jesúza'ne':

—¿Berache nazo' nad' beṅ' wen? Toz Chioza' nake' beṅ' wen. ²⁰ Ba nezkzilo' daa nllia Chioza' bia' goncho: “Bi soaleno' nool bi nak nool cho', bi wito' beṅ', bi kwano', bi chiljalloo bizə gon ino' che beṅ', na' wdap balaan xaxnoo.”

²¹ Na'ch che' beena'ne':

—Kana' naktia' bi' xkwid' chon' yog' diika'.

²² Na'ch ka beni Jesúza' ka goll beena'ne', na' chi'ene':

—Stozə daa chyallj gono': jayet' jade yog' daa de cho' na' be'n beṅ' yesh'ka'. Na' shi gono' ka', na' gat' to yel' shao' cho' yabana'. Na' da, dino' nad'.

²³ Na' ka beni beena' ka goll Jesúza'ne', le gokyeshile', la' beṅ' wni'a nleban'. ²⁴ Na' ka ble'i Jesúza' le gokyeshile', na' chi'e:

—¿Lallj inleeb chonan che beṅ' wni'aka' we'gake' latj inabia' Chioza' legake'! ²⁵ Lobe'ch te to kamey xan yeshaa aga ka to beṅ' wni'a yiyo'e yabana'.

²⁶ Na' beṅ'ka' beni, gollgake'ne':

—¿Noran yila shka'?

²⁷ Na'ch che' Jesúza' legake':

—Daa bi chak gon benecha', Chioza' chak gone'n.

²⁸ Na'ch che' Pédrona' Jesúza':

—Xan', ba wlej yichjnto' yog' dii de chento' kwenche naknto' li' txen.

²⁹ Na'ch che' Jesúza' legake':

—Dii li nia' le', nottezə beṅ' ba bzanile' no lille', no xaxnee, no beṅ' bishee, no beṅ' zane', no xiin xooole' kwenche cho'e latj chnabia' Chioza'ne', ³⁰ Chioza'kzə wi'e dii zak'chi che' yell-lioni aga ka diika' wlej yichje', na' ka yilline' yabana' wi'ene' to yel' mban zejli kani.

De wyon shii wdixjee Jesúza' guete'

(Mt. 20:17-19; Mr. 10:32-34)

³¹ Na'ch wlej Jesúza' beṅ'ka' shllin ka'lə, beṅ'ka' nakgake'ne' txen, chi'e legake':

—Dga ziyajcho Jerusalenna' naa, yillinin daa bzej dii beṅ'ka' wdixjee daa goll Chioza' kani'yi daa gak cha', nad', Beṅ' Bsel' Chioza' Yell-lioni. ³² La' gongake' nad' lo na' beṅ'ka' bi nombia' Chioza', na' gonlegake' cha', biya dii inagake' nad', na' wlla' xeneeka' nad'. ³³ Na' wit chingake' nad' na'tech witgake' nad', na' yiyon lla yiban' ladj beṅ' wetka'.

³⁴ Na' beṅ'ka' nakgake'ne' txen ni lat' bi wyajni'gakile' daa golle' legake', na' ni bi wnezgakile' berache chi'e legake' ka', la' daa golle' legake' nakan dii bi gak shajni'gakile'.

Biyon Jesúza' to beṅ' lchoj yell Jericóna'

(Mt. 20:29-34; Mr. 10:46-52)

³⁵ Na' ka ba chllin Jesúza' yell Jericóna', na' chi' to beṅ' lchoj cho'a neza' chnabile' beṅ' yiyesh'lall'gakile'ne' we'gake' lat' wej xmeche'. ³⁶ Na' ka benile' chde beṅ' zan na'ch wñabe' bin chak. ³⁷ Na' gollgake'ne':

—Jesús, beṅ' Nazaretan', chda ni.

³⁸ Na'ch besyee, chi'e:

—¿Jesús, Xiin dia che dii Daví, biyesh'lall'gachi nad'!

³⁹ Na' beṅ'ka' llialo lao Jesúza' chsheshlengake'ne' kwenche kwi'e llizə, na' zizikchlə chosyee, chi'e:

—¿Xiin dia che dii Daví, biyesh'lall'gachi nad'!

⁴⁰ Na'ch wlez Jesúza' na' bene' mandad lljxi'gake'ne'. Na' ka bllin beṅ' lchoja' lawe'na' na'ch wñabile'ne':

⁴¹ —¿Beran cheenilo' gon' cho'?

Na'ch che' beṅ' lchoja'ne':

—Xan', cheenid' ile'id'.

⁴² Na'ch che' Jesúza'ne':

—Daa ba chonlilalloo nad' na' ile'ilo'.

⁴³ Na' katena' lii bile'teile', na'ch janoe' Jesúza' choe'lawee Chioza'. Na' yog' beñ'ka' ble'i daa ben Jesúza' be'la'ogake' Chioza'.

19

Jesúza' na' Zaquewa'

¹ Na'ch bllin Jesúza' yell Jericóna' na' wdie' gchol yella'. ² Na' yella' zoa to beñ' wni'a lie' Zaqueo, na' ngoo lall' nee xonj wíchixjka'. ³ Na' goklallee ile'ile' Jesúza', per bi gok ile'ile'ne' daa nake' beñ' bçhekwdó' na' daa zejlen Jesúza' beñ' zan. ⁴ Na'ch wllialodoe' lawe'ka' na' wyepe' to lo yag xen kwenche ile'ile'ne' ka tie'. ⁵ Na' ka bllin Jesúza' xan yaga', na' blis lawe'na' chi'ene':

—Zaqueo, btalalloo biyetj, la' lillo'nán' yigaana' naa.

⁶ Na'ch biyetjdo Zaquewa' chibaile' bichi'e Jesúza' lille'na'. ⁷ Na' ka ble'i beñ'ka' lle' na' ka gok, yog'ze' wzolo biz chon chnagake' che', che'gake':

—Yigaanxgale' lill beñ' saaxyani, na.

⁸ Na'ch wzolla Zaquewa' na' chi'e Xancho Jesúza':

—Xan', cheenid' wi'a gashjə daa de cha' beñ' yesh'ka', na' yog' beñ'ka' ba bçhixj' dii xench, yiyoe'gakee taplə ka daa ba wlan' chegake'.

⁹ Na'ch che' Jesúza'ne':

—Naañla ba bisla Chioza' beñ'ki zoa loo yooni kwenche bi kwiayi'gake', daa len Zaquewi nake' xiñ dia che dii Abrahama'. ¹⁰ La' ka nak' nad', Beñ' Bsel' Chioza' Yellioni, bid' kwenche yiyilj' na' yisla' beñ'ka' yoo nez daa wlliaiyi'n legake'.

Jempl che beena' bkwaanlen wen llin che'ka' mech

¹¹ Shlak chzenag beñ'ka' daa che' Jesúza', bseesile' legake' to jempl, daa ba zoa illine' Jerusalenna' na' legake' gokgakile' daa nake' beñ' bsel' Chioza' lii solotie' inabi'e. ¹² Na'ch chi'e legake':

—To beñ' zakii bcheje' wyaje' to yell zit' wal kwenche lljalane' yel' wñabia' che lalle'na', na' ka yilline' inabi'e. ¹³ Na' ka zi' see, wñie' shi wen llin che'ka' na' bi'e legake' twej mech dii zak' dii xen na' chi'e legake': “Ni de mechi, li gonlenan delgens shlak bi soa'.”

¹⁴ Na' beñ' wlall che'ka' le chakzbangakile'ne', na' ka wde wzee bsel'gake' xonj beñ' wyajgake' lao beena' we' lsens inabi'e kwenche jellgake'ne': “Bi cheeninto' inabia' beeni neto'.”

¹⁵ Per bia'kzə gok lo nee inabi'e, na' biyaje' lalle'na'. Na' ka billine' goxe' beñ'ka' bkwaanlene' mecha' kwenche inezile' ka'k' wej ben mecha' gan daa bkwaanlene' to toe'.

¹⁶ Na' ka bllin beñ' necha' lawe'na' na' chi'ene': “Xan', xmecho'na' bkwaan'leno' nad' bena'n gan shin.”

¹⁷ Na'ch beñ' wñabia'na' chi'ene': “Wenkzan beno'. Daa beno' ka chiya' kon lat' mecha' bkwaanlen' li', wzoa' li' inabi'o shi yell.”

¹⁸ Na' ka bllin beena' sto lawe'na' na' chi'ene': “Xan', xmecho'na' bkwaan'leno' nad' bena'n gan gayaan.”

¹⁹ Na' lekzka' chi'e beena': “Wzoa' li' inabi'o gay' yell.”

²⁰ Na'ch bllin stoe' lawe'na' na' chi'ene': “Xan', ni de xmecho'na' bkwaan'leno' nad'. Blall'tipteza'n to lech' na' wlooshawaan ²¹ daa blleb' li', la' le beñ' zñia nako'. Chkaatezo' dii bi naki cho', na' chizi' chilaptezo' dii goz goon beñ' yoblə.”

²² Na'ch che' beñ' wñabia'na' le': “Bikzbi yejni'alallii beno'. Kon ka ba wno' ka'kzan gak cho'. Nezilo' nak' beñ' zñia, na' chkaatez' dii bi naki cha' na' chizi' chilap' dii goz goon beñ' yoblə.”

²³ Na' daa nezilo' ka' chon', çberache ki bi'o xmechaa gon yichjin kwenche yikaan naa ba biyed'?”

²⁴ Na'ch chi'e beñ'ka' lle' na': “Li yikaa mecha' daa bi'ane' na' li we'n beena' bene' gan shin.”

²⁵ Na'ch che' beñ'ka'ne': “Xan', ba napkzə beena' shin.”

²⁶ Na' che' beñ' wñabia'na' legake': “Nia' le', beena' chonlene' llin daa yoo lo nee, wakch lall' nee dii xench; san beena' bi chonlene' llin daa yoo lo nee, axt daa ngoo lo nee

lat' yidoyo. ²⁷ Na' ka nak ben'ka' chakzbangakile' nad', ben'ka' bi cheengakile' inabi'a, li lljxi'gake' ni na' li witgake' ile'teid'."

Billin Jesúza' Jerusalénna'

(Mt. 21:1-11; Mr. 11:1-11; Jn 12:12-19)

²⁸ Na' ka wde wna Jesúza' ka', na'ch bigoolene' nez ben'ka' nakgake'ne' txen ziyajgake' Jerusalénna'. ²⁹ Na' ka billingake' xni'a yaa daa le Yaa Olivos, gaozə yellka' le Betfagé na' Betania, na'ch bselee chop ben'ka' nakgake'ne' txen, ³⁰ na' chi'e legake':

—Li shaj yella' llia na', na' ka illinle ile'ile to burr chbando', ba konon' kwia, da'b yag. Na' wsell-leb wche'leb nilə. ³¹ Na' shi no inaz le': "¿Berache chsellzleb?", na' ye'lene': "Xanchonan' chyalljile'b."

³² Na'ch wyaj ben'ka' bselee, na' ka bllingake' ble'gakile' to burr chbando' da'b yag, kon kayen' goll Jesúza' legake'. ³³ Na' ka chsellgake' burra' na'ch che' xama' legake':

—¿Berache chsell-leb?

³⁴ Na'ch che'gake'ne':

—Xanchonan' chyalljile'b.

³⁵ Na'ch bche'gake'b jwa'gake'b lao Jesúza' na' bxoagake' xe'ka' koll'ba' na' blliangake' Jesúza' koll'ba'. ³⁶ Na' shlak zej Jesúza' llie' burra', chshilj xa ben'ka' tlo neza'. ³⁷ Na' ka ba chillingake' gaozə gana' chiyetj nez daa ziza' Yaa Olivoza', yog'lol ben'ka' nakgake'ne' txen chosyaagake' daa chibagakile' na' choe'la'ogake' Chioza' daa ble'gakile' yog' yel' wakka' bene'. ³⁸ Na'ch nagake':

—¿Gaklenshga Xancho Chioza' beeni ba bselee inabi'e! ¡Li da, we'la'ocho Chioza' zoa yabana' daa bene' ka zoalenchone' mbalaz!

³⁹ Na' bal' fariseoka' len ladj ben'ka' no Jesúza', che'gake'ne':

—Maestro, goll ben'ki nakgake' li' txen soagake' llizə.

⁴⁰ Na' che' Jesúza' legake':

—Nia' le', shi ben'ki soagake' llizə, na' yaj kilə solo gosyaagakan we'la'ogakan nad'.

⁴¹ Na' ka billine' gaozə yell Jerusalénna', gokyeshile' ka ble'ile'n na' wchelle' che ben'ka' zoa na'. ⁴² Na' chi'e:

—¿Shel'ka' naanlla gakbe'ile nakan gonle kwenche soale mbalaz! Per ngashaan laolena' na' aga wakbe'kzile. ⁴³ Wllin lla ila' ben'ka' chakzbangakile' le' na' wzechjgake' yelli leej na' kono gak sho' ichej. ⁴⁴ Na' ni sto yaj che lill-leka' bich yikwaangake' koll' ljwellin, na' witgake' le' len xiinleka', la' bi gokbe'ile ka bla' Chioza' ladjleni.

Bishesh Jesúza' ben'ka' chit' chde lesh' chyoodo'na'

(Mt. 21:12-17; Mr. 11:15-19; Jn 2:13-22)

⁴⁵ Na'ch ka bllin Jesúza' cho'a yoodo'na' na' bisheshe' ben'ka' chit' chde. ⁴⁶ Na' chi'e legake':

—Cho'a Xtill' Chioza' nan: "Lilla'na' nakan ga choe'lwill ben' nad'", na' le' naa ba nonzlen ka to ga chdop chllag wban.

⁴⁷ Na' yog' lla bli' bsedi Jesúza' ben' gana' zoa yoodo'na', na' bxoazka' chnabia' na' ben'ka' chli' chsedi leya' na' nochlə ben' wnabia' che ben' Israelka' la'kzi biyiljlall'gake' naklə gongake' kwenche witgake'ne' ⁴⁸ bikzə bi gok gongake', la' yog'zə ben' chibagakile' chzenaggake' dill'ka' cho'e.

20

Yel' wnabia' che Jesúza'

(Mt. 21:23-27; Mr. 11:27-33)

¹ Na' bllin to lla, shlak chli' chsedi Jesúza' ben'ka' lesh' chyoodo'na' na' chyixje'ile' legake' dill' wen dill' kob che Chioza', bllin bxoazka' chnabia' na' ben'ka' chli' chsedi leya' len ben' golka' chnabia'. ² Na' che'gake'ne':

—Wnashki neto', ¿bi yel' wñabia' napo' chono' diiki? Na' ¿nora ben' li' yel' wñabia'ni?

³ Na'ch che' Jesúza' legake':

—Lekzka' nad' de to dii inabid' le', li inashki nad': ⁴ ¿Noran bsel' Juanna' kwenche bidchoe' ben' nisa'? ¿AChiozan' bseleene'? ¿Anti ben' yell-liona'zan bseleene', lla?

⁵ Na'ch wzologake' choe'len ljwellgake' dill', che'gake':

—¿Nakra ka ye'chone', lla? Shi ye'chone' Chioza' bseleene', lobe' ine' cho': “¿Berache ki wyajle'le che', shka'?” ⁶ Na' shi yize'chone' nozə ben' bseleene', yog' ben'ki wlligake' cho' yaj witgake' cho', la' yog'gake' chajle'gake' Juanna' bi'e dill' daa goll Chioza'ne'.

⁷ Na'ch gollgake' Jesúza':

—Bi nezinto' no bsel' beena'.

⁸ Na'ch che' Jesúza' legake':

—Lekzka' nad' aga wnia' le' noran ben' nad' yel' wñabia'na' kwenche chon' diiki.

Jempl che wen llin malka'

(Mt. 21:33-44; Mr. 12:1-11)

⁹ Na' Jesúza' bseese to jempl lao ben'ka' lle' na':

—To ben' billee yag uva, na' bene'n lall' na' ben'ka' gap wwian, na' wzee wyaje' ssha gan yoblə. ¹⁰ Na' ka bizi' bilap ben'ka' uvana', xaninna' bselee to wen llin che' kwenche lljelle' ben'ka' nak lall' na'gake' yag uvaka' we'gake'ne' daa chidolee yikee. Na' ben'ka' chapgake' yag uvaka' bex'gake'ne' bet wdingake'ne', na'tech bilaggake'ne' to ka' che'. ¹¹ Na'ch bselee sto wen llin che'na'. Na' lekzka' bet wdingake'ne', na' biya dii bengakile'ne', na' bizlaggake'ne' to ka' che'. ¹² Na'ch de wyon shii, bizselee wen llin yoblə, na' lekzka' bengake'ne' bido we'zi, na' bizlaggake'ne'.

¹³ Na'ch chaki xan yag uvaka': “¿Nakra ka gona'n? Wsel'shkid' bi' cha'ni, bi'ni le chakid'. Shera shicholə wzenaggake' cheb'.” ¹⁴ Na' ka ble'i ben'ka' chap yag uvaka' xiine'na', na'ch che' ljwelle': “Bi'nin yigaanlem' yell-lioni. Li da witchob' kwenche yigaanlenchon.” ¹⁵ Na' wlejgake'b' gana' lle' yag uvaka' na' betgake'b'.

Na'ch wñabi Jesúza' ben'ka' chzenag:

—¿Nakra ka chakile goni xan yag uvaka' ben'ka', lla? ¹⁶ Ba nakten shaje' na' lljete' ben'ka' chap yag uva che'na' na' yiyone' yell-lio che'na' lall' na' ben' yoblə.

Na' ka beni ben'ka' wne' ka', na' wnagake':

—¿Bat we' Chioza' latj gak ka'!

¹⁷ Na' bwia Jesúza' legake', chi'e:

—¿Beran zevin Cho'a Xtill' Chioza' gana' na:

Yaja' daa bi wyoolall' wen yooka',

leyen'lannan' yaja' daa ba nchejcha yoon'a?

¹⁸ Nottezə ben' lljchaze' lawinna' kwiayee, na' shi idakwan ben', ax̄t wshoshjan le'.

Janabgakile' Jesúza' shi chiyal' chixjgake' daa chñab beena' chñabia' Rómana'

(Mt. 21:45-46; 22:15-22; Mr. 12:12-17)

¹⁹ Na' bxozka' chñabia' na' ben'ka' chli' chsedi leya' goklall'gake' gox'gake' Jesúza' ka biyoll golle' ka', la' gokbe'gakile' chezgaken' wnie' daa bi chajle'gake' che'. Per blleb'gake' ben'ka' ndop nllag na'. ²⁰ Na'ch bsel'gake' to chop ben' wiwia wiyi, na' bentezgake' ka ben' cheenchgayi wzenag che'. Per aga do lall'gaken' wyajgake', san kwenchezə kwejyelgakile' Jesúzan' na' lljadaogake' xya che' lao beena' chñabia' gana' mbani Judeana'. ²¹ Na' wñabgakile'ne':

—Maestro, nezinto' daa no' na' daa chli'o nakan dii li, na' aga chwio' nak nak ben', shi nake' ben' zakii wa shi bi nake'. Nezinto' chli'o nez li che Chioza' kon ka nakan.

²² Wnashki neto': ¿Achiyal' chixjcho daa chñab Césara', beena' chñabia', anti bi chiyal' chixjchon?

²³ Na' gokbe'i Jesúza' aga do lall'gaken' wñabgakile'ne', na'ch chi'e:

24 —Li wli'shkayi nad' to mech. ¿Nora cho'alawin na' no leyin da'n?

Na' che'gake'ne':

—Che Césarán', beena' chñabia' Rómana'.

25 Na'ch chi'e:

—Na'len, li we' Césara' daa naki che', na' lekzka' li we' Chioza' daa naki che'.

26 Na' ni shcho'a dill' daa bi'e lao ben'ka' bi gok wchingake'n kwenche gaogake' xya che'. Na' bibangakile' ka golle' legake' na' bibe'gake' llizə.

Wnabgakile' Jesúza' nak gak kat' yiban ben' wetka'

(Mt. 22:23-33; Mr. 12:18-27)

27 Ka wde dga, bllin bal saduceoka' lao Jesúza', ben'ka' bi chajle' daa yiban ben' wetka'. Na'ch che'gake' Jesúza':

28 —Maestro, leya' bzej dii Moiséza' nan: shi to ben' byo guete' na' igaan xoolena' wizeb na' kono xiingake' wzoa, ben' bish' ben' weta' chiyal' yikee nool wizeba' kwenche soa xiin dia che dii ben' bisheena'. 29 Ki gok to shii, wzoa gall bish' ben', na' ben' necha' bshagnee, na' wite' na' kono xiine' wzoa. 30 Na' ben' wchopina' bikee noola', na' lekzka' wite' na' kono xiine' wzoa. 31 Na' ben' wyonina', lekzka' bizkee noola', na' wizete' na' kono xiine' wzoa. Na' lekzka' ben'ka' zi tap bizkaagake' noola' na' witgake', na' ni to ben'ka' gall bi wzoa xiingake' kon noola'. 32 Na' ka bllin lla lekzka' wit noola'. 33 Na' kat' yiban ben' wetka', ¿norayen'en' gak ben' che', lla?, la' galltien' wzoalene'.

34 Na'ch che' Jesúza' legake':

—Ben'ka' lle' yell-lioni naa chkaa ljwellgake', na' lekzka' choe' yel' wishagna' che xiine'ka'. 35 San ben'ka' ina Chioza' zak'gake' yiyajgake' gana' zoe' ka yibangake' ladj ben' wetka', aga ka'chan gongake'. La' koch no wshagna' gana' zoa Chioza', 36 ni koch no guet, san soagake' ka zoa anjlka'. Na' gaggake' xiin Chios daa ba bisbane' legake' ladj ben' wetka'. 37 Kwin dii Moiséza' bzeje' kwenche inezicho yiban ben' wetka' kana' bzeje' che yag yeshaa daa ble'ile' chal'nin. Na' wne' Xancho Chioza' nake' Chios che Abrahama', Isaaca' na' Jacoba'. 38 Na' Chioza' aga nake' Chios che ben' wet, san nake' Chios che ben' de yel' mban cheyin. La' yog'lol ben' nxenilallii Chioza', dekzə yel' mban chegake'.

39 Na'ch bal ben'ka' chli' chsedi leya' gollgake'ne':

—Maestro, ka ba wnaeyenoon nakan.

40 Na' bich bi biyaxjchgakile' inabchgakile'ne'.

Crístona' nake' xiin dia che dii Davina'

(Mt. 22:41-46; Mr. 12:35-37)

41 Na' che' Jesúza' legake':

—¿Berache nazə ben' Crístona' nake' xiin dia che dii Davina'?, 42 len kwin dii Davinan' bzeje' lee libr che Sálmoka' gana' na:

Xancho Chioza' golle' Xan'na':

“Wche' kwit' de shli ni

43 shlak wzoa' xni'ona' ben'ka' chakzbani li.”

44 ¿Berache chakzile Crístona' nake' xiin dia che dii Davina', len kwin Davina' golle'ne': “Xan”?

Jesúza' wne' nan ben'ka' chli' chsedi leya' chongake' mal

(Mt. 23:1-36; Mr. 12:38-40; Lc. 11:37-54)

45 Na' shlak chzenag yog' ben'ka' lle' na', Jesúza' golle' ben'ka' nakgake'ne' txen:

46 —Li wsak' bi gonle ka chon ben'ki chli' chsedi leya'. Le chibagakile' gon xe'ka' dii ton, na' cheengakile' yog'zə ben' gapgake' legake' balaan ladj lkwe' ben'. Na' gana' chdop chllagcho choe'lwillcho Chioza' chbagakile' kwe'gake' gana' chbe' ben'ka' zakii, na' ka'kzə chongake' ga de yel' waw. 47 Na' lekzka' chkaatezgake' lill nool wizebka', na' chongake' ka chshaljlen Chioza' ssha nleeb kwenche gaki ben' le wen chongake'. Na' daa chongake' ka', ba nakten ile'gakile' yel' zak'zi' wala'.

21

Daa bzani to nool wizeb, bi'en Chioza'
(Mr. 12:41-44)

¹ Na' ble'i Jesúza' ka chgoo ben' wni'aka' mecha' gana' chgoo ben' mech che yoodo'na'.
² Na' lekzka' ble'ile' to nool yesh', ben' wizeb, wlo'e chop sintabdo'. ³ Na' goll Jesúza' legake':
—Dii li nia' le', la'kzi nool wizebi nake' ben' yesh', ba be'che' dii xench aga ka yog'te
ben'ka'. ⁴ La' yog'gake' choe'gake' daa chichoonan che'ka', na' le', naktie' ben' yesh', wlo'e
doxen daa nape', la'kzi chyalljile'n.

Jesúza' chi'e wllin to lla kwiayi' yoodo'na'
(Mt. 24:1-2; Mr. 13:1-2)

⁵ Na' bal' ben'ka' choe'gake' xtill' yoodo'na' ka xochi nak yajka' nongakile'n na' diika'
bzani ben' be'gake'n yoodo'na'. Na'ch che' Jesúza' legake':

⁶ —Ka nak diiki chwiale naa, wllin lla kwiayi' yogaan, ni sto yaj bich kwia koll' ljwellin.

Diika' gak kat' ba zoa te che yell-lioni
(Mt. 24:3-28; Mr. 13:3-23)

⁷ Na'ch wñabgakile' Jesúza', che'gake'ne':

—Maestro, ¿batran gak dga ba wno'? ¿Bera ka ile'into' gak kwenche inezinto' nan ba zoa
gaoshosh gakan?

⁸ Na'ch che' Jesúza' legake':

—Li wsak' bi we'le latj no siye' le'. La' ben' zan zi ichej gonzgake' ka nad', na' inazgake':
“Nadaan Crístona”, na' lekzka' inazgake': “Ba bllin lla kwiayi' yell-lioni.” Bi gonle legake'
txen. ⁹ Na' ka yenile chak no wdil wa chtop chshag ljwell ben' kwenche soshiyigake' ben'
wñabia'ka', bi illeble. Chonan byen zigaate gak diiki, per aga lii tete che yell-lioni kat' ba
chakgakan.

¹⁰ Na'ch golle' legake':

—Ganga kwe' wdila' na' til yell kon yell. ¹¹ Na' gak no bedxo' wal, na' gat' wbin, na' biya
yillwe' kwe' lo yell-lioni, na' biya dii gak xan yabana' dii wwall wsheban ben'.

¹² Na' ka zi gak diiki, gox'gake' le' na' biya dii gongakile' le'. Na' lljwa'gake' le' gana'
chdop chllagcho choe'lwill-cho Chioza' na' yiya yiyiljgake' le' na' koogake' le' lillya, na'
lljwa'gake' le' lao ben' wñabia' xenka' na' lao ben' wñabia'ka' sto ni cha'. ¹³ Na' kat' gak
chele ka', na'chlə gat' latj we'le cho'a xtillaana' lawe'ka'. ¹⁴ Na' bi sezle wñeyi naklə inale
kat' lljsele lao ben' wñabia'ka', ¹⁵ la' nad'kzan wzajniid' le' nakan inale na' gon' le' yel'
sin'na' kwenche ni to ben'ka' chakzbangakile' le' bi sogakile' inagake' bi nakan ka nale.
¹⁶ Na' no xaxna'tezle, no ben' bish'le, no dialla chele, na' no ben' zoalenle wen gongake'
le' lo na' ben' wñabia'ka', na' witgake' bal-le. ¹⁷ Na' axt yog'zə ben' gakzbangakile' le' daa
nonlilall'le nad'. ¹⁸ Per li koo yichjle, Chioza' gaklene' le' na' ni tlish' yish' yichjlēna' bi
kwiayi'. ¹⁹ Na' shi sechale lawi daa yen ile'ile na' bi gakchoplall'le, na'chan gat' to yel'
mban chele dii bi te cheyin.

²⁰ Na' kat' ile'ile nechj soldadka' Jerusalenni, kanan' inezile nan ba zoa kwiayi'n.

²¹ Na'ch ben'ka' lle' gani mbani Judeani, chiyal' wxonjgake' lljakwash'gake' do yaa yaoka',
na' ben'ka' lle' yelli, chiyal' wxonjgake', na' ben'ka' zej lyixaa, bichoklə yiyedgake' yelli.

²² La' kanan' gon Chioza' yel' zi' che yog'ze' kwenche yillinin doxen ka na Cho'a Xtilleena'.

²³ Nyesh'laz wal gak che noolka' noa' na' noolka' chwall' chxop llana' gak diiki! La' dii xen
daa yen ile'i ben' Israelki. ²⁴ Balgake' guet lo wdila' na' zi bale' wche'gake' pres yell zit'ka'.
Na' ben' zit'ka' wlej wshoshjgake' yell Jerusalenni axt kat'ch illin lla yiyoll yido ka lia bia'
gongake'.

Kat'ka' yiyed Jesúza'
(Mt. 24:29-35, 42-44; Mr. 13:24-37)

²⁵ 'Na' lo wbillā', lo bewaa na'ch lo beljka' gak dii gonan ka yibani beṅ'. Na' beṅ'ka' lle' yell-lioni gakshejlall'gake' na' illebgake' kat' gon nisdo'na' sshag wal daa so' kwe'n. ²⁶ Na' axt i'chol-lall' beṅ' daa chllebgake' kwiayi'lengake' yell-lioni, la' axt yog' diika' lliā xan yabana' inibgakan. ²⁷ Na'ch ile'gakile' nad', Beṅ' Bsel' Chioza' Yell-lioni, zizaa to lo bej kon yel' wak xen na' balaan xen. ²⁸ Na' kat' solo gak diiki, li wtipch lall'le, la' ba zoa gaoshosh yidsla' len'.

²⁹ Na' lekzka' bsees' Jesúza' to jempl chi'e:

—Li wwiakachi yag yixwewa' wa bichlā yag. ³⁰ Kat' chle'ile ba chibia xlaguiinka', chakbe'ile ba zoa yiyoo la'o linna'. ³¹ Ka'kzə, kat' ile'ile ba chak diiki ba wnia', chiyal' inezile ba zoa gao wli' Chioza' yel' wṅabia' che'na'.

³² 'Dii li nia' le', aga ba wit beṅ'ka' zoa ṅaa kat' gak yog' diiki. ³³ 'Yabana' na' yell-lioni te chegakin, san cho'a xtillaana' aga wde bi gak ka nan.

³⁴ 'Li wsak' bi we'le latj sho' diika' wxinjan yichjlall'do'lēna'. Bi wlanzle yel' weezo, na' bi sezle wṅeyi bi chak chele. Li wsak' kwenche aga sha chel-le chon llana' zizaa. ³⁵ La' tokonganān gak diiki yen ile'i yog'te beṅ'ka' lle' doxen yell-lioni. ³⁶ Na' le', li se wṅeyi, li inabi Chioza' toshiizi gaklene' le' kwenche yilale lao yog' diiki lliā bia' gak, na' kwenche bi gall illeble sele lawa'na', nad', Beṅ' Bsel' Chioza' Yell-lioni.

³⁷ Na' Jesúza' bli' bsdile' beṅ' yog' lla yoodo'na', na' ka chal, chjagaane' lo Yaa Olívoza'.

³⁸ Na' yog' zil yog' beṅ' chajgake' yoodo'na' chjazenaggake' daa chli' chsedile'.

22

Wloogake' xnezin witgake' Jesúza'

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Ba zoa gaozə lni Paskwa' kat' chaogake' yetxtil daa bi nchix levadúrana'. ² Na' bṅozka' chṅabia' len beṅ'ka' chli' chsedile' leya' chiyiljlall'gake' naklā gongake' witgake' Jesúza' ka kono gakbe'i, la' bllēbgake' shi bi goni beṅ' wlall' che'ka' legake'.

³ Na'ch xan dii xiw'ka' daa le Satanás wyoon loo yichjlall'do' Jud Scariota', beena' nak txen beṅ'ka' shllin. ⁴ Na' wyaje' lao bṅozka' chṅabia' len lao beṅ'ka' ngoo lall' na' beṅ'ka' chap yoodo'na', na' bi'e dill' nakan gone' Jesúza' lall' na'gake'. ⁵ Na' le' bibagakile' na' bchebgake' we'gake'ne' mech. ⁶ Na'ch bchebe' gone'ne' lall' na'gake'. Na' wzolo chinoe' batan gat' latj kat' kono beṅ' lle' gone' Jesúza' lall' na'gake'.

Lle'na' zeelo wdaolengake' Jesúza'

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Na' bllin llana' chsini'agake' che lṅina', llana' chzolo chaogake' yetxtil daa bi nchix levadúrana' na' chitgake' to xil'do', bana' gaogake' lle' Paskwa'. ⁸ Na'ch wlej Jesúza' Pédrona' len Juanna' na' chi'e legake':

—Li lljasini'a daa gaocho lni Paskwi.

⁹ Na'ch che'gake'ne':

—¿Garan cheenilo' lljasini'anto'n?

¹⁰ Na' che' Jesúza' legake':

—Ka sho'le Jerusalēna', na' ile'ile to beṅ' byo zino'e to chee nis, na' li lljanoe' axt yoona' gana' yilline'. ¹¹ Na' ye'le xan yoona': “Maestrona' chṅabile' li': ¿Garan zoa yoona' wyoone' gana' gaolene' beṅ'ka' nakgake'ne' txen lle' Paskwi?” ¹² Na' wliile' le' to yoo xen dii lliā shkwiana' cha'lə ga ba nonshao'tie'. Nan' wsini'ale daa gaocho xshe'na'.

¹³ Na' wloogake' nez zejgake', na' kon kayen' golle' legake' gok. Na' bsini'agake' daa wdaogake' lle' lni Paskwa'.

¹⁴ Na' ka gol' gaogake' xshe'na', Jesúza' wche'lene' postl che'ka' cho'a mesa'. ¹⁵ Na'ch chi'e legake':

—Ba goklall'chga' yeej gaolen' le' lni Paskwi naa bin' witgake' nad'. ¹⁶ Na' ba nia' le', zeelo naa cheej chaw' dga. Bichga yeej gawa'n axt ki illin llana' wli' Chioza' yel' wñabia' xen che'na', kana'ch yeej gawa'n dii yoblə.

¹⁷ Na' bexee kopa' na' bi'e Chioza' yel' choxken, na' chi'e:

—Li gox' dga, li yeejan lat' wej. ¹⁸ Na' nia' le', bichga yeej' nis uvani axt ki illin lla wli' Chioza' yel' wñabia' xen che'na'.

¹⁹ Na'ch bexee yetxtila' na' bi'e yel' choxken Chioza'. Na' bxoxje'n bi'en legake' kwenche wdaogake'n, na' chi'e:

—Dgan kwerp cha'ni, chzanlallidaan ni chele. Kin gonle kwenche lljadinile nad'.

²⁰ Na' lekzka' bene' ka wde wdaogake' xshe'na', bexee kopa' sto shii, na'ch chi'e:

—Dga yoll loo kopi zejín xchen'na' daa laljə ni chele daa gonan ka gakti dii koba' bcheb Chioza' gone'.

²¹ Na' naa, beena' gone' nad' lo na' ben'ka' chakzi'gakile' nad' chi'lene' nad' cho'a mesi.

²² La' ba bllin lla gak ka nak daa llia bia' gak cha', nad', Ben' Bsel' Chioza' Yell-lioni, per jnyesh'laz gak che beena' gone' nad' lo na' ben' malka'!

²³ Na'ch ben'ka' nakgake'ne' txen wzologake' chnabi ljwellgake' noen' gone'ne' lo na' ben'ka'.

Gokgued ben'ka' nak Jesúza' txen nogaken' zak'chi

²⁴ Na' lekzka' chakdil-len ljwellgake' nogaken' nak ben' zak'chi. ²⁵ Na' che' Jesúza' legake':

—Zoa ben' wñabia' to to nación, na' chongake' byen chzenag ben' chegake', na' nagake' che kwingake' le chaklengake' ben'. ²⁶ San le', bi chiya' gonle ka'. Shi nole nakle ben' zakii, chiya' wchek' yichjle ka to bi' xkwid', na' shi nole chñabia', chiya' gonle ka notteza ben' wen mandad. ²⁷ ¿Noran nak ben' zak'chi?, ¿abeena' chbe' cho'a mesa' chawe'?, ¿anti beena' chon mandadan', lla? Beena' chi' cho'a mesan' nake' ben' zak'chi. San nad', la'kzi naktia' xanle, zoa' ladjleni ka to ben' wen mandad chele.

²⁸ Le' ba wzoalenle nad' lao yog'te daa ba gok cha'. ²⁹ Na' daan, gon' le' yel' wñabia'na' ka daa ben' Xa'na' nad'. ³⁰ Na' yeej gaolenle nad' gana' inabi'a. Na' kwe'le gana' inabi'a'le yizi'le kwent che shllin kwen ben'ka' nak xiin dia che dii Israela'.

Jesúza' wne' bi wcheb Pédróna' shi nombi'ene'

(Mt. 26:31-35; Mr. 14:27-31; Jn. 13:36-38)

³¹ Na' lekzka' golle' Simón Pédróna':

—Simón, Simón, Satanáza', daa chñabia' dii xiw'ka', ba wñaban le' gakte lo na'yin kwenche gondinj gonganin le'. ³² Na' nad' ba wñabid' Chioza' gaktene' li', Simón, kwenche gonlilall'cho nad'. Na' kat' ba biyajilo' cheyi daa gono', na' gaktene' ben'ki nako' txen kwenche soachehgake' gonlilall'gake' nad'.

³³ Na' che' Simónna':

—Xan', ba nchoglallaa laa lillyana' sa'len' li' wa axt guetlen' li' txen.

³⁴ Na' che' Jesúza':

—Pedro, nia' li', naanlle' shon shii bi wchebo' shi nombi'o nad' ka zi' kwell shikwteza'.

Ba zoa gaoz wtil' Jesúza' daa gak che'

³⁵ Na'ch che' Jesúza' legake':

—¿Azyalljile bi byalljile kana' bselaa le' na' bibi be'le, ni ga koo xalaanle, ni mech na' ni xel-le?

Na' che'gake':

—Bibi byalljinto'.

³⁶ Na'ch golle':

—Per naach nia' le', shi de ga chgoo xalaanle, li goxaan, na' shi de xmechle, li wa'n; na' shi nole bi de spad chele, li lljayet' xalena' na' li si' tlisha'n. ³⁷ Nia' le', chonan byen gak

cha' kon ka na Cho'a Xtill' Chioza' gana' na: “Gongakile'ne' ka chongakile' to ben' wen dii mal.”

³⁸ Na' che'gake':

—Xan', ni napnto' chop spad.

Na' chi'e:

—Lliz li soachoklə.

Be'lwil Jesúza' Chioza' gana' le Getsemani'

(Mt. 26:36-46; Mr. 14:32-42)

³⁹ Na'ch biza' Jesúza', na' kon ka yooloe' chone' biyaje' lo Yaa Olívoza', na' zjano ben'ka' nakgake'ne' txen. ⁴⁰ Na' ka bllingake' latja', na' chi'e legake':

—Li we'lwil Chioza' kwenche bi we'zle latj gon beli chenna' le' gan.

⁴¹ Na' bkwase' kwite'ka', ka to ga zeelo chllin to yaj dii chzal'cho, na'ch bchek' xibe'na' be'lwille' Chioza'. ⁴² Na' golle':

—Xa, shi li' cheenilo', bislagach nad' lawi dga ba zoa idil illag'; per aga gak ka cheenid', san gak ka cheenilo'.

⁴³ Na'ch bli'lao to anjl ben' za' yabana' le', na' biyo'ene' fuerz. ⁴⁴ Na' daa le chakyesh'chgaile', zizikli be'lwilche' Chioza' axt biyaklolje'. Na' nis yes che'na' daa chxop lo yona' nakan ka to blon wej chen.

⁴⁵ Biyoll be'lwille' Chioza', na' bizollee biyaje' gana' lle' ben'ka' nakgake'ne' txen, na' ka billine' kwite'ka' ba chesgake' daa chakyesh'gakile'. ⁴⁶ Na' chi'e legake':

—¿Berache cheszele? Li chas na' li we'lwil Chioza' kwenche bi we'zle latj gon beli chenna' le' gan.

Bex'gake' Jesúza'

(Mt. 26:47-56; Mr. 14:43-50; Jn. 18:2-11)

⁴⁷ Ni choe'te Jesúza' dill', ka bllin ben' zan, na' beena' le Jud, beena' nak txen ben'ka' shllin, nchi'e legake'. Na' ka blline' jabiguee kwit Jesúza' na' bnopex' xagueena'. ⁴⁸ Na'ch che' Jesúza'ne':

—Jud, ¿akon dga bnopo' nad' chono' nad', Ben' Bsel' Chioza' Yell-lioni, lo na' ben'ki?

⁴⁹ Na' ben'ka' lle'len Jesúza', ka ble'gakile' ka ba chak che', na'ch gollgake'ne':

—Xan', ¿awñiyainto' spadki?

⁵⁰ Na' toe' lii wdintie'n to mos che bxoz choo bxoz xenna' bhogtie' nague' de shlina'.

⁵¹ Na' che' Jesúza':

—Bich bi gonile ben'ka'.

Na'ch bida' Jesúza' nag beena'. ⁵² Na' daa bllin bxozka' chñabia' len ben'ka' chap yoodo'na', na' ben' golka' chñabia', kwenche gox'gake'ne', chi'e legake':

—¿Berache za'zle nox'le yag na' spad kwenche zidñizle nad' ka to no ben' wban? ⁵³ Yog' lla wzoa' ladjlana' yoodo'na' na' bi bex'le nad'. Per ñaach bllin lla gonle ka cheenile na' ñaayen' chñabia' dii mala' daa chñabia' gana' shgasj shchol.

Bi bcheb Pédrona' shi nombi'e Jesúza'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Na'ch bnizgake' Jesúza' na' bche'gake'ne' lill bxoz choo bxoz xenna', na' zit' zit'lə zjano Pédrona'ne'. ⁵⁵ Na' bxengake' yi'na' lesh' chyoo che bxoz choo bxoz xenna' na' wche'gake' cho'a yi'na', na' wlen Pédrona' legake'. ⁵⁶ Na' to noolə wen mandad, ka ble'ile' chi' Pédrona' cho'a yi'na', lii wzetie' chwie'ne', na' chi'e:

—Lekzka' len beenin nake' Jesúza' txen.

⁵⁷ Na' Pédrona' aga bchebe', na' chi'ene':

—Noolə, aga nombi'a beena'.

⁵⁸ Na' gokzə xtit bizle'i ben' yoblə Pédrona' na' chizi'ene':

—Lekzka' lenon' nako' ben'ka' txen.

Na' Pédróna' chi'ene':

—Bi len' nak' beṇ'ka' txen.

⁵⁹ Na' wizak ka do zi' tgor na' wize' sto beṇ' yoblə:

—Dii likzan len beeni nake' txen Jesúza' la' lekzka' beṇ' Galilean.

⁶⁰ Na'ch che' Pédróna'ne':

—iNi bi nezid' bi dillaan choo!

Na' ni che'telə Pédróna' ka', ka wchell to shikwtez. ⁶¹ Na'ch biyechj Xancho Jesúza' bwie' Pédróna', na' Pédróna' jadinile' daa golle'ne', kana' chi'e: “Naanlle' shon shii bi wchebo' shi nombi'o nad' ka zi' kwell shikwteza.” ⁶² Na' bichej Pédróna' gana' lle' beṇ'ka' na' wchellyeshee.

Btitjgakile' Jesúza'

(Mt. 26:67-68; Mr. 14:65)

⁶³ Na'ch beṇ'ka' chapgake' Jesúza' btitjgakile'ne' na' wdap' wlall'gake'ne'. ⁶⁴ Na' bsejgake' jalawe'na', na'ch wlall'gake'ne', che'gake'ne':

—iWnashki non wlall' li'!

⁶⁵ Na' biya dii gollgake'ne' kwenche'gakile' zi'.

Wde Jesúza' lao beṇ'ka' chṇabia'gake' beṇ' Israelka'

(Mt. 26:59-66; Mr. 14:55-64; Jn. 18:19-24)

⁶⁶ Na' ka wyeeni', bidop beṇ'ka' chṇabia' beṇ' Israelka', len bṇozka' chṇabia' na' beṇ'ka' chli' chsedi leya'. Na' bdegake' Jesúza' lawe'ka'. Na'ch wṇabgakile'ne', che'gake':

⁶⁷ —Wnashki neto' shi li'kzan Crístona', beena' chbeznto'.

Na' che' Jesúza':

—Shi inia' le': “Awe, nadaan”, aga wyajle'le' cha'. ⁶⁸ Na' shi inabid' le' bi dii inabid' le', aga williilen na' ni bi yisanle nad', shi naa. ⁶⁹ Na' naate, nad', Beṇ' Bsel' Chioza' Yell-lioni, kwi'a kwit de shli' che Chioza', beena' nap yel' wak xenna'.

⁷⁰ Na'ch yog'ze' wṇabgakile'ne':

—¿Ana' lin' nako' Xiiṇ Chioza'?

Na'ch che' Jesúza':

—Awe, shlikzan ba wnale.

⁷¹ Na'ch che' ljwellgake':

—Kochno chyalljicho gawe' xya che beeni. Kwintekzcho ba benicho ka ba wne'.

23

Wde Jesúza' lao Pilátóna'

(Mt. 27:1-2, 11-14; Mr. 15:1-5; Jn. 18:28-38)

¹ Na'ch yog'loḷ beṇ'ka' bizolla'gake' na' jwa'gake' Jesúza' lao Pilátóna'. ² Na'ch wzologake' chaogake' xya che Jesúza', che'gake':

—Ba bidolinto' beeni chta chṇie' beṇ' wlall' chento'ka'. Chi'e bi chiyaḷ' chixjcho daa chṇab Césara', beena' chṇabia', na' lekzka' naze' nake' Crístona', na' daa ne' ka' zejín nake' to beṇ' wṇabia'.

³ Na'ch wṇabi Pilátóna' Jesúza', chi'ene':

—¿Alin' nako' beṇ' wṇabia' che beṇ' Israelki?

Na'ch che' Jesúza'ne':

—Kan' nakan.

⁴ Na'ch che' Pilátóna' bṇozka' chṇabia' na' yog' beṇ'ka' lle' na':

—Ni to dii mal bi chillelid' chon beeni.

⁵ Na' zizikchli che'gake':

—Diika' chli' chsedile' chta chṇen yog'loḷ beṇ' lle' doxen lallnto'ni. Wzoloze' Galileana', na' axt Judeani ba bide'.

Bde Pilátóna' Jesúza' lao Heródeza'

⁶ Ka gollgake' Pilátóna' ka', na'ch wñabile' legake' shi nak Jesúza' ben' Galilea. ⁷ Na' ka wnezile' nake' ben' Galilea, na'ch bdie'ne' lao Heródeza', beena' nlane' chnabi'e Galileana', la' kana'yen' zoa Heródeza' Jerusalénna'. ⁸ Na' le bibayi Heródeza' ka ble'ile' Jesúza', la' ba wlla cheenile' ile'ile'ne' daa ba benile' choe' ben' xtilleena'. Na' goki Heródeza' ile'ile' gone' to yel' wak. ⁹ Na' biya dii wñabile' Jesúza', na' ni to daa wñabile'ne' bi billi'e. ¹⁰ Na' lezkza' na' lle' bñozka' chñabia' len ben'ka' chli' chsedi leya', na' zizikli chaogake' xya che Jesúza'. ¹¹ Na'ch Heródeza' len soldad che'ka' biya dii bengakile'ne', na' btitjgakile'ne' bwakwgake'ne' to lech' ka daa chakw to ben' wñabia'. Na'tech bizsel' Heródeza'ne' lao Pilátóna'. ¹² Na' lo llana' bizoalen Pilátóna' Heródeza' wen, la' kana'te chakzbani ljwelle'.

Bchoglogake' guet Jesúza'

(Mt. 27:15-26; Mr. 15:6-15; Jn. 18:39-19:16)

¹³ Na'ch biti'a Pilátóna' bñozka' chñabia', na' ben'ka' chñabia'gake' ben' Israelka' na'ch ben' yell, ¹⁴ na' golle' legake':

—Le' bidwa'le beeni lawii, nale chta chñie' ben', na' nad' ba wñabidee laoleni, na' bi chillelid' ni to daa nale che' shi li ka chone'n. ¹⁵ Na' ni Heródeza' bi billelile' shi bi dol' nap beeni, na' ba bizseleene' laochoni. Na' ba ble'teile aga bi bene' inacho wchoglozcho guete'. ¹⁶ Na' naa gon' mandad wit chingake'ne' na'tech yisane.

¹⁷ Na' ka chakz yog' yiz, chiyal' yisane' to beena' nej lillyana' kat' chal' lni Paskwa'. ¹⁸ Na' yog' ben'ka' ndop nllag na', wzologake' chosyaagake', che'gake':

—¡Guettega beeni! ¡Na' bisan Barrabáza'!

¹⁹ Nyixjgake' Barrabáza' lillyana' daa bxie' wdila' yell Jerusalénna', na' bettie' to ben'. ²⁰ Na' daa cheeni Pilátóna' yisane' Jesúza', na' stokzə wñabile' ben'ka' shi wisane'ne'. ²¹ Na' ben'ka' zizikchli chosyaagake', che'gake':

—¡Bdee lee yag cruza'! ¡Bdee lee yag cruza'!

²² Na' de wyon shiyi che' Pilátóna' legake':

—¿Bera dii malan' nezile ba ben beeni, lla? Bi chillelid' ni to dii mal dii ba bene' kwenche guete'. Gonch' mandad wit chingake'ne' na'tech yisane.

²³ Na' ben'ka' wzeyidgake' chosyaagake' chñabgakile'ne' wdeene' lee yag cruza'. Na' daa wzeyidgake' chosyaagake', bengake' gan wzoa xtilleeka'. ²⁴ Na' bchoglall' Pilátóna' gone' ka cheeni ben'ka'. ²⁵ Na' bisane' beena' wñabgake', beena' de lillyana' daa bxie' wdila' na' daa bettie' to ben'. Na' bene' Jesúza' lo na'gake' kwenche gongakile'ne' ka chaklall'gake'.

Bda'gake' Jesúza' lee yag cruza'

(Mt. 27:32-44; Mr. 15:22-32; Jn. 19:17-27)

²⁶ Na' ka nche'gake' Jesúza' lljada'gake'ne' lee yag cruza', billaggake' to ben' Cirene lie' Simón zizee lyixaa. Na' bex'gake'ne' bwa'gake'ne' yag cruz che Jesúza' na'ch janoe'ne'.

²⁷ Na' ben' zan zjanogake'ne', na' zan noolka' chbellgake' na' chosyaagake' ni che Jesúza'. ²⁸ Na' biyechj Jesúza' bwie' legake' na' golle':

—Le' nool Jerusalén, bi kwellzle cha'; li kwell che kwinle na' che xiinleka'. ²⁹ La' wllin lla kat' ina ben': “Chakomba nool willka', ben'ka' bi wxan na' bi bwall bñopgake'.” ³⁰ Na'ch ben'ka' zoa llana' gak ka', solo inagake': “Shel' iyinjtega yaa yaoki idakwtegan neto'.” ³¹ Shi yag yaa yag banna' chongakile'n kon daa nazan chegake', ¿alechla ki gongakile' yag billa'?

³² Na' lezkza' nche'gake' chop ben' wen dii mal kwenche witgake' legake' txen len Jesúza'. ³³ Na' ka bllingake' latja' gana' le Llit Yichj Ben' Wet, bda'gake' Jesúza' lee yag cruza'. Na' lezkza' bda'gake' chopte ben' wen dii malka' shlaa wej kwite'na'. ³⁴ Na' ka chda'gake' Jesúza' lee yag cruza', chi'e:

—Xa, wxi'xen chegake', la' aga nezgakile' bin chongake'.

Na' soldadka' bengake' to wyitj kwenche wnezgakile' nogake' yidol' xe'na'. ³⁵ Na' lle' ben' zan chwiagake', na' axt ben'ka' chñabia'gake' ben' Israelka' btitjgakile'ne', nagake':

—Gok bisle' beṅ' yoblə, na' ṅaa yishashki kwine' shi leile' len' Crístona', beena' ba wlej Chioza'.

³⁶ Na' lekzka' soldadka' btitjgakilene', na' jabig'gake' kwit yag cruza' gana' nda'gake'ne' na' bshabgakile'ne' to vino dii nak zichj zla'. ³⁷ Na' che'gake'ne':

—Shi lin' nako' beṅ' wṅabia' che beṅ' Israelki, bislashki kwino'.

³⁸ Na' yichj yag cruz che'na' bda'gake' to dii cho'en dill' biḅhe nda'gake'ne' lee yag cruza', nan: “Beenin beṅ' wṅabia' che beṅ' Israelka'.” Bzejgake'n dill' griego, dill' latín na' dill' hebreo.

³⁹ Na' to beṅ' wen dii mala', beena' da' kwit Jesúza', biya dii golle'ne', chi'ene':

—Shi lin' Crístona', Beena' Bsel' Chioza' inabia', bislashki kwino' na' lekzka' bisla neto'.

⁴⁰ Na' beena' sto bsheshlene'ne', chi'e:

—¿Abikzə chall chlleblatoo Chioza'?, len kon ka chak chen' ba chak cho'. ⁴¹ Cho', ka chiyal'kz gak chechon' kwenche chixjcho che dii mala' daa bencho; san beeni aga bi dii mal bene'.

⁴² Na'ch golle' Jesúza':

—Jesús, lljadingachilo' nad' kat'ka' solo inabi'o.

⁴³ Na'ch che' Jesúza'ne':

—Dii li nia' li', ṅaanlla soaleno' nad' latja' gana' nak mbalaz.

Wit Jesúza'

(Mt. 27:45-56; Mr. 15:33-41; Jn. 19:28-30)

⁴⁴ Na' do ka gobill biḅhoḷ doxen yell-liona', bllinte do ka chida shon, ⁴⁵ daa bich bzeeni' wbillla'. Na' lechaa ze loo yoodo'na' bllon' gokan chop laalə. ⁴⁶ Na'ch besyaa Jesúza' zilljə, chi'e:

—Xa, chiyon' bishbe cha'ni lall' noo.

Na' biyoll golle' ka' na'ch wite'.

⁴⁷ Na' ka ble'i beena' chṅabia' soldadka' diika' gok, be'lawee Chioza', chi'e:

—Dii li beeni nake' dowalj beṅ' wen.

⁴⁸ Na' yog' beṅ'ka' lle' na', ka ble'gakile' ka gok, ziyajgake' chball'gake' cho'alcho'eka'.

⁴⁹ Na' yog' beṅ'ka' nombia'gake' Jesúza', do noolka' za'lengake'ne' axt Galileana', wzegake' zit'lə chwiagake' ka gok.

Bkwash'gake' Jesúza'

(Mt. 27:57-61; Mr. 15:42-47; Jn. 19:38-42)

⁵⁰ Wzoa to beṅ' wlie' José, beṅ' yell Arimatea, daa mbani Judéana'. Na' Joséna' nake' txen beṅ'ka' chṅabia' beṅ' Israelka'. Nake' to beṅ' wen na' to beṅ' chon ka cheeni Chioza', ⁵¹ na' zoe' chbeze' wsel' Chioza' beena' inabia'. Na' Joséna' aga wyoolallee ka ben beṅ'ka' chṅabia'lene' daa betgake' Jesúza', na' bi benlene' legake' txen. ⁵² Na'ch wyaje' lao Pilátona' na' wṅabe' lsens yiletje' kwerp che Jesúza'. ⁵³ Na' biletje'ne' lee yag cruza', na'ch bitobe'ne' to lech' xen na' jlo'ene' to loo blej daa benschawee, ga bin' wkash'gake' ni tlish' beṅ' wet. ⁵⁴ Na' llana' gok diiki nakan lla chsini'a beṅ' Israelka' chegake' kwenche bibi llin gongake' lla sabda', llana' chombaṅgake', na' zi lat'zə chyallj solo llana' chombaṅgake'.

⁵⁵ Na' noolka' za'lengake' Jesúza' axt Galileana', wyajgake' jawiagake' bleja' na' jale'gakile' nak wdixjgake' kwerp che'na'. ⁵⁶ Na'ch biza'gake', na' ka billingake' gana' zoagake', benschao'gake' daa chla' zix. Na' bizi'lall'gake' lla sabda' kon ka na' leya'.

24

Biban Jesúza' ladj beṅ' wetka'

(Mt. 28:1-10; Mr. 16:1-8; Jn. 20:1-10)

¹ Na' lla necha' chizolo xmanna', wizaj noolka' ni bal' cho'a bana', nox'gake' diika' chla' zix daa benschao'gake', na' wyaj zi bal' noolə yoblə kon legake'. ² Na' ble'gakile' aga chi'ch yaja' cho'a bana'. ³ Na' wyoogake' loo bleja', na' ble'gakile' aga bich bi kwerp che

Xancho Jesúza' de na'. ⁴ Na' shlak chakgakile' bera zejin dga, kat'kzali ble'gakile' chop ben' byo, nakwgake' lech' dii chey cheeni', zegake' kwite'ka'. ⁵ Na' noolka' bblebchagagake' na' b'chek' yichje'ka' axt lo yona'. Na'ch ben'ka' zena' che'gake':

—¿Berache chiyiljzle beena' mban ladj ben' wetki? ⁶ Kochno de ni. Ba bibane' ladj ben' wetki. Li lljadini daa wne' le' kana' zoalene' le' Galileana'. ⁷ Wne' chonan byen Beena' Bsel' Chioza' Yell-lioni gake' lo na' ben' malka', na' witgake'ne' lee yag cruza', na' ka yiyon lla yibane' ladj ben' wetka'.

⁸ Na'ch jadini noolka' daa goll Jesúza' legake'. ⁹ Na' biza'gake' biyajgake' gana' lle' postlka' shnej len yog' ben'ka' sto gokgake'ne' txen, na' be'gake' dill' yog' daa gok chegake'. ¹⁰ Na' noolkin jayellgake' postlka' daa gok chegake': María ben' yell Magdálana', Juánana', María xna' Jacóbona', na' len zi bal nool yoblə. ¹¹ Na' postlka' ni lat' bi wyajle'gake' daa goll noolka' legake' daa gokgakile' bizan chon chnagake'.

¹² Na' Pédrona' wzee zejdoe' cho'a bana', na' ka blline', bwie' loo bleja' na' ble'ile' lech'ka' chi'gakan ka'lə. Na'ch bizee zjade' gana' zoe' chibanile' ka nak daa ba gok.

Bli'lao Jesúza' chop ben' tnez Emaúza'
(Mr. 16:12-13)

¹³ Na' lo llana' gok ka', chop ben'ka' nak Jesúza' txen wyajgake' to yell dii le Emaús, na' nlaa ljwellin ka do shnej kilometro kon Jerusalénna'. ¹⁴ Na' lo zej ngoogake' nez choe'gake' dill' cheyi diika' ba gok. ¹⁵ Na' shlak choe'gake' dill' cheyi diika' gok, na' jabig' kwin Jesúza' kwite'ka' na' zejlene' legake' txen. ¹⁶ Na' la'kzi chwiagake'ne', aga gokbe'gakile' no beena'. ¹⁷ Na'ch wñabi Jesúza' legake':

—¿Bera dillaan choe'le za'le ni? ¿Berache chakyesh'zile?

¹⁸ Na' toe', beena' le Cleofas, chi'ene':

—Yog'zə ben' nezgakile' daa ba gok Jerusalénna' llaki ba wde. ¿Astozo' li' bi nezilo' daa ba gok?

¹⁹ Na'ch chi'e' legake':

—¿Beran gok?

Na'ch che'gake':

—Diika' gok che Jesús, ben' Nazareta'. Goke' to ben' wdixjee daa che' Chioza'ne', na' bene' yel' wak na' bi'e dill' zakii dii nak shli lao Chioza' na' lao ben'. ²⁰ Na' bxozka' chñabia' na' ben'ka' chñabia'gake' cho' ben' Israel bengake'ne' lo na' joschiska' kwenche b'choglogake' che' guete', na' bda'gake'ne' lee yag cruza'. ²¹ Neto' nonnto' lez nan len' yibeje' cho' ben' Israel lo na' ben' zit'ka'. Na' ba gok shon lla gok diiki. ²² Na' bal noolka' nak neto' txen wyajgake' cho'a bana' daa baabali, na' le bibaninto' ka wñagake' ²³ bich ble'gakile' kwerp che'na' gana' bkwash'gake'ne'. Na'ch bila'gake' nagake' ble'gakile' chop anjl, ben' goll legake' mbankzə Jesúza'. ²⁴ Na'ch wyaj bal ben' byoka' nonlennto' txen cho'a bleja', na' nakan kon ka wna noolka', per aga no Jesúza' ble'gakile'.

²⁵ Na'ch che' Jesúza' legake':

—¿Le' ben' bi chajni! ¿Bi llabia' bat shajle'le daa bzej dii ben'ka' wdixjee daa goll Chioza' legake'! ²⁶ ¿Abi nezile lliakzə bia' biya daa yen ile'i beena' nak Crístona' ka zi' yiyo'e gana' sho'e balaan xenna'?

²⁷ Na'ch wzoloe' chzajniile' legake' Cho'a Xtill' Chioza' gana' cho'en dill' che kwine', wzoloe' zigaate kon daa bzej dii Moiséza', na'tech diika' bzej yog' ben'ka' wdixjee daa goll Chioza' legake'.

²⁸ Na' ka bllingake' yella' gana' zejgake', bentezə Jesúza' ka ben' shaj gan yoblə. ²⁹ Na' ben'ka' bengake' byen yigaanlene' legake', che'gake'ne':

—Bigaanlen neto', la' ba wlle' naa, na' ba chal.

Na'ch wyoo Jesúza' bigaanlene' legake'. ³⁰ Na' ka ba chi'gake' cho'a mesa', bexee to yetxtil na' bi'e yel' choxken Chioza', na'tech bxoxje'n na' bi'en legake'. ³¹ Na'ch biyombia'yen'gake' nan len' Jesúza', na' to binitloze'. ³² Na'ch che' ljwelle':

—¿Bera daan, axt mbalaz inleeb chibayi lall'do'chona' kana' za'cho tneza' choe'lene' cho' dill' chzajniile' cho' Cho'a Xtill' Chioza'!

³³ Na'ch lii biza'tegake' ziyajgake' Jerusalénna'. Na' ka billingake', ndop nllag postlka' shnej na' nochlā ben'ka' nakgake'ne' txen, ³⁴ na' gollgake' legake':

—Dii likzan ba biban Xanchona' ladj ben' wetka'. Ba bli'lawe' Simónni.

³⁵ Na'ch ben'ka' chop gollgake' legake' ka gok chegake' tneza', na' ka biyombia'gake' Jesúza' ka bxoxje' yetxtila' bi'en legake'.

Jali'lao Jesúza' ben'ka' nakgake'ne' txen

(Mt. 28:16-20; Mr. 16:14-18; Jn. 20:19-23)

³⁶ Na' shlak ni choe'gake' dillaa, tokonganzi jaze Jesúza' ladjeka' na' bwape' legake' chiox, chi'e legake':

—Soashgale mbalaz.

³⁷ Na' le bllebgake' daa chakgakile' yel bẋenzen chwiagake'. ³⁸ Na' che' Jesúza' legake':
—¿Beraçhe chllebzle? ¿Biçhe chak choplall'zle? ³⁹ Li wwia ni'a na'ki kwençhe inezile nad'kzan. Li gox' nad' kwençhe inezile aga nak' to yel bẋen, la' to yel bẋen bibi bel' bibi llit yoon ka nak' nad'.

⁴⁰ Na' ka golle' legake' ka', bliile' legake' ni'a neena'. ⁴¹ Na' yel' chiba chizaki che'ka' na' yel' chibanina', ni bi chakbe'gakile' shi lekzen'. Na'ch chi'e legake':

—¿Abi de lat' dii gaocho?

⁴² Na'ch be'gake'ne' lat' bel' ba bwey'gake' lo yi'na'. ⁴³ Na' beẋeeb wdawe'b chwiategake'. ⁴⁴ Na' chi'e:

—Ka nak daa ba gok cha', lennan' wnia' le' kana' ni zoalen' le', kana' wnia' llia bia' yillinin gak cha' yog' diika' bzej dii Moiséza', na' diika' bzej dii ben'ka' wdixjee daa goll Chioza' legake' na' diika' da' lee sálmoka'.

⁴⁵ Na'ch ben Jesúza' ka wyajni'gakile' diika' na Cho'a Xtill' Chioza', ⁴⁶ chi'e legake':

—Cho'a Xtill' Chioza' nan: chonan byen Crístona', biya dii yen ile'ile' na' witgake'ne' na' yiyon lla yibane' ladj ben' wetka'. ⁴⁷ Na' lekzka' nan: ides cho'a xtilleena' daa nan shi yiyaj yileni ben' dii malka' chongake' na' yiyakxen chegake'. Na' solozan Jerusalénni na' illiljan doxente. ⁴⁸ Na' le' chiya' ye'le ben' yog' diiki ba ble'ile gok cha'. ⁴⁹ Na' nad' wselaa beena' bçheb Xa' Chioza' gone' gaklene' le', na' li soatezə Jerusalénni axt kat'ch Xa'na' gone' le' yel' waka' daa za' yabana'.

Biyep Jesúza' yabana'

(Mr. 16:19-20)

⁵⁰ Na'ch bçhe' Jesúza' legake' wyajgake' yell Betániana'. Na' blis neena' benleeye' legake'. ⁵¹ Na' ni chonleeytie' legake', ka bikwase' kwite'ka' na' biyep' yabana'. ⁵² Na' ben'ka' nakgake'ne' txen, biyoll be'la'ogake'ne', biza'gake' ziyajgake' Jerusalénna' chiba chizakgakile'. ⁵³ Na' wzoatezi wzoagake' be'la'ogake' Chioza' yoodo'na'.

Dill' wen dill' kob daa bzej Juanna'

Beena' nak Xtill' Chioza' golje' goke' to beñ'

¹ Ba zoakzə beena' le Xtill' Chios ka wxe wzil yog'lolte dii de. Len' ba zoalene' Chioza', na' lekzen' Chioza', ² na' dezd nechte ba zoalenkze' Chioza'. ³ Len' bene' yog'te dii de, na' biga de to dii bi bene'. ⁴ Len' cho'e yel' mban, na' nake' beeni' che beñ' yell-lioni. ⁵ Na' beeni' che'na' chzeeni'n yell-lioni gani nak shgasj shchoł ni che dii mala', na' yel choła' bi bizoyin yisolan beeni'na'.

⁶ Wzoa to beñ' bsel' Chioza' wlie' Juan. ⁷ Juanna' bidyee dill' che beena' nsa' beeni'na' kwenche yog' beñ' gonlilall'gake'ne'. ⁸ Aga Juanna'yen'nan nsee beeni'na', san to bidtixje'ze' che beena' nsa' beeni'nan'. ⁹ Beena' nsa' beeni'na' daa nak dowalj daa wzeeni'n lao yog'lol beñ', ba zee yell-lioni.

¹⁰ Na' beena' nsa' beeni'na' bidsoe' yell-lioni, na' la'kzi le' bxe bsile' yell-lioni, beñ'ka' lle' lawinna' aga gokbe'gakile' non nake'. ¹¹ Blline' ladj beñ'ka' nak beñ' yell che', na' legake' bi blebgake'ne'. ¹² Per yog' beñ'ka' blebgake'ne' na' benlilall'gake'ne', bene' legake' xiin' Chios. ¹³ Na' aga daa nakgake' beñ' de beli chen'an, wa daa cheeni beñ' soalen ljwellen', ni aga daa cheeni beñ' soa xiin'en', san daa benlilall'gake'nen' gokgake' xiin' Chios.

¹⁴ Na' beena' le Xtill' Chios golje' goke' to beñ' de beli chen na' wzoe' ladjnto'ni. Na' ble'into'ne' nake' beñ' zakii nleb daa nake' Xiin' tlish' tyaj Xacho Chioza', na' nake' beñ' lall'do' xen inleb na' bli'e do ka nak dii lina'. ¹⁵ Na' Juanna' bi'e dill' che' wne':

—Che beenin bzajniid' le' kana' wnia': “Beena' zi' za' nake' beñ' zak'chi aga ka nad', la' ba zoakze' kana' zi' soa' nad'.”

¹⁶ Daa nake' beñ' wen inleb na' daa chakchgaile' cho', dii zan dii wenka' ba bene' che yog'cho. ¹⁷ Dii Moiséza' bzajniile' cho' diika' bllia Chioza' bia' goncho; per Jesucristona' bli'e yel' chiyesh'lalli che Chioza' len dii li che'na'. ¹⁸ Ni to konoñ' ile'i Chioza', per Xiine'na' nak tlish' tyaj, beena' zoalene'ne', len' bidliile' cho' ka nake'.

Juanna', beena' bchoa beñ' nisa', bi'e xtill' Jesucristona' (Mt. 3:11-12; Mr. 1:7-8; Lc. 3:15-17)

¹⁹ Beñ' wñabia' che beñ' Israelka' lle' Jerusalénna' bsel'gake' to chop bxož na' sto chop beñ'ka' nak xiin' dia che dii Levína' kwenche jañabgakile' Juanna' non nake'. ²⁰ Na' bi bkwashée non nake', san golle' legake':

—Aga nadaan Crístona', beena' chbezcho wsel' Chioza'.

²¹ Na'ch wizñabgakile'ne':

—¿Norakzan nako' shka'? ¿Alin' Elíaza', beena' wdixjee daa goll Chioza'ne' kani'yi?

Na' Juanna' chi'e:

—Aga le' nad'.

Na'ch chize'gake'ne':

—¿Alin' beena' ba llia bia' yid kwenche chixji'e daa che' Chioza'ne', shka'?

Na' che' Juanna':

—Akza le' nad'.

²² Na'ch che'gake'ne':

—¿Norakzə li', shka'? Cheeninto' inezinto' kwenche lljayellnto' beñ'ka' bsel' neto' non nako'. ¿Bi ka ino' che kwino'?

²³ Na'ch che' Juanna' legake':

—Dii Isaíaza', beena' wdixjee daa goll Chioza'ne' kani'yi, dill' çhan' bi'e kana' wne': "To beñ' gosyee zillj latja' gana' bibi chashj chleb, na' ine': Li se kwas kwenche wzenagle che Xanchona' kat' zee."

²⁴ Na' beñ'ka' bsel' fariseoka' ²⁵ wñabgakile'ne':

—¿Berache chchoazo' beñ' nis shi aga lin' Crístona', ni Elíaza', ni beena' llia bia' wsel' Chioza' kwenche çhixji'e daa chi'ene'?

²⁶ Na' che' Juanna' legake':

—Nad' chchoa' beñ' nis, per ladjleni zoa to beñ' bi nombia'le, ²⁷ na' len' zi' wli'lawe'. Na' nad' ni bi zakaa gak' xmose' kwenche galj' la'ch' xe'le'na'.

²⁸ Yog' diiki gok gana' le Betania, daa llia shlaa yao Jordanna', gana' bchoa Juanna' beñ' nisa'.

Jesúza', beena' bsel' Chioza', zaklebile' xil'do'na' chitgake'

²⁹ Na' betiyo ble'i Juanna' Jesúza' zeje' kwite'na', na' chi'e:

—Li wwia, beenin bsel' Chioza' na' zaklebile' xil'do'na' chitcho, la' len' yikwase' saaxya che beñ' yell-lioni. ³⁰ Na' xtill' beenin bi'a kana' wnia': "Zi' za' to beñ' zak'chi ka nad', na' ba zoakz beeni kana' zi' soa'." ³¹ Ni nad' bi wñezid' no xtilliin bi'a, per kwenche gombia' beñ' Israelki le', bidchoa' beñ' nis.

³² Na' Juanna' wizne':

—Ble'id' Espíritu che Chioza' betje' yabana' nake' ka to palom na' jsoalene' le'. ³³ La' ni nad' bi wñezid' no xtilliin bi'a, per Chioza', beena' bsel' nad' chchoa' beñ' nis, wne': "Ile'ilo' yetj Espíritu cha'na' lljsoalene' beena' wlej', na' len' gone' ka yidsoa Espíritu Sántona' loo yichjlall'do' beñ'." ³⁴ Ba ble'id' gok ka wna Chioza' nad', na' ñaa nia' le' beenin Xiin Chioza'.

Beñ'ka' bengake' Jesúza' txen dii nech

³⁵ Na' betiyo Juanna' zelene' chop beñ'ka' nakgake'ne' txen. ³⁶ Na' ka ble'ile' chda Jesúza' na', na'ch chi'e:

—Li wwia, beenin bsel' Chioza' na' zaklebile' xil'do'na' chitcho kwenche chiyakxen saaxya chechoka'.

³⁷ Na' chop beñ'ka' nak Juanna' txen, ka bengakile' wna Juanna' ka', na' janogake' Jesúza'. ³⁸ Na'ch ka biyeçhj Jesúza', ble'ile' zjanogake'ne' na' chi'e legake':

—¿Bin cheenile?

Na' che'gake'ne':

—Rabí, ¿garan zo'?

(Na' Rabí zejín: beñ' chli' chsedi beñ'.) ³⁹ Na' che' Jesúza':

—Li da wwiale.

Na'ch wyajlengake'ne' na' jale'gakile' gana' zoe', na' bigaanlengake'ne' axt ka wde llana', la' ka do chida tapan billinlengake'ne' gana' zoe'.

⁴⁰ Na' beena' le Andrés, beñ' bish' Simón Pédrona', len sto beñ' yoblə gokgake' chopə janogake' Jesúza' ka bengakile' daa wna Juanna' che'. ⁴¹ Na' Andréza' lii jadjltie' beñ' bishee Simónna', na' chi'ene':

—Ba billelinto' beena' nak Mesíaza'—. Na' Mesías zejín Cristo, beena' chbezgake' wsel' Chioza' kwenche inabi'e.

⁴² Na'ch Andréza' bchi'e Simónna' gana' zoa Jesúza', na' ka ble'i Jesúza'ne', chi'ene':

—Lin' Simón, xiin Jonáza', na' ñaa yilio' Cefas—. Na' Cefas zejín Pedro.

Jesúza' golle' Felípena' len Natanaela' gakgake'ne' txen

⁴³ Na' betiyo ka zi' yiyaj Jesúza' gana' mbani Galileana', billague' Felípena' na' chi'ene':

—Da dino nad'.

⁴⁴ Felípena' nake' beñ' yell Betsaida, gana' nak lall Andréza' na' Pédrona'. ⁴⁵ Na'ch jadjlj Felípena' Natanaela' na' chi'ene':

—Ba billelinto' beena' bzej dii Moiséza' xtilleena' lee libr che leya'. Na' lekzka' chen' bzej dii beñ'ka' wdixjee daa goll Chioza' legake' kani'yi. Len' Jesúza', beñ' Nazareta', xiin Joséna'.

⁴⁶ Na' Natanaela' chi'ene':

—¿Aka Nazareta' ichej to beñ' zakii?

Na' Felípena' golle'ne':

—Dakachi kwenche gakbe'ilo'.

⁴⁷ Na' ka ble'i Jesúza' zej Natanaela' gana' zie', golle':

—Ni za' to beñ' nak dowalj beñ' Israel, to beñ' bi nak beñ' wxiye'.

⁴⁸ Na'ch goll Natanaela'ne':

—¿Nakra chak nombi'o nad'?

Na' Jesúza' golle'ne':

—Ka zi' yidnele Felípena' li', ble'id' li' xan yag yixwewa'.

⁴⁹ Na' goll Natanaela'ne':

—Maestro, lin' nako' Xiin Chioza'. Na' lin' beena' zidnabia' neto' beñ' Israel.

⁵⁰ Na' goll Jesúza'ne':

—¿Aadaa wnia' ble'id' li' xan yag yixwewan' chajli'o cha'? Zi' ile'chilo' dii xench aga ka dga.

⁵¹ Na' lekzka' gollch Jesúza':

—Dii li nia' le', ile'ile yabana' nyaljan, na' beñ'ka' nak anjl che Chioza' chep chetjgake' lawa', nad', Beñ' Bsel' Chioza' Yell-lioni.

2

Got' to wishagna' yella' le Caná

¹ Na' biyon lla got' to wishagna' yella' le Caná daa llia gana' mbani Galileana', na' na' len xna' Jesúza'. ² Na' lekzka' goxgake' Jesúza' na' beñ'ka' nakgake'ne' txen. ³ Na' shlak chak lnina' bibill vino che'ka', na' goll xna' Jesúza'ne':

—Ba bibill vino che beñ'ki.

⁴ Na'ch che' Jesúza'ne':

—¿Berache nazo' nad' ka'? Bin' gal' gon' daa llia bia' gon'.

⁵ Per xneena' golle' wen mandadka':

—Li gon kon bin ine' le'.

⁶ Na' na' zoa xop yes' xen de yaj, dii choll nis, diika' chon llin kat' beñ' Israelka' chixi chiyechgake' kon ka na ley che'ka'. Na' to to yes'ka' chollan ka do shon yid nis. ⁷ Na' che' Jesúza' wen mandadka':

—Li kaa nisa' loo yes'ki.

Na' wda'gake'n axt ka billa'chagakan. ⁸ Na'ch che' Jesúza' legake':

—Li gash' lataan naa na' li lljeen beena' ngoo lo neen.

Na' bengake' ka golle'. ⁹ Na' beena' ngoo lo neen bnixe' nisa' daa biyak vino, ni bi nezile' ga wza'n. Tochga wen mandadka' nezgakile', la' legaken' wdaagake' nisa'. Na'ch beena' ngoo lo neen goxe' bi'na' chshagna', ¹⁰ chi'eb':

—Yog' beñ' zigaate chdie' vino wenna', na' kat' ba weej beñ'ka' len lnina' dii zil, na'ch chdie' daa bi naktek wen. San li', ba bzagoo vino wenni na' axt naach chdio'n.

¹¹ Yel' waki dga ben Jesúza' yell Canána' daa llia gana' mbani Galileana', lennan' bene' dii nech. Na' ka' bli'e yel' wak che'na' nape', na'ch beñ'ka' nongake' le' txen benlilall'gake'ne'.

¹² Na' ka wde, biyaje' Capernaúma' len xneena', len beñ' bisheeka' na' len beñ'ka' nakgake'ne' txen, na' wzoagake' na' to chop shon lla.

Bishesh Jesúza' beñ'ka' chit' chde lesh' chyoodo'na'
(Mt. 21:12-13; Mr. 11:15-18; Lc. 19:45-46)

¹³ Na' ka ba zoa gal' lni Paskwa' daa chon ben' Israelka', wyaj Jesúza' Jerusalénna'. ¹⁴ Na' ka blline' lesh' chyoodo'na', ble'ile' lle' ben' chit'gake' goon, xil', na' palom, na' lekzka' na' chi' ben'ka' chisha' mecha'. ¹⁵ Na' ka ble'ile' ka chak, bene' to do tashj, na' kon len bisheshile' yog'lolé' lesh' chyoodo'na' lente goonka' na' xil'ka'. Na' bzalee xmech ben'ka' chisha' mecha' lo yona' na' bishi'e mes che'ka'. ¹⁶ Na' ben'ka' chit' palomka', golle' legake':

—Li yishesh baki ni! iBi gonzle lill Xa'na' ka lao yaa!

¹⁷ Na'ch ben'ka' nakgake'ne' txen jadingakile' Cho'a Xtill' Chioza' gana' nan: “Daa le chakid' lill xlatjo'na' len wlliyi'n nad'.”

¹⁸ Na'ch ben' Israelka' lle' na' che'gake' Jesúza':

—¿Bi yel' wak gono' dii wli'n napo' yel' wñabia' kwenche chono' diiki?

¹⁹ Na' che' Jesúza' legake':

—Li yichinj yoodo'ni na' lo shonə llazə yiyona'n.

²⁰ Na'ch che' ben' Israelka' le':

—Xopiyon yiz bengake' yoodo'ni, na' li' nazo' shonə llazə yiyono'n.

²¹ Per daa goll Jesúza' legake' ka', kwerp che'nan' bsakleBILE' yoodo'na'. ²² Na'ch ka biban Jesúza' ladj ben' wetka', jadini ben'ka' nakgake'ne' txen daa wne', na' wyajle'gake' Cho'a Xtill' Chioza' na' dill'ka' be' Jesúza'.

Nombia' Jesúza' yichjlall'do' yog'cho

²³ Na' shlak zoa Jesúza' lni Paskwa' Jerusalénna', ben' zan wyajle'gake' che' daa ble'gakile' yel' wakka' bene'. ²⁴ Per Jesúza' bi bñenilallee legake', la' nombi'e yichjlall'do' yog'lol ben'. ²⁵ Aga byalljile' no yee le' nakan nak benecha', la' kwaslol nombi'e yichjlall'do'eka'.

3

Jesúza' bshaljlene' Nicodémona'

¹ Wzoa to fariseo ben' wle Nicodemo, na' goke' to ben' wñabia' ladj ben' Israelka'. ² Na' Nicodémona' wyaje' jawie' Jesúza' wal-lə na' chi'ene':

—Maestro, nezinto' Chioza' bselee li' kwenche wli' wsedilo' neto', la' bi gak gono' yel' wakka' chono' shel' bi zoalen Chioza' li'.

³ Na'ch Jesúza' chi'ene':

—Dii li nia' li', beena' bi yiyalj dii yoblə aga wak lljazoe' gana' chñabia' Chioza'.

⁴ Na' che' Nicodémona'ne':

—¿Nakra gon to ben' gol yiyaljze' dii yoblə? La' aga wak yiyo'e loo lee xneena' kwenche yiyalje' sto shii.

⁵ Na' Jesúza' chi'ene':

—Dii li nia' li', kono gak yiyaj gana' zoa Chioza' chñabi'e shi bin' galjlenile' nis * na' yikob Espíritu che Chioza' yichjlall'do'ena' kwenche gake' ka ben' galj sto shii. ⁶ Beena' nak xiin ben' de beli chen, de beli chenchokzan nake'. Per beena' chikob Espíritu che Chioza'ne', nake' xiin Chios na' de to yel' mban che' daa bi te cheyin. ⁷ Bi yibanilo' daa nia' li': “Yog' ben' chiyal' galje' dii yoblə.” ⁸ Kat' chze be'na' na' chajan kon ga cheenin, na' la'kzi chenicho ka sshag chonan aga nezicho galan za'n, ni bi nezicho galan zejjan. Lekzkan' aga nezicho nakan chon Espíritu che Chioza' kwenche chiyalj ben' dii yoblə.

⁹ Na'ch wiznabi Nicodémona'ne':

—¿Nakra gak gakz dga?

¹⁰ Na' che' Jesúza'ne':

—Len naktio' to ben' chli' chsedi ben' Israelki, ¿ana' bi nezilo' diiki? ¹¹ Dii li nia' li', choe'nto' dill' che daa nezinto' na' daa ben ble'into', per bi chajle'le daa nanto' le'. ¹² Shi

* **3:5** Galjlenile' nis: bal ben'ka' nsed nagake' zejin daa chchoacho nisa', na' zi balgake' nagake' zejin nisa' daa chzani xña'chona' cho', na' zi balgake' nagake' zejin daa chixis chiyib Espírituna' cho' kat' chonlilal'cho Cristona'.

bi chajle'le daa wnia' le' che diika' chak yell-lioni, ¿alechlə shi we'len' le' dill' che daa nak che yabana'?

¹³ 'Ni to konon' shep yabana', toz nad', Ben' Bsel' Chioza' Yell-lioni, nak' ben' za' yabana'. ¹⁴ Na' ka ben dii Moiséza' gana' bibi chashj chleb bdee bel de broncena' lee yaga', ka'kzan gongakile' nad', Ben' Bsel' Chioza' Yell-lioni. Wda'gake' nad' lee yaga' ¹⁵ kwenche nottez ben' gonlilall' nad' bi kwiayee, san gat' to yel' mban che' zejli kañi.

Chaki Chioza' yog' ben' yell-lio

¹⁶ 'Daa le chakchgayi Chioza' ben' yell-lioni, bselee Xiine'na' tlish' tyaj kwenche nottez ben' gonlilalleene' bi kwiayee, san gat' yel' mban che' zejli kañi. ¹⁷ Chioza' bselee xiine'na' yell-lioni aga kwenche wlliyee benaan, san kwenche yisle' legaken'.

¹⁸ 'Beena' nonlilall' Xiin Chioza', bich nchoglo che' sak'zi'e, san beena' bi nonlilalleene', ba nchoglo che' kwiayee daa bi nonlilalle Xiin tlish' tyaj Chioza'. ¹⁹ Ba nchoglo kwiayi' ben' yell-lioni daa ba bla' beena' nsa' beeni'na', na' daa chongake' dii mala', wyazlall'chgake' yel cholə' aga ka beeni'na'. ²⁰ Yog' ben'ka' chon diika' bi yejni'alallii chakzbangakile' beeni'na', na' aga willjabig'lat'gake' lawinna' daa chllebgake' wli'lawi dii mala' chongake'. ²¹ San ben'ka' zoagake' chongake' ka na dill' li che Chioza', chbig'gake' lao beeni' che'na' kwenche gakbia' chongake' ka cheeni Chioza'.

Juanna', beena' bchoa ben' nisa', be'che' xtil' Jesúza'

²² Ka wde, wyaj Jesúza' Judeana' len ben'ka' nakgake'ne' txen na' wzoagake' na' xtit wen, na' bchoagake' ben' nis. ²³ Na' Juanna' lekzka' chchoe' ben' nis gana' le Enón, gaozə gana' le Salim, la' na' de nis zil, na' chaj ben' kwenche chchoe' legake' nisa'. ²⁴ Diiki gokgakan kana' zi' koogake' Juanna' lillyana'.

²⁵ Na'ch ben'ka' nakgake' Juanna' txen gokdil-lengake' sto ben' Israel ni cheyi diika' yoologake' chongake' kwenche chixi chiyechgake' lao Chioza'. ²⁶ Na' wyajgake' jellgake' Juanna':

—Maestro, beena' wzeleno' shlaa yao Jordanna', beena' bi'o xtilleena', ba chchoe' ben' nis na' yog'zə ben' chajgake' kwite'na'.

²⁷ Na'ch che' Juanna' legake':

—Kono gak bi gon shi Chioza' bi wi'e latj. ²⁸ Kwinkzle benile kana' wnia' aga nadaan Crístona', beena' chbezcho wsel' Chioza', san nak' to ben' bselee kwenche kwialoa' lawe'na' na' yep' ben' wzenaggake' che'. ²⁹ To ga chak wishagna', bi'na' chshagnan' ikaab' noola'. Na' bi'na' nllaguib' chi'b' kwitbaa, le chibaib' ka chenib' chshaljb'. Kayen'nan chak cha', le chibaid' daa chzenaggake' che Crístona'. ³⁰ Len' zizikchli seyi che', na' nad' bichtek seyi cha'.

Beena' za' yabana'

³¹ 'Ka nak beena' za' yabana', len' zak'chi' aga ka yog'lol ben'. Na' ben'ka' lle' yell-lioni, chinogake' daa de lo yell-lionizə, na' che yell-lionizə choe'gake' dill'. San beena' za' yabana' zak'che' aga ka yog'lolte ben', ³² na' choe' dill' cheyi diika' ba ben ble'ile' yabana', per balchga ben' chajle' xtilleena'. ³³ Na' nottez beena' chajle' che', chli'e Chioza' cho'e dill' li. ³⁴ Beena' bsel' Chioza', cho'a xtil' Chiozan' cho'e, la' Chioza' no'ene' do ka nak Espiritu che'na'. ³⁵ Chioza' chakile' Xiine'na', na' ba bene' lall' nee yog'lolte dii de. ³⁶ Na' beena' gonlilall' Xiin Chioza' gat' yel' mban che' zejli kañi. Per beena' bi cheeni gonlilalleene' bi gat' yel' mban che' zejli kañi, san ile'ile' yel' zak'zi'na' we' Chioza'.

4

Bshaljlen Jesúza' to nool Samaria

¹ Fariseoka' gokbe'gakile' ben' zanch nakgake' Jesúza' txen, na' ben' zanch chchoe' nisa' aga ka Juanna', ² la' kzi' aga kwín Jesúzan' bchoe' ben' nisa', san ben'ka' nakgake'ne' txenan.

³ Na' ka gokbe'i Jesúza' ba nezi fariseoka' beñ' zanch nakgake'ne' txen, na'ch bizee gana' mbani Judeana' ziyaje' gana' mbani Galiléana'lə.

⁴ Na' kwenche yilline' gana' mbani Galileana' chiyal' yidie' gana' mbani Samáriana'.

⁵ Na' billingake' to yell dii le Sicar, daa lliana' gana' mbani Samáriana'. Na' yella' llian gaozə gana' de yell-liona' be' dii Jacoba' xiine' dii Joséna'. ⁶ Na' lo yell-liona' lliana' posa' wden dii Jacoba'. Na'ch wche' Jesúza' cho'a posa' daa ba chjxakchgaile' zingwee neza'. Na' ba chonan ka gobill. ⁷⁻⁸ Na' beñ'ka' nakgake'ne' txen zejgake' yella' zjxi'gake' daa gaolengake'ne'. Na' cho'a posa' chi' Jesúza' ka bllin to noolə Samaria zjxi'e nisa'. Na' che' Jesúza'ne':

—Beñ lat' nis yeej'.

⁹ Na'ch che' noolə Samáriana'ne':

—¿Beraçhe chñabzilo' nad' nisa' yeejo'?, la' beñ' Israel li', na' nool Samaria nad'.

Golle' ka' la' beñ' Israelka' bi zoalengake' wen beñ' Samáriaka'. ¹⁰ Na'ch che' Jesúza'ne':

—Shel'ka' nezshailo' daa choñ Chioza' na' no nad' chñabid' li' nisa' yeej', ba wñabilo' nad' goñ daa yeejo', shel'ka', la' nap' to nis yaa nis ban daa goñ li'.

¹¹ Na' noola' chi'ene':

—Beñ'do', bibi noxoo wlepilo' nisa', na' posi le zitjan. ¿Gara lljxi'o nis yaa nis banna' goño' nad' nazo' ka'? ¹² Dii xozxto'cho Jacoba' bkwaanlene' neto' posi gani weeje', na' weej xiine'ka' na' bayix' che'ka'. ¿Achakilo' zak'chilo' ka' le'?

¹³ Na' che' Jesúza'ne':

—Nottezə beñ' cheeje' nis che' posi, wbiłchkzile' dii yoblə. ¹⁴ San beena' yeej nisa' daa wi'ane', aga wbiłchile'. La' nisa' daa wi'ane' nakan ka to dii galchga loo yichjlall'do'ena' na' gonan ka gat' yel' mban che' zejli kañi.

¹⁵ Na'ch che' noola'ne':

—Beñ'do', beñ nad' nisa' no' ka' kwenche bich ibilid' na' bich yid beja' ni.

¹⁶ Na' che' Jesúza'ne':

—Biyaj jəne beñ' cho'na', na' dalene' ni.

¹⁷ Na' che' noola'ne':

—Aga no beñ' cha' zoa.

Na' Jesúza' chi'ene':

—Lekzilo' no' ka', aga no beñ' cho' zoa. ¹⁸ La' ba gok gay' beñ' cho'ka', na' beena' zoaleno' naa ni bi nshagna'lenkzo'ne'. Shlikzan ba wñio'.

¹⁹ Na'ch noola' chi'ene':

—Beñ'do', ba gokbe'id' nako' to beñ' chyixjee daa na Chioza'. ²⁰ Dii xozxto'nto'ka' be'la'ogake' Chioza' lo yaani, na' le' beñ' Israel nale chonan byen we'la'ochone' Jerusalénna'.

²¹ Na' che' Jesúza'ne':

—Noolə, wyajle' cha', wllin lla kat' bich gonan byen yidle lo yaani, ni bich gonan byen shajle Jerusalénna' kwenche we'la'ole Xacho Chioza'. ²² Le' beñ' Samaria ni bi nombia'le non choe'la'ole, san neto' beñ' Israel nombia'nto' Chioza', beena' choe'la'onto', la' ladjnto'nan' ichej beena' yisle' beñ' kwenche bi kwiayi'gake'. ²³ Ba zoa illin lla, wa ba bllinkz llana' beñ'ka' dii li' choe'la'ogake' Xacho Chioza' we'la'ogake' beena' nak dowalj Chios do yichj do lallgake', la' kan' chaklall' Xacho Chioza' we'la'ochone'. ²⁴ Chioza' nake' Espíritu, na' beñ'ka' cheengakile' we'la'ogake'ne', chiyal' we'la'ogake'ne' dowalj na' do yichj do lall'gake'.

²⁵ Na' che' noola'ne':

—Nezid' wla' beena' chbezcho wsel' Chioza' beena' nsi'e Mesías wa Cristo. Na' kat' yide', wzajniile' cho' yog' diiki.

²⁶ Na' che' Jesúza'ne':

—Nad'kzan' beena' no' ka', na' len' chshaljlene' li'.

²⁷ Na' shlak choe'lene' noola' dill', billin ben'ka' nakgake'ne' txen na' bibangakile' daa chshaljlen Jesúza' to noolə. Per ni toe' bi biyaxji inabile'ne' bin cheeni noola' wa bi dillaan chshaljlene'ne'. ²⁸ Na'ch noola' bkwaane' chee nis che'na' na'zə, na' biyaje' jayelle' ben' wlall che'ka':

²⁹ —Li da lljawiacho to ben' ba wne' nad' yog' diika' ba ben'. ¿Aaga len' Crístona', lla?

³⁰ Na'ch blleshgake' yella' wyajgake' gana' chi' Jesúza'. ³¹ Na' shlak ziyaj noola' zeyid ben'ka' nak Jesúza' txen che'gake'ne':

—Maestro, wdao lat'.

³² Na' Jesúza' chi'e legake':

—De to yel' wao cha' daa bi nombia'le.

³³ Na'ch che' ljwell ben'ka' nakgake'ne' txen:

—¿Anti no ba bidwa' dii wdawe', lla?

³⁴ Na' che' Jesúza' legake':

—Yel' wao cha'na' nakan daa chon' ka cheeni beena' bsel' nad' na' wzeeloa' daa cheenile' gon'. ³⁵ Le' nazle: “Chyalljch zi tap beo' kwenche yizi' yilapcho.” Per nad' nia' le', li wwiakachi ba de daa yizi' yilapcho. ³⁶ Beena' chyixjee cho'a xtill' Chioza' naa, zaklebile' to ben' ba chilalile' chizi' chilape'. Na' ben'ka' chzenag daa chyixji'e, gat' to yel' mban chegake' zejli kani, na' beena' goz yibalenile' beena' chizi' chilap. ³⁷ Nakan ka dillaa de daa na: “Ben' yoblan chaz na' ben' yoblə chizi' chilap.” ³⁸ Nad' ba bselaa le' lljalaple gana' bi bllaglole gozle, la' le' gonle ka wzenag ben' cho'a xtill' Chioza' daa wdixjee ben' yoblə.

³⁹ Ben' zan ben' Samáriaka', ben'ka' lle' yell Sicara' benlilall'gake' Jesúza' daa goll noola' legake': “Ba wne' nad' yog'te dii ba ben'.” ⁴⁰ Na'ch ka bllingake' gana' chi' Jesúza', got'yogakile'ne' kwenche yigaanlene' legake'. Na' bigaane' na' chop lla. ⁴¹ Na' ben' zanch benlilall'gake'ne' daa bengakile' dillaa cho'e. ⁴² Na'ch che'gake' noola':

—Naach ba chajle'nto', aga daa wnazo' neto' kan', san kwinkznton' ba beninto' cho'e dillaa na' nezinto' dii li lekzen' beena' yisla ben' yell-lioni kwenche bi kwiayi'gake'.

Jesúza' biyone' xiin to ben' wnabia'

⁴³ Na' ka gok chop lla, bizee biyaje' gana' mbani Galileana'. ⁴⁴ Kwinkz Jesúza' wne' nan to ben' chyixjee daa che' Chioza'ne' aga no chgoo le' balaan lalle'na'. ⁴⁵ Na' ka billine' gana' mbani Galileana', blebgake'ne' daa ble'gakile' yog' daa bene' Jerusalénna' ka gol' lni Paskwa'.

⁴⁶ Na' dii yoblə wizaj Jesúza' yell Canána' daa llia gana' mbani Galileana', gana' biyone' nisa' vino. Na' yella' zoa to ben' zakii ben' chon llin che ben' wnabia'na', na' zoa to xiine' bi' byo bi shao'b'. ⁴⁷ Na' ka wnezile' ba billin Jesúza' Galileana' zizee Judeana'lə, na' wyaje' lawe'na' got'yoile'ne' shaje' lljayene' bi' che'na' daa ba chakshwetb'. ⁴⁸ Na'ch che' Jesúza'ne':

—Aga wyajle'le cha' shi bibi yel' wak gon' ile'ile.

⁴⁹ Na' ben' wnabia'na' chi'ene':

—Ben'do', ben' goklen dagach naate, shategali bin' guet bi' cha'na'.

⁵⁰ Na'ch che' Jesúza'ne':

—Biyaj, jawia. Aga wet bi'na'.

Na' beena' wyajli'e daa goll Jesúza'ne' na' bizee. ⁵¹ Na' ka ba zoa yilline' lille'na' jatil xmose'ka' le', che'gake'ne':

—Ba biyaki bi' cho'na'.

⁵² Na'ch wnabile' legake' ka do bi gor wzolo chiyakshao'lall'b'. Na' che'gake'ne':

—Daa neji do ka chida to bichejb' dii lana'.

⁵³ Na'ch gokbe'i xabaa biyakshao'lall'b' ka gora' goll Jesúza'ne': “Biyaj jawia. Aga wet bi'na'.” Na' le' len yog' ben'ka' zoa lille'na' benlilall'gake' Jesúza'.

⁵⁴ Dga gok de wchopi yel' wakka' ben Jesúza' Galileana' ka zizee Judeana'.

5

Biyon Jesúza' to beñ' net ni'a nee

¹ Ka wde gok diiki, gol' to lni che beñ' Israelka' Jerusalénna', na' biyaj Jesúza' Inina'.
² Na' Jerusalénna', gaozə cho'a puerta' le Puert Çhe Xil'ka' lliā to tang dii le Betesda dill' hebreo. Na' gay' koridor nechjan tanga'.³ Na' loo koridorka' de beñ' zan beñ' we', no beñ' lchol, no beñ' bi chak sa' wen, na' no beñ' net ni'a nee, chbezgake' ta nisa'.⁴ La' zoa kat' chetj to anjl cho'a tanga' chte' nisa', na' beena' chyobi cho'e loo nisa' chiyoll chta anjla'n chiyakile' bittezə yillwe' che'ile'.⁵ Na' ladj beñ'ka' lle' na' len to beñ' ba gok shin'shonichoa yiz bi shawee.⁶ Na' ble'i Jesúza'ne' na' gokbe'ile' ba wlla die' ka', na'ch chi'ene':

—¿Acheenilo' yiyakilo'?

⁷ Na'ch beena' bi shao' chi'ene':

—Beñ'do', aga no zoa cha' wletje' nad' loo nisi kat' chdan. Na' kat' chakid' yetj' loo nisa', beñ' yoblə lii chjsho'tie' lo'inna'.

⁸ Na'ch che' Jesúza'ne':

—Biyas, bitob daa cho'na' biyoa'n na' bigoo nez.

⁹ Na' katena' biyakile' na' lii bitobtie' daa che'na' biyo'en na' bigwee nez. Gok dga lla sabda', llana' chombaangake'.¹⁰ Na' beñ'ka' chñabia' beñ' Israelka' gollgake' beena' biyaki:

—Lla chombaanchō naa. Aga bi lsens de woo daa cho'na'.

¹¹ Na'ch che' beena' legake':

—Beena' biyone' nad' len' wne': “Bitob daa cho'na' biyoa'n na' bigoo nez.”

¹² Na'ch che'gake'ne':

—¿Nora beena' wna li': “Bitob daa cho'na' biyoa'n na' bigoo nez”?

¹³ Na' beena' biyaki aga nezile' non biyon le', la' Jesúza' ba bikwase' ladj beñ'ka' lle' na'.

¹⁴ Na'tech billag Jesúza'ne' lesh' chyoodo'na', na' chi'ene':

—Ba biyakilo' naa. Bich bi dii mal gono' kwenche ki wtilcho' dii walch.

¹⁵ Na'ch beena' biyaje' lao beñ' wñabia' che beñ' Israelka' jayelle' legake' nan Jesúza' biyone'ne'.¹⁶ Na' daa ben Jesúza' yel' waka' lla sabda', llana' chombaangake', goklall'gake' witgake'ne'.¹⁷ Na' Jesúza' chi'e legake':

—Xa'na' bittezə lla chone' llin na' ka'kzə nad'.

¹⁸ Na'ch beñ' wñabia' che beñ' Israelka' goklall'gake' witgake'ne' aga toz daa wdishje' leya' daa cho'en dill' che llana' chombaangake', san lekzka' daa chon kwine' ka Chios daa chi'e Chioza' nake' Xe'.

Yel' wñabia' daa nap Xiin Chioza'

¹⁹ Na' Jesúza' chi'e legake':

—Dii li nia' le', nad', Xiin Chios, aga bi gak gon' tobia'loz', san daa chle'id' chon Xa'nan' lekzannan' chon'.²⁰ La' Xa'na' chakile' nad' na' chliile' nad' yog' diika' chone'. Na' wli'chile' nad' dii zak'techlə ka diiki, dii gonan ka yibanchile.²¹ Ka chon Xa'na' chisbane' beñ' wetka' na' chiyo'e yel' mban chegake', ka'kzə chon nad', Xiine', cho'a yel' mban che nottezə beñ' cheenid' wi'an.²² Na' Xa'na' aga ga chchogloe' che beñ', san nad' nak' Xiine', ba bene' lall' na' wchogloa' che yog'loł beñ'.²³ Bene' ka' kwenche yog' beñ' koogake' nad' balaanna' ka daa chgoogake' Xa'na'. Beena' bi chgwee nad' balaan, nad' nak' Xiin Chios, lekzka' bi chgwee Xa'na' balaan, beena' bsel' nad'.

²⁴ 'Dii li nia' le', beena' chzenag xtilaana' na' chonlilallee beena' bsel' nad', gat' yel' mban che' zejli kañi. Na' aga bi de dii gonan ka choglo che' sak'zi'e, san ba bile' lo yel' wita' na' ba zoe' lo yel' mban daa bi te cheyin.²⁵ Dii li nia' le', wllin lla kat' beñ' wetka' yengakile' inia' legake', nad' nak' Xiin Chios, na' beñ'ka' yengakile' kat' inia' na' yibangake'.²⁶ Xa'na' nape' yel' wak kwenche wi'e yel' mban che beñ' daa bi te cheyin. Ka'kzə ba bene' nad' Xiine' yel' wak kwenche wi'a yel' mban che beñ' daa bi te cheyin.²⁷ Na'

lekzka' ba bene' nad' yel' wñabia' kwenche gon' yel' joschis daa nak' Ben' Bsel' Chioza' Yell-lioni. ²⁸ Bi yibanile daa nia' ka', la' wllin lla wllin gor yeni yog'te ben' wetka' kat' inia' legake'. ²⁹ Na' ka yengakile' inia' na'ch yichejgake' loo bana'. Na' ben'ka' ben dii wenna' yibangake' na' si'gake' banez to yel' mban daa bi te cheyin, na' ben'ka' ben dii mala', yibangake' na' choglo tegake' lo yel' zak'zi'na' zejli kani.

Jesúza' bli'e yel' wñabia' che'na'

³⁰ 'Ni to bibi gak gon' tobialoz', san chchogloa' che ben' kon ka nllia Chioza' bia' gon', na' kon ka nakannan' wchogloa'n. La' aga chon' kon ka cheenid', san daa cheeni Xa'na', beena' bsel' nad', lennan' chon'. ³¹ Na' shi nad' wi'a dill' che kwinn', nezid' aga no shajle' cha'. ³² San zoa to ben' cho'e xtillaana', na' nezid' daa ne' cha' nakan shlichá. ³³ Le' bsel'le ben' janabgakile' Juanna' bi ka ine' cha', na' dillaa daa bi'e cha' nakan dii li. ³⁴ La'kzi nad' bi chyaljid' we' ben' yell-lioni xtillaa; nia' le' diiki kwenche yilale na' bi kwiayi'le. ³⁵ Juanna' goke' ka to yi' dii bzeeni' na' le' bibaile bzenagle che' tolde. ³⁶ Daa chon' diika' non Xa' Chioza' lall' na' gon' choe'n dill' cha', na' zak'chin aga ka daa wna Juanna'. Na' chli'lawin Chiozan' bselee nad'. ³⁷ Xa'na', beena' bsel' nad', lekzka' ba bi'e dill' cha'. Ni shlin bigan' yenile inie' ni bin' ile'ilene' nak nake'. ³⁸ Na' cho'a xtillena' bin' sho'n loo yichjlall'do'lena', la' bi chajle'le cha', nad' ben' bselee. ³⁹ Le' chsedchgale Cho'a Xtill' Chioza' daa chakile le'inna' yillelile naklæ ka gonle kwenche gat' yel' mban chele zejli kani. Na' la'kzi Cho'a Xtill' Chioza' choe'n xtillaana', ⁴⁰ aga cheenile gakle nad' txen kwenche gat' yel' mban chele daa bi te cheyin.

⁴¹ 'Aga chyaljid' no koo nad' balaan. ⁴² Na' nombia' le', na' nezid' aga chakile Chioza'. ⁴³ Xa' Chioza' bselee nad' na' ba bid', na' bi chzenagle cha'. San shi yid ben' yoblæ tobialoze', beena'lan le' gak chele. ⁴⁴ ¿Nakrakzæ gonle shajle'le cha'? La' gangazæ chgoo ljwell-le balaan, na' bi chinole sho'le balaan che beena' zeelo nak Chios. ⁴⁵ Bi gakile nad' gaw' xya chele lao Xa' Chioza', la' zoa sto ben' gawe' xya chele. Dii Moiséza', beena' nonle lez gaklene' le', len' gawe' xya chele lao Xa' Chioza'. ⁴⁶ La' shel' chajle'le daa bzej dii Moiséza', lekzka' wyajle'le cha', shel'ka'. La' len' bzeje' xtillaana'. ⁴⁷ Na' daa bi chajle'le che daa bzej dii Moiséza', ¿nakra gonle shajle'le che diiki nia'?

6

Bwao Jesúza' wdeli gayaa mil ben'

(Mt. 14:13-21; Mr. 6:30-44; Lc. 9:10-17)

¹ Na' ka wde, Jesúza' wyaje' shlaa nisdó' che Galileana', daa lekzka' le nisdó' che Tiberias. ² Na' ben' zan janogake'ne' daa ble'gakile' yel' wakka' bene' kana' biyone' ben'ka' bi shao'. ³ Na'ch wyep Jesúza' to lo yaa na' wche'lene' ben'ka' nakgake'ne' txen. ⁴ Na' ba zoa gal' lni Paskw che ben' Israelka'. ⁵ Ka ble'i Jesúza' ben' zan ba bllin gana' chi'e, na' chi'e Felípena': —¿Gara lljxi'cho dii gao yog' ben'ki?

⁶ Golle' ka' daa chakile' la'shki bi yee Felípena', la' ba nezkzile' nakan gone'. ⁷ Na' Felípena' chi'ene':

—Aga waki laxj to ben' che xon' beo' lljxi'yicho dii gao yog' ben'ki lat' wej.

⁸ Na' sto beena' nak Jesúza' txen lie' Andrés, ben' bish' Simón Pédróna', chi'ene':

⁹ —Ni ze to bi' xkwid' no'ab' gay' yetxtil de cebada na' zi chop bel'. Per bizæ daa par yog' ben'ki.

¹⁰ Na'ch Jesúza' chi'e:

—Li yee yog' ben'ka' kwe'gake'.

Na' dechga yixdo' gana' lle'gake', na' yog'tie' wche', na' to ben' byoka'zæ gok ka do gayaa mil. ¹¹ Na'ch be' Jesúza' yetxtilka', na' bi'e Chioza' yel' choxken, na' bgone' che che ben'ka' nakgake'ne' txen na' legake' be'gake' che yog' ben'ka' chi' na' axt ka beljgakile'. Na' lekzka' bene' che belka'. ¹² Na' ka beljgakile', na'ch chi'e ben'ka' nakgake'ne' txen:

—Li yitop yog'lol dii lao'ka' bichoonan kwenche bibi gaktitj.

¹³ Na'ch bitopgake'n, biyakte shllin xet' diika' bichoonan lao yetxtilka' gay'. ¹⁴ Na' ka ble'i ben'ka' yel' waka' daa ben Jesúza', na'ch che' l'jwellgake':

—Dii li beenin nake' beena' l'lia bia' yid yell-lioni kwenche chixji'e daa che' Chioza'ne'.

¹⁵ Na' daa gokbe'i Jesúza' cheengakile' yiche'gake'ne' kwenche wzoagake'ne' inabi'e legake', bicheje' ladje'ka' na' wyepe' toze' zi lat' cha'ch lo yaana'.

Wza' Jesúza' lo nido'na'

(Mt. 14:22-27; Mr. 6:45-52)

¹⁶ Ka ba chal, ben'ka' nak Jesúza' txen biyetjgake' cho'a nido'na'. ¹⁷ Na' biyoogake' to loo barkw kwenche ziyajgake' yell Capernaúma'. Ba gol' na' bin' yillin Jesúza' kwite'ka'.

¹⁸ Na'ch wzolo wzechga be'na' na' wzolo chas chat' nido'na'. ¹⁹ Na' ka do gay' wa xop kilómetro ba wza'len barkwa' legake' lo nido'na' kat' ble'gakile' Jesúza' zeje' tlo nido'na' zjatile' barkwa' na' le bllebgake'. ²⁰ Na' Jesúza' chi'e legake':

—Nad'kzan, jbi illeble!

²¹ Na' chibagakile' bigoogake'ne' loo barkwa', na' lii blintekzgake' gana' chwiagake' illingake'.

Zan ben' chiyiljgake' Jesúza'

²² Na' betiyo gokbe'i ben'ka' bigaan shlaa nido'na' nan tochga barkwa' got' na' to ben'ka' nonz Jesúza' txen biyoogake'n na' bi len Jesúza' biyoolene' legake'. ²³ Na' gaozə gana' wdaogake' yetxtilka' ka wde be' Xancho Jesúza' Chioza' yel' choxken, bllin sto chop barkw dii za' yell Tibériaza'. ²⁴ Na' ka gokbe'i ben'ka' aga no Jesúza' nla' ni ben'ka' nakgake'ne' txen, na'ch biyoogake' loo barkwka' ziyajgake' Capernaúma' jadiljgake'ne'.

Jesúza' nake' ka to yel' wao dii chona' n yel' mban

²⁵ Na' ka bllingake' shlaa nido'na' jadi'gake'ne', na' gollgake'ne':

—Maestro, ¿bat biyedo' ni?

²⁶ Na' Jesúza' chi'e legake':

—Dii li nia' le', chiyiljle nad' aga daa wyajni'lati'le bi zejin yel' wakka' benan', san daa wdaozle axt ka beljilen. ²⁷ Bi yilal yizodzile kwenche gat' dii yeej gaole, la' dii te cheyin nak daa. San li gal' kwe'no daa gon yel' mban chele zejli kani, daa gon' nad', Ben' Bsel' Chioza' Yell-lioni. La' Xa' Chioza' ba bene'n lall' na' wi'an.

²⁸ Na' che'gake'ne':

—¿Beran chiyal' gonnto' kwenche gonnto' daa cheeni Chioza'?

²⁹ Na' che' Jesúza' legake':

—Daa cheeni Chioza' gonle, gonlilall'le nad', ben' bselee.

³⁰ Na'ch che'gake'ne':

—¿Bera yel' wak gono' ile'into' kwenche shajle'nto' cho'? ¿Bi ka gono'? ³¹ Dii xozxto'choka' wdaogake' daa le maná latja' gana' bibi chashj chleb, ka na Cho'a Xtill' Chioza' gana' na: “Yel' wawa' daa za' yabana' bi'en wdaogake'.”

³² Na' che' Jesúza' legake':

—Dii li nia' le', aga dowaljyen' yel' wao daa za' yabanan' be' dii Moiséza' legake', san Xa'na' chone' daa nak dowalj yel' wao daa za' yabana'. ³³ La' nad', ben' za' yabana', nak ka to yel' wao dii choe' Chioza' ben' yell-lioki kwenche ibangake'.

³⁴ Na'ch che'gake'ne':

—Ben'do', bengach neto' toshiizi yel' wawa' no' ka'.

³⁵ Na' che' Jesúza' legake':

—Nad' nak' ka yel' wawa' daa choe'n yel' mban che ben'. Beena' gake' nad' txen, gake' ka ben' nelj nlla'i toshiizi. Na' beena' gonlilallee nad', gake' ka to ben' bichga ibili. ³⁶ Per kon ka ba wnia' le', la'kzi ba ble'ile nad' bi chajle'le. ³⁷ Yog' ben'ka' chon Xa'na' lall' na', gaggake' nad' txen. Na' beena' gake' nad' txen aga wzoa'ne' ka'la. ³⁸ La' zaa yabana'

na' zoa' yell-lioni aga kwenche gon' daa nazan chan', san zaa kwenche gon' daa cheeni Xa'na', beena' bsel' nad'. ³⁹ Na' Xa'na', beena' bsel' nad', cheenile' bi wi'a latj kwiayi' ni to ben'ka' ba wleje' kwenche gakgake' nad' txen. San cheenile' yisban' legake' ladj ben' wetka' kat' illin lla te che yell-lioni. ⁴⁰ Na' dgan cheeni Xa'na', beena' bsel' nad': chaklallee gat' yel' mban zejli kani che yog'lol ben' gakbe'i nak' Xiine' na' gonlilallee nad'. Na' nad' yisbanee ladj ben' wetka' kat' te che yell-lioni.

⁴¹ Na'ch ben' wñabia' che ben' Israelka' wzologake' biz chon chnagake' che Jesús'a daa wne': "Nad' nak' yel' wao daa za' yabana'." ⁴² Na' che'gake':

—¿Aaga beenin Jesús, xiin Joséna'? Nombia'cho xaxna' beeni. ¿Berache naze': "nad' za' yabana'?"

⁴³ Na'ch che' Jesús'a legake':

—Bibi gon inazle cheyi daa wnia' le'. ⁴⁴ Ni to kono gak gon nad' txen shi Xa'na', beena' bsel' nad', bi gone' le' lall' na'. Na' ben'ka' nak nad' txen, yisban' legake' kat' te che yell-lioni. ⁴⁵ Lee librka' bzej dii ben'ka' wdixjee daa goll Chioza' legake' kani'yi nan: "Chioza' wli' wsedile' yog'lolte ben'." Na' yog' ben' chzenag che Xa'na' na' chajni'gakile' daa ne', legaken' chongake' nad' txen.

⁴⁶ 'Aga ga zoa ben' ba ble'ile' Xa'na'; toz nad', ben' za' yabana', ba ble'idee. ⁴⁷ Dii li nia' le', nottez ben' nonlilallee nad' de yel' mban che' zejli kani. ⁴⁸ Nadaan nak' ka yel' wawa' daa choe'n yel' mban che ben' zejli kani. ⁴⁹ Dii xozxto'leka' wdaogake' daa le maná latja' gana' bibi chashj chleb na' bia'kzə witgake'. ⁵⁰ San nad' cho'a dill' che yel' wao daa za' yabana', na' beena' gawe'n aga bi yel' wit zejli kani ile'ile'. ⁵¹ Nadaan nak' yel' wao daa za' yabana' daa cho'e'n yel' mban che ben'. Beena' gao yel' wawi, ibane' zejli kani. Na' yel' wawa' daa wi'ane', lënnan' beli chen cha'ni daa chzanid' kwenche gat' yel' mban che ben' yell-lioni.

⁵² Na'ch ben' Israelka' wzolo chshesh chnegake', che' ljwelle':

—¿Nakra gon beeni gone' beli chen che'na' gaochon?

⁵³ Na' che' Jesús'a legake':

—Nad', Ben' Bsel' Chioza' Yell-lioni, dii li nia' le', shi bi gaole kwerp cha'ni na' shi bi yeejle chen cha'ni, aga wat' yel' mban chele daa bi te cheyin. ⁵⁴ La' ben'ka' gaogake' kwerp cha'ni na' yeejgake' chen cha'ni, ben'kan' gat' yel' mban chegake' zejli kani. Na' kat' illin lla te che yell-lioni, nad' yisbangakee ladj ben' wetka'. ⁵⁵ La' kwerp cha'ni nakan dowalj yel' wao, na' chen cha'ni nakan dowalj dii cheeje'. ⁵⁶ Beena' gao kwerp cha'ni na' yeeje' chen cha'ni, nake' nad' txen, na' lekzka' nad' nakee txen. ⁵⁷ Xa'na', beena' bsel' nad', zoe' zejli kani na' de yel' mban cha' daa mbane' le'. Na' ka'kzan beena' gao beli chen cha'ni ibane' daa wi'ane' yel' mbanna'. ⁵⁸ Beli chen cha'ni nakan yel' waw dii za' yabana'. Ka nak yel' wawi, aga nakan ka daa le maná daa wdao dii xozxto'leka' na' bia'kzə witgake'. Beena' gao yel' wawa' daa za' yabana', ibane' zejli kani.

⁵⁹ Diikin wna Jesús'a shlak bli' bsedile' ben' gana' chdop chllag ben' Israelka' choe'lwillgake' Chioza' yell Capernaúma'.

Dill' dii nsa'yel' mban

⁶⁰ Na' zan ben'ka' nogake'ne', ka bengakile' daa wna Jesús'a, na' wnagake':

—Lallj inleeb nak dga chli' chsedi beeni. ¿Notgui gon ka ne'?

⁶¹ Na' Jesús'a gokbe'ile' bi wyazlall'gake' xtillee'na', na'ch wñabile' legake':

—¿Achakzbanile dga ba wnia' le'? ⁶² ¿Nakra gonle shel'ka' ile'ile nad', Ben' Bsel' Chioza' Yell-lioni, yiyep' gana' wzaa? ⁶³ Espíritu che Chioza' cho'e yel' mban che ben', la' beli chenna' aga bi zakiin. Dill'ka' ba wnia' gonan ka soalen Espírituna' le' na' gat' yel' mban chele. ⁶⁴ Per bia'kzə zoa bal-le bi chajle'le.

Goll Jesús'a legake' ka', la' dezd nechte ba nezkzile' no ben'ka' bi chajle' che' na' non gon le' lo na' ben' malka'. ⁶⁵ Na' chi'e legake':

—Ba wniakz' le' ni to kono gak gon nad' txen shi Xa'na' bi gone'ne' lall' na'.

⁶⁶ Na' lo llana'tez beñ' zan beñ'ka' nakgake'ne' txen bkwasgake' bich janogake'ne'.

⁶⁷ Na'ch che' Jesúza' beñ'ka' shllin, beñ'ka' nakgake'ne' txen:

—¿Alekzka' lenle cheenile yiyajle?

⁶⁸ Na' Simón Pédróna' chi'ene':

—Xan', aga nochlə cheyi zakii wzenagnto', la' tozo' lin' choo dillaa daa chonan ka gat' yel' mban chento' zejli kani. ⁶⁹ Ba wyajle'nto' cho', na' nezinto' lin' Crístoná', Xiin Chios yaa Chios banna'.

⁷⁰ Na' Jesúza' chi'e legake':

—Ba wlej' shllinle gake nad' txen. Per tole nakle dii xiwaa txen.

⁷¹ Wne' ka' che Jud Scariota', xiin to beñ' le Simón, la' nezile' nan Juda' gone'ne' lall' na' beñ' malka', la'kzi wlene' beñ'ka' shllin.

7

Beñ'ka' nak beñ' bish' golj Jesúza' bi wyajle'gake' che'

¹ Ka wde dga, Jesúza' wde' doxen gana' mbani Galileana'. La' bi goklallee shaje' gana' mbani Judeana' daa cheeni beñ' wñabia' che beñ' Israelka' witgake'ne'. ² Na' ka ba zoa gal' lni che ranshdo'ka' daa chon beñ' Israelka' yog' yiz, ³ beñ'ka' nak beñ' bish' golj Jesúza' che'gake'ne':

—Bi yigaano' nizə, san wyaj Judeana' kwenche beñ'ka' ba non li' txen ile'gakile' yel' wakka' chono'. ⁴ La' beena' cheeni seyi che', aga chkwashee diika' chone'. Bachgali chono' yel' wakki, jentegan lao yog'lol beñ'.

⁵ La' ni beñ' bisheekan' bi wyajle'gake' che'. ⁶ Na'ch che' Jesúza' legake':

—Bin' illin lla illin gor gon' daa lia bia' gon'. San le', bat'tez wak shajle. ⁷ Beñ' yell-lioki bibi de dii gonan ka gakzbangakile' le', san nadaan chakzbangakile' daa chepgakee malan' chongake'. ⁸ Li shaj le' lñina'. San nad' bi saa, la' bin' illin lla illin gor gak cha' daa lia bia'.

⁹ Biyoll golle' legake' ka' na' bigaane' Galileana' zi xtit.

Wyaj Jesúza' lñina'

¹⁰ Na' ka wde wza' beñ' bisheeka', lekzka' wzee wyaje' lñina' do ngash'z. ¹¹ Na' beñ'ka' chñabia' beñ' Israelka' chiyiljgake'ne' lo lñina', che' ljwellgake':

—¿Garanzi beena', lla?

¹² Na' ladj beñ'ka' lle' lñina', beñ' zan choe'gake' xtill' Jesúza'. Bale' che': “Nake' beñ' wen.” Na' zi bale' che': “Bi nake' beñ' wen, la' chdaze' chziyee beñ'.”

¹³ Per ni to kono biyaxji we' xtill' Jesúza' ka nla'z daa chllebgake' beñ'ka' chñabia' beñ' Israelka'.

¹⁴ Na' ba zej shon tap lla chak lñina' ka bllin Jesúza' gana' zoa yoodo'na' na' wzoloe' chli' chsedile' beñ'. ¹⁵ Na' chibani beñ' Israelka', na' che' ljwelle':

—¿Nakra chak chli' chsedile' beeni beñ', len aga bi nsede'?

¹⁶ Na' che' Jesúza' legake':

—Diika' chli' chsedid' aga nakan dii chiyiljall'z', san beena' bsel' nad', len' bli' bsedile' nad' diiki. ¹⁷ Nottez beñ' cheenile' gone' ka cheeni Chioza', wakbe'ile' shi daa chli' chsedid' nakan che Chios wa shi nakan dii chiyiljall'z'. ¹⁸ Beena' tobia'loze' cho'e xtillee, balaan che kwinzen' chylje', san beena' chylje' sho' beena' bsel' le' balaan, len' cho'e dill' li, na' aga bi dill' wxiye' cho'e.

¹⁹ Dii Moiséza' bene' le' ley che Chioza', na' ni tole bi chonle ka nllian bia' gonle. ¿Biche cheenzile witle nad'?

²⁰ Na'ch beñ'ka' lle' na' che'gake'ne':

—Dii xiwaan yoo no' ka'. ¿Noran cheeni wit li'?

²¹ Na' che' Jesúza' legake':

—Tochga yel' waka' ba ble'ile ben' llana' chombaanchō na' yog'le chibanile. ²² Dii li dii Moiséza' bene' byen yog'tele nakle ben' byo chiyal' sho'le sen daa le circuncisión, la'kzi aga len' wzololene'n, san dii xoxto'leka'ten. Daan chgoole bi' byodo'ka' sen na' la'kzi nakan lla chombaanchō. ²³ Na' shi choe'le latj sho' bi' byodo'ka' sen daa le circuncisión lo llana' chombaanchō kwenche gak ka na leya' daa bzej dii Moiséza', ¿biche chllaazle nad' daa biyon' to ben' llana' chombaanchō? ²⁴ Bi wchoglizle che ben' shi bi chle'ile chone', san cheenin inezile nakyen'an nakan kwenche we'le dill' kon ka nakan.

Jesúza' wne' zee gana' zoa Chioza'

²⁵ Na'ch bal' ben' Jerusalénka' nagake':

—¿Aaga beenin cheengakile' witgake', lla? ²⁶ Li wwia ka cho'e dill' ladj lkwe' ben', na' ni to kono bi che'. ¿Anti ba chajle' lza ben' wnabia'ka' nan dii li beeni nake' Crístona', beena' wsel' Chioza' inabi'e, lla? ²⁷ Cho' nezicho ga ben' beeni. San kat' yid beena' nak Crístona', ni to kono inezile galə za' beena'.

²⁸ Jesúza' chli' chsedile' ben'ka' yoodo'na', na' ka benile' daa wna ben'ka' che', na' wnie' zillj chi'e:

—Chakzile nombia'le nad' na' nezile ga ben' nad'. Aga zaa tolazz', san zoa beena' bsel' nad', beena' chon kon ka chchebe' gone'. Na' le' bi nombia'lene', ²⁹ san nad' nombi'ane', la' gana' zoen' wzaa, na' len' bselee nad'.

³⁰ Na'ch bale' goklall'gake' gox'gake'ne', per ni toe' bi bex' le', la' bin' illin lla illin gor gak che' daa lia bia'. ³¹ Na' ben' zan wyajle'gake' che', na' wnagake':

—Kat' yid beena' nak Crístona', beena' wsel' Chioza' inabi'e, ¿awli'techle' yel' wak aga ka daa chli' beeni, lla?

Goklall'gake' gox'gake' Jesúza'

³² Na' fariseoka' bengakile' dillaa daa choe' ben'ka' che Jesúza'. Na' legake' len bxoza' chnabia' bsel'gake' ben'ka' chap yoodo'na' kwenche lljex'gake' Jesúza'. ³³ Na' Jesúza' golle':

—Aga sshach soalen' le', na'ch yiyaa gana' zoa beena' bsel' nad'. ³⁴ Na' yiyiljle nad' per aga willelile nad' daa bi gak yidle gana' lljazoa'.

³⁵ Na'ch ben' Israelka' che' ljwellgake':

—¿Garan yiyaj beeni na' bich yillelichone', lla? ¿Anti gana' lle' ben' wlall chechoka', ben'ka' lle' lall ben' zit'kan' shaje' kwenche lljasedile' ben' griegoka', lla? ³⁶ ¿Beran zejin daa ne': “Yiyiljle nad', per aga willelile nad' daa bi gak yidle gana' lljazoa'”?

Espíritu che Chioza' nake' ka nis yaa nis ban

³⁷ Na' llana' zeelo gok lnina', llana' nak lla choo lla xen, wzolla' Jesúza' na' wnie' zillj, chi'e:

—Shi nole chbili, li da yeejle nisa' daa gon' le'. ³⁸ Na' gak kon ka na Cho'a Xtill' Chioza' gana' nan beena' gonlilallee nad', gak loo yichjlall'do'ena' ka ga chaltit nis yaa nis ban.

³⁹ Na' daa wna Jesúza' ka', zejin soa Espíritu che Chioza' loo yichjlall'do' beena' gonlilall' le'. La' ka gora' bin' yidsoa Espírituna' loo yichjlall'do' ben' daa bin' sho' Jesúza' balaanna' daa lia bia' sho'e kat' yiyepe' gana' zoa Chioza'.

Gok ben'ka' chop shon kwenla

⁴⁰ Na' bal' ben'ka' bengakile' daa wna Jesúza' na' wnagake':

—Dii li beeni nake' beena' lia bia' yid kwenche chixji'e daa che' Chioza'ne'.

⁴¹ Na' zi bale' che'gake':

—Beenikzan' Crístona', beena' chbezcho wsel' Chioza' inabi'e.

Na' zi bale' che'gake':

—¿Achakile ladj ben' Galileaka' ichej beena' wsel' Chioza' inabi'e? ⁴² Cho'a xtill' Chioza' nan lo dia che dii Davina' galj beena' nak Crístona', na' gake' ben' yell Belén ka dii Davina'.

⁴³ Ka' gok, gokgake' chop shon kwenla ni che Jesúza'. ⁴⁴ Bale' goklall'gake' gox'gake'ne', per ni toe' bi biyaxji.

Ben'ka' wñabia' ben' Israelka' bi wyajle'gake' che Jesúsza'

⁴⁵ Na'ch ben'ka' chap yoodo'na' billingake' gana' zoa fariseoka' len b̄xozka' chñabia'. Na'ch che'gake' legake':

—¿Biche bi b̄che'lene'?

⁴⁶ Na' ben'ka' chap yoodo'na' che'gake':

—Ni to konon' we' dill' ka dillaa choe' beena'.

⁴⁷ Na'ch che' fariseoka':

—¿Alekzka' lenle ba wxiyee? ⁴⁸ Ni to ben' wñabia' chechoka', ni neto' fariseo bi chajle'nto' che'. ⁴⁹ Per ben'ki bi nombia'gake' leya', ba wlliyi'gake'.

⁵⁰ Na' farisewa' le Nicodemo, beena' wyaj lao Jesúsza' wal-lə, chi'e legake':

⁵¹ —Ley chechona' nan aga wak w̄choglocho che to ben' in̄acho chone' mal shi bin' wzenagcho dillaa wi'e kwenche inezicho bin chone'. ¿Anti aga kan' nakan?

⁵² Na'ch che'gake'ne':

—¿Alekzka' ben' Galilea li'? Bsed kwenche inezilo' ni to ben' chyixjee daa che' Chioza'ne' bin' ichej gana' mbani Galileana'.

⁵³ Na'ch billeshgake' ziyaj lill che chegake'.

8

Noola' bidol'len ben' byona'

¹ Na' Jesúsza' wyaje' lo Yaa Olívoza'. ² Na' betiyo ka wyeeni' wizaje' yoodo'na'. Na' ben' zan inleeb wbig' kwite'na', na' wchi'e wzoloe' bli' b̄sedile' legake'. ³ Na'ch ben'ka' chli' chsedileya' len fariseoka' n̄che'gake' to noolə bidol'lene' to ben' byo, na' b̄zegake'ne' ladj ben'ka' lle' na'. ⁴ Na' che'gake' Jesúsza':

—Maestro, ba bidol'into' nooli kon to ben' byo. ⁵ Na' nezinto' leya' daa bzej dii Moiséza' nan chiya' w̄itcho noolka' chon ka' kon yaj. ¿Shera li', bi ka ino'?

⁶ Che'gake'ne' ka' kwenchez kweygake'ne' dill' ga si' sengake' na' gaogake' xya che'. Na'ch Jesúsza' b̄chekee bzeje' lo yona' kon xbene'na'. ⁷ Na' daa zeyidgake' chñabgakile'ne', na' bibe'shawee chi'e legake':

—Beena' bibi saaxya che' de, wak soloe' wtakwe'ne' yaja'.

⁸ Na'ch bizchekee chizzeje' lo yona'. ⁹ Na' ka goll Jesúsza' legake' ka', na' biza' twej tweje', wzolozan ben' golka' na'tech ben' xkwid'ka', na' stoz noola' b̄gaanlene' Jesúsza'. ¹⁰ Na' bibe'shao' Jesúsza' dii yoblə, na' chi'ene':

—Noolə, ¿garan ben'ka' chao xya cho'? ¿Ani toe' bibi beni li'?

¹¹ Na' che' noola'ne':

—Ni toe', ben'do'.

Na'ch che' Jesúsza'ne':

—Ni nad' bibi gonid' li'. Biyaj, na' bich wx̄inj w̄leno'.

Jesúsza' nsee beeni' che ben' yell-lioni

¹² Na'ch Jesúsza' bizoloe' choe'lene' ben'ka' lle' na' dill', chi'e:

—Nad' nak' beeni' che ben' yell-lioni. Beena' gone' nad' txen bich soe' lo yel cho' che dii mala', san loo yichjlall'do'ena' gape' beeni' daa nsa' ye' mban zejli kañi.

¹³ Na'ch che' fariseoka'ne':

—Li' choe'zo' xtill' kwino', na' daa choe' xtill' kwino' bi nakan dii shajle'cho.

¹⁴ Na' che' Jesúsza' legake':

—La'kzi choa' dill' che kwin', nezid' nakan dill' li, la' nezid' gan zaa na' gan yiyaa. San le', aga nezile gan zaa, ni bi nezile gan yiyaa. ¹⁵ Le' ch̄choglole che ben' lega ben' yell-lioni. San nad' bi ch̄chogloa' che ben'. ¹⁶ Per shi nad' w̄chogloa' che ben', kon ka nakannan' w̄chogloa'n, la' aga tobia'lozaan ch̄chogloa'n, san X̄a'na', beena' b̄sel' nad', naknto' txen ch̄choglonto' che ben'. ¹⁷ Ley chelena' nan shi chop ben' toz ka chitili x̄tilleeka' chiya'!

shajle'cho chegake'. ¹⁸ Na' nak chopnto', nad' cho'a dill' che kwint', na' lekzka' Xa'na', beena' bsel' nad', cho'e dill' cha'.

¹⁹ Na'ch che'gake'ne':

—¿Garan zoa Xo'na'?

Na' che' Jesúza' legake':

—Ni nad' ni Xa'na' bi nombia'le. La' shel' nombia'le nad', lekzka' nombia'le Xa'na', shel'ka'.

²⁰ Jesúza' bi'e dill'ki shlak bli' bsdile' ben' latja' gana' chi' daa chgoogake' mech che yoodo'na', per ni to kono bex' le' daa bin' illin lla bin' illin gor gak che' daa lia bia'.

Jesúza' wne' kono gak yiyaj gana' yiyaje'

²¹ Na'ch Jesúza' wizi'e legake':

—Nad' yiyaa, na' yiyilje nad', na' gana' yiyaa aga wak sa'le, la' lao saaxya cheleka' guetle.

²² Na'ch ben' wñabia' che ben' Israelka' che' ljwellgake':

—¿Acheenile' yiyit kwinen', lla? ¿Aadan naze': "Gana' yiyaa bi gak sa'le"?

²³ Na'ch che' Jesúza' legake':

—Le' nakle ben' yell-lío, na' nad' zaa yabana'. Le' chonle lega ben' yell-lío, san nad' bi chon' ka le' ben' yell-lío. ²⁴ Daan nia' le', guetle lao saaxya cheleka'. La' shi bi chajle'le nadaan nak' beena' ba wnia' nak', na' guetle lao saaxya cheleka'.

²⁵ Na'ch che'gake'ne':

—¿Norakzə li', shka'?

Na' che' Jesúza' legake':

—Nadaan nak' beena' ba wñiakz' le' dii nechte. ²⁶ Dii zan dii gak inia' dii gaogakan xya chele. Per beena' bsel' nad' cho'e dill' li, na' daa wne' nad' lennan' choe'len' ben' yell-lioni dill'.

²⁷ Na' legake' aga wyajni'gakile' shi xtill' Xe'nan' choe'lene' legake'. ²⁸ Na' daan chi'e legake':

—Kat' ba bda'le nad', Ben' Bsel' Chioza' Yell-lioni, to lee yag, kana'chan gakbe'ile nak' beena' ba wnia' nak'. Na' gakbe'ile aga ga de to dii ben' to bia'loz', san kon daa bsemi Xa'na' nad', lennan' cho'a dill'. ²⁹ La' Xa'na', beena' bsel' nad', lekzen' zoalene' nad'. Bi chbej yichje' nad', la' toshiizi chon' ka chazlallee.

³⁰ Na' ka biyoll be' Jesúza' dill'ka', ben' zan ben' lill' gake'ne'.

Ben'ka' chñabia' dii mala' yichjlall'do'eka'

³¹ Na'ch che' Jesúza' ben' Israelka' ba chajle' che':

—Shi le' soachechle gonle ka ba wnia', dii li txenan ba nakle nad', shi naa. ³² Na' gombia'le dill' li cha'na', na' kat' ba nombia'len, gakle ka to ben' ba biyell bila' lao daa ntakw nchejan le'.

³³ Na'ch che'gake'ne':

—Neto' naknto' xiin dia che dii Abrahama' na' axt naanlla aga non' inabia' neto' kwenche gonznto' kon daa ine'. ¿Berache nazo' yiyell yila'nto'?

³⁴ Na' che' Jesúza' legake':

—Dii li nia' le', nottez beena' chon dii mala' nake' ka ben' ndoo lawinna' daa chñabi'an le'. ³⁵ To wen llin aga toshiizi soe' lill xane'na', san xiin xan llinna', toshiizi soe' lill xe'na'.

³⁶ Na' shi nad', Xiin Chios, yisell yilaa le' lawi dii mala', dii li wiyell wila'le lawinna'.

³⁷ Nezkid' nakle xiin dia che dii Abrahama', per cheenile witle nad' daa bi chleble cho'a xtillaani. ³⁸ Nad' cho'a dill' che daa ba ble'id' gana' zoa Xa'na', na' le', chonle ka na xalena'.

³⁹ Na' che'gake'ne':

—Xiin dia che dii Abrahama' neto'.

Na' Jesúza' chi'e legake':

—Shel' nakle dowalj xiin dia che dii Abrahama', kon ka ben dii Abrahama' chonle, shel'ka'. ⁴⁰ La'kzi ba wnia' le' dill' li daa wna Chioza' nad', kon cheenkzile witle nad'. Dii Abrahama' agaga bene' ka chonle. ⁴¹ Le' chonle kon ka chon xalena'.

Na'ch che'gake'ne':

—Aga naknto' ka to ben' bi wyoo xayin. Toz Chioza' nake' Xanto'.

⁴² Na'ch che' Jesúza' legake':

—Shel' lekzile Chioza' nake' Xale, wakile nad' shel'ka', la' kwite'nan' wzaa. Aga tobialozaan bid', san Chiozan' bselee nad'. ⁴³ Na' aga chajniile diika' nia' le' daa bi cheenile wzenagle dill'ka' cho'a. ⁴⁴ Dii xiwaan nak xale na' chibaile chonle daa chaklalliin. La' kana'te dii xiwaa nakan to wen xya, na' ni shlin bin' gonan daa nak shli, ni bi choe'n dill' li. Kat' chziye'n chonan kon ka nan loo lall'do'inna', la' nakan liizelozii dii wxiye' na' nakten xan yel' wxiye'na'. ⁴⁵ Na' nad', daa cho'a dill' lina' aga chajle'le cha'. ⁴⁶ Ni tole bi gak wli'le shi de saaxya cha'. Na' shi cho'a dill' li, ¿berache bi chajle'le cha'? ⁴⁷ Beena' nak xiin Chioza' chzenague' xtilleena'. Na' le', bi chzenaglen daa bi nakle xiine'.

Ba zoakz Crístona' kana' zi' galj dii Abrahama'

⁴⁸ Na'ch ben' wñabia' che ben' Israelka' che'gake'ne':

—Aga naznto' nanto' nako' ben' Samaria na' yootio' to dii xiw'!

⁴⁹ Na' che' Jesúza' legake':

—Aga no dii xiw' yo'a, san Xa'nan' chgwaa balaan, per le', chnit chdele nad'. ⁵⁰ Aga chyilj' koo ben' nad' balaan. San zoa beena' cheeni sho'a balaan, na' len' chchogloe' che ben' kon ka nakan. ⁵¹ Dii li nia' le', beena' chon ka nia', ibane' zejli kani.

⁵² Na'ch ben' wñabia' che ben' Israelka' che'gake'ne':

—Naach ba wñezinto' dii xiw'kzan yoo. Dii xozxto'cho Abrahama' wite' na' lekzka' yog' ben'ka' wdixjee daa goll Chioza' legake' kani'yi. Na' li' naa, nazo': “Beena' chzenag cha' ibane' zejli kani.” ⁵³ ¿Achakilo' zak'cho' aga ka dii xozxto'cho Abrahama'? Le' wite' na' ka'kzə dii ben'ka' wdixjee daa goll Chioza' legake' kani'yi. ¿Noraka chakzi kwino'?

⁵⁴ Na'ch che' Jesúza' legake':

—Shel' nadaan chgwaa kwina' balaan aga bi zakiin, shel'ka'. Per Xa'na', beena' nale nake' Chios chele, len' chgwee nad' balaan. ⁵⁵ La'kzi bi nombia'lene', nad' nombi'ane'. Shel'ka' nia' bi nombi'ane', na' nak' ka le' ben' wxiye'. Per nombi'ane' na' chon' ka ne'. ⁵⁶ Dii xozxto'cho Abrahama' bibaile' daa wñezile' ile'ile' llaki zoa' yell-lioni. Na' ba ble'ile'n na' bibaile'.

⁵⁷ Na'ch ben'ka' chñabia' ben' Israelka' che'gake'ne':

—Ni shiyon yiz bin' gakilo' na' nazo' zle'ilo' dii Abrahama'.

⁵⁸ Na'ch che' Jesúza' legake':

—Dii li nia' le', kana' zi' galjte dii Abrahama', bakz zoa' nad'.

⁵⁹ Na'ch lii wdoyotegake' yaja' nan wtakwgake'ne'n, per lii bkwash'tie' na' bizee gana' zoa' yoodo'na'. Na' ni bi gokbe'gakile' bidie' ladje'ka' ziyaje'.

9

Biyon Jesúza' to ben' lchol

¹ Ka zej Jesúza' na' ble'ile' to ben' byo ben' golje' nchole'. ² Na' ben'ka' nakgake'ne' txen che'gake'ne':

—Maestro, ¿berache golj beeni nchole', lla? ¿Anchole' ni che saaxya che'na', anti ni che saaxya che xaxneekan', lla?

³ Na' che' Jesúza' legake':

—Aga ni che saaxya che'nan' ni aga ni che saaxya che xaxneekan', san kwenche wli'lawi yel' wak che Chioza' lo yel' mban che'nan' nake' ka'. ⁴ Shlak naa ni de latj, chiyal' goncho xshin beena' bsel' nad'. La' wllin lla kat' kochno bi gak gon. ⁵ Shlak ni zoa' yell-lioni nak' beeni' che ben' yell-lioni.

⁶ Na' ka biyoll wna Jesúza' ka', na'ch blle' xeneena' lo yona' na' bene' lat' benj kon xeneena', na'ch wdebe'n jalao ben' lchola'. ⁷ Na' chi'ene':

—Wyaj jadib jalawo'na' cho'a tanga' daa le Siloé —na' Siloé zejin Ben' Nselee.

Na'ch wyaj ben' lchola' jadib jalawe'na', na' ka bizee na', ba chle'ile'. ⁸ Na'ch ben' wlill che'ka' na' ben'ka' ble'gakile'ne' kana' nchole' che'gake':

—¿Aga beenin chbi'e chñabe' mecha'?

⁹ Na' bale' che':

—Awe, len'.

Na' zi bale' che':

—Aga len', per ka'tekzə nake'.

Na' beena' chi'e:

—Nad'kzan'.

¹⁰ Na'ch wñabgakile'ne':

—¿Nakra gok ba chle'ilo'?

¹¹ Na' chi'e legake':

—To ben' le Jesús bene' benja' na' wdebe'n jalaw'ki na'ch wne' nad': “Wyaj gana' llia tanga' daa le Siloé na' jadib jalawo'na'.” Na'ch wyaa na' ka biyiba'n, na' gok ble'id'.

¹² Na'ch che'gake'ne':

—¿Garañ beena' no' ka'?

Na' chi'e legake':

—Bi nezid'.

Wñabyolli fariseoka' nak gok ble'i ben' lchola'

¹³ Na'ch jwa'gake' beena' gok ben' lchol' lao fariseoka'. ¹⁴ Na' llana' wdeb Jesúza' benja' jalao beena' kwenche ble'ile' nakan lla chombaangake'. ¹⁵ Na'ch fariseoka' lekzka' wñabgakile'ne' nak gok chle'ile'. Na' chi'e legake':

—Beena' biyone' nad' wdebe' benja' jalaw'ki, na' ka biyiba'n gok ble'id'.

¹⁶ Na'ch bal' fariseoka' che'gake':

—Aga Chiozan' bselee beena', la' chone' daa bi chiyal' goncho llani chombaangcho.

Na' zi bale' che'gake':

—¿Nakra gon to ben' saaxya gone' yel' wak ka diiki chon beeni?

Na'ch gokgake' chopla. ¹⁷ Na'ch dii yoblə gollgake' beena' gok ben' lchol':

—¿Shera li'? ¿Bi ino' che beena' ben ka chle'ilo'?

Na' chi'e legake':

—Nad' nia' nake' to ben' chyixjee daa che' Chioza'ne'.

¹⁸ Na' ben'ka' chñabia' ben' Israelka' bi wyajle'gake' shi dii li gok beena' ben' lchol' na' naa ba chle'ile'. Na'ch goxgake' xaxneena', ¹⁹ na' wñabgakile' legake':

—¿Abeenin xiinlena', beena' nale nchole' ka golje'? Na' ¿nakra gok ba chle'ile' naa, shka'?

²⁰ Na' xaxneena' billiigake' xtilleeka':

—Nezinto' beenin xiinnto'na' na' golje' nchole'. ²¹ Per aga nezinto' nak gok chle'ile' naa, ni bi nezinto' non biyon le'. Li inabile', la' aga nake' bi'do' inacho bi gak ine' non biyon le'.

²² Goll xaxneena' ka' daa chlebgake' ben'ka' chñabia' ben' Israelka', la' ba bgaangake' dill' nottezə ben' ine' Jesúza' nake' Crístona' bi wlebgake'ne' gana' chdop chllaggake' choe'llwillgake' Chioza'. ²³ Daan golltezə xaxneena': “Li inabile', la' aga nake' bi'do' inacho bi gak ine' non biyon le'.”

²⁴ Na'ch dii yoblə goxgake' beena' gok ben' lchol', che'gake'ne':

—Bzoashki Chioza' de taschiw shi leilo' choo dill' li, la' nezinto' beena' biyon li' nake' ben' saaxya.

²⁵ Na'ch golle' legake':

—Bi nezid' shi nak beena' ben' saaxya. Lete dii nezid', golj' nchol' na' naa ba chle'id'.

²⁶ Na'ch che'gake'ne':

—¿Beran benile' li'? ¿Nak bene' kwenche chle'ilo'?

²⁷ Na' chi'e legake':

—Ba wniakz' le', na' bi chzi'le cho'a xtilaana'. ¿Biçe cheenzile inia'n dii yoblə? ¿Anti lekzka' lenle ba cheenile gonlene' txen?

²⁸ Na'ch wnegake'ne' zibia', che'gake'ne':

—Lin' nako' beena' txen, san neto' Moisézan' naknto' txen. ²⁹ Nezinto' Chioza' wnie' Moiséza', san beena', ni bi nezinto' ga zee.

³⁰ Na'ch beena' gok beñ' lchoł chi'e legake':

—¿Nakkzan dii yibanicho daa bi nezile ga za' beena' na' ba bene' ka chle'id'! ³¹ Nezkzicho aga chzenag Chioza' che beñ' saaxyaka', san chzenague' che beñ'ka' choe'la'ogake'ne' na' chongake' daa chazlallee. ³² Dezd ka wxw wzil yell-lioni biñ' yenicho shi zoa beñ' chak chone' ka chle'i to beñ' golje' nchole'. ³³ Shel' beeni bi nake' to beñ' bsel' Chioza', ni to yel' wak bi gak gone', shel'ka'.

³⁴ Na'ch che'gake'ne':

—Dezd ka goljo' nako' beñ' saaxya. ¿Ana' chakilo' wli' wsedilo' neto'? Na'ch bibejgake'ne' ladje'ka'.

Ben'ka' nchol nniti yichjlall'do'eka'

³⁵ Na' wnezi Jesúza' bibej fariseoka' beena' gok beñ' lchoł ladje'ka', na' ka billague'ne' na'ch chi'ene':

—¿Achonlilalloo Beena' Bsel' Chioza' Yell-lioni?

³⁶ Na' beena' chi'ene':

—Beñ'do', wnashki nad' nora beena' kwenche gonlilallaane'.

³⁷ Na' che' Jesúza'ne':

—Ba ble'kzilo'ne', na' lekzen' chshaljleno' naa.

³⁸ Na'ch lii bček'te xibe'na' lao Jesúza', na' chi'ene':

—Chonlilallaa li', Xan' —na'ch be'laweene'.

³⁹ Na'ch che' Jesúza':

—Ba bid' yell-lioni kwenche wchogloa' che beñ' yell-lioni. Zaa kwenche beñ'ka' nak ka beñ' lchoł ile'gakile', na' beñ'ka' chakgakile' chle'gakile' yiyakgake' ka beñ' lchoł.

⁴⁰ Na'ch bał fariseoka' lle' na', ka bengakile' chi'e ka', che'gake'ne':

—¿Achakilo' lennton' naknto' beñ' lchoł?

⁴¹ Na'ch che' Jesúza' legake':

—Shel' nakle beñ' lchoł, aga bi xtol'le de, shel'ka'. Per daa nale chle'ile, daan de xtol'le.

10

Jempl che leej che xil'ka'

¹ Dii li nia' le', beena' bi choo cho'a leej che xil'ka' san chiyiljallee cho'e gan yoblə, beenan' beñ' wbanna'. ² San beena' choo cho'a leeja', len' ngoo lall' nee chape' legakb. ³ Na' beena' chap cho'a leej chebka' chsalje'n kwenche cho'e, na' xil'ka' lii chiyombia'tegakb shi'ena'. Na' cho'e le to tob na' chbeje' legakb loo leej chebka'. ⁴ Na' chde chbeje' yog' xil' che'na' na'ch chbialoe' laobka'. Na' xil'ka' xochi chjanogakb le' daa nombia'gakb shi'ena'. ⁵ Aga willjanogakb beñ' yoblə, san wxonjdogakib le' daa bi nombia'gakb shi'ena'.

⁶ Bzoa Jesúza' jempli kwenche bzajniile' beñ'ka'. Per legake' aga wyajni'gakile' bin zeji daa golle' legake'.

Jesúza' chapshi'e cho' ka beñ' chapshi'e xil' che'

⁷ Na'ch chize' Jesúza' legake':

—Dii li nia' le': Nad' nak' ka cho'a leej che xil'ka'. ⁸ Yog' beñ'ka' bid kana' biñ' yid', nakgake' ka beñ' wban. Na' beñ'ka' nia' nakgake' xil' cha' bi bzenaggake' chegake'. ⁹ Nad'

nak' ka cho'a leej che xil'ka', na' beena' gonlilallee nad' bi kwiayee, san gake' ka xilaa, bana' mbalaz choob na' chchejb cho'a leej cheba' na' chllelib dii cheej chaob.

¹⁰ 'Ka nak wbanna', za'ze' kwenche kwane' na' wite' na' wliayee legake'. San nad', zaa kwenche wi'a to yel' mban shao' chegake', na' soagake' mbalaz. ¹¹ Nad' nak' ka to ben' chapshi'e xil' che'na', beena' axt chzani yel' mban che'na' ni che xil'do'ka' nape'. ¹² San beena' chap xil'ka' ni che mba laxje'na', ka chle'ile' ba za' to ba znia gaob xil'ka', lii chchoonlall'tie'gakb na' chxonje' daa bi nakgakb ba che'. Na'ch chllin ba zñiana' chox'b xil'ka' na' chsheshlesb legakb. ¹³ Beena' chzi' laxje'na' chxonjtezile' xil'ka', la' daa ikaaz laxje'nan' chibaile', na' bi chakile' legakb.

¹⁴ 'Nad' nak' ka to ben' chapshi' xil'do'. Na' ben'ka' chonlilall'gake' nad' nakgake' ka xil'do' cha'. Nad' nombi'a legake' na' legake' lekzka' nombia'gake' nad'. ¹⁵ Ka chak che Xa'na' nombi'e nad', na' nad' nombi'ane', ka'kzan nad' nombi'a legake', na' chzanid' yel' mban cha'ni ni chegake'. ¹⁶ Na' lekzka' zoach ben' yoblə, ben' zi' gonlilall' nad', na' lekzka' nakgake' ka xil' cha', per bin' gaggake' txen xil' cha'ka'. Na' chiyal' gaxgakee kwenche wzenaggake' cha', na' yog'gake' gaggake' tozə, na' toz nad' gak lall' na'gake'.

¹⁷ 'Chaki Xa'na' nad' daa chzanid' yel' mban cha'ni witgake' nad', na'tech yiban' sto shii. ¹⁸ Ni to kono yikaa yel' mban cha'ni, san kwinkza'n wi'an. Nap' yel' wñabia' kwenche wi'a yel' mban cha'ni witgake' nad', na' lekzka' nap' yel' wñabia' kwenche yiban'. La' kan' nllia Xa'na' bia' gon'.

¹⁹ Na'ch dii yoblə ben' Israelka' lle' na' gogkake' choplə ka bengakile' daa wne'. ²⁰ Zane' che'gake':

—¿Biche chzenagzle che beena'? Dii xiwaan yo'e, na' chaktonte'n.

²¹ Na' zi bale' che'gake':

—Aga choe' beeni dill' ka ben' yoo dii xiw', la' aga bi yel' wak nap dii xiwaa yiyonan to ben' lchol.

Ben'ka' chñabia' ben' Israelka' bi bzenaggake' che Jesúza'

²² Na' do kana', gol' lnina' Jerusalenna' daa chisa'lall'gake' llana' bengake' lall' na' Chioza' yoodo'na', na' nak beo' zag. ²³ Na' chda Jesúza' loo koridor che dii Salomónna' daa ze kwit yoodo'na'. ²⁴ Na' ben'ka' chñabia' ben' Israelka' wyechjyobgake'ne', che'gake'ne':

—¿Axt batrazə yikwaso' yel' chakchoplall' chento'ni? Shi li'kzan Crístona', beena' chbeznto' wsel' Chioza', lla wnatega neto' kwenche inezinto'.

²⁵ Na' che' Jesúza' legake':

—Ba wniakz' le' kan', na' bi chajle'le. Yel' wakka' chon', chonlena'n yel' wñabia' che Xa'na', na' chli'n nan len' bselee nad'. ²⁶ Na' le', bi chajle'le daa bi nakle txen ben'ka' nia' nakgake' xil' cha'. ²⁷ Nombi'a ben'ka' nia' nakgake' xil' cha', na' legake' chzenaggake' xtilaana' na' nogake' nad'. ²⁸ Na' cho'a legake' yel' mban zejli kani, na' bi kwiayi'gake'. Na' ni to kono gak yibej legake' lo ni'a na'ni. ²⁹ Xa'na' ba bene' legake' lall' na' gapshiigakee, na' len' chñabia'che' lao nottez. Na' ni to kono gak yikwas legake' lo ni'a neena'. ³⁰ Ka Xa'na'kz, nad'.

³¹ Na'ch ben' Israelka' bizgoyogake' yaja' kwenche nan wtakwgake'n Jesúza'. ³² Na' chi'e legake':

—Dii zan dii wen ba ble'ile chonlen' yel' wak che Xa'na'. Na' ¿nonnan' bi choollall'le daa cheenile' wtakwle nad' yaja'?

³³ Na' ben'ka' chñabia' ben' Israelka' che'gake'ne':

—Aga ni che dii wenka' ba benon' cheeninto' wtakwnto' li' yaja', san daa chonz kwino' ka Chiozan', la' ben'zə li'.

³⁴ Na'ch che' Jesúza' legake':

—Ley chelena' nan, Chioza' ne': “Nad' wnia' le' nakle chios.” ³⁵ Cho'a Xtil' Chioza' toshiizi nakan ka wne', na' shi cho'en dill' bsi'e “chios” ben'ka' wdixjee xtilleena', ³⁶ ¿biche nazle nad' chñia' che Xacho Chioza' daa nia' nak' Xiine', len len' wleje' nad' na' bselee

nad' yell-lioni? ³⁷ Shi bi chon' ka chon Xa'na', aga wyajle'le cha'. ³⁸ Na' shi chle'ile chon' ka diika' chon Xa'na', li shajle' che diika' chon', la'kzi bi cheenile shajle'le cha', kwenche inezyen'ile Xa'na' zoalene' nad' na' nad' zoalenee.

³⁹ Na'ch dii yoblə goklall'gake' gox'gake'ne' na' bene' gan bile' lawe'ka'.

⁴⁰ Na'ch bizyaj Jesúza' dii yoblə shlaa yao Jordánna' jazoe' latja' gana' bchoa Juanna' ben'ka' nisa' kana'. ⁴¹ Na' ben' zan wyajgake' gana' zoe' na' che'gake':

—La'kzi bibi yel' wak bli' Juanna', yog' diika' wne' che beeni nakan dii li.

⁴² Na' ben' zan wyajle'gake' che Jesúza' na'.

11

Wit Lázaroná'

¹ Yell Betániana' wzoa to ben' bi shao' wlie' Lázaro, na' lekzka' na' wzoa ben' zane'ka' Maríana' len Mártaana'. ² Maríana', ben' zan Lázaroná', len' bwazje' set zixa' ni'a Xancho Jesúza' na' bisbillile'n yish' yichje'na'. ³ Na' chop bilte ben' zan Lázaroná' bsel'gake' rson lao Jesúza' che'gake'ne':

—Xan', bi shao' ben' zannto'ni, beeni nllaguilo'.

⁴ Na' ka beni Jesúza' rsonna', chi'e:

—Bi guetile' yillwe'na', san chak che ka' kwenche sho' Chioza' balaan, na' lekzka' nad', nak' Xiine', sho'a balaan.

⁵ La'kzi Jesúza' chakgaile' Mártaana', na' ben' bile'na' na' Lázaroná', ⁶ ka benile' rson bi shao' Lázaroná', wllachile' zi chop lla gana' zoe'. ⁷ Na' ka wde, chi'e ben'ka' nakgake'ne' txen:

—Li sho' Judeana' sto shii.

⁸ Na'ch ben'ka' nakgake'ne' txen che'gake'ne':

—Maestro, kani batchgana' goklallii ben' Israelka' lle' na' witgake' li' kon yaja'. ¿Ana' cheenilo' yizajo' na'?

⁹ Na' che' Jesúza' legake':

—¿Aaga shllin goran' de beeni'na' shlla? Na' beena' chda tellalə aga willjachewee daa de beeni'na' yell-lioni. ¹⁰ San shi chde' wal-lə, willjachewee daa bi nla'.

¹¹ Na'tech golle' legake':

—Ba ches Lázaroná', beena' nllaguicho, na' sha' lljasbanee.

¹² Na'ch che' ben'ka' nakgake'ne' txen:

—Xan', shi ba chese', wiyakshao'lall'kzile'.

¹³ Jesúza' golle' ka' daa nezile' ba wit Lázaroná', na' legake' chakgakile' daa cheszen' golle' ka'. ¹⁴ Na'ch be'len Jesúza' legake' dill' ka to shajni'gakile', chi'e:

—Ba wit Lázaroná'. ¹⁵ Na' chibaid' bi wzoa', la' chyalljch gon' ka shajle'chle cha'. Li sho' shajcho gana' die'.

¹⁶ Na'ch Tomáza', beena' che'gake' Dídimo*, chi'e ben'ka' sto:

—Li sho'lene' kwenche lencho guetlenchone' shi witgake'ne'.

Jesúza' chakyisbane' ben' wetka'

¹⁷ Na' ka bllingake' yella', na' che'gake'ne' ba gok tap lla bgash' Lázaroná'. ¹⁸ Na' Betániana' llian gaozə Jerusalénna', ka do shon kilómetro nlaagakan. ¹⁹ Na' ben' zan ben' Israelka' lle' Jerusalénna' wyajgake' jenxenlall'gake' Mártaana' len Maríana' daa wit ben' zane'ka'. ²⁰ Na' ka wnezi Mártaana' ba zoa illin Jesúza', na'ch jatile'ne', per Maríana' bigaane' lille'ka'. ²¹ Na' ka blline' kwite'na', chi'ene':

—Xan', shel' zo' ni kana' wlen yillwe' che ben' zan'na' bi wite', shel'ka'. ²² Na' naa la'kzi ba wite', nezid' gon Chioza' bittezə dii inabilo'ne'.

²³ Na' che' Jesúza'ne':

—Wiban ben' zano'na'.

* 11:16

²⁴ Na'ch che' Mártana':

—Awe, ne_{zid}' wibane' kat' yiban be_n' wetka' llana' te che yell-lioni.

²⁵ Na' che' Jesúza'ne':

—Nad' chon' ka chiban be_n' wetka' na' nap' ye_l' mban dii bi te cheyin. Beena' chon_{lil}allee nad', la'kzi ba wite', wibanchkze'. ²⁶ Na' yog' be_n'ka' mban na' chon_{lil}all'gake' nad' bi guetgake' toshiizi. ¿Achajli'o dga nia' li'?

²⁷ Na' che' Mártana'ne':

—Awe, Xan', chajli'a lin' nako' Crístona', na' lin' Xi_n Chioza', beena' llia bia' yid yell-lioni.

Wchell Jesúza' gana' bkwash'gake' Lázarona'

²⁸ Na' biyoll wna Mártana' ka', na'ch ziyaje' zjanie' be_n' bile' Maríana', na' chi'ene' xochizi:

—Ba bid Maestrona' chnie' li'.

²⁹ Na' kon ka golle' Maríana' ka', lii wzolla'tie' jawie' Jesúza'. ³⁰ Bilan' sho' Jesúza' yella', ni zetie' gana' jatil Mártana'ne'. ³¹ Na' be_n' Israelka', be_n'ka' chonxenlall'gake' Maríana' lille'na', ka ble'gakile' wzollee na' zejdoe', na'ch zjanogake'ne' chakgakile' lljchelle' cho'a banan'.

³² Na' ka bllin Maríana' kwit Jesúza', lii bchek'te xibe'na' lawe'na' chi'ene':

—Xan', shel' zoasho' ni, bi wit be_n' zan'na', shel'ka'.

³³ Na' ka ble'i Jesúza' chbell Maríana', na' ka'kzə be_n'ka' zejlengake'ne', na' to dii wal inlleb gokile'. ³⁴ Na' chi'e legake':

—¿Gara jakwash'lene'?

Na'ch che'gake'ne':

—Sho' lljawiacho gana' die', Xan'.

³⁵ Na' wchell Jesúza'. ³⁶ Na'ch che' ljwell be_n' Israelka' lle' na':

—Li wwia ka gokchgaile'ne'.

³⁷ Na'ch bale' che'gake':

—Beeni bene' ka ble'i be_n' lchola', ¿Aaga zak bisle' Lázarona', na' bi wite' shel'ka', lla?

Bisban Jesúza' Lázarona' ladj be_n' wetka'

³⁸ Na'ch Jesúza' wizakile' dii wal ka bllingake' cho'a bana'. Na' bana' nakan to blej, na' chi' to yaj nkwasha'n cho'ayinna'. ³⁹ Na'ch che' Jesúza':

—Li yikwas yaja' ka'lə.

Na' Mártana', be_n' zan be_n' weta', chi'ene':

—Xan', ba chl'a beena' zban, la' ba gok tap lla wite'.

⁴⁰ Na' che' Jesúza'ne':

—¿Aaga ba wnia' li' shi shajli'o, na' ile'ilo' ye_l' wak choo ye_l' wak xen che Chioza'?

⁴¹ Na'ch bikwasgake' yaja' cho'a bana' gana' die'. Na' blis jalao Jesúza' yabana', na' chi'e: —Xa, choxkeno' ba bzenago' cha'. ⁴² Ne_{zid}' toshiizi chzenago' cha', per chnia' li' kwenche shajle' be_n'ki lle' ni nan lin' bselloo nad'.

⁴³ Na' ka biyoll wne' ka', na'ch wnie' zillj, chi'e:

—¡Lázaro, bichej na'!

⁴⁴ Na' lii bichejte Lázarona' ndob ni'a neena' lech'ka', na' cho'alawe'na' ndoban to lech'. Na'ch che' Jesúza' legake':

—Li yizeshe' lechaa na' li yisane' yiyaje'.

Wloogake' xnezin gox'gake' Jesúza'

(Mt 26:1-5; Mr. 14:1-2; Lc 22:1-2)

⁴⁵ Na' zan be_n' Israelka', be_n'ka' jen Maríana' txen daa wit be_n' zane'na', ble'gakile' ka ben Jesúza' na' ben_{lil}all'gake'ne'. ⁴⁶ Per bale' wyaj lao fariseoka' na' jellgake' legake' ka ben Jesúza'. ⁴⁷ Na'ch bxo_zka' chn_{ab}ia' na' fariseoka' bitopgake' yog' be_n'ka' chn_{ab}ia' be_n' Israelka', na' che'gake':

—¿Nakraz ka gonchon, lla? La' zan yel' wak chli' beeni. ⁴⁸ Na' shi inacho jwayi beena', yog'z ben' gonlilall'gake'ne' na'ch yid ben' Rómaka' na' wlliyi'gake' yoodo' chechoni len yell chechoni.

⁴⁹ Na' len to ben' le' Caifás, nake' b̄ox choo b̄ox xen ka lo yiza'. Na' chi'e legake':

—Bi nezzilen, ⁵⁰ ni bi chakbe'ile wenlan toz ben' guet ni che ben' wlall chechoka', aga ka daa kwiayi' doxen lallchoni.

⁵¹ Na' aga kon ka wnaz Caifáza' kan', san daa nake' b̄ox choo b̄ox xen lo yizan', ben Chioza' ka bi'e dill' guet Jesúza' ni che ben' Israelka'. ⁵² Na' aga ni che toz ben' Israelkan' guet Jesúza', san lekzka' ni che yog' ben'ka' ba wleje' gagkake' xiine' doxen yell-lionin, kwenche gagkake' toz. ⁵³ Na' daa goll Caifáza' ka', lo llana' wzolo bengake' toz dill' kwenche witgake' Jesúza'.

⁵⁴ Na' daa wzolo chongake' ka', aga wdatekch Jesúza' ladj ben' Israelka', san wzee wyaje' to yell dii le Efraín, daa llia gaozə latja' gana' bibi chashj chleb, na' na'z wzoe' len ben'ka' nakgake'ne' txen.

⁵⁵ Na' ba zoa gao gal' lni Paskw che ben' Israelka', na' ben' zan ben' yell yoblə wyajgake' Jerusalénna' ka zi' gal' lina' kwenche yixi yiyechgake' ka nllia leya' bia'. ⁵⁶ Na' chdagake' chiyilgake' Jesúza', na' shlak lle'gake' lesh' chyoodo'na', chnabi ljwelle':

—¿Beraka chakile? ¿Awide' lina', lla?

⁵⁷ Na' b̄oxzka' chnabia' len fariseoka' bengake' mandad shi no nezi ga chda Jesúza' do na' lljellgake' legake' ka' kwenche gox'gake'ne'.

12

Bwazj Maríana' set zixa' ni'a Jesúza'

(Mt 26:6-13; Mr 14:3-9)

¹ Zi' xop lla gal' lni Paskwa' wyaj Jesúza' yell Betániana', gana' zoa Lázarona', beena' bisbane' ladj ben' wetka'. ² Na' ben'ka' lle' Betániana' bsini'agake' to xshe' che Jesúza', na' Mártana' bdie' yel' wawa'. Na' Lázarona' wche'lene' Jesúza' cho'a mesa' na' nochlə ben'ka' wdaolengake'ne'. ³ Na'ch bex' Maríana' ka do gashj litr set zixa' daa le nardo, daa le zak'chga, na' bwazje'n ni'a Jesúza', na' tech bisbillile'n yish' yichje'na'. Na' doxen loo yoonə wche' shii set zixa'. ⁴ Na' len Jud Scariota', beena' nak Jesúza' txen, beena' gone'ne' lo na' ben' malka'. Na' golle':

⁵ —¿Berache bi betee set zixa' na' wi'e mecha' gaklenan ben' yesh'ka', lla? Len la' ka che twiz laxj benaan zakaan.

⁶ Juda' wne' ka' aga inacho daa chiyeshile' ben' yesh'kan', san daa nake' to ben' wbanan. La' len' gok lall' nee xmeche'ka' na' chbane' lat' wejan. ⁷ Na'ch che' Jesúza'ne':

—Bi wllono' gone' ka'. Ba nzoashao'kze' daa kwenche wgone'n llin kat'ka' wk-wash'gake' nad'. ⁸ Ka nak ben' yesh'ka', toshiizin soakz ben'ka' ladjleni, san nad', aga toshiizin soalen' le'.

Wloogake' xnezin witgake' Lázarona'

⁹ Na' zan ben' Israelka' wnezgakile' zoa Jesúza' yell Betániana' na' wyajgake' na'. Per aga wyajgake' yella' ni che toz Jesúzan', san lekzka' kwenche ile'gakile' Lázarona', beena' bisban Jesúza' ladj ben' wetka'. ¹⁰ Na'ch b̄oxzka' chnabia' bengake' toz dill' witgake' len Lázarona'. ¹¹ La' daa biban Lázarona' ladj ben' wetka', zan ben' Israelka' benlilall'gake' Jesúza' na' bich bzenaggake' che b̄oxzka'.

Ka biyoo Jesúza' Jerusalénna'

(Mt. 21:1-11; Mr. 11:1-11; Lc. 19:28-40)

¹² Na' betiyo ben' be ben' zil, ben'ka' lle' yell Jerusalénna' daa chal' lni Paskwa', wnezgakile' ba ngoo Jesúza' nez yilline' yella'. ¹³ Na'ch wyajgake' jlezzgake'ne' nox'gake' zinka', na' choe'la'ogake'ne', nagake':

—¡Li we'la'o Chioza! ¡Gonleeyshga Xancho Chioza' beeni ba bselee inabi'e cho' ben' Israel!

¹⁴ Na' blleli Jesúza' to burr chbando' na' wllie'b. Na' gok kon ka na Cho'a Xtill' Chioza', gana' na:

¹⁵ Le' ben' yell Jerusalén, bi illeble.

Li wwia, ni ba za' beena' inabia' le' na' llie' to burr chbando'.

¹⁶ Na' ben'ka' nakgake'ne' txen aga wyajni'gakile' diiki ka lo gora'. Ka bibanch Jesúza' ladj ben' wetka', kana'ch gokbe'gakile' nan Cho'a Xtill' Chioza' daa bzej ben'ka' kani'yi choe'n dill' che', na' che diika' bengakile'ne'.

¹⁷ Na' ben'ka' lle'len Jesúza' kana' bisbane' Lázaron' ladj ben' wetka', ben'ka' bengakile' binie'ne' kwenche bicheje' loo bana', legaken' be'gake' dill' daa bene'. ¹⁸ Daan ben' zan jatilgake' Jesúza' daa bengakile' ka nak yel' waka' bene'. ¹⁹ Na'ch fariseoka' che' ljwellgake':

—Li wwia ka ba chak, bibi de goncho. Li wwia, yog'lolzə ben' ba nogake' le'.

Bal ben' griegoka' chiyilgake' Jesúza'

²⁰ Ladj ben'ka' wyajlnina' Jerusalénna' je'la'ogake' Chioza' na' len bal ben' griego. ²¹ Na' ben'ki jabig'gake' gana' ze Felípena', beena' nak ben' yell Betsaida daa llia yell-lío daa mbani Galileana', na' che'gake'ne':

—Ben'do', cheeninto' we'lennto' Jesúza' dill'.

²² Na' Felípena' jelle' Andréza' ka', na' choptie' wyajgake' jellgake' Jesúza' ka'. ²³ Na'ch che' Jesúza' legake':

—Ba bllin lla, nad', Ben' Bsel' Chioza' Yell-lioni, sho'a balaan xenna'. ²⁴ Dii li nia' le', shi to bin che trígona' bi igasha'n loo yona', ka'chokzə kwe'n. Per shi igasha'n loo yona', na' yila'n na' yiyakan dii zan wal. ²⁵ Beena' ze wneyi che yel' mban che'na' yell-lioni, len' kwiayee. San beena' chzani yel' mban che'na' bittezə dii gak che', beenan' gat' yel' mban che' zejli kani. ²⁶ Nottezə ben' cheenile' gone' xshin'na' chiyal' gone' nad' txen. Na' gana' soa', na'kzə soe'. Na' beena' gon xshin'na', Xa'na' kwee le' balaan.

Wdixjee Jesúza' witgake'ne'

²⁷ Naatek chakyeshid' dii wal inleeb. ¿Awñabid' Xa'na' yisle' nad' lawi dga wtil', lla? Bi gak gon' ka', la' ni cheyi dgayen'kzan bid'. ²⁸ Na'ch golle':

—Xa, benshki ka shoo balaan.

Na'ch wne Chioza' yabana', chi'e:

—Ba ben' kwenche wyo'a balaan, na' naa gon' ka sho'a balaan sto shii.

²⁹ Na' ben'ka' lle' na' bengakile' shii Chioza', na' bale' wnagake' wziwa'zan wne. Na' zi bale' wna to anjlan' ba wnie' le'.

³⁰ Na'ch Jesúza' chi'e legake':

—Aga ni cha' nadaan wne Chioza', san ni che len'. ³¹ Na' ba bllin lla gone' yel' joschis che yog' ben' lle' yell-lioni, na' naa kweje' dii xiwaa daa chñabia' yell-lioni. ³² Na' kat'ka' wligake' yaga' cha'lə gana' nda'gake' nad', kanan' gat' latj gonlilall' nottezə ben' nad'.

³³ Na' daa wne' ka', bzajniile' legake' nakan guete'. ³⁴ Na' ben'ka' lle' na' che'gake'ne':

—Ba beninto' chlabgake' Cho'a Xtill' Chioza' gana' nan Cristona', beena' wsel' Chioza' inabi'e, soe' zejli kani. Na' ¿biche nazo' Beena' Bsel' Chioza' Yell-lioni wligake'ne' cha'lə wwia ben' le' lee yaga' gana' dee? ¿Nora Beena' Bsel' Chioza' Yell-lioni no' ka'?

³⁵ Na'ch che' Jesúza' legake':

—Nad' nak' beeni' che ben' yell-lioni, per zi shlollchga soalen' le'. Li sho' lo nez lina' shlak ni de beeni'na' kwenche bi gak chele ka chak che to ben' chalile' kat' ngwee' nez. La' beena' chda' gana' shchol' bi nezile' galan zeje'. ³⁶ Li gonlilall' nad' naa shlak ni zoen' le' kwenche sho' beeni' cha'na' loo yichjlall'do'lena'.

Biyoll wna Jesúza' ka' na'ch bizee jakwashi'le' legake'.

Ben' zan ben' Israelka' bi wyajle'gake' che Jesúza'

³⁷ La'kzi ben' Israelka' ble'gakile' yel' wak zan daa ben Jesúza', zangake' bi benlilall'gake'ne'. ³⁸ Na' daa bengake' ka', gok ka wna dii Isaíaza', beena' wdixjee daa goll Chioza'ne' kani'yi, daa wne':

Xan' ¿azoa ben' ba wyajli'e dillaa chyixje'nto'?

Na' ¿azoa ben' ba gokbe'ile' bli'o yel' wak cho'na'?

³⁹ Na' bi wyajle'gake', la' Chioza' bene' chegake' ka na sto dii bzej dii Isaíaza':

⁴⁰ Bene' legake' ka ben' lchol' na' lall'do' chech kwenche bi gakbe'gakile' bi zejin diika' chle'gakile',

ni bi shajni'gakile' diika' chengakile',

kwenche ki yiyaj yilengakile' na' yiyone' legake' ben' wen.

⁴¹ Wna Isaíaza' ka' daa ble'ile' ka nak balaan xen wala' nap Jesúza', na' bi'e dill' che'.

⁴² Na' la'kzi ka', ben' zan ben' Israelka' lente no ben' wñabia' che'ka' benlilall'gake' Jesúza'. Per bi be'gake'n dill' daa bllebgake' bich wleb fariseoka' legake' gana' chdop chllaggake' choe'lwillgake' Chioza', ⁴³ la' wyoolall'chgake' ina ben' nakgake' ben' wen aga ka daa ina Chioza' nakgake' ben' wen.

Cho'a xtill' Jesúza' nakan dii lialo

⁴⁴ Na'ch wñe Jesúza' zillj chi'e:

—Nottez ben' chonlilall' nad', aga toz' nadaan chonlilallee, san len beena' bsel' nadaan chonlilallee. ⁴⁵ Na' nottezə ben' chle'ile' nad', lekzka' chle'ile' beena' bsel' nad'. ⁴⁶ Zaa yell-lioni kwenche beena' gonlilallee nad' te' lo beeni' cha'na' na' bich soe' lo yel chol'a'.

⁴⁷ Na' shi no ben' chenile' cho'a xtillaani na' bi chone' ka nia', aga nadaan wchogloa' che', la' aga zaa kwenche wchogloa' che ben' yell-lionin, san zaa kwenche yislagakee na' bi kwiayi'gake'.

⁴⁸ Beena' bi cheenile' gonlilallee nad' na' bi chzenague' cha', de daa gawan xya che'. Cho'a xtillaana' daa ba bi'a, lennan' gawan xya che' kat' illin lla te che yell-lioni.

⁴⁹ La' dillaa daa ba bi'a aga to bia'lozan' wnia' ka'. Xa'na', beena' bsel' nad', len' nllie' bia' bin chiyal' inia' na' bin chiyal' wli' wsedid' ben'. ⁵⁰ Na' nezid' dill' daa nllia Xa'na' bia' inia' nsa'n yel' mban zejli kani. Daan, yog'lol' diika' nia', nakan kon ka wna Xa'na' nad'.

13*Wdib Jesúza' ni'a ben'ka' nakgake'ne' txen*

¹ Ka ba zoa gal' lni Paskwa', na' nezi Jesúza' ba zoa gao yizee yell-lioni kwenche yiyaje' kwit Xe'na'. Na' chakchgaile' ben'ka' nonlilall'gake'ne' yell-lioni, na' ka' gokile' legake' axt ga zeelo.

² Na' ka chaogake' xshe'na', ba wloolə dii xiwaa loo yichjlall'do' Jud Scariota', xiin Simónna', gone' Jesúza' lo na' ben' malka'. ³ Na' nezi Jesúza' Xe'na' bene' lall' nee yog' dii de, na' nezile' wzee gana' zoa Chioza' na' kwite'na'kzə yilline' dii yoblə. ⁴ Na' lo zej chaogake' xshe'na', wzolla' Jesúza' na' bkwase' xe' dii toña' ka'lə, na' bchele' to lech' lsineena'. ⁵ Na'ch wdee nisa' to loo sha' na' wzoloe' chyibe' ni'a to to ben'ka' nakgake'ne' txen, na' bisbillile'n lechaa ncheje' lsineena'.

⁶ Na' ka bidol' chibe' ni'a Simón Pédrone', na'ch che' Pédrone'ne':

—Xan', ¿ali'lə chibzo' ni'ani?

⁷ Na' che' Jesúza'ne':

—Aga chajniilo' dga chon' naa, per techlə shajniilo'n.

⁸ Na'ch che' Pédrone'ne':

—Bat wi'a latj chibo' ni'ani.

Na'ch che' Jesúza'ne':

—Shi bi chib' ni'ona', bich gako' nad' txen.

⁹ Na'ch chize' Pédrone'ne':

—Shi kan' nakan, Xan', aga toz' ni'ani chibo' san len yichji na' na'ki.

¹⁰ Na'ch che' Jesúza'ne':

—Beena' nosh' nazje', toz ni'enan' chiyał' shech, la' ba nechkz kwerp che'na'. Ka'kzan le', ba nxi nyechle, la'kzi aga yog'le.

¹¹ Daa nezi Jesúza' non gon le' lo na' beñ' malka', daan chi'e legake': "Aga yog'le ba nxi nyech."

¹² Na' ka biyoll wdibe' ni'eka', na'ch biyakwe' xe' dii toña' na' jachi'e cho'a mesa' sto shii. Na' chi'e legake':

—¿Anezile bi zejin dga ba ben'? ¹³ Le' nale nad' Maestro na' Xan', na' lezkzile, la' kan' nakan. ¹⁴ Na' shi nad', naktia' Maestro chele na' Xanle, ba wdib' ni'alena', lezkzka' le' chiyał' chib ni'a ljwell-le. ¹⁵ Ba ben' dga kwenche bliid' le' kan' chiyał' gon che ljwell-le. ¹⁶ Dii li nia' le', aga zak'chi to mos ka xane'na', na' to beñ' zej mandad aga zak'che' ka beena' bseleene'. ¹⁷ Shi chajniile diiki ba wnia' na' gonlen, na' soale mbalaz.

¹⁸ 'Na' aga yog'len nia' ka'. Nezi' nolen ba wlej' kwenche nonlilall'le nad'. Na' chiyał' gak ka na Cho'a Xtill' Chioza', gana' na: "Beena' chaolentie' nad' txen ba chiyeche' nad' gone' mal cha'." ¹⁹ Naa nia' le' dga zi' gak, kwenche kat' ba chakan shajle'le nak' beena' ba wnia' nak'. ²⁰ Na' dii li nia' le', beena' wlebe' notteza beena' wselaa, nad'kzan chlebe'. Na' beena' chlebe' nad', lenkz beena' bsel' nadaan chlebe'.

Wdixjee Jesúza' ka gon Juda' wdie'ne' lo na' beñ' malka'

(Mt 26:20-25; Mr 14:17-21; Lc 22:21-23)

²¹ Na' biyoll wna Jesúza' ka', le gokyeshii loo yichjlall'do'ena', na' bi'e dill' kwasloł, chi'e: —Dii li nia' le', tole gonle nad' lo na' beñ' malka'.

²² Na'ch beñ'ka' nakgake'ne' txen chwia ljwellgake' chakgakile' nogaken' chi'e ka'.

²³ Na' to beena' nak Jesúza' txen, beena' chakchgaile', chi'e kwite'na'. ²⁴ Na' Simón Pédróna' bene' señ kwenche inabi beena' chi' kwit Jesúza' noen' chi'e ka'. ²⁵ Na'ch jabig'ch beena' gaoch kwit Jesúza' na' wñabile'ne', chi'ene':

—¿Noran gon ka', Xan'?

²⁶ Na'ch che' Jesúza'ne':

—Wleejch' lat' yetxtili lo'i dga yoll loo yeeni, na' kon beena' wi'an, len' gon ka'.

Na'ch bleeje' lat' yetxtila' na' bi'en Jud Scariota', xiñ beena' le Simón. ²⁷ Na' kon ka biyoll be' Jesúza' Juda' yetxtila', lii wyoote Satanáza' loo yichjlall'do'ena'. Na'ch che' Jesúza'ne':

—Daa ba ngoo yichjo' gono', bentegan.

²⁸ Na' ni to beñ'ka' chaolengake'ne' bi wyajni'gakile' biche gollze'ne' ka'. ²⁹ Bale' gokgakile' goll Jesúza' Juda' lljxi'e bi dii chyalljgakile' che xshe' che'ka', wa wi'e lat' mech beñ' yesh'ka'. La' len' nak lall' nee xmeche'ka'. ³⁰ Na' ka wde wdao Juda' yetxtila' daa be' Jesúza'ne', lii wza'tie'. Na' ba gol' ka wzee.

Dii koba' daa nllia Chioza' bia'

³¹ Na' ka wde wza' Juda', na'ch che' Jesúza':

—Ba bllin lla sho'a balaan, nad', Beñ' Bsel' Chioza' Yell-lioni, na' lezkzka' dga gon', gonan ka sho' Chioza' balaan. ³² Na' daa gon' ka sho' Chioza' balaan, lezkzka' kwín Chioza' gone' kwenche nad', Beñ' Bsel' Chioza' Yell-lioni, sho'a balaan, na' lii gontie'n. ³³ Le' xiñdawaa, zi shlollchga zoalen' le'. Na' yiyilje nad', na' chiznia' le' ka gosh' beñ'ka' chñabia' beñ' Israelka': Gana' yiyaa, bi gak sa'le. ³⁴ Na' to dii kob chllia' bia' gonle naa: Li gaki ljwell-le. Ka chakid' le', kan' chiyał' gaki ljwell-le. ³⁵ Shi gaki ljwell-le, na'ch inezi yog'lołte beñ' nakle nad' txen.

Wdixjee Jesúza' bi wcheb Pédróna' shi nombi'ene'

(Mt. 26:31-35; Mr 14:27-31; Lc. 22:31-34)

³⁶ Na'ch Simón Pédróna' wñabile' Jesúza', chi'ene':

—Xan', ¿garan yiyajo'?

Na' che' Jesúza'ne':

—Aga wak soo gana' yiyaa naa, per wllin lla soo.

³⁷ Na'ch che' Pédróna'ne':

—Xan', ¿bera_çhe bi gak sa'len' li' naa? Ba n_çhoglallaa guet' ni çho'.

³⁸ Na' Jesúza' chi'ene':

—¿Achakilo' ba n_çhoglalloo gueto' ni çha'? Dii li nia' li', sho_n shii bi w_çhebo' shi nombi'o nad' ka zi' kwell-lə shikwteza'.

14

Jesúza' nake' neza' chillin kwit X̄e' Chioza'

¹ Bi gakshejlall'le. Li gon_lilall' Chioza' na' lekzka' li gon_lilall' nad'. ² Lill x_latj X̄a'na' dii xen latj de. Shel' bi nakan ka', ba wnia' le' ka', shel'ka'. Na' naa yiyaa lljayenshawaa gana' yidzoale. ³ Na' kat' ba benschawaan, na'ch yiyed' yidxia' le' kwen_çhe lenle soale gana' zoa'. ⁴ Na' ba nombia'le neza' daa chillin gana' lljazoa'.

⁵ Na'ch Tomáza' chi'ene':

—Xan', bi nezinto' gan yiyajo'. ¿Nakran gonnto' yillelinto' neza'?

⁶ Na' che' Jesúza'ne':

—Nadaan' neza' daa chillin lao Chioza', na' chli'a daa nak dii li, na' cho'a be_n' yel' mban zej_li ka_ni. Aga no yillin kwit X̄a'na' shi bi gon_lilallee nad'. ⁷ Daa ba nombia'le nad', lenkz X̄a'nan' ba nombia'le. Na' naa ba nombia'lene' na' ba ble'ile'ne'.

⁸ Na'ch che' Felípena'ne':

—Xan', ben ka ile'into' X̄o'na' na' x_nlall'nto'.

⁹ Na'ch billii Jesúza' xtilleena', chi'e:

—Felipe, ba wlla zoalen' le', ¿ana' bikzan' gombia'yenoo nad'? Beena' ba ble'ile' nad' lekzka' ba ble'ile' X̄a'na'. ¿Bera_çhe ch_nabzo' gon' ka ile'ile'ne'? ¹⁰ ¿Abi chaj_li'o zoalen X̄a'na' nad' na' nad' zoalenee? Diika' nia' le' aga to bia'lozan' ch_nia'n, san daa cheeni kw_n X̄a'na', beena' zoalene' nad', lennan' cho'a dill' na' lennan' chon'. ¹¹ Li shaj_le' daa nia' zoalen X̄a'na' nad', na' nad' zoalen' le'. Na' shi bi chaj_le'le dga nia', la'ch' li shaj_le' çha' ni che yel' wakki chle'ile' chon'. ¹² Dii li nia' le', nottez be_n' chon_lilallee nad', gone' ka diika' chon'. Na' dii zak'techi gone' aga ka diika' chon', daa yiyaa kwit X̄a'na'. ¹³ Na' gon' bittez daa inabile X̄a'na' daa nakle nad' txen kwen_çhe sho'e balaan' ni çha'. ¹⁴ Nad' gon' bittezə daa inabile daa nakle nad' txen.

B_çheb Jesúza' wselee Espíritu Sántona'

¹⁵ 'Shi chakile nad', li gon diika' nllia' bia' gonle. ¹⁶ Na' inabid' X̄a'na' wselee sto be_n' gaklene' le' na' soalene' le' toshiizi. ¹⁷ Len' Espíritu Sántona', beena' chli' daa nak dii li. Na' be_n' yell-lioki aga wak wlebgake'ne', la' bi chle'gakile'ne' ni bi nombia'gake'ne'. San le', ba nombia'lene' daa zoalene' le' na' soe' loo yichjlall'do'lena'. ¹⁸ Aga wikwaan' le' ka bi' wizeb, san wiyedch' soalen' le'. ¹⁹ Aga chllach bich ile'i be_n' yell-lioni nad', san le' wle'chkzile nad'. Na' daa mban' toshiizi, lekzka' le' toshiizi ibanle. ²⁰ Kat' illin llana' nia' ka', na' gakbe'ile zoalen' X̄a'na', na' le' zoalenle nad' na' nad' zoalen' le'. ²¹ Nottez be_n' chzenague' daa nllia' bia' na' chone' ka nan, beenan' chakile' nad'. Na' beena' chakile' nad', lekzka' gaki X̄a'na'ne', na' nad' lekzka' gakidee na' gon' kwen_çhe gombia'che' nad'.

²² Na' Júdaza' (beena' sto, aga Jud Scariota,) chi'ene':

—Xan', ¿bera_çhe to neto'z gonzo' ka gombia'chnto' li' na' bi len be_n' yell-lioki, be_n'ka' bi chon_lilall'gake' li'?

²³ Na' billii Jesúza' xtilleena':

—Beena' chakile' nad', wzoe' xtillaa, na' X̄a'na' gakile'ne', na' nad' kon X̄a'na' yid-soalennto'ne'. ²⁴ Na' beena' bi chakile' nad', bi chzoe' xtillaa. Na' diika' chli' chsedid' aga dii chyiljlallzaan, san X̄a'na', beena' bsel' nad', chzajniile'n nad'.

²⁵ 'Yog' diiki choe'len' le' dill' naa shlak ni zoalen' le'. ²⁶ Na' kat' bich soa' len le', Espiritu Sántona', beena' wsel' Xa'na', gaklene' le' na' wzajniile' le' yog' dii chiyal' inezile, na' gone' ka lljadinile yog' diika' ba wnia' le'.

²⁷ 'Yel' mbalaza' chkwaanlena'n le'. Na' yel' mbalaz cha'na' chon' le' bi nakan ka yel' mbalaz che ben' yell-lioka'. Bi gakshejlall'le, ni bi gall illeble. ²⁸ Ba benzkzile nia' yiyaa gana' zoa Xa'na' na' lekzka' wiyedchkz' yidzoalen' le'. Na' shi chakile nad', chiyal' yibaile daa yiyaa gana' zoa Xa'na', la' zak'che' aga ka nad'. ²⁹ Na' ba nia' le' diiki zi' gak kwenche kat' gakan shajle'le.

³⁰ 'Na' bich bitek dill' we'lench' le' naa, la' ba za' dii xiwaa, daa chnabia' yell-lioni. Per aga wak inabia'n nad'. ³¹ La' chon' kon ka nllia Xa'na' bia' gon' kwenche inezi ben' yell-lioki chakid' Xa'na'. Li yizolla'. Li yidó.

15

Jesúza' chzaklebi kwine' to yag uva

¹ 'Nad' nak' ka yag uva daa nak dowalj, na' Xa'na' nake' ka beena' chaz chaanan. ² Na' yog'lol' xoz' xka'inna' daa bi chbia, chchogue'n. Na' diika' chbia, chonshao'che'n kwenche zizikli kwian. ³ Na' le', nakle ka xoz' xka'inna' daa chbia, daa bzenagle ka nak dill'ka' be'len' le'. ⁴ Li soatezi soa gonle nad' txen, na' ka'kz nad' soatezi soalen' le'. Ka xoz' xka'inna', shi bi ndil' nllagan xyaguinna' aga bi chbian, ka'kzan le' shi bi soatezi soale gonle nad' txen bi gak gonle daa chibaid'.

⁵ 'Nad' nak' ka to yag uva, na' le' nakle ka xoz' xka'inna'. Shi le' soatezi soale gonle nad' txen na' nad' soatezi soalen' le', na' gake ka xoz' xka'inna' daa chbiachga. Shi le' bi nakle nad' txen aga bi gak gonle. ⁶ Beena' bi gone' ka dii le gone' nad' txen, nake' ka xoz' xka'inna' daa ba chogue' na' ibillan, na' yitope'n wzaleen lo yi'na' kwenche sheyan.

⁷ 'Shi le' soatezi soale gonle nad' txen na' toshiizi chzoale xtillaana', li inab daa cheenile na' gakan. ⁸ Xa'na' cho'e balaan kat' chonle dii wenna', na' daa chonle ka', chli'lawin dii li nakle nad' txen. ⁹ Ka chaki Xa'na' nad', ka'kzan chakid' le'. Li soatezi soa gonle nad' txen kwenche gakbe'ile chakid' le'. ¹⁰ Shi gonle daa nllia' bia' gonle, na'ch gakbe'ile le chakid' le', ka chon' nad', chon' daa nllia Xa'na' bia' gon', na' ka' chakbe'id' le chakile' nad'.

¹¹ 'Ba wnia' le' ka' kwenche yiba yizaklenile' nad', na' yiyoll yido soale mbalaz. ¹² Na' dgan nllia' bia' gonle: Gaki ljwell-le ka chakid' le'. ¹³ Bich bi yel' chaki dii xench de ka che beena' chzani yel' mban che'na' guete' ni che ben'ka' nllaguile'. ¹⁴ Len' nakle ben'ka' nllaguid' shi chonle ka nllia' bia' gonle. ¹⁵ Bich gon' le' ka mos, la' beena' nak mos aga nezile' bin chon xane'na'. San nakle ben' nllaguid' la' ba bzajniid' le' yog' diika' wna Xa'na' nad'. ¹⁶ Aga len' wlejle nad', san nadaan wlej' le' na' ba bzoa' le' shajle ljenle dii wenna' daa bi te cheyi. Na' Xa'na' gone' yog' daa inabilene' daa nakle nad' txen. ¹⁷ Na' dgan chllia' bia' gonle: Gaki ljwell-le ganga.

Ben'ka' bi nombia' Chioza' gakzbangakile' ben'ka' nak Crístona' txen

¹⁸ 'Bibi gakile shi ben'ka' bi nombia' Chioza' gakzbangakile' le', la' nezkzile ka'kzan gokzbangakile' nad'. ¹⁹ Shel' nakle legake' txen na'ch gaggakile' le', shel'ka'. Per daa ba wlej' le' kwenche gake nad' txen, daan chakzbangakile' le'. ²⁰ Li lljadini ka ba wniakz' le': "Aga inacho zak'chi to mos ka xane'na'." Ka ba bsak'zi'gake' nad', ka'kzan wsak'zi'gake' le'. Na' shi bzenaggake' cho'a xtillaana', lekzka' wzenaggake' chele. ²¹ Yog' diikin gongakile' le' daa nakle nad' txen, la' bi nombia'gake' Xa'na' beena' bsel' nad'.

²² 'Ben'ka' bi nombia' Chioza', aga bi dol' napgake' shel'ka' bi bidye'len' legake' xtilleena'. Per daa ba bidye'len' legake' xtilleena' bi gak inagake' bi chakbe'gakile' chongake' dii mala'. ²³ Beena' chakzbanile' nad' lenkz Xa'nan' chakzbanile'. ²⁴ Aga bi dol' napgake' shel'ka' bi bli'a yel' wakka' daa konon' gon ladje'ka'. Na' la'kzi ba ble'gakile'

diika' chon', bia'kzə chakzbangakile' nad' na' Xa'na'. ²⁵ Chak dga kwenche chillinin ka na ley che'ka' gana' nan: “Kon gokzi' gokzbangakile' nad' la'kzi aga bi ben' chegake'.”

²⁶ 'Na' wselaa Espíritu che Xa' Chioza', beena' gaklene' le'. Espírituna', beena' chli' daa nak dii li, see gana' zoa Xa' Chioza' na' yidyee xtillaa. ²⁷ Na' lekzka' lenle we'le cho'a xtillaana', la' ba gokle nad' txen ka wzoloa' chli' chsedid' ben'.

16

¹ 'Ba wnia' le' diiki kwenche bi yidinjile' daa chonlilall'le nad'. ² La' bich wlebgake' le' gana' chdop chllagcho choe'lwilcho Chioza', na' wllin lla axt wit ben' le' daa gakile' kan' chazlall' Chioza'. ³ Gongake' ka' daa bi nombia'gake' Xa'na', ni bi nombia'gake' nad'. ⁴ Na' nia' le' diiki kwenche kat' ba bllin lla ile'ile yel' zak'zi'ka', lljadinile ka'kzan ba wnia' gak chele. Bi wnia' le' ka' dii nechte daa ni zoalen' le'.

Daa chon Espíritu Sántona'

⁵ 'Na' naa yiyaa lljazoalen' Xa'na' beena' bsel' nad', na' ni stole bich chnabile nad' gan yiyaa. ⁶ Na' daa ba wnia' le' ka' le chakyesh'zi'le'. ⁷ Per dii li nia' le', wakch wen chele shi yiyaa. La' shi bi yiyaa, beena' gaklene' le' bi yidsoalene' le'. San shi ba ziyaa, na' wselaaane'. ⁸ Na' kat' yide', gone' kwenche gakbe'i ben' yell-lioki nakgake' ben' saaxya daa bi biyombia'gake' beena' nak dowalj ben' li ben' shao', na' gakbe'gakile' chidol'gake' wchoglo Chioza' chegake' ni che xtoleeka'. ⁹ Yiyakbe'gakile' napgake' dol' daa bi chonlilall'gake' nad'. ¹⁰ Na' yiyakbe'gakile' nak' ben' li ben' shao' daa yiyaa gana' zoa Xa'na' na' aga wle'chile nad'. ¹¹ Na' lekzka' yiyakbe'gakile' Chioza' wi'e yel' zak'zi' che ben'ka' bi chzenag cha', la' ba bchogloe' sak'zi' dii xiwaa daa chnabia' yell-lioni.

¹² 'Dii zanch de dii inia' le', dii bi shajniile naa. ¹³ Per kat' ila' Espíritu Sántona', beena' chli' daa nak dii li, len' wzajniile' le' kwaslol' daa nak dii li. La' aga dii chiljlall'ze'n ine', san ine' daa che' Xa'na'ne', na' chixje'ile' le' diika' zi' za' gak. ¹⁴ Na' gone' ka sho'a balaan, la' wzajniile' le' diika' ba wnia'. ¹⁵ La' yog'loite daa na' Xa'na' lennan' cho'a dill'. Daan nia', Espírituna' wzajniile' le' diika' ba wnia'.

Yel' chakyeshiina' yiyakan yel' xaba

¹⁶ 'Aga chllach bich ile'ile nad', na' lekzka' aga wlla yizle'ile nad'.

¹⁷ Na' bal ben'ka' nakgake'ne' txen wnabi ljwelle':

—¿Bera zejin daa ne' aga chllach bich ile'ichone', na' lekzka' aga wlla yizle'ichone', na' daa natelze' yiyaje' kwit Xe'na'? ¹⁸ ¿Bi zejin daa naze' “aga chllach”? Bi chajniicho bi che naze' ka'.

¹⁹ Na' Jesúza' gokbe'ile' cheengakile' inabgakile'ne' bi zejin daa wne', na'ch chi'e legake':

—¿Achnabi ljwell-le bi zejin daa wnia' le' aga chllach bich ile'ile nad', na' lekzka' aga wlla yizle'ile nad'? ²⁰ Dii li nia' le', kwell-le na' gakyeshile shlak ben'ka' bi nombia' Chioza' yibagakile'. Na' la'kzi gakyeshile, yel' chakyeshii chelena' yiyakan yel' xaba. ²¹ Kat' chzan to noolə, chey chle' daa ba bllin gor sane'. Na' ka chiyoll chzane' ni bich chjtinile' yel' chey chlana', daa le chibaile' ba zoa to bi'do' che' yell-lioni. ²² Ka'kzan chak chele. Naa chakyeshile, na' ka yillagcho dii yoblə kanan' yiba yizakile, na' ni to kono wsej wllon yibaile.

²³ 'Na' kana'chan bich bi inabile nad'. Dii li nia' le', bittezə dii inabile Xa'na', gonkze'n, daa nonlilall'le nad'. ²⁴ Axt naa ni to bibin' inabile Xa'na' daa nonlilall'le nad'. Li inab bittez dii cheenile inabilene' na' gonkze'n kwenche yiyoll yido soale mbalaz.

Jesucriston'a ba bene' gan daa chnabia' yell-lioni

²⁵ 'Ba bseesaa jemplka' bzajniid' le' diiki, na' wllin lla kat' bich wzajniid' le' kon jempl, san we'len' le' dill' che Xa'na' ka to shajniilen. ²⁶ Na' kat' ba bllin llana', kanan' inabile Xa'na' bittezə dii inabilene' daa nonlilall'le nad', na' bi chonan byen kwin' inabidee gaklene'

le', ²⁷ la' kwinkz Xa'na' chakile' le' daa chakile nad' na' daa chajle'le bselee nad'. ²⁸ Wzaa gana' zoa Xa'na' kwenche bid' yell-lioni, na' naa yizaa yell-lioni kwenche yiyaa gana' zoe'.

²⁹ Na'ch che' ben'ka' nakgake'ne' txen:

—Naach ba choo dill' dii najnii, na' bich bi jempl chchino'. ³⁰ Na' chakbe'into' nez nle'ilo' yog'lolte, na' aga chonan byen no bi inabzi li', la' ba nezlilo' bin inabile' li'. Daan chajle'nto' dii li' zoo gana' zoa Chioza'.

³¹ Na' che' Jesúza' legake':

—¿Aaach chajle'le? ³² Ba zoa illin lla, wa ba bllinkz llana', illeshlesle na' gala ikaa twej tweje, na' yikwaanle toz'. Per aga tozan' yigaana', la' zoalenkz Xa'na' nad'. ³³ Ba wnia' le' yog' diiki kwenche soale mbalaz daa nakle nad' txen. Yell-lioni biya dii yen ile'ile, per li' gondiplall', la' ba ben' gan daa chnabia' yell-lioni.

17

Be'lwil Jesúza' Chioza' che ben'ka' nakgake'ne' txen

¹ Na' ka wde wna Jesúza' diika', na' blis jalawe'na' bwie' yabala, na' golle':

—Xa, ba bllin gor illagloa' daa lla bia' wtil'. Wloo nad' balaan, nad' nak' xiino', kwenche lekzka' nad' kwaa li' balaan. ² La' ba beno' lo na' inabia' lao yog'lol ben', kwenche gon' ka gat' yel' mban zejli kani che ben'ka' wlejo' gonlilall'gake' nad'. ³ Na' daa gat' yel' mban zejli kani che ben', zejlin nombia'gake' li', nako' dowalj Chios, na' lekzka' nombia'gake' nad', ben' bseloo yell-lioni.

⁴ Nad' ba wlo'a li' balaan lao ben' yell-lioki, na' ba biyoll ben' daa bllio' bia' gon'. ⁵ Na' naa, Xa, yiyongacho' nad' balaanna' kat' yiyed' kwito'na' ka balaanna' daa wdapgz' kana' wzoalen' li' ka zi' xe sil yell-lioni.

⁶ Ba beno' nad' ben'ki wlejo' yell-lioni kwenche gonlilall'gake' nad', na' ba bzajniid' legake' ka nako'. Lall' non' nakgake', na' beno' ka benlilall'gake' nad' na' chzenaggake' xtilloona'. ⁷ Na' naa ba nezagakile' yog' dill'ka' bi'a nakan dii wno'. ⁸ La' ba be'len' legake' dill' daa nllio' bia' we'lengakee na' ba bzenaggake'n. Na' ba gokbe'gakile' dii li' wzaa gana' zo' na' ba wyajle'gake' lin' bseloo nad'.

⁹ Chnabid' li' gakleno' legake'. Aga chnab' gakleno' yog' ben' yell-lioki, san chnab' gakleno' ben'ka' wlejo' kwenche gonlilall'gake' nad', la' lall' non' nakgake'. ¹⁰ Na' yog' ben'ka' nak lall' na' lekzka' nakgake' lall' no'. Na' legake' ba wloogake' nad' balaan.

¹¹ Na' naa ba chiza' yell-lioni. Na' legake' yigaangake' ni. Xa, li' nako' dowalj ben' wen ben' shao'. Wdapgach ben'ka' ba beno' nonlilall'gake' nad' kon yel' wak cho'na' kwenche gaggake' toz, ka nakcho cho' nakcho toz. ¹² Shlak wzoalen' legake' yell-lioni ba wdap bwia' legake' kon yel' wak cho'na'. Na' ni toe' bi wliayi', letechokza' beena' ba nakan kwiayee, kwenche gak ka na Cho'a Xtilloona'.

¹³ Na' naa ba zizaa gana' zo'. Na' nia' li' diiki shlak ni zoa' yell-lioni kwenche ben'ki gapgake' yel' xaba ka daa nap'. ¹⁴ Nad' ba bzajniid' legake' cho'a xtilloona', na' ben'ka' bi nombia' li' chakzi' chakzbangakile' legake' daa bi nakgake' legake' txen, ka chon' nad' bi chon' txen ben'ka' bi nombia' li'. ¹⁵ Aga chnabid' li' yikoo ben'ki nonlilall' li' lo yell-lioni, san chnab' wkweejgachgako'ne' kwenche ki chitj seni dii mala' daa chda yell-lioni legake'. ¹⁶ Bi nongake' txen ben'ka' bi nombia' li', ka chon' nad' bi chon' ben'ka' txen. ¹⁷ Bengach kwenche ben'ki nonlilall' nad' gakchgake' ka chazlalloo daa chzenaggake' dill' li' cho'na', la' cho'a xtilloona' nakan dii li'. ¹⁸ Ka beno' bseloo nad' kwenche bidsoa' yell-lioni, ka'kzan chselaa legake' kwenche shajgake' ladj ben' yell-lioki. ¹⁹ Chzanallaa kwin' gon' ka no' ni chegake', kwenche lekzka' gongake' ka no' daa ba chzenaggake' dill' li' cho'na'.

²⁰ Aga chnabid' li' gakleno' to legake', san lekzka' chnab' gakleno' ben'ka' gonlilall' nad' kat' wzenaggake' cho'a xtilloona' daa we' ben'ki. ²¹ Xa, chnabid' li' gonshgo' ka gak yog'gake' toz, ka nakcho cho' nakcho toz. Lekzka' chnab' gaggake' cho' toz kwenche ben'ka' bi nonlilall' li' shajle'gake' lin' bseloo nad'. ²² Ba wlo'a legake' balaan ka daa wloo

nad', kwenche gakgake' toz ka nakcho cho' nakcho toz. ²³ Nad' nakgakee toz ka nakcho cho' nakcho toz. Bengach ka gakgake' toz ka chiyal', kwenche ben'ka' bi nonlilall' li' gakbe'gakile' lin' bseloo nad', na' gakbe'gakile' chakilo' ben'ka' nonlilall' nad' ka chakilo' nad'.

²⁴ 'Xa, li' ba beño' nad' legake', na' cheenid' soalengake' nad' gana' soa' kwenche ile'gakile' balaan cha'na' daa beño' nad' ka zi' xe silte yell-lioni daa chakilo' nad'. ²⁵ Xa, li' nako' ben' li' ben' shao'. La'kzi ben'ka' bi nonlilall' nad' bi nombia'gake' li', nad' nombi'a li' na' ben'ki nonlilall' nad' nezkakile' lin' bseloo nad'. ²⁶ Na' ba bzajniid' legake' non nako', na' zizikli wzajni'chgakidee kwenche kon ka chakilo' nad' ka'kzə gakgake' ben', na' nad' soalenkzakee.

18

Bex'gake' Jesúza'

(Mt. 26:47-56; Mr. 14:43-50; Lc. 22:47-53)

¹ Na' ka biyoll wna Jesúza' ka', wza'lene' ben'ka' nakgake'ne' txen wyajgake' shlaa yao Cedronna', na' wyoolene' legake' to yell-lío ga lle' lla' yag olivo. ² Na' Juda', beena' bene' Jesúza' lo na' ben' malka', lekzka' nombi'e latja', la' Jesúza' zan shii wyajlene' legake' na'. ³ Na' bllinlen Juda' ben' zan soldad na' zi xonj ben'ka' chap yoodo'na', ben'ka' bsel' bxoza' chnabia' len fariseoka'. Zejgake' nox'gake' no kandil, no yi' yech, na' dii wniagakile'. ⁴ Na' Jesúza' ba nezkzile' yog' daa zi' gak che', na'ch bcheje' jatile' legake', na' chi'e:

—¿Non chiyilje?

⁵ Na' che'gake'ne':

—Jesús, ben' Nazaretan', chiyiljnto'.

Na'ch che' Jesúza' legake':

—Nadaan'.

Na' lengake' Juda', beena' bene' le' lall' na'gake'. ⁶ Na' ka goll Jesúza': “Nadaan”, to biza'zgake' jayetgake' wza'che'la. ⁷ Na'ch wiznabi Jesúza' legake':

—¿Noran chiyilje?

Na' che'gake'ne':

—Jesús, ben' Nazaretan'.

⁸ Na'ch che' Jesúza' legake' sto shii:

—Ba wniakz' le' nadaan. Na' shi nadaan chiyilje, li' we' latj yiyaj ben'ki.

⁹ Golle' legake' ka' kwenche billinin daa wne': “Xa, ba wdap' ben'ka' beño' nad' na' ni toe' bi wlliyi'.” ¹⁰ Na' Simón Pédróna' no'e to spad, na'ch wleje'n bchogue' tlaa nag to ben' le Malco, de shlina'. Na' Málcona' nake' xmos bxoza' choo bxoza' xenna'. ¹¹ Na'ch che' Jesúza' Pédróna':

—Bigoo spad cho'na' loo lillinna'. La' chonan byen gak cha' daa ba nllia Xa'na' bia' gak.

Jwa'gake' Jesúza' lao Anáza'

(Mt 26:57-58; Mr. 14:53-54; Lc 22:54)

¹² Na'ch soldadka' len xane'ka', na' ben'ka' chap yoodo' che' ben' Israelka', bex'gake' Jesúza' na' bchejgake'ne'. ¹³ Na' zigaate jwa'gake'ne' lao Anáza' xtobiin che Caifáza', na' Caifáza' nake' bxoza' choo bxoza' xen lo yiza'. ¹⁴ Na' Caifáza', len' beena' golle' ben'ka' chnabia' ben' Israelka' wenchlan witgake' toz Jesúza' aga ka daa kwiayi' yog' ben' wlall' che'ka'.

Bi bcheb Pédróna' shi nombi'e Jesúza'

(Mt 26:69-70; Mr. 14:66-68; Lc 22:55-57)

¹⁵ Na' Simón Pédróna' len sto ben' nake' Jesúza' txen janogake'ne'. Na' beena' zejlen Pédróna' txen nombia' bxoza' choo bxoza' xenna'ne', daan gok wyoolene' Jesúza' lesh' chyoo che bxoza' choo bxoza' xenna'. ¹⁶ Na' Pédróna' wzie' cho'a leeja'. Na'ch beena' nombia' bxoza' choo bxoza' xenna', bicheje' jashaljlene' bi' nool wewaa chap cho'a leeja' kwenche be'b latj wyoo Pédróna'. ¹⁷ Na'ch bi' nool wewaa chap cho'a leeja' che'b Pédróna':

—¿Aaga lenon' nako' beeni txen?

Na' che' Pédróna'b':

—Bi len' nakee txen.

¹⁸ Na' moska' len beñ'ka' chap yoodo'na' wlekgake' yi'na' kwenche wbillgake' daa ba chak zag. Na' jselen Pédróna' legake' cho'a yi'na' kwenche billa'ile'.

Wnabyolli Anáza' Jesúza'

(Mt 26:59-66; Mr. 14:55-64; Lc 22:66-71)

¹⁹ Na' beena' nak b̄xoz choo b̄xoz xen wnabyollile' Jesúza' no beñ'ka' nakgake'ne' txen na' beran chli' chsedile'. ²⁰ Na' che' Jesúza'ne':

—Ladj lkwe' beñaan ba bi'a dill'. Ba bli' b̄sedid' beñ' lesh' chyoodo'na' na' gachl̄a chdop chllag beñ' wlalka' choe'lw̄illgake' Chioza'. Na' bibi dill' bi'a do ngash'z̄a. ²¹ ¿Berache chñabzilo' nad'? Wñabi beñ'ka' ba bli' b̄sedid' kwenche inagake' li' beran ba goshgakee. La' nezgakile' bin ba bli' b̄sedid' legake'.

²² Na' ka wde wna Jesúza' ka', to beñ'ka' chap yoodo'na' wdape' x̄agueena', chi'ene':

—¿Bi'che chilliizo' b̄xoz choo b̄xoz xenni dill'?

²³ Na' che' Jesúza'ne':

—Shi bi dii mal ba wnia', wnashki beran ba wnia'. Na' shi sh̄likzan ba wnia', ¿berache chitzo' nad'?

²⁴ Na'ch de nchejzi Jesúza' bde Anáza'ne' lao Caifáza', beena' nak b̄xoz choo b̄xoz xen.

Sto shii bi b̄cheb Pédróna' shi nombi'e Jesúza'

(Mt. 26:71-75; Mr. 14:66-72; Lc. 22:58-62)

²⁵ Na' shlak ze Pédróna' chshee cho'a yi'na', beñ'ka' lle' na' che'gake'ne':

—¿Aaga lenon' nako' beeni txen?

Na' bi b̄chebe', san chi'e':

—Bi nakee txen.

²⁶ Na' to xmos b̄xoz choo b̄xoz xenna', beena' nak bish' ljwell beena' b̄chog Pédróna' nague'na', chi'ene':

—¿Aaga lenon' ble'lenid' Jesúza' gana' lle' yag olívoka'?

²⁷ Na' stokz̄a bi b̄cheb Pédróna', na' lii wchellte shikwteza'.

Bdegake' Jesúza' lao Pilátóna'

(Mt. 27:1-2, 11-14; Mr. 15:1-5; Lc. 23:1-5)

²⁸ Na' cheeni'lesdo' bichejgake' lill Caifáza' na' bi'che'gake' Jesúza' gana' chon Pilátóna' yel' jos̄chisa'. Na' beñ' Israelka' aga wyoolengake' Jesúza' gana' chon Pilátóna' yel' jos̄chisa', la' aga wak gaogake' daa chsini'agake' che Paskwa' shi ba wyoogake' loo yoona'.

²⁹ Na'ch b̄chej Pilátóna' chi'e' legake':

—¿Bi xyan chaole che beeni?

³⁰ Na' che'gake'ne':

—Shel' bibi dii mal chone' aga widwa'nto'ne' lawo' ni, shel'ka'.

³¹ Na'ch che' Pilátóna' legake':

—Li yichi'e' na' li gon yel' jos̄chis che' kon ka na ley chelena'.

Na' beñ'ka' chñabia' beñ' Israelka' che'gake'ne':

—Aga bi lsens chento' de witnto' beñ'.

³² Na' daa gok ka', billinin ka wna Jesúza' gak kat'ka' guete'. ³³ Na'ch biyoo Pilátóna' gana' chone' yel' jos̄chisa', na' goxe' Jesúza' chi'ene':

—¿Alin' nako' beñ' wñabia' che beñ' Israelki?

³⁴ Na' che' Jesúza'ne':

—¿Adii chza'z lalloon no' ka'? ¿Awa beñ' yoblan ba be'lene' li' xtilaana'?

³⁵ Na'ch che' Pilátóna'ne':

—¿Achakilo' beñ' Israel nad'? Beñ' wlall cho'kikzan na' b̄xozka' chñabia' le', ba bengake' li' lo na'. ¿Beran beno'?

³⁶ Na'ch che' Jesúza'ne':

—Aga nak yel' wñabia' cha'na' ka che beñ' yell-lioki. Shel' nakan ka', beñ'ka' nak nad' txen wllongake' nad' kwenche bi gox' beñ' wlall cha'ki nad', shel'ka'. Per aga nak yel' wñabia' cha'na' de yell-lioz.

³⁷ Na'ch che' Pilátona'ne':

—¿Ana' beñ' wñabia'kzan nako', shka'?

Na' che' Jesúza'ne':

—Awe, kan' nakan. Ni cheyi daan golj' na' bid' yell-lioni, kwenche wi'a dill' daa nak dii li. Na' yog'lol beñ'ka' chzenaggake' dill' lina', chzenaggake' cha'.

³⁸ Na'ch che' Pilátona'ne':

—¿Beran nak dill' li?

Bchoglogake' guet Jesúza'

(Mt. 27:15-31; Mr. 15:6-20; Lc. 23:13-25)

Na' ka wde goll Pilátona'ne' ka', na'ch bizcheje' kwenche jashaljlene' beñ' wñabia' che beñ' Israelka', na' chi'e legake':

—Ni to dii mal bi chillelid' chon beeni. ³⁹ Na' kon ka yoolole chak yog' yiz chsan' to beñ' de lillyana' kat' chal' lni Paskwi, ¿abi cheenile yisan' beñ' wñabia' cheleni, le' nakle beñ' Israel?

⁴⁰ Na'ch yog'gake' besyaagake' zillj, che'gake'ne':

—¡Aga beenan' yisano'! ¡Barrabázan' bisan!

Na' Barrabáza' nake' to beñ' wban.

19

¹ Na' ka' gok ben Pilátona' mandad bet wdingake' Jesúza'. ² Na' soldadka' bengake' to bxoõ de xis yesh' na' bllingake'n yichje'na' ka corona na' bwakwgake'ne' to lech' de morad. ³ Na'ch wbig'gake' lawe'na' chtitjgakile'ne', chongake' ka beñ' chgoo le' balaan, che'gake':

—¡Toshiizi sechgayi che beeni chñabia' beñ' Israelka'!

Na' wdapgabe' xagueena'.

⁴ Na'ch bizchej Pilátona', chi'e beñ' Israelka':

—Li wwia, ni kwejee kwenche inezile ni to dii mal bi chillelid' bene'.

⁵ Na' bchej Jesúza' mbinte bxoõ de xis yeshaa yichje'na' na' nakwtie' lech' morada'. Na'ch che' Pilátona' legake':

—Ni ze beeni chaole xya cheyin.

⁶ Na' bxozka' chñabia' na' beñ'ka' chap yoodo'na' ka ble'gakile'ne', na'ch wzologake' chosyaagake' zillj, che'gake':

—¡Bdee lee yag cruza'! ¡Bdee lee yag cruza'!

Na' che' Pilátona' legake':

—Li yichi'e, shka'. Na' li wdee, le'. La' nad', ni to dii mal bi chillelid' bene'.

⁷ Na' beñ' wñabia' che beñ' Israelka' che'gake'ne':

—De to ley chento' daa na chiyal' guete' daa nalze' nake' Xiin Chios.

⁸ Na' ka gollgake' Pilátona' ka', zizikchli bllibe'. ⁹ Na'ch biyo'e sto shii gana' chone' yel' joschisa' na' chi'e Jesúza':

—¿Gara beñ' li'?

Na' Jesúza' bikzə bi dill' billi'e.

¹⁰ Na'ch che' Pilátona'ne':

—¿Berache ki chilli'o xtillii? ¿Abi nezilo' nap' yel' wñabia' kwenche wdaa li' lee yag cruza' na' naptia' yel' wñabia' kwenche yisan' li'?

¹¹ Na'ch che' Jesúza'ne':

—Aga bi yel' wñabia' napo' bi gonilo' nad' shel' bi non Chioza'n li'. Daan, beena' bdie' nad' lawo' ni, dol' xench nape' aga ka li'.

¹² Na'ch ka beni Pilátona' wne' ka', biyiljallee naklæ ka gone' kwenche yisane' Jesúza', per beñ'ka' chñabia' beñ' Israelka' axt chosyaayigake', che'gake'ne':

—Shi yisano'ne' bi nako' txen Césara', la' nottez beena' ina nake' beñ' wñabia', Césaran' chizoshi'e.

¹³ Na' ka beni Pilátona' gollgake'ne' ka', bizcheje' nchi'e Jesúza'. Na'ch jchi'e gana' chone' yel' joschisa', gana' le Gábata de dill' hebreo, na' zejin latj ga ntaogake' yaj. ¹⁴ Na' gok dga llana' chsini'agake' che lni Paskwa'. Na' ka do gobill goll Pilátona' beñ' Israelka':

—Ni ze beñ' wñabia' cheleni.

¹⁵ Na'ch legake' chosyaagake'. Zeyidgake', che'gake':

—¡Wdoyo beena'! ¡Bdee lee yag cruza'!

Na'ch che' Pilátona' legake':

—¿Acheenile wi'a lsens wda'gake' beñ' wñabia' cheleni lee yag cruza'?

Na' bñozka' chñabia' che'gake'ne':

—Toz Césaran' chñabi'e neto'. Koch no beñ' yoblæ zoa.

¹⁶ Na'ch Pilátona' bene' Jesúza' lo na'gake' kwenche wda'gake'ne' lee yag cruza', na'ch bche'gake'ne'.

Bda'gake' Jesúza' lee yag cruza'

(Mt 27:32-44; Mr. 15:21-32; Lc 23:26-43)

¹⁷ Na'ch bwa'gake' Jesúza' yag cruz che'na', na' bche'gake'ne' gana' le Gólgota de dill' hebreo, na' zejin Latj che llit yichj beñ' wet. ¹⁸ Na' na' bda'gake' Jesúza' lee yag cruza', na' lekzka' bda'gake' zi twej beñ' shlaa wej. ¹⁹ Na' Pilátona' bzeje' to dii bda'gake' yichj yag cruz che Jesúza', na' nan ki: “Jesús, beñ' Nazaret, beñ' wñabia' che beñ' Israelka'.” ²⁰ Na' bzeje'n dill' hebreo, dill' latín na' dill' griego. Na' zan beñ' Israelka' blabgake' daa da' yichj yag cruza', la' gana' bda'gake' Jesúza' lee yag cruza' chgaanān gaozæ yell Jerusalénna'.

²¹ Daan bñozka' chñabia' beñ' Israelka' gollgake' Pilátona':

—Bi chiya' inān “Beñ' wñabia' che beñ' Israelka'”; san inān “Beenin nalze' nake' beñ' wñabia' che beñ' Israelka'.”

²² Na' Pilátona' chi'e legake':

—Kon ka ba bzeja'n, ka'kzan igaanan.

²³ Na' biyoll bda' soldadka' Jesúza' lee yag cruza', na'ch beñ'gake' xe'na' na' bengake'n taplæ kwenche bikaa twej chegake'. Na' lekzka' beñ'gake' xe' dii tonā' daa nak to shwilizæ.

²⁴ Na' che' ljwellgake':

—Bi wxoxjchon, san goncho to wyitj kwenche ila'shki nocho ikaan.

Na' ka' ben soldadka'. Na' daa bengake' ka', billinin ka na Cho'a Xtill' Chioza' gana' na: “Bilaagake' xa'na', na' bengake' to wyitj kwenche got'bia' nogake' wkaan.”

²⁵ Na' kwit yag cruz che Jesúza' ze xneena' len beñ' bile'na', na' len María, xool Cleófaza', na' María beñ' yell Magdálana'. ²⁶ Na' ka ble'i Jesúza' xneena', na' lekzka' ble'ile' gaozæ ze to beena' nake'ne' txen, beena' le chakile', na'ch chi'e xneena':

—Beenin yiyoni xiino' naa.

²⁷ Na'ch chi'e beena' nake'ne' txen:

—Beenin yiyoni xnoo' naa.

Na' lo llana' biñi'e xna' Jesúza' wzoe' lille'na'.

Wit Jesúza'

(Mt. 27:45-56; Mr. 15:33-41; Lc. 23:44-49)

²⁸ Na' ka wde, nezi Jesúza' ba gok yog' daa llia bia' gakæ, na' kwenche yillinin ka na Cho'a Xtill' Chioza', wne':

—Chbilid'.

²⁹ Na' na' zoa to xwag nakan tolla' vino dii nak zichj zla'. Na'ch bleejgake'n to dii chzi' nisa' na' bzoagake'n to lo xis* kwenche bzoagake'n cho'ena'. ³⁰ Na' wde weej Jesúza' daa

* **19:29** To lo xis: literalmente en una rama de hisopo.

nak zichj zla', na'ch wne':

—Ba gok yog' daa llia bia' gak naa.

Na' b'chek' yichje'na', na' wite'.

To soldad wllibe' to ya dii nla' lawinna' kwit lee Jesúza'

³¹ Na' ben'ka' chnabia' ben' Israelka' bi goongakile' yigaan kwerp che ben'ka' lee yag cruzka' llana' chombaangake'. Daan gollgake' Pilátona' gone' mandad llitishjgake' ni'a ben'ka' da' lee yag cruza' kwenche yob guetgake' na' yiletjgake' kwerp che'ka' lee yag cruzka'. ³² Na'ch bselee soldad che'ka', na' jtishjgake' chop laate ni'a ben' necha' da' kwit Jesúza', na' lekzka' bengake' che beena' sto da' zi shlaa kwite'na'. ³³ Na' ka jabig'gake' gana' da' Jesúza' ble'gakile' ba wite', na' bi wdishjgake' ni'ena'.

³⁴ Na' to soldada' wllibe' to ya lo tosh' kwit li'ena' na' lii bchejten chen len nis. ³⁵ Na' beena' choe' dill' cheyi diiki, len' ble'ile' ka gok, na' cho'e dill' kwenche lenle shajle'le. Na' le' nezile' dill' lin cho'e. ³⁶ Gok diiki kwenche billinin ka na Cho'a Xtill' Chioza' gana' na: “Ni to litka' yo'e bi chishjgake'.” ³⁷ Na' gan yoblə lee Cho'a Xtill' Chioza' chiznan: “Wwiagake' beena' wllibgake' yana.”

Bkwash'gake' Jesúza'

(Mt. 27:57-61; Mr. 15:42-47; Lc. 23:50-56)

³⁸ Na' ka wde gok diiki, José ben' yell Arimatéana', wnabile' Pilátona' wi'e latj yikee kwerp che Jesúza'. Joséna' goke' txen Jesúza' do ngash'zə daa bllibe' ben'ka' chnabia' ben' Israelka'. Na' Pilátona' bi'e latj, na'ch wyaj Joséna' bikee kwerp che Jesúza'. ³⁹ Na' wyajlene' Nicodémona', beena' wyaj jawia Jesúza' wal-lə. Na' no'e ka do shichoa kil dii chla' zix daa nongake' de mirra na' nchixan daa le áloe. ⁴⁰ Na'ch btobgake' kwerp che Jesúza' to lech' ton na' blla'gake'n daa chla' zix, kon ka chon ben' Israelka' kat' chkwash'gake' to ben' wet. ⁴¹ Na' gaozə gana' bda'gake' Jesúza' lee yag cruza' de to latj ga nazgake' yag dii chbia dii zix, na' na' zoa to blej kob dii bin' koogake' ni tlish' ben' wet. ⁴² Na' daa chakbyengakile' wsini'agake' che llana' chombaangake', lii wlootegake' kwerp che Jesúza' loo bleja' zoa gaozə na'.

20

Biban Jesúza' ladj ben' wetka'

(Mt. 28:1-10; Mr. 16:1-8; Lc. 24:1-12)

¹ Na' lla nech che xmanna', ni shtedo', wyaj María nool Magdálana' cho'a bana'. Na' ble'ile' bich nkwash' yaja' cho'a bana'. ² Na'ch bizee ziyajdoe' gana' zoa Simón Pédróna' na' sto beena' nak Jesúza' txen, beena' le gokile', jayelle' legake':

—Ba jalejgake' Xanchona' loo bana' na' bi nezinto' galə jaloogake'ne'.

³ Na'ch wza' Pédróna' len beena' sto zejgake' cho'a bana'. ⁴ Choptie' zejdogake', per beena' to bxonjche' aga ka Pédróna' na' zigaate le' blline' cho'a bana'. ⁵ Na' bchekee bwie' loo bana' na' ble'ile' lech'ka' chi' na', per bi wyo'e. ⁶ Na' ka bllin Simón Pédróna' na' wyo'e loo bana' na' lekzka' ble'ile' lech'ka' chi' na'. ⁷ Na' lecha' bdob yichje'na' aga lenan chi' kwit lech'ka', san ndoban chi'n ka'lə. ⁸ Na'ch lekzka' wyoo beena' bllin dii nech cho'a bana', na' ka ble'ile' diika' na' wyajli'e dii li biban Jesúzan'. ⁹ La' kana' aga ba wyajni'yen'gakile' Cho'a Xtill' Chioza' gana' cho'en dill' yiban Jesúza' ladj ben' wetka'. ¹⁰ Na'ch ben'ka' chop non Jesúza' txen biyajgake' gana' zoagake'.

Jali'lao Jesúza' María, ben' yell Magdálana'

(Mr. 16:9-11)

¹¹ Na' Maríana' bigaane' cho'a bana' chbelle'. Na' lo zej chbelle' bchekee kwenche bwie' loo bana'. ¹² Na' ble'ile' chop anjl zoagake' do xtil, chi'gake' loo bana', toe' chi' yichjinna' na' stoe' chi' xni'alin gana' got' kwerp che Jesúza'. ¹³ Na'ch che'gake' Maríana':

—¿Berache chbellzo', noolə?

Na' golle' legake':

—Chbell' daa ba bidlejgake' kwerp che Xan'na', na' bi ne'zid' galə jaloogake'ne'.

14 Shintg wne' ka', ka blii jalawe'na' na' ble'ile' ze Jesúza' kolleena', per bi biyombi'e shi Jesúzan'. 15 Na'ch che' Jesúza'ne':

—¿Berache chbellzo', noolə? ¿Nodaa chiyiljo'?

Na' Maríana' chakile' beena' chap yag zixkan', na' chi'ene':

—Ben'do', shi ba bibejo'ne', wngach nad' galə jadixjo'ne' kwenche yichi'ane'.

16 Na'ch che' Jesúza'ne':

—¡María!

Na' biyechje' na' wnie'ne' dill' hebreo, chi'ene':

—¡Raboni! —na' zejín: ben' chli' chsedi ben'.

17 Na' che' Jesúza'ne':

—Bi goxoo nad', la' bin' yiyep' kwit Xa'na'. Lete biyaj, jañe ben'ka' nak nad' txen jayellgake' ba ziyaa kwit Xa'na', beena' lekzka' nak Xale. Lljazoalen' Chios cha'na', beena' lekzka' nak Chios chele.

18 Na'ch biza' María, ben' yell Magdálana', jayelle' ben'ka' nak Jesúza' txen nan ba ble'ile' Xancho Jesúza'. Na' golle' legake' diika' goll Jesúza' le'.

Jali'lao Jesúza' ben'ka' nalgake'ne' txen

(Mt 28:16-20; Mr. 16:14-18; Lc 24:36-49)

19 Na' ka gol lo llana' bibane', lla nech che xmanña', ba ndop nllag ben'ka' nak Jesúza' txen na' nsejtegake' yooná' daa chllebgake' ben'ka' chñabia' ben' Israelka', ka gokbe'gakile' ba ze Jesúza' ladje'ka', na' chi'e legake':

—Soashgale mbalaz.

20 Na' ka biyoll golle' legake' ka', na'ch bliile' legake' chop laate neena' na' kwit li'ena'. Na' ben'ka' nalgake'ne' txen le bibagakile' ble'gakile'ne'. 21 Na'ch wize' Jesúza' legake':

—Soashgale mbalaz. Ka bsel' Xa'na' nad' kwenche zidsoa' yell-lioni, ka'kzan chselaa le' llje'le cho'a xtilaana' yell-lioni.

22 Na' ka wde golle' legake' ka', na'ch blobe' legake', na' chi'e:

—Li ikaa Espíritu Sántona'. 23 Na' ben'ka' yizi'xenle saaxya che'ka', wiyakxenan. Na' ben'ka' bi yizi'xenle cheyin, bi yiyakxen chegake'.

Tomáza' bi wyajli'e shi biban Jesúza' ladj ben' wetka'

24 Tomáza', beena' che'gake' Dídimó nake' txen ben'ka' shllin, na' bi lene' ka jali'lao Jesúza' legake'. 25 Na' che'gake'ne':

—Ba ble'into' Xanchona'.

Na' Tomáza' chi'e legake':

—Shi bi ile'id' neena' na' wde xben'ni gana' wde klabka', na' wde na'ni kwit li'ena', aga wyajli'a.

26 Na' ka wde xon' lla, dii yoblə bidop ben'ka' nongake' Jesúza' txen loo yooná' na' len Tomáza'. Na' la'kzi nsejtegake' yooná', wyoo Jesúza' jsie' ladje'ka'. Na' chi'e legake':

—Soashgale mbalaz.

27 Na'ch chi'e Tomáza':

—Bwia na'ni, na' bñe'n xbeno'na'; na' bñe' noona' kwit li'ani. Bi gakchoplaloo, san wyajle'.

28 Na'ch che' Tomáza'ne':

—¡Lin' nako' Xan' na' naktio' Chios cha'!

29 Na' che' Jesúza'ne':

—Galj ble'ilo' nad' na'ch chajli'o. Chakomba ben'ka' chajle'gake' la'kzi bin' ile'gakile' nad'.

Bzej Juanna' libri kwenche shajle' ben' Jesúza' nake' Xiin Chios

³⁰Zan yel' wak daa ben Jesúza' lao ben'ka' nakgake'ne' txen bi nyojgakan lee libri. ³¹Per diiki nyojgakan kwenche shajle'le Jesúza' nake' Xiin Chioza' na' len' Crístona', beena' wleje' inabi'e, na' daa gonlilall'lene' gat' yel' mban chele dii bi te cheyin.

21

Jali'lao Jesúza' ben'ka' nakgake'ne' txen

¹Ka wde, Jesúza' jali'lawe' sto shii ben'ka' nakgake'ne' txen cho'a Nisdo' che Galileana' daa lekzka' le Nisdo' che Tiberias. Na' ki gok: ²Simón Pédróna' len Tomáza', beena' nsi'gake' Dídimó, na' Natanaela', ben' yell Canána' daa lliá gana' mbani Galileana', na' chopte xiin Zebedewa' na' zi chop ben'ka' nongake' Jesúza' txen lle'gake' Galileana'. ³Na' Simón Pédróna' chi'e legake':

—Sha'ch' lljxen' belá'.

Na' legake' gollgake'ne':

—Lekzka' wza'lennto' li'.

Na'ch wyoogake' to loo barkw zejgake' wxen belá', na' ni tlish' kono wxengake' do yel. ⁴Na' cheeni'lesdo' bllin Jesúza' cho'a nisdona', na' ben'ka' nakgake'ne' txen aga chakbe'gakile' shi len'. ⁵Na'ch Jesúza' wnie' legake', chi'e:

—Le' ben' bish'dawaa, ¿abin' senle belá' gaocho?

Na' che'gake'ne':

—Aga no de.

⁶Na'ch che' Jesúza' legake':

—Li wzal' yixj chelena' shlaa de shli che barkwa' na' idol'gakb.

Na' bengake' ka golle', na' ka nan yigoyogake' yixja' loo nisa' aga chizogakile'n daa nyichachgan belka'. ⁷Na' beena' le chaki Jesúza'ne', golle' Pédróna':

—jxanchonan'!

Na' kon ka beni Pédróna' golle'ne' ka', lii biyakwte xe'na', na' bxitee loo nisa'. ⁸Na' ben'ka' sto biyajlengake' barkwa' cho'a nisdona'lə, zingoyon yixja' daa zinyichachga belka', la' aga nakchan zit', ka sto guiyoa metrzan. ⁹Na' ka bichejgake' loo barkwa', ble'gakile' ba chi' yi'na' xna na' xoa to bel lawinna', na' dete yetxtil. ¹⁰Na' che' Jesúza' legake':

—Li yiyox'to belka' zi' wxenle.

¹¹Na'ch wyoo Simón Pédróna' loo barkwa' kwenche jaselle' yixj belá' na' bigoyoe'n axt cho'a nisdona'. Na' la'kzi tolla'cha nak yixja' daa ziyoon to guiyoa shiinyon bel yelka', bi bcheza'n. ¹²Na'ch che' Jesúza' legake':

—Li da gaole xsila'.

Na' ni to ben'ka' nakgake'ne' txen bi biyaxjgakile' ye'gake'ne': “¿Nora li'?” La' gokbe'gakile' Xancho Jesúza'kzan'. ¹³Na'ch wbig' Jesúza' na' bexee yetxtila' len belá' na' bi'e che chegake'.

¹⁴Na' dga gok de wyon shii jali'lao Jesúza' ben'ka' nakgake'ne' txen ka wde bibane' ladj ben' wetka'.

Bshaljen Jesúza' Simón Pédróna'

¹⁵Na' ka bidaogake' xsila', na'ch che' Jesúza' Simón Pédróna':

—Simón, xiin Jonás, ¿achakchilo' nad' aga ka to chaki ben'ki nad'?

Na' Pédróna' chi'ene':

—Xan', nezczilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil'do' cha'.

¹⁶Na' de wchop shii wiznabile'ne', chi'ene':

—Simón, xiin Jonás, ¿achakilo' nad'?

Na' Pédróna' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia beñ'ka' chonlilall'gake' nad', beñ'ka' nak ka xil' cha'.

¹⁷ Na' de wyon shii wiznable'ne', chi'ene':

—Simón, xiiñ Jonás, ¿ana' chakilo' nad'?

Na' gokyeshii Pédrona' daa ba gok shon shii chñab Jesúza' shi chakile'ne', na' chi'ene':

—Xan', neznle'ilo' yog'lolte, na' nezkzilo' chakid' li'.

Na'ch che' Jesúza'ne':

—Na'len wdap bwia beñ'ka' chonlilall'gake' nad', beñ'ka' nak ka xil'do' cha'. ¹⁸ Dii li nia' li', ka goko' beñ' wew', gokw xalaano' to kwanzo' na' wyajo' kon ga wnan cho'. Per kat' ba goxoo, wli nooka' na' yiwakw beñ' yoblə xalaano'na', na' wchi'e li' ga bi cheenilo' shajo'.

¹⁹ Na' daa goll Jesúza'ne' ka', bzajniile' legake' ka guet Pédrona', na' daa guete' ka' sho' Chioza' balaan. Na' ka wde golle' Pédrona' ka', chi'ene':

—Btiplalloo benlilall' nad' toshiizi.

Beena' le chaki Jesúza'ne'

²⁰ Na' biyechj Pédrona' na' ble'ile' beena' sto, beena' le chaki Jesúza'ne', noe' legake'. Len' wchi'e kwit Jesúza' kana' zeelo wdaogake' xshe'na' kana' wñabile'ne', chi'ene': “Xan', ¿norakznton' gon li' lo na' beñ' malka'?” ²¹ Na' ka ble'i Pédrona'ne', na'ch chi'e Jesúza':

—Xan', ¿shera beeni?

²² Na' che' Jesúza'ne':

—Shi cheenid', ni mbankz beeni kat' yiyed'. Bi sio' beena' wñeyi. Lin' btiplalloo benlilall' nad' toshiizi.

²³ Na' daa golle' ka', wze dill' ladj beñ'ka' chonlilall' Jesúza' nan aga wet beena'. Per bi goll Jesúza' Pédrona' bi guet beena', san chi'ene': “Shi cheenid', ni mbankze' kat' yiyed'. Bi sio' beena' wñeyi.”

²⁴ Na' beena' nake' Jesúza' txen, beena' le chakile', cho'e dill' kon ka gokə na' bzeje'n lee libri. Na' nezingto' dillaa cho'e nakan dii li.

²⁵ Dii zanch dii ben Jesúza' na' bi nyojan. Shel' nyoj yog' diika' bene', chakid' bi gaki yell-lioni ikwa' librka' shel'ka'.

Diika' ben postlka'

Bcheb Jesúza' wselee Espíritu Sántona'

¹ Teófilo, lee libr necha' bzej', na' bzej' yog' dii wenka' ben Jesúza' na' diika' bli' bsedile' dezd ka wzoloe' ² axt ka bllin lla biyep'e' yabana'. Na' ka zi' yizee, bzajniile' postlka' wleje' daa goll Espíritu Sántona'ne' kwenche gongake' llinna' daa bene' lall' na'gake'. ³ Na' ka wde wite' na' bibane' ladj beñ' wetka', jali'lawe' legake' na' dii zan dii bene' kwenche inezgakile' nan mbankzen'. Na' lo choa lla jali'lawe' legake', na' bzajniile' legake' che yel' wñabia' che Chioza'.

⁴ Na' shlak wzoalen Jesúza' postlka', golle' legake':

—Bi illeshle Jerusalénni. Li kwez gak ka bcheb Xacho Chioza' gone', kon ka ba wniakz'. ⁵ Dii li Juanna' bchoe' beñ' nisa', per le', aga chllach yidsoa Espíritu Sántona' loo yichjlall'do'lena'.

Biyep Jesúza' yabana'

⁶ Na' beñ'ka' ndop nllag kwit Jesúza', wñabgakile'ne':

—Xan', çawibejo' cho' beñ' Israel lo ñi'a na' beñ' zit'ka' ñaa kwenche inabi'o neto'?

⁷ Na' Jesúza' golle' legake':

—Bi chidoi'le inezile bi lla bi gor gon Xacho Chioza' daa gone', la' toze' len' chñabi'e na' ba bllie' bia' batan gone'n. ⁸ Na' ka yidsoa Espíritu Sántona' loo yichjlall'do'lena' na' gone' le' yel' wak, na' we'le xtillaana' yell Jerusalénna', na' doxen gani mbani Judeani na' lekzka' gana' mbani Samáriana', na' doxen zbii zkaan yell-lioni.

⁹ Na' ka biyoll golle' ka', wzolo biyep'e' yabana' chwiate beñ'ka', na' wze to bej bkwashaan le' na' bich ble'gakile'ne'. ¹⁰ Na' ka lle'gake' chwiagake' yabana' gana' biyep Jesúza', lii bllinte chop anjl kwite'ka', na' zoagake' do xtil. ¹¹ Na' gollgake':

—Le' beñ' Galilea, çberaçe chwiazle yabana'? Kwin Jesúza', beena' ble'ile bichej ladjleni na' biyep'e' yabana', kakzan ile'ilene' yiyede'.

Wlejgake' Matíaza' bizoe' lo laz Juda'

¹² Na'ch biyetjgake' lo Yaa Olívoza' ziyajgake' Jerusalénna'. Nakan gaozə, ka to daa nllia ley che'ka' bia' koogake' nez llana' chombaangake'. ¹³ Na' ka billingake' Jerusalénna', biyepgake' yooná' llia shkwiana' cha'lə gana' zoagake'. Na' beñ'kin billin: Pédróna', Jacóbona', Juanna', Andréza', Felípena', Tomáza', Bartoloména', Matewa', Jacóbona' xiin Alfewa', Simón, beena' che'gake' Zelote, na' Judas beñ' bish' Jacóbona'.* ¹⁴ Yog' beñ'ki chdopgake' yog' lla kon beñ'ka' nak beñ' bish' Jesúza' kwenche choe'lwillgake' Chioza', na' len Maríana' xña Jesúza' na' zi' bal' noolka'.

¹⁵ Na' llaka' wzoagake' na', Pédróna' wzie' ladj beñ'ka' chonlilall'gake' Jesucristona', nakgake' ka do to guiyoa galjə, na' golle' legake':

¹⁶ —Le' beñ' bish', benan byen billinin ka goll Espíritu Sántona' dii Davina' na' bzeje'n lee Cho'a Xtill' Chioza'. Bi'e dill' nakan gon Juda', beena' bchi'e beñ'ka' be'xgake' Jesúza'.

¹⁷ Juda' goke' neto' txen naknto' postl, na' lenen' nan gone' neto' txen dga ngoo lo na'nto' chonnto'. ¹⁸ Na' mecha' daa bexee che dii mala' daa bene', lennan' biziile' to yell-lío gana' bxope' de gozyichjlə na' goshj li'ena' na' bchej yog' xjloe'na'. ¹⁹ Na' ka wñezi beñ' Jerusalénka' ka gok che Juda', na' bsi'gake' yell-liona' daa bizi'e Acéldama de xtill'gake', na' zejín Yell-lío Chen. ²⁰ La' lee libr che Sálmoka' nan:

Yidesh yiloashga lill xlatje'na',
na' ni sto kochno soan.

* **1:13** Beñ' bish' Jacóbona': ben'ka' nsed nagake' chiyal' inan xiin Jacóbona'.

Na' lekzka' nan:

Ben' yoblə yiyakshga lo nee daa nan gok lo nee gone'.

²¹ 'Na' chonan byen kwejcho to ben'ki bengake' cho' txen toshiizi kana' wzoalen Xancho Jesúza' cho', ²² ben'ki nakgake' cho' txen dezd ka bchoa Juanna' Jesúza' nisa' axt ka biyepe' yabana', kwenche gone' cho' txen we'cho dill' nakan gok biban Jesúza' ladj ben' wetka'.

²³ Na'ch wlejkake' chope': toe' le Matías, na' sto ben' yoo shonə leyin, José, Barsabás, na'ch Justo. ²⁴ Na' be'lwilgake' Chioza', che'gake':

—Chios, ben' nak Xannto', li' nombi'o yichjlall'do' yog' ben'. Bliyi neto' no ben'ki chop ba wlejo' ²⁵ kwenche gake' neto' txen naknto' postl, la' Juda' ba bnite' daa ndolee yel' wen dii mal che'na' na' ziyaje' latja' gana' chidolee.

²⁶ Na'ch bengake' to wyitj kwenche wnezgakile' noran ba wlej Chioza', na' bidol' Matíaza', na' wlene' postlka' shnej.

2

Ka bid Espíritu Sántona'

¹ Na' ka bllin lla gol' lni Pentecostéza', yog' ben'ka' chonlilall'gake' Jesúza' tozga ndop nllaggake'. ² Na' tokonganzi bengakile' to sshag ka ga za' to be' wal, za'n yabalə na' wnin doxen loo yoona' gana' lle'gake'. ³ Na'ch ble'gakile' dii nak ka bel' yi' chal'ninan, na' yog'ze' zen yichje'ka'. ⁴ Na' Espíritu Santo che Chioza' wyo'e loo yichjlall'do' to toe', na' wzologake' wnegake' wde wdeli dill', kon ka goklall' Espíritu Sántona' ine to toe'.

⁵ Na' lo llana' ben' zan ben' Israelka' lle' Jerusalénna' choe'la'ogake' Chioza', no ben' zaak wde wdeli yell dii lle' yell-lioni. ⁶ Na' ka bengakile' sshaga' daa chak, na' bdop bllaggake' gana' chak ka'. Na' gokleij gokgangakile' ka biyombia'gake' xtilleeka' daa chne ben'ka' lle' na'. ⁷ Na' le chibangakile', na' che' ljwelle':

—¿Aaga ben' Galilea yog' ben'ki choe' dill'ki? ⁸ ¿Nakra chak chakzgake' dill'ka' chne to tocho, lla? ⁹ La' ni zoa ben' Partia, ben' Media, ben' Elam, ben' Mesopotamia, ben' Judea, ben' Capadocia, ben' Ponto, ben' Asia, ¹⁰ ben' Frigia na' Panfilia, ben' Egipto na' zi bale' ben' África, ben' zaak gaozə yell Cirénena', na' lekzka' len ben' za' Rómana'te. Balcho nakcho ben' Israel, na' zi balcho choncho ben' Israelki txen. ¹¹ Na' lekzka' zoa ben' Creta na' ben' Arabia. Na' yog'techo chenicho chne ben'ki xtil' to tocho, choe'gake' dill' che dii wenka' ba ben Chioza', diika' chonan ka yibanicho.

¹² Na' yog' ben'ka' bdop bllag na', bibangakile' na' gokleij gokgangakile'. Na' che' ljwellgake':

—¿Bi zejin dga, lla?

¹³ Na' bale' wnelegakile' legake', nagake':

—Zolli ben'kin.

Daa goll Pédrona' ben'ka' bdop bllag

¹⁴ Na'ch Pédrona' wzechaile' len postlka' zi shnej, na' wnie' zillj chi'e ben'ka' ndop nllag na':

—Le' ben' Israel na' yog'le le' zoale Jerusalénni, cheenid' wzajniid' le' bi zeji dga chak, li wzenagyen' dga inia' le'. ¹⁵ Ben'ki nak' txen aga zollgakilen' ka chza'lall'zle, la' shzilgaz naa. ¹⁶ Dga chak ki naa, chillinin daa wna dii Joela', beena' bzej daa goll Chioza'ne' kani'yi, na' wne':

¹⁷ Kat' ba zoa illin lla te che yell-lioni,

nad' Chios wi'a Espíritu cha'na' soe' loo yichjlall'do' ben'ka' lle' zbii zkaan yell-lioni.

Na' gon' kwenche xiinleka', ka bi' byo na' ka bi' noolə, chixje'gakb' daa yep'gakb'.

Na' bi' wew'ka' ile'do'gakib',

na' ben' golka' inegakile' yel.

18 Na' ka'kzə wi'a Espíritu ɕha'na' yog' beŋ'ka' choe'la'ogake' nad' llana' gak ka', ka beŋ' byo ka noolə,

na' we'gake' dill'ka' wɔxo'a cho'a lolleeka'.

19 Na' xan yabana' wli'a dii gonan ka yibani beŋ',

na' ka'kzə lo yell-lioni

wli'gakidee chen, na' yi', na' llen.

20 Wbilla' bich wzeeni'n,

na' bewaa yiyakan xna ka chen

ka zi' illin lla choo lla xen ɕhe Xanchona'.

21 Na' nottez beŋ' inabile' Xancho Chioza' gaklene'ne', na' yisle'ne' kwenɕhe bi kwiajee.

22 'Na' le' nakle beŋ' Israel, li wzenag dga inia' le'. Nezkzile Chioza' wleje' Jesús, beŋ' Nazareta', daa bi'ene' yel' wɔnabia'na' kwenɕhe bidyene' ladjleni dii zan yel' wak choo yel' wak xen na' bichlə dii benan ka bibani beŋ'. 23 Na' beeni goke' lall' na'le kon ka bliia Chioza' bia'gak ɕhe', na' béx'lene' bénlene' lo na' beŋ' malka' kwenɕhe betgake'ne' lee yag cruza'. 24 Per Chioza' bisbane'ne' ladj beŋ' wetka', na' bi bi'e latj guete' toshiizi, daa bi gok inabia' yel' wita' le'. 25 Dii Davina' bi'e dill' ɕhe Jesús'a kani'yi, ka wne':

Chle'id' Xan'na' toshiizi.

Na' daa zoe' kwitii shlaa de shlini kono gak bi goni nad'.

26 Daan le chibayi lall'dawaani na' cho'a dill' ka mbalaz zoa'.

Na' beli chen ɕha'ni nonan lez yibanan,

27 la' aga wsanlalloo nad' toshiizi ladj beŋ' wetka',

ni bi wi'o latj gooll' iteb beli chen ɕha'ni daa nak' lall' no'.

28 Ba bliilo' nad' nakan nak neza' sho'a kwenɕhe gat'ch yel' mban ɕha',

na' yiba yizakid' daa soalen' li' toshiizi.

29 'Le' beŋ' bish', nezkzicho dii xoxcto'cho Davina' wite' na' bkwash'gake'ne', na' ni nakbia'te naa gana' bkwash'gake'ne'. 30 Na' dii Davina' bi'e dill' diika' goll Chioza' le', na' wnezile' kwini Chioza' bɕhebe' wzoe' to xiin dia' ɕhe' inabi'e. 31 Chioza' bliile' dii Davina' diika' zi' gak ɕhe Crístona', na' bi'e dill' yibane' ladj beŋ' wetka' ka wne' aga wigaane' ladj beŋ' wetka' na' ni bi gooll' iteb beli chen ɕhe'na'. 32 Na' ka' gok, Chioza' bisbane' Jesús'a ladj beŋ' wetka', na' yog'nto' ble'into'ne' na' choe'nto' dill' bibane'. 33 Na' ka biyoll bigoyoe'ne' yabana' na' wlekwe'ne' kwite' de shlina', bene' lo nee bselee Espíritu Sántona' ladjnto'ni ka bɕhebe'. Na' Espíritu Sántona' ba bene' yog' dga ba ben ble'ile naa. 34 Bi gakile dii Davinan' biyepe' yabana', la' kwine', wne':

Xancho Chioza' golle' Xan'na':

“Wche' kwit' de shli ni

35 shlak wzoa' xni'ona' beŋ'ka' chakzbani li'.”

36 'Na' nia' le', yog'cho cho' beŋ' Israel chiyal' inezicho, Jesús'a, beena' betle lee yag cruza', Chioza' bzoe'ne' nake' Xancho, na' len' Crístona', beena' wlej Chioza' inabi'e cho'.

37 Na' beŋ'ka' lle' na' ka bengakile' goll Pédrona' legake' ka', le nyesh'chga gokgakile', na' wɔnabgakile' Pédrona' na' postlka' sto, ɕhe'gake':

—Le' beŋ' bish', ¿beran chiyal' gonnto' shka'?

38 Na'ch Pédrona' chi'e legake':

—To tole, li yiyaj yileni na' li ɕhoa nisa' shi ba chonlilall'le Jesucrístona', na' yiyakxen xtol'leka' na' yidsoa Espíritu Sántona' loo yichjlall'do'lena'. 39 Chioza' ba bɕhebe' gone' le Espíritu ɕhe'na', na' len xiinleka', na' nottez beŋ' zit'. La' nɕhebe' wi'ene' yog' beŋ' gaxe' kwenɕhe gonlilall'gake'ne'.

40 Na' dii zanch dill' be'len Pédrona' legake', got'yoile' legake', chi'e:

—Li yisla kwine' lao yel' zi'na' daa ile'i beŋ' wen dii malka' bi chajle' ɕhe Chioza'.

41 Na' beŋ'ka' wyajle' daa goll Pédrona' wchoagake' nisa'; na' lo llana' shona mil beŋ'ka' wlengake' beŋ'ka' nonlilall' Jesús'a.

Ka ben ben'ka' benlilall' Jesucristona' dii nech

⁴² Na' yog'gake' wzegake' wneyi bengake' diika' bli' bsedi postlka' legake', na' xochi wzoagake'. Na' bdop bllaggake' be'lwillgake' Chioza' na' weej wdaogake' txen. ⁴³ Na' yog'ze' bibani daa ble'gakile' yel' wak zanka' ben postlka'. ⁴⁴ Na' yog' ben'ka' chonlilall'gake' Jesúza' gokgake' toz, na' choe' ljwelle' bi ka dii chyllji to toe'. ⁴⁵ Na' biyit' bidegake' no yell-lío, no yoo chegake' wa bichlæ dii napgake' na' choe' ljwellgake' ka to dii chyllji to toe'. ⁴⁶ Na' yog' lla bdopgake' lesh' chyoodo'na' choe'lwillgake' Chioza', na' lekzka' bibagakile' weej wdaogake' txen lill ljwellgake'. ⁴⁷ Na' wzoatezi wzoagake' be'la'ogake' Chioza' na' yog'zæ ben' gokbe'gakile' ka mba chongake'. Na' yog' lla, Xancho Chioza' bene' ka wyanch ben'ka' benlilall' Jesucristona'.

3

Biyaki to ben' bi chak sa'

¹ To lla do ka chida shonæ shlle'na', ka gora' chdop chllag ben' Israelka' choe'lwillgake' Chioza', Pédrona' len Juanna' wyajgake' yoodo'na'. ² Na' cho'a puert che zeena' daa nechj yoodo'na', puert daa nsi'gake' Puert Xochi, chi' to ben' nxinj ni'ena' ka goljtie'. Na' yog' lla chjlekgake'ne' na' kwenche chñabe' karidá lao ben'ka' chdop chllag yoodo'na'. ³ Na' ka bllin Pédrona' na' Juanna' gana' chi'e, na' wñabile' legake' izangakile' lat' mech we'gake'ne'. ⁴ Na'ch Pédrona' len Juanna' bwiagake'ne', na' Pédrona' golle'ne':

—Bwiakachi neto'.

⁵ Na' beena' bwie' legake', gokile' mechan' we'gake'ne'. ⁶ Na' Pédrona' chi'ene':

—Bibi mech nap' gon' li', lete dii nap' gon' li'. Kon yel' wak che Jesucristo, ben' Nazareta', nia' li' bizolla' na' bigoo nez.

⁷ Na'ch Pédrona' wdoyoe' nee de shlina' na' bisolléene', na' lii biyakteyi ni'ena'. ⁸ Na'ch ka ben' bxit'zæ bene' bizollee. Na' wyoolene' legake' lesh' chyoodo'na' chechj chde' na' chxit'sheshe' choe'lawee Chioza'. ⁹ Na' yog' ben'ka' lle' na' ble'gakile'ne' chde' choe'lawee Chioza', ¹⁰ na' billej bibangakile' daa nombia'gake'ne' chbi'e chñabe' karidá cho'a puert daa nsi'gake' Puert Xochi.

Bzajonii Pédrona' ben'ka' ndop nllag lesh' chyoodo'na'

¹¹ Na' beena' biyaki ni'ena' aga bsane' Pédrona' len Juanna', kon noe' legake'. Na' yog' ben'ka' lle' lesh' chyoodo'na' chillej chibangakile' na' wyajdogake' gana' zoa koridor daa le Koridor che dii Salomón gana' zelengake' beena' biyaki. ¹² Na' ka ble'i Pédrona' ben'ka' chdop chllag na', golle' legake':

—Le' ben' Israel, ¿berache chibanzile daa biyaki beeni? ¿Na' berache chwiazle neto'? ¿Achakile kon yel' wak chento'nan' biyaki beeni? ¿Awa chakile daa zoanto' chonnto' ka chiyoollalii Chiozan' biyakile'? Aga daan. ¹³ Chios, beena' be'la'o dii Abrahama', dii Isaaca', dii Jacoba', na' nochlæ dii xozto'choka', len' wlo'e Xiine' Jesúza' balaan xenna', beena' benle lo na' ben'ka' betgake'ne'. Na' ka goklall' Pilátona' yisane'ne', bi be'le latj. ¹⁴ Lwaa dii nan inable yisane' Jesúza', beena' nak liizelozí ben' li ben' shao', ben' wen xyana'læ wñable bisane'. ¹⁵ Kan' benle betle Jesúza', beena' chon yel' mban daa nak dowalj. Per Chioza' bisbane'ne' ladj ben' wetka', na' neto' choe'nto' dill' daa nezinto' bibane'. ¹⁶ Daa chonlilall'nto' Jesúzan', ba biyaki beeni chwiale na' nombia'le. Dii li, daa nonlilall'nto' Jesúzan' chwiatele ba biyakchaile'.

¹⁷ 'Le' ben' bish', nezid', ka le' na' ka ben'ka' chñabia' le', bi gokbe'ile bin benle ka betle Jesúza'. ¹⁸ Na' Chioza' bi'e latj gok ka' kwenche billinin ka wna dii ben'ka' wdixjee xtilleena' kani'yi, daa wnagake' Cristona' biya dii wchi' wsak' ben' le'. ¹⁹ Na' naa, li wzenag che Xancho Chioza', na' li yiyaj yileni dii malka' chonle kwenche yizi'xene' chele na' wzoe' le' mbalaz. ²⁰ Na' yiselee Cristona', beena' wleje' kwenche inabi'e, kon ka wdixjee dii ben'ka' kani'yi. ²¹ Chonan byen yigaane' yabana' axt ka illin lla yiyonshao' Chioza'

yog'lolte dii de, kon ka goll Chioza' dii beṅ'ka' wleje' wdixje'gake' cho'a xtilleena' kani'yi. ²² La' dii Moiséza' golle' dii xozxto'choka' dill'ki: “Xancho Chioza' kweje' sto beṅ' ka nad' ladjleni, beṅ' chixje'ile' le' bi dill' we'lene'ne'. Na' li wzenag yog' daa ine'. ²³ Na' beena' bi wzenag che', Chioza' kwej yichje'ne' na' bich gak gone' txen beṅ'ka' nak yell che Chioza'.”

²⁴ 'Na' yog'lol dii beṅ'ka' wdixjee daa goll Chioza' legake' kani'yi, wzolozan kon dii Samuela, wdixje'gake' gak diiki chak naa. ²⁵ Len', naki chele daa ba bcheb Chioza' lao dii beṅ'ka' wdixjee daa golle' legake' kani'yi. Na' lekzka' naki chele dii wenna' daa bcheb Chioza' gone' che dii xozxto'cho Abraham'a, ka golle'ne': “Ni che xiin dia cho'na' gon' dii wen che yog'lol beṅ' lle' zbii zkaan yell-lioni.” ²⁶ Na' ka bsel' Chioza' Xiine' Jesúza', zigaate bseleene' ladjchoni kwenche gak wen checho na' to tocho yiyaj yilenicho dii malka' choncho.

4

Pédrona' len Juanna' gokgake' lo na' beṅ'ka' chṅabia' beṅ' Israelka'

¹ Na' ni choe'lente Pédróna' len Juanna' beṅ'ka' dill' ka bllin bxoza' len beena' ngoo lo nee beṅ'ka' chap yoodo'na' na' len zi bal saduceoka'. ² Le chllaagake' daa chli' chsedi Pédróna' len Juanna' beṅ'ka' lle' na' nakan gok biban Jesúza' ladj beṅ' wetka'. ³ Na'ch bex'gake' legake', na' daa ba wlle', jloogake' legake' lillyana', axt betiyoch bibejgake' legake'. ⁴ Per beṅ' zan beṅ'ka' bzenaggake' dillaa be' Pédróna' len Juanna' beṅ'lilall'gake' Jesúza'. Na' ka', wyanch beṅ'ka' beṅ'lilall'gake'ne', na' gokgake' ka do gayaa mil to beṅ' byoka'zə.

⁵ Na' betiyo bidop billag beṅ'ka' chṅabia' beṅ' Israelka' yell Jerusalénna', len beṅ' golka' chṅabia', na' beṅ'ka' chli' chsedi leya'. ⁶ Na' lekzka' len Anáza', beena' nak bxo choo bxo xen, na' Caifáza', Juanna', Alejándrona', na' nokchlə beṅ'ka' nak dialla che bxo choo bxo xenna'. ⁷ Na'ch bzegake' Pédróna' len Juanna' gchole'ka', na' wṅabgakile' legake':

—¿No lsens cheyi na' no bsel' le' chonle diiki?

⁸ Na' Espíritu Santo che Chioza' bzajniile' Pédróna' kwenche golle' legake' ki:

—Le' beṅ' wṅabia', na' le' beṅ' gol chṅabia'le yell Israeli, ⁹ chṅabile neto' ka nak dii wenna' gok che beeni, na' cheenile inezile nakan gok biyakile'. ¹⁰ Cheeninto' yog'lolle inezile na' yog'lol beṅ' Israelka' inezgakile', beeni chwiale ze laoleni biyakile' kon yel' wak che Jesucristo, beṅ' Nazareta', beena' betle lee yag cruza', per Chioza' bisbane'ne' ladj beṅ' wetka'. ¹¹ Che Jesúzan' choe'n dill' daa nan “yaja' daa bi wyoolall'le le' nakle wen yoo, leyen'lannan' yaja' daa ba nchejcha yoona'.” ¹² Bichga zoa sto beṅ' yoblə gak yisle' cho' kwenche bi kwiai'cho. La' kochno zoa doxen yell-lioni beṅ' ba wlej Chioza' kwenche yisle' cho'.

¹³ Le bibani beṅ' wṅabia'ka' daa chwiagake' bi bllib Pédróna' len Juanna' choe'gake' dillaa lawe'ka', la' nakbia' aga bi nsedgake' na' aga no nakgake'. Na' gokbe'gakile' daa wdalengake' Jesúza' txenan chongake' ka'. ¹⁴ Na' daa ze beena' biyaki ni'ena' kwite'ka', bibi gok ye'gake' legake'. ¹⁵ Na'ch bibejgake' legake' shlak be'len ljwellgake' dill' nak koogake' xnezin. ¹⁶ Che' ljwelle':

—¿Nakra goncho che beṅ'ki? La' yog'zə beṅ' zoa Jerusalénni inezgakile' ba bengake' to yel' wak xen, na' aga wak inacho bi nakan ka'. ¹⁷ Na' kwenche bich ides dill'ka' choe'gake', chiya' kooshebchogake' kwenche kochno we'lengake' dill' che Jesúza'.

¹⁸ Na'ch goxgake' Pédróna' len Juanna' dii yoblə, na' gollgake' legake' bich wli' wsdgakile' beṅ' ni bi we'lengake' legake' xtill' Jesúza'. ¹⁹ Na' Pédróna' len Juanna' che'gake':

—Li wwiayen'shki shi nakan wen lao Chioza' wzenagnto' chele lwaa dii wzenagnto' che'. ²⁰ Bi gak wsannto' we'nto' dill' daa ben ble'into' che Jesúza'.

²¹ Na'ch beṅ' wṅabia'ka' biya dii gollgake' legake' kwenche nan illebgake', na'ch bisan-chokləgake' legake', la' bibi billet-lall'gake' gongake' daa yog'zə beṅ' choe'la'ogake' Chioza' ni che daa gok. ²² Na' beena' biyaki ni'ena' kon yel' wak che Jesúza' ba wdeile' choa yiz.

Wnabgakile' Chioza' gaklene' legake' we'gake' xtilleena'

²³ Na' ka bisangake' Pédrona' len Juanna', biyajgake' gana' zoa beŋ'ka' nonlengake' txen na' gollgake' legake' yog' daa goll b̄xozka' ch̄n̄abia' na' beŋ' golka' ch̄n̄abia'. ²⁴ Na' ka bengakile' daa gollgake' legake', na'ch gokgake' toz be'lwillgake' Chioza', che'gake':

—Chios, li' nako' beŋ' zeelo ch̄n̄abia'. Li' beno' yabana', yell-lioni, na' nisdo'na', na' yog'te dii de lo yell-lioni. ²⁵ Na' Espíritu Santo cho'na' b̄xoe' dill'ki cho'a loll' dii Davina' kana' wne':

¿Berache chllaa chlokz beŋ' yell-lioki?

¿Berache toshiizi chgoo beŋ'ki x̄nezin gongake' daa bi nxe bi nzak'?

²⁶ Beŋ'ka' ch̄n̄abia' lo yell-lioni gokgake' toz gokzbangakile' na' biniatezgake' X̄ancho Chioza'

len Crístona', beena' wleje' kwenche inabi'e.

²⁷ Dii li yell Jerusalénni Heródeza' na' Poncio Pilátona', len beŋ' zit'ka' na' beŋ' Israelka', bdop bllaggake' gokgake' toz goklall'gake' wlliyi'gake' Jesúsza', beena' nak liizelozi beŋ' li beŋ' shao', beena' wlejo' kwenche inabi'e. ²⁸ Na' daa bengake' ka', gok ka bllio' bia'. ²⁹ Na' naa Chios, bwia ka ngoosheb beŋ' w̄n̄abia'ka' neto', na' goklen neto' naknto' wen llin cho', kwenche we'chnto' cho'a xtilloona' na' bi gall illebnto'. ³⁰ Bli' yel' wak cho'na' kwenche yiyaki beŋ' bi shao' na' kwenche gonnto' bichl̄a dii yibani beŋ' kon yel' wak che Xiino' Jesúsza', beena' nak liizelozi beŋ' li beŋ' shao'.

³¹ Na' ka biyoll be'lwillgake' Chioza', wxo' wn̄ib latja' gana' ndop nllaggake', na' w̄n̄abia'chga Espíritu Sántona' legake' na' bi bllebgake' we'gake' cho'a xtil' Chioza'.

Daa de che to toe' benin che yoguee

³² Na' yog' beŋ'ka' ba chonlilall' Jesúsza', toz ka gok yichjlall'do'eka'. Na' yog' daa de che to toe', benin che yoguee. Ni toe' bi wna: “Cha' dga.” ³³ Na' postlka', kon yel' wak xen che Chioza', be'chgake' dill' che X̄ancho Jesúsza' daa bibane' ladj beŋ' wetka', na' Chioza' dii xen goklene' yog'l̄ole'. ³⁴ Na' ni toe' bibi byallji, la' beena' de yell-lio che' wa lille' na' chiyiteen, na' mecha' daa choxee cheyin ³⁵ cho'en postlka' kwenche choe'gake' kon ka'k' wej chyallji to toe'. ³⁶ Na' wzoa to beŋ' Chipre lie' José. Nake' dia che dii Levína', na' postlka' bsi'gake'ne' Bernabé, na' zejin witip lall' beŋ'. ³⁷ Na' Joséni biyitee to yell-lio dii nape', na' mecha' bi'en postlka'.

5*Ananíaza' na' Safírana' wxiye'gake'*

¹ Na' wzoa to beŋ' wlie' Ananías, na' xoole'na' wlie' Safira, na' biyit'gake' shkwe' yell-lio che'ka'. ² Na' Ananíaza' len xoole'na' gokgake' toz bkwaangake' lat' mecha' na' bentezgake' ka be' doxenan postlka'. ³ Na'ch Pédrona' golle'ne':

—Ananías, ¿berache be'zo' latj w̄n̄abia' Satanáza' yichjlall'do'na' na' chakilo' siyoo Espíritu Sántona' daa bgaaŋleno' lat' mecha' daa wdixjgake' che yell-lio cho'na'? ⁴ Cho' yell-liona' kana' zi' yiyitooŋ, na' cho' mecha' daa bēxoo cheyin ka biyitooŋ. ¿Berache wlool̄z̄a yichjlall'do'na' siyoo? Aga beŋ' yell-lionin chziyoo, san Chiozan' cheenilo' siyoo.

⁵ Na'ch ka beni Ananíaza' daa goll Pédrona', to ka billeeze' wite'. Na' le blleb yog' beŋ'ka' w̄nezi ka gok che'. ⁶ Na' bllin to chop bi' wew' gana' chtol Ananíaza', na' bitobgakbee to lech' na' jakwash'gakbee.

⁷ Na' gok ka do shon gor ka bllin xoole'na', aga n̄ezile' bin ba gok che beŋ' che'na'. ⁸ Na' w̄n̄abi Pédrona'ne', chi'ene':

—Wnashki nad', ¿aka to nakz beŋ' cho'na'n biyit'le yell-lio chelena'?

Na' Safírana' chi'ene':

—Awe, ka't'kzan biyit'nto'n.

⁹ Na'ch che' Pédrona'ne':

—¿Berache benzle toz dill' kon ben' cho'na' chakile wak siye'le Espíritu che Chioza'? Cho'a yooni ba ziza' bi'ka' jakwash'gakb' dii ben' cho'na', na' naa lljakwash'gakb' li'.

¹⁰ Na' lii billeete Safirana' wite' lao Pédróna'. Na' ka biyoo bi' wew'ka' ble'gakib' ba wite', na'ch bibejgakbee na' jakwash'gakbee kwit dii ben' che'na'. ¹¹ Na' le blleb ben'ka' nonlilall' Jesucrístóna' len yog' ben'ka' wnezi ka gok che dii Ananíaza' na' dii Safirana'.

Postlka' bengake' dii zan yel' wak

¹² Na' postlka' bengake' dii zan yel' wak na' bichlə dii chonan ka yibani ben' ladj ben'ka' lle' Jerusalénna'. Na' yog' ben'ka' chonlilall' Jesúsza' chdop chllaggake' loo koridor che yoodo'na' daa le Koridor che dii Salomón. ¹³ Na' nochlə ben'ka' aga biyaxjgakile' gongake' legake' txen, la'kzi le ble'shiigakile' legake'. ¹⁴ Na' ben' zan, ka noolə ka ben' byo, benlilall'gake' Xancho Jesúsza'. ¹⁵ Na' chyixjgake' tnezka' ben'ka' bi shao', nxoogake' legake' no lo yagla' na' no lo daa, kwenche kat' te Pédróna' la'ch' bxen che'na' ten gana' degake' na' yiyakgakile'. ¹⁶ Na' lekzka' zan ben' yellka' llii gaozə Jerusalénna' chajgake' lao postlka' chjwa'gake' ben' che'i yillwe' na' ben' yoo dii xiw'ka'. Na' yog'lolz'gake' chiyaki.

Wloogake' postlka' lillyana'

¹⁷ Na'ch bxo'z choo bxo'z xenna' na' saduceoka', ben'ka' nakgake'ne' txen, gokxee gokz'bangakile' postlka'. ¹⁸ Na'ch bex'gake' postlka' na' wloogake' legake' lillyana'. ¹⁹ Na' wala' bllin to anjl che Xancho Chioza' bsalje' lillyana' na' bibeje' legake', na' golle':

²⁰ —Li yiyaj yoodo'na', na' li wzajni ben'ka' chdop chllag na' doxen ka nak yel' mban zejli kani daa we' Chioza' legake'.

²¹ Na'ch ka wyeeni', biyajgake' yoodo'na' ka goll anjla' legake', na' bli' bsedgakile' ben'ka'.

Na'ch bxo'z choo bxo'z xenna' na' ben'ka' nakgake'ne' txen bitopgake' yog'lol' ben'ka' chnabia' yell Israela', na' bsel'gake' ben' kwenche nan lljxi'gake' postlka' de lillyana'. ²² Na' ka bllin ben'ka' chap yoodo'na' cho'a lillyana', kochno postlka' de na'. ²³ Na'ch jayellgake' ben'ka' chnabia':

—Nejchech lillyana', na' lle'te soldadka' cho'a puertka' chapgake'n, na' ka bsaljnto'n, ni to ben' bi yoo lo'inna'.

²⁴ Na' beena' ngoo lo nee ben'ka' chap yoodo'na', len bxo'zka' chnabia', ka bengakile' che'gake' ka', na' gokgakile' gate yiyoll yido dga. ²⁵ Na' ni choe'tegake' dill', bllin to ben' chi'e legake':

—Ben'ka' wloole lillyana' lle'tgake' yoodo'na' chli' chsedgakile' ben'ka' lle' na'.

²⁶ Na'ch wyaj ben'ka' chap yoodo'na' kon beena' chnabia' legake' jaxi'gake' postlka' xochi. Bibi bengakile' legake' daa bllebgake' shi ben'ka' chzenag chegake' wlligake' legake' yaj. ²⁷ Na' ka billinlengake' postlka' lao ben'ka' chnabia' yell Israela', na' bxo'z choo bxo'z xenna' chi'e legake':

²⁸ —¿Abi chajle'kzlen nanto' le' bich wli' wsedzile ben' xtill' Jesúsza'? Na' li wwia ka ba benle, ba bli' bsedile yog' ben' Jerusalénki cho'a xtilleena', na' cheenile wtobile neto' daa betgake'ne'.

²⁹ Na'ch Pédróna' len postlka' sto che'gake':

—Chonchan byen wzenagnto' che Chioza' aga ka che ben' yell-lioni. ³⁰ Le' betle Jesúsza' na' bda'lene' lee yag cruza'. Na' Chios, beena' be'la'o dii xozxto'choka', le' bisbane'ne' ladj ben' wetka'. ³¹ Na' Chioza' ba mbeke'ne' kwite' de shlina' gana' ba chi'e chnabi'e, na' nzoe'ne' kwenche yisle' ben' lao dii mala', la' cheenile' yog' ben' Israelki yiyaj yileni dii malka' chongake' kwenche yizi'xen Chioza' chegake'. ³² Na' neto' choe'nto' dill' daa ble'into' gok che Jesúsza', na' daa betj Espíritu Sántóna', beena' ba bzoa Chioza' loo yichjlall'do' yog' ben' chzenague' che', lekzka' chli'n nakan ka nannto'.

³³ Na' ka beni ben' wñabia'ka' daa goll postlka', le' bllaagake' na' goklall'gake' witgake' legake'. ³⁴ Na' ladj ben'ka' chnabia' len to fariseo, ben' le Gamaliel, ben' chli' chsedi

leya', na' yog'z beṇ' chle'shi'gakile'ne'. Na' wzollee, golle' legake' kwejgake' postlka' xtit chyoolə, ³⁵ na' golle' beṇ' wṇabia'ka':

—Le', beṇ' Israel, li wsak' shi bin gonile beṇ'ki. ³⁶ Li lljadini kani batz bchej to beṇ' le Teudas, na' wne' nake' to beṇ' zakii, na' ka do tap guioa beṇ' bengake'ne' txen. Na' ka betgake'ne', yog' beṇ'ka' gokgake'ne' txen biyeslesgake', bich bi bengake'. ³⁷ Na' ka wde gok ka', wizak dii yoblə kana' chlabgake' bal beṇ' lle' to to yell, na' bizchej Judas beṇ' Galileana', na' ka'kzə beṇ' zan bengake'ne' txen. Na' lekzka' betgake'ne' na' biyesles beṇ'ka' gokgake'ne' txen. ³⁸ Na' ṇaa, nia' le' bibi gonile beṇ'ki, la' ka nak dga chli' chsedgakile', shi nakan dii chyiljall'zgake' winitlokzan. ³⁹ Na' shi nakan che Chios, aga wak yisol yinitlen. Chiya' wwiayen'le kwenche bi gakkil-lenle Chioza'.

⁴⁰ Na'ch betjgakile' daa goll Gamaliela' legake'. Na' bizgoogake' postlka', na' bet wdingake' legake', na' dii yoblə bllongake' kochno wli' wsedgakile' xtill' Jesúza'. Na' biyolla' bisangake' legake'. ⁴¹ Na'ch bichej postlka' gana' ndop nllag beṇ'ka' chṇabia', na' le chibagakile' daa be' Chioza' latj bchi' bsak' beṇ'ka' legake' daa choe'gake' xtill' Jesúza'. ⁴² Na' yog' lla postlka' bli' bsedgakile' xtill' Jesucristona' yoodo'na' na' lill beṇ'.

6

Wlejgake' gall beṇ' gak lall' nagake' mandadka'

¹ Na' ka zej chanch beṇ'ka' chonlilall' Jesúza', beṇ'ka' chṇe dill' griegona' wzolo che'gake' aga chaklebi ikaa noolə wizebka' chṇe dill' griegona' ka to daa chkaa nool wizebka' chṇe dill' hebrewa' kat' chyisgake' yel' wawa' yog' lla. ² Na'ch postlka' shllin bti'agake' yog' beṇ'ka' chonlilall' Jesúza', na' che'gake':

—Bi gak wsannto' chixje'nto' cho'a xtill' Chioza' kwenche kooz lo nanto' we'nto' dii yeej gao beṇ'. ³ Na' le' beṇ' bish', li kwej gall beṇ' ladjleni, beṇ' chon wen, beṇ' chajni, na' chṇabia' Espíritu Sántona' legake'. Na' gak lall' na'gake' chisgake' yel' wawa'. ⁴ Na' neto' we'l-lall'chnto' we'llwillnto' Chioza' na' wli' wsedchinto' beṇ' cho'a xtilleena'.

⁵ Na' yog'z beṇ'ka' biyoolall'gake' ka goll postlka', na' wlejgake' beena' le Esteban, nake' beṇ' nonlilall'chgue' Chioza' na' chṇabia' Espíritu Sántona' le'. Na' lekzka' wlejgake' Felípena', Prócorona', Nicanora', Timónna', Parménaza', na' Nicoláza', beṇ' Antioquíana', beena' bene' txen beṇ' Israelka'. ⁶ Na' jwa'gake' legake' gana' lle' postlka', na' postlka' bṁoa neeka' yichje'ka' na' wṇabgakile' Chioza' gaklene' legake'.

⁷ Na' beṇ' zanch beni cho'a xtill' Chioza' na' wyanchga beṇ'ka' benlilall'gake' Jesúza' Jerusalénna', na' zan bṁozka' bzenaggake' na' benlilall'gake' Jesúza'.

Bex'gake' Estébanna'

⁸ Na' Estébanna', wzoalenchga yel' wak che Chioza' le', na' dii xen goklene'ne' kwenche bli'e yel' wakka' na' bichlə dii chonan ka yibani beṇ'. ⁹ Na'ch lle' shkwen beṇ' Israelka' ba biyell bila' lo na' beṇ'ka' wxi' legake', na' non cheləgake' chdop chllaggake' gana' choe'llwillgake' Chioza'. Na' gokgake' toz bal beṇ' Cirene, beṇ' Alejandría, beṇ' Cilicia, na'ch beṇ' zaak do Ásiana', gokdil-lengake' Estébanna'. ¹⁰ Na' aga gokgake' yel' sin' che Estébanna', daa chṇie' kon ka che' Espíritu che Chioza'ne'. ¹¹ Na' wdixjgake' bal beṇ' kwenche wxiye'gake', che'gake': “Ba beninto' Estébanna' chṇie' zban che dii Moiséza' na' che Chioza'.” ¹² Na' daa gollgake' ka', bta bṁegake' beṇ' zan, len beṇ' golka' chṇabia' na' beṇ'ka' chli' chsedi leya' kwenche bex'gake' Estébanna' na' jwa'gake'ne' lao beṇ'ka' chṇabia' beṇ' Israelka'. ¹³ Na' wdiljhgake' beṇ'ka' wxiye', kwenche gollgake':

—Bi chsankzə beeni inie' che yoodo' che Chios chechona', na' che ley che'na'. ¹⁴ Na' ba bizeninto' chizne' Jesús, beṇ' Nazareta', yichinje' yoodo' chechona' na' yisha'tie' daa ba yoolocho choncho ka daa bli' bsedi dii Moiséza' cho'.

¹⁵ Na' yog' beṇ'ka' chi' chongake' yel' joschisa', ka bwiagake' Estébanna' na' ble'gakile' chey cheeni' cho'alawe'na' ka cho'alao anjl.

7

Estébanna' bi'e dill' lao ben' wñabia'ka'

¹ Na'ch b̄xoz choo b̄xoz xenna' wñabile' Estébanna', chi'ene':

—¿Alekzi ben'ki ka chono'n?

² Na' Estébanna' chi'e legake':

—Le' ben' bish' na' le' nakle ka x̄anto', li wzenag dga in̄ia' le': Chios chechona', beena' liizelozi nak ben' choo ben' xen, bli'lawe' dii x̄ozxto'cho Abrahama' kana' zoe' yell-liona' mbani Mesopotámiana', kana' zi' shaje' yell Haránna'. ³ Na' Chioza' golle'ne': “Bkwaan yell cho'ni na' dialla cho'ka', na' wyaj yell-lío gana' wliid' li'.” ⁴ Na'ch dii Abrahama' bcheje' gana' mbani ben' caldeoka' na' jsoe' yell Haránna'. Na'ch ka wde wit xe'na', Chioza' bizseleene' gani zoacho ñaa. ⁵ Na' Chioza' bi bene' lo na' dii Abrahama' ni lat' yell-lioni de ni, san bchebe' wi'ene'n na' kat' guete' yigaanan lo na' xiin̄ dia che'na', la'kzi aga non' bi' che dii Abrahama' ba zoa ka golle'ne' ka'. ⁶ Na' lekzka' Chioza' chi'ene' xiin̄ dia che'ka' soagake' yell zit' na' in̄abia' ben'ka' legake' wgongake' legake' llinna', na' wsak'zi'gake' legake' tap guiyoa yiz. ⁷ Na' lekzka' Chioza' golle'ne': “Gon' yel' zi' che ben'ka' wchi' wsak'gake' legake', na' yiyolla' yiza'gake' lall ben'ka' na' yiyedgake' ni, na' we'la'ogake' nad'.” ⁸ Na' ka bcheb Chioza' gone' dii wen che dii Abrahama', golle'ne' chiyal' sho'e senna' daa le circuncisión, le' na' xiin̄ dia che'na'. Daan, dii Abrahama' wlo'e dii xiine' Isaaca' senna' ka gok x̄on' lla goljb', na' ka'kzə ben dii Isaaca' kon dii xiine' Jacoba', na' ka'kz ben dii Jacoba' kon dii xiine'ka' shllin̄, ben'ka' gok dii x̄ozxto'cho, cho' ben' Israel.

⁹ Na' ben'ka' nak xiin̄ dii Jacoba', gokxe'gakile' dii Joséna', beena' nak ben' bish'gake', na' bet'gake'ne' wxi' ben' Egíptoka'ne'. Per Chioza' wzoalene' dii Joséna', ¹⁰ na'ch bisle'ne' lao yog'lol dii ben ble'ile'. Na' bi'ene' yel' sin' kwenche faraónna', beena' chñabia' Egíptona', ble'shiile'ne' na' bzoe'ne' kwenche wñabia'lene' le' na' bene' lo nee yog' dii de che'.

¹¹ Na' wzolo wche' wbinna', na' gokchga yel' zi' yel' yeshaa doxen gana' mbani Egíptona' na' gana' mbani Canaánna', na' bi got' dii yeej gao dii x̄ozxto'choka'. ¹² Na' ka wñezi dii Jacoba' de trígona' Egíptona', na' bselee bi' che'ka', ben'ka' gok dii x̄ozxto'cho, jxi'gake'n. ¹³ Na' ka wyajgake' de wchopi, dii Joséna' golle' legake' nan len' nake' ben' bish'gake', na'ch bembia' faraónna' dialla che dii Joséna'. ¹⁴ Na'ch Joséna' biselee legake' kwenche jaxi'gake' xe', Jacoba', na' yog' xiin̄ che'ka'. Na' yog'gake' nakgake' ka do guiyon shin'. ¹⁵ Kan' gok jsoa dii Jacoba' Egíptona' gana' wite', na' lekzka' na' wit xiine'ka', ben'ka' gok dii x̄ozxto'cho. ¹⁶ Na' jakwash'gake' legake' loo bana' daa bizi' dii Abrahama' yell Siquema' che xiin̄ beena' le Hamor.

¹⁷ Na' ka ba zoa gao gon Chioza' daa bchebe' gone' che dii Abrahama', ba wyanchga xiin̄ dia che dii Israela', ben'ka' lle' Egíptona', ben' zan wal ba nakgake'. ¹⁸ Na'ch bllin lla wzolo wñabia' sto ben' yoblə yell Egíptona', ben' bi bembie' dii Joséna'. ¹⁹ Na' ben' wñabia'na' wxiyee ben' wlall chechoka' na' biya dii bchi' bsakee dii x̄ozxto'choka', na' bene' byen lljchoongake' bdo'do' che'ka' kwenche guetgakb'. ²⁰ Na' kana'yen' golj dii Moiséza', nakchgab' xochido', na' shon̄ beo'chga bisgol x̄axna'baab' lille'ka'. ²¹ Na' ka bich gok kwkash'gake'b' lille'ka', benan byen jchoongake'b' kwenche nan guetb'. Na'ch noola' nak xiin̄ faraónna' billelile'b' na' bikeeb' na' bisgole'b' ka xiine'. ²² Ka' gok bsd dii Moiséza' yog'lol yel' sin' che ben' Egíptoka' na' bi'e dill' zakii na' leyi bene' dii zakii.

²³ Na' ka goki dii Moiséza' choa yiz, na' gokile' lljawie' ben' Israelka', ben'ka' nak ben' wlall che'. ²⁴ Na' ka ble'ile' to ben' Egípto chchi' chsakee to ben' Israel, na' goklene' ben' Israela', bizi'e wzon che ben' Egíptona', bettie'ne'. ²⁵ Na' goki dii Moiséza' ben' wlall che'ka' gakbe'gakile' nan Chioza' wchine' le' kwenche yisle' legake' lo na' ben' Egíptoka', per bi gokbe'gakile'. ²⁶ Na' betiyo ble'ile' chop ben' wlall che', ben' Israel, chdilgake'. Na' gokile' yizoe' legake' wen, na' chi'e legake': “¿Berache chdil-lenzə ljwell-le?, aga ne' ben'

bishee til-lene'." 27 Na'ch beena' chit chyne' ben' wllall che'na' blliguae dii Moiséza' na' chi'ene': "¿No bzoa li' inabi'o neto' na' koo xnezi chento'ni? 28 ¿Alezkka' cheenilo' wito' nad' ka beto' ben' Egíptona' daa neji?" 29 Na' daa goll beeni ka', dii Moiséza' bxonje' na' jsoe' gana' mbani Madiánna'. Na' la'kzi nake' ben' zit' ladj ben'ka', na' bgaane' na'z na' wzoa chop xiine'.

30 'Ba gok choa yiz zoe' na', ka bli'lao to anjl le' to lo yag yesh' dii chalnin, zoan gana' bibi chashj chleb gaoz Yaa Sinaína'. 31 Na' le bibani dii Moiséza' daa ble'ile' daa, na' wbiguee kwenche bwiayenee kwaslol. Na'ch benile' shii Xancho Chioza', chi'ene': 32 "Nadaan nak' Chios, beena' be'la'o dii xozxto'ka', Abrahamá', Isaaca' na' Jacoba'." Na'ch dii Moiséza' le bllibe' axt chxiztite', na' aga biyaxjchile' wwie'. 33 Na'ch Xancho Chioza' golle' dii Moiséza': "Blechj xelo'na', la' nad' zoa' latji gani zio', na' aga ka nla'z no se ni. 34 Nad' ba ble'id' yel' zi'na' chle'i ben' Israelka' yell Egíptona', ben'ka' nak yell cha'. Ba benid' chonyesh'gake', na' ba bid' kwenche yisla' legake'. Na' li', chidoloo yiselaa Egíptona'."

35 'Na' Chioza' bseleene' kwenche yisle' ben' wllall che'ka' lo na' ben' Egíptoka', na' inabia'tie' legake', la'kzi bi bzenaggake' che' kana' wzoe' Egíptona'. Bengakile'ne' nakzi, na' gollgake'ne': "¿No bzoa li' inabi'o neto' na' koo xnezi chento'ni?" La'kzi gollgake' ka', Chioza' bseleene' ka bli'lao anjla' le' lo yag yeshaa daa golnin. 36 Na' dii Moiséza' bene' zan yel' wak diika' ben ka bibani ben' Egíptoka' kana' bibeje' dii xozxto'choka' lalle'ka'. Na' bene' yel' wak loo nido'na' le Nido' Xna, na' lekzka' latja' gana' bibi chashj chleb gana' wdagake' choa yiz. 37 Na' golle' dii xozxto'choka': "Xancho Chioza' kweje' sto ben' ka nad' ladjleni, ben' chixje'ile' le' dillaa daa we'lene'ne'." 38 Na' dii Moiséza' wzoalene' dii xozxto'choka' latja' gana' bibi chashj chleb, na' len anjla', beena' bshaljlene'ne' lo yaa Sinaína', na' Chioza' be'lene'ne' dill' dii nsa'n yel' mban daa bikwaanlene' cho'.

39 'Na' dii xozxto'choka' aga goongakile' wzenaggake' che dii Moiséza', bzoatezgake'ne' ka'lə na' goklall'gake' yiyajgake' Egíptona'. 40 Na'ch gollgake' dii Aarónna': "Cheeninto' gono' to lwaa lsak' dii we'la'onto', kwenche yibialon laonto'ni. Ka nak Moiséza', beena' bibeje' cho' Egíptona', bi nezicho bi ba gok che'." 41 Na'ch bengake' to lwaa lsak' me'do' na' bengake' lni cheyin, betgake' no bayix' kwenche be'la'ogake' daa beni ni'a neeka'. 42 Na'ch Chioza' wlej yichje' legake' na' bi'e latj be'la'ogake' beljka' lliá xan yabana'. Bengake' ka na lee libra' daa bzej dii ben'ka' wdixjee daa goll Chioza' legake' kani'yi, gana' nan:

Le', ben' Israel,

¿Achakile nadaan be'la'ole kana' betle bayix'ka' lo choa yiza' wzoale latja' gana' bibi chashj chleb?

43 Aga nadaan be'la'ole. Molocan' be'la'ole, benle to yoo de lech' gana' be'la'olen ka chios chele,

na' be'la'ole belj che chios chele Refánna',

diika' benlilall'le.

Na' ni cheyi diikin kweje' le' lall-leni, na' wselaa le' zit' walch aga ka yell Babilóniana'.

44 'Na' shlak wzoa dii xozxto'choka' latja' gana' bibi chashj chleb, bengake' to yoodo' de lech' dii gak yidob na' yiyoa'gake'n. Na' bengake'n kon ka goll Chioza' dii Moiséza', na' kon ka bliile'ne'. Na' lo'inna' wlooshao'gake' yaj taaka' gana' nyoj ley che Chioza'.

45 Dii xozxto'choka' bigaanlengake' yoodo' de lechaa, na' bia'gake'n ka wyajlengake' dii Josuéna' jtil-lengake' yellka' ben Chioza' lall' na'gake', na' bgaanan lallchoni axt ka bllin lla wñabia' dii Davina'. 46 Na' Chioza', beena' be'la'o dii xozxto'cho Jacoba', bibaile' ka ben dii Davina'. Na' Davina' wñabile'ne' wi'e latj gone' to lill xlatje'. 47 Per Salomónna'lə, beena' nak xiine', bene'n 48 la'kzi Chioza', beena' nak liizelozi ben' choo ben' xen, bi zoe' to loo yoo dii chon ben' yell-lioni. La' ka wna dii beena' wdixjee daa goll Chioza'ne' kani'yi:

49 Yabana' nakan gana' chi'a chñabi'a,
na' lo yell-liona' nzoa' ni'ani.

¿Nakran chakile gonle yoona' gana' soa'?, na Xanchona'.

¿Achakile chyallj ga yizi'lallaa?

⁵⁰ ¿Abi chwiale nadaan ben' yog'loł dii de?

⁵¹ 'Na'ch Estébanna' chi'e ben'ka' lle' na':

—Le ben' yichjlall'do' wal nakle. Bi chzenagle che Chioza' na' chonle ka ben' bi nombia' Chioza'. Nakle ben' widenag ka gok dii xoxto'choka'. Bikzə chzenagle che Espíritu Sántona'. ⁵² Dii xoxto'choka' bchi' bsak'gake' yog' dii ben'ka' wdixjee daa goll Chioza' legake' kani'yi. Betgake' ben'ka' be' dill' nan Chioza' wselee beena' zeelo nak ben' li ben' shao'. Na' ka bide' na' bénlene' lo na' ben'ka' betgake'ne'. ⁵³ La'kzi nombia'le ley daa be' anjlka' dii Moiséza', bi chzenagkzlen.

Betgake' Estébanna'

⁵⁴ Ka beni ben'ka' daa goll Estébanna' legake', le bllaagake' ax̄t chaoyaaax̄aj̄ leye'ka'. ⁵⁵ Na' Estébanna', chñabia'chga Espíritu Sántona' le', na' blis lawe'na' yabana' ble'ile' yel' chey cheeni' che Chioza', na' ble'teile' ze Jesúsza' kwit de sh̄li che Chioza'. ⁵⁶ Na'ch golle' legake':
—iLi wwia! Chle'id' nyalj yabana', na' Beena' Bsel' Chioza' Yell-lioni zie' kwit Chioza' sh̄laa de sh̄lina'.

⁵⁷ Na' ben'ka' lle' na' bsej nague'ka' kwenche bi bengakile' xtilleena', na' de chosyaadi-azgake' bex'gake'ne'. ⁵⁸ Na' wlejšgake'ne' yell Jerusalénna' jalliagake'ne' yaja'. Na' ben'ka' ben ka' bkwaanlen xe'ka' daa ndobgake' to bi' wew' le Saulo kwenche wdapbaan. ⁵⁹ Na' ka chliagake'ne' yaja', be'lwille' Jesúsza', chi'ene':

—Jesús, li' nako' Xan', bizi' bikaagach nad'.

⁶⁰ Na' biyoll wne' ka', na' bchek' xibe'na' na' wnie' zillj, wne':

—Xan', wxi'xen che ben'ki dga chongakile' nad'.

Na' biyoll wne' ka' wite'.

8

Sáulona' bchi' bsakee ben'ka' choe'la'o Jesúsza'

¹ Na' Sáulona' goke' toz ben'ka' betgake' Estébanna'.

Na' lo llana'tez wzolo bchi' bsak'gake' yog' ben'ka' nonlilall' Jesúsza' Jerusalénna'. Na' wislesgake' doxen gana' mbani Judeana' na' gana' mbani Samáriana', na' totgui postlka' bigaangake' Jerusalénna'. ² Na' to chop ben' nonlilall' Jesúsza' jakwash'gake' dii Estébanna' na' le wchellgakile'ne'. ³ Na' Sáulona' bchi' bsakee ben'ka' nonlilall' Jesúsza', chaje' lill che chegake' chjtoyoe' ka nool ka ben' byo kwenche chgwee legake' lillyana'.

Be'gake' dill' wen dill' kob che Crístona' gana' mbani Samáriana'

⁴ Na' ben'ka' bllesh Jerusalénna' be'gake' dill' wen dill' kob che Crístona' gattezə wyajgake'. ⁵ Na' beena' le Felipe, wyaje' to yell xen che Samáriana' na' be'lene' ben'ka' dill' che Crístona'. ⁶ Na' bdop bllag ben', na' yog'logake' bzenagyeñ'gake' dill' daa be' Felípena', daa ble'gakile' yel' wakka' chone'. ⁷ Na' ben' zan bichej dii xiwaa, na' ka bichejgakan chosyaadiagakan. Na' lekzka' biyone' zan ben' net ni'a nee, na' ben' bi chak sa' wen. ⁸ Na' daa gok ka', le biba bizaki ben'ka' lle' yella'.

⁹ Na' lekzka' yella' wzoa to ben' willa' lie' Simón, na' kon yel' willa'na' chone' chziyee ben' doxen gana' mbani Samáriana', na' ben kwine' ben' choo ben' xen. ¹⁰ Yog' ben' lle' na' chzenaggake' xtilleena', ka bi' xkwid' ka ben' gol, na' nagake':

—Beenin nsi'gake' Yel' Wak Choo Yel' Wak Xen che Chios.

¹¹ Na' le wyajle'gake' che', la' zan yiz ba gok chziyee legake' kon yel' willa'na' daa chone'.

¹² Na' ka bzajni Felípena' legake' dill' wen dill' kob che yel' wñabia' che Chioza' na' che Jesucrístona', na' ben' zan wyajle'gake' xtilleena' na' wchoagake' nisa', ka noolə ka ben' byo. ¹³ Na' lente Simónna' wyajli'e na' wchoe' nisa', na' wzoloe' chdalene' Felípena' gattez zeje', na' chibanile' ka nak yel' wakka' daa chon Felípena'.

¹⁴ Na' ka wñezi postlka' lle' Jerusalénna' ba chajle' ben' Samáriaka' cho'a xtill' Chioza', na' bsel'gake' Pédróna' len Juanna' Samáriana'. ¹⁵ Na' ka bllingake', be'lwillgake' Chioza' wñabgakile'ne' soa loo yichjlall'do' ben' Samáriaka' Espíritu Sántóna'. ¹⁶ La' bin' soa' Espíritu Sántóna' loo yichjlall'do'eka'. Tochga ba wchoagake' nisa' daa chajle'gake' che Xancho Jesúza'. ¹⁷ Na'ch Pédróna' len Juanna' bxoá neeka' yichj ben'ka', na' jsoa Espíritu Sántóna' loo yichjlall'do'eka'.

¹⁸ Na' ka gokbe'i Simónna' jsoa Espíritu Sántóna' loo yichjlall'do' ben'ka' biyoll bxoá na' postlka' yichje'ka', na' bshabile' legake' mech, ¹⁹ chi'e:

—Li gon nad' yel' waki kwenche nottez ben' ka wxoá na'ki yichje'ka' soa Espíritu Sántóna' loo yichjlall'do'eka'.

²⁰ Na'ch Pédróna' golle'ne':

—Kwiayi'lenshgo' xmecho'na', daa chakilo' wak si'leno'n daa choñ Chioza' ka'z. ²¹ Bikz ga gak gono' ka nak dga chonnto', la' bi nak yichjlall'do'na' ka cheeni Chioza'. ²² Biyaj bileni dii mala' chono', na' be'lwill Chioza' shi yizi'xene' cheyi daa ba goklalloo gono'. ²³ La' nakbia'cha bin nxe bin nzak' nak loo yichjlall'do'na', na' lennan' ntakw nchejan li'.

²⁴ Na'ch che' Simónna' legake':

—Li we'lwillgach Chioza' ni cha' kwenche bi gak daa ba wnale gak cha'.

²⁵ Na' ka biyoll be' Pédróna' na' Juanna' cho'a xtill' Chioza', na' biza'gake' ziyajgake' Jerusalénna'. Na' ka zingogake' nez, be'gake' dill' wen dill' kob che Jesucrístoná zan yellka' gana' mbani Samáriana'.

Felípena' na' ben' Etiopíana'

²⁶ Na'ch to anjl che Xancho Chioza' wñie' Felípena', chi'e:

—Wyaj lli'lə na' goxoo neza' daa ziza' Jerusalénlə na' zejan yell Gázalə, neza' daa chde latja' gana' bibi chashj chleb.

²⁷ Na' wza' Felípena' zeje', na' tneza' billague' to ben' Etiopía wyaje' Jerusalénna' je'lawee Chioza'. Na' nake' to eunuco,* ben' zakii, na' nak lall' nee mech che noolə wñabia' che Etiopíana' beena' le Candace. ²⁸ Na' ba zingwee nez ziyaje' lalle'nalə, na' ziyo'e loo karret che'na' chlabe' daa bzej dii Isaíaza', beena' wdixjee daa goll Chioza'ne' kani'yi. ²⁹ Na'ch Espíritu che Chioza' chi'e Felípena':

—Jabig' kwit karreta'.

³⁰ Na' ka jabig' Felípena' kwit karreta', benile' chlab beena' daa bzej dii Isaíaza'. Na' chi'ene':

—¿Achajniilo' daa chlabo'?

³¹ Na'ch ben' Etiopíana' chi'e:

—¿Nakra gon' shajniida'n?, la' bi zoa no wzajni nad'.

Na' golle' Felípena':

—Wyepgach na' wche' kwitii.

³² Na' Cho'a Xtill' Chioza' gana' chlabe' nan:

Betgake'ne' ka chite' to xil'do';
na' ka to xil'do', ba bi chosyaa kat' chshibe'b,
ka'kz le', ni shcho'a dill' bi wñie'.

³³ Na' bsi'gake'ne' yel' zto', na' aga no goklen le' gone' yel' joschis che'.

Na' kono xiin dia che wzoa,
la' bsol bnitgake' yel' mban che'na'.

³⁴ Na'ch ben' Etiopíana' chi'e Felípena':

—Ben goklen wna nad', ¿nora cheyin wna dii Isaíaza' ka'? ¿Ache kwinen' cho'e dill', anti che ben' yoblan?

* **8:27** Eunuco: zejin ben' wlejgake' xshitin wa ben' bibi nsee ka chaltjie'. Bwia glosáriona'.

³⁵ Na'ch Felípena' wzoloe' bzajniile'ne' ka zeji gana' chlabe' na' bi'e dill' wen dill' kob che Jesúza'. ³⁶ Na' ka bllingake' to ga llia nis, na' che' beṅ' Etiopíana' Felípena':

—Ni llia nis, ¿ade daa wsej wllonan choa' nisa'?

³⁷ Na' che' Felípena'ne':

—Shi chajli'o do yichj do lalloo, wak wchoa' li' nisa'.

Na' che' beṅ' Etiopíana':

—Chajli'a Jesucrístona' nake' Xiin Chioza'.

³⁸ Na'ch bkweze' karreta' na' betjgake'; na' wyoogake' loo nisa' na' Felípena' bchoe'ne' nisa'. ³⁹ Na' ka bichejgake' loo nisa', Espíritu che Xancho Chioza' bichi'e Felípena' gan yoblə, na' aga ble'chi beṅ' Etiopíana' le', per chiba chizakile' ziyaje'. ⁴⁰ Na' Felípena' billine' yella' le Azoto, na' bidie' to to yell chyise' dill' wen dill' kob che Jesúza' axt billintie' Cesareana'.

9

Bisha' Chioza' yichjlall'do' Sáulona' (Hch. 22:6-16; 26:12-18)

¹ Na' Sáulona' kon chde' chwall chshebe' beṅ'ka' nonlilall' Xancho Jesucrístona'. Chiy-ijlallee nak gone' kwenche wite' legake'. Daan wyaje' Jerusalénna' jawie' bxoꝝ choo bxoꝝ xenna' ² na' wṅabile'ne' wzeje' twej yish che to to gana' chdop chllag beṅ' wllall che'ka' choe'lwillgake' Chioza' yell Damáscona', na' we'n lsens yiyilje' beṅ'ka' ba wyoo lo nez li nez shao' che Jesucrístona' na' goṅee legake' kwenche yichi'e legake' pres Jerusalénna', ka noolə ka beṅ' byo. ³ Ka ni ngwee nez, na' ba zoa illine' yell Damáscona', tokonganzi wyeḅj to beeni' xen wal le' dii za' yabalə. ⁴ Na' Sáulona' jchaze' lo yona' na' benile' to shii beṅ', chi'ene':

—Saulo, Saulo, ¿biḅhe chḅhi' chsak'zo' nad'?

⁵ Na'ch Sáulona' chi'e:

—¿Nora li', beṅ'?

Na'ch billii beenan', chi'e:

—Nadaan Jesúza', beena' chḅhi' chsakoo. Na' daa chono' ka', zi' che kwinzon' chono' na' chak cho' ka chak che goṅa' chilibb xisa' daa chbibe'b kwenche sa'b.

⁶ Na'ch Sáulona' axt chxiztite' daa chllebe', na' golle'ne':

—Xan', ¿beran cheenilo' gon'?

Na' Xanchona' chi'ene':

—Biyas na' wyaj Damáscona', na' na' inagake' li' daa chiya'l' gono'.

⁷ Na' beṅ'ka' zejlengake' Sáulona' txen legatega wzegake' bibangakile' na' bllebgake', daa bengakile' chak xne, per ni to kono ble'gakile'. ⁸ Na'ch biyas Sáulona' lo yona'. Na' ka biḅa' jalawe'na' aga ble'chile'. Na' beṅ'ka' zejlene' txen beḅgake' neena' kwenche bḅhe'gake'ne' yell Damáscona'. ⁹ Na' shoṅ lla bi gok ile'ile', ni bi weej wdawe'.

¹⁰ Na' Damáscona' zoa to beṅ' chonlilallee Jesúza' na' lie' Ananías, na' ben Xancho Jesúza' ka ble'do'ile'ne', na' chi'ene':

—Ananías.

Na' Ananíaza' chi'ene':

—Ni zia', Xan'.

¹¹ Na' Xanchona' chi'ene':

—Wyaj, na' wyoo neza' daa le Shlichá, na' lill Júdaza' inabo' to beṅ' Tarso, beṅ' le Saulo. Ba choe'lwille' nad', ¹² na' ba ble'do'ile' li' choo gana' zoe' na' chxoꝝa noona'ne' kwenche yile'ile'.

¹³ Ka beni Ananíaza' chi'ene' ka', na' golle'ne':

—Xan', ze xtill' beena' chsak'zi'e beṅ'ka' nonlilall' li' Jerusalénna'. ¹⁴ Na' naa ba blee ni noṅee yish daa bzej bxoꝝka' chṅabia' daa cho'en lsens goṅee yog'loṅto', neto' choe'lwillnto' li', na' yichi'e neto' pres Jerusalénna'.

15 Na' Xancho Jesúza' golle'ne':

—Wyaj, la' ba wlej' Sáulona' kwenche wi'e xtilaana' lao ben'ka' bi nak ben' Israel, na' lao ben' wñabia' che'ka', na' lekzka' laole le' nakle ben' Israel. 16 Nad' wliidee ka chiyal' si' sakee ni cha'.

17 Na'ch Ananíaza' wyaje' gana' zoa Sáulona' na' wyo'e loo yooná', na' bxoá neena'ne'. Na' chi'ene':

—Saulo, ben' bish', Xancho Jesúza', beena' wñie' li' tneza' kana' zo' ni, ba bselee nad' kwenche gon' ka yile'ilo' na' soa Espíritu Sántona' loo yichjall'do'na'.

18 Na' ka bxoá neena' Sáulona', lii bikwaste jalawe'na' daa nak ka yid bdeej, na' bile'ile'. Na'ch bizolle na' wchoe' nisa'. 19 Na' ka wdawe', biyakshao'lallee, na' bigaanlene' ben'ka' nonlilall' Jesúza' yell Damáscona' zan lla.

Be' Sáulona' xtill' Chioza' yell Damáscona'

20 Na' lii wzolote Sáulona' cho'e xtill' Crístona' to to gana' chdop chllag ben' Israelka' choe'lwillgake' Chioza' yell Damáscona', na' chi'e ben'ka' Jesúza' nake' Xiin Chioza'. 21 Na' yog' ben'ka' bengakile' dill' daa choe' Sáulona' chibangakile', na' che' ljwelle':

—¿Aaga beenin chde' chchi' chsakee ben'ka' nonlilall' Jesúza' Jerusalénna'? Na' ¿aaga ni cheyinnan' bide' ni kwenche yichi'e yog'lolgake' pres lljasane' legake' lao bxoazka' chñabia'?

22 Na' btipch lall' Sáulona' kwenche zizikchli bi'e dill' nan Jesúzan' nake' beena' bcheb Chioza' wselee kwenche inabi'e, na' bich gok ina ben' Israelka' lle' yell Damáscona' bi nakan ka'.

Bila Sáulona' lo na' ben' Israelka'

23 Ka ba gok zan lla choe' Sáulona' xtill' Jesúza' yell Damáscona', na' ben' Israelka' lle' na' bshag ljwellgake' nan witgake'ne'. 24 Na' gokbe'i Sáulona' ba chinogake'ne'. Ka wal ka tella wdapgake' cho'a puert che zeena' daa nechj yella' kwenche gox'gake'ne' ka yicheje' na' witgake'ne'. 25 Na'ch ben'ka' nonlene' txen, wal-lə wloogake'ne' to loo llom na' biletjgake'ne' lee zeena' nechj yella' kwenche bile'.

Billin Sáulona' Jerusalénna'

26 Ka billin Sáulona' Jerusalénna', gokile' lene' ben'ka' nonlilall' Jesúza', per yog'lole' bllebgake'ne', bi wyajle'gake' shi dii li ba chonlilallee Jesúza'. 27 Na' Bernabéna' bchi'e Sáulona' gana' lle' postlka'. Na' golle' legake' nan Sáulona' ble'ile' Xancho Jesúza' tneza' ka zeje' yell Damáscona', na' Jesúza' be'lene'ne' dill'. Na' lekzka' golle' legake' bi bllebe' bi'e xtill' Jesúza' yell Damáscona'. 28 Na' ka' gok bigaané' Jerusalénna' goke' txen ben'ka' nonlilall' Jesúza', na' wal inleeb goke' bi'e xtill' Xancho Jesúza'. 29 Na' be'lene' dill' ben' Israelka' chne dill' griegona' kwenche shajle'gake' che Jesúza', per legake' goklall'ligake' witgake'ne'. 30 Na' ka wñezi ben'ka' nonlilall' Jesúza' ba chinogake' Sáulona' kwenche witgake'ne', bche'gake'ne' Cesareana'lə. Na' ka bllingake' na', na' bisel'gake'ne' Társona'lə gana' nak lalle'.

31 Na'ch ben'ka' nonlilall' Jesúza' doxen Judeana', Galileana' na' Samáriana' wzoagake' mbalaz, la' koch no bchi' bsak'ch legake'. Na' wlooshosh yichjgake' toz Chioza'. Na' Espíritu Sántona' goklene' legake' kwenche gokchachgake' lo xnez Chioza' na' kwenche wyanchgake'.

Biyaki beena' le Eneas

32 Do kana', chda Pédrona' chjawie' ben'ka' nonlilall' Jesúza' to to yell, na' lekzka' jawie' ben'ka' lle' yell Lídana'. 33 Na' yell Lídana' jti'e to ben' le' Eneas. Ba gok xon' yiz die' bi chak chase' daa net ni'a neena'. 34 Na' Pédrona' golle'ne':

—Eneas, Jesucrístona' yiyone' li'. Biyas na' bitob daa cho'na'.

Na' lii biyaste Enéaza'. 35 Na' yog' ben'ka' lle' yell Lídana' na' yell Sarónna', ble'gakile' biyaki beena' na' benlilall'gake' Xancho Jesúza'.

Biban Dorcaza' ladj ben' wetka'

³⁶ Na' lekzka' yell Jópena' wzoa to noolə benlilallee Jesúza', na' wlie' Tabita,* na' dill' griegona' che'gake'ne' Dorcas. Na' nooli, shlak wbane' toshiizi bzani ni'a neena' goklene' ben', na' biyesh'lallile' ben'ka' bibi de cheyin. ³⁷ Na' bllin to lla gok Dorcaza' to yillwe' na' wite'. Na'ch biyoll biwazjgake'ne', jadixjgake'ne' loo yoo che'na' lliá shkwiana' cha'lə. ³⁸ Na' Jópena' llian gaozə yell Lídana', na' ben'ka' wnezzgakile' zoa Pédróna' yell Lídana', na'ch bsel'gake' chop ben' jellgake'ne':

—Sho'gach Jópena' naate.

³⁹ Na'ch Pédróna' wzee zejlene' ben'ka' Jópena'. Na' ka blline', na' jwa'gake'ne' loo yooná gana' de ben' weta', na' yog' nool wizebka' wyechjgake' Pédróna' chbellgake', na' bli'gakile'ne' xe'ka' daa ben dii Dorcaza' shlak wbane'. ⁴⁰ Na' Pédróna' bibeje' yog'lolə' chyoolə, na' b'chek' xibe'na' be'lwille' Chioza'. Na'ch bwie' noola' ba wit na' golle'ne':

—Tabita, biyas.

Na'ch lii bixá'te jalao Dorcaza' chwie' Pédróna'. Na'ch biyase' bibi'e. ⁴¹ Na' Pédróna' bexee neena' na' bisolléene'. Na'ch biñie' nool wizebka' na' nochlə ben'ka' nonlilall' Jesúza' kwenche bizoe'ne' shi'a shbane' lawe'ka'. ⁴² Na' wze dill' doxen yell Jópena' ka gok che Dorcaza', na' ben' zan benlilall'gake' Xancho Jesúza'. ⁴³ Na' Pédróna' bigaanə' Jópena' zan lla lill Simónna, beena' chkoll yidxa bayix'ka'.

10*Pédrona' na' Cornéliona'*

¹ Na' yell Cesareana' wzoa to ben' wlie' Cornelio, na' nak lall' nee zan soldadka', na' ben'ka' nak lall' nee wlegake' Ben' Italia. ² Na' Cornéliona' len ben'ka' nakgake' toz loo yoo lille'na' choe'la'ogake' Chioza' na' chall chllebgake'ne'. Na' zoatezi zoe' choe'lwille' Chioza' na' cho'e mech xen kwenche chaklene' ben' Israelka', ben'ka' chyallj chchinin. ³ To lla, do ka chida shon, ble'do'ile' to anjl che Chioza' wyo'e gana' zoe' na' golle'ne':

—¡Cornelio!

⁴ Na' Cornéliona' chwiayenee anjla' do chllebze', na' golle'ne':

—¿Beran cheenilo' ben'do'?

Na' anjla' chi'ene':

—Chioza' chibaile' daa zoatezi zo' choe'lwillo'ne' na' daa chakleno' ben' yesh'ka'. ⁵ Na' naa bsel' ben' shajgake' yell Jópena' kwenche lljxi'gake' beena' le Simón Pedro. ⁶ Zoe' lill to ben' le Simón, beena' chkoll yid, na' lille'na' zoan gaoz cho'a niso'dna'. Na' Simón Pédróna' ine' li' daa chiyal' gono'.

⁷ Na' ka biza' anjla' bshaljlen Cornéliona', na'ch Cornéliona' goxe' chop xmose'na', na' sto soldad, beena' nonlilallee Chioza' na' zoe' chaklene'ne' chgwee xnezi bittez. ⁸ Na' golle' legake' yog' daa goll anjla', na'ch bselee legake' Jópena'.

⁹ Na' betiyo do ka gobill ba zoa illin ben'ka' bsel' Cornéliona' yell Jópena'. Na' ka lo gora', Pédróna' wyepé' koll' yooná gana' zoe' kwenche we'lwille' Chioza'. ¹⁰ Na' wdone', na' goklallee gawe' shel'ka'. Na' shlak chongake' daa gawe', ble'do'ile' ¹¹ byalj yabana', na' to dii nak ka to lech' xen dii nchej tap yichjten chetjan lo yona'. ¹² Na' loo lechaa lle' biya bayix', no ba lliá tap ni'a na'in, na' no ba chxobi leeb lo yona' na' no ba zoa xilin. ¹³ Na'ch benile' shii to ben', chi'ene':

—Wzolla' Pedro. Bet baka', na' wdao.

¹⁴ Na'ch Pédróna' golle'ne':

—Bi gaw' baka', Xan'; ni shlin biñ' gaw' baki bi nak ba xilall'.

¹⁵ Na' sto shii benile' shii beena', chi'ene':

—Daa ba wna Chioza' wak gawo', bich inazo' bi nakan xilall'.

* 9:36 Tabita: dillii nakan dill' arameo.

16 Shon shii golle' ka', na'ch biyep lechaa yabana'. 17 Na' chibani Pédróna' chakile' bera zejín daa ble'do'ile', ka bllin beñ'ka' bsel' Cornéliona' cho'a yooná' gana' zoe', daa ba wñabgake' gan zoa lill beena' le' Simón, beena' chkoll' yid xa bayix'ka'. 18 Na' ka bllingake', na' wñegake' zillj wñabgake' shi nan' zoa to beñ' le Simón Pedro. 19 Na' Pédróna' zie' wñeyi cheyi daa ble'do'ile', kat' wne Espíritu Sántóna', chi'ene':

—Bwiakachi, na' lle' shon beñ' chiyiljgake' li'. 20 Bizolla' na' biyetj, na' wyajlengake'. Bi gakchopilo', la' nadaan bselaa legake'.

21 Na'ch biyetj Pédróna' gana' lle' beñ'ka' bsel' Cornéliona'. Na' chi'e legake':

—Nadaan beena' chiyilje. ¿Beran chak chele zidwiale nad'?

22 Na'ch che' beñ'ka' Pédróna':

—To beñ' wñabia' che soldadka' lie' Cornelio bselee neto'. Nake' to beñ' zej shli lao Chioza' na' ngooshosh yichje'ne', na' yog' beñ' Israelka' ñezgakile' zoe' chone' wen. Na' to anjl che Chioza' golle'ne' inie' li' kwenche shajo' lille'na' wzajniilo'ne' na' wzenague' dill'ka' we'lono'ne'.

23 Na'ch Pédróna' wlo'e legake' loo yoolə gana' zoe', na' bigaangake' shyel. Na' betiyo wyajlen Pédróna' legake' na' len to chop beñ' Jope, beñ' nonlilall' Jesúza'.

24 Na' llana' sto bllingake' Cesareana'. Na' Cornéliona' ba btope' yog'lol dialla che'na' na' beñ'ka' nllaguile', na' ba lle'gake' lille'na' chbezgake' illin Pédróna'. 25 Na' ka bllin Pédróna' lill Cornéliona', lii bchejte Cornéliona' bchek' xibe'na' lawe'na' choe'laweene'.

26 Na' Pédróna' bisolléene', chi'ene':

—Bizolla', bi wchekz' xibo' lawii, la' lekzka' beñ'zə nad'.

27 Na'ch shlak chshaljgake' wyoogake' loo yooná', na' ble'i Pédróna' beñ' zan ba lle'.

28 Na'ch golle' legake':

—Le' nezile ka na ley chento'na', neto' beñ' Israel bi chiyal' gonnto' txen le' bi nakle beñ' Israel, na' ni bi chiyal' sho'nto' loo yoo lill-le. Per Chioza' ba bzajniile' nad' bi chiyal' gakid' zban nottez beñ'. 29 Daan ka bla' beñ'ki chñegake' nad', lii za'tia' bi bchia' dill'. Na' ñaa cheenid' inezid' biche bseloo beñ'ki bidxi'gake' nad'.

30 Na'ch Cornéliona' chi'ene':

—Ba gok tap lla, do ka ñaayen', chida shon, choe'llwill' Chioza' loo lillii kat' ble'id' to beñ' byo zie' lawa' nakwe' to lech' dii chey cheeni'. 31 Na' wne' nad': “Cornelio, Chioza' ba bzenague' daa choe'llwillo'ne', na' lekzka' chle'ile' ka chakleno' beñ' yesh'ka'. 32 Na' bsel' beñ' shajgake' yell Jópena' lljxi'gake' Simón Pédróna' kwenche yide' we'lene' li' dill'. Zoe' lill to beñ' le Simón, beñ' chkoll' yid, na' lill beeni zoan gaoz cho'a niso'na'.” 33 Daan lii bentia' wñeyi bidxi'gake' li', na' choxkeno' ba bido'. Na' ñezkzi Chioza' yog'nto' cheeninto' wzenagnto' yog' cho'a dillaa daa cheenile' ino' neto'.

Be' Pédróna' dill' lill Cornéliona'

34 Na'ch wzolo Pédróna' bi'e dill', chi'e:

—Chakbe'id' ñaa, dii li Chioza' aga nakzi beñ' chakile', 35 san chle'shiile' yog' beñ' lle' gattez yell kon shi chall chllebgake'ne' na' chongake' daa nak shli. 36 Chioza' bselee beñ' wdixje'ile' neto' beñ' Israel dill' wen dill' kob che'na' nan wak yizoalenchone' mbalaz daa bselee Jesucristóna', beena' nak Xan yog'lolcho. 37 Nezkzile kwaslol diika' gok gana' mbani Judeana', daa wzolo gana' mbani Galileana' ka wde wdixje'i dii Juanna' beñ' nan chonan byen yiyaj yilengakile' na' choagake' nis. 38 Nezile Chioza' bi'e Jesús, beñ' Nazareta', yel' wak na' Espíritu Sántóna', na' wda Jesúza' bene' dii wenka' na' biyone' yog' beñ'ka' ntakw nchej dii xiwaa, daa wzoalen Chioza' le'. 39 Neto' choe'nto' dill' che yog'te diika' ben Jesúza' Jerusalénna' na' doxen gana' mbani Judeana'. Na' biyoll bene' diika', betgake'ne' bda'gake'ne' lee yag cruza'. 40 Per Chioza' bisbane'ne' ladj beñ' wetka' biyon llana', na' bidli'lawe' neto'. 41 Aga yog' beñ' bli'lao Jesúza' ka bibane' ladj beñ' wetka', san bli'lawe' toz neto', neto' naknto' beñ' ba wlej Chioza' kwenche we'nto' xtilleena'. Na' neto' weej wdaolennto'ne' ka wde bibane' ladj beñ' wetka'. 42 Na' Jesúza' bselee neto' chixje'into'

ben' nan Chioza' nzoe'ne' kwenche gone' yel' joschis che yog' lol ben', ka ben' mban na' ka ben' ba wit. ⁴³ Na' lekzka' kani'yi yog' dii ben'ka' wdixjee daa goll Chioza' legake' be'gake' xtill' Jesúza', wnagake' Chioza' yizi'xene' saaxya che notteza ben' gonlilallee Jesúza'.

Wyoo Espíritu Sántona' loo yichjall'do' ben'ka' bi nak ben' Israel

⁴⁴ Na' ni chshaljte Pédrona', kat' Espíritu Sántona' wyo'e loo yichjall'do' yog' ben'ka' chzenaggake' xtilleena'. ⁴⁵ Na' ben' Israelka' nonlilall' Jesúza', ben'ka' bllinlen Pédrona' lill Cornéliona', bibangakile' daa wyoo Espíritu Sántona' loo yichjall'do' ben'ka' bi nak ben' Israel. ⁴⁶ Na' bengakile' chne ben'ka' wde wdeli dill' dii bi nombia'gake', choe'la'ogake' Chioza'. ⁴⁷ Na' Pédrona' golle' ben' Israelka' lle' na':

—Aga no gak wllon wchoa ben'ki nisa', la' ba yoo Espíritu Sántona' loo yichjall'do'eka' ka ba yo'e cho'.

⁴⁸ Na' ben Pédrona' mandad wchoagake' nisa' daa chonlilall'gake' Xancho Jesucristona'. Na' biyolla' wñabgakile' Pédrona' kwenche bigaanlene' legake' chop shon lla.

11

Pédrona' golle' ben' Jerusalénka' ka gok

¹ Na' postlka' na' nochlā ben'ka' nonlilall' Jesúza' Judeana' bengakile' nan ben'ka' bi nak ben' Israel lekzka' chajle'gake' cho'a xtill' Chioza'. ² Na' ka billin Pédrona' Jerusalénna' gokdil-len xonj ben' le', ben'ka' che' chonan byen sho' ben' byoka' nonlilall' Chioza' sen daa le circuncisión la'kzi bi nakgake' ben' Israel. ³ Na' gollgake'ne':

—¿Biche wyoozo' loo yoo lill ben'ka' bi nak ben' Israel na' weej wdaolenzgako'ne'?

⁴ Na'ch Pédrona' golle' legake' yog' ka gok, chi'e:

⁵ —Kana' ni zoa yell Jópēna', shlak choe' lwill' Chioza' ble'do'id' to dii nak ka lech' xen, dii nchej tap yichjten, chetjan xan yabana' na' bla'ten gana' zia'. ⁶ Na' ka bwiaýēnaa diika' llia loo lechaa, na' ble'id' lle' bayix' ba zoa tap ni'a na'b, na' no ba zña, no ba chxobi le'in lo yona', na' ba zoa xilin. ⁷ Na' benid' shii to ben' ne' nad': “Wzolla' Pedro, bet baka' na' wdāo.” ⁸ Na' goshee: “Bi, Xan', ni tshii bin' gaw' baki bi nak ba xilall'.” ⁹ Na' sto shii benid' shii beēna' ne' nad': “Daa ba wna Chioza' wak gawo' bich inazo' bi nakan xilall'.” ¹⁰ Gokte shon shii wne ka', na'tech biyep lech' xenna' yabana'. ¹¹ Na' shintg ble'do'id' diika' kat' bidse shonē ben' cho'a yoona' gana' zoa', zaake' yell Cesareana' ziddiljgake' nad'. ¹² Na' Espíritu che Chioza' wne' nad' bi gonchoplallaa sha'len' legake'. Na' lenkz ben' bish'choki xop wza'lengake' nad', na' yog'tento' wyoonto' lill Cornéliona'. ¹³ Na' Cornéliona' bseesile' neto' nan ble'ile' to anjl zie' lille'na'. Na' anjla' golle'ne': “Bsel' to chop ben' yell Jópēna' kwenche lljxi'gake' beēna' le Simón Pedro. ¹⁴ Na' le' ine' li' nakan gono' kwenche yilaleno' ben'ka' lle' loo yoo lillo'na' bi kwiayi'le.” ¹⁵ Na' ka wzoloa' choe'lengakee dill', betj Espíritu Sántona' wyo'e loo yichjall'do'eka', ka bidsoe' loo yichjall'do'choki. ¹⁶ Na'ch jadinid' daa wna Xancho Jesúza' kana' wne': “Dii li Juanna' bchoe' ben' nis, san le', dii zak'chi gak chele, daa yidsoa Espíritu Sántona' loo yichjall'do'lēna'.” ¹⁷ La' Chioza' bene' ka zoa Espíritu Sántona' loo yichjall'do'eka' ka zoe' loo yichjall'do'choki, cho' chonlilall'cho Xancho Jesucristona'. Na' znora nak' nad' wllon' gon Chioza' daa cheenile' gone'?

¹⁸ Na'ch ka biyoll bzenag ben' Jerusalénka' nonlilall' Jesúza' dillaa be' Pédrona', na' wzoagake' llizā, bich bi gollgake'ne'. Na' be'la'ogake' Chioza', che'gake':

—Len ben'ka' bi nak ben' Israel ba be' Chioza' latj yiyaj yilengakile' dii malka' chongake' kwenche gat' yel' mban chegake' zejli kani.

Ben'ka' nonlilall' Jesúza' Antioquíana'

¹⁹ Na' ben' Israelka' nonlilall' Jesúza', ben'ka' bsheshlesgake' ka wde wit dii Estébanna', ba'le' wyaj zit' axt Feníciana', na' zi ba'le' bllin Chíprena' na' ziba'le' bllin yell Antioquíana'. Na' gana' bllin to toe' be'lengake' to ben' wlall' che'ka'z xtill' Jesúza'. ²⁰ Per ba' ben'ka' nak ben' Chipre na' ben' Cirene, ka bllingake' yell Antioquíana', wzologake' be'lengake' ben'

bi nak beṅ' Israel dill' wen dill' kob che Xancho Jesúza'. ²¹ Na' yel' wak che Xanchona' wzoalenan legake', na' beṅ' zan wlej yichjgake' diika' nxenilall'gake' na' beṅlilall'gake' Xancho Jesúza'.

²² Na' beṅ'ka' nonlilall' Jesúza' Jerusalénna', ka wnezgakile' ba nonlilall' beṅ' Antioquíaka' Jesúza', na' bsel'gake' Bernabéna' jawie' legake'. ²³ Na' ka blline' Antioquíana', ble'ile' ba goklenchga Chioza' legake' na' le bibaile'. Na' btipche' lall' beṅ'ka' kwenche soachehgake' gonlilall'gake' Xancho Jesúza' do yichj do lall'gake'. ²⁴ Na' beṅ' zanch beṅlilall'gake' Xancho Jesúza', la' Bernabéna' nake' to beṅ' wen, na' chṅabia' Espíritu Sántona' le', na' le beṅlilalle Chioza'.

²⁵ Na' ka wde, wza' Bernabéna' zeje' Társona' kwenche lljadilje' Sáulona', na' ka billelile'ne' na' bchi'ene' Antioquíana'. ²⁶ Na' wzoalengake' beṅ'ka' nonlilall' Jesúza' Antioquíana' twiz, na' bli' bsedgakile' beṅ' zan. Na' Antioquíana' dii nechdo' bsi'gake' beṅ'ka' nonlilall' Jesucristona' "Cristianos".

²⁷ Na' do kana'kzə, baḷ beṅ'ka' chyixjee daa che' Chioza' legake' wza'gake' Jerusalénna' bllingake' Antioquíana'. ²⁸ Na' wzolla' toe', beena' le Ágabo, na' bi'e dill' ka ba bzajni Espíritu che Chioza' le', na' golle' kwe' to wbin wal doxen yell-lioni. Na' ka' gok kana' chṅabia' beena' le Claudio gana' mbani Rómána'. ²⁹ Na' beṅ' Antioquíaka' nonlilall' Jesúza' be'gake' dill' we'gake' kon ka'k' wej gak we' to toe' kwenche gaklengake' beṅ'ka' nonlilall' Jesúza' gana' mbani Judeana', gana' chi' wbinna'. ³⁰ Na' ka' bengake', na' daa bdox bigox'gake'n Bernabéna' len Sáulona' kwenche jasangake'n lao beṅ'ka' ngoo lall' na' beṅ'ka' nonlilall' Jesúza' Judeana'.

12

Betgake' Jacóbona' na' wloogake' Pédróna' lillyana'

¹ Na' do kana'kzə beṅ' wṅabia' Heródeza' beṅee baḷ beṅ'ka' nonlilall' Jesúza' kwenche wchi' wsakee legake'. ² Na' bchogloe' gueti Jacóbona' yesya, beena' nak beṅ' bish' Juanna'. ³ Na' ka gokbe'ile' bibayi beṅ'ka' chṅabia' beṅ' Israelka' daa bene' ka', na'ch lekzka' beṅee Pédróna' lo lṅi Paskwa' kana' chaogake' yetxtila' daa bi nchix lewadúrana'. ⁴ Na' ka bdolile'ne', wdixje'ne' lillyana' gana' wdap shin'to soldadka' le', na' bene' tap weje' kwenche bibaji ljwellgake' wdapgabe'ne'. Na' gokile' yiyoll lṅi Paskwa' kweje'ne' lao beṅ' yellka' na' wchogloe' che' guete'. ⁵ Shlak nej Pédróna' lillyana', beṅ'ka' nonlilall' Jesúza' toshiizi be'lwilgake' Chioza' ni che'.

Chioza' bibeje' Pédróna' lillyana'

⁶ Na' lle'na' ka wxezə kwej Heródeza'ne' kwenche wchogloe' che' guete', Pédróna' die' chese' ladj chop soldadka', na' nchejgabe'ne' chop gden, na' zi chop soldadka' chapgabe' cho'a lillyana'. ⁷ Na' tokonganzi bllin to anjl che Xancho Chioza' gana' de Pédróna' na' to beeni' xen wyoo loo lillyana'. Na' anjla' wdane' kwit li'ena' bisbane'ne', chi'ene':

—Lobe'te wyas.

Na' katena' biyell gdenka' nchej neena'. ⁸ Na'ch che' anjla'ne':

—Bikaacha li'ona' na' bilej xelo'na'.

Na' ben Pédróna' daa chi'ene', na'ch che' anjla'ne':

—Bixoa kolloo xachelo'na', na' da dino' nad'.

⁹ Na'ch zjano Pédróna' anjla', ni bi nezile' shi ka chakkzan, kon gokile' chle'do'zilen'. ¹⁰ Na' bidegabe' gana' lle' soldadka' shkwen, na' bidetgabe' gana' lle' beṅ'ka' zi shkwen, na' ka bllingake' gana' zoa puert de yana' daa liizelote, to kwinzin byaljan na' bichejgabe'. Na' ka ba biyoogake' neza', bikwaan anjla' toz Pédróna'. ¹¹ Kana'ch gokbe'i Pédróna', na' wne':

—Naach chakbe'id' dii li Chioza' ba bselee anjl che'na' kwenche bisle' nad' lo na' Heródeza', na' bi wtil' daa non beṅ' Israelki lez gak cha'.

¹² Na' ka gokbe'ile' ba bicheje' lillyana', na' ziyaje' lill Maríana' xna' Juanna', beena' nsi'gake' Marcos. Na' lill Maríana' ndop nllag beñ' zan choe'lwillgake' Chioza'. ¹³ Ka blline', na' wñie' cho'a leeja', na' bchej to bi' noolə le Rode, jawiab' no beena' chñe. ¹⁴ Na' ka biyombia'b' shii Pédróna' chibachgaib', na' daa le chibaib' bikz bsalj'. Zigaate jayellb' beñ'ka' lle' loo yoona' ba ze Pédróna' cho'a leeja'. ¹⁵ Na'ch che'gake'b':

—Chakzilo'n.

Na' leb' wzeyidb' che'b' len'. Na' legake' che'gake'b':

—Anjl che'na'ljan.

¹⁶ Na' Pédróna' ni zie' chñie' cho'a leeja'. Na' ka bsaljgake' ble'gakile'ne', bibanchgagakile'. ¹⁷ Na'ch Pédróna' bene' to señ kon neena' kwenche soagake' llizə, na' golle' legake' ka ben Xancho Chioza' bibeje'ne' lillyana'. Na' chi'e legake':

—Li ye' Jacóbona' na' yog' beñ' bish'choka' ka ba ben Xanchona' cha'.

Na'ch bizee ziyaje' gan yoblə.

¹⁸ Na' ka wyeeni', wche' to ye'l' wban xen ladj soldadka' daa bi gokbe'gakile' nak gok bichej Pédróna'. ¹⁹ Na'ch Heródeza' bta bñie' beñ'ka' biyiljgake'ne', na' bi billelgakile'ne'. Na'ch wñabile' soldadka' chap lillyana' nak gok bicheje', na' bikz bi dill' be'gake'. Na'ch bene' mandad betgake' soldadka'. Na' ka wde bene' ka', wzee Judeana' jsoe' Cesareana'.

Ka wit Heródeza'

²⁰ Heródeza' chlllee beñ' Tíroka' na' beñ' Sidónka'. Na' beñ'ki gokgake' toz bshaljlengake' Blástona', to wen llin zakii che Heródeza', na' bengakile'ne' wen kwenche goklene' legake', la' byalljgakile' si'gake' dii yeej gaogake' gana' chñabia' Heródeza'. Na' Blástona' bshaljlene' Heródeza' kwenche wxi'xene' che beñ' Tíroka' na' beñ' Sidónka' na' yizoalene' legake' wen sto shii. ²¹ Na' Heródeza' bllie' bia' batan lljawiagake'ne'. Na' gokwe' xe'na' daa le nak daa chakwe' kat' chli'lawe' lao lkwe' beñ'. Na'ch jshie' gana' chchogloe' che beñ', na' bi'e dill' lao beñ'ka' ndop nllag na'. ²² Na' shlak cho'e dill', na' besyaa beñ'ka' che'gake':

—To chioza'n chñe, aga kontele beñaan.

²³ Na' anjl che Xancho Chioza' lii be'tie' Heródeza' to yillwe' wal benan ka chyin chlall' bel bzog'ka' loo li'ena' na' wite', daa bi'e latj wloo beñ'ka' le' balaan daa chidol' toz beena' nak dowalj Chios.

²⁴ Na' dill' wen che Chioza' zej chlliljchan doxen.

²⁵ Na' Bernabéna' len Sáulona' ka wde bengake' daa chiyal' gongake' Jerusalénna', biza'gake' biyajgake' Antioquíana', na' bche'gake' Juanna', beena' lekzka' nsi'gake' Marcos.

13

Bernabéna' na' Sáulona' je'gake' cho'a xtill' Chioza' yell zit'ka'

¹ Na' ladj beñ'ka' nonlilall' Jesúza' yell Antioquíana' lengake' beñ' chyixjee daa che Chioza' na' beñ' chli' chsedi cho'a xtill' Chioza'. Na' legake' beñ'ki: Bernabéna', Simónna', beena' che'gake' beñ' gasj, Lúciona' beñ' Cirénena', Sáulona' na' Manaénna', beena' bgollen Heródeza' beena' wñabia' gana' mbani Galileana'. ² Na' to shii ka zoagake' wbasaa na' choe'la'ogake' Chioza' wñe Espíritu Sántona' legake', chi'e:

—Li wzoa Bernabéna' na' Sáulona' kwenche gongake' xshin'na', la' ni cheyinnan' ba wlej' legake'.

³ Na' ka wyeelo be'lwillgake' Chioza' na' biyoll wzoagake' wbasaa, na' bxoā neeka' yichj beñ'ka' chop, na'ch bsel'gake' legake' gana' lljengake' xshin Chioza'.

Páblona' na' Bernabéna' be'gake' cho'a xtill' Chioza' gana' le Chipre

⁴ Na'ch Espíritu Sántona' bselee Bernabéna' na' Sáulona' yell Seleúciana' gana' wyoogake' barkwa' kwenche jwaan legake' yell-lío Chíprena' daa llia lo niso'na'. ⁵ Na' ka wlez barkwa' cho'a yell Salamínana', bchejgake' na' wzologake' wdixje'gake' cho'a xtill'

Chioza' to to gana' chdop chllag ben' Israelka' choe'lwillgake' Chioza'. Na' nche'gake' sto ben' le Juan kwenche gaklene' legake'. ⁶ Na' wdegake' to to yellka' llia Chíprena'. Na' ka bllingake' yell Páfoza', na' jadi'gake' to ben' Israel, beena' le Barjesús. Nake' to ben' willa', na' chziyee ben' chi'e nake' to ben' chyixjee daa che' Chioza' le'. ⁷ Na' beeni nllaguile' beena' chñabi'e doxen Chíprena', beena' le' Sergio Paulo. Na' Sergio Paulona' nake' to ben' chajonii, na' goxe' Bernabéna' len Sáulona' kwenche wzajni'gakile'ne' cho'a xtill' Chioza'. ⁸ Na' ben' willa'na', nsi'gake'ne' Elimas (na' zejin ben' willa'), goklallee gone' ka bi shajle' ben' wñabia'na' che cho'a xtill' Chioza'. ⁹ Na'ch Sáulona', beena' lekzka' lie' Pablo, daa chñabia'chga Espíritu Sántona' le', bwiayenee Elímaza', ¹⁰ na' golle'ne':

—Li' ben' wxiye', ben' wen dii mal, xiin dii xiwaan nako' na' chakzbanilo' yog' daa nak dii wen! ¿Biche chshok chlewzo' daa nak dii li che Xancho Chioza'? ¹¹ Na' naa Chioza' wselee yel' zi' cho', gone' ka icholo' na' shloll wen bich ile'ilo' beeni' che wbillá'.

Na' kate golle'ne' ka' lii wchołtie', na' chgan chtobzile' chñabe' no yiyox' neena' daa bich chle'ile'. ¹² Na' ka ble'i ben' wñabia'na' daa gok, na' wyajli'e, na' le bibanile' ka nak cho'a xtill' Xancho Jesúza' daa chli' chsedgakile'ne'.

Páblona' na' Bernabéna' wyajgake' yell Antioquíana' daa llia gana' mbani Pisídiana'

¹³ Na'ch Páblona' na' ben'ka' chdalene' wyoogake' barkwa' yell Páfoza' na' wyajgake' yell Pérgena' daa llia gana' mbani Panfíliana', na' Juan Márcona' bixonje' ziyaje' Jerusalénna'. ¹⁴ Na' Páblona' len ben'ka' chdalene' na', biza'gake' yell Pérgena' na' wyajgake' yell Antioquíana' daa llia gana' mbani Pisídiana'. Na' ka bllin lla sabda', llana' chombaan ben' Israelka', wyajgake' gana' chdop chllaggake' choe'lwillgake' Chioza', na' jche'lengake' ben'ka'. ¹⁵ Na' ka biyoll blabgake' lat' ley che Chioza' na' zi' lat' daa bzej dii ben'ka' wdixjee daa goll Chioza' legake', na'ch ben'ka' chgoo xnezi cheyi diika' chongake' gana' chdop chllaggake' bsel'gake' to ben' gana' chi' Páblona' len Bernabéna' na' golle' legake':

—Le' ben' bish', shi bi dill' de we'lenle ben'ki kwenche wtipch lall'gake', wak we'len naa.

¹⁶ Na'ch wzolla' Páblona' na' blis neena' kwenche kwe'gake' llizə wzenaggake', na' chi'e:

—Le', ben' Israel, na' le' bi nakle ben' Israel choe'la'ole Chioza', li wzenag dga inia':

¹⁷ Chios, beena' nonlilall'cho cho' ben' Israel, wleje' dii xoxxto'choka' na' bene' ka wyangake' shlak wzoagake' Egíptona'. Na' bllin lla bibeje' legake' kon yel' wak che'na'.

¹⁸ Na' wdape' yel' chxenlall' che yel' widenag che'ka' lo choa yiza' wzoagake' latja' gana' bibi chashj chleb. ¹⁹ Na' bliiayee yellka' gall kwen lle' gana' mbani Canaánna' kwenche bi'e dii xoxxto'choka' yell-lío che'ka'. ²⁰ Kan' gok lawi tap guioa yoo gashj yiz. Na'tech, bzoa' Chioza' ben'ka' wloo lall' na'gake' legake', axt nika bllin lla wzoa dii Samuela', beena' wdixjee daa goll Chioza'ne'.

²¹ Na'ch wñabgake' soa to ben' wñabia' kwenche inabi'e legake'. Na' Chioza' bi'e legake' dii Saúla', beena' wñabi'e legake' lo choa yiz. Goke' xiin dii beena' wle Cis, beena' gok xiin dia che dii Benjamínna'.

²² Na' ka bikwas Chioza' yel' wñabia' che dii Saúla', bizoe' dii Davina' inabi'e na' bi'e dill' che', wne': “Davina', xiin Isaína', nake' to ben' chon ka chazlallaa, na' nezid' gone' yog' daa cheenid' gone'.”

²³ Na' lo dia che dii Davina' golj Jesucristona', beena' wlej Chioza' kwenche yisle' cho' ben' Israel lawi dii mala' kon ka' bchebe' gone'. ²⁴ Na' ka zi' solo Jesúza' wli' wsedile' ben', dii Juanna' golle' yog' ben' Israelka' chiyal' yiyaj yilengakile' xtoleeka' na' choagake' nisa'.

²⁵ Na' ka ba zoa yiyoll gon dii Juanna' daa nak lall' nee gone', na' ba zoate illin lla guete', na' wne': “Bi nak' beena' chakile' nak'. Zi' za'lə beena' zak'ch ka nad'. Na' nad' ni bi zaka' g' xmore' kwenche wlechj' xele'na'.”

²⁶ 'Le' ben' bish', le' nakle xiin dia che dii Abrahama', na' le' choe'la'ole Chioza' la'kzi bi nakle ben' Israel, Chioza' ba bselee cho'a xtilleena' laochoni daa cho'en dill' yisle' ben' kwenche bi kwiayi'gake'. ²⁷ Ben' Jerusalénka' na' ben' wñabia' che'ka' bi gokbe'gakile' bsel' Chioza' Jesúza'. Ni bi wyajni'gakile' diika' bzej dii ben'ka' wdixjee

daa goll Chioza' legake' kani'yi, la'kzi chlabgake'n yog' lla sabd gana' chdop chllaggake' choe'llwillgake'ne'. Na' daa wnagake' chiyal' guet Jesúza', billinin daa bzej dii ben'ka' be' dill' daa goll Chioza' legake'. ²⁸ La'kzi bibi dii mal billelgakile' ben Jesúza' dii gonan ka wchoglogake' witgake'ne', wñabgakile' Pilátona' gone' mandad witgake'ne'. ²⁹ Na'ch ka biyoll bengakile'ne' yog' daa nyoj lee cho'a xtill' Chioza' gak che', na'ch biletjgake'ne' lee yag cruza' na' jakwash'gake'ne'. ³⁰ Na' Chioza' bilise'ne' ladj ben' wetka'. ³¹ Na' ka wde bibane', zan lla bli'lawe' ben'ka' wno wnal'gake'ne' dezd ka wzee Galileana' zeje' Jerusalénna'. Na' legaken' choe'lengakee ben' wlall chechoka' xtilleena' naa.

³² 'Na' chyixje'into' le' dill' wen dill' kob che Jesúza' daa bcheb Chioza' lao dii xoxzto'choka'. ³³ Na' naa ba biyoll bido bene' ka bchebe' gone' checho, cho' nakcho xiin dia chegake', daa bisbane' Jesúza' ladj ben' wetka'. Gok ka nyoj Salmo de wchopina', gana' nan: "Lin' nako' Xiin', na' naa, daa solo inabi'o na' inezi ben' nadaan nak' Xo'."

³⁴ Chioza' ba bi'e dill' yilise'ne' ladj ben' wetka' na' bichga guete', na' wne': "Dii li gaklen' le' dii xen wal ka bcheb' lao dii Davina'." ³⁵ Na' lekzka' sto Salmo nan: "Bi wi'o latj gooll' iteb beli chen cha'ni, daa nak' lall' no'." ³⁶ Na' nezicho dii Davina' goklene' dii xoxzto'choka' kon ka bllia Chioza' bi'a gone', na' ka bllin lla wite' jakwash'gake'ne' gana' bkwash'gake' dii xoxztoe'ka', na' gooll' bteb beli chen che'na'. ³⁷ Per kwerp che Jesúza', beena' bisban Chioza' ladj ben' wetka', bi wlliyi'n. ³⁸ Le' ben' bish', chyixje'into' le' Chioza' chizi'xene' xtol' nottez ben' chonlilallee Jesúza'. ³⁹ Nottez ben' gonlilalleene' yiyake' ben' li ben' shao' lao Chioza'. Aga no yiyak ben' li ben' shao' lao Chioza' daa chone' daa na ley che dii Moiséza'. ⁴⁰ Na' li wsak' kwenche ki gak chele ka bzej dii ben'ka' be' dill' daa goll Chioza' legake' kani'yi, gana' nan:

⁴¹ Li wwia, le' ben' wenle. Li yibani.

Wllin lla kwiayi'le daa bi chajle'le.

Llaki mbanle gon' to dii wal

dii bi shajle'le la'kzi shi no ina le' ki gak.

⁴² Na' ka bichejlen Páblona' ben'ka' nakgake'ne' txen gana' chdop chllag ben' Israelka', na'ch ben'ka' bi nak ben' Israel wñabgakile'ne' we'lene' legake' cho'a xtill' Chioza' lla sabda' sto. ⁴³ Na' ka billeshgake', zan ben' Israelka', na' zan ben'ka' chongake' legake' txen choe'la'ogake' Chioza', janogake' Páblona' len Bernabéna'. Na' Páblona' len Bernabéna' gollgake' legake' chiyal' soachechgake' gonlilall'gake' Chioza' daa le chakile' legake'.

⁴⁴ Na' ka bizoa xmanna' sto, llana' chombaan ben' Israelka', zi lat'z ki biya ben'ka' lle' yella' bdop kwenche wzenaggake' cho'a xtill' Chioza'. ⁴⁵ Na' ka ble'i ben' Israelka' ben' zan ndop nllag, na' gokxe'gakile' Páblona' na' wnegake' zban che dillaa cho'e, na' biya dii wnagake' che'. ⁴⁶ Na'ch Páblona' len Bernabéna' aga bllebgake', na' gollgake' ben' Israelka':

—Benan byen zigaate le' wzajniinto' cho'a xtill' Chioza'. Per daa bi cheenile wzenaglen, chli'le bi chidol'le gon Chioza' yel' mban chele zejli kani, na' solochoklanto' naa wzajniinto'n ben'ka' bi nak ben' Israel. ⁴⁷ La' dgan non Xancho Chioza' mandad gonnto', na' ne':

Ba bzoa' li' kwenche gono' ka sho' beeni' cha'na' loo yichjlall'do' ben'ka' bi nak ben' Israel. Na' yoo ben'ka' lle' doxen yell-lioni ka gongake' kwenche yilagake' na' bi kwiayi'gake'.

⁴⁸ Na' ben'ka' bi nak ben' Israel, ka bengakile' daa wna Páblona' len Bernabéna', le bibagakile' na' wnagake' le mba nak cho'a xtill' Chioza'. Na' yog' ben'ka' ba wlej Chioza' kwenche gat' yel' mban chegake' zejli kani benlilall'gake' Jesúza'. ⁴⁹ Ka' gok blilij cho'a xtill' Xancho Jesúza' doxen na'. ⁵⁰ Na' ben' Israelka', ben'ka' bi wyajle'gake' che Jesúza', wlooyel'gake' bal' noolə wnia'ka', ben'ka' choe'la'o Chioza', na' ben' byoka' le zeyi cheyin yella' kwenche bengakile' Páblona' na' Bernabéna' zban, na' bilaggake' legake' yell che'ka'.

⁵¹ Na'ch Páblona' len Bernabéna' ka biza'gake' wllib ni'eka' bishte che yella' daa bi goklall'

ben'ka' lle' na' wzenaggake' che Chioza'. Na' wyajgake' yell Icóniona'. ⁵² Na' ben'ka' nonlilall' Jesúza' wzoachgagake' mbalaz, na' Espíritu Sántona' wñabi'e loo yichjlall'do'eka'.

14

Bllin Páblona' len Bernabéna' Icóniona'

¹ Na' ka bllin Páblona' len Bernabéna' Icóniona', wyajgake' gana' chdop chllag ben' Israelka' choe'lwillgake' Chioza'. Na' Chioza' goklene' legake' ka be'gake' cho'a xtilleena' kwenche ben' zan benlilall'gake' Jesúza', ka ben' Israel na' ka ben' bi nak ben' Israel. ² Na' ben' Israelka', ben'ka' bi goni shajle' che Jesúza', wlooyel'gake' bal ben'ka' bi nak ben' Israel kwenche gokzbangakile' ben'ka' nonlilall' Jesúza'. ³ Daan bigaan Páblona' len Bernabéna' Icóniona' ssha, na' be'gake' xtill' Xancho Jesúza' na' bi bllebgake', la' nxenilall'gake' zوالen Xancho Chioza' legake'. Na' Xanchona' goklene' legake' bli'gake' yel' wak che'na' kwenche gokbe'i ben' nan choe'gake' dill' li. ⁴ Na' ben' Icónioka' gokgake' chopla, bale' wda'gake' ben' Israelka' na' zi bale' wda'gake' Páblona' len Bernabéna'. ⁵ Na'ch ben' Israelka' bengake' txen ben'ka' bi nak ben' Israel na' gokgake' toz len ben' wñabia'ka', goklall'gake' yiya dii gongakile' Páblona' len Bernabéna' na' wlligake' legake' yaj. ⁶ Na' ka wñezi Páblona' len Bernabéna' ka ba chwia ben'ka' gongakile' legake', lii biza'tegake', wyajgake' yell Lístrana' na' yell Dérbena', yellka' lliá gana' mbani Licaóniana'. ⁷ Na' lekzka' be'gake' dill' wen dill' kob che Jesúza' na'.

Blligake' Páblona' yaj yell Lístrana'

⁸ Na' Lístrana' jadi'gake' to ben' nxinj ni'ena' ka goljtie'. Na' bi chak see daa bi chzoa chech ni'ena'. ⁹ Na' chi'e chzenague' dillaa choe' Páblona'. Na' Páblona' chwie'ne' na' gokbe'ile' chajli'e wak yiyon Chioza' le' kwenche gak see. ¹⁰ Na'ch golle'ne' zillj: —Wzolla'.

Na' lii wzolla'tie' na' gok wzee. ¹¹ Ka ble'i ben' Lístraka' daa ben Páblona', wzolo chosyaagake' chnegake' xtilleeka' daa nak dill' Licaonia che'gake':

—iBa betj chios chechoka' gani zoacho na' chle'gakichone' ka benech!

¹² Na' wñagake' Bernabéna' nake' chios che'ka' beena' nsi'gake' Júpiter, na' Páblona' nake' chios che'ka' beena' nsi'gake' Mercurio, la' len' cho'e dillaa. ¹³ Na' bxoz che yoodo' che Júpitera', daa zoa katez choogake' yella', jwee goonka' na' nwa'lee legakb bga de yej, na' le', na' ben'ka' ndop nllag na', goklall'gake' witgake' legakb kwenche we'la'ogake' Páblona' len Bernabéna'. ¹⁴ Na' ka gokbe'i Bernabéna' len Páblona' bin gon ben'ka', na' wzologake' bchez' xe'ka', la' chakgakile' dii mal nleban chon ben'ka'. Na' jsedogake' ladje'ka', na' wñegake' zillj, che'gake':

¹⁵ —Le' ben'do', ¿berache chonzle ka'? Lekzka' ben' yell-lioz neto', ka le', na' ba bidnto' kwenche wzajniinto' le' chiyal' kweyjichjle diiki bibi zak' na' gonlilall'le Chios, ben' yaa ben' banna', beena' ben yabana', yell-lioni, na' niso'dna', na' yog' dii de xan yabana', lo yell-lioni, na' loo niso'dna'. ¹⁶ Kani'yi Chioza' bwialoze' che benecha' bengake' kon daa nazan chegake'. ¹⁷ Na' la'kzi bwialoze' ka bengake', bliile' legake' yel' wak che'na' kwenche ka' gakbe'gakile' zoe'. La' len' chone' yeja' kwenche chak dii chaz chaancho na' chat' dii cheej chaocho kwenche soacho mbalaz.

¹⁸ Na' la'kzi Páblona' len Bernabéna' gollgake' ka', kani goongakile' bi witgake' goonka' daa nan we'la'ogake' legake'.

¹⁹ Na' bllin bal ben' Israelka' zaak Antioquíana' na' Icóniona', na' wlooyel'gake' ben' Lístraka' kwenche blligake' Páblona' yaja'. Na' daa gokgakile' ba witen', na'ch bxobgake'ne' jadixjgake'ne' cho'a yella'te. ²⁰ Na' ben'ka' nonlilall' Jesúza' bdi'a bllaggake' gana' de Páblona', na' biyase' biyo'e yella' sto shii. Na' betiyo bizee len Bernabéna' na' wyajgake' yell Dérbena'.

²¹ Na' lekzka' wdixjeegake' dill' wen dill' kob che Jesúza' yell Dérbena', na' ben' zan benlilall'gake' Jesúza'. Na'tech, biza'gake' bidegake' yell Lístrana', Icóniona' na'ch

Antioquíana'. ²² Na' to to yellka' gana' bidegake' btipgake' lall' beñ'ka' ba chajle' che Jesúza' kwenche soachehgake' gonlilall'chgake'ne'. Na' gollgake' chiya' yizo yizakicho bittez dii yen ile'icho kwenche gak lljazoalenchó Chioza' gana' chñabi'e. ²³ Na' to to yellka' wlejgake' to chop beñ' koo lall' na'gake' beñ'ka' ba nonlilall'gake' Jesúza'. Na' wzoagake' wbas' be'lwilgake' Chioza', na'ch bengake' legake' lall' na' Xancho Jesúza', beena' nonlilall'gake'.

Páblona' len Bernabéna' biyajgake' yell Antioquíana' daa llia gana' mbani Síriana'

²⁴ Na' wde Páblona' len Bernabéna' gana' mbani Pisídiana' na' bllingake' gana' mbani Panfíliana'. ²⁵ Na' be'gake' cho'a xtil' Chioza' yell Pérgena'. Na'ch biza'gake' ziyajgake' yell Atáliana'. ²⁶ Na' yell Atáliana' biyoogake' to loo barkw na' billingake' yell Antioquíana' gana' lle' beñ'ka' bengake' legake' lo na' Chioza' kana' bsel'gake' legake' lljengake' llinna' daa ba biyoll jengake'. ²⁷ Na' ka billingake' yell Antioquíana', btopgake' beñ'ka' nonlilall' Jesúza', na' gollgake' yog' daa goklen Chioza' legake' to to yellka'. Na' lekzka' gollgake' ka ben Chioza' bi'e latj che beñ'ka' bi nak beñ' Israel kwenche benlilall'gake' Jesúza'. ²⁸ Na' Páblona' len Bernabéna' bigaangake' ssha yell Antioquíana' len beñ'ka' nonlilall' Jesúza'.

15

Bidopgake' Jerusalénna' na' be'gake' dill'

¹ Shlak zoa Páblona' len Bernabéna' yell Antioquíana', bllin bal beñ' za' Judeana' na' wzologake' bli' bsdgakile' beñ'ka' nonlilall' Jesúza' nan chiya' gongake' ka na ley che dii Moiséza' na' sho'gake' señ daa le circuncisión kwenche Chioza' wi'e yel' mban chegake' zejli kani. ² Na' Páblona' len Bernabéna' gokdil-lengake' beñ' Judeaka'. Na' daa gok ka', beñ' Antioquíaka' bengake' toz dill' wsel'gake' Páblona' len Bernabéna' na' sto chop beñ' yell Jerusalénna' kwenche llje'lengake' postlka' dill' len beñ'ka' ngoo lall' na'gake' beñ'ka' nonlilall' Jesúza' Jerusalénna', cheyi daa chli' chsedi beñ' Judeaka' bllin Antioquíana'.

³ Na' wloogake' nez kon ka goll beñ'ka' nonlilall' Jesúza' Antioquíana', na' lo ka zejgake' wdegake' gana' mbani Feníciana' na' gana' mbani Samáriana', na' gollgake' beñ'ka' nonlilall' Jesúza' ka ba wyanchga beñ'ka' bi nak beñ' Israel ba yoogake' lo xnez Chioza'. Na' ka beni beñ'ki dga, le bibagakile'.

⁴ Ka bllin beñ'ki Jerusalénna', beñ'ka' nonlilall' Jesúza' len beñ'ka' ngoo lall' na' legake' na' postlka' blebgake' legake'. Na' Páblona' len Bernabéna' gollgake' legake' yog' daa ba goklen Chioza' legake' jengake'. ⁵ Na' bal fariseoka' nonlilall' Jesúza' wzolla'gake' na' wnagake':

—Beñ'ka' bi nak beñ' Israel chonan byen sho'gake' señ daa le circuncisión ka solo gonlilall'gake' Jesúza', na' chiya' gongake' ka na ley che dii Moiséza'.

⁶ Na' bdop bllag postlka' len beñ'ka' ngoo lall' na'gake' beñ'ka' nonlilall' Jesúza' kwenche wwiagake' naklā ka sho' xnezi dga. ⁷ Ba gok ssha chdil cho'a xtilleeka' ka wzolla' Pédróna' na' golle' legake':

—Le', beñ' bishaa, ba nezczile kana' wlej Chioza' nad' ladjleni kwenche llji'a dill' wen dill' kob che Jesúza' lao beñ'ka' bi nak beñ' Israel kwenche gonlilall'gake'ne'. ⁸ Chioza', beena' nombi'e yichjlall'do' yog' beñ', bli'e nan chlebe' beñ'ka' bi nak beñ' Israel daa bselee Espíritu Sántóna' zoe' loo yichjlall'do'eka' kon ka bene' checho. ⁹ Toz ka ba ben Chioza' checho na' che beñ'ka', la' lekzka' ba biyib bixise' loo yichjlall'do'eka' daa ba nonlilall'gake' Jesúza'. ¹⁰ Na' ¿berache bi chajle'le daa ba ben Chioza'?, na' ¿biche cheenile gon beñ'ka' bi nak beñ' Israel diiki? La' ni cho' ni dii xozxto'choka' bin' sakicho gonchon. ¹¹ Lete chajle'cho daa chaki Xancho Jesúza' chon' ba bisle' cho', na' ka'kz legake'.

¹² Na' yoguee wzoagake' llizə bzenaggake' shlak Páblona' len Bernabéna' be'gake' dill' ka ben Chioza' goklene' legake' bengake' yel' wakka' ladj beñ'ka' bi nak beñ' Israel. ¹³ Na' ka biyoll be' Páblona' len Bernabéna' dill', na'ch wne Jacóbona', golle':

—Le' ben' bish', cheenid' wzenagle dga inia' le': ¹⁴ Simón Pédróni ba bi'e dill' ka wzolo Chioza' wleje' ben' ladj ben'ka' bi nak ben' Israel kwenche gakgake' lall' nee. ¹⁵ Na' dga gok ka' chidil'-lebin daa bzej dii ben'ka' wdixjee daa goll Chioza' legake' kani'yi, gana' nan:

¹⁶ Ka te dga, yiyed'

na' wzoa' to xiin dia che dii Davina' inabi'e.

La'kzi yel' wñabia' che'na' nakan ka to yoo dii ba biyinj, wllin lla yichisa'n.

¹⁷ Gon' dga kwenche yog' ben'ka' bin' gonlilall'gake' nad' yiyiljgake' nad', lente yog'lol ben'ka' bi nak ben' Israel, ben'ka' ba nak lall' na'.

¹⁸ Kan' wna Xancho Chioza', beena' bzajniile' ben'ka' diiki kani'teyi.

¹⁹ Na'chan nia' le', bi chiyal' ye'cho ben'ka' bi nak ben' Israel, ben'ka' ba nonlilall'gake' Chioza', gongake' dii bi chonan byen. ²⁰ Kon wzejcho to yish ye'chogake' bich gaogake' yel' wawa' daa chllia ben' lao lwaa lsak' chios che'ka', na' bi gaogake' bel' che bayix'ka' bi wlalj xchema', na' ni bi gaogake' xchen bayix'ka'. Na' lekzka' bi inelenzgake' xiin xool ben'.

²¹ La' kani'teyi zoakzə ben' to to yell chzajni'gakile' ben' ley che dii Moiséza', na' lennan' ni chlabgake' ñaa gana' chdop chllaggake' choe'llwillgake' Chioza' yog' lla sabd.

Yisha' daa bsel'gake' lao ben'ka' bi nak ben' Israel

²² Na'ch postlka', na' yog' ben'ka' nonlilall' Jesúza' len ben'ka' ngoo lall' na' legake' bengake' toz dill' wlejjgake' to chop ben' ladjeka' kwenche shajlengake' Páblona' len Bernabéna' Antioquíana'. Na' wlejjgake' Judas, beena' lekzka' lie' Barsabás, na' Sílaza', nakgake' ben' mbejlawin ladj ben'ka' nonlilall' Jesúza'. ²³ Na' bsel'lengake' ben'ki to yish dii bzejgake', na' ki choe'n dill':

“Le' ben' bish' na' le' ben' zannto', le' bi nakle ben' Israel na' zoale yell Antioquíana', na' doxen gana' mbani Síriana' na' Cilíciana', neto' postl na' ben'ki ngoo lall' na' ben'ka' nonlilall' Jesúza' Jerusalénni, na' yog' ben' bish'choki lle' ni, chwapnto' le' chiox. ²⁴ Ba wnezinto' ba bchej to chop ben' ladjnto'ni bidgake' to bia'lall'zgake' gana' zoale, na' benllejjgakile' le' daa wnagake' chiyal' sho'le sen daa le circuncisión, na' chiyal' gonle doxen ka na leya'. ²⁵ Daan, ba bennto' toz dill' wlejnto' ben'ki chop ladjnto'ni zidwiagake' le'. Na' chsel'lennto' legake' Pábloni na' Bernabéni, ben' bish'choki le' chakicho, ²⁶ ben'ki chzoa dii nxoll yel' mban che'ka' daa chongake' xshin Xancho Jesucristona'. ²⁷ Na' chsel'nto' ben'ki le' Judas na' Silas, na' legake' wzajni'gakile' le' dga chzejnto' le'. ²⁸ Na' wyazlall'nto' ka bzajni Espíritu Sántona' neto' bi wzoanto' le' gonle dii bi yizoile. Diikizə chakinto' chonan byen bi gonle: ²⁹ Bi gaole yel' wawa' daa chllia ben' lao lwaa lsak' chios che'ka', na' ni bi gaole bel' che bayix'ka' shi bi wlalj xchema', ni bi gaole xchen bayix'ka', na' lekzka' bi inelenzle xiin xool ben'. Shi wzenagle diiki nannto' le', wenkzan chonle. Ka'tz nak dill'ki chzejnto' le'.”

³⁰ Na'ch ka bllin ben'ka' bsel'gake' Antioquíana', na' btopgake' yog' ben'ka' nonlilall' Jesúza', na' be'gake' legake' yisha' daa nox'gake'. ³¹ Na' ka blabgake'n le' bibagakile' ka dillaa choe'n. ³² Na' ka nak Júdaza' na' Sílaza', daa lekzka' nakgake' ben' chyixjee daa che' Chioza' legake' be'gake' dill' zan dii btipan lall'gake' na' goklenan legake' wzoatip wzoashoshchgake'. ³³ Na' biyoll wzoalengake' legake' shloll wen, na'ch ben'ka' nonlilall' Jesúza' Antioquíana' mbalaz bilaagake' legake' dill' na' biyajgake' kwit ben'ka' bsel' legake'. ³⁴ Na' Sílaza' wyazlallee igaane' na'z. ³⁵ Páblona' na' Bernabéna' bigaangake' Antioquíana'. Na' len zan ben' yoblə bli' bsdchgakile' ben' cho'a xtill' Xancho Jesúza'.

Sto shii wyaj Páblona' yellka' gana' ba ji'e cho'a xtill' Chioza'

³⁶ Na' ba gok zan lla zoagake' Antioquíana' ka goll Páblona' Bernabéna':

—Shajcho dii yoblə yellka' gana' ba je'cho cho'a xtill' Xancho Jesúza' kwenche lljawia-cho nak chak che ben'ka' ba wyajle'.

³⁷ Na' Bernabéna' goklallee w̄che'gake' Juan, beena' lekzka' nsi'gake' Marcos. ³⁸ Na' bi gooni Páblona' w̄che'gake'ne', la' kana' b̄che'gake'ne' bixonje' na' bkwaane' legake' Panfílana', na' bich jenlene' legake' xshin Chioza'. ³⁹ Na' ni cheyin, gokguedgake' na' wlaagake'. Bernabéna' wzee b̄chi'e Márcona' na' wyoogake' to loo barkw na' wyajgake' Chíprena'. ⁴⁰ Na' Páblona' wzee b̄chi'e Sílaza'. Na' ben'ka' lle' Antioquíana', ben'ka' nonlilall' Jesúza', w̄nabgakile' Xancho Chioza' gaklene' legake' gattezə shajgake'. ⁴¹ Na' Páblona' len Sílaza' wdegake' gana' mbani Síriana' na' Cilíciana' kwenche goklengake' ben'ka' nonlilall' Jesúza' wzoatip wzoashoshchgake'.

16

Timotewa' bene' txen Páblona' len Sílaza'

¹ Na'ch Páblona' len Sílaza' bllingake' yell Dérbena', na'tech wyajgake' yell Lístrana'. Na' na' zoa to bi' xkwid' nonlilall'b' Jesúza' leb' Timoteo. Nakb' xiin to noolə Israel, na' nooli nonlilallee Jesúza', per xabaa nake' ben' griego. ² Na' ben' Lístraka' len ben' Icónioka' nonlilall' Jesúza' be'gake' dill' le wen nsa' cheb'. ³ Na' Páblona' w̄nabile'b' shajlem' legake', na' wlo'eb' seŋ daa le circunciación kwenche bi gakzbani ben' Israelka' leb', la' nezgakile' xabaa bi nake' ben' Israel. ⁴ Na' yog' yellka' gana' wdegake' be'lengake' ben'ka' nonlilall' Jesúza' dill' che diika' chiyal' gongake', diika' be' postlka' dill' kon ben'ka' ngoo lall' na'gake' ben'ka' nonlilall' Jesúza' yell Jerusalénna'. ⁵ Na'ch ben'ka' nonlilall' Jesúza' yellka' benlilall'chgake'ne' do yichj do lall'gake', na' lla kon lla wyanchgake'.

Ble'do'i Páblona' to ben' Macedonia ch̄nabile'ne' shaje' lalle'na'

⁶ Páblona' len Sílaza' na' Timotewa' to wdegake' gana' mbani Frígiana' len Galáciana', daa bi be' Espíritu Sántona' latj llje'gake' cho'a xtill' Chioza' gana' mbani Ásiana'. ⁷ Na' ka bllingake' gaoz yell-lio gana' le Misia, wnalall'gake' shajgake' gana' mbani Bitíniana', na' lekzka' bi be' Espíritu Sántona' latj shajgake' na'. ⁸ Na'ch wdegake' yell-lio che Mísiana' bllintegake' yell Tróaza' daa llia cho'a niso'dna'. ⁹ Na' lo yela' Chioza' bene' ka ble'do'i Páblona' to ben' byo, ben' Macedonia, zie' chat'yoile'ne', chi'ene': “Dagach Macedóniani kwenche gakleno' neto'.” ¹⁰ Na' ka biyoll ble'do'i Páblona', lii bsini'ate chento' kwenche wyajnto' Macedóniana', la' wyajniinto' Chioza' cheenile' shajnto' llje'lennto' ben'ka' lle' na' dill' wen dill' kob che Jesúza'.

Páblona' na' Sílaza' wyajgake' Filípoza'

¹¹ Na' yell Tróaza' wyoonto' barkwa' na' wyajnto' sh̄l̄icha gana' llia to yell-lio lo niso'dna' daa le Samotracia. Na' betiyo bllinnto' to yell dii le Neápolis. ¹² Na' wza'nto' Neápoliza' wyajnto' yell Filípoza'. Nakan to yell ga lle' ben' Rómaka', na' nakan to yell xen dii zakii gana' mbani Macedóniana'. Na' bigaannto' na' chop shoŋ lla. ¹³ Na' shlak zoanto' na', lla sabda' bchejnto' yella' na' wyajnto' to cho'a yao ga chje'lwillgake' Chioza'. Na' jche'nto' na', be'lennto' dill' noolka' bdop bllag. ¹⁴ Na' ladj noolka' len to ben' le Lidia. Nake' ben' yell Tiatira, na' chitee lech' wen dii nak de morad. Na' choe'lawee Chioza' na' Xancho Chioza' bene' kwenche bzenague' dillaa choe' Páblona'. ¹⁵ Na' ka wde wchoe' nisa' do bxooŋe', na' wne' neto':

—Shi chakile dii li ba nonlilallaa Xancho Jesúza', li sho' na' yigaaŋle lillaa.

Na' bene' byen jagaannto' lille'na'.

¹⁶ Na' to shii ka zejnto' gana' choe'lwillgake' Chioza', na' billagnto' to bi' nool wew' yoob' dii xiwaa, na' dii xiwaa chonan kwenche ch̄neyaab'. Na' nakb' to bi' ndoo lla yel chom' xshin ben', na' dii xen chon xama' gan daa ch̄neyaab'. ¹⁷ Na'ch bi'ni wnob' Páblona' shlak zejlennto'ne', chosyaab' zillj, nab':

—Ben'kin chongake' xshin Chioza', beena' nak ben' choo ben' xen, na' chzajni'gakile' ben' nez li che Chioza' gana' sho'cho kwenche bi kwiaiy'cho.

¹⁸ Na'ch kon ka' wñab' yog' lla, na' gokzedi Páblona', na'ch biyechje', golle' dii xiwaa yoob':

—Kon yel' wñabia' che Jesucristona' nia' li' bichej.

Na' lii bichejte dii xiwaa.

¹⁹ Na' ka gokbe'i xam'ka' bich bi mech gongake' gan, na'ch bex'gake' Páblona' len Síłaza' na' jwa'gake' legake' lao joschiska'. ²⁰ Na' ka bllinlengake' legake' lao joschiska', na' che'gake':

—Ben' Israelki chta chnegake' ben', lallchoni. ²¹ Na' chli' chsedgakile' ben' dii bi chiyał' goncho ni bi chiyał' wlebcho, cho' nakcho ben' Roma.

²² Na' ben' zan bdi'a na' wñegake' zban che Páblona' len Síłaza'. Na'ch joschiska' bchogbia'gake' wdingake' xe'ka' na' bet wdingake' legake'. ²³ Na' ka wde bet wdinchgagake' legake', na' wloogake' legake' lillyana', na' gollgake' beena' chap lillyana' gape' legake' byendad kwenche ki yilagake'. ²⁴ Na' daa gollgake' beeni ka', wlo'e legake' bill' xyoote na' bñi'e yen ni'eka' to lee kwag' dii nyidjgake'.

²⁵ Na' do ka chel Páblona' len Síłaza' choe'łwillgake' Chioza' na' cholgake' choe'la'ogake'ne', na' ben'ka' sto de lillyana' chzenaggake' ka chongake'. ²⁶ Na' tokonganzi wde to bedxo' xen wal na' bñiban doxen lillyana'. Na' lii byaljten, na' gdenka' diika' nchejgake' ben'ka' de lillyana' tolazzin biyellgakan. ²⁷ Na' beena' chap lillyana' bibane' na' ble'ile' ba nyaljchee lillyana', na'ch wleje' spad che'na' nan yiyit kwine' daa gokile' yog' ben'ka' de lillyana' ba billeshgake'. ²⁸ Na' Páblona' besyee, golle'ne':

—¿Bibi goni kwino'! Nikz lle' yog'nto'.

²⁹ Na'ch beena' chap lillyana' wñabe' to yi' na' wyoodoe' jawie' gana' yoo Páblona' len Síłaza', na' lii bchek'te xibe'na' lawe'ka' do chxizze' daa le bblebe'. ³⁰ Na' lii bibejtie' legake' lillyana', na' chi'e:

—¿Le', ben'do', beran chiyał' gon' kwenche bi kwiayaa?

³¹ Na' gollgake'ne':

—Ben'łilalloo Xancho Jesucristona', li' na' do xiin xoolo', kwenche yisle' le' na' bi kwiayi'le.

³² Na' be'lengake' le' na' ben'ka' zoa lille'na' cho'a xtill' Xancho Jesúza'. ³³ Na'ch beena' chap lillyana' wdibe' we'na' lliagake', la'kzi nakan wal chel. Na' lekzka' yog'lołtie' lii wchoategake' nisa'. ³⁴ Na' bichi'e Páblona' len Síłaza' lille'na' na' bweej bwawe' legake'. Na' le chibayi beeni do xiin xoolo' daa ba non'łilall'gake' Chioza'.

³⁵ Na' ka wyeeni', joschiska' bsel'gake' ben' jellgake' beena' chap lillyana' yisane' legake' kwenche yiyajgake'. ³⁶ Na' beena' chap lillyana' golle' Páblona':

—Ba bsel' joschiska' ben'ki, na' nagake' ba de lsens yisan' le'. Na' wak yiyajle naa, kochno bi goni le'.

³⁷ Na' Páblona' golle' legake':

—Neto' ndento' kwent yell Rómana', na' ni bi biyiljni'agake' bin bennto' ba bet wdingake' neto' lao lkwe' ben' na' wdixjzgake' neto' lillyani. ¿Ana' naa cheenzgakile' yisangake' neto' do ngash'zə? Yidch kwingake' yibejgake' neto'.

³⁸ Na' jayellgake' joschiska' daa goll Páblona' legake', na' joschiska' le bblebgake' ka wñezgakile' Páblona' len Síłaza' ndegake' kwent ka ben' Roma. ³⁹ Na'ch wyaj joschiska' jaye'xengake' Páblona' len Síłaza' na' bibejgake' legake' lillyana', na' got'yogakile' legake' bich yigaangake' yella'. ⁴⁰ Na' ka bichej Páblona' len Síłaza' lillyana', na' biyajgake' lill Lidiana' jawiagake' ben'ka' ba non'łilall' Jesúza' na' btipchgake' lall'gake', na'tech biza'gake'.

17

Bta bñe ben' malka' ben' Tesalónicaka'

¹ Na' ka biza' Páblona' len Sílaža', wdegake' yell Anfípoliza' na' yell Apolóniana', na' bllingake' yell Tesalónicana' gana' zoa yooná' gana' chdop chllag beṅ' Israelka' choe'lwíllgake' Chioža'. ² Na' lo shoṅ xman yog' lla sabdka' wyaj Páblona' gana' chdop chllaggake', kon ka yooloe' chone', na' be'lene' legake' Cho'a Xtill' Chioža', ³ bzajniile' legake' Crístona', beena' wlej Chioža' inabi'e, benan byen biya dii wxak'zi'e na' wite', na' bibane' ladj beṅ' wetka'. Na' chi'e legake':

—Jesúža', beena' choe'len' le' xtilleena' naa, len' Crístona', beena' wlej Chioža' inabi'e.

⁴ Na' baḷ beṅ' Israelka' wyajle'gake' na' bengake' txen Páblona' len Sílaža', na' lekzka' zan beṅ' griegoka', beṅ'ka' ba choe'la'ogake' Chioža', wyajle'gake' che Jesúža', na' lekzka' zan noolka' zakii. ⁵ Na' beṅ' Israelka' bi wyajle', gokxe'gakile' Páblona' len Sílaža', na' btopgake' beṅ' wdallagka' nak beṅ' mal, na' wlekgake' to dii zed yella'. Na'ch wyajgake' lill beena' le Jasón jadiljgake' Páblona' len Sílaža' kwenche gongake' legake' lo na' beṅ' yellka'. ⁶ Na' daa bi zoa Páblona' len Sílaža' na', na'ch wdoyogake' Jasónna' na' zi to chop beṅ'ka' nonlilall' Jesúža' na' jwa'gake' legake' lao joschiska'. Na' wnegake' zillj che'gake':

—Beṅ'ka' chda chbekgake' dii zed doxen yell-lioni ba bla'gake' yell chechoni. ⁷ Na' Jasónni ba blebze' legake' lille'na'. Na' ba nakgake' toz bich chzenaggake' daa nllia Césara' bia' goncho, la' nagake' zoa sto beṅ' wṅabia' le Jesús.

⁸ Na' beṅ' yellka' len joschis che'ka' bllaagake' na' goklesh'gakile'. ⁹ Na' wxenlall' joschiska' bllia Jasónna' mech len beṅ'ka' nakgake'ne' txen, na'ch bisangake' legake'.

Páblona' len Sílaža' wyajgake' Bereana'

¹⁰ Na' kon ka goḷ, beṅ'ka' nonlilall' Jesúža' bisa'dogake' Páblona' len Sílaža' kwenche yiyajgake' yell Bereana'. Na' ka bllingake' yella', lii wyajtegake' gana' chdop chllag beṅ' Israelka' choe'lwíllgake' Chioža'. ¹¹ Na' beṅ' Bereaka' nakchgake' beṅ' wench aga ka beṅ' Tesalónicaka', na' bibagakile' bzenaggake' daa bzajni Páblona' len Sílaža' legake'. Na' yog' lla biyiljgake' lee Cho'a Xtill' Chioža' shi nakan ka daa chli' chsedgakile' legake'. ¹² Na' zan beṅ' Israelka' zoa na' benlilall'gake' Jesúža' na' ka'kzə zan beṅ' griegoka', ka beṅ' byoka' na' ka noolka' zakii. ¹³ Na'ch beṅ' Israelka' lle' Tesalónicana', beṅ'ka' bi benlilall' Jesúža', ka wnezgakile' Páblona' choe'lene' beṅ' Bereaka' xtill' Chioža', na'ch wyajgake' jata janegake' beṅ' yellka'. ¹⁴ Na' beṅ'ka' nonlilall' Jesúža' lii bseḷ'tegake' Páblona' cho'a nisdo'nalə, na' Sílaža' len Timotewa' bigaangake' Bereana'zə. ¹⁵ Na' beṅ'ka' zejlen Páblona' jwa'gake'ne' gana' lliate yell Aténaza'. Na' ka zi yiza'gake' yiyajgake' Bereana', Páblona' golle' legake' ye'gake' Sílaža' len Timotewa' wtalall'gake' shajgake' gana' zoe'.

Páblona' zoe' yell Aténaza'

¹⁶ Na' shlak chbez Páblona' Sílaža' len Timotewa' yell Aténaza', le bllaa yichje' daa ble'ile' to ni to na' nzoa beṅ' Aténaska' diika' choe'la'ogake'. ¹⁷ Ni cheyi daan bzajniile' beṅ' Israelka' gana' chdop chllaggake' choe'lwíllgake' Chioža', na' len zi xoṅj beṅ' griego. Na' lekzka' yog' lla wyaje' gana' chak yaana' gana' lle' lla' beṅ' na' be'lene' legake' dill'. ¹⁸ Na' baḷ epicúreoka', beṅ'ka' chsedgake' daa bli' bsemi beena' wle Epicúreo, len baḷ estóicoka', wzologake' wdil xtilleeka' len Páblona'. Na' bale' che':

—¿Beran naz beeni chshaljchgue'?

Na' zi bale' nagake':

—¿Aaga beenin zidye'lene' cho' dilla daa nan chiyaḷ' we'la'ocho sto chios yoblə?

Wnagake' ka' daa chyixje'i Páblona' legake' dill' wen dill' kob che Jesúža', chi'e legake' bibane' ladj beṅ' wetka'. ¹⁹ Na'ch bche'gake' Páblona' to latj gana' nsi'gake' Areópago ga chdopgake' choe'gake' dill', na' ka bllinlengake'ne', che'gake':

—Cheeninto' inezinto' bi dii koban chli' chsedilo'. ²⁰ La' ndantekzi nak dill'ki choo, na' cheeninto' inezinto' bi zejin.

²¹ La' yog' beṅ' Aténaska' na' lekzka' beṅ' zit'ka' zoa na', bichkzə bilə chongake', to chinozgake' bi dill' kob wzenaggake' na' to xtillii daazə choe'gake' yog' lla.

²² Na'ch Páblona' wzie' ladje'ka' gana' nzi' Areópago, na' golle' legake':

—Le' ben' Atenas, chakbe'id' le chibaile choe'la'ole diika' noni chios chele. ²³ La' ba ble'id' yell cheleni to to latj gana' chgoole diika' balaan, na' ble'id' to ga da' to dill' dii na: “Che Chios, beena' kono nombia'.” Na' beena' chgoole balaan la'kzi bi nombia'lene', dill' che'nan' zidye'len' le' naa.

²⁴ Chios, beena' ben yell-lioni na' yog' dii de lawinna' nake' Xan yabana' na' yell-lioni. Aga zoe' loo yoodo' dii choni ni'a na' ben'. ²⁵ Na' aga bi chyallji Chioza' dii inacho gak gon ben' yell-liona' che'. La' len' non'e' yel' mban che yog'lolcho, na' non'e' bishbe checho, na' yog' bi dii de checho.

²⁶ Len' bxe bsile' to ben' yell-lion, na' yog'lolcho cho' nakcho xiin dia che beena' bxe bsile', na' le'kze' ba nllie' bia' bal yiz soacho yell-lioni na' gana' soa to tocho. ²⁷ Na' bzoe' cho' yell-lioni kwenche yiyiljcho nakan goncho gombia'chone'. Na' dii li gal' gllin zelen Chioza' to tocho, ²⁸ la' len' chone' ka mbancho na' ka chzo chdacho. Kan' bzej bal ben' sin' cheleka', ben'ka' wngake': “Nakcho xiin Chioza'.” ²⁹ Na' daa nakcho xiin Chioza', bi chiyal' gakicho nake' to ben' de or, de plat, de yaj, de yag, ka chaljlall' ben'ka' chongake' diiki. ³⁰ Kana'teyi Chioza' bwialoze' ben ben'ka' daa nazan chegake' yel' bi chajni che'ka', per naanlla chone' byen yog'lol ben' lle' doxen yell-lioni yiyaj yilengakile'. ³¹ La' Chioza' ba bllie' bia' to lla gone' yel' joschis che to to ben' lle' yell-lioni, na' gone' che to toe' kon ka chidolee. Na' ba bliile' cho' beena' wleje' gon yel' joschisa' daa bilise'ne' ladj ben' wetka'.

³² Na' ka bengakile' wna Páblona' Chioza' chisbane' ben' ladj ben' wetka', bale' bxillgake', na' zi bale' gollgake'ne':

—Sto llagalə wzenagnto' cho' cheyi dga choo dill'.

³³ Na' biza' Páblona' gana' lle' ben'ka'. ³⁴ Na' bal ben' bengake'ne' txen na' benlilall'gake' Jesúza'. Na' ladje'ka' len to ben' lie' Dionisio, beena' len ben'ka' zakii chdop latja' nzi' Areópago, na' lekzka' sto noolə lie' Dámaris, na' sto chop ben' yoblə.

18

Biyaj Páblona' yell Coríntona'

¹ Ka wde biza' Páblona' yell Aténaza', na' biyaje' yell Coríntona'. ² Na' ka billine' Coríntona' billague' to ben' Israel lie' Aquila. Na' beeni nake' ben' yell Ponto na' nool che'na' lie' Priscila. Zi' bllinzgake' Coríntona' biza'gake' gana' mbani Itáliana', la' Claudiona', ben' wñabia'na', bisheshe' yog' ben' Israelka' Rómána' gana' zoe'. Na' Páblona' jawie' legake', ³ na' daa nlangake' toz ka llin, bigaanlene' legake', na' wdiagake' yid xa bayix'ka' daa chchingake' lwaa yoo. ⁴ Na' yog' lla sabd, Páblona' chaje' gana' chdop chllag ben' Israelka' choe'lwillgake' Chioza', na' chzajniile' ben'ka' lle' na' xtill' Jesúza', ka ben' Israel na' ka ben' bi nak ben' Israel.

⁵ Na' Silaza' len Timotewa' biza'gake' Macedóniana' na' bllingake' gana' zoa Páblona'. Na' daa bllingake', bich bi llin yoblə ben Páblona', san toz xshin Chioza' bene' na' bzajniile' ben' Israelka' nan Jesúza' nake' Crístona', beena' wlej Chioza' inabi'e. ⁶ Per wzololəgake' chakdil-lengake'ne' na' wnegake' zban che', na' wllib xalaane'na' lawe'ka' kwenche bli'e nan chbejyichje' legake', na' golle':

—Le'zkan wlliyi' kwinle. Aga bi dol' gap' nad'. Na' naa lljali' lljasedid' ben'ka' bi nak ben' Israel.

⁷ Na'ch bizee kwite'ka' na' biyaje' lill to ben' le Justo, beena' choe'la'o Chioza', na' zoa lille'na' gao gana' chdop chllag ben' Israelka' choe'lwillgake' Chioza'. ⁸ Na' to ben' le Crispo ngoo lall' nee chgwee xnezi cheyi diika' chon ben' Israelka' gana' chdop chllaggake', na' do xiin xoole' wyajle'gake' che Xancho Jesúza'. Na' ben' zanch ben' Coríntoka', ka bengakile' xtill' Chioza' daa be'len Páblona' legake', wyajle'gake' na' wchoagake' nisa'.

⁹ Na'ch to lle' bli'lao Xancho Jesúza' Páblona', na' golle'ne':

—Bi illebo'. Be'ch xtilaana' lao beṅ'ki na' bi so' llizə. ¹⁰ Nad' zoalen' li', na' bi wi'a latj no bi goni li', la' beṅ' zan zi' gombia'gake' nad' yelli.

¹¹ Na' bigaan Páblona' Coríntona' twiz yoo gashj bli' bsedile' beṅ' cho'a xtil' Chioza'.

¹² Na' kana' chṅabia' beena' le Galión gana' mbani Acáyana', beṅ' Israelka' gokgake' toz beṅ'gake' Páblona' na' bche'gake'ne' gana' chon Galiónna' yel' joschisa'. ¹³ Na' che'gake' Galiónna':

—Beeni chde' chgooyee beṅ' kwenche we'la'ogake' Chioza' nlla'lə aga ka na ley che Rómána' daa chṅabia' cho'.

¹⁴ Ka nan ine Páblona', lii wṅete Galiónna' beṅ' Israelka', chi'e:

—Ka nak dga chaole xya, shi bi dol' nap beeni wa shi bi xya wal bene', wak gon' yel' joschis chelena'. ¹⁵ San shi chaole xya che dill' daa cho'e, na' daa chzetje' le beṅ', na' che ley chelena', bi nakan ka dii gon' yel' joschis cheyin. Le'zə, li wwia naklə gonlen.

¹⁶ Na' bibeje' legake' gana' chone' yel' joschisa'. ¹⁷ Na'ch yog' beṅ' griegoka' beṅ'gake' Sósteneza', beena' chgoo xṅezin cheyi diika' chon beṅ' Israelka' gana' chdop chllaggake' choe'lwilgake' Chioza', betsodgake'ne'. Na' chwiazə Galiónna' bikzə bi golle' legake'.

Páblona' biyaje' yell Antioquíana'

¹⁸ Ka wde gok ka', Páblona' bigaanche' sshach Coríntona'. Na'ch bilee dill' beṅ'ka' nonlilall' Jesúza' na' bizee kwenche shaje' gana' mbani Síriana'. Na' Priscílana' len Aquílana' zejlengake'ne'. Na' ka zi' sho'gake' loo barkwa' yiza'gake' yell Cencreana', Páblona' bshib yichje'na' kon ka nchebe' gone' lao Chioza'. ¹⁹ Ka bllingake' yell Éfesona', Páblona' bikwaanze' Priscílana' len Aquílana', na' wzee wyaje' gana' chdop chllag beṅ' Israelka' choe'lwilgake' Chioza' na' be'lene' beṅ'ka' dill'. ²⁰ Na' beṅ'ka' ndop nllag na', wṅabgakile' Páblona' yigaanlenche' legake', na' Páblona' bi goonile'. ²¹ Na'ch chi'e legake':

—Chonan byen yiyaa Jerusalénna' kat' gal' lnina' daa za', na' widchkz' yidwia' le' shi Chioza' wi'e latj.

Na'ch bizee Éfesona' biyo'e to loo barkw. ²² Na' ka betje' barkwa' Cesareana', wyaje' Jerusalénna' jawape' chiox beṅ'ka' nonlilall' Jesúza'. Na' bizee biyaje' Antioquíana'. ²³ Na' bigaane' shloll, na'tech wzee wyaje' sto shii to to yell gana' mbani Galáciana' na' Frígiana' jatipche' lall' beṅ'ka' nonlilall' Jesúza'.

Apóloza' bi'e xtil' Chioza' Éfesona'

²⁴ Na' do kana' bllin to beṅ' Israel Éfesona' lie' Apolos, beṅ' golj yell Alejandríana'. Na' chak cho'e dill' lao lkwe' beṅ', na' le nsede' Cho'a Xtil' Chioza'. ²⁵ Apóloza' nsede' che Xancho Jesúza', na' do yichj do lallee cho'e dill' che' kon ga zeelo nezile', per zeelo nezile' daa bli' bsemi Juanna' che daa chchoa beṅ' nisa'. ²⁶ Na' Apóloza' bi bllebe' bi'e dill' che Jesúza' gana' chdop chllag beṅ' Israelka' choe'lwilgake' Chioza'. Na' ka beni Priscílana' len Aquílana' ka chli' chsemi Apóloza', na'ch biche'gake'ne' kwenche bzajni'chgakile'ne' kwaslöl ka nak xṅez Chioza'. ²⁷ Ka goki Apóloza' shaje' gana' mbani Acáyana', beṅ'ka' nonlilall' Jesúza' btipgake' lallee na' bzejgake' to yish dii bexee che beṅ'ka' nonlilall' Jesúza' na', kwenche wlebgake'ne'. Na' ka blline', le goklene' beṅ'ka' ba biyesh'lallii Chioza' kwenche nonlilall'gake' Jesúza'. ²⁸ Na' bli' bsemi beṅ' nan klelan chajni beṅ' Israelka' che Jesúza'. Na' bibi gok yee beṅ' Israelka' daa bliile' legake' to to gana' nyoj Cho'a Xtil' Chioza' daa na Jesúza' nake' Crístona', beena' wsel' Chioza' inabi'e.

19

Ka wzoa Páblona' Éfesona'

¹ Na' shlak wzoa Apóloza' Coríntona', Páblona' wdie' to to yellka' llia ladj yaa yaoka' gana' mbani Galáciana' na' Ásiana', na' bllintie' Éfesona' gana' jadi'e baḷ beṅ' ba nonlilall' Jesúza'.

² Na' wṅabile' legake', chi'e:

—¿Azidsoa Espíritu Sántona' loo yichjlall'do'lena' ka wzolole chonlilall'le Jesúza'?

Na' beñ'ka' gollgake'ne':

—Ni bi nezinto' shi zoa Espíritu Sántona' beena' no' ka'.

³ Na'ch Páblona' wizñabile' legake':

—¿Bin wyajniile ka wchoale nisa'?

Na' che'gake'ne':

—Kon ka bzajni dii Juanna'.

⁴ Na'ch goll Páblona' legake':

—Dii Juanna' bzajniile' beñ' chiyal' choagake' nisa' daa wli'n ba biyaj bilengakile' na' lekzka' golle' legake' chiyal' gonlilall'gake' beena' zi' yid, na' len' Jesúza', beena' wlej Chioza' inabi'e.

⁵ Na' ka bengakile' daa goll Páblona' legake', na' wchoagake' nisa' daa chonlilall'gake' Xancho Jesúza'. ⁶ Na' ka bxoá na' Páblona' yichje'ka', Espíritu Sántona' wyo'e loo yichjlall'do'eka' na' wnegake' wde wdeli dill' na' lekzka' wdixje'gake' dill' daa goll Chioza' legake'. ⁷ Na' beñ'ki gok cheyin ka' nakgake' ka do shlin.

⁸ Na' wzoa Páblona' Éfesona' shon beo' bli' bsdile' beñ' Israelka' gana' chdop chllagake' choe'llwillgake' Chioza' na' bi bllebe'. Na' be'lenche' beñ'ka' dill' kwenche wyajni'gakile' ka chñabia' Chioza' loo yichjlall'do' beñ'ka' nonlilall'gake'ne'. ⁹ Na' bal beñ'ka' nak beñ' lall'do' wal aga goongakile' shajle'gake', na' biya dii wngake' lao lkwe' beñ' che nez li nez shao' che Jesucristona'. Na'ch biza' Páblona' kwite'ka', na' bichi'e beñ'ka' ba nonlilall' Jesúza', wyajlene' legake' lill to beñ' le Tirano dii nak ka yoo skwel gana' chdi'a beñ', na' bli' bsdchile' legake' yog' lla. ¹⁰ Gokte chop yiz bli' bsdile' legake', na' yog'lol beñ'ka' lle' doxen Ásiana' bengakile' xtill' Xancho Jesúza', ka beñ' Israel ka beñ' griego. ¹¹ Na' Chioza' bchine' Páblona' kwenche bene' yel' wak xen dii benan ka bibanchgayi beñ'. ¹² Na' axt no bachyichj, no lech' chjatigake'ne' na' chiyox'gake'n ga de beñ' bi shao' na' chiyakgakile', na' lekzka' chichej dii xiwaa yoo beñ'.

¹³ Na' bal beñ' Israelka' chdagake' to to yell chibejgake' dii xiw'ka' yoo beñ', na' chakgakile' wchingake' le Xancho Jesúza' kwenche yibejgake'n. Na' che'gake'n:

—Kon yel' wak che Jesúza', beena' choe' Páblona' xtilleena', nannto' le', li yichej.

¹⁴ Ka' ben gall xiin to beñ' Israel le Esceva, beena' nak to wñabia' che bxozka'. ¹⁵ Na' ka nan yibejgake' dii xiwaa, na' gollan legake':

—Nombi'a Jesúza', na' lekzka' Páblona', per le', bi nezid' no le'.

¹⁶ Na'ch beena' yoo dii xiwaa bxitee bnize' legake', na' bchezee xalaane'ka' na' bene' legake' zi' axt bllie' legake' we' na' gal'yid gal'bel'zgake' bixonjgake' lille'na'. ¹⁷ Na' yog' beñ'ka' zoa Éfesona', ka beñ' Israel ka beñ' bi nak beñ' Israel, wnezgakile' ka gok che beñ'ka', na' le bllebgake' na' wloochgake' Xancho Jesúza' balaan.

¹⁸ Na' zan beñ'ka' ba nonlilall'gake' Jesúza' jaxoadol'gake' lao lkwe' beñ' ka nak dii malka' ba bengake'. ¹⁹ Na' zan beñ'ka' blan yel' willa'na' jwa'gake' libr che'ka' daa bsdgake' na' bzeygake'n lao yog' beñ'ka'. Na' bengake' kwent ka'k' zak' librka' bzeygake', na' bllinan ka do shiyona mil mech plat. ²⁰ Ka' gok blliljch xtill' Xancho Jesúza' na' beñ' zanch benlilall'gake'ne' daa gokbe'gakile' xtill' Chioza' nsa'n yel' wak xen.

²¹ Na' ka wde gok yog' diiki, Páblona' bchoglallee shaje' lljawie' beñ'ka' lle' yellka' lla Macedóniana' na' Acáyana', na'tech yiyaje' Jerusalénna'. Na' lekzka' golle': "Ka yiyoll yiyaa Jerusalénna' chiyal' shaa Rómána'." ²² Na'ch bselee Timotewa' na' Erástoná' Macedóniana', beñ'ki chop chaklengake'ne', na' le' bigaane' Ásiana' zi' shloll wen.

Bta bñe Demétriona' beñ' Éfesoka'

²³ Na' got' to dii zed wal Éfesona' daa chli' chsedi Páblona' che nez li nez shao' che Jesucristona'. ²⁴ Na' beena' wlek dii zeda' lie' Demetrio, na' noni xshine' chone' de plat lwaa lsak' yoodo' che xnax Dianana', beena' noni chios chegake'. Na' dii xen chone' gan

cheyin len ben'ka' chonlengake'ne' llinna'. ²⁵ Na' btope' ben'ka' chonlene' llinna' na' yog' ben'ka' nlangake' llin ka daa, golle' legake':

—Nezile llin dga nlancho dii xen chkwaanān checho. ²⁶ Na' ba chen chle'ile ka chon beena' le Pablo, chde' chzajniile' ben' wllall chechoki na' doxen gani mbani Ásiani, chi'e aga bi zakii lwaa lsak' dii chon ben' kwenche we'la'ozgake'n. Na' ben' zan ba chzenaggake' che'. ²⁷ Na' nxoll bich too diiki choncho, na' lekzka' nxoll bich seyī che yoodo' gana' zoa xnax Diana chechona', beena' nak ben' choo ben' xen. Na' beeni choe'la'o yog'zə ben' lle' gani mbani Ásiani na' ben' lle' doxen yell-lioni, gongakile'ne' ka to ben' bibi zakii.

²⁸ Ka goll Demétriona' legake' ka', le bllaagake' na' besyaagake', nagake':

—jBen' choo ben' xen nak xnax Diana chechona', cho' ben' Éfeso!

²⁹ Na' yog'lóle' gokgake' toz, wlekgake' dii lchix wal yella', na' bex'gake' chop ben' Macedonia, toe' le Gayo, na' stoe' le Aristarco, ben'ka' zejlen Páblona'. Na' wdoyogake' legake' bllinlentegake' legake' gana' chidopgake' choe'gake' dill'. ³⁰ Na' Páblona' gokile' sho'e ladj ben'ka' ndop nllag na' kwenche nan we'lene' legake' dill', per ben'ka' nonlilall' Jesúza' aga be'gake' latj sho'e. ³¹ Na' lekzka' ladj joschis che ben' Ásiaka' len ben' nllagui Páblona', na' bsel'gake' rson, che'gake'ne':

—Ben goklen, bi shoo gana' lle' ben'ka'.

³² Na' ben'ka' ndop nllag na' chosyaagake', wde wdeli dii na to toe'. Na' zan ben'ka' len ladje'ka' ni bi nezgakile' biche lle'z'gake' na'. ³³ Na' bal' ben' Israelka' bllig'gake' Alejándrona' lao ben'ka' kwenche wi'e dill' lawe'ka'. Na'ch Alejándrona' blis neena' kwenche soagake' llizə na' wzenaggake' daa yee legake'. ³⁴ Na' ka ble'gakile'ne' na' gokbe'gakile' nan ben' Israelan, na'ch bizologake' chosyaagake', nagake':

—jBen' choo ben' xen nak xnax Diana chechona', cho' ben' Éfeso!

Ka do chop gor besyaagake' che'gake' ka'.

³⁵ Na'ch beena' nak sikriban che yella' bzoe' legake' llizə. Na'ch golle' legake':

—Le' ben' wllall, yog' ben' yell-lío nezgakile' cho' ben' Éfeso chido'l'cho gap wwiacho yoodo' che xnax Diana chechona', beena' nak ben' choo ben' xen. Na' nezgakile' lwaa lsakeena' za'n yabalə, ³⁶ na' ni to kono gak ina aga kan' nakan. Na' li soa llizə kwenche bi gonle to dii bi chiya'l' gonle. ³⁷ Ka nak ben'ki ba bidwa'le ni, bi inacho ba wlangake' bi de loo yoodo' chechona', ni bi inacho ba wnegake' zban che xnax Diana chechona'. ³⁸ Na' shi Demétrioni na' ben'ka' chonlengake'ne' llinna' de dii chak chegake' kon nottezə ben', daan chi' ben'ka' chchoglogake' che ben' na' wak shajgake' lawe'ka' kwenche gongake' yel' joschis che'ka'. ³⁹ Na' shi bichlə dii cheenile gak, chiya'l' yitopcho yog'lol' ben' yell na' we'chon dill'. ⁴⁰ La' ka nak dga gok naa, nxoll ina ben' to cho'zan chta chnecho ben' yell, na' ɔbera inacho shi ba chnabgakile' cho' che dga ba gok naa?

⁴¹ Ka wde golle' legake' ka', na' bisheshe' legake'.

20

Biyaj Páblona' Macedóniana' na' Gréciana'

¹ Na' ka bibe'lli daa ben ben' Éfesoka', na'ch gox Páblona' ben'ka' nonlilall' Jesúza' na' be'lene' legake' to chop dill' dii gaklenan legake' na' wdele' to togake', na' bilee legake' dill'. Na' bizee zjade' gana' mbani Macedóniana'. ² Na' bidie' to to yellka' llia Macedóniana' na' be'lene' ben'ka' nonlilall' Jesúza' zan dill' dii btipan lall'gake'. Na' biyolla' billine' Gréciana', ³ na' shon beo' wzoe' na'. Na' ba zoa yiyo'e loo barkwa' kwenche yiyaje' gana' mbani Síriana', ka wnezile' ba chino ben' Israelka' le'. Na' bchoglallee bigwee nez kon ni'aze ziyaje' Macedóniana'lə. ⁴ Na' ben' zan zejlengake' Páblona' Ásiana'. Ladje'ka' len Sópatera' xiin Pírrona', ben' Bereana'; na' Aristárcona' len Segúndona', ben' Tesalónicaka'; na' Gáyona', ben' Dərbena'; Timotewa', na'ch Tíquiconā' len Trófimona', ben' Ásiaka'. ⁵ Na'

yog' ben'ki wllialogake' laonto'na', na' wlezgake' neto' yell Tróaza'. ⁶ Na' ka wde lñi Paskwa' kat' chaogake' yetxtila' daa bi nchix lewadúrana', na'ch biza'nto' yell Filípoza' biyoonto' to loo barkw. Na' ka gok to xman biza'nto' na' billinnto' yell Tróaza' gana' ba chbez ben'ka' neto'. Na' wzoanto' na' gall lla.

Billin Páblona' yell Tróaza'

⁷ Na' ka bllin lla dmiwa', lla nech che xmanna', bdop bllagnto' weej wdaonto' txen len ben'ka' nonlilall' Jesúza', na' Páblona' bli' bsdile' legake'. Na' daa ba nakan yizee yetiyo, ax̄t chelch wyeelo be'lene' legake' dill'. ⁸ Na' ndop nllagnto' to loo yoo dii llia shkwiā cha'lə, na' nakan bido yi'zi. ⁹ Na' to bi' wew' lliab' cho'a ventanna', na' leb' Eutico. Na' daa bshaljlen Páblona' ben'ka' ssha, beḡ'kza bishgala' leb' na' bxopb' cho'a ventan che yoo de shon kwiana' gana' lliab', na' ka bilisgake'b' ba witb'. ¹⁰ Na'ch biyetj Páblona', na' ka blline' gana' jadixjgake'b' bchekee wdele'b'. Na' golle' ben'ka':

—Bi illeble; mbankzba'n.

¹¹ Na'ch biyep Páblona' dii yoblə, bxoxje' yetxtila' na' wdaogake'n. Na'tech bizoloe' choe'lene' legake' dill' ni ka wyeeni'teyi. Na'ch bizee. ¹² Na' ka billesh ben'ka', chibagakile' biche'gake' bi' wewaa shi'a shbam'.

Biza' Páblona' Tróaza'

¹³ Na'ch neto' bibialonto' biyoonto' to loo barkw wyajnto' yell Asónna' gana' yillagnto' Páblona' ka bgaannto' dill', na' bigwee nez ni'aze'. ¹⁴ Na' ka billagnto' Páblona' Asónna', na' biyoolene' neto' loo barkwa' na' wyajnto' yella' le Mitilene. ¹⁵ Na'ch biza'nto' Mitilénena', na' betiyo bidento' gaozə yell-lio Quíona' daa llia lo nido'na'. Na' gok lillj billinnto' yell-lio Sámoza' daa llia lo nido'na', na' llana' sto wyajchnto' yell Milétona'. ¹⁶ Ka' bennto', la' Páblona' bi goonile' shajchnto' Éfesona' kwenche bi sha'ile' Ásiana', daa ba chakbyenile' yilline' Jerusalénna' daa ba zoa gal' lñi Pentecostéza'.

Billag Páblona' ben'ka' ngoo lo na'gake' ben'ka' nonlilall' Jesúza' Éfesona'

¹⁷ Na' ka zoanto' Milétona', Páblona' bselee rson na' goxe' ben'ka' ngoo lo na'gake' ben'ka' nonlilall' Jesúza' Éfesona'. ¹⁸ Na' ka bllingake', goll Páblona' legake':

—Le' nezile nak bsa' cha' dezd nechte ka wzoalen' le' Ásiani. ¹⁹ Ba wzoa' ba ben' xshin Chioza' do yichj do lallaa, na' zan shii gokyeshid' na' wchell', na' biya dii ben ble'id' daa bchi' bsak' ben' Israelka' nad'. ²⁰ Na' aga ni che ka' bsan' bich wnia' le' daa chiyal' inezile, san bli' bsdchkzid' le' gana' chdop chllagle na' ka'kzə lill to tole. ²¹ Ka ben' Israel ka ben' bi nak ben' Israel, be'lengakee dill' nan chiyal' yiyaj yilengakile' che dii malka' chongake' lao Chioza' na' gonlilall'gake' Xancho Jesucristona'. ²² Na' naa, Espíritu che Chioza' chone' byen yiyaa Jerusalénna', na' bi nezid' bi gak cha' na'. ²³ Zeelo dii nezid', Espíritu Sántona' ne' nad' to to yell gana' tia' gataa lillya na' biya dii gak cha'. ²⁴ Na' aga bi chakid' cheyi diika' gak cha', la' aga llialo yel' mban cha'ni, san lliarote yiyoll gon' yog'lol' daa ben Xancho Jesúza' lo na' gon', la' len' wleje' nad' kwenche chixji'a dill' wen dill' kob che Chioza' daa chakile' cho'.

²⁵ Na' ba bzajniid' le' ka chon Chioza' chnabi'e loo yichjlall'do' ben' chonlilalleene', na' naa ni stole le' bich ile'ile nad' yell-lioni. ²⁶ Daan nia' le' naa, aga bi dol' nap' shi nole kwiayi'. ²⁷ La' ba bzajniid' le' yog' daa cheeni Chioza'. Bibi bkwashaa dii inacho bi wnia' le'. ²⁸ Na' li wsak', li gap wwia ben'ka' nakle txen, la' Espíritu Sántona' wleje' le' kwenche gap wwiale ben'ka' nonlilall' Xancho Jesúza', ben'ka' biya'o bizi'lene' xchene'na' daa blalje' lee yag cruza'. ²⁹ La' nezid' kat' bich soalen' le' na' yid ben' gonllejgakile' le' kwenche kwej yichjle daa nonlilall'le Jesúza'. Gongake' ka ba zña, ba chjatao xil'do' che ben'. ³⁰ Na' ladjlena' ichej ben' wli' wsdile' le' daa bi nak shli kwenche gonlene' txen. ³¹ Na' li wsak' kwenche kono siye' le'. Na' li lljadini ka ben' lo shon yiza' wzoalen' le', la' ka tella ka wal' got'yoid' to tole kwenche wzenagle che Chioza', na' ax̄t wchell' ni chele.

³² Na' naa, chon' le' lo na' Chioza' len cho'a xtilleena' daa na le chakile' cho'. La' lennan' napan yel' wak kwenche gaklenan le' soachehle gonlilall'lene'. Na' ka' lljazoalenlene' txen len yog' beñ' nakgake' lall' nee. ³³ Nezkzile bibin' selallaa chele, ni xmechle, ni xalaanle, ni bichlæ dii napple. ³⁴ Na' nezkzile ni'a na'ni benlen' llin kwenche bllleid' bi dii byalljlenid' beñ'ki chonlengake' nad' xshin Chioza'. ³⁵ Ben' llinna' kwenche bliid' le' ka chiyal' gaklencho beñ' kat' bi chyalljgakile'. La' chiyal' lljadinicho xtill' Xancho Jesús'a kana' wne': "Mbalazch soacho shi we'cho beñ' bi we'chone', aga ka daa ikaacho bi dii gone' cho'."

³⁶ Na' ka biyoll be'len Páblona' legake' dill', na'ch bchek' xibe'ka' be'llwillgake' Chioza'. ³⁷ Na' yog'gake' wchell, na' wdel'gake' Páblona' na' bnopgake'ne'. ³⁸ Na' le nyesh' wzoagake' daa goll Páblona' legake' bich ile'i ljwellgake'. Na' jasangake'ne' gana' biyo'e barkwa'.

21

Biyaj Páblona' Jerusalénna'

¹ Na' ka bilaanto' beñ' Éfesoka', na'ch biyoonto' loo barkwa' ziyajnto' shlich'a yell-lio Coza' daa llia lo nido'na', na' betiyo billinnto' yell-lio Ródaza' daa llia lo nido'na', na' biza'nto' billinnto' yell Pátarana'. ² Na' ka billinnto' Pátarana' ble'into' to barkw dii shaj gana' mbani Feníciana', na' biyoonto'n. ³ Na' ka zejnto' loo barkwa' ble'into' yell-lio Chíprena' daa llia lo nido'na' na' to wdeznto' shlaana'læ zejnto' yell Tírona' daa llia gana' mbani Síriana'. Na' ka billin barkwa' Tírona', biłetjgake' yoa'na' noa'n na' biyetjnto'. ⁴ Na' jadiljnto' beñ'ka' nonlilall' Jesús'a na' bigaanlennto' legake' to xman. Na' Espíritu Sántona' golle' legake' bi chiyal' yiyaj Páblona' Jerusalénna'. ⁵ Na' ka gok to xman biza'nto'. Na' yog' beñ'ka' ba nonlilall' Jesús'a yell Tírona', do xiin xoolgake', wza'lengake' neto' cho'a yella'. Na' ka bllinnto' cho'a nido'na', bchek' xibnto' be'llwillnto' Chioza'. ⁶ Na'ch bilaa ljwellnto' dill', na' biyoonto' loo barkwa', na' beñ'ka' biyajgake' lill che chegake'.

⁷ Na' biza'nto' Tírona' billinnto' yell Tolemáidana', na' bwapnto' chiox beñ'ka' nonlilall' Jesús'a na', na' bigaanlennto' legake' shlla. ⁸ Na' betiyo biza'nto' Tolemáidana' na' billinnto' yell Cesareana'. Na' wyajnto' lill Felípena' beena' choe' dill' wen dill' kob che Crístona', na' nake' txen beñ'ka' gall chaklengake' postlka', na' bigaannto' lille'na'. ⁹ Na' zoa tap bi' nool wew' che', na' chyixje'gakb' daa che' Chioza' legakb'. ¹⁰ Na' ka ba gok shon tap lla zoanto' lille'na', na' bla' to beñ' Judea lie' Ágabo, beñ' chyixjee daa che' Chioza' le'. ¹¹ Bidwie' neto' na' wñabe' xpachlee Páblona' na' bichej ni'a na' kwine', na' chi'e:

—Ba bzajni Espíritu Sántona' nad' ne' beñ' wlallka' lle' Jerusalénna' wchejgake' ni'a na' xan bachleeni ka ba nchej' ni'a na'ni, na' gongake'ne' lo na' beñ'ka' bi nak beñ' Israel.

¹² Na' ka beninto' wna Ágabona' ka', neto' len beñ' Cesareaka' got'yointo' Páblona' bi yiyaje' Jerusalénna'. ¹³ Na' Páblona' wne' neto':

—Bi kwell-le cha', bi gonle ka gakyeshid'. Zoakz' wtil' diika', aga toz daa wchejgake' nad', san wakte witgake' nad' daa nonlilallaa Xancho Jesucrístona'.

¹⁴ Na' ka gokbe'into' bi chzenag Páblona' daa che'nto'ne' bi yiyaje' Jerusalénna', na'ch wnanto':

—Gakshga ka cheeni Xancho Jesús'a.

¹⁵ Na' ka wde, bisini'a chento' kwenche biza'nto' ziyajnto' Jerusalénna'. ¹⁶ Na' bal beñ' Cesareaka' nonlilall' Jesús'a wza'lengake' neto'. Na' bche'gake' neto' lill to beñ' le Mnasón, gana' yigaañnto'. Beeni nake' beñ' Chipre na' ssha ba gok nonlilallee Jesús'a.

Páblona' jawie' Jacóbona' Jerusalénna'

¹⁷ Na' ka billinnto' Jerusalénna', le chibayi beñ'ka' naknto' txen nonlilall'nto' Jesús'a. ¹⁸ Na' betiyo wza'len Páblona' neto' jawianto' Jacóbona'. Na' ka bllinnto', ba lle' yog' beñ'ka' ngoo lo na'gake' beñ'ka' nonlilall' Jesús'a Jerusalénna'. ¹⁹ Na' biyoll bwap Páblona'

legake' chiox, na' golle' legake' to to diika' goklen Chioza' le' daa bene' ladj ben'ka' bi nak ben' Israel. ²⁰ Na' ka wde bzenaggake' diika' wna Páblona', be'la'ogake' Chioza'. Na'ch gollgake'ne':

—Li', ben' bish', nezczilo' ben' zan wal inleeb ben' Israelka' ba nonlilall'gake' Jesúza', na' yoguee nagake' chonan byen goncho daa na leya'. ²¹ Na' ba bengakile' rson ka chono', na' nagake' chzajniilo' yog' ben' Israelka' lle' yell zit'ka' bich gongake' ka na ley che dii Moiséza', ni bi koo bi' che'ka' sen daa le circuncisión, na' bich gongake' daa yoolocho choncho. ²² ¿Nakra gonchon, lla? La' lii idop illagte ben' kat' inezgakile' ba biyedo'. ²³ Waklja gono'n ki: Ladjnto'ni zoa tap ben' nchebe' to dii nchebe' lao Chioza', na' chonan byen wdelazgake' daa nchebgake'. ²⁴ Chiyal' wchi'o legake' yoodo'na' kwenche txen yixi yiyechle. Na' li' chixjo' daa chiyal' chixjgake' kwenche gak wshib yichje'ka' ka nllia leya' bia'. Na' shi gono' ka', yog' ben' inezgakile' bi nakan ka nagake' cho', na' gakbe'gakile' lekzka' chzenago' daa na leya'. ²⁵ Na' ka nak ben'ka' bi nak ben' Israel na' ba nonlilall'gake' Jesúza', ba bzejnto' legake' bi kwe' yichjgake' diika' zejlencho cho' ben' Israel. Na' gollnto'gake' daa chiyal' gongake': bi gaogake' yel' wao daa ba bllia ben' lao lwaa lsak' daa choe'la'ogake', na' bi gaogake' xchen bayixaa, ni xpel' bana' bi wlalj xchema', na' bi inelenzgake' xiin xool ben'.

Bex'gake' Páblona' yoodo'na'

²⁶ Na' betiyo ka bixi biyech Páblona' len ben'ka' zi tap, na' wyajgake' yoodo'na' kwenche wzenile' bxoza' bi llan sheelo daa ba nchebgake' kwenche ka yiyoll yixi yiyechgake' ka nllia leya' bia' na' we'gake' bayix'do'ka' witgake'.

²⁷ Na' ba zoa iza gall lla chongake' daa chiyal' gongake' kwenche yixi yiyechgake', na' bal ben' Israelka', ben'ka' zaak Ásiana', ble'gakile' Páblona' loo yoodo'na'. Na'ch bta bnegake' ben'ka' lle' na', kwenche bex'gake' Páblona'. ²⁸ Na' wnegake' zillja che'gake':

—Le', ben' Israel, li' gaklen neto'. Beeni chde' doxen chli' chsedile' ben' kwenche gakzbangakile' cho' ben' Israel, len ley chechona' na' yoodo' chechoni. Na' naa sto dii zban wal ba bizone', ba wlo'e to chop ben' griego yoodo' chechoni, la' bi de lsens sho' ben'ki lill xlatj Chios chechona'.

²⁹ Wnagake' ka' daa ba ble'gakile' Trófimona', to ben' yell Éfeso, chdalene' Páblona' txen Jerusalénna', na' gokgakile' lekzka' bche' Páblona'ne' yoodo'na'.

³⁰ Yog'z ben' lle' yella' bllesh bcheengake' zejdogake'. Na'ch bigoyogake' Páblona' axt de xneze' bibejgake'ne' yoodo'na', na' lii bsejtegake' puertka'. ³¹ Na' ba llagdia'gake' Páblona' cheengakile' wittekzgabe'ne' ka bllin dillaa lao ben' wñabia' che soldadka' nan chak dane nleeb doxen yell Jerusalénna'. ³² Na' lii btoptie' soldadka' na' ben'ka' ngoo lall' na' legake' na' wyajdogake' gana' lle' ben'ka'. Na' ben'ka' chit Páblona' ka ble'gakile' ben' wñabia'na' len soldad che'ka', na'ch bsangake' bich bet wdingake'ne'. ³³ Na'ch jabig' ben' wñabia'na', na' bexee Páblona' na' bene' mandad bchejgake'ne' chop gden. Na'ch wñabile' ben'ka' no beena' na' bin bene'. ³⁴ Na' ben'ka' kon chosyaagake' na' chiya dii na to toe', na' bi wyajni ben' wñabia'na' daa zi'te chongake' sshag. Na'ch bene' mandad biche' soldadka' Páblona' gana' zoagake'. ³⁵ Na' ka bllingake' cho'a shkwiaka' lle' cho'a lill soldadka' benan byen bñen soldadka' Páblona' daa zej ben' Israelka' cheengakile' wñizgabe'ne'. ³⁶ Na' ben' zan nogake'ne' chosyaagake', che'gake':

—iLii wittegue'!

Páblona' cho'e dill' lao ben' Israelka'

³⁷ Na' ka ba zoa lljloogake' Páblona' gana' zoa lill soldadka', na'ch golle' ben' wñabia'na':

—¿Awak we'len' li' to chop cho'a dill'?

Na' ben' wñabia'na' golle'ne':

—¿Achako' dill' griegona'? ³⁸ ¿Aaga lin' ben' Egíptona' beena' wzoshyi' ben' wñabia'ka' kani batza, na' bchi'e tapa mil ben' wen xyaka' latja' gana' bibi chashj chleb?

³⁹ Na'ch goll Páblona'ne':

—Aga le' nad'. Nad' nak' to beṇ' Israel, beṇ' yell Tarso dii nak to yell xen gana' mbani Cilíciana'. Ben goklen be' latj we'len' beṇ'ki dill'.

⁴⁰ Na' beṇ' wṇabia'na' bi'e lsens. Na'ch wze Páblona' lo shkwiaka' na' bze neena' lawe'ka' kwenche soagake' llizə. Na'ch ka wche'lligake' na' wzoloe' be'lene' legake' dill' hebrewa' daa nak xtill'gake', chi'e:

22

¹ —Le' beṇ' bish', na' le' beṇ' gol, li wzenag dill' cha'ni wi'a.

² Na' beṇ'ka', ka bengakile' chṇe Páblona' dill' hebrewa' na' wlle'gake' llizə. Na' Páblona' chi'e legake':

³ —Nad' nak' beṇ' Israel na' golj' yell Társona' gana' mbani Cilíciana', per bgol' Jerusalénni, na' bli' bsemi maestro Gamaliela' nad' kwaslöl ka na' ley che dii xozxto'choka', na' toshiizi choe'l-lallaa chon' ka chazlall' Chioza' do yichj do lallaa, ka chonkzle le' naanlla. ⁴ Na' bchi' bsakaa beṇ'ka' ba wyoo lo nez li nez shao' che Jesucristona' na' goklallaa guetgake'. Na' beṇ'aa ka nool ka beṇ' byo, na' wlo'a legake' lillyana'. ⁵ Beena' nak bṇoz choo bṇoz xen na' yog' beṇ' golka' chṇabia' beṇ' Israelka' nezgakile' ka beṇ'. Na' legake' bengake' nad' yish daa beṇ'aa ka wzaa zyaa yell Damáscona', gokid' lljexaa yog'lol beṇ'ka' nogake' xtill' Jesucristona' na' yi'che'gakee Jerusalénni kwenche sak'zi'gake'.

Be' Páblona' dill' ka gok benlilallee Jesúza'

(Hch. 9:1-19; 26:12-18)

⁶ Na' ka do gobill, ka ba zoa illin' Damáscona', tokonganzi wyalj to yi' dii za' yabana' lo neza' gana' zyaa. ⁷ Na' to wzoatishz' lo yona'. Na'ch benid' shii to beṇ' wne' nad': "Saulo, Saulo, ¿berache chchi' chsak'zo' nad'?" ⁸ Na' wṇabidee, chepee: "¿No li, beṇ'?" Na' wne': "Nadaan Jesús, beṇ' Nazareta', beena' chchi' chsakoo." ⁹ Na' beṇ'ka' zyaalen' txen ble'gakile' yi'na' daa wyalj na' bllibgake', per aga bengakile' daa wna beena' nad'. ¹⁰ Na'ch goshee: "¿Beran chiya' gon', Xan'?" Na' wne' nad': "Biyas na' wyaj Damáscona', na' na' inagake' li' yog' daa chiya' gono'." ¹¹ Na' beeni' wala' bcholān nad', na' beṇ'ka' zyaalen' txen biyox'gake' na'na' na' bche'gake' nad' Damáscona'.

¹² Na' Damáscona' zoa to beṇ' le Ananías, na' zoe' chone' yog' daa na' leya', na' yog' beṇ' Israelka' zoa Damáscona' nagake' che' nake' to beṇ' chon dii wen. ¹³ Na' Ananíaza' bide' bidwie' nad', na' ka blee, wne' nad': "Saulo, beṇ' bish', naa yile'ilo' sto shii." Na' kate wne' ka', lii bile'teid', na'ch gok ble'idee. ¹⁴ Na'ch wne' nad': "Chioza', beena' be'la'o dii xozxto'choka', ba wleje' li' kwenche gombi'o daa cheenile' gono', na' kwenche ble'ilo' beena' nak liizelozi beṇ' wen, na' benteilo' kwine'n ba bshaljlene' li'. ¹⁵ Na' li' wi'o xtilleena' doxen yell-lioni, na' we'leno' beṇ' dill' yog'lol diika' ba ben ble'ilo'. ¹⁶ Na' naa, bibi wsej wllonan choatego' nisa' na' wṇabi Xancho Jesúza' yisol yinite' saaxya cho'ka'."

¹⁷ Na' ka biyed' Jerusalénni, wyaa yoodo'na' je'llwill' Chioza', na' Chioza' bene' ka ble'do'id'. ¹⁸ Na' ble'id' Jesúza', beena' nak Xan', na' wne' nad': "Btalaloo bchej Jerusalénni, la' aga no wzenag xtilaana' daa we'lengako'ne'." ¹⁹ Na'ch chepee: "Xan', legake' nezgakile' ka wya' to to gana' chdop chllagnto' choe'llwillnto' Chioza' jexaa beṇ'ka' nonlilall' li', na' bet wdingakee na' biche'gakee ni, bsejgakee lillyana'. ²⁰ Na' kana' betgake' dii Estébanna' beena' be' xtilloona', len' bi'a latj betgake'ne', na' wdap' xa beṇ'ka' bet le'." ²¹ Na' Jesúza', beena' nak Xan', wne' nad': "Wloo nez, wyaj yell zit'ka' na' je'len beṇ'ka' bi nak beṇ' Israel xtilaana'."

Páblona' goke' lo na' beṇ' wṇabia' che soldadka'

²² Zeelo diika'z bzenaggake' che Páblona', na'ch wzolo chosyaagake' che'gake':

—¿Bisol biñittegue' yell-lioni! ¿Aga chiya' soach ka le'!

²³ Na' bikzə bsangake' chosyaagake' daa le' chllaagake'. Axt no xe'ka' chzal'gake' ka'lə na' no bishte yona' chashgake'n chzal'gake'n cha'lə. ²⁴ Na' beṇ' wṇabia' che soldadka'

bene' mandad wloogake' Páblona' gana' zoa lill soldadka' na' wit chingake'ne' kwenche wi'e dill' bin bene' daa zi'te chllaa beṅ'ka' le'. ²⁵ Na' ka ba nchejgake'ne' kwenche wit chingake'ne', Páblona' golle' xan soldadka':

—¿Ade lsens wit chinle to beṅ' nde kwent Rómana' la'kzi biṅ' yiyiljyoll-le bin bene'?

²⁶ Na' ka goll Páblona' xan soldadka' ka', na'ch jelle' beṅ' wṅabia' che'ka':

—Wsak'shkilo', nde beeni kwent yell Rómana', na.

²⁷ Na' beṅ' wṅabia' che soldadka' wyaje' kwit Páblona' na' wṅabile'ne', chi'ene':

—¿Alin ndio' kwent yell Rómana'?

Na' Páblona' chi'ene':

—Awe.

²⁸ Na'ch beṅ' wṅabia' che soldadka' chi'e Páblona':

—Nad' mech xen wxakidaan kwenche ndia' kwent yell Rómana'.

Na' Páblona' golle'ne':

—Nad' dezd ka goljtia' ndia' kwent yell Rómana'.

²⁹ Na' daa goll Páblona' ka', beṅ'ka' nan wit chingake'ne' lii bikwastegake' kwite'na'. Na' axt beena' chṅabia' soldadka', ka gokbe'ile' Páblona' ndie' kwent yell Rómana', le bllabe' daa bene' mandad bchejgake'ne' gdenka'.

Bzegake' Páblona' lao beṅ'ka' chṅabia' beṅ' Israelka'

³⁰ Na' betiyo, beṅ' wṅabia' che soldadka' btope' bṅozka' chṅabia' na' yog'lol beṅ'ka' chṅabia' beṅ' Israelka'. Na' bselle' gdenka' daa nchej ni'a na' Páblona', na' wleje'ne' bzie'ne' lao beṅ'ka' daa cheenile' inezile' biṅhe chao beṅ' Israelka' xya che'.

23

¹ Na'ch Páblona' bwie' beṅ'ka' chṅabia' beṅ' Israelka' na' golle' legake':

—Le' beṅ' bish', nezi yichjlall'dawaani axt naa chon' daa chazlall' Chioza'.

² Na'ch Ananíaza', beena' nak bṅoz choo bṅoz xen, golle' beṅ'ka' ze kwit Páblona' kwall'gake' cho'ena'. ³ Na' Páblona' golle'ne':

—¿Chioza' wit chine' li', wxiye'! Li' chi'oni kwenche yiya yiyiljo' nad' kon ka na leya', per chyishjo' daa na leya' daa beno' mandad wlall'gake' cho'ani.

⁴ Na'ch beṅ'ka' lle' na', che'gake' Páblona':

—¿Naktekara chiyaxjilo' chilliizo' dill' beena' nak bṅoz choo bṅen che Chioza'?

⁵ Na'ch Páblona' golle' legake':

—Le' beṅ' bish', bi nezid' shi len' bṅoz choo bṅoz xenna'. Shel'ka' nezid', aga goshee ka', la' Cho'a Xtill' Chioza' nan: “Bi inio' zban to beṅ' wṅabia' che yell cho'na'.”

⁶ Na' Páblona' gokbe'ile' beṅ'ka' chṅabia' nakgake' chop kwenla. Bale' nak txen saduceoka' na' bale' nak txen fariseoka'. Na'ch wṅie' zillj chi'e:

—Le' beṅ' bish', nad' nak' fariseo na' naktia' xiin fariseo. Na' chaole xya cha' daa non' lez yiban beṅ' wetka'.

⁷ Ka goll Páblona' ka' na' gok to wishesh wal ladj fariseoka' len saduceoka'. Na' gokgake' chopla. ⁸ La' saduceoka' nagake' aga wibanch beṅ' wetka', na' lekzka' nagake' aga no anjl zoa ni dii xiw'. Na' fariseoka' chajle'gake' zoa anjl na' zoa dii xiw' na' chajle'gake' yiban beṅ' wetka'. ⁹ Na' yog'gake' besyaagake' choe'gake' wde wdeli dill'. Na'ch wzolla' bal beṅ'ka' chli' chsedi leya' nakgake' txen fariseoka', na' che'gake':

—Ni to dii mal biṅ' gon beeni. Shera shi to beṅ' bi gak ile'icho wa to anjlan' ba wṅie' le'. Bi chiyal' soshiy'cho Chioza'.

¹⁰ Na' daa zi'telə gokdil-len ljwell beṅ'ka', bxolli beṅ' wṅabia' che soldadka' wxoxj wtingake' Páblona'. Na'ch wṅie' soldadka' yibejgake' Páblona' ladje'ka' na' lljaloogake'ne' dii yoblə gana' zoa lille'ka'.

¹¹ Na' llana' sto ka gol, bli'lao Xancho Jesúza' Páblona' na' golle'ne':

—Bendiplaloo Pablo, ka ba be'kzo' xtilaana' Jerusalénni, ka'kzan chonan byen lljeno' Rómana'.

Chgoogake' xnezin witgake' Páblona'

¹² Na' betiyo bal' beñ' Israelka' gokgake' toz kwenche witgake' Páblona', na' wloo cho'agake' bibi yeej gaogake' axt ki guet Páblona', na' gollgake' Chioza' wsak'zi'e beena' yeej gao shlak bin' witgake'ne'. ¹³ Wdeli choa beñ'ka' wloo cho'agake' witgake' Páblona'. ¹⁴ Na'ch wyajgake' lao bxo'zka' chñabia' na' lao beñ' gol che'ka' chñabia' beñ' Israelka' na' jellgake':

—Ba bchebnto' wsak'zi' Chioza' neto' shi yeej gaoznto' na' bin' witnto' Páblona'. ¹⁵ Na' le' nakle beñ' wñabia' chento', li gak toz na' li inabi beñ' wñabia' che soldadka' kweje'ne' wxē na' yidweene' laoleni, na' wda'tezilen yiyiljyoll-le berakzan bene'. Na' neto' kwe'nonto'ne' tneza' kwenche witnto'ne' ka zi' ilee ni.

¹⁶ Na' bi' che beñ' zan Páblona' benib' dill'ka' be'gake', na' wyajb' gana' zoa lill soldadka' jasi'nib' Páblona'. ¹⁷ Na' Páblona' wñie' to beñ' nak xan to guiyoa soldadka', golle'ne':

—Jwa'gach bi'ni lao beñ' wñabia' che soldadka', la' de to dii ye'b' le'.

¹⁸ Na' xan soldadka' jweeb' lao beñ' wñabia' che yog' soldadka', na' golle'ne':

—Páblona', beena' nej lillyana', wñabile' nad' yidwa' bi'ni lawo'ni, la' de to dii inab' li' na.

¹⁹ Na' beñ' wñabia' che yog' soldadka' bexee na' bi'na', na' bchi'eb' ga kono lle'. Na'ch wñabile'b':

—¿Beran cheenilo' ino' nad'?

²⁰ Na' bi' xkwidaa gollb' le':

—Beñ' Israelka' ba gokgake' toz kwenche inabgakile' li' kwejo' Páblona' wxē na' wseloone' lao beñ'ka' chñabia' legake', na' wda'tezgakile'n yiyiljyollgake' berakzan bene'.

²¹ Na' bi' shajli'o chegake', la' wdeli choa beñ'ka' kwe'nogake'ne' tneza' kwenche witgake'ne', na' che'gake' Chioza' wsak'zi'e legake' shi yeej gaozgake' na' bin' guete'. Na' ba chbezgake' gono' ka cheengakile'.

²² Na'ch beñ' wñabia' che soldadka' chi'eb':

—Ni to kono yoo ka nak dga ba wno' nad'.

Na'ch biza'b'.

Bsel'gake' Páblona' lao beñ' wñabia'na' le Félix

²³ Na'ch beñ' wñabia' che soldadka' wñie' chop xan soldad che'ka' na' bene' mandad wzengakile' soldadka' wsini'a chegake' kwenche ichejgake' koogake' nez do ka chida ga wala' shajgake' Cesareana'. Na' bene' mandad chop guiyogake' shajgake' ni'azgake', na' giyonshigake' kwiagake' kabay na' zi chop guiyogake' gox'gake' lanza. ²⁴ Na' lekzka' golle' legake' koogake' xa kabayka' wchin Páblona' na' illine' shi'a shbane' lao Félix', beena' chñabia'. ²⁵ Na'ch bgoxee legake' to yish dii na ki:

²⁶ “Si'xengacho' beñ' wñabia' Félix, nad' Claudio Lisias chzej' li', na' chwap' li' chiox.

²⁷ Ka nak beeni chselaa lawo'na', beñ' Israelka' be'x'gake'ne' na' ba zoa witgake'ne' shel' ki nad' jasla'ne' len soldad cha'ka', la' wnezid' ndie' kwent yell Rómana'. ²⁸ Na' daa goklallid' inezid' berache chaogake' xya che', jwaane' lao beñ'ka' chñabia' beñ' Israelka'. ²⁹ Na' got'bia' chaogake' xya che' daa bi chone' ka na ley che'ka', per bi chonan ka guete' wa gatee lillya. ³⁰ Na' ka wnezid' beñ' Israelka' ba ngoogake' xnezin witgake'ne', bchoglallaa wselaaane' lawo'na'. Na' ba gosh' beñ'ka' chao xya che' yidgake' lawo'na' na' inagake' li' bin chaklen chegake' Pábloni. Ka'tz dii nia' li'.”

³¹ Na'ch soldadka' lle' na' bche'gake' Páblona' zejlengake'ne', bllinlentegake'ne' yella' le Antípatris kon ka goll beñ' wñabia' che'ka' legake'. ³² Na' betiyo, soldadka' zej ni'azgake' bibiigake' ziyajgake' Jerusalénna'. Na' beñ'ka' lliia kabayka' zejlenchgake' Páblona'. ³³ Na' ka bllingake' Cesareana', be'gake' beñ' wñabia'na' yisha' nox'gake' na' bengake' Páblona'

lo nee. ³⁴ Na' ka wde blab beṅ' wṅabia'na' yisha', na'ch wṅabile' Páblona' ga beṅaan. Na' ka wṅezile' Páblona' nake' beṅ' yell Tarso, daa llia gana' mbani Cilíciana', ³⁵ na'ch golle'ne':

—Na' wzenagshkid' bin ino' kat' yid beṅ'ka' chao xya cho'.

Na'ch bene' mandad lljasejgake'ne' yooná' ben dii Heródeza', gana' chzoa beṅ' wṅabia'ka'.

24

Be' Páblona' dill' lao Félixá'

¹ Gok gay' lla zoa Páblona' Cesareana' ka bllin bṅoz choo bṅoz xenna', beena' le Ananíás, na' nchi'e bal beṅ' golka' chṅabia' na' kon to beṅ' wide dill', beṅ' le Tértulo. Na' bllingake' lao beena' chṅabia' kwenche gaogake' xya che Páblona'. ² Na'ch bdegake' Páblona' lao beṅ' wṅabia'na' le Félix na' wzolo Tértulona' chawe' xya che', chi'e:

—Choṅkeno' li', beṅ' wṅabia', zoanto' mbalaz na' chak wen chento' lallnto'ni daa chak koo xṅezi yog'lolte kon yel' sin' cho'na'. ³ Na' daan, gattez zoanto' toshiizi nanto' li' choṅkeno' dii zan las, li' beṅ' wṅabia'. ⁴ Na' kwenche bich wshayinto' li', chṅabinto' li' gono' goklen wzenago' to chop ka nak dga inanto' li'. ⁵ Ka nak beeni ze lawo'ni, nezinto' nake' to beṅ' chbek dii zed, na' chdaze' doxen yell-lioni chta chnie' beṅ' kwenche neto' beṅ' Israel gaknto' choplə, na' ngoo lo nee xonj beṅ' chonlilall' to beṅ' Nazaret. ⁶ Ga biyollin, goklallee kwee loo yoodo'na' beṅ' bi nak beṅ' Israel. Daan bex'nto'ne'. ⁷ Na' wyaz beṅ' wṅabia' che soldadka', beena' le Lisias, na' bigoyoe'ne' lo na'nto'na'. ⁸ Na' wne' neto' chiyal' yidnto' lawo'ni kwenche gaonto' xya che'. Na' kwino' naa, wak inabilo' Pábloni kwenche inezilo' biche chaonto' xya che'.

⁹ Na' beṅ' Israelka' lle'lengake' na', bischopgake' dillaa che'gake': “Ka nakannan'.” ¹⁰ Na'ch beṅ' wṅabia'na' bene' seṅ' lao Páblona' kwenche wi'e dill', na'ch wzolo Páblona' chi'e:

—Nezid' ba gok zan yiz chono' yel' joschis che beṅ'ki lle' gani mbanilo'. Daan chibaid' wi'a dill' daa chak cha' lawo'ni. ¹¹ Zi' gok shllin lla billin' Jerusalénna' jaye'lawaa Chioza', na' shi cheenilo' gakiyilo'n, wak inabo' kwenche xenlalloo ka nakannan'. ¹² Na' kono ble'i nad' chakdil-len' beṅ' wa chbekw' wdil wishesh ladj beṅ', ni loo yoodo'na' ni gan yoblə ga chdop chllagnto' choe'lwillnto' Chioza' ni gachli yella'. ¹³ Na' ka nak diiki na beṅ'ki cha', ni ton bi gongake' gan inagake' ka nakannan'. ¹⁴ Lete to dii wcheb' lawo'ni choe'lawaa Chioza', beena' be'la'o dii xozxto'nto'ka', kon ka nak nez li nez shao' che Jesucristona' daa yo'a, daa na beṅ'ki bi zejan shli. Per chajli'a yog' daa na ley che Chioza' na' diika' bzej dii beṅ'ka' wdixjee daa golle' legake'. ¹⁵ Na' ka beṅ'ki chao xya cha' na' ka nad', toz ka nonnto' lez yisban Chioza' beṅ' wetka', ka beṅ' wen ka beṅ' mal. ¹⁶ Daan chon' byen yixi yiyech yichjlall'dawaani, la' cheenid' bibi dol' gap' lao Chioza' ni lao beṅ' yell-lioni.

¹⁷ Ba gok zan yiz chda' yell zit'ka', na' billin' Jerusalénna' kwenche wi'a mech dii gaklenen beṅ' wlall cha'ka' na' lekzka' wi'a bi dii wi'a yoodo'na'. ¹⁸ Na' diikin chon' ka biyoll bixi biyech' kon ka na leya', kat' to chop beṅ' Israel, beṅ' zaak Ásiana', ble'gakile' nad' yoodo'na'. Aga no beṅ' ntop nshag' na' ni to wdil wishesh bi mbek'. ¹⁹ Legaken' chiyal' yidgake' ni gaogake' xya cha' shi bin ble'gakile' chon'. ²⁰ Wa beṅ'ki zoa ni, inashkigake' shi bi dii mal billelgakile' cha' kana' jwa'gake' nad' lao beṅ' wṅabia' chento'ka'. ²¹ ¿Awa shi daa besyaa goshgakee: “Chaozle xya cha' daa chajli'a wllin lla yiban beṅ' wetka'”?

²² Na' ka biyoll beni Félixá' wna Páblona' ka', na' bsane' bich bene' yel' joschis che'na', la' ba wṅezile' nakan nak diika' chajle' beṅ'ka' yoo lo nez li nez shao' che Jesucristona'. Na' golle' beṅ'ka':

—Kat' yid Lísiaza', beena' chṅabia' soldadka', kana' inezyen'id' nakran nak dga chak chele.

²³ Na'ch Félixá' golle' xan soldadka' wseje' Páblona', per bi wllone' sho' ben'ka' nombia' le' na' llje'gake'ne' bi dii chyalljile'.

²⁴ Na' ka wde chop shon lla, bizllinlen Félixá' xoolle'na' le Drusila, to nool Israel. Na'ch ben Félixá' mandad bllin Páblona' lawe'ka' kwenche wzenaggake' dillaa daa cho'e daa ne' chiyal' gonlilall'cho Jesucristona'. ²⁵ Na'ch be' Páblona' dill' chi'e chiyal' goncho byen goncho wen na' bi goncho daa nazan checho, la' wllin lla yizi' Chioza' kwent che to tocho. Na' ka beni Félixá' xtilleena', le bllibe'. Na'ch golle' Páblona':

—Ba gokz to ka't, na' kat' gat' latj cha'na' inia' li' dii yoblə.

²⁶ Félixá' lekzka' goklallee we' Páblona' le' mech kwenche yisane'ne'. Daan zekizezi wnie'ne' kwenche be'lene'ne' dill'. ²⁷ Ka'z wde chop yiz, na' ka bichej Félixá' bich wñabi'e na' wyoo to ben' yoblə lie' Porcio Festo. Na' kwenche ile'shii ben' Israelka' Félixá', bi bisane' Páblona'.

25

Páblona' bi'e dill' lao Féstona'

¹ Na'ch ka bllin Féstona' Cesareana' kwenche inabi'e, na' wzoe' shon lla. Na'tech wzee wyaje' Jerusalénna'. ² Na' bxoza' chñabia' na' nochlə ben'ka' chñabia' ben' Israelka' ka wnezgakile' ba blline' Jerusalénna', na'ch jtaogake' xya che Páblona' lawe'na'. ³ Na' wñabgakile'ne' gone' to goklen yiselee Páblona' Jerusalénna' kwenche gak yel' joschis che'na'. Gollgake'ne' ka' daa goklall'gake' witgake'ne' tneza'. ⁴ Per goll Féstona' legake':

—Cesareana' zkaə yigaan Páblona', na' aga chillach yiyaa na'lə.

⁵ Na' golle' legake':

—Ben'ka' chñabia' le' chiyal' sa'lengake' nad' Cesareana' kwenche gaole xya shi bi dii malan bene'.

⁶ Na' ka do zi ga shi lla wzoa Féstona' Jerusalénna', na' bizee ziyaje' Cesareana'. Na' betiyo wchi'e gana' gone' yel' joschisa' na' bene' mandad jxi'gake' Páblona'. ⁷ Na' ka wyoo Páblona' gana' chi' Féstona' lii wbig'te ben' Israelka' zaak Jerusalénna' chaogake' xya che', che'gake' dii zan dii mal ba bene', per na' ni to daa wdaogake' xya che' bi bengake' gan ye'gake' ka nakannan'. ⁸ Na'ch Páblona' bzoa rson che', chi'e legake':

—Nad' ni tlish' dii mal biñ' gon', ni biñ' chishj' ley chento'na' neto' ben' Israel, ni biñ' wnit' balaan che yoodo' chento'na', ni bigan' inia' zban che Césara' beena' chñabia'.

⁹ Na' daa goklall' Féstona' ile'shii ben' Israelka' le', na' chi'e Páblona':

—¿Acheenilo' yiyajo' Jerusalénna' kwenche gon' yel' joschis cho'na' na'lə?

¹⁰ Na' Páblona' chi'ene':

—Ba zia' lawo'ni, na' ben' wñabia' Césara' ba nzoe' li' ni kwenche gono' yel' joschis, na' nin chiyal' gak yel' joschis cha'na'. Nezkzilo' aga bi ben' che ben' wlall cha'ki. ¹¹ Shi ba ben' dii chon ka chidoḷaa guet', wakkzə guet'. Per shi bibi ben' che ben'ki chao xya cha', kono gak gon nad' lo na'gake'. Na' chñab' wdio' nad' lao ben' wñabia' Césara' kwenche kwine' gone' yel' joschis cha'na'.

¹² Na'ch Féstona', ka wde be'lene' dill' ben'ka' chaklen le' chone' yel' joschisa', na'ch chi'e Páblona':

—Ba wñabo' tio' lao ben' wñabia' Césara' kwenche gone' yel' joschis cho'na', na' wselaa li' lawe'na'.

Páblona' bi'e dill' lao ben' wñabia' Agrípana'

¹³ Na' gok chop shon lla na'ch bllin ben' wñabia' Agrípana' len Berenícena' yell Cesareana' jawapgake' Féstona' chiox. ¹⁴ Na' daa wzoagake' Cesareana' zan lla, Féstona' be'lene' Agrípana' dill' ka nak daa chak che Páblona', na' golle'ne':

—Ni nej to ben' bi ben Félixá' yel' joschis che'na'. ¹⁵ Ka wya' Jerusalénna', ben' wñabia' che bxoza' na' ben' golka' chñabia' ben' Israelka' wdaogake' xya che' lawa'na', goklall'gake' wchogbi'a guete'. ¹⁶ Na' gosh'gakee ka choncho cho' ben' Roma, aga lii

wchogbia'tezcho guet to beṅ' shi bi sie' wzoa rson che' lao beṅ'ka' chao xya che'. ¹⁷ Daan, ka bid beṅ'ka' bidtao xya che', bi bshe'ida'n, san betiyoz lii bentia' wneyi jxi'gake'ne' kwenche gon' yel' joschis che'na'. ¹⁸ Na' beṅ'ka' bidtao xya che', ni tlish' diika' wza'lallaa bene' bi w nagake'. ¹⁹ Daa zeelo nagake' che', nlla'lə chajli'e che Chioza' na' chde' cho'e dill' che to beṅ' wle Jesús, beena' ba wit, na' le' ne' mbankze'. ²⁰ Na' daa bi ne'zid' nak gon' yel' joschis che beṅ'ki, wṅabid' le' shi cheenile' yiza'lene' nad' Jerusalénna' kwenche gak yel' joschis che'na' na'. ²¹ Per Páblona' wṅabe' tie' lao César Augústona' kwenche gone' yel' joschis che'na', na' ben' mandad shejze' axt kat'ch gak wselaaane' Rómana'.

²² Na'ch Agrípana' golle' Féstona':

—Lekzka' cheenid' wzenag' ka dillaa cho'e.

Na' Féstona' chi'ene':

—Wxete wzenago'n, shka'.

²³ Na' betiyo bllin Agrípana' lega beṅ' zakii, len Berenícena' na' len baḷ beṅ'ka' chṅabia'gake' soldadka', na' beṅ'ka' mbejlawin yella'. Na'ch Féstona' bselee beṅ' jxi'gake' Páblona'. ²⁴ Na' wne Féstona', chi'e:

—Li' beṅ' wṅabia' Agripa, na' yog'le le' lle'le ni, ka nak beeni ze ni, yog' beṅ' Israelka', ka beṅ' lle' Jerusalénna' na' ka beṅ' lle' Cesareani, chaogake' xya che', na' chongake' byen chogbi'a guete'. ²⁵ Na' nad' chakbe'id' aga bi dii mal ba ben beeni kwenche chogbi'a guete'. Na' kwine' ba wṅabe' tie' lao César Augústona' kwenche gone' yel' joschis che'na', na' ba bcheb' wdia'ne' na'lə. ²⁶ Per bi chillelid' bin ben Pábloni kwenche wzej' Césara' yeppee bin bene'. Daan ba nzia'ne' laoleni na' lawo'niyen'kzə li', beṅ' wṅabia' Agripa, kwenche inabyollichone' bin bene', na' ka' wllia' lee yisha'. ²⁷ La' chakid' bi nakan wen wselaa to beṅ' lawe'na' kwenche wchogloe' che' na' bi nzej' bin bene'.

26

Páblona' bzo'e' rson che' lao Agrípana'

¹ Na' Agrípana' golle' Páblona':

—Bzoashki rson cho'na' ṅaa.

Na'ch Páblona' blis neena' na' wzoloe' bi'e dillaa, chi'e:

² —Li' beṅ' wṅabia' Agripa, mbalaz wal chakid' daa gak wzoa rson cha'ni lawo'ni che yog' diika' chao beṅ' Israelka' xya cha'. ³ La' nezkzilo' ka yoolo neto' beṅ' Israel chonnto', na' lekzka' che dil chix chento'ka'. Daan chṅab' gapgacho' yel' chxenlall' na' wzenaggacho' ka nak dga inia' li' ṅaa.

⁴ 'Yog'lol beṅ' Israelka' ne'zgakile' ka bsa' cha' ladje'ka', ka yell cha'na' gana' bgol' na' ka Jerusalénna'. ⁵ Na' lekzka' ne'zgakile' toshiizi nak' toz fariseoka', beṅ'ka' chzenagchgake' che ley che dii Moiséza' aga ka nochlə beṅ' yoblə. Na' wak yizi' cho'agake'n shi gueengakile'. ⁶ Na' ṅaa chaogake' xya cha' daa non' lez wllin lla gon Chioza' ka bchebe' lao dii xozxto'nto'ka'. ⁷ Na' neto' naknto' shllin kwente dia che dii Israela', nonnto' lez gon Chioza' daa bchebe' gak, na' daan choe'la'onto' Chioza' ka tella ka wal. Na' daa non' lez gak daa bcheb' Chioza', daan chao beṅ' Israelki xya cha', li' beṅ' wṅabia'. ⁸ ¿Berache bi chajle'le wak yisban Chioza' beṅ' wetka'?

Páblona' bi'e dill' ka bsak'zi'e beṅ'ka' nonlilall' Jesúza'

⁹ 'Lekzka' nad' gokid' chiyaḷ' wsak'zi'a beṅ'ka' nonlilall' Jesús, beṅ' Nazareta'. ¹⁰ Na' ka' ben' Jerusalénna'. Na' bxo'zka' chṅabia' bengake' lsens wlo'a lillyana' beṅ'ka' nonlilall' Jesúza', na' ka betgake' legake' lekzka' len' chakid' kan' chiyaḷ' gak. ¹¹ Zan shii wya' gana' chdop chllagnto' choe'ḷwillnto' Chioza' na' biya dii benid' legake' kwenche inegake' zban che Jesucristona'. Na' le bllaachga' legake', axt yell zit'ka' wya' jasad'zi'gakee.

Sto shii be' Páblona' dill' ka gok blla' yichjlall' do'ena'
(Hch. 9:1-19; 22:6-16)

12 Na' lekzka' nan lljenid' ben'ka' nonlilall' Jesúza' yell Damáscona', na' b̄xozka' ch̄n̄abia' bsel'gake' nad' na' ben̄gake' lsens lljasak'zi'gakee. 13 Na' ki gok cha', li' ben' w̄n̄abia'. Ka zyaa ngwaa neza', do ka gobill ble'id' to yi' wal dii za' yabana' dii chzeeni'ch aga ka w̄billa', na' wyechjan nad' len ben'ka' zyaalen'. 14 Yog'tento' wzoatishnto' lo yona', na'ch nad' benid' shii to ben' w̄nie' nad' dill' hebreo, ne': "Saulo, Saulo, ¿berache ch̄chi' chsak'zo' nad'? Daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b." 15 Na'ch wnia', chepee: "¿Nora li', ben'?" Na' wne': "Nadaan Jesúza', beena' ch̄chi' chsakoo. 16 Na' naa biyas. Ba bli'law' li' kwenche gono' ka cheenid' na' kwenche wi'o dill' che dga chen chle'ilo' naa na' cheyi diika' zi' wliid' li'. 17 Na' wselaa li' gana' lle' ben'ka' bi nak ben' Israel, na' gaklen' li' kwenche ni legake' na' ni ben' Israelka' bi witgake' li'. 18 Na' wselaa li' kwenche lljali' lljasedilo' legake' kwenche sho' beeni' cha'na' loo yichjlall'do'eka' na' bich tagake' lo yel chola'. Gono' ka bich inabia' Satanáza' legake', san gonlilall'gake' Chioza' na' gonlilall'tegake' nad' na' yizi'xen' xtoleeka'. Na' lengake' ikaagake' daa we' Chioza' ben'ka' nak lall' nee."

19 Kan' gok cha', li' ben' w̄n̄abia' Agripa, na'chan bzenag' daa wna Jesúza' ka bli'lawe' nad'. 20 Na' zigaate ben' Damáscoka' bli' b̄sedid' cho'a xtill' Jesucristona', na'tech ben' Jerusalénka', na' ben' lle' doxen yell-lio Judeana', na' lekzka' ben'ka' bi nak ben' Israel. Gosh'gake' chiyal' yiyaj yileni che xtoleeka' na' wzenaggake' che Chioza', na' gongake' ka gakbe'i ben' nan ba biyaj bilengakile'. 21 Na' ni cheyi diikin, bex' ben' w̄lall' cha'ka' nad' yoodo'na' na' nan witgake' nad'. 22 Per Chioza' chaklene' nad' kwenche choe'ch' xtilleena' lao ben' axt naanlla, ka lao ben' zakii na' ka lao ben' bi zakii. Na' kon ka wnakz dii Moiséza' gak na' ka wnakzə dii ben'ka' wdixjee daa goll Chioza' legake' kani'yi, kon kakzan nia', aga bichlə dii yoblan nia'. 23 La' legake' wnagake' Chioza' nllie' bia' Crístona', beena' wselee, yiya dii yen ile'ile' na' witgake'ne', na' len' gake' ben' necha' yibane' ladj ben' wetka', na' chixje'ile' ben' Israelka' na' ben'ka' bi nak ben' Israel nakan chiyal' gongake' kwenche sho' beeni' che'na' loo yichjlall'do'eka'.

Páblona' goklallee gonlilall' Agrípana' Jesúza'

24 Na' shlak Páblona' chzoa rson che'na', besyaa Féstona', chi'ene':

—¿Chaktonto'n, Pablo! Daa zi'telə chsedo' ba chontontin li'.

25 Na' Páblona' chi'ene':

—Aga chaktonta'n, ben'do', san dill' lin cho'a, na' nakan dii shajle'cho. 26 Na' ben' w̄n̄abia' Agrípani nezile' che yog' diiki nia' le', daan chiyaxjid' cho'a dill' lawe'ni. Aga inacho bi nezile' diika' gok, la' ga lle' lla' beñaan gokan. 27 Na' li', ben' w̄n̄abia' Agripa, ¿achajli'o cho'a xtill' Chioza' daa bzej dii ben'ka' wdixjee daa golle' legake' kani'yi? Nad' nezid' chajli'o.

28 Na'ch Agrípana' chi'e Páblona':

—¿Achakilo' xtitz wshaljleno' nad' cho'a xtill' Jesúza' na' gonlilallaane'?

29 Na'ch Páblona' chi'ene':

—La' xtitzə wa la' ssha wshaljlen' li', Chioza' wi'e latj aga tozo' li' shajli'o san yog' ben'ki lle' ni chengakile' dillii cho'a shajle'gake' ka ba wyajli'a nad', per aga nia' w̄chejgake' legake' gden ka n̄chejgake' nad'.

30 Na' ka biyoll wna Páblona' ka', na'ch bizolla' Agrípana' na' Berenícena' len Féstona' na' yog' ben'ka' wche'lengake'. 31 Na'ch bichejgake' gana' lle'gake' na' be'gake' dill', che' ljwelle':

—Aga bi ben beeni kwenche chogbi'a guete' ni bi chiyal' gatee lillyana'.

32 Na'ch Agrípana' golle' Féstona':

—Wak yislacho beeni shel'ka' ki ba w̄n̄abe' tie' lao ben' w̄n̄abia' Césara' kwenche gone' yel' joschis che'na'.

27

Bsel'gake' Páblona' yell Rómana'

¹ Na'ch ka b̄hoglall'gake' wsel'gake' neto' Itáliana' loo barkwlə, bengake' Páblona' kon sto chop pres yoblə lo na' beena' le Julio, nake' x̄an to guioa soldadka' beŋ'ka' nzi' soldad che beena' ch̄nabia' Rómana'. ² Na'ch wyoonto' to loo barkw dii za' yell Adramítiona' na' zejan Ásiana'. Na' wza'len to beŋ' le Aristarco neto'. Nake' beŋ' Tesalónica, daa lia gana' mbani Macedóniana'. ³ Na' betiyo bllinnto' yell Sidónna', na' Júliona' le wen benile' Páblona' na' bi'e latj jawie' beŋ'ka' nombi'e yella' kwenche be'gake'ne' bi dii byalljile'. ⁴ Na' ka biza'nto' Sidonna' na' wdeteznto' yichjlə yell-lio Chíprena' daa lia lo nisdona' kwenche bkweejan neto' daa le ze be'na'. ⁵ Na' wdetento' lo nisdona' daa de tcho'a yell-lio gana' mbani Cilíciana' na' Panfílana', na' bllinnto' cho'a yell Mírana', daa lia gana' mbani Líciana'.

⁶ Na' yell Mírana' x̄an soldadka' bllelile' to barkw dii za' Alejandríana' na' zejan Itáliana', na' bidie' neto' lo'inna'. ⁷ Na' zan lla wyajlennto' barkwa' sho'lall'zə, na' kaŋi bllinnto' cho'a yell Gnídona'. Na' daa ze be'na' klelə, na' wyechjnto' yell-lio Crétana' daa lia lo nisdona', wdeteznto' cho'a yell Salmónna'. ⁸ Na' kaŋi gok zejnto' tcho'a nisdona' axt ni bllintento' gana' le Buenos Puertos, gaozə yell Laseana'.

⁹ Zan llate ba wllainto' na' ba chonan dii nxoll shajchnto' lo nisdona' daa ba zoa yilen dii zaga'. Na' goll Páblona' legake':

¹⁰ —Chakbe'id' shi shajchcho nxoll kwiayi' barkwi na' kwiayi'te yoa'na' nsa'n, na' aga toz diiki san lenkzcho le nxoll kwiayi'cho.

¹¹ Per na' x̄an soldadka', bzenagche' che beena' chsa' barkwa' na' che x̄aninna', na' bi bzenague' daa goll Páblona' legake'. ¹² Na' daa bi nak latja' wen yigaannto' na'z shlak chi' dii zaga', zangake' b̄hoglall'gake' shajchnto' kwenche illinnto' yell Fenícena' gana' yigaannto' shlak te dii zaga'. Nakan to latj ga mbani Crétana', gana' choo barkwka', na' bitek choon be'na' daa za' cha'lə ni daa za' lli'lə.

Wze to be' wal lo nisdona'

¹³ Na'ch wzolo ze to be'les dii za' lli'lə, na' beŋ'ka' chsa' barkwa' gokgakile' wakkzə shajgake'. Na'ch wdegake' tcho'azi yell-lio che Crétana' daa lia lo nisdona'. ¹⁴ Ka gok shloll, wzolo to be' wal dii za' cha'lə. ¹⁵ Na'ch wzolon chlligaan barkwa' na' bikzə bi gok gonnto', na' bsanlall'choklənto'n nllig' be'na' len. ¹⁶ Na' ka wdentto' gaozə to yell-liodo' le Clauda daa lia lo nisdona', na' bich zetek be'na'. Na'ch barkwdo'na' ngoyo barkw xenna' bilepnto'n loo barkw xenna', per kaŋi gokan. ¹⁷ Na' ka biyoll bilepnto'n, na'ch b̄chejgake' barkw xenna' rietka' kwenche goklenan daa. Na' daa bllebgake' lljshia barkwa' lo yoxa' latja' le Sirte, na' bitobgake' lech'ka' daa chonan ka chza' barkwa' na' be'gake' latj bllig' be'na' barkwa' kwenche shajan kon ga wlliga'n len. ¹⁸ Na' betiyo, daa zizikli wzech be'na', na' wzologake' bsheshgake' yoa'na' nsa' barkwa' na' bza'l'gake'n loo nisdona' kwenche bichtek gok barkwa' zii. ¹⁹ Na' ka gok shon lla, axt len xshinlaz barkwa' bza'l'nto' loo nisdona'. ²⁰ Na' zan lla bi bli'lao wbillā' ni beljka', na' daa zechga be'na', bich bennto' lez yilanto'.

²¹ Na' ka ba gok zan lla biŋ' gaonto', na'ch Páblona' wzie' ladj beŋ'ka' na' chi'e legake':

—Shel' bzenagle cha' kana' zoacho Crétana', ka wnia' le' bich shajcho, aga bi bnitcho ni bi zoacho dii nxoll, shel'ka'. ²² Na' naa bikzə gonchoplall'zle, la' ni tole bi guet. Toz barkwi kwiayi'. ²³ La' daa nle'yi Chios cha'na' beena' chonlilallaa bselee to anjl bli'lawe' nad'. ²⁴ Na' anjla' wne' nad': “Bi illebo' Pablo. Chonan byen illino' lao beŋ' w̄nabia' Césara', na' ni cho' li' yiyesh'lallii Chioza' yog' beŋ'ka' zejlēno' txen loo barkwi na' bi guetgake'.” ²⁵ Na' naa, li wtiplall'le, la' nxenilallaa Chioza' na' nezyenid' kon ka wna anjla' nad' kayen'nan gak. ²⁶ Per chonan byen wwiacho naklə goncho kwenche yichoonan cho' to lo yell-liodo' dii lia lo nisdona'.

²⁷ Na' ba gok shda' wbill ka bllinnto' gana' de Nisdo' Adriáticoná', na' ni chllig' be'na' barkwa' to ki to ka'lə lo nido'na'. Na' ka bllin chel, beŋ'ka' chsa' barkwa' gokbe'gakile' ba chllinnto' gana' de yo billa'. ²⁸ Na'ch bletjgake' to ya kwenche bchixgake' ka'k' zitj nisa', na' ka bchixgake'n zitjan shin'toyichoa metr. Na'ch ka wza'n zilat' na'ch bizchixgake'n dii yoblə na' zitjan gallichoa metr. ²⁹ Na' daa bllebgake' lljsho' barkwa' lee yajka', bletjgake' tap ya xen dii llia xoziiin kwenche kwe' barkwa' tozga, shel' wxegakile' lii sheeni'te. ³⁰ Na' beŋ'ka' chsa' barkwa' gokgakile' yixonjgake'. Na'ch wzologake' chletjgake' barkwdo'na' daa yoo loo barkw xenna', chontezgake' ka chletj sto ya xen che barkwa'. ³¹ Na'ch Páblona' golle' xan soldadka' na' soldad che'ka':

—Shi beŋ'ki bich yigaangake' loo barkwi, aga wilalat'le shi naa.

³² Na'ch soldadka' bchoggake' rietka' daa nchej barkwdo'na' na' bxopan loo nisa'.

³³ Na' ka ba zoa sheeni' Páblona' golle' legake':

—Li gaolat'. Ba gok shda' wbill bi chaole daa chall chlleble. ³⁴ Na' nia' chonan byen gaolat'le kwenche yiyakshao'lall'le, la' ni tole bi kwiayi'.

³⁵ Na' ka biyoll wna Páblona' ka', na' bexee to yetxtil na' bi'e Chioza' yel' choxken lao beŋ'ka' lene' na' bxoxje'n na' wzoloe' chawe'. ³⁶ Na' ka ble'gakile' chawe', na'ch yoguee bendiplall'gake' wdaogake'. ³⁷ Yog'lol' neto' yoonto' loo barkwa' naknto' chop guioa guiyonshin'to. ³⁸ Na' ka beljgakile', na'ch bzal'gake' trígona' daa nsa' barkwa' loo nisa' kwenche bich goktek barkwa' zii.

Wche' barkwa'yel

³⁹ Na' ka wyeeni', beŋ'ka' chsa' barkwa' aga biyombia'gake' yell-liona', per ble'gakile' to ladj lchi ga choo xoz' nisa' gana' gokgakile' wak sho' barkw che'ka'. Na' bchoglall'gake' lljlekkgake'n lo yoxa'. ⁴⁰ Na' bchoggake' riet che ya xenka' daa chzagaan barkwa' na' wchoonlall'gake'n loo nisa'. Na'ch bisellgake' yaga' daa chaklenen chzechj chlliin barkwa', na' bizeshgake' lechaa daa ze yichjinna' kwenche bllig' be'na'n, na' wzolo barkwa' zjabigaan cho'a nisa'. ⁴¹ Na' jshia xin' barkwa' to ga zoayaa yoxa' loo nido'na' na' gogaan, na' aga gokch yichejan. Na'ch bli che nido'na' wzolon bxoxj btinan xan barkwa'. ⁴² Na'ch soldadka' nan witgake' preska' kwenche ni toe' bi xoa yela' lo nisa' na' yixonjgake'. ⁴³ Per xane'ka' bi bi'e latj witgake' legake' daa goklallee yisle' Páblona'. Na' bene' mandad zigaate beŋ'ka' chak xoa yela' wxit'gake' loo nisa' kwenche yillingake' lo yo billa', ⁴⁴ na' beŋ'ka' bi chak xoagake' yela' wchingake' yagla'ka' wa diika' ba goxj che barkwa' kwenche gak yillingake' lo yona'. Na' ka' bennton', na' yog'lol'nto' billinnto' shi'a shao' lo yo billa'.

28

Páblona' wzoe' Máltana'

¹ Na' ka biyoll billin yog'nto' shi'a shao' lo yo billa', na' wnezinto' yell-liona' len Malta. ² Na' beŋ'ka' lle' na' le wen bengakile' neto', na' daa chak zag na' leyi chakte yeja', bxengake' yi'na' xen na'ch goxgake' yog'nto' kwenche bishaanto'. ³ Na'ch Páblona' btope' xonj xis bill, na' ka bzaleen lo yi'na' bichej to bel'ladjinna' na' wdinyaab neena'. ⁴ Na' ka ble'i beŋ' Máltaka' nal' bel'a' na' Páblona', na'ch che'ljwelle':

—Beŋ' wen xyalja beeni. La'kzi bile' lo nido'na', Chioza' aga wi'e latj ibane'.

⁵ Na'ch Páblona' wllib neena' kwenche bxop bel'a' lo yi'na', na' aga bi gokile'. ⁶ Na' yoggake' chbezgake' sa' neena' yina', wa tokonganzi yilli'e na' guete'. Na' ka ba gok ssha chbezgake' na' ble'gakile' bibi chakile', na'ch wzolo nagake':

—Chioslja beeni.

⁷ Na' gaozə gana' bllinnto' de yell-lío che beena' chnabia' doxen gana' mbani Máltana', na' lie' Publio. Na' blebe' neto' lille'na' na' wzoalennto'ne' shon lla na' benshi'e neto'. ⁸ Na' xa Públiona' die' yo'e dii la' na' chaktie' besa'. Na'ch wyaj Páblona' jawie'ne', na' ka

biyoll be'lwille' Chioza' bxoā neena' yichje'na' na' biyakile'. ⁹ Na' ka wnezi beñ' Máltaka' daa ben Páblona', na'ch wyaj yog' beñ'ka' bi shao' lawe'na' na' biyakgakile'. ¹⁰ Na' beñ'ka' le benshiigake' neto', na' ka biza'nto', dii zan dii bengake' neto', diika' iyalljinto'.

Ka bllin Páblona' Rómana'

¹¹ Shoñ beo' wzoanto' Máltana'. Na' ka biza'nto' biyoonto' to loo barkw dii bchej Alejandríana' daa lekzka' bigaanān Máltana' shlak wde dii zaga'. Na' xin' barkwa' da' chop lwaa lsak' chios che beñ' griegoka', beñ'ka' le Cástor na' Pólux. ¹² Na' ka bllinnto' yell Siracúsana', na' wzoanto' shoñə lla. ¹³ Na' bizza'nto' Siracúsana' bllintento' yell Régiona'. Na' betiyo wzolo chak be'na' daa za' lli'lə na'ch gok wza'chnto', na' bichop lla bllinnto' yell Puteólina' gana' bichejnto' loo barkwa'. ¹⁴ Na' Puteólina' billagnto' baļ beñ'ka' nak neto' txen chonlilall'nto' Jesúza', na' wñabigake' neto' yigaañlennto' legake' to xman. Na' ka wde xmanna', na'ch biza'nto' zejnto' Rómana'. ¹⁵ Na' beñ' Rómaka' nonlilall' Jesúza', ka wnezgakile' ba zoa illinnto', na'ch wyajgake' jlezgake' neto' yella' le Apio, gana' chak yaana', na' gana' le Shoñ Yoo Ga Chigaañ Beñ'. Na' ka ble'i Páblona' legake', bi'e yel' choxken Chioza' na' biyondiplallee. ¹⁶ Na' ka bllinnto' Rómana', xan soldadka' bene' preska' lall' na' beena' chñabia' soldadka' zoa na', san Páblona', bi'e latj wzoe' chele', na' toz soldada' wdape'ne'.

Páblona' bi'e xtill' Jesúza' Rómana'

¹⁷ Na' ka gok shoñ lla zoa Páblona' na', na'ch goxe' beñ' Israelka' zakii, beñ'ka' lle' Rómana'. Na' ka bdopgake' na' golle' legake':

—Le' beñ' bish', shlak wzoa' Jerusalénna' beñ' wlall chechoka' lle' na' beñ'gake' nad' na' bengake' nad' lo na' beñ' Rómaki la'kzi aga bi ben' chegake' na' bin' chishj' diika' wna dii xoxzto'choka' chiyaļ' goncho. ¹⁸ Na' biyoll wñabyollgakile' nad' bin beñ', beñ' wñabia'ka' goklall'gake' wsangake' nad', la' aga bi ben' kwenche wchogbia'gake' guet'. ¹⁹ Per beñ' wlall chechoka' lle' Jerusalénna' aga be'gake' latj yisangake' nad'. Na' benan byen wñab' tia' lao beñ' wñabia' Césara' kwenche gone' yel' joschis cha'na'. Per aga gaw' xya daa ben beñ' wlall chechoka' cha'. ²⁰ Na' ni cheyi dga chak chan' ba gox' le' kwenche ile'id' le' na' we'len' le' dill'. La' ni cheyi daa noncho lez, cho' beñ' Israelan, nchejgake' nad' gdenki.

²¹ Na'ch che'gake' Páblona':

—Aga bin' yish ila' laonto'ni dii za' Judeana' dii we'n dill' cho'. Na' ni to beñ' wlall chechoka' bin' ila' biz gon inagake' cho'. ²² Na' cheeninto' wzenagnto' bi dillaan wi'o, la' nezinto' doxenz chnegake' zban che beñ'ka' nakgake' txen dii koba' chliile.

²³ Na'ch bzoagake' to lla kwenche idopgake'. Na' ka bllin llana' blligake' bia', beñ' zan bdop gana' zoa Páblona'. Na' be'lene' legake' dill' do lla, bzajniile' legake' che yel' wñabia' che Chioza'. Na' bene' to dii byen kwenche shajle' beñ'ka' che Jesúza'. Bzajniile' legake' diika' nyoj che Jesúza' lee ley che dii Moiséza' na' diika' bzej dii beñ'ka' wdixjee daa goll Chioza' legake'. ²⁴ Na' bale' wyajle'gake' diika' goll Páblona' legake', na' zi bale' bi wyajle'. ²⁵ Na' daa bi gok toz xtilleeka', na' wzolo chilleshgake'. Ka gokbe'i Páblona' ba chilleshgake', stoz dga golle' legake':

—Shlichakzan goll Espíritu Sántona' dii Isaíaza', daa bi'e dill' lao dii xoxzto'choka' chi'e legake':

²⁶ Wyaj na' jellsha beñ' Israelka':

La'kzi wzenagle bi shajni'kzile

Na' la'kzi chle'teile bi gakbe'kzile bin zejin.

²⁷ Bikzə bi rson chazle, daa naklikzle lall'do' wal,

na' chonle ka kwell lchoļ,

ni bi cheenile wzenagle,

ni bi cheenile ile'ile,

na' ni bi cheenile shajniile

kwenche yiyaj yilenile

na' gon' ka yiyakshao' yichjlall'do'lena'.

²⁸ Chiyal' inezile Chioza' ba ngwee xnezi yisle' ben'ka' bi nak ben' Israel kwenche bi kwiayi'gake', na' lelgake' wlebgake' cho'a xtilleena'.

²⁹ Ka biyoll goll Páblona' legake' ka', na'ch ziyajgake' chakdil-len ljwellgake'.

³⁰ Chop yizyen' bigaan Páblona' yooná' gana' wdixje', na' blebe' nottezə ben' jawia le'.

³¹ Na' aga no bsej blon bzajni Páblona' ben'ka' nakan nak yel' wñabia' che Chioza' na' bli' bsedile' ben' cho'a xtil' Xancho Jesucristona'.

Kart daa bzej Páblona' na' bseleen lao ben'ka' nonlilall' Jesucrístona' yell Rómana'

¹ Nad' Pablo, nak' wen llin che Cristo Jesúsá'. Chioza' gox wñabe' nad' gak' postl che', na' bene' lall' na' wi'a dill' wen dill' kob che'na' ² cheyi daa bchebe' gone', na' dii ben'ka' wdixjee daa golle' legake' kani'yi bzejgake'n lee Cho'a Xtilleena'. ³⁻⁴ Na' cho'en dill' che Xiine' Jesucrístona', beena' nak Xancho, daa goke' benech, na' goke' xiin dia che dii rey Davina'. Na' Espíritu Sántona' bli'e nan nake' Xiin Chioza', beena' nak ben' yel' wak choo yel' wak xen daa bibane' ladj ben' wetka'. ⁵ Na' daa nonlilall'nto' Jesucrístona', Chioza' ba goklene' neto', na' nzoe' neto' naknto' postl che Jesucrístona', na' bene' lall' na'nto' ljtixje'nto' xtilleena' kwenche doxen yell-lioni soa ben' gonlilall'gake'ne' na' wzenaggake' che', na' sho'e balaan. ⁶ Na' lenle ba gox wñab Chioza' kwenche gakle lall' na' Jesucrístona'.

⁷ Chzej' yog'lol-le, le' lle'le yell Rómana', le' ba gox wñab Chioza' nakle lall' nee na' chakile' le'. Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

⁸ Zigaate nia' le', ni cheyi daa ben Jesucrístonan' chak wi'a Chioza' yel' choxken che yog'loltele, la' doxen choe' ben' dill' ba nonlilall'le Jesucrístona'. ⁹ Chios, beena' chon' xshine'na' do yichj do lallaa daa chyixji'a dill' wen dill' kob che Xiine'na', nez nle'ile' tlizi chñabidee gaklene' le' kat' choe'lwillee. ¹⁰ Na' toshiizi chñabidee wi'e latj yidwia' le', na' shi cheenile' yid', lekze' kwee xnezin. ¹¹ Le chzelallaa yidwia' le' na' we'len' le' dill' daa gaklenan le' soachechchle gonlilall'chle Jesucrístona'. ¹² La' cheenid' wtipch lall' ljwellcho daa nonlilall'chone'.

¹³ Le' ben' bish' na' le' ben' zan', cheenid' inezile zan shii ba goklallaa yidwia' le' per ax̄t naa bikzan' gakan. Cheenid' yidwia' le' kwenche gakchachle gonlilall'le Jesucrístona' na' soach ben' gonlilall'gake'ne' ladjlena', ka ba gok che ben'ka' bi nak ben' Israel yellka' gana' ba wyaa. ¹⁴ Nezd' chonan byen we'len' yog' ben' xtill' Crístona', ka ben' griego na' ka ben' bi nak ben' griego, ka ben' sin' na' ka ben' bi nteyi. ¹⁵ Daan, cheenid' lekzka' chixje'id' le' dill' wen dill' kob che'na', le' zoale Rómana'.

¹⁶ Bi chiyii chido'id' wi'a dill' wen dill' kob che Jesucrístona', la' nsa'n yel' wak che Chioza' kwenche yislan nottez ben' gonlilalleene', zigaate ben' Israelka', na' lekzka' ben'ka' bi nak ben' Israel. ¹⁷ Na' dill' wen dill' kob che'na' chliin cho' nakan goncho yiyakcho ben' li ben' shao' lao Chioza'. Na' chzajniin cho' chiya' gonlilall'chone' na' bich bi de sto dii gaklenan cho'. Kon ka na Cho'a Xtilleena': "Beena' nak ben' li ben' shao' daa nonlilalle nad', beenan' ibane'."

¹⁸ Yel' zak'zi che Chioza' za'n yabana' ni che ben'ka' bi chzenag che' na' chongake' chiya dii mal, diika' chsej chllongakan gombia'gake' daa nak dii li. ¹⁹ Daa cheeni Chioza' inezgakile' che', ba nezkzgakile'n, la' Chioza'kzan ba bliile'n legake'. ²⁰ La'kzi bi chle'icho Chioza', chle'icho diika' bene' na' chakbe'icho ka nake'. Daa bxe bsile' yell-lioni nakbia'cha nake' Chios na' yel' wak che'na' biga te cheyin. Na' bibi de dii wda'i ben' inagake' bi nezkakile' shi zoe'. ²¹ La' la'kzi nezkakile' zoa Chioza', bi choe'la'ogake'ne' ni bi choe'gake'ne' yel' choxken. San yoolə yichjgake' diika' bi zakii na' nchol nnti yichjlall'do'eka' daa bi ntegakile'. ²² La'kzi nazgake' nakgake' ben' sin', daa chongake' chli'n nakgake' ben' bi nteyi. ²³ Lwaa dii nan koogake' Chioza' balaan, beena' biga te cheyin, lwaa lsak' benecha'lə, ben'ka' chde cheyin, wloogake' balaan, na' ax̄t no lwaa lsak' ba ze xan yabana', na' lwaa lsak' ba zoa tap ni'a na'yin, na' lwaa lsak' ba chxob le'in.

²⁴ Na' daa chongake' ka', Chioza' ba wchoonlallee legake' kwenche gonchgake' dii zbanka' cheeni beli chen che'ka', na' benlen ljwellgake' diika' nak zban. ²⁵ Lwaa dii nan

shajle'gake' daa nak dii li che Chioza', wyazlall'chgake' daa nak de wxiye'. Be'la'ogake' diika' bxe bsil Chioza' na' wloogake'n balaan lwaa dii nan koogake' le' balaan daa bxe bsile' legakan na' chidolee we'la'ochone' toshiizi. Kan' nakan.

²⁶ Daan, Chioza' ba wchoonlallee legake' kwenche gonchgage' dii zbanka' cheeni beli chen che'ka', na' axt noolka' chiyat'len ljwell noolgake' na' chongake' daa bi noe' Chioza' latj gongake'. ²⁷ Na' ka'kzə beñ' byoka', lwaa dii nan soalengake' noolə, chibalgakile' chiyat'len ljwell beñ' byogake', na' chonlen ljwellgake' daa nak dii zban. Na' chzak'zi'len beli chen che'ka' yel' zak'zi'na' daa chido'lgake' daa chongake' dii malka'.

²⁸ Na' daa bi goklall'gake' wzenaggake' che Chioza', wlej yichje' legake' kwenche gontegagake' dii mala' kon ka nan loo yichjlall'do'eka' daa nxinj. ²⁹ Shgal' dii bi yejni'alallii chongake', choe'gake' cho'a xbayi beli chen che'ka', chzelall'gake' gat' kwe'gakile', chibagakile' gongake' dii malka'. Nakgake' beñ' xe' beñ' xga', beñ' wen xya, beñ' wishagdilə, beñ' wxiye', beñ' chibayi gon mal che beñ', beñ' wichitj dill', ³⁰ beñ' chyilj chzan xtill' beñ', beñ' chakzbani Chioza', beñ' bibi nalli, beñ' cha'sibə na' beñ' chshalj chshon. Chiyiljall'gake' bi dii mal gongake', bi chzenaggake' che xaxna'gake', ³¹ bi ntegakile', bi chongake' daa chchebgake', bi chakgakile' beñ', ni bi chiyesh'gakile' beñ'. ³² La'kzi nezgakile' ba chhoglo Chioza' chiyal' guet beñ'ka' chon ka', zizikchli chongake'n, na' axt chiba chizak'gakile' kat' chon beñ' yoblan.

2

¹ Na' li' naa, nottezə nako', kat' chchoglo' che beñ' nape' dol' lao Chioza', lekzka' che kwinton' chnio', la' lenkzo' chono' diika' chongake', na' bibi de wda'ilo'n ino' bibi xto'loo de. ² Na' nezicho Chioza' chone' kon ka chiyal' gone' kat' chchogloe' sak'zi' beñ'ka' chon dii malka' nak ka'. ³ Na' li' no' che beñ'ka' chon dii malka' napgake' dol', bi gakzilo' wilo' lo yel' zak'zi' che Chioza', la' ka'kzan chono'. ⁴ ¿Achakzilo' bi wsak'zi' Chioza' li' ni che daa chono'? ¿Abi chakbe'ilo' ni che yel' beñ' wen che'nan' chiyesh'lallile' cho' na' chape' yel' chxenlall' checho, daa cheenile' yiyaj yilenicho che dii malka' choncho? ⁵ Per daa nako' yichjlall'do' chech na' bi cheenilo' yiyaj yilenilo', kwintezo' chkwa' chti'azo' yel' zak'zi'ka' illaglo' kat' illin lla wchoglo Chioza' che beñ' kon ka chiyal' gone'. ⁶ La' Chioza' gone' ka gak che to to beñ' kon ka chidolee. ⁷ Beñ'ka' zoatezi zoagake' chongake' daa nak wen kwenche sho'gake' balaan, wi'e yel' mban chegake' zejli kani na' biga lliia ile'gakile' yel' wita'. ⁸ Na' beñ' yaalall'ka', beñ'ka' chzoagake' ka'lə daa nak dii li na' nogake' diika' bi yejni'alallii, wsak'zi'e legake' daa le chllée legake'. ⁹ Yel' zak'zi' wal yen ile'i yog' beñ'ka' chon dii mala', zigaate beñ' Israelka' na'tech beñ'ka' bi nak beñ' Israel. ¹⁰ Per beñ'ka' chon dii wenna', sho'gake' balaan na' soagake' mbalaz, zigaate beñ' Israelka' na'tech beñ'ka' bi nak beñ' Israel.

¹¹ La' Chioza', tlap chone' yel' joschis, aga nakzi beñ' chakile'. ¹² Yog' beñ'ka' bi nombia' ley daa bzej dii Moiséza' kwiayi'gake' shi bengake' dii mala', la'kzi bi nezgakile' daa nan. Na' yog' beñ'ka' ben dii mala' na' neztegakile' daa na leya', choglo chegake' kon ka na leya' gak chegake'. ¹³ La' kono yiyak beñ' li beñ' shao' lao Chioza' daa nombia'ze' leya', san beena' chon kon ka nan, len' yiyake' beñ' li beñ' shao' lawe'na'. ¹⁴ Ka nak beñ'ka' bi nak beñ' Israel na' bi nezgakile' bin na ley che dii Moiséza', shi tobialozgake' chongake' ka na leya', nakbia' yoo to ley loo yichjlall'do'eka'. ¹⁵ Na' daa chongake' ka', chli'n yoo loo yichjlall'do'eka' daa cheeni leya' gongake'. Na'ch yichjlall'do'eka'kzə chonan ka chakbe'gakile' shi dii wen wa shi dii malan bengake'. ¹⁶ Kan' gak llana' gon Chioza' lo na' Jesucristona' wchogloe' che diika' yoo loo yichjlall'do' beñ' yell-lioni, kon ka na dill' wen dill' kob che'na' daa cho'a dill'.

¹⁷ Na' li' nako' beñ' Israel, chakilo' nako' beñ' wen lao Chioza' daa nezilo' daa na ley che dii Moiséza' na' chep cha'lalloo daa nombi'o Chioza'. ¹⁸ Chakilo' nezilo' daa cheeni Chioza' gono' daa chli' chsedi leya' li' gono' daa nakch wen. ¹⁹ Chakilo' wak koo beñ' lo nez li che

Chioza' na' gaktio' ka beeni' lao ben'ka' chda lo yel chola'. ²⁰ Na' chakilo' wak wzajniilo' ben' bi nteyi na' wakte wli' wsedilo' ben'ka' bin' shajni'yenii daa nombi'o leya' daa nsa' do ka nak yel' chajni na' daa nak dii li. ²¹ Na' shi li' chli' chsedilo' ben' yoblə, ¿berache bi chli' chsedilo' ben' bi kwane', ¿berache li'lə chbanzo'? ²² Na' li' chsedilo' ben' bi chiya' soalene' nool bi nak nool che', wa ben' byo ben' bi nak ben' che', ¿berache li'lə chonzo' ka'? Na' li' chwiilo' lwaa lsak' diika' choe'la'o ben', ¿berache chzi' chbanzo' bi de loo lill xlatjinka'? ²³ Chshalj chshono' daa nombi'o leya', per chnit chdio' Chioza' daa bi chono' ka nan. ²⁴ Dii liyen'nan na Cho'a Xtill' Chioza': "Ben'ka' bi nak ben' Israel chnegake' zban che Chioza' ni chele daa chonle mal."

²⁵ Dii li sen daa le circuncisión daa yoo kwerp cho'na' zak'kzin shi chzenago' daa na leya', per shi bi chzenago'n bibi zjanayi daa yoo senna'. ²⁶ Na' shi beena' bi yoo senna' chone' ka na leya', lao Chioza' nake' ka ben' yoo sen. ²⁷ Na' beena' chon ka na leya' la'kzi bi yo'e senna', yili'e lawo' napo' dol' daa bi chono' ka na leya' la'kzi nombi'on na' yootio' senna'. ²⁸ Bi gatzilo' nako' dowalj ben' Israel daa chono' yog' diika' yoolocho choncho cho' ben' Israel, ni daa yoo kwerp cho'na' senna'. ²⁹ San dowalj ben' Israel nak beena' nonlilall' Chioza' do yichj do lallee, na' daa ba bikob Espiritu che'na' yichjlall'do'ena' nakan ka senna' daa chli'n nake' lall' na' Chioza'. Na' che beenin we' Chioza' xtillee chone' wen, aga ben' yell-lionin.

3

¹ Na' ¿bera yel' goklen che ben' Israelka' de? Na' ¿bera banez si'gake' daa yoogake' sen daa le circuncisión? ² Dii xen wal banez chegake' de. La' zigaate, legaken' be' Chioza' Cho'a Xtilleena'. ³ ¿Anti chakile ni cheyi daa bi chajle' bal' ben' Israelka' che', ba wlej yichje' legake'? ⁴ ¿Bi nakan ka! Chioza' toshiizi chone' ka ba bchebe' gone' la'kzi yog' ben' yell-lioki nakgake' ben' wxiye'. Cho'a Xtilleena' nan:

Daa nchogbi'o gak che ben' saaxyana' nakbia'chan zejan shli, na' gakbe'gakile' chono' yel' joschis kon ka chiya' gakan.

⁵ Na' shi dii mala' choncho chli'n Chioza' nake' ben' li ben' shao', ¿bera inacho, lla? ¿Ainacho Chioza' bi nake' ben' wen daa chsak'zi'e ben'ka' chon mal? (Nia' ka' daa chaki ben' yell-lioki ka'.) ⁶ Per ¿bi nakan ka! La', shel'ka' Chioza' bi nake' ben' li ben' shao', aga wak gone' yel' joschis che ben' yell-lioni.

⁷ Na' zoa ben' nagake', shi yel' wxiye' chechona' chli'n yel' li che Chioza' na' chisgolan balaan che'na', ¿biche naze' nakcho ben' saaxya, shka'? ⁸ Na' daa chakgakile' ka', wnaljagake': "Goncho dii mala' kwenche sho'che' balaan." Zoa ben' nagake' kan' chli' chsedinto', per bi nakan ka'. Na' ben'ka' naz ka' chidol'gake' yel' zak'zi' che Chioza'.

⁹ ¿Nakra lla? ¿Anakchnto' neto' ben' Israel ben' wench aga ka ben' yoblə, lla? ¿Bi nakan ka! La' ba wniakz' yog'cho, ka neto' ben' Israel na' ka'kzə ben'ka' bi nak ben' Israel, toz ka napcho dol' lao Chioza' daa ba bencho dii mala'. ¹⁰ La' Cho'a Xtill' Chioza' nan:

Kono ben' li ben' shao' zoa, ni tlišee.

¹¹ Ni to ben' bi chajniile' daa nak dii li, ni kono zoa ben' chiyilj Chioza'.

¹² Yog'z ben' ba wlaagake' lo nez lina', na' yog'zgake' nxinj yichjlall'do'eka'.

Ni togagake' bi chon dii wen.

Ni tliš' ben' chon wen bi zoa.

¹³ Ka zban chla' to loo ba che ben' wet dii nyalj, kan' nak dill' zbanka' chchej cho'a lolleeka'. Kon cho'a lolleeka' chziye'gake'.

Na' ka yierb che bel' nak dill'ka' choe'gake'.

¹⁴ Lillinzə chyishjgake' bia' blag' che ben' na' choe'gake' dill' zi'bia'.

¹⁵ Bi nallgakile' chittezgake' ben'.

16 Gattezə zejgake' chlliayi' chlliadegake' na' chgoogake' yel' zi' yel' yesh'.

17 Bi nombia'gake' bi daa ne' soalengake' beṇ' mbalaz.

18 Bi chall chlebgake' gon Chioza' xya chegake'.

19 Na' nezicho beṇ'ka' nagake' chongake' daa na ley che Chioza' chiyal' gongake' doxen ka nan. Na' daa kono gok gonan, ba bchoglo Chioza' che yog'lolcho, cho' beṇ' yell-lion, ka neto' beṇ' Israel na' ka beṇ' bi nak beṇ' Israel, napcho dol', na' ni to kono gak ina: "Bibi dol' nap'." 20 Daan, ni to beṇ' bi gak ine' nake' beṇ' li beṇ' shao' lao Chioza' daa chone' ka na leya'. La' leya' chonan ka chakbe'icho nakcho beṇ' saaxya.

21 Na' naa Chioza' ba bliile' cho' nakan goncho kwenche yiyakcho beṇ' li beṇ' shao' lawe'na', na' aga daa goncho ka na leyan'. La' ka leya', na' ka diika' bzej dii beṇ'ka' wdixjee daa goll Chioza' legake', toz ka choe'gakan dill' cheyin. 22 Chioza' ne' yog'lol beṇ' gonlilallee Jesucristona' yiyake' beṇ' li beṇ' shao' lawe'na', nottezə nake'. 23 La' yog'lolza beṇ' bxinj blengake' na' ni to kono nak dowalj beṇ' wen ka nak Chioza'. 24 Per daa nak Chioza' beṇ' wen, chiyone' beṇ' beṇ' li beṇ' shao' daa wdixj Cristo Jesúsza' saaxya che'ka', na' bibi zak'gakile'n. 25 Chioza' bselee Crístona' blalj xchene'na' na' wite' ni che saaxyaka' bencho. Na' ni che xchene'na', nottezə beṇ' gonlilalleene', Chioza' yizi'xene' saaxya che'na'. Na' ka' chli'e nan nake' beṇ' chon daa nak shli. La' daa nape' yel' chxenlall', bene' ka'z saaxyaka' ben beṇ' kana' bin' wselee Crístona'. 26 Na' naa, daa bselee Jesucristona' chli'e nake' beṇ' chon daa nak shli daa ne' nottezə beṇ' gonlilallee Jesúsza' nake' beṇ' li beṇ' shao' lawe'na'.

27 Kono gak wshalj wshon ine' nake' beṇ' li beṇ' shao' lao Chioza' ni che ba bene' ka na leya'. La' aga no chon doxen ka nan, san Chioza' ne' nottezə beṇ' gonlilallee Crístona' nake' beṇ' li beṇ' shao' lawe'na'. 28 Na' ba nezicho chiyakcho beṇ' li beṇ' shao' lao Chioza' daa chonlilall'cho Jesucristona' na' aga daa choncho daa na leyan'.

29 ¿Achakile Chioza' nake' Chios che to beṇ' Israelka'zə? ¿Bi nakan ka! Lekzka' nake' Chios che beṇ'ka' bi nak beṇ' Israel. 30 La' toz Chiozan' zoa, beena' chiyone' beṇ' li beṇ' shao' beṇ'ka' chonlilall' Crístona'. Na' toz ka chone' che nottezə beṇ' chonlilalleene', ka beṇ' Israel, beṇ'ka' yoo sen daa le circuncisión, na' ka beṇ' bi nak beṇ' Israel. 31 ¿Achakile daa chonlilall'cho Jesúsza' chzoacho leya' ka'lə? ¿Bi nakan ka! La' nezicho nakan to dii zakii.

4

1 ¿Bera ka inacho che dii xozxto'cho Abrahamama'? Nak gok biyake' beṇ' li beṇ' shao' lao Chioza'. 2 Shel'ka' biyak dii Abrahamama' beṇ' li beṇ' shao' lao Chioza' ni cheyi diika' bene', zaklja bshalj bshone' lao beṇ' yell-lioni, per aga lao Chioza'. 3 La' Cho'a Xtill' Chioza' nan: "Dii Abrahamama' wyajli'e che Chioza', na' Chioza' wne' nake' beṇ' li beṇ' shao' lawe'na'."

4 Kat' to wen llin chkaa laxje', bi nakan to dii chzani beṇ' cho'ene', san nakan dii chiyal'kz wi'ene'. 5 Per shi to beṇ' shajli'e che Chios, beena' chiyon beṇ' saaxyana' beṇ' li beṇ' shao', Chioza' ile'ile'ne' beṇ' li beṇ' shao' daa gonlilalleene', la'kzi bibi bene' kwenche idolee yel' goklen che Chioza'. 6 Dii Davina' bi'e dill' che yel' mbalaz che beena' na Chioza' nake' beṇ' li beṇ' shao' la'kzi bibi bene' kwenche bdolile'n. 7 Ki wna dii Davina':

Chakomba beena' ba biyakxen xtoleena',
na' ba biyol binit saaxya che'na'.

8 Chakomba beena' bi yizi' Xancho Chioza'ne' kwent.

9 ¿Achakile to beṇ'ka' yoozgake' sen daa le circuncisión wak soagake' mbalaz? Bi nakan ka', san lekzka' beṇ'ka' bi yoo senna' wak soagake' mbalaz. La' ba wniakz' Chioza' wne' dii Abrahamama' goke' beṇ' li beṇ' shao' lawe'na' daa wyajli'e che'. 10 Na' ¿batran wna Chioza' ka'? ¿Aba wyoo dii Abrahamama' senna' kana' wna Chioza' nake' beṇ' li beṇ' shao'? ¿Awa bin' sho'en? Chioza' wne' ka' kana' bin' sho'en. 11 Na'techlə wloo kwine' sen daa le circuncisión na' senna' bli'n ba nake' beṇ' li beṇ' shao' lao Chioza' daa benlilalleene'. Daan, dii Abrahamama' nake' xozxto' yog' beṇ' nak beṇ' li beṇ' shao' lao Chioza' daa

nonlilall'gake'ne', la'kzi bi yoogake' seṇna'. ¹² Na' dii Abrahama' lekzka' nake' xoxzto' neto' yoonto' seṇ daa le circuncisión. Per aga daa yoonto' seṇna'zan, san daa nonlilall'nto' Chioza', beena' ba nonlilall' dii Abrahama' kana' zi' sho'e seṇna'.

¹³ Chioza' bchebe' gaki che dii Abrahama' len xiin dia che'ka' doxen yell-lioni. Na' bchebe' wi'en legake' aga daa bengake' doxen ka na ley che dii Moisézan', san daa benlilall' dii Abrahama' Chiozan', wna Chioza' nake' ben' li ben' shao' lawe'na'. ¹⁴ La' shel' to ben'ka' chonz ka na leyan' gaki chegake' daa bcheb Chioza' wi'e dii Abrahama', bibi zjanayin gonlilall'cho Chioza' na' aga bi zakii daa bchebe' gone', shel'ka'. ¹⁵ Leya' nsa'n yel' zak'zi' che ben'ka' bi chon ka nan. Per shi bibi ley de, aga bi de dii inan napgake' dol'.

¹⁶ Ka nak daa bcheb Chioza' gone' che dii Abrahama', nakan to goklen daa chone' che nottez ben' nonlilalleene' kwenche yog'zə xiin dia che'ka' ikaagake' daa we' Chioza' legake'. Bi nakan che to ben'ka' chonz ka na leya', san lekzka' nakan che nottezə ben' chonlilall' Chioza' ka benlilall' dii Abrahama' le'. La' dii Abrahama' nake' xoxzto' yog'cho cho' nonlilall'chone'. ¹⁷ Ka na Cho'a Xtill' Chioza': "Ba nzoa' li' kwenche gako' xaxna' ben' zan inleeb." Na' Chioza', beena' benlilall' dii Abrahama', nape' yel' wak yisbane' ben' wetka' na' wxə wsile' diika' bin' gak.

¹⁸ Kana' bich non dii Abrahama' lez soa xiine', wyajli'e daa goll Chioza'ne' na' bene' lez gak ka golle'ne'. Ka' gok biyake' xoxzto' ben' zan inleeb, kon ka goll Chioza'ne', chi'e: "Kan' shesh shan xiin dia cho'ka'." ¹⁹ Biga gokchoplallee che Chioza', la'kzi chakbe'ile' ba nake' ben' golə par soa xiine', la' ba zoa gakile' to guiyoa yizan. Na' ni bi gokchoplallee la'kzi gok dii Sárana' nool will. ²⁰ Bi gokchoplallee, san zizikli benlilallee gak daa bcheb Chioza' gone' na' be'laweene'. ²¹ La' wnezile' kwaslol' Chioza' nape' yel' wak kwenche gone' yog' diika' chchebe'. ²² Daan ble'i Chioza'ne' ben' li ben' shao' daa wyajli'e che'.

²³ Na' daa nan "Chioza' ble'ile'ne' ben' li ben' shao'", aga che tozen' nan ka', ²⁴ san lekzka' cho'en dill' checho cho' nonlilall'cho Chioza', beena' bisbane' Xancho Jesucristona' ladj ben' wetka', la' lenchon chle'i Chioza' ben' li ben' shao' daa nonlilall'chone'. ²⁵ Bzani Chioza' Xancho Jesucristona' wite' ni che saaxya chechoka' na' bisbane'ne' ladj ben' wetka' kwenche biyakcho ben' li ben' shao' lawe'na'.

5

¹ Chioza' ba biyone' cho' ben' li ben' shao' daa ba nonlilall'chone', na' ba bizoalenchone' wen daa wit Xancho Jesucristona' ni checho. ² Na' daa ba nonlilall'cho Cristona', Chioza' toshiizi chonile' cho' wen na' chibaicho daa noncho lez lljazoalenchone'. ³ Na' aga to dgazan yibaicho, san lekzka' yibaicho yel' zak'zi'ka' chle'icho yell-lioni, daa nezicho chongakan ka soachehcho gonlilall'chone'. ⁴ Na' shi zoachehcho chonlilall'chone' shlak chllaglocho yel' zak'zi'ka', na' chli'n nakchacho lao Chioza'. Na' shi nakchacho lao Chioza' na' noncho lez lljazoalenchone'. ⁵ Na' ka nak daa noncho lez, bi te bi la ki gakan, la' Chioza' ba bliile' cho' yel' chaki che'na' daa ba nzoe' Espiritu Santo che'na' loo yichjlall'do'choni.

⁶ Kana' ni nakcho ben' wen dii mal na' aga bi gok goncho kwenche bi kwiayi'cho, kana'yen' bid Cristona' wite' ni checho cho' nakcho ben' saaxya. ⁷ Aga ga zoa to ben' lii izanteyi kwine' guete' ni che to ben' nak ben' li ben' shao'. Kayaadia shi yiyaxji to ben' izani kwine' guete' lwaa to ben' wen. ⁸ San Chioza' bli'e ka chakile' cho' daa bzanile' Cristona' wite' ni checho kana' ni nakcho ben' saaxya. ⁹ Daa blalj xchen Cristona' wite' ni checho, ba biyon Chioza' cho' ben' li ben' shao' lawe'na'. Na' daa wite' ni checho, zalechlin ki yisle' cho' lao yel' zak'zi'na' kat' illin lla wchoglo Chioza' che yog'lol' ben'? ¹⁰ Shi kana' chakzbanicho Chioza', bselee Xiine'na' wite' ni checho kwenche bizoalenchone' wen, zalechlin naa ba bisbane'ne' ladj ben' wetka' ki yisle' cho' daa ba zoalenchone' wen? ¹¹ Na' aga diika'z chibaicho, san lekzka' daa nombia'cho Chioza', la' ni che Xancho Jesucristonan' bizoalencho Chioza' wen.

¹² Ni che yel' widenag che toz beñaan golj wxe saaxyana' yell-lioni, na' ni che saaxyana' wyoo yel' wita'. Ka' gok wzolo chet yog' beñ', la' yog'zə beñ' chongake' dii mala'. ¹³ Kana' zi' we' Chioza' dii Moiséza' ley che'na', ba chonkzə beñ' yell-lioni dii mala'. Per shi bibi ley de, aga bi de dii gawan xya chegake'. ¹⁴ La'kzi aga bi ley got' dii gawan xya chegake', yel' wita' wñabia'n lao yog'lol beñ'ka' ben dii mala' wzololenzan dii Adánna' bllinten kana' wban dii Moiséza', la'kzi bi wdishjgake' cho'a xtill' Chioza' ka ben dii Adánna'. Ni che dii Adánna' wyoo yel' wita' yell-lioni, san Jesucrístona', beena' wloo Chioza' xñezin wselee kani'teyi, bxie' yel' mban zejli kañi.

¹⁵ Per ka nak dii mala' ben dii Adánna', bi gak wsaklebichon ka dii wenna' ben Chioza' checho, dii xen wal nlla'n. Daa bxinj blen dii Adánna' yog'zə beñ' chet, san daa bsel' Chioza' Jesucrístona' kwenche wite' ni checho, bene' to dii wen inleeb che yog' beñ' gonlilalleene'. ¹⁶ Bi gak wsaklebicho daa ben dii Adánna' kon yel' goklen daa ben Chioza' checho. La' wchogbia' che yog'lol beñ' guetgake' ni che toz dii mala' daa ben dii Adánna'; san yel' goklen che Chioza' daa chone' checho chiyone' cho' beñ' li beñ' shao' lawe'na', la'kzi nakcho beñ' saaxya nleeb. ¹⁷ Shi yel' wita' wñabia'n daa bxinj blen dii Adánna', ¿alechlin ki inabia' beñ'ka' ba biyon Chioza' beñ' li beñ' shao' daa nake' beñ' wen inleeb, ni che Jesucrístona', beena' be' to yel' mban kob chegake'?

¹⁸ Dii mala' ben dii Adánna' benan ka bchoglo Chioza' che yog' beñ' guetgake', na' ka'kzə dii wenna' daa ben Jesucrístona' benan ka yog' beñ'ka' gonlilall'gake'ne' yiyakgake' beñ' li beñ' shao' na' gat' yel' mban chegake' daa bi te cheyin. ¹⁹ Daa gok dii Adánna' widenag, wchoglo che yog' beñ' nakgake' beñ' saaxya, per daa gok Crístona' beñ' wizoa dill', beñ' zan yiyak beñ' li beñ' shao'.

²⁰ Chioza' bi'e ley che'na' kwenche wyanch xtol' beñ' yell-lioni daa bi bzenaggake' cheyin. Per la'kzi wyanch xtoleeka', Chioza' bli'che' yel' chiyesh'lallii che'na'. ²¹ Na' daa chet yog' beñ', chli'n saaxyana' napan yel' wak wsi wchogan cho'. Per lekzka' yel' chiyesh'lallii che Chioza' chli'n napan yel' wak yiyonan cho' beñ' li beñ' shao' na' goñan yel' mban checho zejli kañi ni che Jesucrístona', beena' nak Xancho.

6

¹ ¿Beran inacho ñaa, lla? ¿Agonchcho saaxyana' kwenche wli'ch Chioza' yel' chiyesh'lallii che'na'? ² ¡Aga kan' goncho! La' cho' ba nakcho ka beñ' ba wit lao saaxyana' daa bich chñabi'an cho'. Daan, bich chiyal' gonchon txen. ³ ¿Abi ñezile ka wchoacho nisa' daa nakcho Cristo Jesús'a' txen, lekzka' zejin witlenchonen'? ⁴ Daa wchoacho nisa' zejin witlenchone' na' bgash'lenchone' kwenche gat' to yel' mban kob checho ka gok che Crístona' kana' bisban Xacho Chioza' le' kon yel' wak xen che'na'.

⁵ Na' daa ba witlenchone', ka'kzan yibancho ka bibane' ladj beñ' wetka'. ⁶ Nezicho yel' mbanna' nsa'cho kana', wlliyi'n ka wit Crístona' lee yag cruza' kwenche bich we'cho cho'a xbayi beli chenna' na' bich inabia' dii mala' cho'. ⁷ La' kat' to beñ' ba wite', bich chñabia' dii mala' le'. ⁸ Na' shi ba witlencho Crístona', ba nxenlall'cho lekzka' ibanlenchone'. ⁹ Nezicho biban Crístona' ladj beñ' wetka' na' bich guete' dii yoblə, la' bich so saki yel' wita' le'. ¹⁰ Na' ka wit Crístona', shlin shlaxjzan bsol bnite' yel' wak che saaxyana'. Na' daa mbane' ñaa, zoe' chone' ka cheeni Chioza'. ¹¹ Na' ka'kzə le', chiyal' gakbe'ile ba nakle ka beñ' ba wit lao saaxyana' daa bich chñabia'n le', per mbanle lao Chioza' na' zoale chonle ka cheenile' daa nakle Xancho Cristo Jesús'a' txen.

¹² Daan bi chiyal' we'le latj inabia' dii mala' le' kwenche we'zle cho'a xbayi beli chen chelena' daa ile'i yel' wita'. ¹³ Bi chiyal' gon kwerp chelena' lall' na' saaxyana' kwenche gonle dii mala', san chiyal' gon kwinle do ka nakle lall' na' Chioza' kwenche gonle ka cheenile'. La' wak inacho Chioza' ba bisbane' le' ladj beñ' wetka' daa ba beñe' le' to yel' mban kob. ¹⁴ Bich chiyal' inabia' dii mala' le', la' bich zoale xñi'a leya', san daa biyesh'lallii Chioza' le', ba zoalenle yel' goklen che'na'.

15 ¿Nakrazə, ɿla? Naa ba biyesh'lallii Chioza' cho', na' bich zoacho xni'a leya', ¿agonchcho dii mala'? ;Bi chiyaɿ' goncho ka! 16 Nezkzile shi ba ben kwincho lo na' beɿ' kwenche goncho bittez daa ne', choe'cho latj chɿabi'e chon'. Ka'kzan, shi chzenagcho che dii mala', na' inabia'n cho' na' wlliyi'n cho'. Na' shi we'cho latj inabia' Chioza' cho', wiyone' cho' beɿ' li beɿ' shao'. 17 Per choxken Chioza', la'kzi kana' wɿabia' dii mala' le' na' benle ka nan, naa do yichj do lall'le ba chzoale xtilleena' daa bli' bsedgakile' le'. 18 Naa ba biyell bila'le lao dii mala', na' ba biyakle lall' na' Chioza' kwenche gonle ka cheenile'. 19 Ba bi'a dill' che daa chak checho cho' beɿech kwenche shajniile dga nia' le'. Kana' ben kwinle lall' na' saaxyana' len dii zbanka' cheeni beli chen chelena' kwenche benle dii malka'. Na' naa, li gon kwinle lall' na' Chioza' kwenche soale gonle ka cheenile'.

20 Shlak be'le latj wɿabia' dii mala' le', aga bzenagle che Chioza' na' bi benle ka cheenile'. 21 Na' aga bi banez wxi'le che dii mala' benle na' naa chiyii chido'lenile'n, la' yel' witchokzan nsa'n. 22 San naa ba bisell bila' Chioza' le' lo ni'a na' dii mala' na' ba chonle ka cheenile', de banez cheyin daa zejch chonle daa nak wen, na' gat' yel' mban chele zejli kani. 23 Laxj beena' chon saaxyana' nakan yel' wit, san daa chzani Chioza' wi'e beena' gonlilallee Xancho Cristo Jesúsza' nakan to yel' mban zejli kani.

7

1 Le' beɿ' bish' na' le' beɿ' zan', nombia'le leya' na' nezile leya' chɿabi'an beɿ' shlak mbane'. 2 Na' ka nak leya', cho'en dill' nan noola' nshagna' chiyaɿ' soalene' beɿ' che'na' shlak mbane', per shi guet beɿ' che'na', wak yikee beɿ' yoblə. 3 Shi lljsoalene' beɿ' yoblə shlak ni mban beɿ' che'na', nakan xya. Per shi ba wit beɿ' che'na', leya' nan wak yikee beɿ' yoblə, na' bi nakan xya.

4 Na' ka'kzan chele le', nakcho txen nonlilall'cho Crístona', le' beɿ' bish'dawaa na' le' beɿ' zandawaa. Daa nonlilall'le Crístona', beena' wit ni checho, zejɿn lekzka' ba nakle ka beɿ' ba wit lao leya' na' bich chɿabi'an le'. Na' naa ba biyakle lall' na' beɿ' yoblə, beena' wite' na' bibane' ladj beɿ' wetka', kwenche goncho ka cheeni Chioza'. 5 Kana' wzoacho be'cho cho'a xbayi beli chenna', leya' wloochan ltip beli chen chechoka' na' benchcho dii mala', na' saaxyana' daa bencho bsa'n yel' wit. 6 Per naa, ba nakcho ka beɿ' ba wit lao leya' daa btakw bchejan cho', na' ba biyell bila'cho kwenche goncho ka cheeni Chioza' daa ba bikob Espíritu Sántona' yichjlall'do'choni, na' bich chɿabia' leya' cho'.

7 Bi chiyaɿ' inacho leya' nakan dii mal. La' lennan' bzajniin nad' nan malan' chon'. Aga nezid' shi nakan mal selallaa bi de che beɿ' shel'ka' ki leya' nan: "Bi selaloo bi de che beɿ'." 8 Per dii mala' yoo loo yichjlall'dawaani bchinan dga bllia Chioza' bia' kwenche wloochan ltip beli chen cha'ni na' chiya dii wzelallaa. La' shel' bibi leya' got', bibi de daa inan nakcho beɿ' wixinj wilen, shel'ka'. 9 Kana' bin' inezid' daa na leya', gokid' le wen nsa' cha', per ka wnezid' daa nllia leya' bia', zizikli benz' dii mala' daa wlliyi' nad'. 10 Daa bllia Chioza' bia' goncho kwenche gaklenan cho' gat' yel' mban checho, bchoglolan cha' nan chiyaɿ' guet'. 11 La' dii mala' yoo loo yichjlall'dawaani bchinan leya' na' wxiye'n nad' kwenche blliyi'n nad'.

12 Leya' dii licha nakan che Chioza', na' yog' daa nllian bia' nakan dii wna Chioza', nakan dii li dii shao' na' dii wen. 13 Leya' nakan wen na' aga lennan' benan ka kwiayaa. San dii mala' yoo loo yichjlall'dawa'nin bchinan leya' daa nak dii wen kwenche blliyi'n nad'. Na' daa nakan ka', ni che leya' bli'lao saaxyana' nakan dii mal inleeb.

14 Nezhicho leya' nakan che Chioza', san nad', lega beɿ' de beli chen chon', na' chɿabia' dii mala' nad' daa chon' ka nan. 15 Bi chajniid' ka chon', la' bi chon' dii wenna' daa cheenid' gon', san dii mala' daa chakzbanid', lelan chonz'. 16 Na' kat' chon' daa bi cheenid' gon', chakbe'id' leya' nakan wen. 17 Na' aga inacho nadaan chon' ka', san dii mala' daa daa yoo loo yichjlall'dawaanin chlligaan nad' kwenche chon' dii mala'. 18 Nad' nezid' aga bi dii wen cheeni beli chenni gonan. Na' la'kzi le lliallalaa gon' dii wenna', bi chak gona'n. 19 Bi

chizoid' gon' dii wenna' daa cheenid' gon', san dii mala' daa bi cheenid' gon', lelan chonz'.
²⁰ Na' daa chon' daa bi cheenid' gon', zejin aga nadaan chona'n, san dii mala' daa chñabia' loo yichjlall'dawaanin chonan daa.

²¹ Chakbe'yenid' la'kzi cheenid' gon' daa nak wen, dii malalə chon'. ²² La'kzi chibayi loo yichjlall'dawaani ley che Chioza', ²³ chakbe'id' de daa chsej chllonan gon' daa nezid' nak wen, la' dii mala' daa chñabia' nad' chtakw chchejan nad' kwenche gon' daa bi nak wen.

²⁴ Le nyesh' chak cha'! ¿Notgui yisell yila' nad' lao beli chenni dga ba nchogbia' kwiayi'?
²⁵ Cho'a Chioza' yel' choxken daa wit Xancho Jesucristona' na' bisle' nad' lo na' dii mala'. Na' kin chajniida'n: chibaid' gon' ka na ley che Chioza', per beli chen cha'ni chlligaan nad' kwenche gon' dii mala'.

8

¹ Na' naa, bich bi yel' zak'zi' che Chioza' yen ile'i ben'ka' nak Cristo Jesús'a txen, ben'ka' bich chongake' ka na beli chen che'ka', san ba chongake' ka cheeni Espíritu che Chioza'.
² La' daa nonlilall'cho Cristo Jesús'a, Espíritu che Chioza' ba bene' yel' mban kob checho, na' daa chñabia' Espírituna' cho', bich chñabia' saaxyana' cho' daa nsa' yel' wita'. ³ Ley daa bzej dii Moisés'a bi gok yislan cho' lao saaxyana' daa choncho ka na beli chenna'. Daan Chioza' bselee Xiine'na' goke' ben' de beli chen ka cho' per bi goke' ben' saaxya, na' wdixje' saaxya chechoka' ka wite' kwenche bich inabia'n cho'. ⁴ Chioza' bselee Crístona' ni checho kwenche so sakicho goncho wen lawe'na' ka na ley che'na'. Na' bich soacho goncho ka cheeni beli chenna' san soacho goncho ka cheeni Espíritu che Chioza'.

⁵ Ben'ka' ni chzenag che dii mala' yoo loo yichjlall'do'eka', toz len zegake' wneyi chongake'; san ben'ka' chzenag che Espíritu che Chioza', zegake' wneyi gongake' daa cheenile'. ⁶ Ben'ka' yoo yichjgake' gongake' dii mala', kwiayi'gake'; san ben'ka' yoo yichjgake' gongake' ka na Espíritu che Chioza', gat' yel' mban chegake' zejli kani na' soagake' mbalaz. ⁷ Ben'ka' chibayi chon dii mala', chakzbangakile' Chioza', la' bi chzenaggake' ka na ley che'na', ni bi chak gongake' ka nan. ⁸ Ben'ka' ni chibayi chon dii mala', Chioza' bi chazlallee ka chongake'.

⁹ Per le', bich chzenagle che dii mala' san chzenagle che Espíritu che Chioza', shi ba zoe' loo yichjlall'do'lena'. Na' shi no bi zoa Espíritu che Crístona' loo yichjlall'do'ena', bi nake' lall' na' Crístona'. ¹⁰ La'kzi ba nakan guet kwerp chelena' daa nakle ben' saaxya, per shi nakle Crístona' toz, Espíritu che'na' zoe' loo yichjlall'do'lena' na' dekzə yel' mban kob chele daa ba biyakle ben' li ben' shao' lao Chioza'. ¹¹ Na' shi Espíritu che Chioza', beena' bisbane' Jesús'a ladj ben' wetka', zoe' loo yichjlall'do'lena', Chioza' lekzka' gone' to yel' mban kob che kwerp chelena' daa guet, daa zoa Espíritu che'na' loo yichjlall'do'lena'.

¹² Daan, le' ben' bish' na' le' ben' zan', chonan byen goncho ka cheeni Chioza' na' bi goncho kon daa nazan che beli chenni. ¹³ La' shi we'chcho cho'a xbayi beli chenni, na' guetcho; san shi we'cho latj gaklen Espíritu che Chioza' cho' kwenche kwey yichjcho dii mala' daa nan goncho, na' gat' yel' mban checho zejli kani.

¹⁴ Yog' ben'ka' chzenaggake' che Espíritu che Chioza' na' chongake' ka cheenile', legaken' nakgake' xiin Chios. ¹⁵ Cho' ba zoa Espíritu che Chioza' loo yichjlall'do'choni, bich chak checho ka chak che beena' zoa ben' chñabi'ene' na' chall chllebe'ne', san daa zoa Espíritu che'na' loo yichjlall'do'chonan', zejin ba wkaa Chioza' cho' ka xiine'. Na' daa zoalen Espírituna' chon', chak che'chone': "Xadawaa." ¹⁶ Na' Espíritu che'na' lekzka' chzajniile' cho' kwenche chnezicho nakcho xiin Chios. ¹⁷ Na' daa nakcho xiin Chioza', lekzka' wllin lla ikaalencho Crístona' daa gone', la' shi goncho banez yel' zak'zi'ka' ka diika' ben ble'i Crístona', na' gakchone' txen sho'lenchone' balaan.

¹⁸ Na' ka nak yel' zak'zi'ka' chen chle'icho yell-lioni, aga wllinlebin ka balaan xenna' sho'lenchone'. ¹⁹ Na' yog' diika' bxe bsil Chioza' chbezgakan yob illin lla wli'lao ba nakcho xiin Chioza'. ²⁰ La' yog' diika' bxe bsil Chioza' bich nakshao'gakan ka gokgakan

dii nech. Na' aga legakannan' goklall'gakan gакgakan ka', la' Chiozan' bllie' bia' gакgakan ka', per lekzka' bene' kwenche chbezgakan yiyakshao'gakan. ²¹ La' wllin lla kat' yog' diika' bxe bsile' bich gакgakan dii kwiayi', san yiyakgakan mbalaz inleeb ka gак checho, cho' nakcho xiine'. ²² Na' nezicho axt naanlla yog' diika' bxe bsile' chak chegakin ka chak che to nool chllagloe' sane' bi'do' che'na'. ²³ Na' aga toz diika' ben Chiozan' chak chegakin ka', ka'kzan chak checho, cho' ba yoocho Espiritu che'na', beena' chon ka noncho lez gonch Chioza' dii wen checho, chbellyesh'cho shlak chbezcho yiyone' kwerp chechoni to dii kob na' wli'lao ba none' cho' xiine'. ²⁴ Kon ka bisla Chioza' cho' lo ni'a na' dii mala', noncho lez yikobe' kwerp chechoki. Aga daa ba den noncho lez, la' daa ba gok bich nakan dii goncho lez. ²⁵ Per shi ni noncho lez ile'icho daa zi' gак, chiya' gapcho yel' chxenlall' shlak ni chbezcho gakan.

²⁶ Na' lekzka' Espiritu che Chioza' chaklene' cho' choncho daa bi chak goncho. La' aga nezicho nakan chiya'yen' we'llwillcho Chioza', per kwin Espiritu che'na' chbellyeshee chnabe' checho lawe'na'. Na' la'kzi aga bi dill' chchine', ²⁷ Chioza', beena' nombi'e yichjlall'do' yog'cho, nezile' bin chnab Espiritu che'na' checho. La' daa chaklall' Chiozan' chnabe' checho, cho' nakcho lall' nee.

²⁸ Na' nezicho Chioza' chchine' yog' diika' chen chle'icho kwenche gакlengakan cho', cho' ba chakichone', cho' ba wleje' kwenche gакcho lall' nee kon ka goklallee. ²⁹ Kana' bin' soatecho, Chioza' ble'shiile' cho' na' wleje' cho' kwenche yiyone' cho' ben' wen ka nak Xiine' Jesucrístona', kwenche Jesucrístona' gake' ben' llialo ladjchoni, cho' nakcho ben' bishee na' ben' zane'. ³⁰ Chioza' wleje' cho' kani'teyi, na' lekzka' gox wnabe' cho' kwenche gакcho lall' nee, na' biyone' cho' ben' li ben' shao' lawe'na'. Na' cho' ba biyone' ben' li ben' shao', ba nakan sho'cho to balaan xen.

³¹ ¿Bera dech inacho cheyi dga ba ben Chioza' checho, lla? La' shi Chioza' zoalene' cho', ¿nora gак bi goni cho'? ³² Shi Chioza' axt ni Xiine'na' bi biyeshile' san bzanile'ne' wite' ni checho, ¿alechlin ki gone' cho' yog'lol diika' bchebe'? ³³ Aga no gак gao xya checho lao Chioza', la' len' ba wleje' cho' na' biyone' cho' ben' li ben' shao'. ³⁴ Na' aga no gак wchoglo checho guetcho. La' Cristo Jesúsza' wite' ni checho, na' bibantie' ladj ben' wetka'. Na' chi'e kwit de shli che Chioza', chnabe' gакlene' cho'. ³⁵ Aga bi de dii gonan ka bich gaki Crístona' cho'. Ni yel' zi' daa chen chle'icho, ni dii lalljka' chak checho, ni daa chsak'zi' ben' cho', ni daa chbil chdoncho, ni daa bi de xalaancho, ni daa zoacho dii nxoll, wa shi wit ben' cho'. ³⁶ Chak ka na Cho'a Xtill' Chioza' daa na:

Daa chzoanto' xtilloona' toshiizi de dii nxoll chento' witgake' neto'.

Chongakile' neto' ka xil'do'ka', baka' nzoagake' witgake'.

³⁷ Per Crístona', beena' chakile' cho', chaklene' cho' kwenche goncho gan lao yog'lolte diika' chen chle'icho. ³⁸ Na' daan nezid' aga bi de dii gonan ka bich gaki Chioza' cho': ni yel' wita', ni yel' mbanna', ni anjlka', ni dii xiw'ka', ni daa chak naa, ni daa zi' gак, ³⁹ ni dii chak gana' zeelo nak sib wal, ni dii chak gana' zeelo nak zitj wal, ni bittez dii yoblə dii bxe bsil Chioza' bi gак gonan ka bich gакile' cho', la' ba bli'e le chakile' cho' daa wit Xancho Cristo Jesúsza' ni checho.

9

¹ Daa nonlilallaa Crístona' cho'a dill' li, na' bi chziyaa. Na' lekzka' Espiritu Sántona' chzajniile' nad' kwenche nezi yichjlall'dawaani dga nia' nakan dii li. ² Le nyesh' zoa' na' toshiizi le chjeli lall'dawaani, ³ na' axt shel' wx'e'id' bich gакlen Crístona' nad' na' kwiayaa kwenche shicholə gакlenan ben' Israelka' ben'ka' nak ben' wlall cha' na' ben' bishaa. ⁴ Chioza' wleje' dii xozxto'nto'ka' kwenche noni xiine' neto'. Na' got' to balaan chegake' daa wzoalene' legake'. Bchebe' gакgake' yell che', na' bi'e legake' ley che'na'. Na' bzajniile' legake' ka chiya' we'la'ogake'ne', na' dii zan dii bchebe' gone' chegake'. ⁵ Neto' ben' Israel naknto' dia che dii Abrahama', dii Isaaca' na' dii Jacoba', na' Crístona' lekzka' golje' lo dia

chento'na' ka bide' yell-lioni. Na' chiyal' we'la'ochone' zejli kani, la' len' nake' Chios na' chnabi'e lao yog'lolte dii de. Kan' nakan.

⁶ Na' bi inacho Chioza' bi bene' ka bchebe' gone' chento', san daa gok, aga yog' ben'ka' golj lo dia che dii Israela' nakgake' dowalj ben' Israel. ⁷ Aga yog' ben' goljgake' lo dia che dii Abrahama' nakgake' dowalj xiin dia che'. Chioza' golle'ne': "Xiino' Isaaki gakb' xaxna' yog'lol xiin dia cho'ka' zi' zaak." ⁸ Dga chzajniin cho' nan aga ni che nakgake' xiin dia che dii Abrahama' nakgake' xiin Chios, san ben'ka' chajle' gone' ka bchebe' gone', legaken' noni xiine'. ⁹ Ki nak daa bcheb Chioza' gone' che dii Abrahama', chi'e: "Zi twiz ka naa zaa dii yoblə, na' Sárana' sane' to xiino' bi' byo."

¹⁰ Na' aga dgazan. Lekzka' Rebécana' wxane' chop bi'do' che dii xozxto'nto' Isaaca'. ¹¹⁻¹² Na' kana' zi' galj bi' kweshka', na' ni bin' gongakb' dii wen ni dii mal, Chioza' bshaljlene' Rebécana', golle'ne': "Bi'na' galjə nech wlexj yichjb' lao bi'na' galjə koll'baa." Golle'ne' ka' kwenche chakbe'icho Chioza' chbeje' beena' gak xiine' kon ka ba blie' bia' gak, na' chaxe' ben'ka' cheenile' gak xiine', ni bi chone' kwent shi bi ba bengake'. ¹³ Nakan kon ka na Cho'a Xtill' Chioza' daa na: "Gokid' Jacoba', na' bwiqid' Esaúna'."

¹⁴ ¿Bera ka inacho, naa? ¿Awak inacho Chioza' bi chone' wen? ¿Bi nakan ka! ¹⁵ La' Chioza' golle' dii Moiséza': "Beena' cheenid' yiyesh'lallid' na' yiyesh'lallidee, na' beena' cheenid' gaklen' na' gaklenee." ¹⁶ Daan, nezicho aga daa le cheeni ben' gake' xiin Chiozan' kwej Chioza'ne', ni aga ni che bi dii chone'n, san Chioza' chbeje'ne' daa chiyesh'lallile'ne'. ¹⁷ La' Cho'a Xtill' Chioza' cho'en dill' ka golle' faraónna', beena' wñabia' Egíptona': "Bzoa' li' chnabi'o kwenche gon' ka ile'i ben' yel' wak cha'na' na' kwenche gakbe'i yog' ben' lle' doxen yell-lioni nad' nak' Chios." ¹⁸ Na' kan' nakan, Chioza' chiyesh'lallile' ben'ka' cheenile' yiyesh'lallile', na' lekzka' chone' chech yichjlall'do' ben'ka' cheenile' gakgake' ben' widenag.

¹⁹ Na' wnaljo': "Shi choncho kon ka ba nllia Chioza' bia' goncho, bi gak ine' napcho dol' lawe'na', la' aga wakə wsej wlloncho gak ka cheenile'." ²⁰ Na' shi ka' chakilo', ¿nora nako' wsheshlenzo' Chioza'? Aga wak ine' to yes' yo yeen beena' benan: "¿Bi'che benzo' nad' ki?" ²¹ La' beena' chon yes' xwagka' wakə gone' benja' kon nak cheenile', na' wakte gone'n to yes' dii gon llin ga lliarote, na' sto dii wchine' che bittez.

²² Na' ka'kzə ba ben Chioza'. Ni che dii mala' chon ben' yell-lioni goklallee wliile' legake' yel' chllaa che'na' na' gone' ka wli'lao yel' wak che'na', per wzoile' wdape' yel' chxenlall' che ben'ka' chidol' yel' zak'zi'na', ben'ka' ba nakan kwiayi'. ²³ Na' lekzka', ba bli'e ka liizelozi ben' wen inleeb nake' daa ba biyesh'lallile' cho' na' bizi'xene' checho, na' biyone' cho' ben' li' ben' shao' kwenche idol'cho balaan' ka yillincho lawe'na'. ²⁴ Na' ba gox wñab Chioza' cho', aga balz neto' naknto' ben' Israelan', san len bal-le bi nakle ben' Israel. ²⁵ Chak ka wna Chioza' daa bzej dii Oseaza', daa na:

Ben'ka' bi nak yell cha', yepgakee: "Nakle yell cha'."

Na' ben'ka' bi gokid', yepgakee: "Chakid' le'."

²⁶ Na' latja' gana' golle' legake' bi nakgake' yell che', wsi' ben' legake' xiin Chios yaa Chios ban.

²⁷ Ki wna dii Isaíaza' che ben' Israelka': "La'kzi shesh shan ben' Israelka' axt gakgake' ben' zan ka yox daa chi' cho'a nido'na', balchokzgaken' yilagake' kwenche bi kwiayi'gake'."

²⁸ La' Xancho Chioza' lobe' wchogbi'e ka gak che yog' ben' lle' yell-lioni." ²⁹ Ka bzej dii Isaíaza', kana' wne':

Shel' Xancho Chioza', beena' nak liizelozi ben' yel' wak choo yel' wak xen, bi bkwaane' sto chop dia chechoka',

ba biyol binitcho ka gok che ben' yell Sodómaka' na' ben' yell Gomórraka', shel'ka'.

³⁰ ¿Nakra inacho, naa lla? Ben'ka' bi nak ben' Israel bi wzegake' wneyi kwenche yiyakgake' ben' wen lao Chioza', per daa ben'li' lall'gake'ne', ba biyakgake' ben' li' ben' shao' lawe'na'. ³¹ San ben' Israelka', la'kzi goklall'gake' yiyakgake' ben' wen lao Chioza' daa

zejlengake' ley che'na', bi wxakgakile'n. ³² Na' ¿biche bi biyakgake' ben' li ben' shao' lawe'na'? Daa bi benlilall'gake'nen'. Kon gokgakile' ina Chioza' nakgake' ben' li ben' shao' daa chongake' daa na leya'. Na'ch gok chegake' ka chak che ben' chjachew' yaj, ³³ yaja' daa chzetj Cho'a Xtill' Chioza', daa na:

Wselaa to ben' yell Siónna',

na' saklebile' ka to yaj daa chjachew' ben', na' ka to yaj dii lljsho'gake' na' ibixgake'.

Na' beena' wxenilalleene', biga yiyajile' daa nxenilalleene'.

10

¹ Na' le' ben' bish' na' le' ben' zan', daa lliallalaa na' daa chnab' kat' choe'llwill' Chioza' chnabidee yisle' ben' wllall cha'ka', ben'ka' nak ben' Israel, kwenche bi kwiayi'gake'. ² Nez nle'id' chegake' zechgagake' wneyi gongake' ka cheeni Chioza', toz daa bi nezgakile' nakyen'an cheenile' gongake'. ³ Daa bi chajni'gakile' toz Chiozan' chiyone' ben' ben' li ben' shao', chaklall'gake' yiyon kwingake' ben' wen, na' bi cheengakile' gonlilall'gake' Crístona' kwenche yiyakgake' ben' li ben' shao' lawe'na'. ⁴ La' daa bid Crístona', bene' daa bi gok gon leya', na' yog' ben'ka' gonlilall'gake'ne' yiyakgake' ben' li ben' shao' lao Chioza'. Na' bich goncho lez daa goncho ka na leyan' yiyakcho ben' wen lawe'na'.

⁵ Dii Moiséza' bzeje' ka chiyal' gon ben'ka' zoa xni'a leya' kwenche yiyakgake' ben' wen lao Chioza', na' nan: “Nottezə ben' chon doxen ka na leya' si'e banez yel' mban che'na'.” ⁶ Na' che ben'ka' nak ben' li ben' shao' lao Chioza' daa nonlilall'gake'ne', wne': “Bi sa'lall'zle, inale: ¿Nora gak shaj yabana'?” (kwenche gone' ka yetj Crístona' yell-lioni). ⁷ “Ni bi inale: ¿Nora gak yetj gana' lle' ben' wetka'?” (kwenche lljaleje' Crístona' ladje'ka'). ⁸ Ki chizna daa bzej dii Moiséza': “Dillaa daa ba wna Chioza' zoalenan le' na' ba yoon cho'a loll'lena' na' loo yichjlall'do'lena'”, na' lennan' daa choe'lennto' le', nanto' chiyal' gonlilall'le Crístona'. ⁹ Shi wi'o dill' Jesúsza' nake' Xancho na' shajli'o do yichj do lalloo nan Chioza' bisbane'ne' ladj ben' wetka', na' yisla Chioza' li' kwenche bi kwiayoo. ¹⁰ La' daa shajle'cho do yichj do lall'chon, yiyakcho ben' li ben' shao' lao Chioza', na' lekzka' daa choe'cho dill' nan Crístona' nake' Xancho, yisle' cho' kwenche bi kwiayi'cho.

¹¹ Cho'a Xtill' Chioza' nan: “Nottez ben' gonlilalleene', biga yiyajile' daa benlilalleene'.”

¹² Laa nakcho ben' Israel, laa bi nakcho ben' Israel, Crístona' nake' Xancho, na' chaklene' yog'cho cho' chnabcho yel' goklen lawe'na'. ¹³ La' nottezə ben' inabe' gaklen Xancho Crístona' le', na' yisle'ne' kwenche bi kwiayee. ¹⁴ Per ¿nakra gon ben' inabgake' gaklene' legake' shi bin' gonlilall'gake'ne'? Na' ¿nakra gongake' gonlilall'gake'ne' shi bin' yengakile' xtilleena'? Na' ¿nakra gak yengakile' xtilleena' shi kono zoa chixje'ile'n legake'? ¹⁵ Na' ¿nakra gak soa ben' chixjee xtilleena' shi kono wsel' legake'? Ka na Cho'a Xtill' Chioza': “Mbalaz inleeb kat' ila' ben'ka' ziditixje'gake' dill' wen dill' kob che Chioza'.”

¹⁶ Per aga yog' ben' Israelka' chzenaggake' dill' wen dill' kob che Chioza'. Chak ka bzej dii Isaíaza', gana' na: “Xan, kono chajle' dillaa daa chyixje'nto'.” ¹⁷ Daan, kwenche gonlilall' ben' Crístona' chiyal' yengakile' xtilleena'.

¹⁸ Na' nia': ¿Abin' yengakile' cho'a xtilleenan', lla? ¿Yog'ze' ba bengakile'n! La' cho'a xtill' Chioza' nan:

Cho'a xtilleeka' chllinan doxen yell-lioni

axt gana' zeelo chiyoll chidon.

¹⁹ Na' chiznia', ¿anti neto' ben' Israelan bi wyajniinto'n, lla? Zajniinto'n. La' dii Moiséza' wdixji'e daa goll Chioza'ne' che ben' Israelka' kana' wne':

Nad' Chios gon' wen che ben'ka' bi nakgake' yell cha' kwenche gaklall'le gon' chele ka chon' chegake'.

Na' gon' kwenche illaale daa chon' wen che ben' zit'ka' ben'ka' bi napgake' yel' chajni.

²⁰ Na'tech dii Isaíaza' biyaxjile' wne':

Ben'ka' bi wze wneyi gombia'gake' nad', ben' ka bembia'gake' nad'.

Na' ben' kwenche ben'ka' bi wyoo yichjgake' nad' bembia'gake' nad'.

²¹ Na' dii Isai'aza' lekzka' wdixji'e daa goll Chioza'ne' che ben' Israelka' kana' wne': "Toshiizi goklallaa gaken ben' widenagka', ben'ka' bi chzoa xtilaana'."

11

¹ Na' nia' zaba wlej yichj Chioza' yell che'na' toshiizin, lla? jBi nakan ka! La' lekzka' nad' nak' ben' Israel. Golj' lo dia che dii Abrahama' na' nak' xiin dia che dii Benjaminna'.

² Kani'teyi wlej Chioza' neto' ben' Israel kwenche naknto' yell che', na' aga ba wlej yichje' neto'. zAbi chjtinile ka na Cho'a Xtill' Chioza' che Eli'aza'? nan ka be'lwille' Chioza' wdawe' xya che ben' Israelka', chi'e: ³ "Xan', ben' wlall cha'ka' ba betgake' ben'ka' wdixjee daa gollo' legake' na' ba blliyi'gake' gana' chzeynto' bayix'ka' chonnto' li'. Stochga nad' chgaana', na' lekzka' cheengakile' witgake' nad'." ⁴ Na'ch Chioza' golle'ne': "Ni nzoa' galla mil ben' Israel, ben' chzenag cha' na' bin' wchek' xibe'ka' lao Baala'." ⁵ Na' ka'kzan chak naanlla, zi xonjchga neto' ben' Israel chzenagnto' che'. Na' yel' ben' wen che'na' wleje' neto' gaknto' lall' nee daa nake' ben' chiyesh'lallii. ⁶ Na' shi yel' ben' wen che'nan' wleje' neto', zejina' aga wleje' neto' ni che shi bi dii wennan chonnto'. La' shel' wleje' neto' ni che dii wenna' chonnto', bi nakan to goklen daa bene' chento', shel'ka'.

⁷ Ben' Israelka' goklall'gake' yiyakgake' ben' wen lao Chioza' tobiall'zgake', na' bi gokan, san ben'ka' ba wlej Chiozan' bdoj' bllongakile'n. Na' ben'ka' sto, zizikchli gokchgake' ben' widenag. ⁸ Gok ka na Cho'a Xtill' Chioza' daa na: "Chioza' bchoj' bnitile' legake' kwenche bi shajni'gakile'. Na' ax't naanlla nakgake' ka to ben' bi chen chle'i." ⁹ Ki wna dii Davina':

"Yiyakshga lni che'ka' ka to yalj dii wzapan legake',
na' ka to dii chgoo chchew'gake', na' sak'zi'gake'.

¹⁰ Gakshgagake' ka ben' lchoj';

na' toshiizi gak chegake' ka to ben' noa' to dii zii wal."

¹¹ Na'ch nia': zAdaa bi bzenag ben' Israelka' che Chiozan' wchoonlallee legake' toshiizi, lla? jBi nakan ka! San daa bi bzoagake' xtilleenan', na'chan bisle' ben'ka' bi nakla' ben' Israel kwenche ben' Israelka' lekzka' gaklall'gake' yisle' legake'. ¹² Shi yel' widenag che ben' Israelkan' benan ka gok wen che ben'ka' bi nak ben' Israel, zalechlə ki gakch wen chegake' kat' ben' Israelka' yiyonlilall'gake'ne'?

¹³ De to dii cheenid' we'len' le' dill', le' bi nakle ben' Israel. Chioza' ba wleje' nad' na' bselee nad' laolena'. Na' do yichj do lallaa chon' dga bene' lall' na' gon', ¹⁴ kwenche shi bal' ben' wlall cha'ka' gaklall'gake' gak chegake' ka ba chwiagake' chak chele, na' yilagake' bi kwiayi'gake'. ¹⁵ La' shi daa bzoa Chioza' ben' Israelka' ka'lə, bene' ka ben'ka' bi nak ben' Israel bizoalengake'ne' wen, le mbalaz kat' illin lla yilebe' ben' Israelka' sto shii. La' gak chegake' ka to ben' biban ladj ben' wetka'. ¹⁶ Na' shi lee kwana' chbejcho daa chonicho yetxtil necha' daa choe'cho Chioza', zejina' doxente kwana' nakan che'. Na' shi lo yaga' nakan che Chioza', lekzka' xoziiinka' nakgakan che'.

¹⁷ Ben' Israelka' zaklebgakile' yag olivo wenna' daa bchogue' bal' xoziiinka', na' le' bi nakle ben' Israel zaklebile' yag olivo yixaa daa bidee lee yag wenna'. Na' yag wenna' noxaan xozii yag olivo yixaa diika' bidee le'inna' na' cho'en yel' mban chegakan. ¹⁸ Per bi gakile nakchle ben' wench aga ka ben' Israelka', ben'ka' zaklebi xoz' yaga' diika' bchogue'. Bi shep sha'lall'le, la' aga xoz' yagan' cho'en yel' mban cheyin san loinnan' choe'n yel' mban che xoziiinka'.

¹⁹ Na' wnaljale: "Bchogue' xoziiinka' kwenche bidee neto' le'inna'." ²⁰ Lekzile kan' nakan, la' daa bi benlilall'gake' Chiozan', bzo'e' legake' ka'lə, na' biyakle lall' nee daa nonlilall'lene'. Daan, bi shep sha'lall'le, san li gall illeb Chioza'. ²¹ La' shi Chioza' bi biyeshile' xoz' yaga' diika' nak dowalj, lekzka' gone' chele shi naa. ²² Li gakbe'i ka ben' wen ben' shao' nak Chioza' na' lekzka' nake' ben' chsak'zi'. La' bsak'zi'e ben'ka'

bi benlilall'gake'ne', na' ba chone' wen chele. Na' gonche' wen chele shi gonle ka dii le gonlilall'lene', san shi bich gonlilall'lene' lekzka' wzoe' le' ka'la. ²³ Na' shi ben' Israelka' gonlilall'gake'ne', na' yidee legake' sto shii lee yaga', la' Chioza' wak gone'n. ²⁴ Na' le' bi nakle ben' Israel, wak inacho nakle ka xoz' yag olivo yixaa diika' bidee lee yag olivo wenna', la'kzi bi nakan dowalj xoziin. ¿Alechlin diika' nak dowalj xoziin ki yideen sto shii? Ben' Israelka' nakgake' ka xoziin daa nak dowalj, na' aga bi lallj nakan yileb Chioza' legake' dii yoblə.

²⁵ Le' ben' bish' na' le' ben' zan', de to dii bin' inezile daa bzajonii Chioza' nad', na' cheenid' inezilen kwenche bi gatzle ben' cha'sib na' gatzile zak'chle ka neto' ben' Israel. La' aga toshiizin gak ben' Israelka' ben' widenag, san kat'ka' ba bza' ben'ka' bi nak ben' Israel gonlilall'gake' Crístonan', bich gak ben' Israelka' widenag. ²⁶ Na' ka illin lla gak ka', na'ch yog' ben' Israelka' yiyakgake' lall' na' Chioza'. Na' gak ka na Cho'a Xtilleena' daa na:

Yell Jerusalénna' ichej to ben'

yisell yilee ben'ka' nak xiin dia che dii Jacoba' lao dii mala'.

²⁷ Na' dgan chcheb' gon' chegake',

yizi'xen' saaxya che'ka'.

²⁸ Na' daa bi bzenag ben' Israelka' dill' wen dill' kob che Crístonan', bllaa Chioza' legake'. Na' daa gok ka' got' latj benlilall'lene', le' bi nakle ben' Israel. Per Chioza' ni chakile' neto' ben' Israel daa wleje' dii xozxto'nto'ka' kwenche gatzake' ben' yell che'. ²⁹ Na' daa chon Chioza', aga wikwase'n na' bi chiyajile' daa chax chnabe' cho'. ³⁰ Kana', le' bi nakle ben' Israel, bi bzenagle che Chioza'. Per naa, daa gok ben' wlall' cha'ka' ben' widenag lao Chioza', ba biyesh'lallile' le'. ³¹ Na' daa bi chzenaggake' che Chioza' naa, chak ka' kwenche wliyi Chioza' legake' nan lekzka' chiyesh'lallile' legake' ka chiyesh'lallile' le'. ³² La' Chioza' bi'e latj yog'lol' ben' gogake' ben' widenag kwenche yog'logake' yiyesh'lallile'.

³³ ¡Dii xen inlleb nak ye! sin' na' ye! chajonii che Chioza'! ¡Ni to kono chajonii daa nllie' bia' gak wa daa nllie' bia' gone'! ³⁴ La' "ni to kono nezi daa chza'lall' Xancho Chioza', na' ni to kono gak wzajniile'ne' nakan chiyal' gone'. ³⁵ Biga zoa ben' ba bi'e Chioza' dii naki che' kwenche gone' lez yigoo Chioza' wzon che'." ³⁶ La' len' bxe bsile' yog'lol'te dii de na' bllie' bia' chongakan ka chaklallee, na' yog'lol' dii de nakan che'. ¡Le' chidolee koochone' balaan zejli kani! Kan' nakan.

12

¹ Na' le' ben' bish' na' le' ben' zan', daa ba biyesh'lallii Chioza' cho', chat'yoid' le', li we' Chioza' do ka nakle naa mbanle kwenche gakte dowalj ben' wen ka chazlallee, la' kan' chiyal' we'la'ochone'. ² Na' bi gonle txen diika' de lo yell-lioni, san li we' latj yikob Chioza' yichjlall'do'lena' kwenche yilla' ye! mban chelena'. Na' ka' gakbe'ile daa cheenile' gonle. Na' daa cheenile' goncho nakan dowalj dii wen, daa chazlallee.

³ Daa nzoa Chioza' nad' gon' xshine'na', nia' le': Ni tole bi gatile ba nakle to ben' zakii. San li gakbe'i nak nakle lao Chioza' kon ka zej chaklene' le' chonlilall'lene'. ⁴ Ka nak che kwerp chechoni, dii zan dii nsa'n na' aga toz ka dii chongakan. ⁵ Ka'kzan cho', la'kzi nak zanchi, tozan nakcho daa nonlilall'cho Crístonan', na' ndil nllagcho ka ndil nllag diika' nsa' to kwerp.

⁶ Chioza' ba bene' cho' wde wdeli daa gak goncho kon ka chazlallee gon to tocho. Daan, beena' naki che' chixje'ile' ben' daa che' Chioza'ne', chiyal' wxenilalleene' gatlene' le' gone'n. ⁷ Na' beena' naki che' gatlene' ben', chiyal' gone'n do yichj do lallee. Na' beena' naki che' wli' wsedile' ben' yoblə, chiyal' wli' wsedile' legake'. ⁸ Na' beena' naki che' wtipe' lall' ben', chiyal' wtipe' lall'gake'. Na' beena' naki che' izanile' bi wi'e ben', chiyal' wi'en do yichj do lallee. Na' beena' naki che' gak kwee xnezi dii chak che ben', chiyal' gone'n xochi ga zeelo gake'. Na' beena' naki che' yiyeshile' ben', chiyal' yibaile' gatlene' ben'.

⁹ Li gaki ljwell-le do yichj do lall'le. Li gatzbani dii mala' na' li soa gonle dii wenna'.
¹⁰ Li gaki ljwell-le ka bish' goljle, na' ganga goni ljwell-le ka ben' zak'chi ka le'.
¹¹ Bi wshe'lall'le gonle daa cheeni Xanchona', san li gon ka dii le gonle daa chazlallee axt ga zeelo soile.
¹² Li yiba yizaki daa nonle lez lljazoalenle Chioza', li gap yel' chxenlall' kat' zaak yel' zak'zi'ka', na' li we'lwill Chioza' toshiizi.
¹³ Le' nakle lall' na' Chioza', li gaken ljwell-le shi bi dii chyalljile. Na' li we' ben' ga yigaangake' loo yoo lill-le.
¹⁴ Chiyal' inabile Chioza' gak wen che ben'ka' chsak'zi' le'. Li inab gak wen chegake' na' bi chishjle bia' blag' chegake'.
¹⁵ Li yiba yizakleni ben'ka' chiba chizaki na' li kwell-len ben'ka' chbell.
¹⁶ Li soalen ljwell-le wen. Bi gakte ben' cha'sib, san li gon txen ben' yesh'do'ka'. Na' bi gon kwintle ka to ben' sin'.
¹⁷ Shi ga zoa ben' chone' mal chele, bi yizi'le wzonna'. Chiyal' sho' yichjle gonle wen lao yog' ben'.
¹⁸ Chiyal' gonle axt ga zeelo gakte kwenche soalenle yog' ben' mbalaz.
¹⁹ Le' ben' bish' na' le' ben' zan', bi chiyal' yizi'le wzon che ben' shi bi chone' chele, san li gonan lo na' Chioza' kwenche le' wsak'zi'ene'. La' Cho'a Xtilleena' nan: "Xancho Chioza' ne': Nad' yizia' wzon che ben'ka' chon dii mala'. Na' nad' wsak'zi'gakee." ²⁰ Na' lekzka' nan: "Shi chbil chdon beena' chakzbani li', be' dii yeej gawe'. Na' daa gono' ka', yiyii yido'ile'." ²¹ Bi we'le latj inabia' dii mala' le', san li gon wen kwenche gonle gan dii mala'.

13

¹ Yog'cho chiyal' wzenagcho che ben'ka' chnabia', la' aga bi yel' wnabia' de dii bi nak che Chioza'. Na' Chioza' nzoe' ben'ka' kwenche inabia'gake'. ² Na' beena' chizoshi' ben'ka' chnabia', daa nllia Chioza' bia' gonchon chizoshi'e. Na' ben'ka' chon ka', choglo chegake' sak'zi'gake'. ³ Ben'ka' chnabia', aga zoagake' kwenche wwall wshebgake' ben'ka' chon wenan, san ben'ka' chon malan chiyal' gall illebgake' legake'. Shi chall chllebo' ben'ka' chnabia', ben wen, na' inegake' wen cho'. ⁴ La' Chioza' nzoe' ben'ka' chnabia' kwenche soacho mbalaz. Per shi bi chono' wen, na'chan sho' shebo', la' aga zoaxenzə ben'ka' chnabia'n, san Chiozan' nzoe' legake' kwenche wsak'zi'gake' ka chiyali beena' bi chon wen. ⁵ Daan, chonan byen wzenagcho che ben'ka' chnabia', aga kwenchezə bi wsak'zi'gake' chon', san daa nezicho chiyal' goncho wenan. ⁶ Na' lekzka' chiyal' we'cho daa chidol'cho chixjcho, la' Chioza' nzoe' legake' kwenche chnabia'gake', na' lennan' noni xshingake'.

⁷ Na' chiyal' yiyixjcho che yog' ben' shi bi chbag'cho chegake'. Shi chal'cho daa chchixj ben'ka' chnabia' cho', chiyal' chixjchon. Na' beena' chiyal' idap balaan, chiyal' gapchone' balaan. Na' beena' chidol' sho'e balaan, chiyal' koochone' balaan. ⁸ Bi chiyal' ibag'cho che ben', san daa chiyal' goncho gaki ljwellcho, la' beena' ba chaki bish' ljwelle'na' ba chone' doxen ka na ley che Chioza'. ⁹ Na' ki na ley che'na': "Bi taleno' nool bi nak xoolo'. Bi gono' xya. Bi kwano'. Bi selalloo bi de che ben'." Yog'kzə diikin ba choncho lente yog' diika' sto nllia leya' bia' shi ba choncho dga na: "Chiyal' gaki bish' ljwello'na' ka chaki kwino'." ¹⁰ Shi ba chakicho bish' ljwellchona', bibi dii mal gonichone'. Daan, ba choncho doxen ka nllia leya' bia' shi ba chaki ljwellcho.

¹¹ Li gakbe'i ka nak llaki zoacho naa. Ba gol' goncho ka dii le na' bich gonzcho ka ben' ches, la' gauch ba zoa yisla Chioza' cho' lao dii mala' aga ka kana' zi' wyajle'cho cho'a xtilleena'. ¹² Ba zoa gao te che yell-lioni gani chnabia' dii mala' daa zaklebi yel cholə', na' ba zoa gao ile'icho beeni' che Chioza'. Daan, chiyal' kwey yichjcho dii mala' na' soacho goncho dii wenna' lega ben' yoo beeni' che Chioza'. ¹³ Chiyal' wsa' checho wen, ka ben' chda tella. Bi chiyal' goncho txen ga cheej chao ben' na' chzoll chnitgakile', ni bi chiyal' talencho xiin xool ben' wa xiin xyo ben', ni bi chiyal' goncho bichlə daa nak zban. Na'

bi chiyal' gakkil-lencho ben', ni bi chiyal' gakkcho ben' xe'. ¹⁴ San chiyal' gon kwinchcho lall' na' Xancho Jesucristona' na' koo yichjcho wsa' checho ka chazlallee na' bich secho wneyi we'cho cho'a xbayi beli chenni.

14

¹ Li gap yel' chxenlall' che beena' bin' gakkcha, na' bi gakkil-lenlene' ni che diika' bi nak dii lialo. ² La' bal ben' chakkakile' nakkzan wen gaogake' bittezə yel' wao, na' zi bale' chakkakile' chiyal' gaogake' shgal' yix' kwan. ³ Beena' cheej chao bittezə, bi chiyal' gonile' nakzi beena' bi cheej chao yog'lol. Na' beena' bi cheej chao yog'lol, bi chiyal' gakkile' beena' cheej chao bittezə bi chone' wen. La' Chioza' ba noni xiine' choptegake'. ⁴ ¿Nora nako' li' wwia wyizo' nak chon wen llin che ben' yoblə? Toz xane'nan' nezile' shi chone' wen wa bi chone' wen. Na' wzakkzile' gone' ka chiyal', la' Xanchona' nape' yel' wak kwenche gone' ka soachech xiine'ka' gongake' ka cheenile'.

⁵ Na' nit' ben' chakkakile' zoa lla nakchan lla choo lla xench aga ka lla yoblə. Na' lekzka' zoa ben' chakkakile' toz ka nak yog'te llaka'. To to ben' chiyal' soe' do yichj do lallee gone' ka chakile' nakan wen. ⁶ Na' beena' chaki zoa lla nakan lla choo lla xench aga ka lla yoblə, chbeje'n kwenche kwee Xancho Crístona' balaan. Na' beena' chaki toz ka nak yog'te llaka', lekzka' Xancho Crístonan' chgwee balaan daa chakile' ka'. Na' beena' chao bittezə, chgwee Xanchona' balaan, la' cho'e Chioza' yel' choxken kat' chawe'n. Na' beena' bi chao yog'lol, lekzka' chgwee Xancho Crístona' balaan, la' lekzka' cho'e Chioza' yel' choxken kat' chawe'.

⁷ Ni tocho bi chiyal' secho wneyi che kwinzcho. Shi mbancho wa shi guetcho chiyal' secho wneyi daa cheeni Crístona'. ⁸ Shi mbancho na' goncho ka sho' Xancho Jesucristona' balaan, na' shi guetcho na' guetcho ka sho'e balaan. La', laa mbancho wa ba wicho, lall' na' Xanchona'kzan nakcho. ⁹ Crístona' wite' na' bibane' ladj ben' wetka' kwenche gake' Xan yog'lol ben', ka ben' mban na' ka ben' ba wit.

¹⁰ Bi chiyal' yiya yiyiljcho bish' ljwellchona', ni bi chiyal' gonichone' nakzi. La' yog'lolcho lljazecho lao Chioza' kwenche wchogloe' che to tocho. ¹¹ Cho'a Xtill' Chioza' nan:

Xancho Chioza' ne', dii li zoakz' nad', na' dii li yog' ben' wchek' xibe'ka' lawa'ni, na' yoguee we'gake' dill' nan nad' nak' Chios.

¹² Na'chan to tocho yidecho kwent lao Chioza' che diika' bencho.

¹³ Daan, bich chiyal' yiya yiyilj ljwellcho. San wsak'cho bi goncho bittezə dii gonan ka ixop bish' ljwellchona' gone' dii mala' wa gakkchoplallee. ¹⁴ Daa bzajnii Xancho Jesúsza' nad', nezid' aga bi yel' wao de dii chxinj chlenan cho', lete shi to ben' chakile' de yel' wao dii chxinj chlenan yichjlall'do'ena', bi nakan wen gawe'n shi naa. ¹⁵ Na' shi daa cheej chawo' chonan ka chakkchoplall' bish' ljwello'na', aga chakilo'nen' shi ni cheej chaozo'n. Bi chiyal' yeej gawo' daa gonan ka kwiayi' beena' wit Crístona' ni che'. ¹⁶ La'kzi chonle bittezə dii chakile' nakan wen, bi chiyal' gonchlen shi chonan ka ina ben' yoblə aga wenan chonle. ¹⁷ La' shi ba chnabia' Chioza' cho', diika' cheej chaocho bi nakan dii lialo, san dii lialo yiyakcho ben' li ben' shao' na' soalen ljwellcho mbalaz, na' soacho yiba yizakicho daa zoalen Espíritu Sántona' cho'. ¹⁸ Na' shi zoacho choncho diiki chazlall' Crístona', na' yibayi Chioza' ka choncho na' lekzka' ben' yell-lioni inagake' choncho wen.

¹⁹ Daan, chiyal' goncho to dii byen soalen ljwellcho mbalaz na' gakkchachcho ganga. ²⁰ Bi yeej gaocho to dii gonan ka yinit dii wenna' ba ben Chioza' checho. Dii li, yog' diika' cheej chaocho nakgakan wen, san bi nakan wen yeej gaocho to dii chonan ka gakkchoplall' ben' yoblə. ²¹ Wentelan bi gaocho belaa ni bi yeejcho vinona', ni bi gonzcho bittezə dii gonan ka gakkchoplall' bish' ljwellchoka'. ²² Chiyal' inezilo' daa yeej gawo' do yichj do lalloo bi nakan mal lao Chioza'. Chakomba beena' bibi chza'lallee cheyi daa

nezile' nak wen. ²³ Beena' chonchoplall' kat' yeej gawe' to yel' wao, chape' dol' daa bi chawe'n do yichj do lallee. Na' yog' daa bi goncho do yichj do lall'cho, nakan xya.

15

¹ Na' cho' ba zoachecho chonlilall'cho Chioza', chiya' gapcho yel' chxenlall' che ben'ka' bin' gakcha, na' bi chiya' goncho daa cheenzicho goncho. ² To tocho chiya' goncho dii gaklenen bish' ljwellchoka' kwenche gakchagake'. ³ La' Crístona' aga bene' daa wyazlall' to kwinze', san gok che' ka na Cho'a Xtill' Chioza', daa na: "Daa wchell wne ben' cho' bzoazi'yaagakan nad'." ⁴ Na' yog' diika' na Cho'a Xtill' Chioza' bzejgake'n kwenche wzajniin cho' na' wtipan lall'cho kwenche gapcho yel' chxenlall' lao diika' chen chle'icho na' goncho lez dii wenna' ba bcheb Chioza' checho. ⁵ Chioza', beena' chon cho' yel' chxenlall' na' chtipe' lall'cho, gaklenshgue' le' soalen ljwell-le wen kon ka bli'yi Cristo Jesús'a' cho', ⁶ kwenche yog'le gake toz we'la'ole Chioza', beena' nak Xa Xancho Jesucristona'.

⁷ Daan, li wleb ljwell-le, ka ben Crístona' blebe' le' bénlene' txen, kwenche koole Chioza' balaan. ⁸ Na' nia' le', Crístona' bide' kwenche gaklene' neto' ben' Israel, kon ka bcheb Chioza' lao dii xozxto'nto'ka' kwenche inezinto' chone' kon ka chchebe'. ⁹ Na' lekzka' bide' kwenche ben'ka' bi nak ben' Israel we'la'ogake'ne' daa chiyesh'lallile' legake'. Chak ka na Cho'a Xtill' Chioza' daa na:

Daan, we'lawa li' ladj ben'ka' bi nak ben' Israel,
na' gol' inia' we'lawa li'.

¹⁰ Na' gan yoblə chiznan:

Le' bi nakle ben' Israel, li yibaleni neto' naknto' yell che'.

¹¹ Na' lekzka' gan yoblə chiznan:

Yog'le le' bi nakle ben' Israel, li we'la'o Xancho Chioza'.

Le' lle'le yog'te yell, li gol' inie'.

¹² Na' lekzka' dii Isaíaza' bzeje' daa na:

Ka to yag dii chigaa, ka' yiyak xiin dia che dii Isaína',

daa galj to ben' inabi'e ben'ka' bi nak ben' Israel,

na' gongake' lez gaklene' legake'.

¹³ Chios, beena' noncho lez gone' wen checho, gonshgue' ka yibaile na' soale mbalaz daa nonlilall'lene, kwenche zizikli gonchlene' lez daa zoalen yel' wak che Espíritu Sánton che'na' le'.

¹⁴ Le' ben' bish'dawaa na' le' ben' zandawaa, nezyenid' le' ben' wen nakle na' le' ba chajniile, na' ba chak wzajniin ljwell-le. ¹⁵ Na' lee yishi ba biyaxjid' bzej' le' che bal diika' bi chiya' guetlall'le, la' chaklen Chioza' nad' kwenche ¹⁶ chon' xshin Jesucristona' ladj ben'ka' bi nak ben' Israel. Na' llinni chon' nakan ka xshin bxoz, beena' chjwa' lao Chioza' diika' bibi nda' nchen. La' daa choe'len' legake' dill' wen dill' kob che'na' kwenche gonlilall'gake' Crístona', na' yixis yiyib Espíritu Sánton'a' yichjlall'do'eka', na' gakgake' lall' na' Chioza', wak inacho nakgake' ka to dii bibi nda' nchen daa chzanid' wi'ane'.

¹⁷ Daa chaklen Cristo Jesús'a' nad', chibaid' cho'a dill' chon' xshin Chioza' daa bene' lall' na'. ¹⁸ Aga wiyaxjid' wi'a dill' che bichlə dii ba ben', san cho'a dill' ka ba bchin Crístona' nad' kwenche zan ben'ka' bi nak ben' Israel chzenaggake' che'. Bchine' diika' wnia' na' diika' ben' ¹⁹ kon yel' wak che Espíritu che'na' kwenche gok diika' ben' ble'i ben' na' wyajle'gake'. Wzolo' Jerusalénna' na' wya' axt doxen gana' mbani Ilíricon'a' be'len' yog' ben' dill' wen dill' kob che Crístona'. ²⁰ Na' ben' byen jtixji'a dill' wen dill' kob che'na' gana' konon' inezin, kwenche bi jachish' jalan' xshin ben' yoblə. ²¹ San kon ka na Cho'a Xtill' Chioza', gana' nan:

Ben'ka' bin' gombia'gake' xtilleena', gombia'gake'n,
na' ben'ka' bin' yengakile' xtilleena', shajni'gakile'n.

²² Na' ni che llin dga chon' bin' gak yid' gana' zoale, la'kzi zan shii ba goklallaa yidwia' le'. ²³ Per naa ba biyoll ben' xshin Chioza' doxen gani chda', na' chakid' wak yidwia' le', la' kana'te chaklallaa yid'. ²⁴ Cheenid' tia' gana' zoale kat' sha' Española', la' cheenid' ile'id' le', la'ch' shloll, kwenche soacho mbalaz. Na' chbez' gaklenle nad' kwenche gak kooch' nez. ²⁵ Per naa, yiyaa Jerusalénna' lljasan' dii chyallji ben' bish'choka' lle' na'. ²⁶ La' ben'ka' choe'la'ogake' Crístona' Macedóniana' na' Acáyani do yichj do lall'gake' ba btopgake' mech dii wsel'gake' che ben' yesh'do'ka' len ladj ben'ka' nonlilall' Crístona' Jerusalénna'. ²⁷ Do yichj do lall'gake' chaklall'gake' gaklengake' legake', na' dii li nakan to dii chiyal' gongake', la' lengake' ba naki chegake' dii wenka' ba bcheb Chioza' che neto' ben' Israel, na' chiyal' yigoogake' wzon che ben' Israelka' we'gake' daa chyalljgakile'. ²⁸ Na' ka yiyoll lljasan' mech dga bengake' lo na', na' kwaa nez sha' Española' na' tia' yidwia' le'. ²⁹ Na' nezid' kat' yidwia' le', dii xen inleeb gaklen Crístona' cho'.

³⁰ Le' ben' bish' na' le' ben' zan', daa nonlilall'cho Xancho Jesucristona' na' daa chon Espíritu Sántona' ka chaki ljwellcho, chat'yoid' le' gakle nad' txen inabgachile Chioza' gaklene' nad' lawi diika' chdil chllag'. ³¹ Li inabi Chioza' yisle' nad' lo na' ben'ka' bi chonlilall'gake' Crístona', ben'ka' lle' gana' mbani Judeana', na' lekzka' li inabile' sho'lall' bish' ljwellchoka' lle' Jerusalénna' dga lljasan' chegake', ³² kwenche zoa' mbalaz yidwia' le', shi Chioza' gone' latj, na' yiyakshao'lallaa daa soacho txen. ³³ Na' Chioza', beena' chon ka zoacho mbalaz, soalenshgue' yog'le. Ka' gakan.

16

¹ Cheenid' gombia'le ben' zanchona' le Febe, beena' zoa chaklene' bish' ljwellchoka' nonlilall' Jesucristona' yell Cencreana'. ² Daa nonlilallee Xancho Jesucristona', wlebgachlene' do yichj do lall'le kat' yide' gana' zoale, la' kan' chiyal' goncho, cho' nakcho lall' na' Chioza'. Na' gaklenlene' shi bi dii chyalljile', la' len' ba goklene' zan bish' ljwellchoka' na' lentia' ba goklene'.

³ Li wwapgach chiox Priscilana' len ben' che', Aquilana', ben'ka' chonlengake' nad' xshin Cristo Jesús'. ⁴ Legake' bzoa dii nxoll yel' mban che'ka' kwenche goklengake' nad'. Na' aga to nad'zan nia' choxkengake' bengake' ka', san len yog' ben'ka' bi nak ben' Israel, ben'ka' ba nonlilall' Crístona' to to yell gana' jtixji'a xtilleena'. ⁵ Na' lekzka' li wwapgach chiox ben'ka' chdop chllag choe'la'ogake' Crístona' lille'ka'. Na' wwapgachle chiox Epenétona', beena' le chakid', beena' gok ben' nech benlilallee Crístona' gana' mbani Ásiana'. ⁶ Li wwapgach Maríana' chiox, la' le ba bilal bizodile' kwenche goklene' le'. ⁷ Li wwapgach chiox ben' wlall cha'ka' Andróniconna' na' Júniaza', ben'ka' wyoolen' txen lillyana'. Nechgake' benlilall'gake' Crístona' ka nad', na' mbejlaogake' ladj ben'ka' chjtixjee xtilleena'.

⁸ Li wwapgach chiox Ámpliaza'. Le chakidee daa nake' Xancho Jesucristona' txen. ⁹ Li wwapgach chiox Urbánona', beena' chonlene' neto' xshin Cristo Jesús', na' Estáquiza', beena' le chakid'. ¹⁰ Li wwapgach chiox Apéleza', beena' ba bli'e chakile' Crístona' do yichj do lallee. Na' li wwapgach chiox Aristóbulona' na' ben'ka' nake' txen loo yoo lille'na'. ¹¹ Li wwapgach chiox Herodiónna', beena' nak ben' wlall cha'. Na' lekzka' li wwapgach chiox Narcisona' na' ben'ka' nake' txen loo yoo lille'na', ben'ka' nonlilall' Xancho Jesucristona'. ¹² Li wwapgach chiox Trifénana' na' Trifósana', noolka' chon xshin Xancho Jesucristona'. Na' li wwapgach chiox Pérsidana', beena' le chakicho, la' le ba bilalile' bene' xshin Xanchona'. ¹³ Li wwapgach chiox Rúfona' beena' le zoacheche' chonlilallee Xancho Jesucristona', na' lekzka' xneena', beena' chonile' nad' ka xiine'. ¹⁴ Li wwapgach chiox Asíncritona', Flegóntena', Hérnaza', Patróbaza', Hérmeza' na' ben' bish'choka' na' ben' zanchoka' zolen legake'. ¹⁵ Li wwapgach chiox Filólogona' na' Júliana', na' Nerewa' len ben' zane'na', na' Olímpaza' na' yog' ben'ka' zolen legake', ben'ka' nak lall' na' Chioza'.

¹⁶ Li wwapgach chiox ljwell-le lega ben' chaki ljwellin daa nakle Chioza' txen. Yog' ben'ka' nonlilall' Crístona' yellka' gana' ba wya' chwagake' le' chiox.

¹⁷ Le' ben' bish' na' le' ben' zan', li wsak' bi wzenagle che ben'ka' chon ka chak ben' chopla, na' gongake' ka gakklejile che dill' lina' ba nsedle. Bi gonle legake' txen.

¹⁸ Ben'ka' chon ka' aga chongake' ka cheeni Xancho Jesucrístona', san chongake' daa nazan chegake'. Na' choe'la'o choe' dill'gake' na' choe'gake' dill' goll-lall' kwenche chonlej chongangakile' ben'ka' chajle'daz. ¹⁹ Yog'te ben' ba nezgakile' nakle ben' wizoa dill', na' le chiba chizakid' ka chonle. Na' cheenid' gake' ben' sin' kwenche gonchle diika' nak wen na' bibi dii mal gonle. ²⁰ Na' Chioza', beena' chon ka soacho mbalaz, lii wliayi'tie' yej' wak che Satanáza' na' gone' ka wlej wshoshjlen. Xancho Jesucrístona' gaklenshgue' le'.

²¹ Timotewi, beeni chonlene' nad' xshin Chioza', chwape' le' chiox na' lekzka' Lúcioni, Jasónni na' Sosípateri, ben'ki nak ben' wlall' cha'.

²² Nad', Tercio, chzej' dga na Pábloni, na' lekzka' chwap' le' chiox daa nakcho Xancho Jesucrístona' txen.

²³ Na' Gáyoni chwape' le' chiox, beeni none' lille'ni zoanto', na' lekzka' lille'ni no'en kwenche chdop chllag ben'ki choe'la'ogake' Crístona'. Na' Erástoni, beeni ngoo lo nee mech che yelli, chwape' le' chiox, na' lekzka' bish' ljwellchoni le Cuarto.

²⁴ Xancho Jesucrístona' gaklenshgue' yog'lojtele. Kan' gakan.

²⁵ Chiyal' we'la'ocho Chioza', beena' wak gone' ka soachechle gonlilall'lene' daa wyajle'le dill' wen dill' kob che'na' daa chyixji'a, daa chzajniin cho' che Jesucrístona'. Nakan daa kono wnezi kani'teyi, ²⁶ per naa, Chios, beena' zoa zejli kani, chaklallee inezichon, na' ba bene' ka chajniicho diika' bzej dii ben'ka' wdixjee daa golle' legake' kani'yi kwenche yog' ben' lle' doxen yell-lioni shajle'gake'n na' wzenaggake' cheyin.

²⁷ Toz Chioza' zeelo nake' ben' sin'. Na' chiyal' koochone' balaan zejli kani daa bselee Jesucrístona'. Kan' nakan.

Kart nech daa bzej Páblona' na' bseleen lao ben'ka' nonlilall' Jesucrístona' yell Coríntona'

¹ Nad' Pablo nak' ben' gox wñab Cristo Jesús'a' kwenche gak' postl che' kon ka chaklall' Chioza'. Nad', len ben' bish'cho Sóstenezi, chwapnto' le' chiox. ² Chzej' le', le' chdop chllagle choe'la'ole Chioza' yell Coríntona', na' nakle lall' nee daa ba nonlilall'le Jesucrístona'. Chioza' gox wñabe' le' kwenche gakle lall' nee len yog' ben'ka' choe'la'ogake' Xancho Jesucrístona' gattezə, la' Xancho Jesucrístona' lekzka' nake' Xangake'. ³ Xacho Chioza' len Xancho Jesucrístona' gaklenshgagake' le' na' wzoagake' le' mbalaz.

⁴ Toshiizi cho'a Chioza' yel' choxken ka wen ba bene' chele daa nonlilall'le Cristo Jesús'a'. ⁵ La' daa ba naklene' txen, Chioza' chaklene' le' kwenche chak gonle yog' diika' cheenile', ka choe'le xtilleena' na' leyi chajniilen. ⁶ Na' ka', ba nakbia'cha dii li ba wyajle'le xtil' Crístona' daa be'lennto' le'. ⁷ Na' daa ba non Chioza' le' daa chak gon tole, ba chak chonle yog' daa cheenile gonle shlak chbezle yiyed Xancho Jesucrístona'. ⁸ Na' gaklene' le' soachechle gonlilall'lene' axt llana' yiyede', kwenche bibi xtol'le gat' lawe'na'. ⁹ Chios, beena' gox wñab le' kwenche nakle txen Xiine' Jesucrístona', beena' nak Xancho, toshiizi chone' ka chchebe'.

¹⁰ Le' ben' bish' na' le' ben' zan', chat'yoid' le' kon yel' wñabia' che Xancho Jesucrístona', li gak toz lao yog'lolte na' bi gonzə che chele, san toz ka li se wneyi na' li gon toz dill' lao bittezə dii gonle. ¹¹ Nia' ka', le' ben' bish'dawaa na' le' ben' zandawaa, la' ben'ka' lle' lill Cloéna' ba wñagake' nad' ka chakdil-len ljwell-le. ¹² Nia' ka', daa bal-le nale: "Nad' chon' txen Páblona'", na' bal-le nale: "Nad' chon' txen Apóloza'." Na' bal-le nale: "Nad' chon' txen Céfaza'."* Na' zi bal-le nale: "Nad' nak' txen Crístona'." ¹³ ¿Achakile' Crístona' nake' chop shon' kwenlə? ¿Awa chakile nadaan wit' lee yag cruza' ni chele'? ¿Anti lia'na' bzetjgake' ka wchoale nisa'? Nezkzile bi nakan ka'. ¹⁴ Choxken Chioza' ni tole bi bchoa' nisa', lete Críspona' na' Gáyona', ¹⁵ kwenche kono inazə daa chone' nad' txenan wchoe' nis. ¹⁶ Lekzka' bchoanis' ben'ka' lle' loo yoo lill Estéfanaza', na' bi chjadinid' shi nochlə ben' yoblə bchoanis'. ¹⁷ La' aga bsel' Crístona' nad' wchoa' ben' nis, san kwenche chixje'id' legake' dill' wen dill' kob che'nan'. Na' ka chyixji'an, bi chpaa dill'ka' cho'a kwenche ki gaki ben' dill'ka' cho'a nakchan dii zak'chi aga ka daa wit Crístona' lee yag cruza'.

¹⁸ Kat' no cho'e dill' che daa wit Crístona' lee yag cruza', ben'ka' kwiayi' chakgakile' bizan chon chnan. San cho' yisla Chioza' kwenche bi kwiayi'cho, nezicho nakan dill' zakii dii nsa' yel' wak che'na'. ¹⁹ La' Cho'a Xtil' Chioza' nan:

Yinitloa' yel' sin' che ben' sin'ka'.

Na' gonllejid' ben'ka' chaki le chajni.

²⁰ ¿Bitgui gak gon ben' sin'ka' na' ben'ka' le nsed ley che Chioza', na' ben'ka' choe' dill' dii chaki ben' nakan dill' sin'? La' Chioza' ba bli'e bibi zakii yel' sin' che ben' yell-lioni.

²¹ Lo yel' sin' che'na', ba bene' kwenche aga yel' sin' che ben' yell-lioki gaklenen legake' gombia'gake' le'. La' wyazlallee yisle' ben' kwenche bi kwiayi'gake' daa shajle'gake' xtil' Crístona' daa chyixje'i ben' legake', la'kzi chaki ben' bizan chon chnan.

²² Ka nak ben' Israelka', legake' chnabgake' ile'gakile' yel' wak kwenche shajle'gake', na' ben' griegoka' chiyiljgake' daa chakgakile' nak yel' sin'. ²³ San neto' chyixje'into' ben' daa wit Crístona' lee yag cruza', na' ben' Israelka' chakzbangakile' daa nanto' ka', na' ben'ka' bi nak ben' Israel chakgakile' biz dill' daa choe'nto'. ²⁴ San cho' ba gox wñab Chioza' kwenche nakcho lall' nee, ka neto' naknto' ben' Israel na' ka le' nakle ben' griego, nezicho Chioza' bli'e yel' wak na' yel' sin' che'na' daa bselee Crístona' wite' ni checho. ²⁵ Na' dga

* **1:12** Céfas: kan' le Pédrona' de dill' arameo, daa gok xtil' Jesús'a'.

ben Chioza' daa chaki beṅ' yell-lioni bizan chon chnan, leyen'lannan' nakchan to yel' sin' xench aga ka bittezə yel' sin' che beṅ' yell-lioni. Na' daa chaki beṅ' yell-lioni chli'n bi nap Chioza' yel' wak, leyen'lannan' napchan yel' wak aga ka bittezə yel' wak dii nap beṅ' yell-lioni. ²⁶ Le' beṅ' bish', li se wneyi ka nak daa gox wṅab Chioza' le' kwenche nakle lall' nee la'kzi aga zanle nape yel' sin'na' de yell-lioni, ni aga zanle nakle beṅ' zakii, ni aga zanle goljle lo dia che beṅ' zakii. ²⁷ La' Chioza' ba wleje' beṅ' bi nake' beṅ' sin' yell-lioni kwenche wsi'e beṅ' sin'ka' yel' zto', na' wleje' beṅ' bibi zakii yell-lioni kwenche wsi'e beṅ'ka' zakii yel' zto'. ²⁸ Chioza' ba wleje' beṅ' bibi zakii, na' beṅ' choni beṅ' legake' nakzi, na' beṅ'ka' kono nakgake' yell-lioni, kwenche chli'e bibi zakii yel' zakii daa de yell-lioni. ²⁹ Na' ka', kono gak gon kwini beṅ' choo beṅ' xen lawe'na'. ³⁰ La' kwinkzen' ba bene' ka gokcho Jesucristona' txen. Na' daa ba nakcho Crístona' txen, Chioza' ba nonə' cho' yel' sin' che'na', na' ba biyone' cho' beṅ' li beṅ' shao' lawe'na', na' ba bixis biyibe' yichjlall'do'chona' na' ba bisell bilee cho' lo ni'a na' dii mala'. ³¹ Na' kon ka na Cho'a Xtill' Chioza': "Shi no cheeni wshalj wshon, chiyaḷ' wshalj wshone' che yog' diika' ba ben Xanchona' che'."

2

¹ Na' le' beṅ' bish' na' le' beṅ' zan', ka bidtixje'id' le' xtill' Chioza', aga bpaadill'ka' be'len' le', ni bi bchin' dill' sin' che beṅ' yell-lioni. ² Kana' wzoa ladjləna', beṅ' to dii byen be'len' le' toz xtill' Jesucristona' na' ka nak daa wite' lee yag cruza', na' bich bi dill' yoblə be'len' le'. ³ Na' ka wzoalen' le', blleb' daa gokid' shi bi gak' wi'a xtill' Jesucristona' ka chiyaḷ'. ⁴ Na' ka bshaljlen' le' na' ka wdixje'id' le' xtill' Crístona', aga bi'a dill' dii chaki beṅ' nakan dill' sin' kwenche kooyelaa le' shajle'le. San daa bi'a xtilleena' kon yel' wak che Espíritu che Chiozan' wyajle'le. ⁵ La' aga goklallaa shajle'le ni che yel' sin' che beṅ' yell-lioni, san daa yenile' dill'ka' nsa' yel' wak che Chiozan'.

⁶ Dii li de to yel' sin' daa choe'lennto' beṅ'ka' ba nakcha nonlilall'gake' Crístona'. Per bi nakan yel' sin' che yell-lioni, ni bi nakan yel' sin' che beṅ'ka' chṅabia'gake' lo yell-lioni, la' wllin lla te che beṅ'ka'. ⁷ San chzajniinto' le' yel' sin' che Chioza' daa ngash' kani'teyi, daa wlo'e xṅezin kana' zi' wxə wsile' yell-lioni. La' kana'te wlo'e xṅezin yid Crístona' chixje' xtol'choka' kwenche soacho mbalaz. ⁸ Ni tlish' beṅ' wṅabia'ka' zoa yell-lioni bi wyajni'gakile' yel' sin' che Chioza', la' shel'ka' wyajni'gakile'n, bi betgake' Xancho Crístona' lee yag cruza', beena' liizelozi nak beṅ' choo beṅ' xen. ⁹ Per ka na cho'a xtill' Chioza':

Daa konon' ile'i na' konon' yeni, ni konon' sa'lall' shi gakan,
lennan' wloo Chioza' xṅezin gone' che beṅ'ka' chakgakile'ne'.

¹⁰ Na' Chioza' ba bene' kwenche Espíritu che'na' ba bzajniile' cho' cheyi diika'. Na' Espíritu che'na' nez nle'ile' yog'lol, na' chajniile' kwaslol yog' daa nak che Chioza'.

¹¹ La' cho' beṅ' yell-lion shinchozə nezicho dii yoo loo yichjlall'do' kwinocho, na' bi nezicho bi yoo loo yichjlall'do' beṅ' yoblə. Ka'kzan, toz Espíritu che Chioza' nez nle'ile' daa ngoo Chioza' xṅezin. ¹² Na' cho' aga yel' sin' daa de yell-lionin chchincho, san Chioza' ba bene' cho' Espíritu che'na' kwenche chajniicho ka nak dii wenna' daa ba nonə' cho'. ¹³ Na' neto', kat' choe'nto' xtill' Crístona', aga chchinnto' yel' sin'na' de yell-lionizə, san chzajniinto' diika' chzajni Espíritu che Chioza' neto', na' chchinnto' dill' daa chzajniile' neto'.

¹⁴ Na' beena' bi yoo Espíritu che Chioza' loo yichjlall'do'ena', bi chajli'e dill' daa chzajni Espíritu che Chioza', daa chakile' bizan chon chnan. Na' bi chajniile'n daa chyalljin gaken Espírituna'ne' kwenche shajniile'n. ¹⁵ San beena' yoo Espíritu che Chioza' loo yichjlall'do'ena' chajniile' che bittezə daa cheeni Chioza' inezile', na' kono gak bi ina che'. ¹⁶ Cho'a Xtill' Chioza' nan: "Ni to kono nezi daa cheeni Xancho Chioza' gone', na' ni to kono gak wzajniile'ne' nakan chiyaḷ' gone'." San cho' ba yoo Espíritu che Chioza' loo yichjlall'do'choni, ba chajniicho daa cheeni Crístona' gone'.

3

¹ Le' ben' bish' na' le' ben' zan', bi gok we'len' le' ka dill'ka' choe'len' ben'ka' ba nakcha lo xnez Chioza', daa ni chonle ka nazan chele, na' ni nakle ka bi'do' daa bin' shajni'yen'ile che Crístona'. ² Na' ka chon ben' kon bdo' cheenna' cho'eb' nillaa daa bin' gak gaob' yel' wawa', kan' ben' chele, bi be'len' le' dill' dii nak lallj, la' bin' gak shajniilen. Na' ni naa bin' shajni'kzilen. ³ Nia' ka', daa ni chonle daa nazan chele. Daa chakxe'i ljwell-le, na' chakdil-len ljwell-le, chli'n ni chonle ka nazan chele na' chonle ka ben' bi nombia' Chioza'. ⁴ Daa na bal-le: "Nad' nak' txen Páblona'", na' zi bal-le nale: "Nad' nak' txen Apóloza'", ¿abi chakbe'ile ka ben' bi nombia' Chiozan' chonle?

⁵ ¿No nak Apóloza'? Na' ¿no nak' nad'? Zeelochoz naknto' wen llin che Xancho Crístona', na' le' bene' ka ben'ilall'lene' ka be'lennto' le' xtilleena'. To to neto' bennto' kon ka wlo'e xnezin gonnto'. ⁶ Nad' nak' ka beena' goz daa wdis' xtill' Crístona' ladjlena', na' Apóloza' nake' ka beena' wdil, daa bli' bsdchile' le'. Per Chioza' bene' ka wyajle'le daa bli' bsdinto' le'. ⁷ Na' aga no nak beena' chaz ni beena' chyil, la' toz Chiozan' chone' ka chgol daa ba byaz. ⁸ Toz ka zak' beena' chaz na' beena' chyil. Na' Chioza' gone' kwenche to toe' si'e banez kon ka nak llinna' daa bene'. ⁹ Neto' naknto' txen chonnto' xshin Chioza' ladjlena', na' naknto' ka ben' goz goon che', na' le' nakle ka yell-lion che' gana' chonnto' llinna'. Na' lekzka' nakle ka to yoo che' dii chonnto'.

¹⁰ Chioza' ba goklene' nad' chon' xshine'na' ladjlena', na' daa ben' ladjlena' nakan ka ben' wlek to len yoo, na' ben' yoblə chlise' zeeka'. Na' to to wen llin chiyal' wsakee shi chone' llinna' ka chiyal' gakan. ¹¹ Na' kono gak wxe sto len yoblin, la' Jesucrístonan' zaklebile' len yooná' ba chí'. ¹² Na' lo len yooni, zoa ben' wxeile'n or wa plat, wa yaj dii zakii, na' zoa ben' wxeile'n yagla', wa yeje, wa yix. ¹³ Na' llinna' daa gon to toe' wli'lawin shi nakan dii zakii. La' kat' illin lla gon Chioza' yel' joschis che ben' yell-lioni, yi' che'na' wzeyan daa bi zakii, na' gakbia' nak nak llinna' ben to toe'. ¹⁴ Na' shi no ben to dii bi shey, na' si'e banez che xshine'na'. ¹⁵ Per shi daa bene' sheyan, na' bibi banez si'e cheyin. Na' kayaadia yile' bi kwiaayee lo yi'na'.

¹⁶ ¿Abi chakbe'ile nan le' chdop chllagle choe'la'ole Crístona' nakle ka lill xlatj Chioza', na' Espíritu che'na' zoe' ladjlena'? ¹⁷ Na' shi no wlliaiyi' lill xlatje'na', Chioza' wlliaayee beena' gon ka', na' len' nakle ka lill xlatj Chioza' daa nakle lall' nee.

¹⁸ Bi siye' kwinkle. Shi nole chakile nakle ben' sin' daa naple yel' sin' che yell-lioni, chiyal' yiyakle ka to ben' bibi chajnií lao ben' yell-lioni kwenche Chioza' gone' le' dowalj yel' sin'na'. ¹⁹ La' yel' sin' che ben' yell-lioni aga bi zakaan lao Chioza'. Cho'a Xtill' Chioza' nan: "Chioza' chone' kwenche ben' sin'ka' chakchixgakile' lo yel' sin' che'ka'."

²⁰ Na' lekzka' nan: "Xancho Chioza' nombi'e yog'lol' daa chza'lall' ben' yell-lioni, na' nezile' nakan dii bibi zakii." ²¹ Daan, ni tole bi chiyal' gake ben' cha'sib daa shi non nakle txen, la' yog' ben' na' yog' dii de nakan chele kwenche si'le banez cheyin: ²² laa nad' Pablo, laa Apóloza', laa Céfaza', laa yell-lioni, laa yel' mbanna', laa yel' wita', laa daa chak naa, laa daa zi' gak. Yog'nto' len yog' diika' nakgakan chele kwenche si'le banez cheyin. ²³ Na' le' nakle lall' na' Crístona', na' Crístona' nake' lall' na' Chioza'.

4

¹ Chiyal' gakbe'ile neto' naknto' wen llin che Crístona', na' nak lo na'nto' chzajniinto' ben' daa kono wnezi daa wloo Chioza' xnezin. ² Na' chonan byen gonnto' kon ka ba none' lall' na'nto' gonnto'. ³ Na' aga bitek wneyi zia' shi le' wa laa xonj ben' chi'e nad' kwent wneyi shi chak gon' xshin Chioza' ka chiyal'. Ni nad' biga chbi'a kwent wneyi che kwín' shi chon' ka chiyal'. ⁴ Na' la'kzi bibi de dii chao chdian nad', aga ni che ka' bibi dol' cha' de. Toz Xancho Crístona' nez nle'ile' shi chon' ka chiyal' gon'. ⁵ Na' daan, bi chiyal' sele kwent wneyi ben', san li kwez ax't kat'ka' yila' Xancho Crístona' na' wli'e lawi daa ngash' naa na' daa yoo loo yichjlall'do' yog' ben'. Kana'chan gon Chioza' ka sho'cho balaan shi bencho ka cheenile'.

⁶ Le' ben' bish' na' le' ben' zan', choe'len' le' dill'ki kwenche gak wen chele, na' cho'a dill' che kwint' len xtill' Apóloza' kwenche inezile ka chonnto' na' wsedle bi tele lawi daa na Cho'a Xtill' Chioza'. Na'ch bi gakte ben' cha'sib na' soazle che bal' ben' na' gonzile zi bale' nakzi. ⁷ ¿Achakile nakchle ben' zak'chi aga ka ben' yoblə? La' Chioza' bene' diika' ba nape. Na' daa ben' Chioza'gakan, ¿berache chshalj chshonzle cheyin ka inacho tobialozlen bllelilen?

⁸ Le' chakile bich bi chyalljile. Chakile ba nakle ka ben' wni'a daa non Chioza' diika' gak gon to tole. Chakile ba chnabia'lenle Crístona' na' bich chyalljile neto'. Le mba shel' dii li ba chnabia'le, kwenche len neto' inabia'lennto' le', shel'ka'. ⁹ Chakid' Chioza' ba none' kwenche neto' postl naknto' ka ben' liizelozi bibi zakii, na' ka ben' nchogbia' guet. Na' yog'te ben' yell-lioki na' len anjlka' chibangakile' chwiagake' ka chak chento'.

¹⁰ Ben' zan chakgakile' naknto' ben' bi nteyi daa chonnto' xshin Crístona', san le', chon kwint'le ka ben' le chajni daa nonlilall'le Crístona'. Neto' chakbe'into' bibi chak gonnto', san le' chakile chak gonle bittezə. Chle'shii ben' le', san neto', chle'zbani ben' neto'.

¹¹ Axt naanlla zoa kat' chbil chdonnto', chyallj xalaannto', chsak'zi ben' neto', na' aga bi lill xlatjnto' de. ¹² Na' chisto yichj chisto lall'nto' chonnto' llin kon ni'a na'nto'ki kwenche gat' dii yeej gaonto'. Zoa ben' chyishjgake' bia' blag' chento', na' neto' chnablnto' gaklen Chioza' legake'. Chchi chsak'gake' neto' na' chzo chzakinto' daa chongakile' neto'.

¹³ Chiya dii nagake' chento', na' neto' choe'lento' legake' dill' xochi. Na' chongakile' neto' ka ben' zeelo bibi zakii, ka to dii ba wchoon ben'. Axt naanlla ni chongakile' neto' ka'.

¹⁴ Aga chzej' dga kwenche wsi'a le' yel' zto', san kwenche wzajniid' le', daa chakid' le' ka xiin'. ¹⁵ Na' la'kzi zoa shi mil ben' wzajniile' le' che Crístona', toz beena' nak ka xalen zoa. La' nadaan nak' ka xale daa wlo'a le' lo xnez Cristo Jesúsza' ka be'len' le' dill' wen dill' kob che'na'. ¹⁶ Daan chat'yoid' le', li gon ka chon'.

¹⁷ Na' daan, ba bselaa Timotewa' gana' zoale. Chakidee ka dowalj xiin' na' chone' xshin Crístona' ka chiyal' gone'. Le' yisee lall'le ka nsa' cha' lo xnez Crístona', na' ka chzajniid' ben'ka' chdop chllag choe'la'ogake' Crístona' doxen gana' chda'. ¹⁸ Bal'le ba chep cha'lall'le daa chakile' bich yidwia' le'. ¹⁹ Per shi Xanchona' wi'e latj, yob yidwia' le' na' ile'id' shi ben'ka' chep cha'lall' dii li chak gongake' ka nagake' wa shi chshaljzgaken'.

²⁰ Aga de dill'zan inacho ba chnabia' Chioza' cho', san daa gapcho yel' wak che'nan' na'chan gak goncho ka cheenile'. ²¹ ¿Nakra cheenile gon' kat' yidwia' le'? ¿Acheenile gonid' le' znia?, anti ¿we'len' le' dill' xochi daa le chakid' le'?

5

¹ Ba benid' dill' nagake' nan len to ben' ladjlena' zoalene' xna'zi'ena' ka xoole'. Daa chon beena' nakan to dii zban inleeb; ni ben'ka' bi nombia' Chioza' bi chongake' ka'. ² Na' la'kzi chak ka' ladjlena', ni chep cha'lall'zle daa chakile ba chonle ka cheeni Chioza'. Chiyal'lə gakyeshilen na' yibejle beena' chon ka'. ³ La'kzi naa bi zoa' gana' zoale, le chi' yichj' ka nsa' chele. Na' kon li gaktezi na'kzan zoalen' le', na' li gon ka ba bhogloa' gak che beena' ben ka'. ⁴ Na' kat' ndi'a nllagle choe'la'ole Xancho Jesúsza', li gaktezi na'kzan zoa' ladjlena', na' daa zoalen yel' wak che Xancho Jesúsza' le', ⁵ li yibej beena' na' li gone' lall' na' Satanáza' kwenche shi yiyakbe'ile' na' yiyaj yilenile' na' yile' lo yel' zi'na' daa za llana' wchoglo Xanchona' che ben'.

⁶ Bi nakan wen chep cha'lall'le. Ba nezczile dillaa de nan: “Lat'z le vadúrana' chisgolan doxen kwa che yetxtila.” ⁷ Dii mal daa ben beena' ladjlena' nakan ka le vadúrana'. Na' ka neto' ben' Israel bi choe'nto' latj yigaan ni lat' le vadúrana' loo yoo lillnto' kat' chal' lni Paskwa', ka'kzə le' chiyal' kwejle beena' chon zban ladjlena' kwenche gakte ka kwa kob daa bi nchix le vadúrana', kon ka ba nakkzle. La' Crístona', beena' zaklebi xil'do'na' chitgake' Paskwa', ba wite' ni checho. ⁸ Na' ka chon ben'ka' chon lni Paskwa' chbejgake' yog'lol' daa nchix le vadúrana', ka'kzə cho' chiyal' soa kwezcho bich goncho saaxyana' na' bi dii mal daa bencho kani'yi, san soacho do yichj do lall'cho shajlencho daa nak dii li.

⁹ Ba bzejgz' le' to shii wnia' le' bi gonlenle txen ben'ka' chdalen ljwellin. ¹⁰ Daa wnia' bi chiyal' gonle txen ben'ka' chdalen ljwellgake', wa chzelall'gake' gat' kwe'gakile' dii de yell-lioni, wa chbangake', wa choe'la'ogake' no yaj yag, aga che ben'ka' bi nombia' Chiozan' nia' ka', la' shel' bi gak lencho ladje'ka' chiyal' ichejtekzcho lo yell-lioni, shel'ka'. ¹¹ San daa wnia' ka' zej in bi gak lencho nottezə ben' ne' nake' cho' txen nonlilall'cho Crístona' na' chdalene' xiin xool ben', wa chzelallile' gat' kwe'ile' dii de yell-lioni, wa choe'la'owe' no yaj yag, wa chbell chnie' che ben', wa nake' weezo, wa nake' ben' wban. Yog' ben'ka' chon ka', ni bi yeej gaolenle legake'. ¹² Bi nak lall' na'cho kwe'cho kwent wneyi ben'ka' bi nonlilall' Crístona'. San ben'ka' nakcho txen nonlilall'cho Crístona', legaken' chiyal' kwe'cho kwent wneyi. ¹³ Chioza' yizi'e kwent ben'ka' bi nonlilall' Crístona'. Na' le', li yibej beena' chon dii mala' ladjlena'.

6

¹ Kat' tole de to dii zed chele kon sto beena' nakle txen nonlilall'le Crístona', bi chiyal' shajle lao ben'ka' bi nonlilall' Crístona' kwenche gongake' yel' joschis chelena', san li shaj lao ben'ka' nak lall' na' Chioza' kwenche gongake' yel' joschis chelena'. ² ¿Abi nezile wllin lla le' nakle lall' na' Chioza' gonle yel' joschis che ben' yell-lioki? Na' shi len' gonle yel' joschis che'ka', lekzka' wak gonle yel' joschis che bizə diido'ka' chak naa. ³ ¿Abi nezile ax̄t anjlka' goncho yel' joschis che'ka'? Na' shi goncho yel' joschis che anjlka', ¿abi gak goncho yel' joschis che diiki chak naa zoacho yell-lioni? ⁴ Na' shi le' chakdil'-len ljwell-le ni che biz diika' chak chele, ¿berache chajzle lao joschiska' ben'ka' bi nonlilall'gake' Crístona', ben'ka' bibi zakii ladjlena'? ⁵ Nia' le' ka' kwenche yido'latile. ¿Aniga tlish'le bi nteyi kwenche gak gonle yel' joschis che ben'ka' nonlilall'lenle Crístona'? ⁶ Latjin dii gonlen ladjle na'z, ba zejzle zjtaole xya che ljwell-le lao joschiska' bi nonlilall' Crístona'.

⁷ Na' daa chao xya che ljwell-le chli'n bi nsa' chele wen. ¿Bi che ki chonxenlall'le yog' dii choni ben' le', wa ki chonle ka'z kat' no chzi' chban bi de chele? ⁸ Per le'la, lwaa dii gonle ka', dii zan dii choni ljwell-le na' chizi' chibantezle che ljwell-le.

⁹ ¿Abi nezile ben'ka' bi chon wen aga willingake' gana' zoa Chioza' chnabi'e? Bi siye'z kwinele, la' ka' nak ben'ka' chdalen ljwellin, ben'ka' choe'la'o yaj yagka', ben'ka' bi chon banez xoolin wa noolka' bi chon banez ben' cheyin, ben' xejka', ¹⁰ ben' wbanka', ben'ka' chzelallii gat' kwe'gakile' daa de yell-lioni, ben' weezoka', ben'ka' chbell chne che ben', wa ben'ka' chyiljall' naklə si' kwangake' bi de che ben', ni to ben'ka' chon diiki bi yillingake' gana' zoa Chioza' chnabi'e. ¹¹ Na' bal'-le gokle ka' ben' malki kana'. Per naa Chioza' ba bixis biyibe' le', ba none' le' yell che', na' ba biyone' le' ben' li ben' shao' lawe'na' daa ba nonlilall'le Xancho Jesucristona' na' daa chon Espiritu che'na' llin lo yel' mban chelena'.

¹² Dill' de, nan: “De latj goncho bittezə.” Likzan, per aga yog' daa goncho nakan wen. Na' la'kzi de latj goncho bittezə, bi chiyal' we'cho latj inabia'n cho'. ¹³ Nezicho yel' wawa' nakan che leechoni, na' leechoni none'n kwenche shoon yel' wawa'. Per Chioza' gone' ka te che chopte diiki. Na' kwerp chechoni aga none'n kwenche nottez gat'lencho, san kwenche goncho daa cheeni Xancho Crístona', na' Xanchona' nak lall' nee kwerp chechoni. ¹⁴ Na' ka bisban Chioza' Xancho Jesucristona' ladj ben' wetka' kon yel' wak che'na', ka'kzan yisbane' cho' ladj ben' wetka'.

¹⁵ Nezile yog'cho nonlilall'cho Crístona' chzaklebicho tkwen wej kwerp che'na'. Na' biga chiyal' wchincho kwerp chechoki nak ka tkwen wej kwerp che Crístona' kwenche gat'lencho noolə wdana'. ¹⁶ ¿Abi nezile nottezə ben' gat'lene' to noolə wda, chake'ne' toz? La' Cho'a Xtill' Chioza' nan: “Ben'ka' chop gagkake' toz kwerp.” ¹⁷ Per beena' chon kwine' lall' na' Xancho Crístona', chake'ne' toz daa yoo Espiritu che'na' loo yichjall'do'ena'.

¹⁸ Bi wchinle kwerp chelena' gat'lenzle nottez ben', li ikwas lao dii mala' nak ka'. La' lennan' chxinj chlenchan kwerp chechona' aga ka bichlə dii mal yoblə. Beena' gon to dii

mal yoblə, aga bi nonan che kwerp che'na', san daa chon beena' chchin kwerp che'na' chat'lene' nottez, chxinj chlenan do ka nake'. ¹⁹ ¿Abi nezile kwerp chechoni nakan lill xlatj Espiritu Sántona', beena' bzoa Chioza' loo yichjall'do'choni? Na' bi gak goncho daa nazan checho; ²⁰ la' Crístona' ba biya'o bizi'e cho' daa blalj xchene'na' na' wite' ni checho kwenche nakcho lall' na' Chioza'. Daan yog' daa gonlen kwerp chechoni chiyal' gonchon ka sho' Chioza' balaan.

7

¹ Ka nak diika' wñabile nad' ka bzejle nad', nad' nia' nakan wen shi bi ikaa che ben' byona'. ² Per daa zoale dii nxoll gat'lenle nottez ka chon ben' yell-lioni, daan to to ben' byo chiyal' soa nool che', na' lekzka' to to noolə chiyal' soa ben' che'. ³ Na' ben'ka' nshagna', ka ben' byo ka nool, bi chiyal' wlloni ljwellgake' kwerp che'ka'. ⁴ La' noola' aga nak kwerp che'na' che toze', san nakan len che ben' che'na'. Na' ka'kzə ben' che'na' bi nak kwerp che'na' che toze', san nakan len che xoolə'na'. ⁵ Na' daan bi wlloni ljwell-le kwerp cheleka', per shi choptele ba be'le dill' bi gat'len ljwell-le to tiemp kwenche we'llwill-le Chioza', aga bi nonan. Na' tena' chiyal' yiyell ljwell-le dii yoblə kwenche bi soale dii nxoll gon dii xiwaa le' gan na' we'le cho'a xbayi beli chenna' talenle ben' yoblə.

⁶ Nia' le' ka' kwenche inezile wak wshagna' ben' byona' na' noola', per bi chonan byen shi bi cheengakile'. ⁷ Nad' chakid' nakan wen shel'ka' yog' ben' byo soe' toze' ka zoa' nad', per wde wdeli nak daa non Chioza' gon to tocho.

⁸ Na' le' bin' wshagna'le, na' lekzka' le' ba wit ben' cheleka', nia' le' naklan wen soa tozle, ka zoa' nad'. ⁹ Per shi bi yizoilen, wenchoklə ikaa chele kwenche bi sho' shejlall'le selall'le nool wa ben' byo daa chonan lallj inabia' kwinle.

¹⁰ Na' le' nshagna'le, nia' le' kon ka non Xancho Crístona' mandad gonle, aga nakan dii nia' nad': Noola' bi chiyal' yilee ben' che'na'. ¹¹ Na' shi noola' yilee ben' che'na', bi chiyal' yikee ben' yoblə, san wenlan yiyoe'xene' ben' che'na' na' yikeene' dii yoblə. Na' ka'kzə ben' byona' bi chiyal' yilee xoolə'na'.

¹² Ka le' nshagna'le na' bi nonlilall'le Crístona' choptele, nia' le' dga, per bi nakan daa nllia Xanchona' bia' gonle: shi to ben' byo nshagna'lene' to noolə bi nonlilall' Crístona', na' noola' none' lez gax'she'lene'ne', bi chiyal' yilaa ben' che'na' le'. ¹³ Na' shi to noolə nshagna'lene' to ben' byo bi nonlilall' Crístona', na' ben' che'na' none' lez gax'she'lene'ne', bi chiyal' yilaa xoolə'na' le'. ¹⁴ Ben' byona', beena' bi nonlilallee Crístona' shi nshagnee to noolə ben' ba nonlilalleene', Chioza' chle'shiile'ne' ni che nool che'na'. Na' noola', beena' bi nonlilallee Crístona', shi nshagnee to ben' byo ben' ba nonlilalleene', Chioza' chle'shiilene' ni che ben' che'na'. Shel' bi nakan ka', bi chle'shii Chioza' xiine'ka', shel'ka'. San daa nonlilall' togake' Crístona', Chioza' chle'shiile' xiine'ka'. ¹⁵ Per shi xoolə'na' wa ben' cho'na', beena' bi nonlilallee Crístona', bich cheenile' soalene' li', be' latj yiyaje'. Bi chonan byen soayaadialenzo'ne', la' Chioza' ba gox wñabe' cho' kwenche soacho mbalaz. ¹⁶ Na' li' nonlilalloo Crístona', bi nezilo' shi wak gono' kwenche ben' cho'na' wa xoolə'na' gonlilallee Crístona' na' yile' bi kwiayi'e.

¹⁷ To tocho, ka ben' nshagna' ka ben' zoa toze', chiyal' soacho kon ka non Xanchona' checho ka gox wñab Chioza' cho'. Ka'kzə chon' byen gon yog' kwen ben'ka' chdop chllag choe'la'ogake' Crístona'. ¹⁸ Shi nole yoole sen daa le circuncisión ka gox wñab Chioza' le', bi gonle ka yinit senna'. Na' shi bi yoole senna' ka gox wñab Chioza' le', bi koo kwinle sen. ¹⁹ Aga bi nonan shi yoocho senna' wa shi bi yoochon, san daa lliarote goncho ka nllia' Chioza' bia'. ²⁰ To tocho chiyal' soacho kon ka nakcho ka gox wñab Chioza' cho'. ²¹ Shi ba nzi' ben' li' kwenche gono' xshine'na' ka gox wñab Chioza' li', bibi gakilo'. Per shi sho'ilo' xnezin yisane' li', ben to dii byen. ²² La' beena' ndoo chon xshin ben' ka gox wñab Chioza'ne', Crístona' ba bisell bileene' lao dii mala'. Na' beena' chon xshinkze' ka gox wñab Chioza' le', ba nak Crístona' Xane' daa ba biya'o bizi'ene' lao dii mala'. ²³ Daa

wit Crístona' biya'o bizi'e cho' lo ñi'a na' dii mala'. Daan chiyal' wzenagchcho che' aga ka che nottez beñ'. ²⁴ Na' le' beñ' bish' na' le' beñ' zan', kon ka zoacho ka gox wñab Chioza' cho', ka'kzan soa kwezcho lawe'na'.

²⁵ Na' ka le' ni zoale tozle, bi nllia Xancho Crístona' bia' nak gonle, per nad' inia' ka chakid' chiyal' gonle. Na' daa ba biyesh'lallii Xanchona' nad', zak'kzi xtillaana' wzenaglen. ²⁶ Nad' chakid' nakan wen soale kon ka zoale ñaa, la' llaki zoacho nakgakan dii lallj. ²⁷ Shi zoa nool chele bi yilaalene'. Na' shi kono nool chele zoa, bi gonle byen ikaa chele. ²⁸ Shi wshagna'le, bi nakan mal; na' shi to nool wew' wshagna'b' lekzka' aga bi mal nakan. Per dii zan dii zed chen chle'i beñ'ka' nshagna', na' chaklallaa bi gak chele ka'.

²⁹ Na' le' beñ' bish' na' le' beñ' zan', cheenid' inia' le' dga: Zi' lat'chga latj checho de. Daan, le' nshagna'le, bi we'le latj wsej wllon nool chelena' gonle ka cheeni Chioza'. ³⁰ Na' shi nole zoale nyesh' bi we'le latj wsej wllonan gonle ka cheeni Chioza'. Na' shi nole zoale mbalaz, bi we'le latj wsej wllonan gonle ka cheeni Chioza'. Na' shi nole cha'o chzi'le bitteza, bi we'le latj wsej wllonan gonle ka cheeni Chioza'. ³¹ Na' shi nole chzi'le banez dii de yell-lioni, bi we'le latj wsej wllonan gonle ka cheeni Chioza'; la' yell-lioni dga nombia'cho nakan dii te cheyin.

³² Nad' chaklallaa bibi sele wñeyi cheyin, shel'ka'. La' beñ' byona' bi nshagna' chzeche' wñeyi daa nak che Xanchona' kwenche gone' ka yiyoollalee. ³³ San beena' nshagna' chzeche' wñeyi cheyi daa de yell-lioni na' nak gone' kwenche yiyoollallii nool che'na' daa chone', ³⁴ na' chopla nak diika' chzie' wñeyi cheyin. Na' nool tona' na' ka'kza nool wewaa zechgake' wñeyi che daa nak che Xanchona', na' do ka nakgake' chon kwingake' lall' nee kwenche gongake' daa cheenile'. San noola' nshagna' chzeche' wñeyi cheyi daa de yell-lioni na' nak gone' kwenche yiyoollallii beñ' che'na' daa chone'.

³⁵ Nia' le' ka' aga daa cheenid' wsej wllon' bi gonle, san daa cheenid' gaklen' le' gonle ka chiyali, kwenche bibi wllonan gon kwinle lall' na' Xancho Crístona' do ka nakle na' gonle ka cheenile'.

³⁶ Shi to bi' wew' ba nakan ikaab' to nool wew' bi' ba nzag'b', na' chakib' wenan ikaab' leb' daa ba golb', wshagna'chb', aga bi mal chom'. ³⁷ Per shi zoa bi' wew' chakib' bi chonan byen ikaab' noolə na' wzoib' beli chen chebaa kwenche bi wxinj wlem', wenan gom' bi wshagna'b'. ³⁸ Na' bi'na' wshagna' wenkzan chom', per bi'na' bi wshagna'b' chontechb' wen.

³⁹ Na' noola' nshagna', chonan byen soalene' toz beñ' che'na',shlak mbane'; per shi guet beñ' che'na', wak yikee beñ' yoblə, kon shi nake' beñ' nonlilall' Xancho Crístona'. ⁴⁰ Per nad' chakid' wzoache' mbalazch shi bich yikaa che'. Na' dga ba wnia', chakid' Espíritu che Chioza' yoo loo yichjall'dawa'nin na ka'.

8

¹ Na' ka nak che yel' wawa' daa chllia beñ' lao lwaa lsak' chios che'ka', yog'cho nezicho cheyi dga. Per nxoll gakcho beñ' cha'sib daa chakicho le nezicho. San shi napcho yel' chakina', wzecho wñeyi gaklen ljwellcho gakchachcho. ² Na' beena' chaki le nezile', chiyal' gakbe'ile' bi nezile' ka chiyal'. ³ Per beena' le chakile' Chioza', Chioza' nombi'ene'.

⁴ Na' ka nak yel' wawa' daa chllia beñ' lao lwaa lsak' chios che'ka', nezicho lwaa lsak' chios che'ka' bibi zak'gakan, san toz Chiozan' zoa. ⁵ Dii li de dii zan daa na beñ' nakgakan chios chegake'. Per la'kzi nagake' zoa chios chegake' na' xangake' yabana' wa lo yell-lioni, ⁶ cho' nezicho toz Chiozan' zoa, beena' nak Xacho. Len' bxe bsil yog'lolte dii de, na' zoacho kwenche we'la'ochone'. Na' lekzka' zoa toz beena' nak Xancho, na' len' Jesucrístona', beena' bxe bsile' yog'lolte dii de, na' ni chen' mbancho.

⁷ Per aga yog' beñ' nezgakile' dga. Bal beñ' wyoologake' be'la'ogake' lwaa lsak' chios che'ka', na' kat' cheej chaogake' yel' wawa' daa ba bllia beñ' lawinka' chakgakile' txenan chonlengake'n. Na' daa biñ' gakbe'gakile' bibi zakii diika', chakgakile' malan' chongake'

kat' cheej chaogake' yel' wawa'. ⁸ Per aga ni che daa cheej chaochon ile'shi'chi Chioza' cho' wa gonile' cho' nakzi; la' aga bi chon daa gaocho wa daa bi gaocho. ⁹ Per cho', la'kzi chakbe'icho aga bi zakii lwaa lsak' chios che'ka' na' nezicho aga bi nonan shi yeej gaocho diika' bliiagake' lawinka', chiyal' wsak'cho kwenche ki wchixcho beena' bin' gakcha lo xnez Chioza' gone' daa chakile' nakan mal. ¹⁰ La' shi nezile aga bi zakii lwaa lsak' chios che'ka' na' cheej chaole gana' choe'la'ogake' legakan, na' ile'i to bish' ljjwell-le le', ben' bin' gakcha lo xnez Chioza', na' nxoll wchogllallee yeej gawe'n, la'kzi chakile' nakan mal. ¹¹ Na' daa chonle daa nezile bi nakan mal, nxoll wlaale lo xnez Chioza' bish' ljjwell-lena' beena' bin' gakcha, beena' lekzka' wit Crístona' ni che'. ¹² Na' daa chonle ka gon bish' ljjwell-lena' to dii na yichjlall'do'ena' bi chiyal' gone', lao Crístona'kzan chxinj chlene. ¹³ Daan shi daa cheej chaw' gonan ka wxinj wlen bish' ljjwellaa, naklan wen bichga gaw' belaa, kwenche bi gon' ka wxinj wlene'.

9

¹ De lsens gon' daa chakid' nakan wen. Nad' nak' postl che Xancho Jesucristona'. Nad' ble'idee, na' le' ba nonlilall'lene' daa bzajniid' le' xtilleena'. ² Na' la'kzi zoa ben' bi chajle'gake' nak' postl che Jesucristona', le' nezile nak' postl che'. Na' daa ba nonlilall'lene' chli'n kan' nakan.

³ Na' ki chilli'a xtil' ben'ka' na bi nak' dowalj postl: ⁴ Nezile wak inabnto' gon ben' dii yeej gaonto' shel'ka'. ⁵ Na' lekzka' wak ikaanto' to noolə nonlilallee Crístona' na' wche'nto'ne' gana' gonnto' xshin Chioza', ka chon postlka' sto, na' ben'ka' nak ben' bish' Xancho Crístona', na' lekzka' Céfaza'.* ⁶ ¿Achakile zeelo Bernabéna' len nad' chiyal' gonnto' llinna' kon ni'a na'nto'ki kwenche yeej gaonto'? ⁷ Aga ga zoa soldad chyixj gaxt che kwine'. Na' biga zoa ben' gaze' yag uvana' na' bi yeeje' daa chbian. Ni biga zoa ben' gape' no shib wa no xil' na' bi yeeje' xill'bka' kat' chsie'n. ⁸ Bi gakile nad'zan nia' ka', la' lekzka' na leya' bzej dii Moiséza'. ⁹ La' leya' nan: “Bi wllino' yixja' cho'a goonka' kat' chlej chshoshjgakkb trígona'.” Na' aga toz che goonkan' ze Chioza' wneyi. ¹⁰ San daa zie' wneyi chechon wne' ka'. La' leya' byojan kwenche gaklenan cho'. Ka beena' chwaan goonna', na' ka beena' chonshao' trígona', nongake' lez lengake' ikaagake' daa chizi' chilapgabe'. ¹¹ Na' shi neto' naknto' ka ben' goz daa ba bzajniinto' le' cho'a xtil' Chioza', ¿achakile zi'telan gonnto' inabinto' le' shi bi chyalljinto'? ¹² Shi ben'ka' sto chli' chsedi le' choe'le daa chyallj chchingakile', ¿alechla neto'?

Per chonnto' banez bibi chnabinto' le' kwenche bibi gombeg wzenagle dill' wen dill' kob che Crístona'. ¹³ Nezkzile ben'ka' chon llin loo lill xlatj Chioza' cheej chaogake' daa chjwa' ben'ka' lao Chioza'. Na' bxozka' chit bayix'ka' lao Chioza' de lsens gaogake' xpel' bayix'ka' chitgabe'. ¹⁴ Na' ka'kzə Xancho Crístona' bllie' bia' che ben'ka' chyixjee dill' wen dill' kob che'na', lekzan ibangakile'. ¹⁵ Per nad' ni tshii bin' inabid' le' gonle dii chyalljid', ni bi chzej' dga kwenche gonlen. Wenchlan guet' aga ka daa ina ben' cha' chon' xshin Crístona' daa naxjid'. La' chibaid' inia' bibi chchixj' chon' xshine'na'.

¹⁶ Na' nad' bi gak wshalj wshon' daa chyixji'a dill' wen dill' kob che Crístona', la' chonan byen gon' daa none' lall' na'. ¡Na' nyesh'laz gak cha' shi bi wi'a dill' wen dill' kob che'na'! ¹⁷ Na' shel'ka' chyixji'an daa goljan loo yichjlall'dawaani, na' chidol' sia' laxj', shel'ka'. Per aga chyixji'an daa goljan loo yichjlall'dawaanin, san zeelo chon' daa ben Crístona' lall' na' gon'. ¹⁸ Na' dgan baneza' chizi'a: daa le chibaid' chyixji'a dill' wen dill' kob che Crístona' na' bibi inabid' ben' wzenague'n, la' bi cheenid' ibanid' dill' wen dill' kob che'na', la'kzi wak gon ka', shel'ka'.

¹⁹ La'kzi kono ben' chnabi'e nad', chon kwinn' ka ben' ndoo lla yel lao yog'lol ben' daa choe'lengakee xtil' Crístona', kwenche shanch ben'ka' gonlilall'gake'ne'. ²⁰ Kat' zoa' ladj ben' Israelka', ben'ka' nak ben' wlall cha', na' chsa' cha' ka nsa' chegake' kwenche

* 9:5

gonlilall'gake' Crístona'. Na' chon' daa na leya' bzej dii Moiséza' daa nogake' la'kzi nezid' bich chñabi'an nad'. ²¹ Na' kat' zoa' ladj ben'ka' bi nombia' ley daa bzej dii Moiséza', na' chsa' cha' ka nsa' chégake' kwenche gonlilall'gake' Crístona'. Per bi inacho chzoa' ka'lə daa nllia Chioza' bia', la' chzenag' che leya' daa bzoa Crístona' loo yichjlall'dawaani. ²² Na' kat' zoa' ladj ben'ka' chaki dii zan dii bi de lsens gongake', na' chsa' cha' ka nsa' chégake' kwenche wzajni'chgakidee che Crístona'. Ba bsa' cha' ka nsa' che yog'lolgake' kwenche gon' gan yisla' balgake' na' bi kwiayi'gake'. ²³ Chon' yog' diiki kwenche wzenag ben' dill' wen dill' kob che Crístona' na' yizi'lengakee banez cheyin.

²⁴ Nezkzile ka nak che ben'ka' chxonj, zangake' chxonjgake', per tochokzen' gone' gan na' ikee daa chidolee. Na' ka chon' beena' chxonj kwenche gone' gan, kan' chiya' gonle, li gon ka dii le gonle ka cheeni Chioza' kwenche gone' daa si'le banez. ²⁵ Ben' wyitjka' chsed, chbej yichjgake' daa chzoazi'yaa kwerp che'ka'. Na' chongake' ka' kwenche idol' illongakile' daa yibagakile' xtit shloll na' te cheyin. San cho' choncho to dii byen kwenche idol' illonicho to dii biga llia te cheyin. ²⁶ Daan, nad' bi chon' ka beena' kon chxonj ni bi nezile' gan illine', ni bi chon' ka beena' chdil' na' bi chzakile' kwalle' beena' chdil'-lene'. ²⁷ San chñabi'a kwini' kwenche chon' daa chiya' gon' kwenche ki, ka yiyoll wli' wsedid' ben' nakan chiya' gone', nad'lə bi sho'lall'zi Chioza' ka nsa' cha'.

10

¹ Le' ben' bish' na' le' ben' zan', bi cheenid' gal-lall'le daa gok che dii xozxto'choka', yog'gake' wloogake' nez xan beja' daa bze Chioza' na' yog'gake' bidegake' lo neza' bsalje' loo niso'da'. ² Na' yog'gake' nakgake' ka ben' wchoa nis daa gokgake' dii Moiséza' txen biyajlengake'ne' xan beja' na' daa bidelengake'ne' lo neza' daa byalj loo niso'da'. ³ Na' yog'lole' wdaogake' toz yel' wao daa be' Chioza' legake'. ⁴ Na' yog'lolgake' weejgake' toz nis daa bi'e legake', nisa' daa gol lee yaja', yaja' daa zaklebi Crístona', beena' wzoalene' legake'. ⁵ La'kzi yog'lolgake' wxi'gake' banez diika', zangake' bi biyoolallii Chioza' ka bengake', na' witgake' gana' bibi chashj chleb.

⁶ Na' yog' diika' gok chégake' chzajniin cho' bi chiya' selall'cho goncho dii mala' ka bengake'. ⁷ Bi chiya' we'la'ole diika' non ben' lwaa lsak' chios che'ka' ka ben balgake', la' Cho'a Xtill' Chioza' nan: "Wche'gake' weej wdaogake' na' biyolla' bengake' kon daa nazan che beli chen che'ka'." ⁸ Na' bi chiya' gat'lencho nottez ben', ka ben balgake', na' daa bengake' ka', shllaz wit shonichoa milgake'. ⁹ Na' bi chiya' wzoacho Chioza' gone' daa nazan checho, ka ben balgake', na' daa bengake' ka' wdinyaa belka' legake' na' witgake'. ¹⁰ Ni bibi gon inazle che Chioza' ka ben balgake' na' ni cheyin bselee anj che'na' beena' bete' legake'.

¹¹ Na' yog' diiki gok chégake' nakan to dii chzajni cho' bi goncho ka bengake', na' lliagakan lee Cho'a Xtill' Chioza' kwenche chsi'nin cho' mbancho llaki zeelo. ¹² Daan, nottezcho shi chakicho zoachecho nonlilall'cho Crístona', chiya' wsak'cho kwenche bi ibixcho goncho dii mala'. ¹³ Yog' dii malka' chdil' chllagle nakgakan ka diika' chdil' chllag nottez ben'. Na' wak wxenilall'le Chioza' gaklene' le', la' len' bi wi'e latj idil' illagle daa bi so sakile, san kat' idil' illaglen, lekzen' gaklene' le' kwenche so sakile yichejle lawinna'.

¹⁴ Daan, le' ben' bish'dawaa na' le' ben' zandawaa, bi we'la'ole diika' non ben' lwaa lsak' chios che'ka'. ¹⁵ Chshaljlen' le' ba nteile, na' kwinkzle gakbe'ile shi dga chzajniid' le' nakan shli. ¹⁶ Kat' chisa'lall'cho daa wit Crístona' ni checho, na' cheejcho lat' wej vinona' na' choe'cho Chioza' yel' choxken, zejin nakcho Crístona' txen daa blalj xchene'na' ni checho. Na' kat' chxoxjcho yetxtila' na' chaochon, zejin nakchone' txen daa bzani kwerp che'na' wite' ni checho. ¹⁷ Na' la'kzi nakcho ben' zan, toz yetxtilan' chaocho, na' zejin nakcho ka toz kwerp.

¹⁸ Na' li wwia ka chon ben' Israelka'. Yog' ben'ka' chaogake' xpel' bayix'ka' chitgake' lao Chioza' nakgake' toz choe'la'ogake'ne'. ¹⁹ Na' bi gakile nia' lwaa lsak' daa non ben' chios

che'ka' nakgakan dii zakii, ni bi gakile' bel' che bayix'ka' chitgake' lawinka' zak'chgakan ka bittezə bel'. ²⁰ San ki zejin daa nia' ka': kat' ben'ka' bi nonlilall'gake' Chioza' chitgake' bayix'ka' chliagake'n lao lwaa lsak' chios che'ka', dii xiw'ka'lan choe'gake'n, na' aga Chiozan'. Na' bi cheenid' we'la'olenle legake' dii xiw'ka'. ²¹ Bi gak yeej gaocho daa cheej chaocho kat' chisa'lall'cho daa wit Xancho Crístona', na' lekzka' yeej gaotezcho daa cheej chao ben'ka' choe'la'o dii xiw'ka'. ²² Bi chiya' wshaacho Chioza', la' aga wzo wzakichone'.

²³ Dez dill, nagake': "Wak goncho bittez dii cheenicho." Dii likzan, per aga yog' daa gak goncho nakan wen. La'kzi de latj goncho bittezə, aga yog' daa goncho gaklenan bish' lijwellchoka' gakchachgake' lao Chioza'. ²⁴ Ni tocho bi chiya' goncho ka gak wen che tozcho, san chiya' gaklencho ben' yoblə kwenche gak wen che'.

²⁵ Bittezə bel' dii chit'gake' lao yaana' wakə si'len. Na' bi inable shi nakan dii bliagake' lao lwaa lsak' chios che'ka' kwenche bi gakchoplall'le cheyin. ²⁶ La' doxen yell-lioni na' yog'te daa de lawinna' nakan che Xancho Chioza'.

²⁷ Shi to ben' bi nonlilallee Crístona' chaxe' le' lljtaole lille'na', na' cheenile' shajle, li yeej li gao daa gone', na' bi inabilene' shi nakan dii blie' lao lwaa lsak' chios che'na' kwenche bi gakchoplall'le cheyin. ²⁸ San shi no ina le': "Beli nakan dii wllia lao lwaa lsak' chios cha'ka'", na' bi gaolen ni che beena' wna le' ka'. La' beena' wna ka' wakte gakile' malan chonle shi gaolen. ²⁹ Bi gakile nia' malan gonle gaolen, san nia' ka' ni che beena' gakile' malan chonle shi gaolen.

La'kzi nezid' aga bi nonan gaw' bittezə, bi cheenid' gon' ka sa'lall' ben' yoblə nan malan' chon'. ³⁰ Na' shi cho'a Chioza' yel' choxken cheyi daa gaw', ¿berache inaz ben' malan chon' daa chaw' to dii ba bi'a Chioza' yel' choxken cheyin? ³¹ Na' bittezə dii chonle, shi cheej chaole wa shi bichlə dii yoblə chonle, chiya' gonlen ka sho' Chioza' balaan. ³² Bi gonle ka ixop ben' yoblə gone' to dii mal, laa nake' ben' Israel, laa bi nake' ben' Israel, laa nake' ben' nakcho txen nonlilall'cho Chioza'. ³³ Li gon ka nad', la' chon' to dii byen toshiizi chon' ka yiyoolallii yog' ben'. Aga chon' kwenche to nad'zə gak wen cha', san chon' ka gak wen che ben' yoblə kwenche yilagake' bi kwiayi'gake'.

11

¹ Li wsa' to chele ka nsa' cha', la' nad' nsa' cha' ka bsa' che Crístona'.

² Le wen chonle daa toshiizi chjadinile nad' na' ni zejlenle diika' bli' bsedid' le'. ³ Per cheenid' shajniile dga: Chioza' chnabi'e Crístona', na' Crístona' chnabi'e yog'lol ben' byo, na' ben' byoka' chnabi'gake' nool che'ka'. ⁴ Na' nottezə ben' byo shi nkwash' yichje'na' shlak choe'lwille' Chioza' wa shlak chyixji'e daa che' Chioza'ne', bi chgwee Crístona' balaan. ⁵ San shi nottez nool bi wkwash' yichje'na' shlak choe'lwille' Chioza' wa shlak chyixji'e daa che' Chioza'ne', na' chnite' balaan che ben' che'na'. Na' shi ka' chone', na' nake' ka to noolə ben' nshib axt lo yej. ⁶ Na' shi to noolə bi wkwash' yichje'na', wenlan wshibteguen' axt lo yej. Na' shi chido'ile' wshiben', chiya' wkwashen. ⁷ Na' ben' byona' bi chiya' wkwash' yichje'na' daa nake' lwaa lsak' Chioza' na' chli'e balaan che'na'. Na' noola' chli'e balaan che ben' che'na'. ⁸ La' aga kwit lee noolan' wlej Chioza' ben' byona', san noolan' wleje'ne' kwit lee ben' byona'. ⁹ Na' ni bi bxie' ben' byona' kwenche gaklene' noola', san bxie' noola' kwenche gaklene' ben' byona'. ¹⁰ Ni cheyi daan, na' ni che anjlka' len ladjchoka', chiya' wkwash' yichje'ka' kwenche nakbia' chapgake' balaan ben' che'ka'. ¹¹ Per cho' nakcho Xancho Crístona' txen, nezicho noolka' chyalljgakile' cho' ben' byo, na' cho' ben' byo chyalljicho noolka'. ¹² La' ka nak daa bchej noola' kwit lee ben' byona', lekzka' ben' byona', noolan' chzane' le'; per Chiozan' bxe bsile' yog'lol.

¹³ Na' le'zə, li wwiakachi shi nakan wen we'llwill noolka' Chioza' gal' yichjzgabe'. ¹⁴ Kon ka yoolocho choncho, chakbe'icho nakan yel' zto' we'z ben' byona' latj igol yish' yichje'na'. ¹⁵ San nakan wen we' noola' latj igol yish' yichje'na' na' nakan to balaan che'. La' Chioza' none'n kwenche wkwasha'n yichje'na'. ¹⁶ Na' shi nole bi chazlall'le dga ba

wnia', chiyal' inezile ka neto' na' ka yog' kwen ben'ka' chdop chllag choe'la'ogake' Chioza', toz ka yoolonto' chonnto'.

¹⁷ Na' ka nak dga inia' le', bi gak inia' le' wen chonle. La' kat' chdop chllagle choe'la'ole Chioza' lwaayin dii nan gaklenan le', chzoazi'yaalan le'. ¹⁸ Zigaate cheenid' inia' le' daa ba benid' nagake' chele nan kat' chdop chllagle choe'la'ole Chioza' nonzə che chel-le. Na' chajli'a dii liljakz ka chonlen. ¹⁹ Na' chakljayile chiyal' gake chop shon kwenlə kwenche wli'lawin nolen chazlalli Chioza' ka chonle. ²⁰ Na' kat' chdop chllagle na' cheej chaolen ljwell-le txen kwenche chisa'lall'le daa wit Xancho Jesucristona', bi chonlen ka bllie' bia'. ²¹ La' kat' yeej gaole, bi chbez ljwell-le kwenche yeej gaole txen, san to tole lii cheej chaotele yel' wao cheleka'. Na' bal-le bibi de gaole na' zi bal-le axt chzollile. ²² ¿Abi zoa lill-le ga yeej gaole? ¿Berache chonzile nakzi ben'ka' nakcho txen choe'la'ocho Chioza' na' chsi'zle yel' zto' ben'ka' bibi de yeej gaogake'? ¿Bitgui iniale, lla? ¿Achakile inia' le' le wen chonle? Bi inia' le' ka', la' aga wenan chonle.

(Mt. 26:26-29; Mr. 14:22-25; Lc. 22:14-20)

²³ Dga ba bli' bsedid' le' nakan daa bli' bsemi Xancho Jesucristona' nad'. Lle'na' ben Júda'ne' lo na' ben' malka', Xancho Jesús'a' bexee yetxtila', ²⁴ na' biyoll bi'e Chioza' yel' choxken, na'ch bxoxje'n na' chi'e: "Dgan kwerp cha'ni daa chzanid' ni chele. Li gox' lat' wejan gaolen. Li gon dga kwenche lljadinile nad'." ²⁵ Na' lekzka' biyoll wdaogake' xshe'na', bexee kopa' daa yoll vinona', na' chi'e: "Dga yollə loo kopi zezin xchen'na' daa laljə daa gon ka gaki dii koba' bcheb Chioza' gone'. Li gon dga, na' to to ka yeejlen li lljadini nad'." ²⁶ Na' to to ka gaole yetxtila' na' yeejle vinona' axt llana' yiyed Xancho Crístona' zezin chyixje'ile ben' ka nak daa wite' ni checho.

²⁷ Nottezə ben' gawe' yetxtila' wa yeeje' vinona' daa chonan ka lljadinicho Xanchona', na' bi chape' balaan ka nak daa chone', toz ka nak xtoleena' ka che ben'ka' betgake' Xanchona' na' blalgake' xchene'na'. ²⁸ Daan, to tocho chiyal' yiya yiyilj kwincho kat' zi' gaocho yetxtila' na' kat' zi' yeejcho vinona'. ²⁹ La' Chioza' wsak'zi'e nottez ben' kontele yeej gawe'n na' bi gone'n ka kwee Xancho Crístona' balaan daa bzani kwerp che'na' ni checho. ³⁰ Daan, zanle bi shao'le wa zoazi'yaale, na' bal ben'ka' nakle txen ba witgake'. ³¹ Per shi yiya yiyilj kwincho, Xancho Chioza' bi wsak'zi'e cho'. ³² Na' shi chsak'zi'e cho', chone'n kwenche yigooshlilall'cho na' bi wliayi'lene' cho' ben'ka' bi nonlilall'gake'ne'.

³³ Na' le' ben' bish' na' le' ben' zan', kat' chdop chllagle kwenche yeej gaole, li kwez ljwell-le. ³⁴ Na' shi nole chbil chdonle, chiyal' yeej gaole loo yoo lill-le kwenche bi gonle ka gonan byen tele yel' zak'zi' daa bi chonle wen kat' chdop chllagle. Dech diika' cheenid' wzajniid' le', na' kwaa xnezin kat' yidwia' le'.

12

¹ Le' ben' bish' na' le' ben' zan', cheenid' inezile che diika' non Espíritu che Chioza' gak gon to tocho.

² Nezkzile kana' bin' gonlilall'le Xancho Jesús'a', bentezle txen ben'ka' choe'la'o lwaal sak' chioska' diika' ni bi chak ine. ³ Daan, cheenid' inezile ni to ben' bi ine': "Aga bi zakii Jesús'a'" shi zoalen Espíritu che Chioza' le'. Na' lekzka' ni to ben' bi gak ine': "Jesús'a' nake' Xancho" shi bi zoalen Espíritu Santo che Chioza' le'.

⁴ Wde wdeli daa chon Espíritu che Chioza' to tocho, per lekzen' chone' yog'tegakan. ⁵ Wde wdeli nak xshin Xancho Crístona' goncho, per toze' len' nak Xancho. ⁶ Na' wde wdeli nak daa none' lall' na'cho gon to tocho, per toz Chiozan' chaklene' cho' kwenche chak chonchon. ⁷ Chioza' chli'e zoalen Espíritu che'na' cho' daa none' to tocho diika' chak choncho kwenche chaklenan yog'cho. ⁸ Na' ba bene' kwenche Espíritu che'na' chaklene' balcho choe'lencho ben' dill' kon yel' sin' che'na', na' zi balcho, chone' ka chajniicho daa nak che Chios na' chak chzajniichon ben' yoblə. ⁹ Na' zi balcho, chon Espíritu che'na' ka chajle'chacho gone' daa inabichone'; na' zi balcho, chone' ka gak yiyoncho ben'. ¹⁰ Na' zi

balcho, chchine' kwenche choncho yel' wak; zi balcho, chone' ka chak chyixje'cho daa na Chioza' cho'; zi balcho, chone' ka chakbe'icho shi dillaa choe' ben' dii li nakan che Chioza' wa shi nakan che dii xiwaa. Zi balcho, chone' ka chak chnecho wde wdeli dill' dii bi nsedcho; na' zi balcho, chone' ka chak chizajniicho bin wna beena' chne dillaa. ¹¹ Na' toz Espiritu che Chioza' chgwee xnezin goncho yog' diika', na' le' chgone' daa gon to tocho.

¹² Na' ka kwerp chechona' nakan toz la'kzi zan diika' ndil nllagan, ka'kzə cho' nonlilall'cho Crístona' nakchone' toz la'kzi nakcho ben' zan. ¹³ Na' yog'lolcho cho', ka ben' Israel, ka ben' griego, ka ben' ndoo lla yel chone' xshin ben', na' ka ben' chon xshinkze', Espiritu che Chioza' ba bene' kwenche nakcho ka toz kwerp. Na' toz len' yo'e loo yichjall'do' to tocho.

¹⁴ Na' ka nak kwerp chechona', zan diika' ndil nllagan. ¹⁵ Na' shi ni'achona' inan: “Daa bi nak' neena', bi ndil nllag' kwerpa'.” La'kzi shi inan ka', ndil nllagkzan kwerpa'. ¹⁶ Na' shi nagchona' inan: “Daa bi nak' jalawe'na', bi ndil nllag' kwerpa'.” La'kzi shi inan ka', ndil nllagkzan kwerpa'. ¹⁷ Na' shel'ka' doxen kwerp chechona' nakan jalaocho, ¿nakra goncho kwenche yenicho? Na' shi doxen kwerp chechona' nakan nagcho, ¿nakra goncho kwenche ila'icho? ¹⁸ Na' Chioza' bzoe' to to diika' ndil nllag kwerp chechona' kon gana' chakile' nakan wen soa to ton. ¹⁹ La' shel' toz ka nak yog'te daa ndil nllagan, bi nakan to kwerp shel'ka'. ²⁰ Na' la'kzi zan diika' ndil nllaggakan kwerp chechona', tozgz kwerpan nakan.

²¹ Na' jalaochoka' bi gak ye'gakan na'choka': “Bi chyalljid' le'.” Ni bi gak ye' yichjchona' ni'achoka': “Bi chyalljid' le'.” ²² Na' diika' ndil nllag kwerp chechona' daa chakicho bi nakan wal, lelagakannan' lliallote. ²³ Na' diika' ndil nllag kwerp chechona' daa chakicho bitek bi zaka'n, lelagakannan' chapshiicho. Na' diika' bi cheenicho ile'i ben' chkwashi'chon xachona'. ²⁴ Na' diika' ndil nllag kwerp chechona' na' bi chonan ka yiyii yido'icho ile'i ben' legakan, bi chonan byen wkwash'chon. Na' ka' ben Chioza' kwerp chechona' kwenche nkwash'cho diika' chonan ka yiyii yido'icho ile'i ben' legakan. ²⁵ Na' yog' diika' ndil nllag kwerpa' chaklen ljwellin daa nakgakan toz. ²⁶ Daan shi gayi kwerp chechona' chey chla, doxen kwerpa' bi shao'. Na' shi gayi kwerp chechona' chonichon wen, doxenan chibayi.

²⁷ Na' le' nakle ka kwerp che Crístona' daa naklene' toz, na' to tole nakle ka tkwen wej kwerp che'na'. ²⁸ Na' ladjchona', cho' chdop chllagcho choe'la'ocho Crístona', Chioza' lliallote bzoe' neto' naknto' postl, na'ch bzoe' ben' chyixji'e daa chi'ene', na' de wyoni bzoe' ben' wli' wsedile' ben' cho'a xtilleena'. Na'ch bzoe' ben' wli'e yel' wak che'na', na' ben' yiyone' ben', na' ben' gaklen bish' ljwellchoka', na' ben' chgoo xnezin che xshine'na', na' ben' chne wde wdeli dill' dii bi nsede'. ²⁹ Nezicho aga yog'cho nakcho postl. Aga yog'cho chak chixje'cho daa na Chioza' cho'. Aga yog'cho chak wli' wsedicho cho'a xtilleena'. Na' aga yog'cho chak goncho yel' wak. ³⁰ Aga yog'cho chak yiyoncho ben'. Aga yog'cho chak inecho wde wdeli dill' dii bi nsedcho. Na' aga yog'cho chak yizajniicho bi zeji dill'ka'. ³¹ Na' le', li selall' gaklen Espiritu che Chioza' le' kwenche gak gonle diika' zak'chi.

Na' naa wsedid' le' to dii lliallaotech.

13

¹ Shi nad' chak' wde wdeli dill' dii chne ben' yell-lioni na' axt len xtill' anjlka' chak', per bi chakid' ben', aga bi zjanayin chak' diika', na' nak' ka to dii nak de ya dii chon dane wa ka platiy dii chon sshag. ² Na' la'kzi shi chak chixji'a daa na Chioza' nad', na' nezid' yog'lol daa nak che Chioza' axt daa kochnon' inezi, na' la'kzi shi le chajli'a che Chioza' axt chon' ka illa' xishna' yaaka', shi bi chakid' ben', aga bi zjanayin chak gon' diika'. ³ Na' la'kzi shi wi'a ben' yesh'do'ka' yog' dii de cha', wa izanid' kwerp cha'ni kwenche wzeygake'n, shi bi chakid' ben', aga bi gaklenan nad' lao Chioza'.

⁴ Shi chakicho ben', gapcho yel' chxenlall' chegake', gonicho legake' wen, bi gakxe'icho legake', bi wshalj wshoncho lawe'ka', bi gakcho ben' cha'sibə, ⁵ bi gonichogake' zban, bi chiljcho daa nak to banez chezcho, bi gakcho zgaal zyil, ni bi koolall'cho. ⁶ Ni bi yibaicho kat' no chon mal, san yibaicho kat' no chon wen. ⁷ Shi chakicho ben', bi goncho dii choo dii xen bittez dii chonile' cho', na' bi sa'lall'cho mal che', san toshiizi goncho lez gone' wen, na' so sakicho bitteza.

⁸ Yel' chakina' aga wiyoll widon. San ka nak daa chyixjee ben' daa che' Chioza'ne', na' daa ine ben' wde wdeli dill' dii bi nsede', wllin lla bich iyalljan, na' ni bich bi iyalljicho inezicho. ⁹ La' lat'chga daa nezicho naa, na' lat'chga daa na Chioza' cho' kwenche chyixje'ichon ben', ¹⁰ per kat' illin lla Chioza' gone' ka gombia'chone' kwaslol, na' te cheyi diika' chzajniin cho' lat' wej naa.

¹¹ Kana' nak' bi'do', bshalj' lega bi'do', ben' pensar ka bi'do', na' wyajniid' lega bi'do'. Per ka bgol' bich bsa' cha' ka che bi'do'. ¹² Ka'kzan chak checho kon daa nak che Chioza' naa. Nakcho ka to ben' chwia to lo wan dii bi nla'yen'. Per wllin lla kat' ile'yen'ichone' ka chle'i cho'alao ljwellcho. Bin' gombia'yen'cho Chioza' naa, per wllin lla kat' gombia'chone' kwaslol ka nombi'e cho'. ¹³ Na' naa diiki shonə nakgakan dii lliarote goncho: gonlilall'cho Chioza', gonchone' lez, na' gapcho yel' chakina'. Na' daa lliarote lawi diiki shon, lennan' yel' chakina'.

14

¹ Li gon byen gakile' bish' ljwell-leka' na' lezkka' li selall' gon Espiritu che Chioza' le' to dii gak gonle, na' daa llialach selall'le gone' ka gak chixje'le daa ina Chioza' le'. ² La' beena' chne dill' daa kono chajni, Chiozan' chshaljlene', aga ben' yell-lionin. La' Espiritu che Chiozan' chone' ka cho'e dill' daa kono chajni. ³ San beena' chyixjee daa che' Chioza' le', chone' ka gakchach ben' lao Chioza', na' chtipe' lall'gake' na' chiyonxenlallee legake'. ⁴ Beena' chne dill' daa kono chajni, to le'zen' chaklenan, san beena' chyixjee daa che' Chioza'ne' chaklene' yog' ben'ka' chdop chllag choe'la'ogake' Cristona' kwenche gakchagake' lo xneze'na'.

⁵ Nad' cheenid' shel'ka' yog'lol-le gak inele dill'ka' daa kono chajni, per wibachid' shel'ka' gak chixje'le daa ina Chioza' le'. La' dii zak'chi daa chyixjee ben' daa na Chioza' aga ka daa inie' dill' daa kono chajni, lete shi yizajniile' ben'ka' bin zeji dill'ka' chnie' kwenche gakchachgake' lao Chioza'. ⁶ Na' le' ben' bish' na' le' ben' zan', shi nad' yidwia' le' na' inia' dill' daa kono chajni, bi gaklenan le'. Lete waklenan le' shi wzajniid' le' to dii ba bli' bsemi Chioza' nad', wa to dii chiyal' inezile che', wa chixje'id' le' bi ine' nad', wa wli' wsedid' le' cho'a xtilleena'.

⁷ Kachaka' blleja' wa no dii lli kwerd cheyin, kono shajni bin chkwelgake' shi bi chllaa shiinka'. ⁸ Na' kat' chak to wdil, shi beena' chkwel clarinna' bi wkwelle'n kwaslol, aga no idop illag kwenche shajgake' lo wdila'. ⁹ Na' ka'kzan chak chele, shi inele dill' daa bi chajni ben', nakra gone' shajniile' bin nale. Na' bibi zakii dill'ka' chnele shi naa. ¹⁰ Nezicho zan kwen xtil' ben' de yell-lioni na' to togakan chajni ben'ka' chnegake'n. ¹¹ Na' shi bi chajniid' dillaa we'len to ben' nad', nak' ka ben' zit' par le', na' lezkka' le' nake' ka ben' zit' par nad'. ¹² Na' daa ba chzelall'le gon Espiritu che Chioza' daa gak gonle, li gon ka dii le inable daa gaklenan bish' ljwell-leka' chdop chllag choe'la'ogake' Cristona' kwenche gakchachgake' lawe'na'.

¹³ Daan, beena' chne dill' daa kono chajni, chiyal' inabile' Chioza' gaklene'ne' kwenche gak yizajniile' ben' bin zeji dillaa chnie'. ¹⁴ La' shi chshaljlen' Chioza' dill' daa bi chajniid', yichjlall'dawaani nezin chshaljlen' Chioza', per bi chajniid' bin chepee. ¹⁵ ¿Beran chiyal' gon', lla? Chiyal' we'lwill' Chioza' kon dill' daa na Espiritu che'na', na' lezkka' we'lwill' kon dill' daa chajniid'. Na' lezkka' chiyal' gol' kon dill' daa na Espiritu che'na', na' gol' kon dill' daa chajniid'. ¹⁶ La' shi we'la'ole Chioza' kon dill' daa kono chajni, la'kzi nakan

che Espíritu che Chioza', beñ'ka' yengakile' dill'ka' chnele aga gongake' le' txen we'le yel' choxken Chioza' la' bi chajni'gakile' bin nale. ¹⁷ La'kzi choe'le Chioza' yel' choxken do yichj do lall'le, bi chaklenan beñ' yoblə daa bi chajni'gakile' bin nale. ¹⁸ Cho'a Chioza' yel' choxken daa chnech' dill' daa kono chajni' aga ka yog'tele. ¹⁹ Per kat' ndop nllagcho choe'la'ocho Chioza' txen, wenchlan inia' gay'zə dill' daa chajni'cho kwenche wzajniid' beñ' yoblə, aga ka daa inia' ga shi mil dill' daa kono chajni'.

²⁰ Na' le' beñ' bish' na' le' beñ' zan', bi gonzle pensar ka bi'do' bin' shajni', san li gon pensar ka beñ' golə, beñ' ba chajni'. Per ka nak che dii mala', li gak ka to bi'do' bin' sho' yichjin dii mala'. ²¹ Cho'a Xtill' Chioza' nan: "Wchin' beñ' zit', beñ' chne dill' yoblə, kwenche wzajniid' beñ' Israelki, per ni ka' bi wzenaggake' cha', na Xancho Chioza'." ²² Daan, kat' chnecho dill' daa kono chajni' chonan kwenche beñ'ka' bi chonlilall'gake' Chioza' gakbe'gakile' zoalene' cho' per bibi chzajniin cho' ba nonlilall'chone'. San daa chixje'cho daa na Chioza' cho', chaklenan cho' ba nonlilall'chone' per bi chaklenan beñ'ka' bi chonlilall'gake'ne'. ²³ Na' kat'ka' ndop nllagle choe'la'ole Crístona', shi yog'zle choe'le dill' daa kono chajni', na' sho' beñ' bi chajniile' bin chonle wa beñ' bin' gonlilall' Crístona', wak gakile' bi nza'n chelenan'. ²⁴ San shi yog'le chyixje'le daa na Chioza' le', na' sho' to beñ' bin' gonlilall' Crístona' wa to beñ' bi chajni' bin chonle, na' yiyakbe'ile' nake' beñ' saaxya na' yiyaj yilenile' dii malka' chone' ka yenile' dill'ka' chyixje'le. ²⁵ Na'ch gonan ka wli'lawi daa yoo loo yichjlall'do'ena', na' wchek' xibe' we'lawe Chioza', na' gakbe'ile' dii licha Chioza' zoalene' le'.

²⁶ Na' le' beñ' bish' na' le' beñ' zan', kat' chdop chllagle de latj kwenche bal-le gol-le dii koon Chioza' balaan, na' zi bal-le wli' wsedile, zi bal-le chixje'le daa na Chioza' le', na' zi' bal-le inele dill' daa kono chajni', na' zi bal-le yizajniile dillaa kono chajni'. Yog' diiki chiyal' wchinlen kwenche gaklenan soachechle lo xnez Chioza'. ²⁷ Na' kat' inele dill' daa kono chajni', chopzle wa shonzle inelen, na' yizoayile inele, na' chiyal' soa to beñ' yizajniile' bin wnale. ²⁸ Na' shi kono zoa beñ' chak yizajniile' bin inale, bi chiyal' inelen gana' ndop nllagle choe'la'ole Crístona', san wak inelenlen Chioza' de loo yichjlall'do'ləna'zə. ²⁹ Na' lekzka' chop shonzlen chixje'le daa na Chioza' le', na' yizoayile inele. Na' beñ'ka' chzenag, chiyal' wzenagyeñ'gake' shi dii li nakan daa na Chioza'. ³⁰ Shi shlak to beñ' chyixje'le dillaa daa che' Chioza'ne', na' inele Chioza' sto beñ' chi'e ladjlena', chiyal' kwez beena' chne kwenche chixjee beena' sto daa che' Chioza'ne'. ³¹ To tole yizoayile chixje'le daa na Chioza' kwenche yog'le shajni'chile diika' na Chioza' na' wtipch lall'le. ³² Na' beena' chyixjee daa che' Chioza'ne' chiyal' inabia' kwine' kwenche wi'e latj inele beñ' yoblə, shi naa. ³³ La' Chioza' cheenile' gonle xochi yog' daa chonle kat' choe'la'olene' na' bi gonle kon daa nazan chele.

Ka yoolo beñ'ka' choe'la'o Crístona' yog'te gana' chdop chllaggake', ³⁴ noolka' chiyal' soagake' llizə gana' chdop chllagle, la' bi de lsens inegake'. San chiyal' wchek' yichj wchek' laogake' lao beñ'ka' chnabia' legake', kon ka na ley daa bzej dii Moiséza'. ³⁵ Na' shi de daa cheengakile' inezgakile', chiyal' inabgakile' beñ' che'ka' loo yoo lillgake', la' bi nakan wen inegake' kat' ndop nllagle.

³⁶ Bi gakile zigaate ladjlenan' golj wxe cho'a xtill' Chioza', ni bi gakile le'chgan ba bleblen. ³⁷ Shi nole chakile nakle beñ' chyixjee daa na Chioza', wa chakile Espíritu che Chioza' chzajniile' le', chiyal' gakbe'ile dga chzej' le' nakan dii chon Xancho Crístona' mandad. ³⁸ Na' shi no bi chzenag cheyi dga chzej' le', lekzka' kono wzenag che'.

³⁹ Na' le' beñ' bish'dawaa na' le' beñ' zandawaa, li selall' gak chixjeele daa na Chioza' le', na' bi wllonle inele beñ' dill' daa kono chajni'. ⁴⁰ Per bittezə dii gonle, li gonan kon ka chiyali na' xochi li gonan.

15

¹ Na' le' beñ' bish' na' le' beñ' zan', cheenid' yisaa lall'le dill' wen dill' koba' wdixje'id' le'

daa ba bleble na' zoachechle chajle'le cheyin. ² La' lennan' yislan le' kwenche bi kwiayi'le shi toshiizi soachechle shajle'le daa ba wdixje'id' le'. Na' shi bi soachechle toshiizi aga bi zjanayin daa nale ba wyajle'le cheyin.

³ Bli' bsedid' le' dga bzajni Chioza' nad' daa nakan dii lialote: nan Crístona' wite' ni checho daa nakcho ben' saaxya, kon ka na Cho'a Xtill' Chioza'. ⁴ Na' bkwash'gake'ne' na' biyon lla bibane' ladj ben' wetka', kon ka na Cho'a Xtill' Chioza'. ⁵ Na' bli'lawe' Céfaza',* na'tech bli'lawe' postlka' sto. ⁶ Na'tech bli'lawe' wdeli gay' guioa ben' bish'choka' na' ben' zanchoka' nonlilall'gake'ne'. Na' zan ben'ka' ni mban lla naanlla, na' balgake' ba wit. ⁷ Na'tech bli'lawe' Jacóbona', na' wdena' bli'lawe' yog' postlka'.

⁸ Na' zeeloteyi bli'lawe' nad', la'kzi nak' ben' bibi zakii. ⁹ Nad' nak' liizelozi ben' bibi zakii ladj ben'ka' wlej Crístona' gongake' xshine'na', na' bi chidolaa ina ben' nad' "postl", daa bsak'zi'a ben'ka' chonlilall'gake'ne'. ¹⁰ Per daa nak Chioza' ben' chiyesh'lallii, wleje' nad' wi'a xtill' Crístona'. Na' daa biyeshlallile' nad' bi gokdadzan, la' ba bench' xshine'na' aga ka yog' postlka' sto. Per aga tobia'lozan' bena'n, san len' ba goklene' nad' kwenche bena'n. ¹¹ Na' la'kzi nad' wa postlka' sto choe'lennto' ben' xtilleena', toz ka dill' choe'nto', na' lennan' ba wyajle'le.

¹² Na' daa chyixje'nto' biban Crístona' ladj ben' wetka', ¿berache nazə bal-le bi yiban ben' wetka'? ¹³ La' shel' bi yiban ben' wetka', lekzka' aga biban Crístona' shel'ka'. ¹⁴ Na' shel' Crístona' bi bibane' ladj ben' wetka', aga bi zakii daa chyixje'nto' cho'a xtilleena', ni aga bi zakii daa nonlilall'lene', shel'ka'. ¹⁵ Na' shel' bi yiban ben' wetka', aga dill' li che Chiozan' be'lennto' le' daa wnanto' Chioza' bisbane' Crístona' ladj ben' wetka', shel'ka'. ¹⁶ La' shel' bi yiban ben' wetka', aga biban Crístona', shel'ka'. ¹⁷ Na' shel' Crístona' bi bibane' ladj ben' wetka', aga bi zjanayin nonlilall'lene', na' ni napkzle dol' che saaxya cheleka', shel'ka'. ¹⁸ Na' shel' nakan ka', ben'ka' benlilall'gake' Crístona' na' ba witgake', wlliai'chokzgaken', shel'ka'. ¹⁹ Na' shel' to lo yell-lionizan noncho lez gaklen Crístona' cho', nyesh'lazch nakan checho aga ka che yog' ben' yoblə, shel'ka'.

²⁰ Per dii li Crístona' bibane' ladj ben' wetka', na' daa bibane' neche' ladj ben' wetka' zaklebile' dii necha' chizi' chilap ben'. ²¹ Daa bxinj blen toz ben', wyoo yel' wita' yell-lioni, na' lekzka' toz ben' bxie' daa yiban ben' wetka'. ²² Ka chet yog' ben' ni che daa bxinj blen dii Adánna', ka'kzan yiban beena' nak Crístona' txen. ²³ Per to to ben' yibane' ladj ben' wetka' kat' illin llana' nllia Chioza' bia' yibangake'. Zigaate Crístona' bibane' ladj ben' wetka', na' kat' yiyed Crístona', lekzka' yiban yog' ben'ka' nak lall' nee. ²⁴ Na' te che yell-lioni kat'ka' wlliai' Crístona' yog'lol' yel' wak na' yel' wnabia' yoblə, na' yiyo'e yel' wnabia' che'na' Xacho Chioza'. ²⁵ La' Crístonan' chiyal' inabi'e axt ki yiyoll yido wzoe' xni'ena' yog' ben'ka' chakzi' chakzbani le' na' yog' dii xiw'ka'. ²⁶ Na' yiyollin, wlliaeyee yel' wita'. ²⁷ Cho'a xtill' Chioza' nan Chioza' bzoe' xni'a Crístona' yog'lol'te dii de. Na' daa nan yog'lol'te zoa xni'a Crístona', aga len Chiozan' zoe' xni'ena', la' len' bzoe' xni'a Crístona' yog'lol'te dii de. ²⁸ Na' kat'ka' yog'lol'te dii de ba zoan xni'a Crístona', na'ch kwín Crístona', beena' nak Xiin Chioza', wzexj yichje' lao Chioza', beena' bzoa yog'te dii de xni'ena'. Na'ch gakbia' nan Chioza' nake' liizelozi ben' zakii lao yog'lol'te dii de.

²⁹ Na' chiznia' sto, ¿bera zejín daa chchoa bal' ben' nisa' lwaas ben' wetka'? Shi chakgakile' bi yiban ben' wetka', ¿berache chchoazgake' nisa' lwaagake'?

³⁰ Na' shel'ka' bi yiban ben' wetka' ¿berache zoaznto' dii nxoll gak dii gak chento' do lla do yel'? ³¹ Dii li, le' ben' bish' na' le' ben' zan', yog' lla zoa' dii nxoll guet'. Na' lekzka' dii licha le' chiba chizakid' chele daa ba nonlilall'le Xancho Jesucrístonan'. ³² Yell Éfesona' wdil-len' ben'ka' nak ka ba znia' nllib, ¿beratgui gon' gan wdil-lengakee shel'ka' bi yiban ben' wetka'? Gonchokljacho ka dillaa de daa na: "Yeej gaotezcho la' wetcho wxē willj."

* 15:5 Céfás: kan' le Pédróna' de dill' arameo, daa gok xtill' Jesúsza'.

³³ Bi we'le latj no siye' le'. La' dill' de, nan: “Shi goncho txen beṅ' malka' na' solo goncho ka chongake'.” ³⁴ Li yiyeeni kwaslōl na' bich gonle dii mala', la' bal-le ni bi nombia'le Chioza'. Nia' le' ka' kwenche yido'latile.

³⁵ Wnalja bal-le: “¿Nakra gak yiban beṅ' wetka'? Na' ¿Nakra yiyak kwerp che'ka'?” ³⁶ Shi ka' nale, nakle ka beṅ' bi nteyi. Kat' chazcho binna', bi chila' yagdo'na' shi bi chbiayi' binna'. ³⁷ Kat' chazcho, aga yagdo'nan' chazcho, san bin cheyinnan' chazcho, na' chila' yagdo'na'. Na' kan' chak che bittezə dii chazcho, shi no trigo wa bichlə. ³⁸ Na' Chioza' chgwee xnez xlatjin chakan ka cheenile', na' to to bin chak xyaguinna' kon ka chiya'! gak che to ton. ³⁹ Aga toz ka nak kwerpka'. Nlla'lə nak kwerp che benecha' len che bayix'ka'. Na' nlla'lə nak che baka' chzo xan yabana' na' che belka' lle' loo nisa'. ⁴⁰ Lekzka' nak cheyi diika' lle' xan yabana' na' diika' chle'icho lo yell-lioni. Nlla'lə yel' xochi cheyi diika' chle'icho xan yabana' len yel' xochi cheyi diiki chle'icho lo yell-lioni. ⁴¹ Nlla'lə yel' chey cheeni' che wbillā' len che beo'do'na' na' len che beljka'. Na' ladj beljdo'ka' nlla'lə nak yel' chey cheeni' che to togakan. ⁴² Na' ka'kzan gak che beṅ'ka' yiban ladj beṅ' wetka'. Kwerpa' daa chgash' loo bana' nakan dii gooll' iteb, san kwerp daa yiyas kat' yibancho ladj beṅ' wetka' bi nakan dii gooll' iteb. ⁴³ Kwerpa' daa chgash' loo bana' nakan dii bichbi zakii, san daa yiyas ladj beṅ' wetka' gakan to dii zakii nleb. Kwerpa' daa chgash' loo bana' nak blan'zan, san daa yiyas ladj beṅ' wetka' gakchechan. ⁴⁴ Kwerpa' daa chgash' loo bana' nakan de beli chenzə dii chon llin yell-lioni, san kwerp daa yiyas ladj beṅ' wetka' gakan to dii kob daa gon Chioza'. Na' daa nezicho kwerp chechoni nakan de beli chenzə, lekzka' chiya'! inezicho wat' to kwerp kob checho daa gon Chioza'.

⁴⁵ Cho'a Xtill' Chioza' nan: “Adánna', beena' gok beṅ' nech, goke' to beṅ' yaa beṅ' ban.” Na' lekzka' Crístona' goke' beṅ' yell-lío, per le' chone' yel' mban zejli kaṅi. ⁴⁶ Zigaate chbanlencho kwerp de beli chenni, na'techlan ibanlencho dii koba' daa gon Chioza'. ⁴⁷ Beṅ' necha' ben Chioza' de bishte yo, goke' beṅ' yell-lío. Na' beṅ' wchopina', beena' nak Xancho, len' wzee yabana'. ⁴⁸ Kwerp chechona' nakan ka kwerp che beṅ' necha' bxe bsil Chioza' de bishte yona'. Na' ka nak kwerp che Crístona', beena' zoa yabana' naa, ka'kzan yiyak kwerp chechona' kwenche lljazocho yabana'. ⁴⁹ Naa nakcho ka beena' ben Chioza' de bishte yo, na' wllin lla yiyakcho ka Crístona', beena' zoa yabana'.

⁵⁰ Na' le' beṅ' bish' na' le' beṅ' zan', cheenid' inia' le': Aga wak yillinlencho kwerp de beli chenni gana' zoa Chioza' chṅabi'e. Na' kwerpi dga gooll' iteb bi gak gonan txen kwerp daa bi gooll' iteb. ⁵¹ Ni inia' le' to dii kono wnezi: aga yog'cho guetcho, per yog'cho yiyakcho nlla'lə. ⁵² Tokonganzi, to ka chshod' chxa'z jalaochoki, kat' kwell trompet che Chioza', yiyakcho nlla'lə. La' ka kwell trompeta', beṅ' wetka' yibangake' kon to kwerp dii bi gooll' iteb. Na' cho' ni mbancho, lekzka' yilla' kwerp chechoki. ⁵³ La' kwerp chechoni dga gooll' iteb, yiyakan to dii bi gooll' iteb. Na' beli chen chechoni dga ile'i yel' wita', yiyakan to dii bichga guet. ⁵⁴ Kat'ka' kwerp chechoni dga gooll' iteb ba biyakan to dii bi gooll' iteb, na' beli chen chechoni dga ile'i yel' wita' ba biyakan to dii bichga guet, na' gak ka na Cho'a Xtill' Chioza' daa na: “Xanchona' ba bene' gan bsol bnite' yel' wita' toshiizi.” ⁵⁵ Na' lekzka' nan: “Yel' wit, li' chsi chchogo' yel' mban che beṅ', ¿gan yel' wak cho'na' naa?” ⁵⁶ Daa bi choncho diika' bllia Chioza' bia' goncho chli'n nakcho beṅ' saaxya, na' daa nakcho beṅ' saaxya, yel' wita' napan yel' wak kwenche wsol wñitan cho'. ⁵⁷ Per choxken Chioza' bselee Xancho Jesucristona' ni checho kwenche bi saki yel' wita' si' ikaan cho' zejli kaṅi.

⁵⁸ Daan, le' beṅ' bish'dawaa na' le' beṅ' zandawaa, li soachech lo xnez Chioza' toshiizi. Na' zizikli li gon xshin Xancho Jesucristona', la' nezczile xshine'na' aga nakan to llin dii chondadzle.

16

¹ Na' ka nak mech daa wtople daa we'le beṅ'ka' nak lall' na' Chioza', li gon ka beṅ' mandad gon beṅ'ka' chdop chllag choe'la'ogake' Crístona' to to yell daa llia gana' mbani

Galáciana'. ² Yog' lla nech che xmanka', to tole chiyal' kwejle lat' wej daa benle gan lo xmanna' na' kooshao'len kwenche bibi wtope kat' yid'. ³ Na' kat' yid' gana' zoale, wselaa ben'ka' kwejle ljwa'gake' Jerusalénna' mecha' daa btope, na' wgox'gakee yish daa wzej' kwenche ben' Jerusalénka' wlebgake' legake'. ⁴ Na' shi chonan byen shaa, na' sha'len' legake'.

⁵ Chonan byen tia' gana' mbani Macedóniana', na' ka tia', yidwia' le'. ⁶ Na' waklja yigaanlen' le' shloll wa soalen' le' axt ka yiyollch te dii zaga'. Na' kat' yigwaa nez yiyaa gan yoblə wak gakenle nad' gonle daa iyallj ichinid'. ⁷ Aga shlollzan cheenid' yidwia' le', san non lez yigaanlen' le' ssha, shi Xancho Chioza' wi'e latj. ⁸ Na' naa cheenid' yigaana' yell Éfesoni axt ka gal' lni Pentecostéza', ⁹ la' ben' zan lle' ni, ben' cheeni wzenag xtill' Jesucrístona', la'kzi ben' zan chllaagake' daa choe'len' ben' xtilleena'.

¹⁰ Na' shi ba za' Timotewa' gana' zoale, li gonile wen, la' lezkza' lene' chone' xshin Xancho Jesucrístona' ka chon' nad'. ¹¹ Na' ni tole bi gonilene' nakzi, san li gaklene' yigwee neza' mbalaz kwenche yidwie' nad', la' chbeztia'ne' kon ben' bish'choka' sto.

¹² Na' ka nak ben' bish'cho Apólozi, le got'yoidee yidlene' ben' bish'choki yidwiagake' le', per bi goonile' yide' naa, per widkze' kat' gat' latj che'na'.

¹³ Li se kwas na' li soachech gonlilall'chle Crístona'. Li gakcha lo xneze'na' na' bi illeble. ¹⁴ Na' bittezə dii gonle, li gonan lega ben' chaki ljwellin.

¹⁵ Na' le' ben' bish' na' le' ben' zan', nezile ben'ka' lle' lill Estéfanazi gokgake' ben' nech ben' benlilall'gake' Crístona' gana' mbani Acáyana', na' zoatekzgake' chli' chsedgakile' ben'ka' nak lall' na' Chioza'. ¹⁶ Chat'yoid' le', li wzenaggach che ben'ka' chon ka legake', na' li wzenag che yog' ben'ka' chaklen chongake' xshin Chioza'. ¹⁷ Le chibaid' daa ba bid Estéfanazi len Fortunátoni na' Acaíconi gani zoa', la' daa zoalengake' nad' ni, bich chakyeshid' daa bin' gak yidwia' le'. ¹⁸ Ba biyongake' nad' to yel' chxenlall' ka daa chongake' le'. Ka ben'ki na' ka ben'ka' chon ka legake', chidol'gake' gaple legake' balaan.

¹⁹ Ben'ki chdop chllag choe'la'ogake' Crístona' to to yell gani mbani Ásiani chwapgake' le' chiox. Na' Aquílani len Priscílani, len ben'ka' chdop chllag lille'ka' chwapgake' le' chiox do yichj do lall'gake' daa nakle Xancho Crístona' txen. ²⁰ Na' yog' ben' bish'choka' lle' ni chwapgake' le' chiox. Na' li wwap ljwell-le chiox lega ben' chaki ljwellin daa nakle lall' na' Chioza'.

²¹ Nad', Pablo, kwinq' chzej'* gani chwap' le' chiox.

²² Nottezə ben' bi chakile' Xancho Jesucrístona', wsak'zi'shga Chioza'ne'. ¡Bidagach Xan'!

²³ Xancho Jesucrístona' soalenshgue' le' na' gaklenshgue' le'. ²⁴ Le chakid' yog'le daa nakcho Jesucrístona' txen.

* **16:21** Kwinq' chzej': Páblona' bchine' ben' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

Kart wchopi daa bzej Páblona' na' bseleen lao beñ'ka' nonlilall' Jesucrístona' yell Coríntona'

¹ Nad' Pablo nak' postl che Jesucrístona' kon ka chaklall' Chioza', na' len beñ' bish'cho Timotewi chwapnto' le' chiox, le' chdop chllagle choe'la'ole Chioza' yell Coríntona'. Na' lekzka' chwapnto' chiox yog'lol bish' ljjwellchoka' lle' gana' mbani Acáyana', beñ'ka' nak lall' na' Chioza'. ² Na' chñabinto' Xacho Chioza' len Xancho Jesucrístona' gaklenshgagake' le' na' wzoagake' le' mbalaz.

³ Chiyal' we'la'ocho Chioza', Xa Xancho Jesucrístona', la' len' Xachona', beena' chiyesh'lallile' cho' na' chiyonxenlallee cho' lao bittezə dii chak checho. ⁴ Chiyonxenlallee cho' lao yog'lol diika' chzak'zi'cho kwenche ka chone' checho, ka'kzan goncho yiyonxenlall'cho beñ' yoblə kat' chzak'zi'gake'. ⁵ Daa lennto' chzak'zi'nto' ka wxak'zi' Crístona', Chioza' chtipche' lall'nto' daa nonnto' Crístona' txen. ⁶ Na' shi neto' chzak'zi'nto', chak chento' ka' kwenche gondiplall'chle na' yilale bi kwiayi'le. Na' shi Chioza' chtipe' lall'nto', chone' ka' kwenche lekzka' le' gondiplall'le na' so sakile' ka yel' zak'zi'ki chen chle'into'. ⁷ Nonyen'nto' lez bi gakhoplall'le lao diika' chen chle'ile, la' nezinto' daa lenle chtil-le yel' zak'zi'ka', lekzka' lenle wtip Chioza' lall'le.

⁸ Le' beñ' bish' na' le' beñ' zan', cheeninto' inezile' ka'k'tek dii lalljka' btilnto' gana' mbani Ásiana'. Gokan to dii lallj wal dii bich nan so sakinto', na' bich bennto' lez yel' mbanna'. ⁹ Goktezkinto' ni bllin lla guetnto' naa. Gok chento' ka' kwenche gokbe'into' bi gak wxenilall' kwinnto', san chiyal' wxenilall'nto' Chioza', beena' chisban beñ' wetka'. ¹⁰ Na' Chioza' bisle' neto' na' wislachkze' neto' lao dii nxollka' nsa' yel' wit. Na' nxenilall'nto'ne' toshiizi wislachkze' neto' ¹¹ shi gakenle inabile'ne' gaklene' neto'. Na' shi beñ' zan inabe' chento', lekzka' beñ' zan we'gake' Chioza' yel' choxken kat' ba goklene' neto'.

¹² De to dii chakyiblennto': daa nezyen'into' do yichj do lallnto' nsa' chento' wen ladj beñ' yell-lioni, ka chazlall' Chioza', na' chonnto' to dii byen chonchnto' wen ladjlena'. Na' aga yel' sin' che beñ' yell-lionin chaklenen neto' chonnto' ka', san Chiozan' chaklene' neto'. ¹³⁻¹⁴ Diiki chzejnto' le' nakan dii shajniile ka wlablen. La'kzi naa bin' shajni'yen'ile biche nsa' chento' ka', chbez' illin lla shajniilen kwaslol, kwenche kat'ka' yila' Xancho Jesúsza', yibaile' daa nonle neto' txen, ka chibainto' nonto' le' txen.

¹⁵ Daa nxenlallaa wyajniile dga na' wleble nad', goklallaa tegaxj' yidwia' le', la' gokid' le yiba yizakile yidwia' le' chop shii. ¹⁶ Gokid' tia' wwia' le' ka shaa Macedóniana', na' yidia' wwia' le' sto shii ka zizaa. Na' zak goklenle nad' kwenche yigwaa nez yiyaa Judeana', shel' gokan. ¹⁷ Bi gakile aga do yichj do lallaan wnia' yidwia' le'. ¿Anti chakile chon' ka chon nottezə beñ' yell-lioki chongake' to “wak” to “bi gaka”? ¹⁸ Chioza' nez nle'ile' biga chonnto' to “wak” to “bi gaka” laolena'. ¹⁹ Nad' Pablo, len Timotewi na' Silvónoni be'nto' ladjlena' cho'a xtil' Cristo Jesúsza', beena' nak Xiin Chioza'. Na' Jesucrístona' ba bli'e toshiizi chon Chioza' kon ka ba wne' gone'. ²⁰ Na' ni che Crístona' chak yog'lol dii chcheb Chioza', na' nacho “kan' nakan” kwenche chgoocho Chioza' balaan. ²¹ Na' Chioza'kzan chone' kwenche soatip soashoshcho gonlilall'cho Crístona', ka chone' chento' na' ka chone' chele. Na' wleje' cho' kwenche nakcho lall' nee, ²² na' Espíritu Santo che'na' nake' ka to sey daa ba ngweene' loo yichjlall'do'chona' kwenche chakliyicho ba nakcho xiine', na' kwenche nezicho wllin lla gone' yog' dii wenna' daa ba bchebe' gone'.

²³ Chioza' nezile' bin' yid' Coríntona' yidwia' le' daa chap' yel' chxenlall' chele, na' bi cheenid' wsheshlen' le'. ²⁴ Aga cheeninto' gonnto' byen kon daa inaznton' gonle daa nakle Crístona' txen, la' ba zoachechkzle nonlilall'lene'. San cheenlinto' gakennto' le' kwenche gapchle yel' chiba chizakina'.

2

¹ Daan, b̄hɔglallaa bi bidwia' le' kwen̄che bi yidzoaz' le' nyesh' sto shii. ² ¿Nora gon ka yiba yizakid' shi ba bidyenyesh'zid' le'? ³ Na' bzejchokl̄e le' daa bi goklallid' yid' na' gonyeshile nad', la' cheenlid' gonle ka yiba yizakid'. Na' n̄xenlallaa lenle yiba yizaklenile nad'. ⁴ Bzej' le' daa wzechga' w̄neyi n̄leb na' gokyesh'chgaid' axt wchellchga'. Na' aga bzeja'n kwen̄che gonyeshid' le' san kwen̄che in̄ezile le chakid' len'.

⁵ Na' beena' benyeshile' nad', aga toz nadaan benile' ka', san lenkzlen benyeshile' lat'. Nia' "lat'", kwen̄che bi in̄ia' zi'tegala ben beena' checho. ⁶ Yel' zak'zi'na' daa ba benle che' ba gokkz̄e to ka't'. ⁷ Na' n̄aa chiyal' yizi'xenle che' na' gakenlene' kwen̄che ki gakshejlallee lo yel' chakyeshii che'na'. ⁸ Daan, chat'void' le', li wli' ni chakkzilene'. ⁹ Ba bzej' le' kana' che ka nak dga kwen̄che wli'shkilaole shi leile gonle yog'te diika' nia' le'. ¹⁰ Na' beena' yizi'xenle che', lekzka' nad' wizi'xen'z' che'. Na' shi de dii yiyakxen che', Crístona' n̄ezile' wizi'xen'z' che' beena' ni chele, ¹¹ kwen̄che bi we'cho cho'a xbayi Satanáza'. La' n̄ezkzicho ka nak yel' wxiye' cheyinna'.

¹² Ka billin' yell Troaza' kwen̄che wi'a dill' wen dill' kob che Crístona', got'chga latj cha' kwen̄che gon' llin che X̄anchona', shel'ka'. ¹³ Per daa bi billag' ben' bish'cho Títona', na'ch gokshejlall'chga'. Daan, bilaa ben'ka' dill' na' biyaa Macedóniana'.

¹⁴ Chōxken Chioza' chone' kwen̄che toshiizi chonnto' gan lao diika' chl̄is chta dii xiwaa daa naknto' Crístona' toz. Na' ngoonto' nez choe'nto' xtilleena' kwen̄che doxen zbii zkaan yell-lioni illiljan, ka chl̄ilij shii x̄la' to dii chl̄a' zix̄ sia, na' gombia' ben' le'. ¹⁵ Ka bibayi Chioza' shii x̄la' llen yala' daa chl̄a' zix̄ sia, ka'kzan chibaile' daa nzoa Crístona' neto' choe'nto' xtilleena' ladj ben'ka' yila na' ladj ben'ka' kwiayi'. ¹⁶ Ben'ka' kwiayi', bi chibagakile' dillii choe'nto' daa chl̄a'gakile'n zye'l' wit. Na' ben'ka' yila, chibagakile'n daa chl̄a'gakile'n zix̄ sia daa nsa'n yel' mban chegake'. ¿Notgui gak gone' dga? ¹⁷ Ben' zan llialallee yibeje' cho'a xtill' Chioza' mech. San neto' aga kan' chonnto'. Nez n̄le'i Chioza' do yichj do lall'nto' choe'nto' xtilleena' lega ben' bselee, daa naknto' Crístona' toz.

3

¹ Ka choe'lennto' le' dill'ki, ¿achakile ba wizzolonto' chshalj chshon che kwinnton'? ¿Awa chakile chiyal' gonnto' ka chon bal' ben', gonnto' yish, wa in̄abinto'n le', gana' cho'en dill' nan chonnto' wen? ² Le'kzan nakle ka yish daa cho'en dill' chonnto' wen, la' daa nonl̄ilall'le Crístona' chakbe'i yog' ben' choe'nto' dill' li. Na' toshiizi yoole loo yichjlall'do'nto'ki. ³ Na' daa ile'i ben' ba bikob Crístona' yichjlall'do'lena' daa be'lennto' le' cho'a xtilleena', nakle ka to yish dii bzej kwinn Crístona' nan chonnto' wen. Na' bi nakan to dii nyoj lee yish wa dii nyoj lee yaj taa, san daa ba bsel' Crístona' Espíritu che Chios yaa Chios banna' loo yichjlall'do'lena' zevin bzeje'n lee lall'do'lena'.

⁴ Daa chaklen Crístona' neto', chiyaxjid' nia' chonnto' xshine'na' ka chazlall' Chioza'. ⁵ Aga daa le napnto' yel' sin'nan' chonnto' diiki, san Chiozan' chaklene' neto' chonnto'n. ⁶ Chioza' ba bli' b̄sedile' neto' kwen̄che gak we'nto' dill' che dii koba' daa ba b̄chebe' gone' checho. Na' dga bi nakan ka ley che dii Moiséza' daa chl̄liayi'n ben', san dga nakan che Espíritu che Chioza', na' len' cho'e yel' mban che ben'.

⁷ Ka nak leya' be' Chioza' dii Moiséza', daa byoj lee yaj taana', n̄chogbia'n gat' yel' wit checho, gokan to dii zakii n̄leb na' bsa'n yel' chey cheeni' xen axt ni bi gok wwia ben' Israelka' cho'alao dii Moiséza' daa le chey cheeni'n la'kzi gokan dii yinit. Na' shi leya' daa n̄hogbi'a gat' yel' wit checho gokan to dii zakii n̄leb, ⁸ ¿alechl̄e nak yel' zakii che dii koba' daa b̄xe Espírituna'? ⁹ Shi leya' daa n̄hogbi'a guetcho gokan to dii zakii n̄leb, na' daa chon Chioza' checho chizi'xene' xtol'choka', naktechan dii zakii n̄lebch. ¹⁰ Ka nak yel' zakii che leya', bi bllinan ka nak yel' zak' xen in̄leb cheyi dga ba b̄xie' sto. ¹¹ Na' shi leya' daa ben llin shlollz gokan to dii zakii, dii zak'techi nak dga gon llin toshiizi.

¹² Daa ba de dga nonnto' lez na'chan choe'nto' dill' kon ka nakan. ¹³ Na' bi chonnto' ka ben dii Moiséza' kana' bkwash' cho'alawe'na' kon to lech' kwenche ben' Israelka' bi ile'gakile' ka chinit yel' chey cheeni'na' cho'alawe'na'. ¹⁴ Na' yel' chajni' che'ka' bi benkzan llin, la' axt naanlla kat' chlabgake' leya' bi chajni'kzgakile'n na' nakan ka to dii ngash'. San ben'ka' gonlilall'gake' Crístona', legaken' shajni'gakile'n, la' len' wsalje' yichjlalldoe'ka'. ¹⁵ Axt naa, kat' chlabgake' daa bzej dii Moiséza', de to dii chsej chllonan shajni'gakile'n. ¹⁶ Per kat' to ben' yiyaj yilenile' na' gonlilallee Xancho Crístona', na' yikwas daa chsej chllonan shajniile'n. ¹⁷ La' Xanchona', lekzen' Espírituna', na' beena' zoalen Espiritu che Xanchona'ne', bich bi ntakw nchejan le'. ¹⁸ Daan, yog'lolcho cho' bich bi de wsej wllonan gombia'chone', na' ba nakcho ka to wan gana' chli'lao balaan che Xanchona'. Na' Espiritu che'na' zejch chiyonshawe' cho' kwenche yiyakcho ka Xanchona'.

4

¹ Daa ba biyesh'lallii Chioza' neto', ba bzoe' neto' chonnto' xshine'na', na' bi chidinjinto'. ² Neto', ni to dii nak yel' zto' bi chonnto', ka diika' chon ben' do ngash'zə. Na' bi chziye'nto', ni bi chshok chlewnto' cho'a xtill' Chioza', san choe'nto' dill' li che'na' kon ka nakan. Na' yog' ben' wzenague'n, gakbe'i loo yichjlall'do'ena' ka nakan, na' lekzka' Chioza' nezile' ka chonnto'. ³ Per ben'ka' kwiayi', bi chajni'gakile' dill' wen che Crístona' choe'nto', daa ngashaan lawe'ka'. ⁴ La' dii xiwaa daa chnabia' yell-lioni, ba bcho' bntin yichjlall'do'eka' kwenche bi sho'n beeni' che dill' wen dill' kob che Crístona', beena' bli' ka nakye' Chioza'. ⁵ Aga xtill'nton' choe'nto', san choe'nto' dill' che Jesucristona', nanto' len' nake' Xancho. Na' daa chakinto' Crístona', chonnto' bittez dii gak gonnto' kwenche gaklennto' le'. ⁶ La' Chioza', beena' wna: "Wzeeni' beeni'na' lo yel cholá'", lekzka' ba wlo'e beeni' che'na' loo yichjlall'do'nto'na' kwenche gombia'nto' Jesucristona', na' kan' gakbe'into' ka nak yel' zakii che Chioza'.

⁷ Na' beeni' che dill' wen che Crístona' nakan to dii zakii inleeb. Na' ba nzoa Chioza'n loo lall'do'nto'ni, neto' naknto' ben' bibi zakii, kwenche ka we'nto' xtilleena', gakbe'i ben' yel' wak xenna' nsa'n nakan che Chios, aga nakan chento'. ⁸ La'kzi chiya dii chak chento', bi nakgakan dii bi yichej yilalennto'. La'kzi de dii nzen neto' wneyi, bi chakshejlall'nto'. ⁹ La'kzi chino ben' neto', aga chchoonlall' Chioza' neto'. La'kzi chchix cholol'gake' neto', bin' wlliai'gake' neto'. ¹⁰ Gattezə chajnto', chsak'zi'gake' neto' na' cheengakile' witgake' neto' ka betgake' Jesúsza'. Chak chento' ka' kwenche nakbia' Jesúsza' zoe' chaklene' neto'. ¹¹ La' shlak mbannto', toshiizi zelennto' yel' wit daa naknto' Jesúsza' txen. Chak chento' ka' kwenche nakbia' zoa Jesucristona' chaklene' neto' lao diika' chllaglo beli chen chento'ni dga guet. ¹² Daa choe'nto' cho'a xtill' Crístona' zelennto' yel' wit, kwenche le' gat' yel' mban chele.

¹³ Cho'a Xtill' Chioza' nan: "Daa benlilallaa Chioza', na'chan bi'a dill'." Na' kakzan neto', daa chonlilall'nto'ne'n, na'chan choe'nto' cho'a xtilleena'. ¹⁴ Na' nezicho Chioza', beena' bisbane' Xancho Jesúsza' ladj ben' wetka', lekzen' yisbane' cho' ka bisbane' le'. Na' ka neto' ka le', yichi'e cho' gana' zoe'. ¹⁵ Yel' zi' dga chllaglonto' naa, chllaglonto'n kwenche gak wen chele. Na' ka zej chanch ben' gombia' dill' wen che Crístona', lekzka' ben' zanch wi'e Chioza' yel' choxken daa nake' ben' wen, na' sho'e balaan xen.

¹⁶ Daan bi chidinjinto'. La'kzi beli chen chento'ni zej chde cheyin, yichjlall'do'nto'ni chikob Chioza'n lla kon lla. ¹⁷ Diiki chtilnto' naa, nakan dii te toldezə, na' bibi chaktek-into'. La' nezinto' daa chak chento' ki, Chioza' gone' to dii wen inleeb chento' dii bi te cheyin. ¹⁸ Aga zento' wneyi che diiki chle'icho yell-lioni, san diika' bi nla'n zento' wneyi. La' yog'te diiki chle'icho yell-lioni, de toldezə che ka diika', na' diika' bi chle'icho naa, nakan dii bi te cheyin.

5

¹ Kwerp chechoni nakan ka to yoo dii te cheyin. Na' nezicho shi ba wlliyi'n, Chioza' yiyone' sto dii kob dii bi te cheyin yabana'. Na' aga nakan dii beni ni'a na' ben'. ² Chibanchgaicho naa zoacho yell-lioni, na' ba cheenchgaicho yobzə lljazoalencho Chioza' yabana' gana' gone' sto kwerp kob checho. ³ Ka chak che beena' chishaa xe'na' daa ba biyi na' chiyakwe' to dii kob, kakzan gak checho daa yishaa Chioza' kwerp chechoni dga kwiayi'. ⁴ Shlak ni zoacho lo kwerpi, chibanicho na' chakyeshicho. Aga inacho chibachgaicho guetchon, san daa cheenicho yobzə ile'icho kwerp kob chechona' daa bi te cheyin na' ibanlenchon zejli kani. ⁵ Na' kwin Chioza' ba none' checho ile'icho dga, na' ba bselee Espiritu che'na' zoe' loo yichjlall'do'chona' kwenche chakliyicho gone' yog' daa ba bchebe'.

⁶ Na' daa nezicho dga, toshiizi nxenilall'cho Chioza'. Na' nezicho kwerpi mbanlencho, bi yillinlenchon gana' zoa Chioza'. ⁷ Chajle'cho dga, la'kzi bin' ile'ichon. ⁸ Na' cheenicho yobzə yiza'cho yell-lioni na' yigaan kwerp chechoni, la' nxenlall'cho kat' yiza'cho ni, na' lljazoalencho Xanchona'. ⁹ Na' daan, choncho to dii byen choncho ka chazlall' Chioza' naa mbancho wa la'kzi ba witcho. ¹⁰ La' chonan byen yog'lolcho lljazecho lao Crístona' gana' wchogloe' checho, kwenche to tocho ikaacho daa chidol'cho kon ka bencho shlak wbancho, shi bencho wen wa bencho mal.

¹¹ Na' daa nezinto' yog'cho techo lao Xanchona', na'chan chonnto' to dii byen choe'lennto' ben' xtilleena' kwenche gonlilall'gake'ne'. Chioza' nezile' do yichj do lall'nto' chonnto' xshine'na', na' non' lez nezki yichjlall'do'leka' ka chonnto'. ¹² Aga cheeninto' chibzə kwinnto' laolenan', san nia' le' ka' kwenche yibaile ka chonnto' na' gak yilliile xtill' ben'ka' chonz ka le chontegalə na' nagake' legaken' zeelo chongake' dii wenna' per bi chongake'n do yichj do lall'gake'. ¹³ Shi bal-le chakile chaktontnto'n, Chioza' nezile' xshine'nan' chonnto'. Na' shi chakile aga chaktontnto'n, banez chekzle llinna' chonnto'. ¹⁴ Daa nezinto' le chaki Crístona' cho', na'chan chonnto' to dii byen choe'nto' xtilleena'. Na' chajle'nto' daa wite' ni checho, zejlin yog'cho witcho. ¹⁵ Wite' ni che yog'lolcho kwenche bich goncho kon daa nazan checho, san goncho ka chazlall' beena' wit na' bibane' ni checho. ¹⁶ Ni cheyi daan, bich choninto' nottez ben' nakzi, shi zakee wa bibi zakee. La' kana' gokinto' bibi zakii Crístona', na' naa ba nezinto' bi nakan ka'. ¹⁷ Beena' ba nake' Crístona' txen, ba bikob Chioza' yel' mban che'na'. Ba wchoonlallee yel' mban gol che'na', na' ba zoe' to lo yel' mban kob.

¹⁸ Yog'lolte diiki nakan che Chioza', beena' ba ben ka bizoalenchone' wen daa bselee Crístona' wite' ni checho. Na' bene' lall' nanto' we'lennto' ben' dill' nak gongake' yizoalengake' Chioza' wen. ¹⁹ Kwin Chioza' bene' ka cho' ben' yell-lion chizoalenchone' wen daa bselee Crístona' wite' kwenche binitle' saaxya chechoka'. Na' ba bene' lall' na'nto' we'lennto' ben' cho'a xtilleena' kwenche inezgakile' nak gongake' yizoalengake'ne' wen. ²⁰ Daa bzoa Crístona' neto' choe'lennto' le' xtilleena', li gaktezi kwinkz Chiozan' chat'yoile' le' daa nanto' le': "Li yizoalen Chioza' wen." ²¹ Crístona' ni to dii mal bi bene'. Per ni checho chon', Chioza' benile'ne' ka ben' saaxya, kwenche daa gonlilall'cho Crístona' yiyakcho ben' li ben' shao' lawe'na'.

6

¹ Neto' chonnto' xshin Chioza', chat'yointo' le' gonle ka chiyoollallee daa ba bene' to dii wen chele. ² La' Cho'a Xtill' Chioza' nan: Ka byalljilo' wzenag' cho', nad' bzenag'. Ka byalljilo' yisla' li' na' goklen' li'. Na' nia' le', naan' ba bllin lla bllin gor gaklen Chioza' le'. Naan' nakan llana' yisle' le'.

³ Na' neto' bi chonnto' bittez dii gon ka ine ben' zban che xshin Chioza' dga chonnto'. ⁴ San toshiizi chonnto' to dii byen chonnto' xshin Chioza' ka chiyali. Daan, chonnto'

banez laa lo yel' zi', laa chyallj chchininto', laa de dii lallj, ⁵ laa chit chyingake' neto', laa chyixjgake' neto' lillya, laa lliadia' ben' neto', laa chonnto' llin dii nak zii zshab, laa tento' bishgal zi' bishgal ya', laa chbil chdonnto'. ⁶ Na' lekzka' chli'nto' chonnto' xshin Chioza' ka chiyali daa zoanto' do yichj do lall'nto', daa ba nezinto' daa nak dii li, daa napnto' yel' chxenlall' che ben' na' chonnto' wen chegake', daa zoalen Espiritu Sántona' neto', daa chakinto' ben' do lall'nto', ⁷ daa choe'nto' cho'a xtill' Chioza' daa nak dii li, na' daa zoalen yel' wak che Chioza' neto'. Na' dii li dii shao'ka' chonnto' nakgakan ka dii chñiyainto' kwenche chdil-lennto' dii mala'. ⁸ Zoa ben' chle'shi'gakile' neto', na' zoate ben' chle'zbangakile' neto'. Zoa ben' chnegake' wen chento', na' zoate ben' chñit chdegake' neto'. Zoa ben' chongakile' neto' ka to ben' wxiye', la'kzi dill' lin choe'nto'. ⁹ Zoa ben' chongake' ka bi nombia' neto', la'kzi nombia'kzgake' neto'. La'kzi chtilnto' yel' wita', ni mbankznto'. Na' la'kzi chit chyingake' neto', bin' gongake' gan guetnto'. ¹⁰ La'kzi de dii zan dii cheenin gonyeshiin neto', toshiizi zoanto' mbalaz. La'kzi naknto' ben' yesh', ben' zan chonnto' ka ben' wni'a daa choe'lennto' legake' cho'a xtill' Chioza'. La'kzi bibi napnto' ni, nezinto' dii xench nak chento'na' de.

¹¹ Le' ben' bish' na' le' ben' zan', le' lle'le yell Coríntona', ba be'lento' le' dill' kon ka nakan na' ba bli'nto' chakinto' le' do yichj do lall'nto'. ¹² Neto' chli'nto' chakinto' le' do yichj do lall'nto', per le', bi chli'le shi chakile neto'. ¹³ Chat'yoid' le', le' nakle ka xiin cha', gonle ka chon neto' na' li gaki neto' do yichj do lall'le.

¹⁴ Bi gonle txen ben'ka' bi nonlilall' Crístona'. La' aga widili daa nak dii li dii shao' kon dii mala', na' aga wdili beeni'na' kon daa nak yel chol. ¹⁵ La' ba nezczile bi chidili Crístona' dii xiwaa. Na' lekzka' beena' ba chonlilallee Crístona' bi chidilile' beena' bi chonlilalleene'. ¹⁶ Na' bi gak soa daa nak lwaa lsak', diika' choe'la'o ben', loo yoodo' che Chioza'. La' cho' nakcho ka yoodo' che Chios yaa Chios banna'. Ka wna Chioza' che ben' Israelka': Soa' ladje'ka', na' nad' gak Chios chegake' na' legake' gakgake' yell cha'.

¹⁷ Na' daan goll Chioza' legake':
Li yichej ladj ben'ka', bi gonle legake' txen.

Bi gox'le daa ba wnia' bi nxi nyech.

Na' ka' wleb' le',

¹⁸ na' gak' Xale,
na' le' gakte xiin cha'.

Kan' na Xancho Chioza', beena' zeelo nap yel' wak choo yel' wak xen.

7

¹ Kan' nak daa ba bcheb Chioza' checho, le' ben' bish'dawaa na' le' ben' zandawaa. Daan, chiyal' goncho to dii byen gakcho ben' nxi nyech lawe'na' kwenche bibi dii mal ta' ichen kwerp chechoni na' yichjlall'do'choni. Na' daa chall chllebcho Chioza' goncho ka dii le gakcho dowalj ka cheenile'.

² Li gaki neto' do lall'le. La' ni to kono bin' goninto', na' ni to konon' wsak'zi'nto', na' ni to konon' siye'nto'. ³ Aga chsheshlen' len' nia' le' ka'. Ba wnia'kz' ka chakchgaid' le' axt ni guetid'. ⁴ Nxenlallaa chonle wen, na' cho'a dill' chele ka wen ba chonle. Ladj dii zi' dii ya'ka' ni chtiplallaa na' le' chiba chizakid'.

⁵ Kon ka bla'nto' gani mbani Macedóniani, bibi yel' wixi'lall' chento' got'. Doxenzə chdil chllagnto' dii zed, chakdil-len ben' neto', na' za' dii chwall chsheban neto'. ⁶ Per Chioza', beena' chiyonxenlall' ben'ka' zoa nyesh', biyonxenlallee neto' ka bla' Títona'. ⁷ Aga to daa bla'ze'n, san daa choe'yenee xtill'le ba chonle wen. Na' be'lene' neto' dill' ka zelall'le ile'ile neto' na' ka chakyeshile daa zele wneyi cha'. Na' daa benid' dga zizikli chibaid'.

⁸ La'kzi yisha' bselaa benyeshiin le', bibi chaktekid'. La'kzi gokyeshid' ka bwia' benyeshiin le' shloll, ⁹ naa chibaid', aga daa gokyeshile, san daa goklenan le' biyaj

bilēnile ka cheeni Chioza'. Na' aga bi gok chele ni che daa bzej' le'. ¹⁰ Chioza' chone' ka gakyeshicho kwenche yiyaj yilenicho na' gat' ye'l' mban checho zejli kani, na' bich chakyeshicho daa gok checho ka'. Per ye'l' chakyeshii daa nsa' dii mala' choncho chlliyai'n cho'. ¹¹ Ye'l' chakyeshiina' daa be' Chioza' latj got' ladjlena' benan ka gokbalile' daa ben beena', na' wda'le nad'. Benan ka bllaale na' wyoosheble, na'tech wzelall'le yidwiach' le', na' bsak'zi'le beena' wdap dolaa. Na' yog' diiki chli'n bi nonle txen dii mala' bene'. ¹² Na' ka bzej' le', aga bzej' ni che beena' ben dii mala', ni aga ni che beena' benile' zi'bia', san bena'n kwenche Chioza' gaklene' le' gakbe'ile dii likzan zele wneyi chento'. ¹³ Diiki chaklenan neto' chiyakshao'lall'nto'.

Na' zizikchli bibainto' ka ble'into zoa Títona' mbalaz daa btiplē lallee. ¹⁴ Ba be'len' Títona' dill' chele, goshee le chibaid' ka chonle, na' bi chido'id' daa goshee ka'. Na' ka dill' daa be'lennto' le' nakan dii li, lekzka' gokbe'i Títona' xtill'lēna' daa bi'a lawe'na' nakan kon ka goshee. ¹⁵ Na' zizikchli chakile' le' kat' chjadinile' ka bleblene' na' bzenagle che' lega be'n' chiyal' gall illeble. ¹⁶ Chiba chizakid' daa ba nxenlallaa dii likzə chzenagle.

8

¹ Na' naa, le' be'n' bish' na' le' be'n' zan', cheeninto' inanto' le' ka mba ba ben Chioza' goklene' be'n'ka' chdop chllag choe'la'ogake' Crístona' gani mbani Macedóniani. ² La'kzi biya dii ba gok chegake', mbalaz inleeb zoagake'. Na' la'kzi chak ye'l' zi' ye'l' yesh' chegake', do yichj do lall'gake' bzangakile' bi de chegake' kwenche gaklengake' be'n' yoblə. ³ Nad' nezyen'id' do yichj do lall'gake' be'gake' mecha' bzangakile', na' bengake' axt ga zeelo gokgake'. ⁴ Na' legake' got'yochgagakile' neto' kwenche we'nto' latj lengake' gaklengake' bish' ljwellchoka' nak lall' na' Chioza'. ⁵ Bentechlēgake' aga ka to daa nonnto' lez gongake'. Zigaate ben kwingake' lall' na' Xancho Crístona' kwenche gongake' ka cheenile', na'tech bzenaggake' chento' daa nezgakile' nan kan' cheeni Chioza' gongake'. ⁶ Ni cheyinnan' ba got'yointo' Títona' kwenche yisyolle' wtope' daa chzanile we'le be'n'ka' chyallj chchini. ⁷ Na' ka mbejlaole chonle yog' dii nak wen: daa nonlilall'chgale Crístona', daa chak we'le dill' mbalaz, daa le chajniile, daa cheenchgaile gonle dii wenna', na' daa le chakile' neto', lekzka' li gon byen kwejlaole gakenle be'n' we'le daa chzanile.

⁸ Aga chontek' byen gonle ka nia', san daa cheenzid' inezile ka chibachgayi be'n' bish'choka' gaklengake' be'n', na' kan' cheenid' gonle, kwenche wli'le shi lekzilen chaki ljwell-le do yichj do lall'le. ⁹ Ba nezkzile dii wenna' ben Xancho Jesucrístona'. La'kzi nake' be'n' choo be'n' xen, ben kwine' ka be'n' bibi zakii kwenche gak wen chele.

¹⁰ Daa godwizi wzolole btope mech kwenche gakenle be'n'. Na' aga no got'yoi le' btoplen, san benlen do yichj do lall'le. Na' naa inia' ka nak daa gonle: ¹¹ li yisyoll daa wzolole chonle dii nech do yichj do lall'le. Ka bibaile kana' wzolole, ka'kzə li yibayi yisyoll-len. Li we' ka to daa gak we'le. ¹² La' shi izanilen do yichj do lall'le, na' ixin' lao Chioza', la'kzi lat'zan. Chioza' bi chnabe' dii bi napcho.

¹³ Aga ni che nia' le' gakenle be'n' na' le'lə yigaan yesh'le, san gat' dii iyalljile ganga. ¹⁴ Naa le' naple daa chyalljgakile'. Na' shi wxē willj ba napgake' bi dii iyalljile, na' yiyaklengake' le'. Na' bibi iyalljile ganga. ¹⁵ Na' gak ka na Cho'a Xtill' Chioza': "Beena' bitop dii zan, aga bi bichoonan, na' beena' bitop lat'zan, aga bi byalljile."

¹⁶ Choxken Chioza' bzie' Títona' wneyi ka wneyi daa zia' chele. ¹⁷ Na' le bibaile' bchebe' yidwie' le', daa lekzka' chaklallee ile'ile' le'.

¹⁸ Na' chsel'lennto'ne' sto be'n' bish'cho, be'n' le wen zeyi che' lao yog'lol be'n'ka' nonlilall' Crístona' to to gana' chdop chllaggake', daa le cho'e dill' wen dill' kob che Crístona'. ¹⁹ Na' aga daazə, san lekzka' be'n'ka' chdop chllag choe'la'ogake' Crístona' ni, wlelgake'ne' sa'lene' neto' lljasannto' mecha' bdop. Na' chonnto' dga kwenche sho'ch Chioza' balaan na' kwenche wli'n nan cheeninto' gakennto' be'n'. ²⁰ Bi cheeninto' bi gon inaz be'n'

chento' ni che mech xenni ngoo lo nanto'. ²¹ Na' chonnto' to dii byen gonnto'n ka chiya_{li}, aga toz lao Xancho Chioza' san lenkz lao be_n'.

²² Lekzka' chsel'lennto' legake' sto be_n' bish'cho, beena' zan shii ba ble'into' chone' wen, na' naa cheenchlile' gaklene' daa nxenlallee gonle ka cheeni Chioza'. ²³ Na' ka nak Títona', nake' nad' txen chone' xshin Chioza' ladjlena'. Na' be_n' bish'choka' zi chop wlej be_n'ka' chdop chllag choe'la'ogake' Crístona' ni, chongake' ka choo Crístona' balaan. ²⁴ Kwenche inezi be_n'ka' nonlilall' Crístona' gan yoblə, li wliyi be_n'ki chselaa nan dii li ba chakile be_n', na' li wli' chonle wen kon ka choe'nto' xtill'le.

9

¹ Bich chonan byen wzej' le' inia' chiya_{li} gakenle be_n' bish'choka' nak lall' na' Chioza'. ² La' ba nezid' ka cheenile gakenle be_n', na' ba bi'a xtill'le lao be_n' Macedóniaki, chepgakee godwizteyi le' lle'le Acáyana' cheenile gakenle. Na' ka wnezi be_n' Macedóniaki ka cheenile gonle, zangake' ba chaklall'gake' gaklengake'. ³ La'kzi nakan ka', chselaa be_n' bish'choki kwenche inezgakile' nan choe'nto' dill' li daa che'nto'gake' nan chonle wen. Nia' le' ka' kwenche gonchle ka dii le wtoplen. ⁴ La' shi za'len no be_n' Macedonia nad' ka yidwia' le', na' ile'gakile' bi chonle ka dillaa choe'nto' chele, na' gakan yel' zto' chento' daa nxenlall'nto' chonle wen. Na' le' si'techlale yel' zto'. ⁵ Ni cheyinnan' chakid' chonan byen wselaa be_n' bish'choki yidwiagake' le' zigaate, kwenche gaklengake' le' yiyoll wtople daa ba bcheble. Na' kat' yid', ba xoashawan lega dii chzanile, na' aga inacho do ki do lall'len choe'len.

⁶ Li lljadini cheyi dga: Beena' gaz lat'zə, lat'chokzə yizi' yilape'; na' beena' gaz dii xen, lekzka' dii xen yizi' yilape'. ⁷ To tole we'le ka to daa chzanile. Bi gonlen do ki do lall'le, la' aga no chon byen we'len. La' Chioza' chakchgaile' beena' chibayi we'n do yichj do lallee. ⁸ Chioza' wak gone' ka gakchga wen chele kwenche toshiizi gat'ch yog'lo_l dii chyallj chchinile na' gakteyin gakenle yog'lo_l be_n' bibi de che'. ⁹ Cho'a Xtill' Chioza' nan: Cho'e be_n' yesh'do'ka' daa chyallj chchingakile', na' dii wenna' daa chone' biga llia te cheyin.

¹⁰ Chioza', beena' chon bi dii chaz chbekcho na' dii cheej chaocho, lekze'n gone' bittezə dii chyalljile, na' gone' ka shesh shanch bi de chele kwenche gonchle dii wenna'. ¹¹ Na' ka', gapchle dii xench kwenche gak we'chle dii xench gakenle be_n'. Na' kat' lljasannto' mecha' daa ba btope lao be_n'ka' chyalljin, na' we'gake' Chioza' yel' choxken. ¹² Ka nak mecha' daa we'le be_n'ka' nak lall' na' Chioza', aga to gakenzan legaken', san lekzka' gonan ka we'chgagake' Chioza' yel' choxken. ¹³ Na' ka ikaagake'n, we'la'ogake' Chioza' daa chonle ka na dill' wen dill' kob che Crístona' daa ba chajle'le. Na' lekzka' we'la'ogake' Chioza' daa btope mech xen be'len legake' na' nochlə be_n' yoblə. ¹⁴ Na' daa chwiagake' chaklenchga Chioza' le', na' inabgakile'ne' gakenche' le'. ¹⁵ Choxken Chioza', daa ba bene' to dii wen inlebb checho. Bichkzə bi dill' chillle we'cho ka to ba bene' checho.

10

¹ Nad' Pablo, chat'yoid' le', na' choe'len' le' dill' goll-lall' ka be' Crístona' dill' daa nape' yel' chxenlall', la'kzi nagake' cha' bi chiyaxjid' wsheshlen' le' kat' zoa' ladjlena', na' galjə zoa' zit' chiyaxjid' chnia' le' zi'bia' lee yishka' chzej'. ² Na' chat'yoid' le', li gongach wen kwenche kat' yidwia' le' bi lenle wsheshlen' ka wsheshlen' be_n'ka' naz chon' lega be_n' yell-lio. ³ La'kzi naknto' be_n' de beli chen, bi chdilnto' ka chdil be_n' yell-lioki. ⁴ Neto', kat' chdil-lennto' dii mala' bi chchinnto' yesya ka daa chchin be_n' yell-lioki, san daa chchinnto' nsa'n yel' wak che Chioza' kwenche chlliyai'nto' yel' wak che dii xiwaa. ⁵ Na' chlliyai'nto' daa yoo loo yichjlall'do' be_n' daa chsej chllonan gombia'gake' Chioza'. Na' chonnto' kwenche wzexj yichjgake' wzenaggake' che Crístona'. ⁶ Na' kat' ba nakbia' chzenagle kwaslo_l, na' wwianto' nak gonnto' che beena' bi chzenagkz.

⁷ Li wwia ka chonnto'. Na' shi chakile nonle Crístona' txen, chiyal' gakbe'ile lekzka' neto' naknto'ne' txen. ⁸ Aga chido'id' chshalj chshon' daa nia' kwín Crístona' bene' lall' na'nto' we'nto' xtilleena' kwenche gaklennto' le' gake wal, aga kwenche wlliyi'nto' len'. ⁹ Bi cheenid' gakzile chzej' yishki kwenche wsheb' le'. ¹⁰ Zoa ben' ne' yishka' chzej' le' le zña chñen, per kat' zoalen' le' ni bi nak' ka ben' illeble, na' ni dill' bi chak wi'a. ¹¹ Na' ben'ka' naz ka', chiyal' inezgakile' kon ka chzejnto' ñaa zoanto' zit', ka'kzə gonnto' kat' soanto' ladjlena'.

¹² Bi cheeninto' gakebinto' ben'ka' chyibz kwingake'. Daa chakgakile' le wen chongake' na' daa chsaklebi ljwelle' nochgake' chonch, chli'gake' bi ntegakile'. ¹³ Neto', aga wshalj wshonnto' che to dii bin' gonnto'. San cheyi daa ben Chioza' lall' na'nto' gonnto'n choe'nto' dill', na' le' bselee neto' lall-lena'. ¹⁴ Neto' bidye'lennto' le' dill' wen dill' kob che Crístona' dii nech, na' bi chixoa chento' inanto': "ki bennto'". ¹⁵ Bi chshalj chshonlenznto' xshin ben' yoblə, san nonnto' lez gonlilall'chle Crístona' kwenche gonchnto' xshin Chioza' daa nak lall' na'nto' gonnto' gana' zoale. ¹⁶ Lekzka' nonnto' lez we'nto' dill' wen dill' kob che Crístona' kon ga bin' illin xtilleena', kwenche bi wshalj wshonlenznto' xshin ben' yoblə.

¹⁷ Beena' chshalj chshon kat' bin chone', che Chiozan' chiyal' wshalj wshone'. ¹⁸ Beena' chshalj chshon che kwine', bibi zakee, san beena' ina Chioza' le wen chone', beenan' zak'.

11

¹ La'kzi chakile biz dill' diika' cho'a, li wzenagan. ² Dga chaktek cha' chele za'n che Chioza'. Nad' ba non' le' lo na' Crístona', ka chak che to ben' zoa to nool wew' che', bi' napshii kwim', na' chone'b' lo na' beena' gak ben' cheb'. Na' kan' cheenid' gake lao Crístona', ka to nool wew', bi' napshii kwinin. ³ Per chxollid' gak chele ka gok che dii Évana' kana' wxiye' be'la' le' daa bzenague' cheb. Na' chakid' shi ka' gonzle wzenagle bi dill' wxiye' dii gonllejin le', na' bich gonlilall'le Crístona' do yichj do lall'le. ⁴ Shi chla' ben' choe'lene' le' dill' nlla'lə aga ka daa ba bsedinto' le' che Jesús'a, wa chsedtegakile' le' nlla'lə che Espíritu che Chioza', beena' zoa loo yichjlall'do'chona', wa che dill' wen dill' kob che Crístona' daa wyajle'le dii nech, na' chajle'tezle chegake'. ⁵ La'kzi chakile chajni'chi ben'ka' nale nakgake' postl chele aga ka nad', nad' nezid' bi nakan ka'. ⁶ Leljaile bi chakyañaa wi'a dill', per chajni'chid' aga ka legake'. Na' dgan ba bliinto' le' toshiizi lao yog'lolte dii chonnto'.

⁷ ¿Achakile malan ben' bentez' ka ben' bibi zakii na' aga bi laxj' wñabid' le' kana' be'len' le' dill' wen dill' kob che Chioza'? Goktgui gake ben' zakii lawe'na'. ⁸ Bex'shaz' mecha' daa ben' ben'ka' chdop chllag choe'la'ogake' Crístona' yell yoblə kwenche bibi byalljid' shlak bli' bsedid' le'. ⁹ Na' kana' wzoa' ladjlena' na' byallj bchinid', ni tole bi benid' zed. Ben' bish'choka' lle' yell Macedóniana' bidwa'gake' daa byalljid'. Na' ka' bibi zed benid' le', na' biga gonkzid' le' zed. ¹⁰ Dill' li che Crístonan' cho'a, na' nia' ni to ben' lle' gana' mbani Acáyana' bi wsej wllone' wshalj wshon' ka to dga chon'. ¹¹ ¿Añezile biçhe nia' ka'? ¿Achakile bi chakid' len'? Chioza' nezile' le' chakid' le'.

¹² Per gonchzk' ka chon' kwenche bi wi'a latj che ben'ka' cheeni wshalj wshongake' inazgake' chongake' ka chonnto'. ¹³ Ben'ki bi nakgake' dowalj postl, na' chdagake' chziye'gake', nazgake' nakgake' postl che Crístona'. ¹⁴ Na' daa chongake' ka' bi nakan ka dii yibanicho, la' nezicho dii xiwaa chonz kwinin ka anjl che Chios. ¹⁵ Daan, bi nakan ka dii yibanicho ben'ka' chon xshininna' nagake' chsedgakile' ben' nakan gongake' yiyakgake' ben' wen lao Chioza'. Na' daa chongake' ka', len wlliyi'n legake'.

¹⁶ Sto shii nia' le', bi gakile bizə dillaan choe'len' le'. Wa shi ka' chakile, li gakshazi ka', per li we' latj wi'a dill' kwenche wshalj wshonlataa. ¹⁷ Na' daa chshalj chshon' che kwín', chon' ka ben' bi nteyi, la' aga kan' cheeni Xanchona'. ¹⁸ Daa le chshalj chshon ben' zan shi no nakgake', lekzka' nad' wshalj wshon' non nak'. ¹⁹ Le' nale nakle ben' sin' na' chibazile

chleble ben'ka' bizə chon chna lat' wej. ²⁰ Chonzle banez shi bi chgongake' le' gonle, shi chzi' chkaagake' bi de chele, shi kon daa nazan chegake' chongakile' le', wa shi chgap' chball'gake' xag'lena'. ²¹ ¿Achakile bi chiyaxjid' gon' ka chon ben'kin? Nezganz bi gakebid' legake' gon' ka'.

Lete shi legake' chiyaxgakile' chshalj chshongake', lekzka' nad' wiyaxjid' wshalj wshon', ka chon to ben' bi nteyi. ²² Shi nagake' nakgake' ben' hebreo, lekzka' ben' hebreo nad'. Shi nagake' nakgake' ben' Israel, lekzka' ben' Israel nad'. Shi nagake' nakgake' xiin dia che dii Abrahama', lekzka' xiin dia che' nad'. ²³ Shi nagake' chongake' xshin Crístona', nad' nia' chontechla'n ka legake'. (Daa nia' ka' chon' ka ben' bi nteyi.) Nad' choe'l-lall'ch' chon' xshin Crístona' aga ka legake'. Lech ba wyaa lillya ka legake', ba bet wdinch ben' nad' aga ka legake', na' dii zan shii ba bila' lo yel' wita'. ²⁴ Gay' shii ba bet wdini ben' Israelka' nad' yid sota' twaljichoa wej, ²⁵ shon' shii bet wdingakile' nad' yaga', na' zi shlin bliagake' nad' yaja'. Lekzka' shonə shii ka yo'a loo barkwa' wche'lenan nad' yel, na' zi shlla shyel bgaana' lo nido'na'. ²⁶ Shlak chda' ngwaa nez dii zan dii ba ben ble'id'. Ba wzoa' dii nxoll wa' no yao nad', no che ben' wban, no che ben' wlall'cha'ka', no che ben' bi nak ben' Israel. Ba wzoa' dii nxoll ka wdia' yell xenka', na' ka wdia' lyix', na' ka wdia' lo nido'na'. Na' lekzka' ba wzoa' dii nxoll che ben' wxiye'ka' nazgake' ba chajle'gake' che Crístona'. ²⁷ Ba benchga' llinna' axt ba chjxakchgaid', zan shii ba wlej' bishgal, ba wbil wdonchga' na' ben banez bi weej wdaw', ba bllagloa' no dii zag na' byallj xalaana'.

²⁸ Na' ka chllagloa' yog'lol diiki, ka'kzan chllagloa' daa zia' wneyi lla kon lla che yog' ben'ka' nonlilall' Crístona' to to yell. ²⁹ La' kat' to ben' bich chone' ka dii le, kon chakid' nad'kzan chak'cha'ka'; wa shi ga zoa ben' biz che' chone' na' chchixe' ben' yoblə lo xnez Chioza', na' chllaa yichj'. ³⁰ Shi de dii chonzan ka wshalj wshon', we'tochl' dill' cheyi daa chli'n bibi gak gon' tobia'loz'. ³¹ Chios, beena' nak Xa Xancho Jesúsza', beena' chgoocho balaan toshiizi, nezile' cho'a dill' li. ³² Na' ka wzoa' yell Damáscona', beena' nzoa rey Arétaza' ngoo lall' nee yella' bzoe' ben' wdapgake' cho'a yella' kwenche nan gox'gake' nad'. ³³ Na' ben'ka' zoa gana' bllin', bigoogake' nad' to loo llom, biletjgake' nad' to cho'a ventan dii zoa lee zee daa nechj yella', na' bi be'gake' nad'.

12

¹ Chonkzan byen wshalj wshon' la'kzi bibi gon' gan. Na' we'toch' dill' cheyi daa ble'do'id' na' cheyi daa bli'yi Xanchona' nad' daa konon' yen ile'kzi. ² Nombi'a to ben'* nake' Crístona' txen. Ba gok shda' yiz Crístona' bchi'ene' yabana' axt gana' lliate Chioza'. Bi nezid' shi wyaje' do beli chen che'na', wa shi to bishbe che'na'zan wyaj. Toz Chioza' nezile' ³ shi wyaje' do beli chen che'na' wa shi to bishbe che'na'zan wyaj, per nezid' ⁴ bche Chioza'ne' yabana' gana' nak mbalaz inleeb. Na' benile' dill' dii konon' yenkzi, dii bi de lsens no wshaljan. ⁵ Che beena' gok cheyin kan' wshalj wshon', san ka nak nad', aga bi de wshalj wshon' lete wak wshalj wshon' cheyi diika' chli'n bibi gak gon' tobia'loz'. ⁶ Shel' cheenid' wshalj wshon', aga inacho chon' ka ben' bi nteyin, la' dill' lin cho'a. Per bi gon' ka', kwenche kono ile'i nad' ben' le zakii daa ba ble'id' diika'. La' diika' chon' na' dill'ka' cho'a, lekzgakannan' wli'gakan nakan nak'.

⁷ Kwenche bi gak' ben' choo ben' xen lao yel' mba yel' shao' inleebka' ba bli'yi Crístona' nad', bi'e latj bla' to dii chzak'zi' nad', to dii bsel' Satanáza' daa chzoazi'yaan nad', na' chak' ka ben' chad' chbibe' yesh'. ⁸ Dga chak' cha', shon' lin ba wñabid' Xanchona' yikwase'n. ⁹ Na' wne' nad': "Chaklə cho' zoalenkz' li' na' gakden' li'. Daazan chyalljilo'. La' yel' wak cha'na' chli'ch lawin kat' de daa chli'n bibi gak gono' tobia'lozo'." Daan, chibachid' wi'a dill' cheyi diika' chli'n bibi gak gon' tobia'loz', kwenche yel' wak che Crístona' soalenchan nad'. ¹⁰ Na' daa chakid' Crístona', chibaid' kat' za' daa chli'n bibi

* **12:2** Nombi'a to ben': daa nan ki, Páblona' cho'e dill' che kwine', la' kwinkzen' bche' Crístona' yabana'.

chak gon' tobialoz', kat' choni ben' nad' zban, kat' chyallj chchinid', kat' chsak'zi' ben' nad', na' kat' de to dii lallj cha'. La' kat' za' daa chli'n bibi chak gon' tobialoz', kana'lan chakbe'id' zoalench yel' wak che Crístona' nad'.

¹¹ Ba ben' ka ben' bi nteyi daa chshalj chshon' che kwini ni chele, la' le'lan nan we'le dill' nan chon' wen. La'kzi bibi zakaa, aga chonch ben'ka' nale nak postl chele ka nad', ben'ka' nale chajni'chgayi. ¹² Daa wzoatezi wzoa' ben' daa yoo lo na' gon' lao yog' diika' btil' na' daa ben' yel' wakka' ladjlena', chli'n nak' dowalj postl. ¹³ Bi gakile' benid' le' nakzi aga ka ben'ka' nonlilall' Crístona' yell yoblə daa bi benid' le' zed bibi wkaa chele. Bi nakan ka'. Na' li si'xen cha' shi bi ben' wen ben' ka'.

¹⁴ Ba chon' wneyi yidwia' le' de wyon shii, na' lekzka' bi cheenid' gonid' le' zed. La' aga chzelallaa bi de chele, san len' chzelallaa yidwia'. Ka chak che ben' nape' bi'do', aga legakban' wweej wwaogakb' legake', san xaxna'b'kan' segake' wneyi wweej wwaogake' legakb'. Kan' chak cha' chele. ¹⁵ Do yichj do lallaa izanid' bi de cha', axt yel' mban cha'ni izanid', kwenche gak wen chele. La'kzi nad' axt ga zeelo gakiid' le', widezile zizikchli gonile nad' kazli.

¹⁶ Nezkzile aga bi zed benid' le', per bal-le chakile' biyiljall'zan' kwenche wxiyaa le'. ¹⁷ Wa li inashki shi no ben'ka' ba bselaa ba wxi' wkaagake' bi de chele. ¹⁸ Gosh' Títona' yidwie' le', na' bsel'lenee sto ben' nakcho txen. Li inashkilja shi bi wxi' wkaa Títona' chele. Nezile bi nakan ka'. La' toz ka nsa' chento' na' toz ka cheeninto' gakennto' le'.

¹⁹ Shi chakile' choe'nto' dill'ki kwenche bibi sa'lall'le chento', aga kan' nakan. Choe'nto' dill' lao Chioza' daa naknto' Crístona' txen. Le' ben' bish'dawaa na' le' ben' zandawaa, yog'lol' diiki chonnto' nakan dii gaken le' kwenche gakchale lo xnez Chioza'. ²⁰ Chxollid' kat' yidwia' le' bi chonle ka cheenid' gonle. Na' le', aga wyazlall'le ka gon' chele ka yid' gana' zoale shi naa. Chxollid' shi ka yid' ba chdil' chsheshlenz ljwell-le, ba chakxe'zi' ljwell-le, ba chllaaz ljwell-le, ba chonz che chezle, bizə ba chon chnaz che ljwell-le, ba chchitjzle dill' che ljwell-le, ba chep cha'lall'zle, na' bichkzə nkaani'a xnezi daa chonle. ²¹ Lekzka' chxollid' shi kat' yidwia' le' sto shii, si'a yel' zto' lao Chios cha'na' ni chele, na' kwell' ni chele. La' zantele chonle dii mala', na' bin' yiyaj yilenile diika' ba benlenle beli chen chelena' kon ka nazan chele.

13

¹ Dga gak shon shii yidwia' le'. Naach yidyen' ka na cho'a xtil' Chioza': Shi zoa ben' chawe' xya che to ben', na' bibi gak gone' shi bi zoa chop shon ben' inagake' kan' nakan. ² Kana' bidwia' le' de wchop shiyi, gosh' ben'ka' chongake' dii mala' bich wwaloz' chegake'. Na' naa zoa' zit', ba nia' le' ka' sto shii, bich si'xen' kat' yid' dii yoblə. ³ Gon' ka' ni cheyi daa cheenile ile'ile shi lekzidaan cho'a dill' kon ka cheeni Crístona'. La' Crístona' bi nake' ka ben' bibi gak gon ladjlena', san nape' yel' wak kwenche yigwee shli lall'le. ⁴ Dii likzə Crístona' blexj yichje' wdee lee yag cruza' ka ben' bi nap yel' wak, per naa zoalene' yel' wak che Chioza'. Na' lekzka' neto' lennto' Crístona' naknto' ka ben' bi nap yel' wak, per daa naknto'ne' txen lekzka' zoalennto' yel' wak che Chioza' kwenche gonnto' xshine'na' ladjlena'.

⁵ Li yiya yiyilj kwini shi dii li ba nonlilall'le Jesucrístona'. Na' li gakbe'yeni shi zoalenkze' le', wa shi bi nonlilall'kzlene'. ⁶ Na' nonto' lez gakbe'ile zoalenkze' neto'. ⁷ Chnabinto' Chioza' gaklene' le' bibi dii mal gonle. Aga chnabinto'ne' dga kwenchezə wli' wzez chento' le wen bennto' xshine'na' ladjlena', san cheeninto' gonle dii wenna' daa chiyal' gonle la'kzi ina ben' bi chak gonnto' xshin Chioza'. ⁸ Bi gak bi inanto' cheyi daa nak dii li, san zeelo chaklennto' kwenche wli'chlawin. ⁹ Chibainto' shi le' nakchale na' bi chonan byen wchinnto' yel' wñabia'na' nak lall' na'nto', la'kzi zoa ben' chle'ile' neto' ka ben' bi nap yel' wñabia'. Na' inabchinto' Chioza' gaklene' le' gake doxen ka cheenile'. ¹⁰ Chzej' le' naa kwenche kat' yid' bi inetek' le' znia. La' Xanchona' none' nad' yel' wñabia' kwenche gaken' le' gakchale lo xnez Chioza', aga bene'n kwenche wliayaa le'.

¹¹ Dga zeelo nia' le', le' beṅ' bish' na' le' beṅ' zan', lliallalaa soale mbalaz na' we'l-lall'le gake doxen ka cheeni Chioza'. Li wtip lall'le, li gak toz na' soalen ljwell-le mbalaz. Na' Chioza', beena' chakile' cho' na' chzoe' cho' mbalaz, soalene' le'. ¹² Na' li wwap ljwell-le chiox lega beṅ' chaki ljwellin daa nakle lall' na' Chioza'. ¹³ Na' yog'loḷ beṅ'ki ba bixi biyech lao Chioza' chwapgake' le' chiox.

¹⁴ Xancho Jesucristona' gaklenshgue' le', na' yel' chaki che Chioza' soalenan le', na' Espiritu Santo che'na' gone' ka gakbe'ile zoalene' le'. Kan' gakan.

Kart daa bzej Páblona' na' bseleen lao ben'ka' nonlilall' Jesucrístona' gana' mbani Galáciana'

¹ Nad' Pablo, nak' postl che Jesucrístona', na' aga no ben' yell-lío wleje' nad' na' bselee nad' wi'a xtilleena', san kwin Jesucrístona' na' Xacho Chioza', beena' bisbane'ne' ladj ben' wetka', bsel'gake' nad'. ² Nad' na' yog' bish' ljwellchoki chwapnto' le' chiox, ka le nonlilall'le Crístona' to to yellka' lle' gana' mbani Galáciana'. ³ Chñabid' Xacho Chioza' na' Xancho Jesucrístona' gaklenshgagake' le' na' wzoagake' le' mbalaz. ⁴ Jesucrístona' bzani kwine' wite' ni checho daa nakcho ben' saaxya, kwenche bisle' cho' lao dii mala' de yell-lioni, kon ka goklall' Xacho Chioza' gone', ⁵ beena' chidol' sho' balaan zejli kani. Kan' nakan.

⁶ Le chibanid' chele daa ba bilaala'odozle Chioza', beena' gox wñab le' na' bliile' le' yel' chiyesh'lalli che'na' daa bselee Crístona' wite' ni checho, na' ba zjanozle to dii yoblə daa bi nak dill' wen dill' kob che'. ⁷ Aga inacho de sto dill' wen dill' kob yoblan, san zoaz bal' ben' cheengakile' gonlej gongangakile' len', na' chsha'zgake' dill' wen dill' kob che Crístona'. ⁸ Shi ga za' ben' yishee dill' wen dill' kob che Crístona' daa ba wdixje'into' le', Chioza' wsak'zi'shgue' zejli kani notteza beena' gon ka', laa neto' wa no anjl ben' za' yabana'. ⁹ Ba wñiakza' le' ka', na' naa chiznia'n sto shii: shi no chsha' dill' wen dill' kob che Crístona' daa ba wdixje'into' le', Chioza' wsak'zi'shgue'ne' zejli kani.

¹⁰ Aga cheenid' ile'shii ben' nad' daa nia' ka', san cheenid' gon' daa chazlall' Chioza'. Shi cheenid' gon' ka' chazlall' ben', aga wen llin che Crístona'chan nak'.

¹¹ Cheenid' inezile dga, le' ben' bish' na' le' ben' zan', dill' wen dill' kob che Crístona' daa wdixje'id' le' bi nakan dii wdiljlall' ben' yell-lioni. ¹² Ni to ben' yell-lío bi bli' bsedile'n nad', san kwin Jesucrístona' bli' bsedile'n nad'.

¹³ Ba benzkile' ka' bsa' cha' kana' ni noa' ley chento'na', neto' ben' Israel. Na' bsak'zi'a ben'ka' nak lall' na' Chioza' daa nonlilall'gake' Crístona', goklallaa yis lengakee. ¹⁴ Kana' ni noa' ley chento'na', wlejlaw' ladj ben'ka' nak ljwell' daa ben' to dii byen wnoa' yog' diika' bkwaanlen dii xozxto'nto'ka' neto'. ¹⁵ Per Chioza', kana' zi' galjtia', ba ngwee xnez xlatjin yiyesh'lallile' nad', na' wleje' nad' kwenche gon' xshine'na'. Na' ka bllin llana' nllie' bia', ¹⁶ bene' ka bembia' Xiine'na' kwenche lji'a xtilleena' lao ben'ka' bi nak ben' Israel. Na' ka gox wñab Chioza' nad', ni tlish' ben' yell-lío bi wñabid' wzajniile' nad' daa chiyal' gon'. ¹⁷ Ni bi biyaa Jerusalénna' lljawia' ben'ka' wlej Crístona' nakgake' postl che' kana' zi' kweje' nad'. San lii wyaatia' gana' mbani Arábiana', na'tech biyaa Damáscona' sto shii.

¹⁸ Na' ka wde shon' yiz, biyaa Jerusalénna' kwenche bembia' Pédrona', na' bigaanlenee shda' wbill. ¹⁹ Lekzka' ble'id' Jacóbona', beena' nak ben' bish' Xanchona', na' kochno postl yoblə ble'id'. ²⁰ Chioza' nezile' dga chzej' le' bi nakan de wxiye'.

²¹ Na'tech wyaa gana' mbani Síriana' na'ch Cilíciana'. ²² Per ben'ka' nonlilall' Crístona' Judéana' bin' gombia'gake' nad'. ²³ Zeelo ba bengakile' nagake': "Beena' bsak'zi'e cho' kana', ba chde' choe' dill' wen dill' kob che Crístona' daa goklallee yisol yinite' kana'."

²⁴ Na' be'la'ogake' Chioza' daa ba chyixji'a xtill' Crístona'.

2

¹ Wde shda' yiz biyaa Jerusalénna' sto shii, na' wza'len Bernabéna' nad' na' lekzka' bchi'a Títona', ² la' Chioza' bene' ka wnezid' nan chiyal' sha'. Na' jashaljen' ben'ka' chñabia' lao ben'ka' nonlilall' Crístona', na' to nad' to legake' bzajniid'gake' ka nak dill' wen dill' kob che Crístona' daa choe'len' ben'ka' bi nak ben' Israel. La' goklallaa inezgakile' bin chli' chsedid' kwenche bi inagake' daa ba ben' na' daa ni chon' nakan dii bibi zakii.

³ Na' ni Títona', beena' zyaalen', naktie' ben' griego, bi bengake' byen sho'e sen' daa

le circuncisión, ⁴ la'kzi wzoa ben' aga do lall'gake' lengake' neto' n̄x̄enilall'nto' Cristo Jesúza' san bidwia bidyizgake' shi ni chonnto' ka na ley daa bzej dii Moiséza'. La' goklall'gake' toshiizi idakw ichejnto' gonnto' doxen ka na leya'. ⁵ Na' neto', biga bennto' ka goklall'gake', daa cheeninto' in̄ezile bich chonan byen gonle daa na leya', san chiyal' gonle daa na dill' wen dill' kob che Crístona' daa nak dii li.

⁶ Ka nak ben'ka' ch̄n̄abia' lao ben'ka' non̄lilall' Crístona' yell Jerusalénna', la'kzi nakgake' ben' mbejlawin bitek zia' w̄neyi shi no nakgake', la' yog'cho toz ka zak'cho lao Chioza'. Bi wnagake' chonan byen yishaa diika' chli' chsedid' che Crístona'. ⁷ San gokbe'gakile' Chioza' ba bene' lall' na' wi'a dill' wen dill' kob che Crístona' lao ben'ka' bi nak ben' Israel, ka bene' che Pédrona' bene' lall' nee chixje'ile'n ben' Israelka'. ⁸ La' Chioza', beena' wleje' Pédrona' kwenche nake' postl che' na' chixje'ile' cho'a xtilleena' ben' Israelka', lekzen' wleje' nad' nak' postl che' kwenche chixje'id' cho'a xtilleena' ben'ka' bi nak ben' Israel.

⁹ Jacóbona', Pédrona', na'ch Juanna', ben'kin mbejlaogake' lao ben'ka' non̄lilall' Crístona', ka gokbe'gakile' chaklen Chioza' nad' kwenche chon' xshine'na', na' bli'gake'n chongake' nad' na' Bernabéna' txen daa bex'gake' na'nto'ka'. La' gokgakile' wenan gonnto' xshin Chioza' lao ben'ka' bi nak ben' Israel shlak chli' chsedgakile' ben' Israelka'. ¹⁰ Toz dii wnagake' neto' nan chiyal' yiyesh'lallinto' ben' yesh'ka', na' leyen'kzannan' ba yookzə yichj' gon' do yichj' do lallaa.

¹¹ Na' ka bid Pédrona' Antioquíana', bsheshlenee, la' daa bene' bi nakan wen. ¹² Dii nech weej wdaolene' ben'ka' bi nak ben' Israel, per ka bid ben'ka' bsel' Jacóbona', bsane' bich weej wdaolene' legake' daa bllebe' ben'ka' na chiyal' sho'cho sen daa le circuncisión na' goncho doxen ka na leya'. ¹³ Na' ben' Israelka' lle' na', ben'ka' ba non̄lilall' Crístona' goklebgakile' Pédrona' bich weej wdaolengake' ben'ka' bi nak ben' Israel. Na' ax̄t lenzə Bernabéna' gokleBILE' legake'. ¹⁴ Na' ka gokbe'id' bi chongake' ka na dill' wen dill' kob che Crístona', na' gosh' Pédrona' lao yog' ben'ka' lle' na': “Len naktio' ben' Israel, na' ba wlej yichjo' ley chechona' na' ba wzolozo' chono' txen ben'ka' bi nak ben' Israel. ¿Biche cheenzilo' gono' byen gon ben'ki daa yoolocho choncho, cho' nakcho ben' Israel?”

¹⁵ Cho' nakcho ben' Israel ka goljtecho chakicho bi nakcho ben' saaxya ka ben' yellka' sto, ¹⁶ per nezicho ni tlish' ben' bi nake' ben' li ben' shao' lao Chioza' daa chone' yog' daa na ley che'na'. San beena' gonlilallee Jesucristonan' yiyake' ben' li ben' shao' lawe'na'. Na' lekzka' cho' ba benlilall'cho Jesucristona' kwenche yiyakcho ben' li ben' shao' lao Chioza', na' aga daa goncho daa na leyan'. La' aga no yiyak ben' li ben' shao' lao Chioza' daa chone' daa na leya'.

¹⁷ Daa cheenicho gakcho ben' li ben' shao' lao Chioza' daa wit Crístona' ni checho, chakbe'icho lenkzcho cho' ben' Israelan nakcho ben' saaxya. Na' daa chakbe'icho nakcho ben' saaxya, ¿azejin Crístona' none' cho' ben' saaxya? ¿Bi nakan ka! ¹⁸ Shi ba wlej yichj' leya', na' sto shii yiyonza'n lez yiyonan nad' ben' wen, na' gap' dol' lao Chioza'. ¹⁹ Nad' nak' ka ben' ba wit lao leya' daa bich chon' ka nan, kwenche gak soa' gon' ka cheeni Chioza'. ²⁰ Nad' nak' ka ben' witlen Crístona' txen kana' wite' lee yag cruza'. Daan, bich chon' daa nazan cha' san Crístona' zoe' lo yel' mban cha'ni. Na' daa chonlilallaane', shlak mban' chon' daa cheeni Xiin Chioza', beena' gokile' nad' na' bzani kwine' wite' ni cha'. ²¹ Bi chzoa' ka'lə yel' chiyesh'lalli che Chioza' daa bselee Crístona'. La' shel' leya' bizoyin biyonan cho' ben' li ben' shao', bi benan byen wit Crístona' lee yag cruza', shel'ka'.

3

¹ Le' ben' Galacia, ben' bi chajni, ¿no wxiye'z le'? Kwasl̄ol̄ bli' bsedinto' le' nanto' Crístona' wxak'zi'e lee yag cruza' ni checho. ² Toz dii cheenid' in̄abid' le': ¿Ani che daa chonle daa na leyan' bidsoa' Espiritu che Chioza' loo yichjlall'do'lena'? ¿Anti daa wyajle'le che xtill' Crístona' daa bli' bsedid' len', lla? ³ ¿Ni lat' bi chajniile! Espiritu che Chioza' wyo'e loo yichjlall'do'lena' ka wzolo chonlilall'le Crístona'. Na' naa chakile yiyakle ben'

li ben' shao' daa chonle ka na leya'. ⁴ ¿Ana' bibi zjanayin yog' yel' zak'zi'ka' ba ben ble'ile daa benlilall'le Crístonan'? Non' lez bi gakan ka'z. ⁵ Chioza' bzoe' Espíritu che'na' loo yichjall'do'lena' na' bliile' le' yel' wak che'na', aga ni che daa chonle ka na leyan', san daa wyajle'le xtill' Crístonan'.

⁶ Ka ben dii Abrahama', wyajli'e che Chioza', na' daa wyajli'e, Chioza' wne' goke' ben' li ben' shao' lawe'na'. ⁷ Chiyal' inezile dga: ben'ka' chajle' che Chioza', legaken' nakgake' dowalj xiin dia che dii Abrahama'. ⁸ Cho'a Xtill' Chioza' nan bliie' bia' che ben'ka' bi nak ben' Israel lengake' yiyakgake' ben' li ben' shao' lawe'na' shi gonlilall'gake'ne'. Na' bi'e dill' wen dill' koba' kana' golle' dii Abrahama': "Ni cho' li' gak wen che yog' ben' lle' zbii zkaan yell-lioni." ⁹ Na' Chioza' chonleeye' ben'ka' chonlilall' le', ka bene' che dii Abrahama' daa benlilallee le'.

¹⁰ Ben'ka' non lez gakgake' ben' wen daa chongake' daa na leya', ba mbiayi'gake'. La' Cho'a Xtill' Chioza' nan: "Ba nakten kwiayi' beena' bi saki gone' yog'lo'lte daa nllia leya' bia'." ¹¹ Na' nakbia'cha aga no nak ben' li ben' shao' lao Chioza' daa chone' daa na leya'. Cho'a Xtill' Chioza' nan: "Beena' nak ben' li ben' shao' daa nonlilallee nad', beenan' ibane'." ¹² Na' aga na leya' chiyal' gonlilall'cho Chioza', san nan: "Nottezə ben' chon doxen ka na leya' si'e banez yel' mban che'na'."

¹³ Crístonan' wxak'zi'e lee yag cruza' ka to ben' mal ni checho kwenche bi kwiayi'cho daa bi choncho daa na leya'. La' Cho'a Xtill' Chioza' nan: "Ba mbiayi' beena' wwal'gake' to lo yag." ¹⁴ Gok ka' kwenche ka le' bi nakle ben' Israel lenle gonlilall'lene', na' Chioza' gone' wen chele ka bchebe' gone' che dii Abrahama'. Na' shi gonlilall'cho Cristo Jesúsza', Espíritu che Chioza' soalene' cho', kon ka bchebe' gone' checho.

¹⁵ Le' ben' bish' na' le' ben' zan', cheenid' wshaljlen' le' ka choncho cho' ben' yell-lío: Kat' to ben' gone' to yish dii zakii na' ba nakchan, aga no gak ina bibi zakaan ni bich gak wzanche' cho'a dill'ka' le'inna'. ¹⁶ Na' kan' nak daa bcheb Chioza' gone' che dii Abrahama' len xiin dia che'na'. Cho'a Xtill' Chioza' bi nan: "xiin dia che'ka'", san nan: "xiin dia che'na'". Bi choe'n dill' che ben'ka' shesh shan lo dia che'na', san che toz Crístonan', beena' golj lo dia che'nan' cho'en dill'. ¹⁷ Dga nia' naa zejín Chioza' bi bzoe' ka'lə daa bchebe' gone' che dii Abrahama' ka bi'e dii Moiséza' ley che'na' wde tap guiyoa shichoa yiz. La'kzi Chioza' bi'e leya', bi wlej yichje' daa bchebe' gone' che dii Abrahama'. ¹⁸ Na' shi chonan byen goncho daa na leya' goktgui ikaacho daa bcheb Chioza' gone', bich nakan daa bchebe' gone' cho' ka'zə, shi naa. Per Chioza' bchebe' wi'en dii Abrahama' ka'zə.

¹⁹ Shi ka' nakan, ¿berache be' Chioza' leya'? Bi'e leya' kwenche gakbe'i ben' bi chongake' ka cheenile'. Na' bliie' bia' gonan llin shlak bin' yid Crístonan', beena' bcheb Chioza' galjə lo dia che dii Abrahama'. Chioza' bchine' anjlka' be'gake' ley che'na' dii Moiséza', na' bchine' dii Moiséza' bzajniile' ben'ka' ka nan. ²⁰ Na' Chioza' bi byalljile' ben' yoblə wzajniile' dii Abrahama' daa bchebe' gone' che', san kwinkze' bzajniile'ne'.

²¹ ¿Achakile Chioza' bititjile' xtilleena' daa bchebe' gone' che dii Abrahama' ka bi'e ley che'na'? Bi nakan ka'. La' shel' leya' gak gonan yel' mban checho, ba biyakcho ben' li ben' shao' daa choncho ka nan, shel'ka'. ²² Cho'a Xtill' Chioza' nan yog'lo' ben' ndakw nchejgake' lao saaxyana', na' ben'ka' gonlilall' Jesucrístonan' gaki chegake' daa ba bcheb Chioza'.

²³ Kana' zi' yid beena' gonlilall'cho, na' ntakw nchej leya' neto' ben' Israel, axt ki Chioza' bliile' neto' Crístonan' yisle' ben'ka' gonlilall'gake'ne'. ²⁴ Na' leya' goklenan neto', gokan ka to ben' nak lall' nee chap chwie' xiin ben', axt ki bid Crístonan' benlilall'nto'ne' na' biyaknto' ben' li ben' shao' lao Chioza'. ²⁵ Na' naa daa ba bla' beena' nonlilall'cho, bich chnabia' leya' neto'.

²⁶ Daa ba nonlilall'le Cristo Jesúsza', ba nakle xiin Chioza'. ²⁷ Yog'lo'le, le' ba wchoale nisa' daa nonlilall'le Crístonan', ba billa'le na' ba nsa' chele ka nsa' che' daa naklene' toz. ²⁸ Na' cho' nakcho Crístonan' txen, laa ben' Israel, laa ben' bi nak ben' Israel, laa ben' ndoo lla yel chone' xshin ben', laa ben' chon xshinkze', laa noolə, laa ben' byo, ba nakcho toz.

29 Na' shi nakcho lall' na' Crístona', dii licha nakcho xiin dia che dii Abrahama', na' lencho chidol'cho daa bcheb Chioza' gone' che'.

4

1 Kin cheenid' inia' le': bi'na' gak lall' na'b' daa de che xabaa, shlak ni nesh'b' toz ka zaklebib' wen llinka' nap xabaa, la'kzi leban' gaki cheb' yog'lolte dii de che'. 2 Na' nzoa xabaa ben' chap chwiagake' le' na' chgoogake' xnezi yog'te dii gom' axt ki illinch llana' bllia xabaa bia' bich soab' xni'a ben'ka'. 3 Ka'kzan gok checho kana' bin' shajniicho, na' wnocho diika' na ben' yell-lioki chonan byen goncho. 4 Na' ka bllin lla, Chioza' bselee Xiine'na', wxan to nool le', na' wzoe' xni'a ley che dii Moiséza' 5 kwenche yisle' notteza ben' zoa xni'a leya' na' yiyake' xiin Chioza'. 6 Na' daa ba nakcho xiine', bselee Espiritu che Xiine' Jesucristona' loo yichjall'do'choni, na' Espirituna' chone' kwenche che'cho Chioza': "Xadawaa." 7 Na' naa, bich nakle ka ben' ndoo lla yel chone' xshin ben', san ba nakle xiin Chioza'. Na' daa ba nakle xiine', ba nonle lez ikaale daa chidol' ben'ka' nak xiine'.

8 Kana' bin' gombia'le Chioza', na' wzoale xni'a diika' ben'li'le, diika' bi nak dowalj chios. 9 Per naa ba nombia'le Chioza', wa wench inacho ba nombia' Chioza' le', ¿berache sto shii wzoazle xtilii diika' na ben' yell-lioki chonan byen gonle, diika' bibi zakii? ¿Acheenile yizoale xni'a diika' sto shiin? 10 Na' lenzle chaple balaan llaka', beo'ka', na' kat' chibii lla yelka', na'ch yizka', diika' chakile nakgakan dii lialo. 11 Le chxollid' shi gaktadz xshin Chioza' daa ba ben' ladjlana'.

12 Le' ben' bish'dawaa na' le' ben' zandawaa, chat'yoid' le' gonle ka chon', la' nad' ba ben' kwina' ka le' bi nole leya' na' bich zoa' xni'ayinna'. Aga chllaan nia' le' ka', la' bigan' bi gonile nad'. 13 Le'kza' nezile ni che to yillwe' dii bex' nad' bgaan' lall-lena', na' kan' gok be'len' le' dill' wen dill' kob che Crístona' dii nech. 14 Na' bi benile nad' nakzi ni bi bzoale nad' ka'lə ni che yillwe'na' gok', la'kzi gokan to dii zed chele. San bleble nad' ka to anjl che Chioza' wa ka kwina' Cristo Jesúsza'. 15 ¿Garan' yel' chiba chizaki chelena' naple kana' wzoalen' le'? Nezi' shel' wxe'ile kwej jalaolena' gonlen nad' kana'. 16 Na' naa, ¿achllaale nad' daa ba wnia' le' dill' liki?

17 Ben'ka' bidli' bidsedi le', aga do lall'gaken' bli' bsedgakile' le'. San daa cheenzgakile' yilaale neton' na' gonle legake' txen. 18 Nakkzan wen toshiizi soa ben' wli' wsedile' le' kon shi gongake'n do yichj do lall'gake', kwenche aga to kat' yidwiaz' le' wli' wsedid' le'. 19 Le' xiindawaa, sto shii chak cha' ka chak che noola' chllagloe' sane' bi'do' che'na' daa chi' yichjlikz' gake' ka chazlall' Crístona'. 20 Shel' wxe'id' naate soalen' le' we'len' le' dill' goll-lall', la' bi chajniid' biche chonzle ka'.

21 Ka le' cheenile gonle daa na leya', li inashki nad': ¿abin' yenile ka na leya'? 22 Cho'en dill' wzoa chop xiin dii Abrahama': tob' gok xiin noola' wxi'gake' bene' llin che'ka', na' stob' gok xiin beena' gok nool che' dowalj, beena' biga gok wen llin che ben'. 23 Xiin nool wen llin che'ka' wzoab' daa wzoalen' l'jwellgake'. San noola', beena' biga gok wen llin che ben', wzoa xiine' daa bcheb Chioza' wi'e to bi' chegake'. 24 Daa gok che noolka' chop, chzajniin cho' che chop daa be' Chioza' ben' Israelka'. Dii Agara' zakleBILE' leya' daa be' Chioza' lo yaa Sinaína'. Na' len' goke' xna' beena' wdoo lla yel bene' xshin ben'. 25 Na' zakleBILE' yaa Sinaína' daa zoa Arábiana', na' nake' ka yell Jerusalénna' daa zoa naa. La' yog' ben'ka' chesh chalj yella' nakgake' ka ben' ndoo lla yel chone' xshin ben' daa zoagake' chongake' daa na leya'. 26 San cho' lljazocho Jerusalénna' daa zoa yabana' gana' zoa Chioza', bi nakcho ka ben' ndoo lla yel chone' xshin ben', la' bi zoacho xni'a leya'. 27 La' Cho'a Xtill' Chioza' nan:

Li' nool will, ben' kono xiinin zoa, biba bizaki.

Li' bin' tio' lo yel' zak'zi' che yel' san bi'do', besyaa yel' chiba chizaki cho'na'.

La' noola', beena' wchoonlall' ben' che'na'ne',

soach xiine' aga ka beena' zoalen ben' che'na'.

²⁸ Na' le' beṅ' bish'dawaa na' le' beṅ' zandawaa, nakle ka dii Isaaca', beena' bcheb Chioza' wi'e dii Abrahama'. ²⁹ Na' ka gok kana', bi'na' golj daa wzoalen ljwellgake', biya dii benib' bi'na' golj kon yel' wak che Espíritu che Chioza', kakzan chak naa. ³⁰ Na' Cho'a Xtill' Chioza' nan: "Bilag noola' chon xshino'na' len xiṅe'na'. La' bi lem' ikaab' daa chidol' xiṅ beena' biga gok wen llin che beṅ'." ³¹ Na' naa, le' beṅ' bish'dawaa na' le' beṅ' zandawaa, aga nakchcho ka xiṅ beena' wdoos lla yel' bene' xshin beṅ', san nakcho ka xiṅ beena' biga gok wen llin che beṅ'.

5

¹ Crístona' ba bisell bilée cho'. Na' chiyal' soaḗheḗhle kwenḗhe bich soale xṅi'a daa wtakw wḗhejan le' dii yoblə.

² Nad' Pablo chṅabid' le' wzenagle dga nia' le'. Shi le' we'le latj koogake' le' seṅ daa le circuncisión, bibi zjanayin nale nonlilall'le Crístona', shi naa. ³ Sto shii nia' le', nottezə beṅ' wi'e latj koogake'ne' seṅ daa le circuncisión chonan byen gone' yog'lol' daa na leya'. ⁴ Le' chonle ka na leya' daa chakile yiyonan le' beṅ' li beṅ' shao', Crístonan' ba bilaala'ole daa chakile ka', na' ba bzoale ka'lə yel' goklenna' ben Chioza' chele. ⁵ San neto', daa zoalen Espíritu che Chioza' neto', nonnto' lez yiyaknto' beṅ' li beṅ' shao' lawe'na' daa nonlilall'nto' Crístona'. ⁶ Na' shi nonlilall'cho Cristo Jesúsza', aga bi zakii lawe'na' sho'cho seṅ daa le circuncisión wa bi sho'chon. Daa zakii lawe'na' gonlilall'chone' na' gakicho beṅ'.

⁷ Zejkzle wen lo nez lina' daa ba yoole, shel'ka'. ¿No benllej benganzi le' kwenḗhe bich chzenagle dill' lina'? ⁸ Aga nak dga che Chios, beena' gox wṅab le'. ⁹ Dezə dill' nan "lat'zə levadúrana' chisgolan doxen kwa che yetxtila'". ¹⁰ Nḗenilallaa Xanchona' gaklene' le' kwenḗhe bi shajle'le che daa bi nak dill' li. Na' Chioza' wsak'zi'e nottezə beena' gonllej gonganile' le'.

¹¹ Ka nak nad', le' beṅ' bish'dawaa na' le' beṅ' zandawaa, shel' ni nia' chiyal' sho' beṅ' seṅ daa le circuncisión, aga wsak'zi' beṅ' Israelka' nad', shel'ka'. La' shel' ni chon' byen gongake'n, bi gakzbangakile' xtill' Crístona' daa nia' wite' lee yag cruza' ni checho kwenḗhe gakcho beṅ' wen lao Chioza', shel'ka'. ¹² Ka nak beṅ'ka' chdazə chongake' byen sho' beṅ' seṅ daa le circuncisión, iwentelə shel' wḗhogtega kwingake' doloḗte gana' chgwee seṅna'!

¹³ Le' beṅ' bish'dawaa na' le' beṅ' zandawaa, Chioza' gox wṅabe' le' kwenḗhe yiyell yila'le lao dii mala'. Na' aga ni che biyell bila'le na' gonzle kon daa nazə beli chen chelena'. San li gaklen ljwell-le na' li gaki ljwell-le ganga. ¹⁴ La' doxen daa na leyan' choncho shi choncho daa bliia Chioza' bia' daa na: "Chiyal' gakilo' bish' ljwello'na' ka chaki kwino'."

¹⁵ Li wsak' bi til' wsheshle kwenḗhe ki wzoazi'yaa ljwell-le na' wliayi' ljwell-le.

¹⁶ Ki nia' le' naa: li gon ka cheeni Espíritu che Chioza', na' bich gonle daa na beli chen chelena'. ¹⁷ La' daa chzelall' beli chenna' bi nllaguin Espíritu che Chioza', na' daa cheeni Espíritu che Chioza' bi nllaguin daa chzelall' beli chenna'. Na' ni to diiki bi nllagui ljwellin, na' daan bi choe'gakan latj gonle daa chaklall'le. ¹⁸ Per shi chzenagcho daa na Espíritu che Chioza', bich zoacho xṅi'a leya'.

¹⁹ Nakbia'cha diikin chon beṅ'ka' chzenaggake' daa che' beli chen che'ka': chdalen-gake' xiṅ xool beṅ' wa xiṅ xyo beṅ', chongake' daa nak dii zban, chibagakile' gongake' yog' daa na beli chen che'ka', ²⁰ choe'la'ogake' yaj yag, chlangake' yel' willa'na', chakzban-gakile' beṅ', chakdil-lengake' beṅ', chakxe'gakile' beṅ', chllaa chlogkake', chibagakile' to lezgake' gak wen chegake', chibagakile' kwegkake' dil' chix' na' gonte cheləgake'. ²¹ Nakgake' beṅ' xe', nakgake' wen xya, nakgake' beṅ' weezo, chajgake' ga chal' lni na' chzoll chnitgakile' na' chjeej chjtaogake' ka nla' ka nte, na' chongake' bichlə dii bi yej'ni'a. Na' nia' le' sto shii, ka dillaa ba be'len' le', beṅ'ka' chon ka' aga wak yillingake' gana' chṅabia' Chioza'.

²² San beŋ'ka' chzenaggake' daa na Espíritu che Chioza' chakgakile' bish' ljwellgake', chiba chizak'gakile', zoagake' mbalaz, napgake' yel' chxenlall', chle'shi'gakile' beŋ', chongake' wen che beŋ', chongake' daa chchebgake', ²³ nakgake' beŋ' gaxjlall', na' chñabia' kwingake'. Na' beŋ'ka' chon diiki aga bi ley de dii inan bi chongake' wen. ²⁴ Na' beŋ'ka' ba nak lall' na' Cristo Jesúza' bich choe'gake' latj inabia' beli chenna' legake' daa nakgake' ka beŋ' ba wit lawi daa chzelall' beli chen che'ka'. ²⁵ Shi ba yoo Espíritu che Chioza' loo yichjlall'do'chona', chiyal' we'cho latj inabi'e cho'.

²⁶ Bi chiyal' gakcho beŋ' cha'sib, ni bi chiyal' wshagdizə ljwellcho, ni bi gakxe'i ljwellcho.

6

¹ Le' beŋ' bish'dawaa na' le' beŋ' zandawaa, shi inezile to beena' nakle txen chone' dii mala', ka le' chzenagle che Espíritu che Chioza' chiyal' gaklenlene' kwenche yigooshlilallee, na' bi gonilene' zi'bia'. Na' li se wneyi che kwinle kwenche ki lenle yixople lao dii mala'. ² Li gaklen ljwell-le bittezə dii chak chele, la' kan' cheeni Crístona' gonle.

³ Shi zoa beŋ' chon kwine' beŋ' choo beŋ' xen, chziye'z kwinen'. ⁴ To tole chiyal' yiya yiyiljle nak nsa' chele. Na' shi ba chizoile chonle dii wenna', li yiba yizaki, na' bi inazle chonchle ka beŋ' yoblə. ⁵ La' to tocho chiyal' sho' yichjcho goncho daa naki checho.

⁶ Beŋ'ka' chzenag cho'a xtill' Chioza' chiyal' we'gake' bi de chegake' beena' chli' chsedi legake'.

⁷ Bi gakzile wak siye'le Chioza'. Daa gaz kwekle lekzannan' yizi' yilaple. ⁸ Beena' choe' cho'a xbayi beli chenna', kwiayee daa chzenague' cheyin. San beena' chon ka cheeni Espíritu che Chioza', yizi'e banez yel' mban zejli kan' daa chzenague' che'. ⁹ Bi chiyal' lljxakicho goncho dii wenna', la' wllin lla yizi'chon banez kon shi bi yidin'jicho. ¹⁰ Na' daan, kat' de xlatjin, chiyal' gonicho wen yog' beŋ', na' lliarote beŋ'ka' nakcho toz nonlilall'cho Crístona'.

¹¹ Kwin' chisyoll' chzej' yishi.* Li wwiakachi ka nak letr yel' cha'ki. ¹² Beŋ'ka' chonzə byen sho'le seŋ' daa le circuncióŋ, chongake'n kwenchzə kono bi ina chegake', na' kono wsak'zi' legake' daa choe'gake' xtill' Crístona', beena' wit lee yag cruza'. ¹³ La' ni beŋ'ka' yoo senna' bi chizogakile' gongake' doxen ka na leya'. San cheenzgakile' sho'le seŋ'na' kwenche wshalj wshongake' ba bengake' gan yoolen. ¹⁴ Ka nak nad', biga cheenid' wshalj wshon' che kwin', san wshalj wshon' che daa ben Xancho Jesucrístona'. La' daa wite' lee yag cruza' bich bi wneyi zia' shi bi ina beŋ' cha', na' ka'kzə beŋ' yell-lioka' bich ndegake' nad' kwent. ¹⁵ Bibi zjanayin sho'cho seŋ'na' wa bi sho'chon, san daa ba bikob Chioza' yichjlall'do'chonon', lennan' zakii. ¹⁶ Yiyesh'lall'shgayi Chioza' yog'lol' beŋ'ka' chon ka ba wnia', na' gone' ka soagake' mbalaz, la' legaken' nakgake' dowalj beŋ' Israel, beŋ'ka' nak yell che'.

¹⁷ Na' naa, bich cheenid' no kwekw nad' dii zed, la' kwerp cha'ni nsa'n yill che yog' diika' ba wxak'zi'a daa chon xshin Xancho Jesúza'.

¹⁸ Le' beŋ' bish'dawaa na' le' beŋ' zandawaa, Xancho Jesucrístona' soalenshgue' yog'lol'tele na' gakenshgue' le'. Kan' gakan.

* **6:11** Kwin' chisyoll' chzej' yishi: Páblona' bchine' beŋ' bzeje' dillaa bi'e, per kwine' bzeje' to chop cho'a dill' gana' chiyoll' yisha' kwenche gokbe'gakile' len' bseleen.

Kart daa bzej Páblona' na' bseleen lao ben'ka' nonlilall' Jesucrístona' yell Éfesona'

¹ Nad' Pablo nak' postl che Jesucrístona' kon ka chaklall' Chioza'. Chwap' le' chiox, le' lle'le yell Éfesona', na' nakle lall' na' Chioza' daa nakle Cristo Jesúsza' toz, beena' chonlilall'le. ² Chñabid' Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

³ Chiyal' we'la'ocho beena' nak Chios che Xancho Jesucrístona', beena' nak Xe'. La' ba benleeye' cho' na' ba naki checho yog' dii wenna' de yabana', daa nakcho Crístona' toz. ⁴ Chioza' wleje' cho' gakcho Crístona' toz kana' zi' xe silte yell-lioni kwenche gakcho ben' nxi nyech na' bibi xtol'cho gat' lawe'na'. Daa le chakile' cho', ⁵ wlo'e xnezin kana' zi' xe silte yell-lioni gakcho xiine' kon ka wyazlallee gone' checho, daan bselee Jesucrístona' ni checho. ⁶ Na' daan, toshiizi we'la'ocho Chioza' daa bene' to dii wen inleeb checho daa ba nakcho Xiine'na' toz, beena' le chakile'. ⁷ Ba nakchone' toz daa wdixje' xtol'choka' kana' blalj xchene'na' ni checho kwenche Chioza' bizi'xene' saaxya chechoka' daa naklikze' ben' wen inleeb. ⁸ Na' dii xen wal chaklen Chioza' cho' daa none' cho' yel' sin'na' len yel' chajniina'. ⁹ Na' ba bliile' cho' daa goklallee gone' daa kono wnezi kani'yi, daa bllie' bia' gon Crístona'. ¹⁰ Na' bllie' bia' illin lla gak ka wyazlallee na'ch yiyone' toz yog'lol dii bxe bsile', ka diika' lle' yabana' na' ka diika' lle' lo yell-lioni, kwenche Crístona' inabi'e lao yog'lolan.

¹¹ Chios, beena' chon yog'lol daa chaklallee kon ka chgwee xnezin gak, wleje' cho' kana' zi' soatecho kwenche gaki checho dii wenna' wi'e ben'ka' nak Crístona' toz. ¹² Na' goklallee zigaate neto' naknto' ben' Israel wxenilall'nto' Crístona' kwenche shajlawee daa nake' ben' choo ben' xen. ¹³ Na' lekzka' le', wyajle'le che Crístona' na' bénlene' txen ka benile dill' wen dill' kob che'na' daa nak dii licha daa choe' dill' yisle' cho' kwenche bi kwiayi'cho. Na' ka wyajle'le, Chioza' bli'e ba nakle lall' nee daa bzoe' Espíritu Sánto che'na' loo yichjlall'do'lena' kon ka bchebe' gone'. Na' daa bene' ka', wak inacho wlo'e le' to sen daa chli'n nakle lall' nee. ¹⁴ Na' daa zoa Espíritu che'na' loo yichjlall'do'chona', nezicho gak lo na'cho yog' diika' nchebe' gone' cho' kat' illin lla yizi' yikee cho' nakcho lall' nee, kwenche koochone' balaan daa nake' ben' choo ben' xen.

¹⁵ Na' daan, ka wnezid' nonlilall'le Xancho Jesúsza' na' le chakile' yog' ben'ka' nak lall' na' Chioza', ¹⁶ bi chsanlallaa wi'a Chioza' yel' choxken ni chele na' chñab' gaklene' le' kat' choe'lwillee. ¹⁷ Choe'lwil' Chios che Xancho Jesucrístona', beena' nak Xacho, beena' liizelozi chidolee sho'e balaan xen, chñabidee gon Espíritu che'na' le' yel' sin' che'na' na' wzajniile' le' kwenche gombia'chlene'. ¹⁸ Na' chñabidee wzoe' beeni' che'na' loo yichjlall'do'lena' kwenche inezile bin nonle lez daa ba gox wñabe' le', na' ka mbalaz inleeb nak daa wi'e ben'ka' ba nak lall' nee, ¹⁹ na' kwenche gakbe'ile ka nak yel' wak choo yel' xen che'na' daa bi chiyoll chido daa chaklenan cho' nonlilall'chone'. Lennan' yel' wak choo yel' wak xen ²⁰ daa bli'e kana' bisbane' Crístona' ladj ben' wetka' na' wlekwe'ne' shlaa de shli che'na' yabana', ²¹ gana' nzoe'ne' chñabia'che' aga ka yog'lol anjlka' na' dii xiw'ka' nap yel' wak na' yel' wñabia'. Na' zeyi che' kochno zoa, ni kochno soa, ben' gakch ben' zak'chi ka le'. ²² Na' bzoe' xni'a Crístona' yog'lolte dii de, na' nzoe'ne' chñabi'e lao yog'lolcho cho' nakchone' toz, ka chon yichjchona' chñabi'an doxen kwerp chechona'. ²³ La' cho' nakchone' toz, zaklebicho kwerp che'na'. Na' toshiizi zoalene' cho' na' chñabi'e cho', la' len' chñabi'e yog'lolte dii de doxen yell-lioni na' yabana'.

2

1 Kana' bin' gonlilall'le Crístona', gokle ka ben' net lao Chioza' daa wzoale bxinj blenle. 2 Na' wdale benle kon ka nazan chele, ka chon nottezə ben' yell-lío, ben' bi nombi'e Chioza'. Na' bzenagle cheyi daa chnabia' dii xiw'ka' ze lo llazə, daa chnabia' yichjlall'do' ben'ka' bi chzenag che Chioza'. 3 Ka'kzan ben yog'lolcho kana', bencho kon daa nazan checho, be'cho cho'a xbayi beli chen chechoni na' yog'lol diika' wza'lall' loo yichjlall'do'choni. Na' daa bencho ka', chidol'cho yel' zak'zi' che Chioza' kon ka chidol' gak che ben'ka' bi chzenag che'. 4 Per daa nak Chioza' ben' lall'do' xen inleeb na' le chakile' cho', 5 bene' yel' mban checho zejli kani ka benlilall'cho Crístona', beena' biban ladj ben' wetka', la'kzi gokcho ka ben' net daa choncho saaxyaka'. Na' daa nak Chioza' ben' wen inleeban, bisle' cho' kwenche bi kwiayi'cho. 6 Na' daa nakcho Cristo Jesúza' toz, ka bisban Chioza'ne' ladj ben' wetka', lenkzchon bisbane' daa bene' cho' to yel' mban kob. Na' ba nakten ljanabia'lenchone' yabana'. 7 Chioza' bene' ka' kwenche llaka' zi' za' wli'lawin nake' ben' wen inleeb daa bene' to yel' goklen xen checho daa bselee Crístona' ni checho. 8 La' yel' ben' wen che'nan' bisle' cho' kwenche bi kwiayi'cho daa ba nonlilall'cho Crístona'. Aga inacho daa nakcho ben' wenan bisle' cho', san nakan to goklen daa bene' checho ka'zə. 9 Na' bi gak gakzcho cha'sib, la' aga daa choncho dii wennan' bisle' cho'. 10 La' Chioza' bikobe' yel' mban chechona' ka bene' cho' lall' na' Crístona' kwenche soacho goncho dii wenna' ba wlo'e xnezin goncho.

11 Ka le' bi nakle ben' Israel, ben' Israelka' nsi'gake' le' Ben' bi yoo sen daa le circuncisión, na' legake' nsi' kwingake' Ben' yoo sen daa le circuncisión. Li ljadini ka gokle kana'. 12 La' kana' bin' gombia'le Crístona', gokle ka ben' zit' laonto'na', neto' wlej Chioza' kwenche naknto' yell che', na' Chioza' aga bchebe' gaklene' le' ka bchebe' gaklene' neto' ben' Israel. Na' wzoale yell-lioni bi bembia'le Chioza' ni bi benle lez gak wen chele. 13 Kana', gokle ka ben' zit' laonto'na'. San naa, ba nakcho toz daa nonlilall'le Cristo Jesúza', beena' blalj xchene'na' wite' ni checho. 14 Crístona' bene' ka bizoalen ljwellcho wen. Kana', bi ble'shii ljwellcho, san naa, ba biyone' cho' toz daa bsol bnite' daa benan ka bwiyi ljwellcho. 15 Daa bzani kwin Crístona' wite' ni checho, bchogue' daa wna ley chento'na' chiyal' gonnto'. Bene' ka' kwenche neto' ben' Israel na' le' bi nakle ben' wlall' chento' biyakcho toz lawe'na'. Na' ba bizoe' cho' wen. 16 Na' daa wite' ni checho lee yag cruzá', bizoe' cho' wen kon Chioza', ka le' na' ka neto', na' biyakcho toz na' bich chakzbani ljwellcho.

17 Crístona' bidtixji'e dill' wen dill' koba' daa na yog'cho wak soalencho Chioza' wen, ka le' nakle ben' zit' na' ka neto' naknto' ben' yell che'. 18 La' daa nonlilall'cho Crístona', ka le' na' ka neto', wak ibig'cho lao Xacho Chioza' daa ba bene' cho' Espíritu che'na'. 19 Na' le' bi nakle ben' Israel bich nakle ka ben' zit', san ba lenle ben'ka' nak yell che Chioza', na' Chioza' ba none' le' ka ben' loo yoo. 20 Le' nakle ka to yoo, na' neto' postl na' ben'ka' chyixjee daa che' Chioza' legake' naknto' ka len yoona', na' kwin Jesucrístona' nake' ben' llialaote ka yaja' daa mbejlawi, yaja' daa ba nchejcha yoona'. 21 Na' Jesucrístona' chone' kwenche yog'cho cho' nakchone' txen gakcho toz na' gakcho ka to yoodo' gana' zoa Chioza'. 22 Na' lekzka' Jesucrístona' chone' kwenche yog'cho, ka neto' na' ka le', gakcho ka to yoo gana' zoa Chioza' daa zoalen Espíritu che'na' cho'.

3

1 Nad' Pablo dia' lillyani daa chyixje'id' le' xtill' Crístona', le' bi nakle ben' Israel. 2 Ba nezkzile' dii wenna' ben Chioza' daa bene' lall' na' wi'a xtilleena' laolena'. 3 Ba bzajniile' nad' daa kono wnezi, kon ka ba bzej' le' to chop cho'a. 4 Na' kat' wlable yishi, gakbe'ile ba bzajniile' nad' daa kono wnezi che Crístona'. 5 Diaka' ba wde bi wnezgakile' dga ba bzajni Espíritu che'na' neto' postl che' len ben'ka' wdixjee daa goll Chioza' legake'. 6 Na' dga kono wnezi nan: yog'cho cho' chajle'cho dill' wen dill' kob che Cristo Jesúza', ka le' bi nakle ben'

Israel na' ka neto' ben' Israel, nakcho toz na' txen ikaacho dii wenna' bcheb Chioza' gone' checho.

⁷ Yel' ben' wen che Chiozan' wleje' nad' na' bzoe' nad' gon xshine'na', na' chaklentie' nad' kon yel' wak che'na' kwenche choe'len' ben' dill' wen dill' kob che Crístona'. ⁸ Nad' chakid' shlas aga no nak' lao yog' ben' nak lall' na' Chioza'. Per la'kzi aga bi zakaa, Chioza' wleje' nad' kwenche we'len' ben'ka' bi nak ben' Israel dill' wen dill' kob che Crístona' daa le zak'chga na' bich bi de dii wsaklebichon. ⁹ Chioza', beena' bxe bsil yog'lolte dii de, kani'yi wlo'e xnezin gone' to dii gone', na' ni to kono golle' ka nak daa gone'. Na' naa ba bene'n lall' na' wzajniida'n ben' ¹⁰ kwenche ni checho, cho' nakcho toz nonlilall'cho Crístona', gakbe'i anjlka' lle' yabana' na' dii xiw'ka' doxen ka nak yel' sin' che Chioza'. ¹¹ Na' daa bselee Xancho Cristo Jesús'a, ba bene' ka wlo'e xnezin gone' kana' zi' wxe wsiltie' yell-lioni. ¹² Na' daa nonlilall'cho Crístona' na' nakchone' txen, de latj checho we'llwillcho Xacho Chioza' na' nezicho wzenague' checho. ¹³ Na' nia' le', li gon goklen bi yidinjile ni che dga chllagloa' daa be'len' le' xtill' Crístona', san li yibayi daa chzak'zi'a ni chele.

¹⁴ Daan, chchek' xib' choe'llwill' Xacho Chioza', beena' nak Xa Xancho Jesucrístona', ¹⁵ beena' ben kwenche yog'cho cho' nakcho xiine' nakcho toz, ka ben' lle' yell-lioni ka ben' lle' yabana'. ¹⁶ Na' daa nape' doxen yel' waka', chñabidee kwenche Espíritu che'na', beena' yoo loo yichjlall'do'lena', gone' ka gakchachle ¹⁷ na' soachle gonlilall'le Crístona' kwenche toshiizi soalene' le', na' yel' chakina' wde loyin lo yel' mban chelena' kwenche soatezi soale gakilene' na' gaki ljwell-le, ¹⁸ na' gakbe'ile, le' na' yog' ben'ka' nak lall' na' Crístona', ka chakchgaile' cho', na' biga yiyoll yido yel' chaki che'na'. ¹⁹ Cheenid' gombia'le yel' chaki che'na' daa nak liizelozí dii xen inleeb, daa kono illin shajnií kwaslól, kwenche yiyoll yido gakte doxen ka cheeni Chioza'.

²⁰ Chioza' chidolee sho'e balaan daa chak chone' dii xench aga ka daa chñabichone' wa daa chakicho gone' checho ni che yel' wak che'na' daa zoalen cho'. ²¹ Cho' nonli'lall'cho Cristo Jesús'a' chiyal' koocho Chioza' balaan toshiizi na' zejli kani ni cheyi daa bselee Crístona' ni checho. Kan' nakan.

4

¹ Nad' dia' lillyani daa chyixji'a xtill' Xancho Jesucrístona'. Na' chat'yoid' le' soale gonle wen kon ka chiyal' goncho cho' ba gox wñab Chioza'. ² Li gak ben' gaxjlall', li ile'shii ben', li gap yel' chxenlall' chele ganga na' li gaki ljwell-le. ³ Espíritu Sántona' bene' ka yog'cho biyakcho toz, na' li gon byen soalen ljwell-le wen kwenche toshiizi gakcho toz. ⁴ Yog'cho, cho' nonlilall'cho Crístona', zaklebicho to kwerp daa nakcho toz; na' toz Espíritu yoo loo yichjlall'do'chona'; na' toz ka noncho lez gon Chioza' checho daa ba gox wñabe' cho'. ⁵ Tozə beena' nak Xancho, na' toze'n nonlilall'cho, na' toz ka zeji daa chchoacho nisa'. ⁶ Tozə Chioza' zoa, beena' nak Xa yog'lolcho. Na' len' chñabi'e lao yog'lolcho; na' chchine' yog'cho kwenche chak daa cheenile' gak, na' zoalene' yog'cho.

⁷ Per to tocho non Crístona' dii gak goncho kon ka goklallee. ⁸ Daan, cho'a xtill' Chioza' nan:

Ka biyepe' yabana', zinchi'e pres che'ka',
na' bi'e dii wen che'na' ben' yell-lioki.

⁹ Na' ka nak daa nan “biyepe’”, zejin zigaate betje' bide' yell-lioni. ¹⁰ Na' beena' bid yell-lioni, lekzen' biyepe' yabana' gana' zoe' chñabi'e lao yog'lolte dii de. ¹¹ Na' len' bzoe' ben' nak postl che', na' ben' chyixjee daa chi'ene', na' ben' chyixjee dill' wen dill' kob che'na', na' ben' chap chwie' ben'ka' ba nonlilall' le', na' ben' chli' chsedi cho'a xtilleena', ¹² kwenche ben'ka' nak lall' nee gak gongake' xshine'na', na' yiyoll yido gakcha yog' ben'ka' nak Crístona' txen, ¹³ axt ki yog'cho gakcho toz gonlilall'cho Xiin Chioza' na' gombia'chchone'. Na' gakyen'cho ka chiyal' gakcho, na' yiyoll yido gakcho dowalj ben' wen doxen ka nak Crístona'. ¹⁴ Na' bich gakzcho ka bi'do' na' shajle'tezcho bittezə daa

chyiljall' ben', na' ni bi gak gon ben' wxiye'ka' gan siye'gake' cho' kwenche shajle'cho daa bi nak dii li. ¹⁵ San shajlencho dill' li che Chioza' na' gapcho yel' chaki che'na', na' ka' zej gakchcho ben' wen ka nak Crístona', beena' chñabi'e cho', ka chon yichjchoni chñabia'n kwerp chechoni. ¹⁶ Ka nak kwerp chechoni, tkwen tkwen wejan nox' ljwellin na' chaklen ljwellin bittezə llin gonan. Ka'kzan cho' nakcho Crístona' txen nakcho ka toz kwerp kwenche to tocho goncho daa none' cho', na' yog'cho zejch chakchacho na' zejch chakchi ljwellcho.

¹⁷ Nia' le' dga kon yel' wñabia' che Xancho Crístona': bich soale gonle ka chon ben'ka' bi chonlilall'gake' Chioza', ben'ka' kon chyiljall'gake' daa bibi zakii, ¹⁸ na' nchol nñiti yichjlall'do'eka' na' bi ntegakile', na' bi napgake' yel' mban daa non Chioza' cho', ni bi nombia'gake' daa nak che Chioza', daa nakgake' ben' lall'do' wal. ¹⁹ Bichkzə bi yel' zto' nombia'gake', na' biga chjshyagakile' chongake' yog' diika' nak zban. ²⁰ San le', ñezile aga kan' cheeni Crístona' goncho, ²¹ shi dii likzə ba benile xtill' Jesúsza' na' ba nzedile soale gonle ka cheenile' kon ka nak dii li che'na'. ²² Na' chiyal' wsanle bich gonle dii malka' benle, na' kwej yichjle yel' mban gol chelena', la' daa wxiye' beli chenna' len', bñinj bñenan le'. ²³ Chiyal' yikob yichjlall'do'leka' na' bich bi dii mal sa'lall'le. ²⁴ Na' chiyal' yikob yel' mban chelena' kwenche yiyakle dowlj ben' li ben' shao' lega ben' nak xiin Chios.

²⁵ Daan, bich chiyal' siye'le, san to tole chiyal' we'len ljwell-le dill' li, la' yog'cho ba nakcho toz, ka kwerp chechona' nakan toz, la'kzi zan diika' ndil nllagan.

²⁶ Kat' illaale, bi wxinj wlenle ni bi koolall'zle, ²⁷ kwenche bi we'le latj che dii xiwaa.

²⁸ Na' beena' chzi' chban, bich gone' ka', san wchine' ni'a neena' gone' llin kwenche gape' dii wi'e ben'ka' bibi de cheyin.

²⁹ Na' bi chiyal' we'le dill' zban, san chiyal' we'le dill' wen dill' shao' dii gonan ka soatip soashoshch ben'ka' chzenag bin nale na' gaklenan legake'. ³⁰ Na' bi gonle ka soayesh' Espíritu Santo che Chioza', beena' ba nzoe' loo yichjlall'do'chona' kwenche chakbe'icho ba nakcho lall' na' Chioza' shlak illin lla yikee cho', cho' ba biya'o bizi'e.

³¹ Chiyal' kwej yichjle yog'lo' dii malki: bich koolall'le, bich illaa ilokle, bi koole ben' bel ban, bibi gon inale che ben' na' ni sto dii malka' bich gonle. ³² Li gak ben' wen ben' shao' na' ben' chiyesh'lalli bish' ljwellin. Chiyal' yizi'xen che ljwell-le, ka ben Chioza' bizi'xene' chele daa nonlilall'le Crístona'.

5

¹ Daa ba nakle xiin Chios na' chakile' le', li wsed gonle wen ka chone'. ² Chiyal' soale gakile ben', ka chaki Crístona' cho'. Daa chakile' cho', bzani kwine' wite' ni checho, na' bibayi Chioza' daa bene' ka', ka bibaile' shii xla' bayix'do'ka' bzeygake' lawe'na' kana'.

³ Bi chiyal' selall'le inelen ljwell-le wa gonle bichlə dii zban, ni bi selall'le gat' kwe'ile dii xen wal. Ni to diiki bi chiyal' gak ladjlena' daa ba nakle lall' na' Chioza'. ⁴ Bi we'le dill' zban, ni dill' dii bi zakii ni dill' dii bi yejni'alallii, la' aga dill' ka diikin chiyal' we'le, san chiyal' we'le Chioza' yel' choxken. ⁵ La' ba ñezkzile ni to ben' chñelen ljwellin, wa ben' chon bichlə dii zban, wa ben' chzelall' gat' kwe'ile' dii xen, bi yilline' yabana' gana' chñabia' Crístona' len Chioza'. Beena' chzelallii gat' kwe'ile' dii xen, toz ka chone' ka beena' choe'la'o daa nak yaj yag. ⁶ Bi we'le latj no siye' le' we'lenze' le' dill' dii bi zakii, la' ben'ka' chon chiya dii malki, ile'gakile' yel' zak'zi' xen che Chioza' daa bi chzenaggake' che'. ⁷ Daan, bi chiyal' lenle ben'ka' chon ka'.

⁸ Kanan', nchol nñiti yichjlall'do'lena', san ñaa daa ba nakle Xancho Jesucrístona' txen, ba yoo beeni' che'na' loo yichjlall'do'lena', na' chiyal' soale gonle lega ben' ba yoo beeni' che'na'. ⁹ La' beeni' che'na' chaklenan cho' gakcho ben' wen, na' ben' li ben' shao', na' ben' choe' dill' li. ¹⁰ Li se wñeyi kwenche inezile bi daa chazlalli Xanchona' gonle. ¹¹ Bi gonle txen diika' chon ben'ka' nchol nñiti yichjlall'do'eka', la' bibi zakii daa chongake',

san li gon ka yiyakbe'gakile' bi chongake' wen. ¹² La' axt chiyi chido'icho we'cho dill' cheyi diika' chongake' do ngash'zə. ¹³ Per yog'lol diika' choncho, chli'laogakin lo beeni' che Chioza' nak nakgakan. ¹⁴ La' beeni' che'na' chili'n lao yog'te diika' choncho. Daakzan ne':

Li yiban, le' nakle ka ben' ches;

na' li yiyas ladj ben' wetka'.

Na' Cristona' kwee beeni' che'na' loo yichjlall'do'lena'.

¹⁵ Na' li se wneyi wsa' chele wen, na' bi gonze ka ben' bi nteyi, san li gakte ka ben' sin'. ¹⁶ Li gon ka dii le gonle dii wenna' kat' de xlatjin, la' llaki zoacho le ba chi'chga dii mala'. ¹⁷ Daan, bi chiyal' gonle ka ben' bi nteyi, san chiyal' shajniile daa cheeni Xancho Jesucristona' goncho. ¹⁸ Bi soll nitile, la' beena' chzoll chniti chone' chiya dii bi yejni'alallii. San li we' latj soa Espiritu Sántona' inabi'e loo yichjlall'do'lena'. ¹⁹ Chiyal' we'len ljwell-le dill' che sálmoka', na' gol-le dii koon Xanchona' balaan na' bichlə dii ina Espiritu che Chioza' gol-le. Na' li gol ine we'la'ole Xancho Cristona' do yichj do lall'le. ²⁰ Na' daa nakcho Xancho Jesucristona' txen, toshiizi chiyal' we'le Xacho Chioza' yel' choxken daa chaklene' cho' lao yog'lolte.

²¹ Chiyal' wzexj yichjle wzenag che ljwell-le, daa chaple Crístona' balaan.

²² Na' ka le' noolə zoa ben' chele, chiyal' wzexj yichjle wzenagle chegake', ka chonle chzenagle che Xancho Crístona'. ²³ La' ben' byonan' chnabi'e nool che'na', ka chon Crístona' chnabi'e cho' nonlilall'chone', cho' ba bisle' kwenche bi kwiayi'cho. Chnabi'e cho', cho' zaklebicho kwerp che'na', ka chon yichjchoni chnabi'an kwerp chechoni. ²⁴ Na' ka cho' nonlilall'cho Crístona' na' chzexj yichjcho lawe'na', ka'kzan chiyal' gon noolka' wzexj yichje'ka' lao yog'lol daa ina ben' che'ka'.

²⁵ Na' ka le' ben' byo zoa nool chele, li gaki nool cheleka', ka chon Crístona' chakile' cho' nonlilall'chone' na' bzani kwine' wite' ni checho ²⁶ kwenche biyakcho ben' nxi nyech lawe'na'. Bixis biyibe' yichjlall'do'chona' ka wyajle'cho xtilleena' ²⁷ kwenche yibaile' cho' nakcho lall' nee kat' yillincho lawe'na' na' bibi nda' nchen yichjlall'do'chona', san gaktecho ben' nxi nyech, ben' bibi xtoliin de. ²⁸ Na' ka'kzə le' ben' byo, le' zoa nool chele, chiyal' gapshiile nool cheleka' ka chapshii kwinle. Beena' chakile' nool che'na', kwinkzen' chakile'. ²⁹ Biga zoa ben' chwiile' kwerp che'na', san chweej chwawe'n na' chapshi'en, ka chon Crístona' chapshi'e cho' nakchone' txen, ³⁰ la' to tocho nakcho ka tkwen wej kwerp che'na'. ³¹ “Daan, wlaa ben' byona' xaxneena' kat' ikaa che', na' soalene' xoolena' gaktecho toz.” ³² Dill'ki ba wnia' chzajniin le' to dii zak'chgayi daa bin' inezile', la' chzajniin cho' ka chon Crístona' daa chakile' cho' ba nakchone' toz. ³³ Na' ka le' ben' byo, to tole chiyal' gaktecho nool cheleka' ka chaki kwinle. Na' le' noolə, chiyal' gaple balaan ben' cheleka'.

6

¹ Na' le' bi'do', li wzenag che xaxna'leka' lega bi' chzenag che Xancho Crístona', la' kan' chiyal' gonle. ² Dga bllia Chioza' bia' goncho gokan dii nech daa nsa' to dii bchebe' gone' checho shi goncho ka ne', na' nan: “Li gap balaan xaxna'leka', ³ kwenche gaktecho wen chele na' ibanle ssha lo yell-lioni.”

⁴ Na' le' zoa xiinle, bi gonle ka gakshejlall'b', san li yisgolgakt' xochi na' li wzajni'gaktib' kwenche wzenaggakt' che Xancho Crístona'.

⁵ Na' le' ndoo lla yel-le chonle xshin ben', li gon daa na ben'ka' nak xanle yell-lioni. Li gaktecho balaan, li illebgakte' na' li gon xshine'ka' do yichj do lall'le. Li gaktezi che Crístona'kzan chzenagle.

⁶ Aga kat' chwiazə xanlena' yilal yizodile' kwenche ile'shi'gakte' le', san li gonan do yichj do lall'le lega ben' nakwen llin che Crístona', la' kan' cheeni Chioza' goncho. ⁷ Chiyal'

gonle llinna' do yichj do lall'le, na' li gaktezi xshin Crístonan' chonle, aga che ben' yell-lion. ⁸ La' nezkzile nottezə nakcho, laa ben' ndoo lla ye'le' chone' xshin ben' wa ben' chon xshinkze', Xanchona' gone' ka yizi'cho banez che dii wenna' ba bencho.

⁹ Na' le' nzi'le ben'ka' chon xshinlena', lekzka' li gonigake' wen. Bi wwall wsheble legake', la' nezkzile, ka le' na' ka legake', yabana' zoa to ben' nak Xanle, na' le' aga nakzi ben' chakile'.

¹⁰ Na' lekzka' nia' le' ben' bish'dawaa na' le' ben' zandawaa, li gak wal kon yel' wak choo yel' wak xen che Xanchona'. ¹¹ Li wchin yog' diika' non Chioza' gaklenan cho' kwenche gakchale na' so sakile gonle gan dii xiwaa kat' za'lenan yel' wxiye' cheyinna'. ¹² La' aga ben' de beli chenzan chdil-lencho, san chdil-lencho dii xiw'ka' bi chle'icho, diika' ze lo llazə na' napgakan yel' wak na' yel' wñabia', diika' chñabia' lo yell-lioni gani dechga dii mala'. ¹³ Na' daan, li goni chele yog' daa non Chioza' gaklenan le' kwenche so sakile dii mala' lla'na' wtil-len, na' ka yiyoll wtil-len ni zechechkzle. ¹⁴ Li soachech na' li we' daa nak dill' li, la' lennan' gaklenan le' gonan ka bachleena' daa chchel leelena'. Na' li soa li gon daa nak dii licha, la' lennan' gaklenan le' gonan ka daa chbin soldadka' chkweejan lcho'eka'. ¹⁵ Na' li se kwas we'lenle ben' xtill' Crístonan' daa wzoan legake' mbalaz, ka chon to soldad ze' kwase' nlej xe'le'na' kwenche shaje' lo wdila'. ¹⁶ Na' daa llialote lawi diiki, li soachech gonlilall'le Chioza' kwenche gaklenan le' na' wsol wñitan yog'lol de wxiye' che dii xiwaa, na' gonan llin ka daa nox' soldada' chkweejan le' kwenche bi chchele' daa chzal' beena' chdil-lene'. ¹⁷ Na' li wzoa yichjle daa bisla Chioza' le' lao dii mala', na' gonan llin ka lap' ya che soldadka' daa chkweej yichje'ka'. Na' Cho'a Xtill' Chioza' gakan ka to yesya daa chon Espíritu Sántonan' le' kwenche til-lenle dii mala'. ¹⁸ Toshiizi li we'llwill Chioza', na' inabilene' kon ka chzajni Espíritu che'na' le'. Na' toshiizi li se wneyi, na' bi lljxakile inabilene' che yog' ben'ka' ba nak lall' nee. ¹⁹ Na' lekzka' li inabi Chioza' kwenche wxoe' cho'a lollaani dill'ka' we'len' ben', na' bi illeb' wzajniid' ben' ka nak dill' wen dill' kob che Crístonan' daa kono wyajni kani'yi. ²⁰ La' Chioza' nselee nad' lo laze' kwenche we'len' ben' cho'a xtilleena', na' ni cheyinnan' dia' lillyani. Li inabi Chioza' gaklene' nad' kwenche bi gall illeb' wi'a cho'a xtilleena'.

²¹ Tíquiconi, ben' bish'choni le chakid', nake' to ben' toshiizi chaklene' lo xshin Chioza', na' yidzajniile' le' yog'lol ka chak cha' na' daa chon'. ²² Chselaane' yide' laolena' kwenche inezile ka chak chento', na' kwenche wti'pe' lall'le.

²³ Le' ben' bish' na' le' ben' zan', chñabid' Xacho Chioza' na' Xancho Jesucrístonan' gongake' ka soale mbalaz, na' gonlilall'chle legake', na' gaki ljwell-le. ²⁴ Chioza' gaklen-shgue' yog'lol-le, le' zoale chakchgaile' Xancho Jesucrístonan'. Kan' gakan.

Kart daa bzej Páblona' na' bseleen lao ben'ka' nonlilall' Jesucrístona' yell Filípoza'

¹ Nad' Pablo na'ch Timotewi naknto' wen llin che Jesucrístona', chwapnto' chiox yog'le, le' lle'le yell Filípoza', le' nakle lall' na' Chioza' daa nonlilall'le Cristo Jesúsza'. Na' lekzka' chwapnto' chiox ben'ka' chgoo xnezi xshin Chioza' ladjlena' na' ben'ka' chaklen legake'. ² Chios, beena' nak Xacho len Xancho Jesucrístona' gaklenshgagake' le' na' wzoagake' le' mbalaz.

³ Ka ka chjadinid' le' cho'a Chios cha'na' yel' choxken. ⁴ Na' toshiizi choe'lwilliee kon yel' xaba kat' chñabidee gaklene' yog'le, ⁵ daa lenle chonle nad' txen, dezd ka wyajle'le axt naa, kwenche ides dill' wen dill' kob che Jesucrístona'. ⁶ Nezyen'id' Chios, beena' wzolo chone' to dii wen loo yichjall'do'lena', gone' kwenche yiyoll yido yiyakle ka chazlallee kat' illin lla yila' Jesucrístona'. ⁷ Na' chiyal'kz yibaid' ka chjadinid' le', la' toshiizi yoole loo yichjall'dawaani. Na' la'kzi dia' lillyani wa choe'len' ben' dill' wen dill' kob che Jesucrístona' kwenche gakbe'gakile' nakan dill' li na' shajle'gake' cheyin, nezid' toshiizi chaklenle nad' lo llinna' daa ben Chioza' lall' na' gon' yel' ben' wen che'na'. ⁸ Chioza' nez nle'ile' ka chakid' yog'le kon ka chaki Cristo Jesúsza' le'. ⁹ Kat' choe'lwill' Chioza', chñabidee zizikli yisgolche' yel' chaki chelena', na' gonche' le' yel' sin'na' len yel' chajniina' ¹⁰ kwenche gakbe'ile daa nakch wen na' ka' soale do yichj do lall'le na' bibi dol' gaple kat' yiyed Crístona'. ¹¹ Na' Jesucrístona' gaklene' le' gonle lega ben' li ben' shao' kwenche sho' Chioza' balaan na' we'la'o ben' le'.

¹² Le' ben' bish' na' le' ben' zan', cheenid' inezile diiki ba gok cha' goklenlan kwenche bdesch dill' wen dill' kob che Jesucrístona', na' bi bizogakin wsej wllongakan. ¹³ La' naa yog'lol' soldadka' lle' ni na' nochlæ ben' yoblæ lle' do ni nezgakile' dia' lillyani daa chonlilallaa Crístona'. ¹⁴ Na' daa dia' lillyani, zan ben' bish'choka' ba wloolall'gake' chongake' lall'chog choe'gake' xtill' Chioza' na' bi chlebgake'.

¹⁵ Dii li balgake' choe'gake' xtill' Crístona' daa chakxe'zgakile' nad' na' daa cheenzgakile' gonchgake' ka nad'. Per zoakz ben' chone'n do yichj do lallee. ¹⁶ Ben'kin chongake'n daa chakgakile' nad' na' daa nezgakile' Chioza' ba nzoe' nad' kwenche wi'a dill' wen dill' kob che Jesucrístona'. ¹⁷ Na' ben'ka' zi shkwen choe'gake' xtill' Crístona' daa cheenzgakile' gonchgake' ka nad', na' aga chongake'n do lall'gake'. Na' chakzgakile' daa chongake' ka gakyeshid' daa nej' lillyani. ¹⁸ Per aga bi chon daa cha' shi do lall'gaken' chongake'n wa aga do lall'gaken'; kon daa choe'lgake' xtill' Crístona', daalan chibaid'.

Na' zizikli yibachid' ¹⁹ daa nezid' wichej' wen lao yog' diiki chak cha' daa chñable cha' lao Chioza' na' daa chaklen Espíritu che Jesucrístona' nad'. ²⁰ Na' toshiizi non' lez Chioza' gaklene' nad' kwenche bi sia' yel' zto', san naa na' toshiizi gon' kwenche sho' Crístona' balaan, laa ibanch' wa laa guet'. ²¹ La' shi ibanch', gonchkz' daa cheeni Crístona'; na' shi guet', de to banez cha'. ²² Shi dech yel' mban cha', gonchkz' xshin Crístona' kwenche ben' zanch gombia'gake'ne'. Na' bi nezid' non nakch wen. ²³ Chonan lallj inia' non nakch wen: to cheenid' guet' kwenche lljazoalen' Crístona', na' naktechlan wen. ²⁴ Per chonchan byen ibanch' ni chele. ²⁵ Chakid' nakchan wen ibanch' kwenche gaklench' le' gakchachle gonlilall'le Crístona' na' yiba yizakchile daa nonlilall'lene'. ²⁶ Na' kat' ile'ile nad' ladjlena' sto shii, le yiba yizakile we'la'ole Cristo Jesúsza'.

²⁷ Naktez gak, li se wneyi wsa'to chele wen lega ben' chajle' che dill' wen dill' kob che Crístona' kwenche laa yidwia' le' wa laa yenzid' xtill'le, inezid' ni zoachechle nxenilall'le Crístona' na' nakle toz chonle ga zeelo chakle kwenche shajle' ben' dill' wen dill' kob che'na', ²⁸ na' bi gall illebzle ben'ka' chakzi' chakzbani le'. Na' daa gonle ka', wli'n kwiayi'chokzgaklen', na' le' yilale, la' Chioza' bi wi'e latj kwiayi'le. ²⁹ La' Chioza' goklene'

le' kwenche benlilall'le Crístona', na' lekzka' chaklene' le' lo yel' zak'zi'ka' chen chle'ile daa nonlilall'lene'. ³⁰ Ba chsak'zi'gake' le' ka ble'ile bsak'zi'gake' nad' daa chyixji'a xtill' Crístona', na' nezkzile ka'kzə ni chak cha'.

2

¹ Daa nakle Crístona' toz, yel' goklen che'na' chtipan lall'le, na' yel' chaki che'na' chonan ka soale mbalaz, na' Espíritu che'na' zoalenkze' le', na' lall'do'lena' nakan lall'do' yesh'.

² Daan, li gak toz, li gaki ljwell-le ganga, na' toz ka dii sele wneyi, na' toz ka dii selall'le, kwenche yiba yizakchid' ni chele. ³ Bibi sele wneyi che tozle wa kwenche gon kwinle ben' choo ben' xen, san li gonan kon yel' gaxjlall', li goni ben' ka ben' zak'chi ka le'. ⁴ Ni tole bi chiya' chiljzle dii nak to banez chezle, san lekzka' li gon ka si' ben' yoblə banez.

⁵ Li se wneyi gonle ka ben Crístona'.

⁶ La'kzi nake' Chios,

bzanile' yel' wñabia' che'na' na' balaan che'na' daa naplene' Xe' Chioza',

⁷ na' bzoe' ka'lə daa naki che',

na' ben kwine' ka to ben' bi zakii,

na' golje' goke' to ben' de beli chen.

⁸ Na' ka ba nake' ben' yell-lío, blexj yichje'

bene' kon ka wna Chioza'

axt bi'e latj betgake'ne' lee yag cruza'.

⁹ Daan, Chioza' wlo'ene' to balaan xen inleeb daa liizelozi zak'chi,

na' bzoe'ne' nake' xan yog'lołte dii de,

¹⁰ kwenche yog' ben' lle' yabana', na' lo yell-lioni, na' xan yell-lioni

kat' yengakile' le Jesúza' wchek' xibe'ka' lawe'na'.

¹¹ Na' yog'loł ben' we'gake' dill' nan Jesucrístona' nake' Xancho

na' daa gongake' ka' sho' Xacho Chioza' balaan.

¹² Daan, le' ben' bish'dawaa na' le' ben' zandawaa, kon ka ba benkzle toshiizi bzoale dill' kana' wzoalen' le', li we'l-lall'ch gakchle ben' wizoa dill' naa bich zoa' ladjlena'. Li gall illeeb Chioza', beena' bisla le', na' li gon ka dii le gonle daa cheenile'. ¹³ La' Chioza'kzan chone' kwenche chalj loo yichjlall'do'lena' gonle dii wenna' daa chaklallee gonle, na' lekzka' chaklene' le' kwenche chonlen.

¹⁴ Na' yog'loł daa gonle, li gonan do yichj do lall'le, na' bi gakkleshile ni bi gakkuedzle,

¹⁵ kwenche ben' malka' lle' yell-lioni, ben'ka' nxinj yichjlall'do'eka', gakbe'gakile' bibi dii

mal chonle, na' kono bi gak ina chele. Na' gaktole ben' bibi dol' cheyin de, lega ben'

nak dowalj xiin Chios. Na' gakte to beeni' lawe'ka', ka beljdo'ka' chey cheeni', ¹⁶ daa

chzoachechle chzenagle che cho'a xtill' Chioza' daa nsa' yel' mban. Na' shi ka' gonle,

kat'ka' yila' Crístona' de dii gonan ka yibaid' daa bi bendadz' xshin Chioza' ladjlena'.

¹⁷ Daa chzani kwinle sak'zi'le kwenche gonle daa cheeni Chioza' naa nonlilall'le Crístona',

zaklebin daa chzani ben' choe' Chioza' kwenche choe'laweene'. Na' daa chzanid' kwin'

witgake' nad' daa chon' xshin Crístona', zaklebin ka daa chlalgake' lao daa chzani ben'

choe' Chioza'. Na' la'kzi axt witgake' nad', chiba chizakid' na' cheenid' yiba yizaklenile

nad'. ¹⁸ Li yiba yizakleni nad', na' li soa mbalaz ka zoa'.

¹⁹ Non' lez Xancho Jesúza' wi'e latj yobzə wselaa Timotewa' gana' zoale, kwenche

yibaid' ka yiyede' ine' chak wen chele. ²⁰ Kochno zoa sto cha' ka le', la' tochga len' zelene'

nad' wneyi do yichj do lallee gak wen chele. ²¹ La' ben'ki sto zoalen nad', che kwinzgake'

zegake' wneyi na' bi zegake' wneyi daa cheeni Jesucrístona'. ²² Per ba nezkzile ka wen

nsa' che Timotewa' na' ka ba goklene' nad' ba be'nto' dill' wen dill' kob che Crístona'. Ba

goklene' nad' ka ben' chaklen xayin. ²³ Daan, kat' ba nezid' nakan gak cha', lii wsel'tia'ne'

gana' zoale. ²⁴ Na' nxenlallaa Xanchona' lekzka' yob yidwia' le' kwinkz'.

²⁵ Na' naa chakid' chonan byen yiselaa ben' bish'cho Epafrodítóni, beeni nonlene' nad'

txen chdil-lennto' dii mala' daa chonnto' xshin Chioza', beeni bsel'le kwenche gaklene'

nad' lao dii chyallj chchinid'. ²⁶ Cheenchgaile' ile'ile' le', na' le chakyeshile' daa wnezile we'ile'. ²⁷ Na' dii licha zi lat'zə ki wite', per Chioza' biyesh'lallile'ne' biyakile'. Na' aga tozen' biyesh'lallile', san lenan' kwenche bi gakyesh'chid'. ²⁸ Daan chisełane' laolena' dopiyenzə kwenche yibaile' daa yile'ilene' sto shii, na' nad' bich gakyesh'tekid' chele. ²⁹ Li yilebgache' kon yel' chiba chizaki daa nake' cho' txen nonlilall'cho Xanchona'. Na' li gap balaan yog'lol ben'ka' chon ka chone'. ³⁰ La' zi lat'zə ki wite' daa chone' xshin Cristona'. Bzoe' dii nxoll yel' mban che'na' goktgui bidyaklene' nad' bidyene' diika' bi gok gonle.

3

¹ Na' naa, le' ben' bish'dawaa na' le' ben' zandawaa, li yiba yizaki daa ba nonlilall'le Xanchona'. Nad' bi chak zedid' wzej' le' dii yoblə diika' ba wniakz' le' daa nezid' waklenan le'. ² Li wsak' bi wzenagle che ben' malka', ben'ka' nazə chonan byen wchogtekzə kwerp chechona' sho'cho sen daa le circuncisión. ³ La' cho'yen'lan nakcho dowalj ben'ka' yoo sen, cho' chole'la'ocho Chioza' daa yoo Espíritu che'na' loo yichjlall'do'chona' na' chiba chizakicho daa nakcho Cristo Jesúza' txen. Na' bi noncho lez daa goni kwerp chechoni gaklenan gakcho ben' wen lao Chioza'. ⁴ Nia' ka' la'kzi de dii zan dii gak wxenilallaa che kwini' daa gonan ka ile'shii Chioza' nad'. Shi no chakzi de dii gak wxenilallee che kwine' daa gonan ka ile'shii Chioza'ne', ¿alechlin nad'? ⁵ Ka gokid' xon' lla, wloogake' kwerp cha'ni sen daa le circuncisión. Nak' ben' Israel, na' golj' lo dia che dii Benjamína', na' nak' dowalj ben' hebreo ka xaxna'ka', na' bsedyenaa ley chento'na' na' bzenag' cheyin, na' benlen' fariseoka' txen. ⁶ Daa le wzechga' wneyi ley che Chioza', axt gokid' chon' ka cheeni Chioza' daa bchi' bsakaa ben'ka' chonlilall'gake' Jesúza'. Na' ben' kon ka na leya', na' aga no gok ina bi ben' ka nan. ⁷ Kana'n gokid' le zak'chgayi yog' diika', per naa, daa ba nonlilallaa Crístona', chakbe'id' bibi zak'gakan. ⁸ Na' dii li nezid' bibi de dii zak'chi ka daa ba nombia' Cristo Jesúza', beena' nak Xan'. Na' daa le chakidee, bich nxenilallaa yog' diika' gokid' le zak'chga, san ba nongaka'n ka beb kwenche gombia'ch' Crístona' ⁹ na' gakee txen. Aga daa chon' daa na leyan' nak' ben' li ben' shao' lao Chioza', san daa nonlilallaa Crístonan', la' ben'ka' chonlilall'gake' Crístona', Chioza' chiyone' legake' ben' li ben' shao'. ¹⁰ Cheenid' gombia' Crístona' na' yel' wak che'na' ka daa bli'e kana' bibane' ladj ben' wetka', na' cheenid' izanid' kwini' gak cha' ka gok che' daa wdie' yel' zak'zi'ka' na' wite'. ¹¹ Na' ka', non' lez idolaa yisban Chioza' nad' ladj ben' wetka'.

¹² Bi nia' ba nombi'ane' kwasłol wa ba chon' kwasłol ka chazlallee. Per ni chon' ka dii le kwenche gak gona'n, la' ni che lennan' gox wñab Cristo Jesúza' nad'. ¹³ Le' ben' bish' na' le' ben' zan', bi nia' ba chon' kwasłol ka chazlallee. Per de to dii chon', bich zia' wneyi che diika' ba wde, san chon' to dii byen kwenche idolid' dii wenna' zi' za'. ¹⁴ Ni chon' ka dii le kwenche yillin' gana' ikaa daa gon Chioza' nad'. La' ni cheyinnan' gox wñabe' nad' kwenche nak' Crístona' txen.

¹⁵ Na' kan' chiyal' secho wneyi yog'lolcho, cho' ba nakchacho chonlilall'chone'. Na' shi bi zelen wneyi Chioza'kzə wzajniile'n le'. ¹⁶ Na' daa lliarote chiyal' soatezi soacho goncho kon ka ba bzajni Chioza' cho'.

¹⁷ Le' ben' bish' na' le' ben' zan', li wsa'to chele ka nsa' cha', na' ka nsa' che ben'ka' chon kon ka ba bliinto' le' gonle. ¹⁸ Zan shii ba wnia' le', na' naa axt chakyeshid' nia' le' dga sto shii, zan ben' chongake' ka bibi zakii daa wit Crístona' lee yag cruza' daa bi nsa' chegake' wen. ¹⁹ Wllin lla kwiayi' ben'ki daa chole'la'ogake' toz daa chñab beli chen che'ka', na' chep cha'lall'lgake' cheyi daa chongake' lwaayi dii nan yido'gakile'. Kon lillinzi daa de yell-lioni zegake' wneyi. ²⁰ San cho', yabanan' nak lallcho. Na' nan' ziza' Xancho Jesucrístona', beena' chbezcho yisle' cho' kwenche bi kwiayi'cho. ²¹ Len' yishee kwerp chechoki, diiki gooll' iteb, kwenche yiyakan ka kwerp che'na' daa le zakii. Na' gone'n kon yel' wak che'na' daa chñabia'lene' lao yog'lolte dii de.

4

¹ Le' beṇ' bish'dawaa na' le' beṇ' zandawaa, le chakid' le', na' chzelall'chgaid' ile'id' le', na' chiba chizakid' daa nonlilall'le Crístona', na' ni chele le' de to dii yizi'a banez. Li soachech gonlilall'le Xanchona'.

² Chat'yoid' Evódiana' len Sintiquena' yizoagake' wen daa nakgake' Xanchona' txen.

³ Na' li' nako' nad' txen do yichj do lalloo choncho xshin Chioza', chat'yoid' li', gaklengach'o' beṇ' zanchoki. La' le ba bllaglogaken' goklengake' nad' be'nto' dill' wen dill' kob che Jesucrístona', len Cleméntena' na' beṇ'ka' sto benlench nad' xshin Chioza'. Ba da' lie'ka' lee libr che Chioza' gana' da' le beṇ'ka' napgake' yel' mban zejli kaṇi.

⁴ Li yiba yizaki toshiizi daa nakle Xancho Crístona' txen. Na' sto shii nia' le': jli yiba yizaki! ⁵ Li wsa' chele xochi kwenche yog' beṇ' gakbe'gakile' nakle beṇ' wen. Ba zoa gao yiyed Xanchona'.

⁶ Bi kwekzə yichjle bittez dii chak chele, san li we'lwill Chioza' na' li gonan lall' nee, na' li wi'e yel' choxken. ⁷ Na' gone' ka soale mbalaz axt kono shajniikzi biče zoale ka'. Na' yel' zoa mbalaza' wsol wñitan dii zeda' de loo yichjlall'do'leka' daa nakle Cristo Jesús'a txen.

⁸ Na' le' beṇ' bish' na' le' beṇ' zan', daa zeelote naa, li se wñeyi cheyi daa nak dii li, che yog'loḷte dii chidoḷ' gapcho balaan, che yog'loḷ daa nak dii li dii shao', che yog'loḷ dii bibi dii mal nsa'n, che yog' dii wenka' chon ka yibaicho, na' che yog'loḷ dii zeyi cheyin nakan wen. Li se wñeyi che yog'loḷ diiki nak wen, diiki chidoḷ' we'cho xtiliin.

⁹ Li gon daa ba bli' bsedid' le' na' daa benile wnia', na' daa ble'ile chon'. Lennan' li gon, na' Chios, beena' chon ka soacho mbalaz, soalene' le'.

¹⁰ Chiba chizakchgaid' lao Xancho Jesucrístona' daa bachga chizele wñeyi cha' dii yoblə. Bi nia' ba gol-lall'le nad', san bi got' xlatjinnan' gaklentole nad'. ¹¹ Aga daa chyallj chchinida'n nia' ka', la' ba nzedid' gon' banez ka'k' dii de cha'. ¹² Ba nezd' bi daa ne' soe' lo yel' yesh', na' lekzka' ba nezd' bi daa ne' soe' lo yel' wnia'. Ba nzedid' gon' banez bittez dii chak cha', shi nelj nlla'id' wa shi chbiḷ chdon', shi dechga daa chyallj chchinid' wa shi shlas bibi dekzə. ¹³ Chzoid' yog'loḷte dii chtil' daa chaklen Crístona' nad'. ¹⁴ Per le wen benle daa goklenle nad' lo dii lalljki chtil'.

¹⁵ Na' nezkzile kana' bizaa Macedóniana' na' wzoloa' cho'a dill' wen dill' kob che Crístona', totgui le' lle'le Filipoza' beṇle daa byalljid' kwenche ji'a cho'a xtill' Chioza'. La' ni to beṇ'ka' ba nonlilall' Crístona' yellka' sto bi goklengake' nad'. ¹⁶ Na' kana' wzoa' yell Tesalónicana', zan shii bsel'le dii byalljid'. ¹⁷ Aga inacho chyilj' bi gonle nad', san cheenlid' gat'ch yel' shao' chele yabana'. ¹⁸ Epafrodítone ba bene' nad' daa bsel'lenlene', na' naa ba nap' yog'te daa chyalljid' axt ba chichoonlan. Na' chibayi Chioza' daa bsel'len, ka chibaile' diika' chzani beṇ' choe'gake'ne', diika' chla'ile' zix sia kat' chzeygake'n lawe'na'. ¹⁹ Chios cha'na', beena' nap yog'loḷte dii wen dii shao'ka', gone' le' yog'loḷ daa chyalljile daa nakle Cristo Jesús'a txen. ²⁰ Toshiizi chiyal' koocho Xacho Chioza' balaan. Kan' nakan.

²¹ Li wwapsha chiox yog'loḷ beṇ'ka' nak lall' na' Chioza' daa nongake' Cristo Jesús'a txen. Na' lekzka' beṇ' bish'choki zoalen nad' ni, chwapgake' le' chiox. ²² Na' yog'loḷte beṇ'ka' nak lall' na' Chioza' ni chwapgake' le' chiox, na' beṇ'ka' chon xshin beṇ' wñabia' Césara', leyen'gake' chwapgake' le' chiox.

²³ Xancho Jesucrístona' soalenshgue' le' na' gaklene' yog'loḷtele. Kan' gakan.

Kart daa bzej Páblona' na' bseleen lao ben'ka' nonlilall' Jesucrístona' yell Colósaza'

¹ Nad' Pablo nak' postl che Jesucrístona' kon ka goklall' Chioza'. Na' len ben' bish'cho Timotewi ² chwapnto' le' chiox, ka le nakle lall' na' Chioza', le' zoale yell Colósaza', na' nakle bish' l'jwellnto' daa nonlilall'le Crístona' do yichj do lall'le. Xacho Chioza' len Xancho Jesucrístona' gaklenshgagake' le' na' wzoagake' le' mbalaz.

³ Toshiizi ka chñabnto' chele, choe'nto' Chioza' yel' choxken, beena' nak Xa Xancho Jesucrístona'. ⁴ La' ba beninto' dill' ba nonlilall'le Cristo Jesúsza' na' ba chakile yog'lol ben'ka' nak lall' na' Chioza'. ⁵ Ba nsa' chele ka' daa nonle lez lljazoale yabana' gana' zoa Chioza'. Na' wzolo benlen lez ka wzolo bzenagle dill' wen dill' kob che Crístona' daa nak dill' li che Chioza'. ⁶ Na' dill' wen dill' kobi daa ba bzenagle ba blliljan doxen yell-lioni na' ba chon xshinin loo yichjlall'do' ben', kon ka benan loo yichjlall'do'lena' ka benilen na' wyajniile nan dii li Chioza' chakile' cho'. ⁷ Dgan blii Epáfrazza' le', beena' chonlene' neto' xshin Crístona' na' le chakinto'ne', na' zoatezi zoe' chone' xshin Crístona' ladjlena'. ⁸ Na' Epáfrazza' wne' neto' ka ba chaki l'jwell-le daa zoa Espíritu che Chioza' loo yichjlall'do'leka'.

⁹ Na' daan, ka wnezinto' ka ba chonle, toshiizi chñabinto' Chioza' gaklenche' le'. Na' chñabinto'ne' gone' le' do ka nak yel' sin' che'na' na' yel' chajni che'na' kwenche shajniile kwaslol daa chaklallee gonle, ¹⁰ na' gak wsa' chele lega ben' nonlilall' Xanchona', na' toshiizi gonle daa chazlallee, na' gak gonle yog'lolte daa nak wen, na' zejch gombia'chle Chioza', ¹¹ na' gakchachle kon yel' wak che'na' daa zeelo nak yel' wak choo yel' wak xen kwenche ka' gaple yel' chxenlall' na' so sakile lao bittezə dii chak chele, na' yibaile ¹² we'tezi we'le Xacho Chioza' yel' choxken. La' len' bene' kwenche lljazoalenle yog' ben'ka' nak lall' nee yabana' gana' chñabi'e, gana' de beeni' che'na'. ¹³ Chioza' bibeje' cho' lo yel' cholá' gana' chñabia' dii xiwaa na' ba bizoe' cho' lo na' Xiine'na', beena' le chakile', kwenche inabi'e cho'. ¹⁴ La' len' bisle' cho' lao yel' zak'zi'na' chidol'cho daa blalj xchene'na' wite' ni checho kwenche biyakxen saaxya chechoka'.

¹⁵ Crístona' bli'e ka nak Xe Chioza', beena' kono chle'i, na' Crístona' ba chñabia'kze' kana' zi' xe silte yog'lol dii de. ¹⁶ La' len' bxe bsile' yog'lolte dii de: diika' de yabana' na' diika' de yell-lioni. Bene' dii chle'icho na' bentie' dii bi chle'icho, ka no anjlka' na' len anjlka' biyak dii xiw' diika' chñabia' lo yell-lioni. Bene' yog'lolte dii de, na' bene'n kwenche sho'e balaan. ¹⁷ Ba zoakz Crístona' kana' zi' xe sil yog'lolte dii de, na' le' chone' ka chongakan daa bliie' bia' gongakan. ¹⁸ Na' len' chñabi'e cho' nakcho lall' nee, daa nakchone' txen. Len' bxie' yel' mban daa nak zejli kan' daa nake' ben' nech ben' biban toshiizi ladj ben' wet'ka'. Daan, nake' liizelozi ben' choo ben' xen na' chñabi'e lao yog'lolte dii de. ¹⁹ La' Chioza' wyazlallee gap Crístona' doxen yel' wñabia', yel' wak na' yog' ka diika' nape', ²⁰ na' bene' ka yog'lolte dii bxe bsile' yabana' len yell-lioni bizoalengakan le' wen daa wit Crístona', blalj xchene'na' lee yag cruza'.

²¹ Na' le', kanan' nlaala'ole Chioza' ni che dii malka' chonle na' gokzi' gokzbanilene'. ²² San naa, ba bene' kwenche bizoalenlene' wen daa bselee Crístona' wite' lee yag cruza' kwenche gake ben' nxi nyech, ben' bibi nda' nchen na' ben' bibi xtoliin de lawe'na'. ²³ Per chonan byen toshiizi soachechle gonlilall'le Crístona', beena' ba wyajle'le che', na' bi gakhoplall'le cheyi daa benle lez gaki chele ka bzenagle dill' wen dill' kob che'na'. Na' dga ba benile, ba choe'gake'n dill' doxen yell-lioni, na' nad' Pablo, chaklen' cho'an dill'.

²⁴ Na' naa chiba chizakid' daa chllagloa' yog' yel' zak'zi'ki ni chele. La' daa chak cha' ki, chen chle'id' ka yel' zak'zi'ka' ben ble'i Crístona' ni checho, cho' ba nonlilall'chone' na' zaklebicho ka kwerp che'na'. ²⁵ Chioza' bzoe' nad' gak lo na' gaken' le' ba chonlilall'lene'

na' wliid' le' kwas_{lo}l cho'a xtilleena'. ²⁶ Kani'teyi kono w_{ne}zi daa wlo'e x_{ne}zin gone', per naa ba bliile'n be_n'ka' nak lall' nee. ²⁷ Chioza' chaklallee i_{ne}zi be_n'ka' nak lall' nee dga kono w_{ne}zi kana', na' nakan to dii zakii nleb nan Crístoná' zoalene' le' bi nakle be_n' Israel, le' chon_{li}lall'lene', na' nonle lez lljazoalenle Chioza' gana' de balaan xen che'na'.

²⁸ Neto' chyixje'into' be_n' xtil' Crístoná', na' chat'yointo' yog' be_n' wzenaggake'n. Na' ch_{ch}innto' do ka nak yel' sin'na' daa ba ngwee neto' ka chli' chsedinto' legake' kwenche yog' be_n'ka' gak Crístoná' txen yiyakgake' kwas_{lo}l ka cheeni Chioza'. ²⁹ Daan, choe'l-lallaa chyixji'a cho'a xtilleena' kon ga zeelo chizoid', na' Crístoná' chaklene' nad' kon yel' wak che'na'.

2

¹ Cheenid' i_{ne}zile' dii xen dii chen chle'id' ni chele na' ni che be_n' bish'choka' lle' Laodiceana', na' ni che yog'_{lo}l be_n' bish'choka' bi_n' gombia' nad', ² kwenche yog'le wtip' lall'le na' gakte toz gaki ljwell-le, na' shajniile kwas_{lo}l daa wloo Chioza' x_{ne}zin daa kono w_{ne}zi kani'yi. Na' l_{en}nan' daa bidyen Crístoná', ³ beena' blii cho' doxen ka nak yel' sin' na' yel' chajni che Chioza', diika' nak dii zakii nleb. ⁴ Nia' le' ka' kwenche kono siye' le' we'lenze' le' dill' xochi na' gakile nakan dill' li. ⁵ La'kzi bi zoalen' le', chi' yichj_{kz}' le' na' chiba chizakid' daa _{ne}zid' nsa' chele wen na' zoachechle chon_{li}lall'le Crístoná'.

⁶ Na' daa ba nonle Jesucrístoná' Xanle, chiyal' wsa' chele lega be_n' ba nake'ne' txen. ⁷ Ka zoachech to yag dii ba nde loinna' zitj, ka'kzan le', li soachech gon_{li}lall'le Crístoná', kon ka ba bli' bsedinto' le', na' toshiizi li we' Chioza' yel' choxken.

⁸ Li wsak', bi we'zle latj no siye' le' kon yel' sin' daa chaljlall' be_n' yell-lioni daa bibi zakii. La' aga xtil' Crístonan' chli' chsedgakile' san che diika' ch_nabia' lo yell-lionin.

⁹ Crístoná', beena' golje' goke' be_n' de beli chen, nape' doxen yel' w_nabia', yel' wak na' yog' ka diika' nap Chioza'. ¹⁰ Na' le', daa nakle Crístoná' txen, yel' wak che'na' ba chonan llin lo yel' mban chelena', la' Crístoná' napche' yel' w_nabia' na' yel' wak aga ka yog' anjlka' wa dii xiw'ka' ch_nabia'. ¹¹ Na' lekzka' daa naklene' txen wak i_nacho yoo to se_n loo yichjlall'do'lena' daa chli'n nakle lall' na' Chioza', per bi nakan ka se_nna' daa chgoo be_n' kwerp che'ka' daa le circuncisión, san se_nna' chgoo Crístoná' nakan daa chikobe' yichjlall'do'chona' kwenche dii mala' daa chzelalii beli chenna' bich i_nabia'n cho'. ¹² Ka wchoale nisa' wak i_nacho witlenle Crístoná', na' bgash'lenlene' ka bgashee, na' lekzka' bibanle ka bibane' ladj be_n' wetka' daa wyajle'le Chioza' bisbane' Crístoná' kon yel' wak che'na'. ¹³ Na' le', gogle ka be_n' net lao Chioza' ni che saaxya cheleka' daa bi_n' choon_{lall}'le daa cheeni beli chen chelena'. San naa, Chioza' ba be_n'e' to yel' mban kob chele daa nakle Crístoná' txen, na' bizi'xene' yog' saaxya cheleka'. ¹⁴ Chioza' bikwase' daa wdao xya checho, na' bsol b_nite'n kana' wda' Jesucrístoná' lee yag cruza'. ¹⁵ Na' bikwase' yel' wak che dii xiw'ka', diika' ch_nabia' be_n' yell-lioki, kana' wit Crístoná' lee yag cruza'. Na' daa bli'e bene' legakan gan, bsi'e legakan yel' zto' lao lkwe' be_n'.

¹⁶ Daan, bi wzenagle che be_n'ka' nagake' bi gak yeej gaole bittez yel' wao, wa nagake' chonan byen gonle i_nika', na' koole balaan llana' chize beo' cheena', na' gomba_{an}le lla sabdka'. ¹⁷ Yog'_{lo}l diiki nakan daa wzajniin cho' lat' che daa zi' gon Chioza' na' benan llin kana' zi' wselee Crístoná', na' naa daa bide' bich chongakan llin. ¹⁸ Bi we'le latj no siye' le' kwenche bi w_nitle daa ba nonle lez ikaale. Bi wzenagle che be_n'ka' chonzə ka le chzexj yichjin lao Chioza', na' choe'la'ogake' anjlka', na' nazgake' chle'dogakile' na' chep cha'lall'lengake' daa chyiljall'zgake'. ¹⁹ Be_n'ka' chon ka' bi nakgake' Crístoná' txen, beena' zaklebi yichjchona' daa ch_nabi'e cho' non_{li}lall'chone'. Na' cho' nakchone' txen, chakchacho ka cheeni Chioza', ka chak che tkwen wej kwerp chechoni ndil nllagan bechj b_nia'ka' nox' ljwellin kwenche ka' chgolgakan txen.

²⁰ Daa ba nakcho Crístoná' txen daa wite' lee yag cruza', wak i_nacho ba netcho lao diika' chyiljall' be_n' yell-lioni na' bich chiyal' i_nabia'n cho'. Na' zberache ni chonzle txen diika'

chyljlall' ben' yell-lioni, ²¹ kachaka' daa nagake': "Bi wchino' dga, bi gawo' dga, na' bi goxoo dga?" ²² Yog'lol diiki chwal' ben' yell-lioni nakchozgakan dii chibill chido na' dii chde cheyin ka zej chchinogakan. ²³ Dii li, diika' nagake' chontekzgakan ka dii le zakii, la' kat' chongake'n chontekzgake' ka ben' le chapshii daa nak che Chios, na' ka ben' le chzexj yichjin lao Chioza', na' ka ben' le chdezi' beli chen cheyin, per yog' diika' chongake' bi gak yikwasgakan daa chibayi beli chenna'.

3

¹ Daa ba nakle txen Crístona' na' nakle ka ben' bibanlene' txen ka bibane' ladj ben' wetka', chiyal' kwe' yichjle cheyi daa nak che yabana', gana' llia Crístona' shlaa de shli che Chioza'. ² Li se wneyi daa nak che yabana', na' bich kooz yichjle daa nak che yell-lioni. ³ La' ba nakle ka ben' ba wit daa nakle Crístona' txen, na' yel' mban chelena' ba nakan toz kon Crístona' lao Chioza'. ⁴ Na' ka yiyed Crístona', beena' none' le' yel' mban daa nak zejli kani, lekzka' sho'lenlene' balaan xen daa chidolee.

⁵ Daan, chiyal' kwej yichjle yog'lol dii mala' daa chiba chizaki beli chen chelena': bi inelenzle xiin xool ben' wa xiin xyo ben', bi gonle bichlæ dii zban, bich we'le cho'a xbayi beli chen chelena', bich sa'lall'zle gonle dii mala', ni bi selall'le bi gat' kwe' chele. La' beena' chzelall' gat' kwe'ile' dii xen, toz kan chonlene' beena' choe'la'o daa nak yaj yag. ⁶ Chioza' wsak'zi'e ben'ka' chon diika' daa bi chzenaggake' che'. ⁷ Na' le', lekzka' benle diika' kana' bin' wzenagle che Chioza'. ⁸ Per naa, chiyal' kwej yichjle yog'lol diiki: yel' chllaa chlok, yel' wen dii mal, yel' chylj chzan xtill' ben', na' yel' chbell chne ka nla' ka nte. ⁹ Bich siye' ljwell-le, la' ba wlej yichjle yel' mban gol chelena' na' bich gonle dii malka' benle kana'. ¹⁰ Ba biyakle ben' kob, na' Chios, beena' bxe bsil le', chone' ka gombia'chlene' na' gakchle dowalj ka cheenile'. ¹¹ Aga bi zakii shi nakcho ben' Israel wa shi bi nakcho, shi yoocho sen daa le circuncisión wa shi bi yoochon, shi nakcho ben' nsed wa ben' bi nsed, shi nakcho ben' ndoo lla yel chone' xshin ben' wa nakcho ben' chon xshinkzin. Daa lliialoten, gakcho Crístona' txen, la' nottezæ nakcho lekzen' zoalene' cho'.

¹² Chioza' le chakile' le' na' ba wleje' le' kwenche gakle lall' nee. Na' daan, chiyal' yiyesh'lallile ben' na' gonile legake' wen, na' bi gakle ben' cha'sib, san gakle ben' gaxjlall', na' gaple yel' chxenlall'. ¹³ Chiyal' gonle banez ljwell-le, na' chiyal' si'xen che ljwell-le shi no bi chon chele. Ka ben Crístona' wxi'xene' chele, lekzka' le' chiyal' si'xenle che ben'. ¹⁴ Na' daa lliialote chiyal' gaki ljwell-le, la' shi chaki ljwell-le, lannen' gonan ka gonle yog' diiki. ¹⁵ Li we' latj inabia' yel' mbalaz che Crístona' loo yichjlall'do'lena', la' kwenche soalen ljwell-le mbalazan ba gox wñabe' le' gakle toz. Na' tlizi chiyal' we'lene' yel' choxken.

¹⁶ Li kooshao' do ka nak xtill' Crístona' loo yichjlall'do'lena'. Li wli' wsemi ljwell-le na' li wtip lall' ljwell-le, li wchin do ka nak yel' sin'na' daa ba bene' le'. Li gol no salmo, no himno, na' bichlæ daa na Espíritu che Chioza' gol-le, na' li we' Chioza' yel' choxken ka gol-le. ¹⁷ Na' yog'lol daa gonle wa daa inale, chiyal' gonlen lega ben' nak Xancho Jesúsza' txen na' we'le Xacho Chioza' yel' choxken daa ba nonlilall'le Jesucristona'.

¹⁸ Le' noolæ, li wzenag che ben' chelena', la' kan' chiyal' gonle daa ba nxenilall'le Xanchona'. ¹⁹ Na' le' ben' byo, li gaki xool-lena' na' bi gonile legake' zid' znia. ²⁰ Na' le' bi'do', li wzenag yog'lol daa na xaxna'leka', la' kan' chazlall' Xanchona'. ²¹ Na' le' chisgol chischoole, bi wsheshlenle xiinleka' kontele, kwenche bi gakyesh'gakib'. ²² Na' le' ndoo lla yel-le chonle xshin ben', li wzoa dill', li gon yog'lol daa na ben'ka' nak xanle lo yell-lioni. Aga kat'ka' chwiazgake' gonle ka chilali kwenche ile'shi'gakile' le', san do yichj do lall'le li gonan daa ba chall chlleble Xancho Crístona'. ²³ Yog'lol daa gonle, li gonan do yichj do lall'le na' li gaktezi xshin Xancho Crístonan' chonle na' aga che ben' yell-lion.

²⁴ La' nezkzile Xancho Crístona', beena' nak dowalj Xanle, gone' ka yizi'le banez che dii wenna' chonle. ²⁵ San beena' chon mal, lekze' ikee laxji dii mala' chone', nottezə nake'.

4

¹ Le' nzi'le ben'ka' chon xshinlena', li gongakile' wen. Li lljadini lekzka' le' zoa to Xanle yabana'.

² Li we'l-lall' we'llwill-le Chioza', na' li se kwas we'llwill-lene' na' we'lene' yel' choxken.

³ Na' kat' we'llwill-lene', inabgachile'ne' gaklene' neto' kwenche wsaljche' xneznto' llje'chnto' xtill' Crístona' daa kono wnezi kana', la' ni cheyinnan' dia' lillyani. ⁴ Li inabi Chioza' gaklene' nad' kwenche gak wi'a dill' kwasloł, ka chiyal' wi'an.

⁵ Li wsak' li gon wen ladj ben'ka' bi nombia' Crístona', la' naayen'nan de latj wli'le non nakle txen. ⁶ Dill'ka' choe'le chiyal' gakan sia mbalaz toshiizi, na' lekzka' gak yilliile xochi xtill' ben' kat' no bi inabi le'.

⁷ Ben' bish'cho Tíquiconi, beeni le chakicho, we'lene' le' dill' ka nak yog'loł diika' chak cha'. Len' do yichj do lallee chonlene' nad' xshin Xancho Crístona'. ⁸ Daan, chselaaane' laolena' kwenche wi'e dill' nakan chak chento' na' wtipe' lall'le. ⁹ Na' lekzka' ben' wllall' chele Onésimoni ziza'lene'ne', beeni le chakinto' na' nake' dowalj bish' ljwellcho. Legake' we'gake' dill' che yog'loł daa chak cha' ni.

¹⁰ Aristárconi, beeni nak' txen dento' lillyani, chwape' le' chiox; na' lekzka' Márcona', ben' bish' Bernabéna'. Ba wniakz' le' shi yidwia Márcona' le', li gonshaile' wen. ¹¹ Ka'kzə Jesúszi, beeni che'gake' Justo, chwape' le' chiox. Ladj yog' ben' Israelka' nonlilall' Crístona', ben'kichgan chaklengake' nad' chonnto' xshin Chioza', na' le ba btipgake' lallaa. ¹² Ben' wllall' chele, Epáfrazi, lekzka' chwape' le' chiox. Nake' to ben' chon xshin Crístona', na' toshiizi choe'llwille' Chioza' ni chele kwenche gakchale lo xneze'na', na' soachechle we'l-lall'le gonle ka cheeni Chioza'. ¹³ Nezi' ka wneyi nleb zie' chele na' che ben'ka' lle' yell Laodicéana' na' yell Hierápoliza'. ¹⁴ Lúcazi, beeni chon rmech, beeni le chakid', chwape' le' chiox, na' lekzka' Démazi.

¹⁵ Li wwap chiox bish' ljwellchoka' lle' yell Laodicéana', na' lekzka' Nínfana' na' ben'ka' chdop chllag lille'na' choe'la'ogake' Crístona'. ¹⁶ Ka yiyoll wlable yishi bzej', li wselaan lao ben'ka' nonlilall' Crístona' yell Laodicéana' kwenche lekzka' lengake' wlabgake'n, na' legake' gongake' le' yisha' daa bselaa lawe'ka' kwenche wlablen. ¹⁷ Li ye' Arquípona' gone' to dii byen gone' kwasloł daa ba non Chioza' lall' nee gone'.

¹⁸ Nad', Pablo, kwin' chzej'* gani chwap' le' chiox. Li lljadini lillyan dia'. Chioza' gaklenshgue' le'.

* **4:18** Kwin' chzej': Páblona' bchine' ben' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseléen.

Kart nech daa bzej Páblona' na' bseleen lao ben'ka' nonlilall' Jesucrístona' yell Tesalónicana'

¹ Nad' Pablo na' Silvánoni len Timotewi chwapnto' le' chiox, le' chdop chllagle choe'la'ole Jesucrístona' Tesalónicana', le' nakle lall' na' Xacho Chioza' len Xancho Jesucrístona'. Chnabinto' legake' gonshgagake' ka gak wen chele, na' wzoagake' le' mbalaz.

² Toshiizi choe'nto' Chioza' yel' choxken che yog'lol-le kat' choe'lwillnto'ne'. ³ Toshiizi ka choe'lwillnto' Chioza', beena' nak Xacho, chjadininto' ka choe'l-lall'le chonle dii wenna' daa nonlilall'lene' na' chakile'ne', na' daa zoachechle nonle lez Xancho Jesucrístona'. ⁴ Na' le' ben' bish' na' le' ben' zan', le' nakle ben' chaki Chioza', nezinto' ba wleje' le'. ⁵ La' ka be'lennto' le' dill' wen dill' kob che Jesucrístona', aga de cho'a dill'zan be'lennto'n le', san kon yel' wak che Chioza' na' che Espíritu Santo che'nan' be'nto' dill' do yichj do lall'nto'. Na' nezczile ka wen bsa' chento' ladjlena' kwenche goklennto' le'.

⁶ Na' le' bsdle chonle ka neto' na' ka ben Xancho Jesucrístona', la' Espíritu Sántonan' bene' ka bibaile bleble Cho'a xtill Chioza' la'kzi dii zan yel' zak'zi'ka' ben ble'ile. ⁷ Na' daa bizo bizakile yel' zak'zi'ka', bliile ben'ka' nonlilall' Crístona' yellka' mbani Macedóniana' na' Acáyana' ka chiyal' gongake'. ⁸ Na' daa benle ka', Cho'a xtill' Chioza' ba wislesan aga to Macedóniana'zə, ni aga to Acáyana'zə, san doxente. Na' lekzka' ba bengakile ka nonlilall'le Crístona', na' bi chonan byen we'nto' dill' chele. ⁹ La' kwingake' choe'gake' dill' ka wen benle bleble neto', na' bsanle bich be'la'ole lwaa lsak' diika' bi nak chios kwenche benlilall'le beena' nak dowalj Chios yaa Chios ban, ¹⁰ na' chbezle yiyetj Xiine' Jesúza' yabana', beena' bisbane' ladj ben' wetka'. Na' Jesúza' yisle' cho' lao yel' zak'zi'na' ziza' daa we' Chioza' ben'ka' bi bzenag che'.

2

¹ Le' ben' bish' na' le' ben' zan', nezczile daa bidwianto' le' bi biddadznto'. ² Na' lekzka' nezile le wxak'zi'nto' yell Filipoza' na' biya dii wnagake' neto', per Chioza' goklene' neto' na' bi bllbnto' wdixje'into' le' dill' wen dill' kob che Jesucrístona' la'kzi biya dii btilnto'. ³ Na' ka wdixje'into'n le', do yichj do lall'nto' be'lennto' le' daa nak dill' li, na' kono wxiye'nto'. ⁴ La' Chioza' wleje' neto' na' bzo'e' neto' we'nto' dill' wen dill' kob che'na'. Na' aga chonnto'n kwenche chazlall' bənaan, san kwenche chazlall' Chiozan', beena' nombia' yichjlall'do'nto'ni. ⁵ Nezczile, na' Chioza' nez nle'ile', ni shlin bigan' we'la'o we' dill'nto' le' daa chzelall'nto' bi de chele. ⁶ Bi cheeninto' no koo neto' balaan, ni le' ni ben' yoblə. Daa naknto' postl che Crístona', zak' wñabinto' le' gonle daa chyalj chchininto' shel'ka', per bibi wnanto' le'. ⁷ San kana' wzoalennto' le' bennto' chele ka chon to noolə chap chwie' bi'do' che'ka' xochi. ⁸ Na' daa le chakinto' le', aga to daa be'lenznto' le' dill' wen dill' kob che Crístonan' bibainto', san lekzka' bennto' axt ga zeelo bizointo' goklennto' le'. La' le chakinto' le'. ⁹ Le' ben' bish' na' le' ben' zan', chjadinkzile ka bdezi' kwinnto' shlak wzoalennto' le' kana' be'lennto' le' dill' wen dill' kob che Crístona'. Ka tella ka wal bennto' llinna' kwenche ni tole bi beninto' zed.

¹⁰ Chioza' nez nle'ile', na' lekzka' le' nonlilall'le Crístona', nezile do yichj do lall'nto' wzoanto' ladjlena', na' bennto' daa nak shli na' bsa' chento' wen kwenche kono biz gon ine chento'. ¹¹ Lekzka' nezile beninto' to tole ka choni to ben' xiine'ka' ¹² daa btipnto' lall'le, na' bennto' le' yel' chxenlall', na' ba be'lennto' le' dill' ka chiyal' wsa' chele, le' nonlilall'le Chioza', beena' gox le' kwenche inabi'e le' na' lljazoalenlene' gana' ile'ile ka nak balaan xen che'na'.

¹³ Na' lekzka' toshiizi choe'nto' Chioza' yel' choxken daa bleble cho'a xtilleena' be'lennto' le', la' gokbe'ile' nakan cho'a xtill' Chioza' na' aga cho'a xtill' ben' yell-lionizan.

Na' dii li nakan cho'a xtil' Chioza' daa chisha'n yichjlall'do'chona', cho' chonlilall'chone'.
 14 Na' le' beñ' bish' na' le' beñ' zan', kana' bsak'zi' beñ' wlall cheleka' le', gok chele ka
 gok che beñ' Judeaka', beñ'ka' chdop chllag choe'la'ogake' Crístona', la' beñ' wlall che'ka',
 beñ' Israelka', bsak'zi'gake' legake' daa nonlilall'gake' Crístona'. 15 Lekzgaken' betgake'
 Xancho Jesúza' na' betgake' dii beñ'ka' wdixjee daa goll Chioza' legake' kani'yi, na' lekzka'
 blaggake' neto'. Bi chongake' ka chazlall' Chioza' na' chle'zbangakile' yog'lol beñ', 16 la'
 chsej chllongake' chixje'into' beñ'ka' bi nak beñ' Israel cho'a xtil' Chioza' kwenche
 yilagake' na' bi kwiayi'gake'. Na' daa chongake' ka', chzanchgake' saaxya che'ka', na'
 daan, ba nakten ile'gakile' yel' zak'zi' wala' we' Chioza'.

17 Le' beñ' bish' na' le' beñ' zan', kana' bi wzoalennto' le' shloll, la'kzi bi ble'into' le',
 toshiizi jadininto' le' na' le' goklall'nto' yidwianto' le'. 18 Dii li goklall'nto' yidwianto'
 le', na' nad'yen' zan shii goklallaa yidwia' le', per Satanáza' bsej blonan yid'. 19 Daa
 chonlilall'le Xancho Jesúza' na' zoale chonle wen daa be'lento' le' xtilleena', nonnto' lez
 gonle ka yibainto' lawe'na' kat' yiyede'. 20 Dii li, chibainto' ka chonle na' zoanto' mbalaz
 ni chele.

3

1 Na' ka bich bi rson chele de, bi wzoanto' wen na' be'nto' dill' yigaannto' to neto'za
 Aténaza' 2 na' bsel'nto' beñ' bish'cho Timotewa', beena' chonlene' neto' xshin Chioza' daa
 chyixje'nto' dill' wen dill' kob che Crístona'. Bsel'nto'ne' kwenche yidtiipe' lall'le na' gone'
 ka soachechle gonlilall'le Crístona', 3 kwenche ni tole bi gakklejile ni che yel' zak'zi'ka'
 chen chle'ile. La' nezkzile kan' llia bia' gak checho. 4 Na' kana' ni zoalennto' le', bsi'ninto'
 le' nan wle'icho yel' zak'zi'ka', na' nezile ba gok ka wnanto' le'. 5 Na' daa le' gokshejlallaa
 ni chele, bsel'aa Timotewa' kwenche inezid' shi ni nonlilall'kzle Jesucrístona', la' gokid' dii
 xiwaa gonan ka gonchoplall'le na' gakedadz xshin Chioza' daa bennto' ladjlena'.

6 Per naa ba bila' Timotewi gani zoanto' na' cho'e dill' ni nonlilall'kzle Jesucrístona'
 na' chaki ljwell-le. Lekzka' cho'e dill' toshiizi chjadinile neto' daa le' chakile neto', na'
 le' cheenile ile'ile neto'. Na' ka'kz neto', le' cheeninto' ile'into' le'. 7 Daan, le' beñ'
 bish' na' le' beñ' zan', la'kzi chiya dii chen chle'into', axt bixenlall'nto' ka wnezinto' ni
 zoachechle nonlilall'le Crístona'. 8 Daa ba nezinto' ni zoachechle chonlilall'le Xanchona',
 axt biyakshao'lall'nto'. 9 Na' bichkz bi dill' chillelinto' kwenche we'nto' Chioza' yel'
 choxken che yel' xabana' daa napnto' ni chele. 10 Ka tella ka wal' chnabinto' Chioza' wi'e
 latj yidwianto' le' dii yoblə kwenche yiyoll yido wzajniinto' le' daa ni chyalljile shajniile
 kwenche gonlilall'chlene'.

11 Na' chnabid' Xacho Chioza' na' Xancho Jesúza' gaklengake' neto' kwenche bibi wsej
 wllonan yidwianto' le'. 12 Na' Xanchona' gonshgue' ka zizikli gakchi ljwell-le na' gakile
 yog'lol beñ', ka chakinto' le'. 13 Na' gonshgue' ka gakchach yichjlall'do'lena' kwenche
 gakle beñ' nxi nyech na' bibi xtol'le gat' lao Chioza', beena' nak Xacho, kat'ka' Xancho
 Jesucrístona' ziza'lene' beñ'ka' nak lall' nee.

4

1 Le' beñ' bish' na' le' beñ' zan', kon yel' wñabia' che Xancho Jesucrístona', chat'yointo'
 le' soatezi soale gonchle ka chazlall' Chioza', kon ka bsdinto' le' gonle na' kon ka ba
 chonkzle.

2 Ba nezkzile diika' wnanto' le' gonle, na' nakgakan diika' bllia Xancho Jesúza' bia'
 goncho. 3 Chioza' cheenile' soale gonle daa chazlallee. Na' bi inelenzle xiin xool beñ',
 4 san to tole chiyal' gable balaan xool-lena' lega beñ' nak lall' na' Chioza', 5 na' bi' we'zle
 cho'a xbayi beli chen chelena', ka chon beñ'ka' biñ' gombia'gake' Chioza'. 6 Na' ni tole
 bi gonle'ile xool ljwell-le la' ba bsi'nkzinto' le' Xanchona' wsak'zi'e yog' beñ'ka' chon ka'.
 7 Chioza' aga gox wñabe' cho' kwenche goncho dii zbanki, san gox wñabe' cho' kwenche

gakcho beṅ' nxi nyech. ⁸ Daan, beena' bi chzenague' diiki chli' chsedinto' aga chento'n bi chzenague', san che Chiozan', beena' beṅ' le' Espiritu Santo che'na'.

⁹ Na' ka nak cheyi daa chaki ljwellcho, bi chonan byen wzajni'chinto'n le', la' kwin Chioza' ba bsdile' le' gaki ljwell-le. ¹⁰ Na' chakile yog'lol beṅ'ka' nonlilall' Crístona', beṅ'ka' zoa doxente Macedóniana'. Na' chat'yointo' le' beṅ' bish' na' le' beṅ' zan', zizikchli gakchi ljwell-le. ¹¹ Li gon to dii byen soalen ljwell-le wen, na' li se wneyi che loo yoo lill-lena', na' li gon llin kon ni'a na'leka' ka ba wnakznto' le' ¹² kwenche beṅ'ka' bi nonlilall' Crístona' inagake' le wen nsa' chele, na' lekzka' bibi zed lljenle lill beṅ'.

¹³ Na' le' beṅ' bish' na' le' beṅ' zan', cheeninto' inezile nak gak che beṅ'ka' ba wit kwenche bi gakyeshile ka chakyeshii beṅ'ka' bi nongake' lez lljazoalengake' Chioza'. ¹⁴ Daa chajle'cho wit Jesúza' na' bibane' ladj beṅ' wetka', lekzka' chajle'cho Chioza' yisbane' beṅ'ka' nonlilall'gake'ne' ka witgake'.

¹⁵ Na' daan, nanto' le' kon ka wna Xancho Jesúza': Cho' ni mbancho kat' zizee, aga chon' yibialocho lao beṅ'ka' ba wit. ¹⁶ La' kwin Xancho Jesúza' zizee yabana', na' inie' zillj gone' mandad yiban beṅ' wetka', na' anjla' chnabia' inie' na' yenicho kwell trompet che Chioza', na' beṅ'ka' benlilall' Crístona' yibangake' nech. ¹⁷ Na'tech, ka cho' ni mbancho, yigoyo Chioza' cho' yiyakchogake' t xen ladj bejka' kwenche lljatil'cho Xanchona', na' soalenchone' zejli kaṅi. ¹⁸ Na' daan, li wtip lall' ljwell-le kon dill'ki.

5

¹ Na' le' beṅ' bish' na' le' beṅ' zan', bi chyalljin wzejnto' le' inanto' bi lla bi goran' gak diiki. ² La' ba nezkzile kwaslol llana' ziza' Xanchona' tokonganzi zizee, ka chon to wban kat' lljlane' wal'chel. ³ Kat'ka' beṅ' yell-liona' ine': "Asi naa zoachgacho mbalaz. Bikzbi chak checho", kana'lan tokonganzi kwiayi'gake' na' aga wilalat'gake'. Gak chegake' ka chak che noola' tokonganza chzolo chaz bes che'na' kat' sane'. ⁴ San le' beṅ' bish' na' le' beṅ' zan', ba nezile diiki kwenche ki sha chel-lə chon llana' zizee tokonganza. ⁵ Yog'le ba nombia'le Chioza' ba chdale lo beeni' che'na', na' bich chdale lo yel chol'a' daa chzaklebi dii mala'. ⁶ Daan, li se kwas na' li gako beṅ' nyeen nyeeniyi na' bi gonle ka chon beṅ'ka' bi nombia'gake' Chioza'. ⁷ Beṅ'ka' chda lo yel chol'a' bi nombia'gake' Chioza', nakgake' ka beṅ' ches wa ka beṅ' chzoll chniti na' bi chakbe'gakile' bin chak. ⁸ Per cho', lo beeni'nan' chdacho. Daan, chiyal' gakcho beṅ' nyeen nyeeniyi, na' gonlilall'chcho Chioza', na' gakicho yog'lol beṅ' na' goncho lez lljazoalencho Chioza'. Shi goncho yog' diika', na' gakcho ka to soldad beena' nyaz diika' chkweejan le' lo wdila'. ⁹ La' aga gox wṅab Chioza' cho' kwenche techo lo yel' zak'zi'na' zizan', san gox wṅabe' cho' kwenche gat' yel' mban checho zejli kaṅi daa wit Xancho Jesucristona'. ¹⁰ Wite' ni checho kwenche la'kzi shi ni mbancho wa shi ba witcho, lljazoalenchone'. ¹¹ Na' daan, li wtip lall' ljwell-le na' li gaklen ljwell-le soachechchle wzenagle che Chioza' kon ka ba chonkzle.

¹² Le' beṅ' bish' na' le' beṅ' zan', chṅabinto' le' gaple balaan beṅ'ka' chilali chongake' xshin Xanchona' ladjlena', beṅ'ka' ngoo lall' na' le' na' chli' chsedgakile' le' nakan chiyal' gonle. ¹³ Li gapgake' balaan na' li gaki legake' ni che llinna' daa chongake'. Na' li soalen ljwell-le mbalaz.

¹⁴ Lekzka' chat'yointo' le' beṅ' bish' na' le' beṅ' zan', li we'lensha beṅ' liaka' dill' kwenche gongake' llin. Na' li wtipsha lall' beṅ'ka' chidinji, na' li gaklen beṅ'ka' bin' gakcha lo xnez Chioza', na' li gap yel' chxenlall' che yog'lol beṅ'.

¹⁵ Wsak'gale ni tole bi yizi'zle wzon che beṅ' shi bi gone' chele, san li gon ka dii le gonle dii wenna', aga to ladjle na'za, san kon yog'lolte beṅ'.

¹⁶ Toshiizi li yibayi. ¹⁷ Li soatezi soa we'llwill-le Chioza'. ¹⁸ Li we' Chioza' yel' choxken lao bitteza dii chak, la' kan' cheenile' goncho cho' nonlilall'cho Cristo Jesúza'.

¹⁹ Bi wsej wllonle daa cheeni Espíritu Sántona' gone'. ²⁰ Bi gonzile nakzi xtill' beena' ina: "Ki ba wna Chioza' nad'." ²¹ San li wsedyen'an shi dii li nakan daa goll Chioza' le' na' li ikaa dii wenna'. ²² Bi gonle txen bittez dii mal.

²³ Na' Chioza'kzə, beena' chzoe' cho' mbalaz, gone' ka yiyoll yido gakle ka chazlallee. Na' gap wwie' do ka nakle kwenche bibi dol' naple kat' ziza' Xancho Jesucristona'.

²⁴ Chioza', beena' gox wñabe' le', toshiizi chone' daa ba wne' gone', na' len' gone' dga.

²⁵ Na' le' beñ' bish' na' le' beñ' zan', li inabshayi Chioza' gaklene' neto'.

²⁶ Li wwapgach chiox yog'lol beñ' bish'choka' na' beñ' zanchoka' lega beñ' chaki lijwellin daa nakle lall' na' Chioza'.

²⁷ Na' nia' le' kon yel' wñabia' che Xanchona' wlabshale dga lao yog'lol beñ' bish'choka' na' beñ' zanchoka'.

²⁸ Xancho Jesucristona' gaklensgue' le'.

Kart wchopi daa bzej Páblona' na' bseleen lao ben'ka' nonlilall' Jesucrístona' yell Tesalónicana'

¹ Nad' Pablo, na' Silvánoni len Timotewi chwapnto' le' chiox, ka le' chdop chllagle choe'la'ole Xacho Chioza' na' Xancho Jesucrístona' Tesalónicana'. ² Na' chñabinto' legake' gonshgagake' ka gak wen chele na' wzoagake' le' mbalaz.

³ Dii licha toshiizi chiya! we'nto' Chioza' yel' choxken ni chele, le' ben' bish' na' le' ben' zan', daa zejch chonlilall'le Jesucrístona' na' daa to tole zejch chakile ben'. ⁴ Daan, choe'nto' xtill'le lao ben'ka' nonlilall' Crístona' to to gana' chdop chllaggake' choe'la'ogake' Chioza' ka nak daa zoachechle toshiizi nonlilall'le Crístona' la'kzi chen chle'ile yel' zak'zi'ka'. ⁵ Na' yog'lol dga chli'n ka wen ben Chioza' wleje' le' gake lall' nee, na' chli'n dii li nakle ben' chido! lljzoa gana' chñabi'e, la' ni cheyinnan' chzak'zi'le.

⁶ Na' Chioza', beena' chchoglo che ben' ka chiya!, wsak'zi'e ben'ka' chsak'zi'gake' le'. ⁷ Na' le' chzak'zi'le naa, Chioza' gone' ka soale mbalaz, na' ka'kz gone' chento' kat'ka' ziza' Xancho Jesúsza' yabana' ladj bel' yi'na' kon anjl che'ka', ben'ka' nap yel' wak xen, ⁸ kwenche wsak'zi'e ben'ka' bi bembia'gake' Chioza' ni bi bzenaggake' dill' wen dill' kob che Xancho Jesúsza'. ⁹ Ben'kin sakzi'gake' zejli kani na' bi yillingake' gana' chñabia' Xanchona' kon yel' wak choo yel' wak xen che'na'. ¹⁰ Ka' gak chegake' kat' yila' Xancho Jesucrístona' kwenche ben'ka' nak lall' nee koogake'ne' balaan na' yibachgayi yog' ben'ka' wyajle' che', na' lenle, daa wyajle'le xtilleena' be'lento' le'.

¹¹ Daan, toshiizi chñabnto' chele kwenche Chioza' ile'shiile' le' lega ben' gox wnabe', na' gaklene' le' kon yel' wak che'na' kwenche yiyoll gonle yog' dii wenna' ba yoo yichjle na' bichlæ dii wenka' cheenile' gonle daa nonlilall'lene' ¹² kwenche Xancho Jesúsza' sho'e balaan ni che daa chonle, na' lekzka' kwee le' balaan. Na' Chios chechona' na' Xancho Jesucrístona' gaklengake' le' gak ka'.

2

¹ Na' naa, le' ben' bish' na' le' ben' zan', ka nak daa ziza' Xancho Jesucrístona' na' daa yidi'a yillagcho yiyakchone' txen, chñabinto' le' ² bi gakklejile ni bi illeble kat' yenile inagake' ba bila'læ Xanchona'. Axt inatelzgage': "Ki ba wna Chioza'", wa inazgage': "Ki wna Páblona'", wa, "Ki bene'n yish nan ba bila'læ Xanchona'." ³ Bi we'le latj no siye'zæ le' ka nak diiki. La' aga wiyedzie' shi ben'ka' chwiyi Chioza' bin' yizoshyi'gake'ne', na' shi bin' ichej beena' nak ben' mal wal,* beena' ba naktan kwiayee. ⁴ Beenin gon kwine' liizelozi ben' choo ben' xen na' wsej wllone' we'la'o ben' Chioza' wa bittezæ dii nonlilall'gake'. Na' lljchi'e loo yoodo' che Chioza' gon kwine' ka Chios.

⁵ ¿Abi chjadinile bshaljlen' le' cheyi dga kana' zoalen' le'? ⁶ Naa ba nezile non ni nkwez beeni kwenche bi yobile' wli'lawe'. ⁷ Do ngash'zæ ba wzolokzæ chak dii mala' daa ba yoo xnezin gaka. Stozæ chyalj ikwas beena' ni nzague'n kwenche wli'lawin. ⁸ Na'ch wli'lao ben' mal wala', na' wit Xancho Jesúsza'ne' kon bishbe che'na' na' wliiayeene' ka ziza'lene' yel' chey cheeni' che'na'. ⁹ Ka nak ben' mal wala', dii xiwaan gaklenan le' gone' biya yel' wak diika' gon ka yibani ben' kwenche siyee legake'. ¹⁰ Na' wchine' yog' de wxiye' kwenche siyee ben'ka' ba nakan kwiayi' daa bi goklall'gake' wlebgake' daa nak dii li kwenche yilagake'. ¹¹ Daan, Chioza'kzæ cho'e latj shajle'gake' che de wxiye'ka', ¹² kwenche kwiayi' yog'lolte ben'ka' bi wyajle'gake' che daa nak dii li, san bibachgakile' daa nak dii mal.

* **2:3** Beena' nak ben' mal wal: xtila' nagake' el hombre de pecado wa el hombre malvado. Bwia 1 Jn. 2:18.

¹³ Na' neto' naa, toshiizi chiyal' we'nto' Chioza' yel' choxken ni chele, le' ben' bish' na' le' ben' zan', ben' chaki Chioza'. La' dii nechte Chioza' wleje' le' kwenche yilale bi kwiayi'le daa ba bixis biyib Espiritu Santo che'na' le' na' daa chajle'le dill' li che'na'. ¹⁴ Ni cheyi dgan, gox wñab Chioza' le' ka be'lennto' le' dill' wen dill' kob che'na', kwenche idol'le sho'lenle Xancho Jesucristona' balaan.

¹⁵ Na' le' ben' bish' na' le' ben' zan', li soachech na' li kooshao' diika' bli' bsedinto' le' ka be'lennto' le' dill' na' ka bzejnto' le'. ¹⁶ Na' kwin Xancho Jesucristona' na' Xacho Chioza', beena' ba gokile' cho' na' lo yel' ben' wen che'na' ba bene' cho' yel' chxenlall' zejli kani na' to dii wen dii shao' dii goncho lez, ¹⁷ wtipshgagake' lall'le na' wzoachechgake' le' kwenche toshiizi gonle wen na' we'le dill' wen dill' shao'.

3

¹ Dii zeelo nanto' le', ben' bish' na' le', ben' zan', li inabshayi Xanchona' chento' kwenche cho'a xtilleena' choe'lennto' ben' illiljan tolbezə na' wlebgake'n lega dii zakii, kon ka benle le', ² na' kwenche yisle' neto' lo ni'a na' ben' malaka', ben'ka' chon dii bi yejni'alallii. La' aga yog' ben' chajle'gake' che Xanchona'. ³ Per nezicho Xanchona' chone' ka ne', na' gone' ka soachechchle na' gap wwie' le' lao dii mala'. ⁴ Na' nxenlall'nto' Xanchona' chaklene' le' chonle ka ba wnanto', na' toshiizi gonlen. ⁵ Na' Xanchona' gaklene' le' gakile' ben', ka chon Chioza' chakile' cho', na' so sakile gaple yel' chxenlall' lao yog' daa yen ile'ile ka ben Crístona'.

⁶ Le' ben' bish' na' le' ben' zan', kon yel' wñabia' che Xancho Jesucristona' nanto' le' bi gonle txen nottezə ben' bish'choka' chdaliazə, la' aga kan' bsedinto' le'. ⁷ La' nezgzile ka chonnto', na' kan' chiyal' gonle. Neto' biga wzoaznto' ka ben' lia ladjlena'. ⁸ Ni biga wdoaznto' yel' wao che ben' na' bi wdixjnto'n, san ka tella ka wal bilal bizodinto' bennto' llinna' kwenche ni tole bi beninto' zed. ⁹ Na' dii licha, zak'kzə wñabnto' yel' goklen chelena', shel'ka', per bennto' llin kwenche ble'ile, na' kan' gonle. ¹⁰ Kana' zoalennto' le' wnanto': "Beena' bi cheenile' gone' llin, lekzka' bi gawe'." ¹¹ Na' ba beninto' bal-le kon chdale to ni to na', ni bi chonle llin, na' chlalltezi chele ga bi chiyal'. ¹² Na' ben'ki chon ka', chñabinto' legake' kon yel' wñabia' che Xancho Jesucristona' bich tazgake' ka'z, san gongake' llin kwenche yeej gaogake'.

¹³ Na' le' naa ben' bish', na' le' ben' zan', bi lljxakile gonle dii wenna'. ¹⁴ Shi no bi chzoa dill' ka nanto' lee yishi, li wwia no beena' na' bi gonlene' txen kwenche yido'ile'. ¹⁵ Bi nia' gakzbanilene', san wzajniile'ne' ka ben' bish'le.

¹⁶ Na' kwin Xanchona', beena' chzoa cho' mbalaz, gone' ka soale mbalaz toshiizi bittezə dii chak chele. Xanchona' soalenshgue' yog'loltele.

¹⁷ Nad' Pablo, kwin' chzej'* to chop cho'a lee yishi chwap' le' chiox, kan' chzej' lee yog' yishka' chselaa laolena' kwenche inezile nad'kzan chselaan. ¹⁸ Xancho Jesucristona' gaklenshgue' yog'loltele.

* **3:17** Kwin' chzej': Páblona' bchine' ben' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

Kart nech daa bzej Páblona' na' bseleen lao Timotewa'

¹ Nad' Pablo, nak' postl che Jesucristona' kwenche wi'a xtilleena', la' Chioza', beena' bisla cho' kwenche bi kwiayi'cho, len Cristo Jesúsza', beena' noncho lez gone' wen checho, bzoagake' nad'. ² Chzej' li', Timoteo, nako' ka dowalj bi' cha' daa nakcho txen chonlilall'cho Jesucristona'. Xacho Chioza' len Xancho Cristo Jesúsza' gaklenshgagake' li', na' yiyesh'lall'gakile' li', na' gongake' ka so' mbalaz.

³ Kana' ba zoa shaa Macedóniana', wñabid' li' yigaano' Éfesona' kwenche yoo ben'ka' chli' chsedi daa bi nak dii li bi gongake' ka', ⁴ na' bi segake' wñeyi che dill' golka' wdiljall' ben' na' che diika' ben dii xoxxtoe'ka' daa bi chiyoll chido. La' dill'ka' chonan ka chakgued ben' na' bi chaklenan gombia'gake' daa cheeni Chioza' goncho daa nonlilall'chone'.

⁵ Ye'gako'ne' ka' kwenche gapgake' yel' chaki ka daa chalj loo yichjlall'do' beena' ba bixi biyech na' bibi de chao chdian le' daa nezile' chone' ka chazlall' Chioza' na' nonlilalleene' do lallee. ⁶ Balgake' lwaa segake' wñeyi cheyi diiki, ba lenzgake' choe'gake' dill' cheyi diika' bi zakii. ⁷ Cheenzgakile' gakgake' ben' wli' wsedi ley che Chioza', per ni lekzgake' bi chajni'gakile' daa chli' chsedgakile' la'kzi nazgake' kayen'nan nakan.

⁸ Nezicho ley che Chioza' nakan wen, shi wchinchon ka chiyali. ⁹ La' nezicho aga ben Chioza' leya' ni che ben'ka' chon wen, san ni che ben'ka' chyishj xtilleena' len ben'ka' bi chzenag, ben'ka' bi chall chlleb Chioza', ben' saaxyaka', ben'ka' chiyit xaxna'yin, yog' ben'ka' nak wen xya, ¹⁰ ben'ka' chñelen xiin xool ben', ben'ka' nak ben' xej, ben'ka' chit' chde ben', ben'ka' chziye', ben'ka' ax't chzoagake' Chioza' de taschiw kat' chziye'gake', na' nottez ben' bi chone' daa na cho'a xtill' Chioza' ¹¹ kon ka chzajni dill' wen dill' kob che'na' daa nak dii zakii nllleb. Na' Chioza', beena' chidol' we'la'ocho, ba bene'n lall' na' wi'an dill'.

¹² Cho'a Xancho Cristo Jesúsza' yel' choxken chone' nad' wal, na' nxenlallee nad' wak gon xshine'na', na' bzoe' nad' gona'n. ¹³ La'kzi biya dii ben wñia' che', na' bchi' bsakaa ben'ka' benlilall'gake'ne' na' bshagdil' legake', Chioza' biyesh'lallile' nad' daa bi wñezid' bin chon' kana' bin' shajli'a che Jesúsza'. ¹⁴ Na' dii xen goklene' nad', bene' ka chonlilall'chee na' bene' nad' yel' chakina' daa nak' txen Cristo Jesúsza'.

¹⁵ Dillii nakan dii wñenlall'cho, na' yog'lol ben' chiyal' shajli'en: Cristo Jesúsza' bide' yell-lioni kwenche yisle' ben' saaxyaka', na' nad'yen' goklikz' ben' saaxya wal. ¹⁶ Per Chioza' biyesh'lallile' nad' kwenche wli' Jesucristona' do ka nak yel' chxenlall' xen che'na' na' ile'i ben'ka' zi' shajle' che' na' gapgake' yel' mban zejli kan. ¹⁷ Toshiizi shajla'oshga beena' chñabia' zejli kan, beena' biga llia te che', beena' zoakz la'kzi bi chle'ichone', na' sho'shgue' balaan. Zeelo len' nake' Chios. Kan' gaksghan.

¹⁸ Timoteo, xiindawaa, nia' li' chiyal' gono' ka wdixje'i ben'ka' li' daa goll Chioza' legake' cho' dii nechte, kwenche daa wnagake' cho' gakenan li' gono' ga zeelo yizoilo' gono' xshin Chioza' daa nak lall' no'. ¹⁹ Toshiizi so' gonlilalloo Jesucristona' na' tlizi gono' wen kwenche bibi gao idian li' daa nezilo' chono' ka chazlallee. La' bal ben' dii shao'tekzə chongake' daa bi chiyal' gongake' na' bich chonlilall'gake'ne'. ²⁰ Ka gok che Himenewa' len Alejándrona', na' wñabid' Chioza' gakgake' lall' na' Satanáza' kwenche wsedgake' bich bi gon inazgake' che Chioza'.

2

¹ Naa nia' li' daa lliallote gonle: chiyal' we'llwill-le Chioza' na' inabilene' daa chyallj chchinile na' daa chyallj chchini ben' yoblə, na' gat'yoile'ne' gaklene' yog'lolte ben', na' we'lene' yel' choxken ka nak daa chone' che yog'lol ben' yell-lioni. ² Chiyal' inabicho Chioza' gaklene' ben' wñabia'ka' na' yog'lolte ben' nak joschis, kwenche soacho mbalaz

na' kono wsej wllon we'la'ocho Chioza' na' goncho daa cheenile'. ³ La' dgan nakan wen na' chazlalli Chiozan', beena' bisla cho' kwenche bi kwiayi'cho, ⁴ na' cheenile' yog'lolte ben' yell-lioki yilagake' na' gombia'gake' daa nak dii li. ⁵ La' toz Chiozan' zoa, na' toz beena' chizoa ben' yell-lioni wen kon Chioza', len' Cristo Jesúza', ⁶ beena' bzani kwine' wite' kwenche wdixje' xtol' yog'lol ben' yell-lioni. Na' dga gokə, gokan llana' bllia Chioza' bia', na' bli'e cheenile' yisle' cho'. ⁷ Na' kwenche inezi yog' ben' dga, bzoe' nad' nak' postl che' na' bene' lall' na' chyixji'a xtilleena'. Na' bene' lall' na' wli' wsedid' ben'ka' bi nak ben' Israel, kwenche shajle'gake' dill' li che'na'. Na' dga cho'a dill' nakan dii li, na' bi chziyaa.

⁸ Cheenid' yog'lol ben' byoka' we'llwillgake' Chioza' gattezə zoagake', na' chiya' gaggake' ben' lall'do' nxi nyech, ben' bi yoo daa nak yel' chllaa yel' chlok na' yel' wishagdil' kat' wlis neeka' lawe'na' we'llwillgake'ne'. ⁹ Na' ka nak noolka', chiya' wsak'gake' gawk xagake', na' bi tezgake' lawin yiyiljall'gake' naklə yipaa yichje'ka', ni bi wchingake' no or wa lech' zakii inleeb. ¹⁰ San gonləgake' to dii byen seyi chegake' chongake' wen lega ben' choe'la'o Chios. ¹¹ Chiya' kwe' noolka' llizə wzenaggake' che ben'ka' chli' chsedid' cho'a xtil' Chioza' na' wzoagake' xtilleeka'. ¹² Bi cho'a latj wli' wsedzi noolka' ben' byoka', ni bi inabia'zgake' legake', san chiya' kwe'gake' llizə wzenaggake'. ¹³ La' Chioza' bene' zigaate Adánna', na'techlə bene' Évana'. ¹⁴ Na' aga Adánna' wxiye' dii xiwaa, san noolan' wxiye'n na' bxope' lao saaxyana'. ¹⁵ Na' noolka' chzoa xiinin, bi tegake' lao yel' zi'na' shi toshiizi nxenilall'gake' Chioza', na' segake' wneyi gaggakile' ben', na' soagake' gongake' ka cheeni Chioza' lega ben' nyeen nyeeniya.

3

¹ Dillii nakan dii wxenlall'cho: shi no cheeni koo lall' nee gap wwie' ben'ka' nonlilall' Crístona' na' wli' wsedile' legake', llin wen inleeban lliallalee gone'. ² To ben' ngoo loo nee chli' chsedile' ben', chiya' gake' ben' zoa do yichj do lallee, ben' bibi cho'a xtillee de. Chiya' soa toz xoolé', na' gake' ben' nsa' cheyin wen, na' gake' ben' nyeen nyeeniya, na' ben' chidolee gap ben' le' balaan. Na' chiya' yiyeshile ben' wi'e ga yigaane', na' gakte wli' wsedile' ben'. ³ Bi chiya' gake' ben' weezo, ni bi gake' ben' wishagdil', ni bi selall'chgaile' mech, san gake' ben' wen, ben' gaxjlall'. ⁴ Chiya' gak kwee xnez xlatji dii chak loo yoo lille', na' gone' byen wzenag xiine'ka' che' na' soagakb' gongakb' daa nak wen. ⁵ La' shi to ben' bi chak kwee xnez xlatji dii chak loo yoo lille', znakra gone' kwee xnezi che ben'ka' nxenilall' Chioza'? ⁶ To ben' shinzə wzolo chonlilallee Crístona' bi chiya' gak lall' nee gap wwie' ben'ka' nonlilall' Crístona', kwenche ki gakze' ben' chep cha'lall' na' wchoglo Chioza' che' ka ba nchogloe' che dii xiwaa. ⁷ Lekzka' chiya' seyi che' chone' wen lao ben'ka' bi nonlilall' Crístona' kwenche kono biz gon ina che' na' gonzə dii xiwaa gan wchixan le'.

⁸ Lekzka' ben'ka' gak lo na'gake' gaklengake' wwiagake' bin chyallj chchini ben'ka' nakgake' txen nonlill'gake' Crístona', chiya' gaggake' ben' chidol' gap ben' legake' balaan, ben' chda do lallee, na' bi sollgakile', ni bi gaggake' ben' wzelall'. ⁹ Chiya' soachehgake' shajle'gake' dii li daa ba bzajnii Chioza' cho' daa kono wnezi kana'. Na' chiya' soagake' do yichj do lall'gake' na' bibi de gao idian yichjlall'do'eka' daa nezagakile' chongake' ka cheeni Chioza'. ¹⁰ Na' lekzka' kat' kwejle ben'ki, chiya' wwiayen'le nak nsa' chegake'. Na' shi bibi de dii chao xya chegake', wak gak lo na'gake' wwiagake' bin chyallj chchini ben'ka' nakgake' txen nonlill'gake' Crístona'. ¹¹ Na' noolka' lekzka' chiya' gaggake' ben' chidol' gap ben' legake' balaan, na' bi gaggake' ben' wichitj dill', san gaggake' ben' nsa' cheyin wen, na' gaggake' ben' gak wxenlall'cho toshiizi gongake' wen. ¹² To ben' gak lo nee wwie' bin chyallj chchini ben'ka' nake' txen nonlill'gake' Crístona' chiya' soa toz xoolé', na' chiya' gap wwie' xiine'ka' kwenche gongakb' wen, na' kwe' xnez xlatji dii chak loo yoo lille'. ¹³ Ben'ka' chak chgoogake' xnezi che diika' chyallj chchini ben'ka'

nakgake' txen nonlill'gake' Crístona' chidol'gake' to balaan, na' soachgagake' mbalaz daa nonlilall'gake' Cristo Jesús'a'.

¹⁴ La'kzi ba non' lez yobzə yidwia' li', chzej' dga ¹⁵ kwenche shi bi chyobzid' yid', na' ba nezilo' nakan chiya' soa ben'ka' nak xiin Chioza', la' cho' chdop chllagcho choe'la'ochone' nakcho xiin Chios yaa Chios banna'. Na' nak lo na'cho goncho ka gombia' ben' dill' li che'na'. ¹⁶ Dii li dga chzajniin cho' che Crístona' daa kono wnezi nakan dii zakii nleeb, na' nan:

Bide' golje' ka cho' ben' yell-lio,

na' Espíritu che Chioza' bli'e nan nake' ben' li ben' shao'.

Na' ble'i anjlka' le',

na' wda ben' be'gake' cho'a xtilleena' lao ben' yell-lioki,

na' benlilall'gake'ne'.

Na' biyep'e yabana' gana' yo'e to balaan xen.

4

¹ Espíritu che Chioza' cho'e dill' kwaslól, ne' kat' ba zoa te che yell-lioni, bal ben'ka' ba nonlilall'gake' Crístona' bich gonlilall'gake'ne', na' wzenaggake' che dii xiw'ka' na' diika' chli' chsedi ben' chegakin. ² Na' wzenaggake' che ben' wxiye'ka', ben'ka' bichbi chao chdian legake' daa ba nlantekzgake' yel' wxiye'na'. ³ Na' chllongake' wshagna' ben', na' chllontegake' yeej gaogake' bal yel' wao la'kzi Chioza' wlo'e yel' waoka' kwenche cho' nonli'lall'chone' na' nombia'cho dill' li che'na' gaochon na' we'chone' yel' choxken. ⁴ La' yog'lól daa bxe bsil Chioza' nakan wen, na' bibi de dii inacho bi gak gaochon kon shi we'chone' yel' choxken kat' yeej gaochon. ⁵ La' daa chajle'cho cho'a xtill' Chioza' na' daa choe'lwillchone', chonleeye' yel' wao chechona'.

⁶ Shi dga wli' wsedilo' bish' ljwellchoka', na' gako' to wen llin wen che Jesucrístona', na' tolla' ba nono' cho'a xtill' Chioza' loo yichjlall'do'na' len dii wenna' daa bsedo' na' zej chono'n. ⁷ Na' bi wzenago' bizə dill' gol dii chsees' ben', diika' wdiljlall'gake' daa bi nak ka dii shajle'cho, san bsed gono' ka cheeni Chioza'. ⁸ Nezicho kat' chchitj ni'a na'choki chaklenan kwerp chechoni. Per daa choncho ka cheeni Chioza', dii xentechlə chaklenan cho' naa zoacho yell-lioni na' lekzka' kat' illin lla lljazoalenchone'. ⁹ Dillii nakan dii wxenlall'cho, na' yog' ben' chiya' shajli'en. ¹⁰ Na' ni cheyinnan' chonnto' to dii byen chilalinto' chonnto' xshin Chioza' daa ba nonnto' lez Chios yaa Chios banna', beena' cheeni yisle' yog'lól ben', na' ben'ka' chonlilall'yen' len' yisle'.

¹¹ Diikin chiya' yoo ben' gongake' na' wli' wsedilo' legake'. ¹² Bi weezo' latj no ile'zi li' nakzi daa nako' bi' wew', san ben wen lao ben'ka' nonli'lall' Crístona', ka de cho'a dill', na' yel' nsa' cheyin wen, na' yel' chaki ben', na' yel' nonlilalii Crístona', ni bibi dii mal sa'lalloo, kwenche lengake' gongake' ka'. ¹³ Shlak yid', ben ka dii le blab Cho'a Xtill' Chioza' lao ben'ka' chdop chllag, bli' bsdgakile', na' btip lall'gake'. ¹⁴ Bi guetlalloo daa ben Chioza' lall' no' kana' ben'ka' ngoo lall' na'gake' ben'ka' nonlilall' Crístona' bxoə neeka' yichjo'na' bengake' li' lall' na' Chioza', na' bchej beena' wdixjee nan Chioza' ba wleje' li' gono' xshine'na'.

¹⁵ Ben to dii byen ben diiki wloo Chioza' lo no' gono', na' benyenaan kwaslól kwenche gakbe'i yog'lól ben' ba zejch chono' wen. ¹⁶ Wze wneyi che kwino' na' cheyi daa chli' chsedilo' ben', na' toshiizi wno'n. Na' shi gono' ka nan, na' yisla kwino' len ben'ka' chzenaggake' daa chli' chsedilo'.

5

¹ Bi inezo' zibia' ben' golka', san be'lengake' dill' xochi ka ben' chshaljlen xayin. Na' goni ben' bishoo ben' xkwid'ka'. ² Na' goni xnoo noolka' ba ngolch ka li', na' goni ben' zano' nool xkwid'ka', na' bibi dii mal sa'lalloo.

³ Goklen nool wizebka', beŋ'ka' kono zoa chegake'. ⁴ Per shi zoa xiin xsoagake', chonan byen inezgakib' chiyal' gap wwiagakb' le', la' len' bisgole' legakb'. La' kan' chazlall' Chioza' goncho. ⁵ Nool wizeba', beena' kono zoakz cheyin, beena' bgaan tlish' tyaj, chxenilallee Chioza' na' ka tella ka wal' choe'lwille'ne' na' chat'yoile'ne' gaklene'ne'. ⁶ Per nool wizeba', beena' choe' cho'a xbayi beli chen che'na', nake' ka beŋ' net lao Chioza' la'kzi mbane'. ⁷ Bzajni'gakile' dga kwenche bibi gon inaz beŋ' chegake'. ⁸ La' beena' bibi wneyi ze che no dialla che' na' che beŋ'ka' nakyenee txen loo yoo lille'na', ba wlej yichje' daa nak che Chios, shi ka' chone', na' ba nxinjtechlə yichjlall'do'ena' aga ka beena' bin' shajle' che Chioza'.

⁹ Lee yisha' gana' da' le nool wizebka' chiyal' ta' le beŋ'ka' ba wdeli guiyon yiz, beŋ'ka' ben banez kochno bikaagake'. ¹⁰ Chiyal' seyi chegake' chongake' wen: daa gok bisgol xiine'ka', daa chiyesh'lall'gakile' beŋ' choe'gake' ga yigaangake', daa chongake' bittez dii gaklenen beŋ'ka' nonlilall' Chioza', axt chyibgake' ni'eka', na' daa chaklengake' beŋ'ka' chzak'zi', na' daa chongake' ka dii le chongake' yog' daa nak wen.

¹¹ Na' bi wdoo le nool wizebka' lee yisha' shi bin' gaggakile' guiyon yiz. La' zoa kat' we'gake' cho'a xbayi beli chen che'ka' na' yikaa chegake' na' bich gongake' kwasloł xshin Crístona', ¹² na' gaggake' dol' lao Chioza' daa bi saggakile' gongake' ka ba bchebgake'. ¹³ Na' leyi chiyakgake' noolə lia na' chdagake' to to yoo. Na' aga toz daa, san lekzka' chchitjgake' dill', na' chjalaalli chegake' dii chak che beŋ' yoblə, na' choe'gake' dill' dii bi chiyal' we'gake'. ¹⁴ Daan nool wizebka' ni zoa xlatjin, cheenid' yikaa chegake' na' yizoa xiingake', na' koogake' xnezi dii chak loo yoo lillgake', kwenche bi wxa'gake' cho'alao beŋ'ka' bi chonlilall' Chioza'. ¹⁵ La' bal' nool wizebka' ba bichejgake' lo xnez Chioza' na' ba zjanogake' Satanáza'lə.

¹⁶ Shi to beŋ' nonlilall' Chioza' zoa to dialla che' nool wizeb, chiyal' gaklene'ne' kwenche bi gake' to dii zii dii zshab che beŋ'ka' nonlilall' Crístona', na' gak we'gake' daa chyallj chchini nool wizebka' kono zoa chegake'.

¹⁷ Ka nak beŋ'ka' ngoo lall' na'gake' beŋ'ka' nonlilall' Crístona', na' chak chgoogake' xnezin wen, chidol'gake' balaan xen. Na' beŋ'ka' noni xshingake' choe'gake' cho'a xtill' Chioza' na' chli' chsedgakile', balaan xentechlə chidol'gake'. ¹⁸ La' Cho'a Xtill' Chioza' nan: "Ka nak goona' bana' chilali chlej chshoshjb trígona' kwenche ichej xayinna', bi wllinle yixja' cho'aba' kwenche gak koyob to chop cho'a." Na' lekzka' nan: "Beena' chon llinna' chidolee ikaa laxje'."

¹⁹ Shi no chao xya che to beŋ' ngoo lall' na' beŋ'ka' nonlilall' Crístona', bi wzenago'n shi bi zoa chop shon beŋ' yizi' cho'agake'n. ²⁰ Na' shi ga zoa beŋ'ka' bi chsankzgake' dii mala', chiyal' wsheshleno' legake' kat' ndop nllagle kwenche yog'lol beŋ'ka' nakle txen illebgake' na' bi gongake' ka'. ²¹ Chat'yoid' li' lao Chioza', na' lao Jesucrístona' na' lao anjl che'ka', toshiizi gono' diiki ba wnia'. Na' toz ka gonilo' yog'lol beŋ', aga balze' gakilo'. ²² Bi wxoazə noona' yichj beena' cheeni gon xshin Chioza' shi bi nezilo' nak nsa' che', kwenche ki gako'ne' txen shi chone' dii mala'. Wdaphshii kwino' kwenche ki ta' icheno' dii mala'.

²³ Daa chak li'ona' na' daa zekizezi bi shawoo, bich yeejteko' toz nisa', san weej lat'do' wej vinona'.

²⁴ Bal' dii malka' chon beŋ' chli'lawin ka zi' gaolə beŋ' xya chegake'. Na' zi balan, zi' chila' chinezli beanaan. ²⁵ Na' ka'kzə, dii wenna' daa chon beŋ' nla'xejgakan, na' la'kzi de dii wenna' daa ngash', wllin lla wli'lawin.

6

¹ Yog'lol beŋ'ka' ndoo lla yel chongake' xshin beŋ' na' ba chonlilall'gake' Crístona', chiyal' sho' yichjgake' gaggake' xane'ka' balaan kwenche bibi gon inaz beŋ' che Chioza' na' cheyi daa chli' chsedicho. ² Na' shi xane'ka' nonlill'gake' Crístona', la'kzi ba nakgake' beŋ' bish'gake' daa chonlilall'gake' Crístona', chiyal'kz gaggake' legake' balaan, na' chiyal'

gonchləgake' xshine'ka' do yichj do lall'gake' daa chakgakile' legake' na' nezgakile' ben'ka' si' banez xshine'ka' nakgake' ben' nonlilall' Crístona'. Dgan chiyal' wli' wsedilo' legake' na' ye'gako'ne' gongake'n.

³ Shi no chli' chsedi dii nak nlla'lə na' bi chidilīn daa bli' bsemi Xancho Jesucristona', na' bi chidiltein daa chsedi cho' goncho ka cheeni Chioza', ⁴ beena' chon ka' nake' ben' chep cha'lall', ben' bibi nezi. Na' daa le chibaile' gakkil-lene' ben', chxie' daa nak yel' xe', yel' wishagdil, yel' chbell chne che ben', na' yel' chza'lall' mal che ben'. ⁵ Na' biga yiyoll yido gakkil-lene' ben' daa ba nxinj yichlall'do'ena', na' bi nombi'e daa nak dii li. Na' chakile' daa chonze' ka chli' chsedi che Chioza' gatile' mech xen. ⁶ Dii li, le mbalaz soacho shi goncho ka cheeni Chioza' na' goncho banez ka'k' to dii de checho. ⁷ La' to ka cha'zchon goljcho yell-lioni, na' to ka cha'zchon yiza'cho. ⁸ Shi de dii cheej chaocho na' de xalaancho, chiyal' goncho banez. ⁹ Na' ben'ka' cheeni gakkil ben' wni'a, chxopgake' lawi daa nak yel' wzelall' na' lliall'gake' biya dii bi yejni'alallii daa chxinj chlenan legake', na' chtakw chchejan legake' na' chbiayi'lengake'n. ¹⁰ Lo yel' wzelall' mecha' chalj chxe biya dii bi yejni'alallii. Bal ben', yel' wzelall' che'ka', ba bilaagake' lo xnez Chioza' na' ba chile'gakile' zan yel' zi'.

¹¹ Per li' chono' xshin Chioza', biga gono' ka chon ben'ka', san ben daa nak dii licha, ben ka cheeni Chioza', wzoatezi wzoa benlilallee, wdap yel' chaki, gok wal lao yog'lol dii idil illago', na' gok ben' gaxjlall'. ¹² Btiplaloo na' ben to dii byen gono' daa cheeni Chioza', beena' nonlilaloo. Na' be'l-lall' beni cho' daa nak yel' mban zejli kani. La' ni cheyinnan' gox wñab Chioza' li' na' bi'o dill' lao ben' zan nan nonlilaloo Crístona'. ¹³ Na' naa, lao Chioza', beena' choe' yel' mban che yog'te dii de yell-lioni, na' lao Jesucristona', beena' be' dill' kon ka nakan lao Poncio Pilátona', chon' byen ¹⁴ wzo' dill' dga nia' li', na' seyi cho' chono' wen na' bibi dii mal ta' icheno' axt ni ka yila' Xancho Jesucristona'. ¹⁵ La' wllin lla yiyede' ka bllia Chioza' bia', Chios, beena' chidol' we'la'ocho, beena' zeelo chñabia'. Zeelo len' nake' Xan yog'lol ben', na' chñabi'e lao yog'lol ben'. ¹⁶ Toze' len' biga lli te che', na' zoe' lo beeni' xen wala' daa kono chzoi wwia. Ni tlish' benech bin' ile'ile'ne' ni bi gakkil'gakile'ne'. Len' chidolee sho'e balaan zejli kani na' biga lli te yel' wñabia' che'na'. Kan' nakan.

¹⁷ Ben'ka' chle'i yel' wni'ana' yell-lioni, gollgake' bi gakkil' ben' cha'siba, ni bi gongake' lez yel' wni'a che'ka'. La' yel' wni'ana' bi nakan lez. San chiyal' gongake' lez Chios yaa Chios banna'. Len' chone' zoayaa zoallin yog'lol daa chyallj chchinicho kwenche si'chon banez. ¹⁸ Gollgake' gongake' wen, na' koo yichjgake' wzanchgake' dii wenka' chongake', na' segake' wneyi izangakile' we'gake' ben' dii de chegake'. ¹⁹ Na' daa gongake' ka', na'chan saki gongake' lez daa zi' za', na' idol'gakile' yel' mban daa nak dowalj.

²⁰ Timoteo, wlooshosh yichjo' dga ba wnia' li'. Bi wzenago' dill'ka' bi yejni'alallii na' bibi zakaan, ni bi wzenago' xtill' ben'ka' chonzə ka nap yel' sin'. ²¹ Bal ben' ba wyajle'gake' cho'a xtilleeka' na' ba bilaagake' lo xnez Chioza'.

Chioza' gakkilshgue' le' na' gone' ka gakkil wen chele.

Kart wchopi daa bzej Páblona' na' bseleen lao Timotewa'

¹ Nad' Pablo nak' postl che Jesucristona' kon ka chaklall' Chioza', kwenche wi'a dill' nan ba bchebe' wi'e yel' mban zejli kani che nottezə beŋ'ka' nak Crístona' txen.

² Chzej' li', Timoteo, nako' ka dowalj bi' cha'. Xacho Chioza' na' Xancho Jesucristona' gaklenshgagake' li', na' yiyesh'lall'gakile' li', na' gongake' ka so' mbalaz.

³ Tlizi choe'llwill' Chioza', beena' chonlilallaa do yichj do lallaa, ka ben dii beŋ' gol cha'ka'. Ka tella ka wal chnab' gaklene' li' na' cho'ane' yel' choxken ni cho'. ⁴ Chjadinid' ka wchello' kana' zeelo bshaljcho, na' cheenid' ile'id' li' kwenche yiba yizakid'. ⁵ Chjadinid' ka nonlilalloo Chioza' do yichj do lalloo, ka ben xna'golo' Lóidana' na' xnoo, Eunícena'. Na' nezyenid' lekzka' li' nonlilalloone' do yichj do lalloo.

⁶ Na' daan, chisa'lalloo chiyal' we'l-lall'cho gono' xshin Chioza' kon ka nak yel' waka' daa bene' lall' no' kana' bxo'a' na'na' yichjo'na'. ⁷ La' Chioza' bene' cho' Espíritu che'na', na' Espíritu che'na' chaklene' cho' kwenche bi gall illebcho, na' chone' cho' yel' wak len yel' chaki, na' chaklene' cho' gakcho beŋ' nyeen nyeeniya. ⁸ Daan, bi yiyi yido'ilo' wi'o cho'a xtil' Xanchona', ni bi yido'ilo' ni cha' daa dia' lillyani daa chon' xshin Chioza'. San chiyal' gono' nad' txen illaglocho yel' zak'zi'ka' ni che cho'a xtil' Crístona', la' Chioza' chaklene' cho' len yel' wak che'na'. ⁹ Chioza' bisle' cho' na' gox wñabe' cho' kwenche gakcho lall' nee, aga yel' chon wen chechonan', san kon ka goklallile' gone'n daa nake' beŋ' wen. Na' daa biyesh'lallile' cho' wlo'e xnezin wselee Jesucristona' kana' zi' wxē wsiltie' yell-lioni. ¹⁰ Na' naa, ba bli'lawi yel' chiyesh'lallii che'na' daa bid Jesucristona', beena' bisla cho', na' blliaeye yel' wak che yel' wita', na' dill' wen dill' kob che'na' chzajniin cho' nan de to yel' mban daa bi te cheyin.

¹¹ Chioza' bzoe' nad' nak' postl na' bene' lall' na' chyixji'a dill' wen dill' kobi na' chli' chsedida'n beŋ'. ¹² Na' ni cheyinnan' chzak'zi'a lao dga chak cha' naa. Per bi chiyi chido'id', la' nezid' ka nak beena' ba nxenilallaa. Na' nezid' nape' yel' wak gapshi'e dill' li' che'na' daa bene' lall' na', kwenche toshiizi gakan dowalj axt kat' illin lla te che yell-lioni.

¹³ Dill' lika' ba bli' bsedid' li', bli' bsemi'n beŋ' kon ka nakan. Na' daa ba nako' txen Cristo Jesús'a, soachecho' gonlilalloone' na' gakteilo' beŋ'. ¹⁴ Espíritu Sántona', beena' zoa loo yichjlall'do'chona', gaklene' li' kwenche toshiizi wli' wsedilo' beŋ' dill' lina' daa ba bsemi' li' na' bi wi'o latj shi ga za'zə beŋ' cheenile' yisheen.

¹⁵ Nezkzilo' yog' beŋ' Ásiaka' wchoonlall'gake' nad', na' lentez Figélon'a' na'ch Hermógeneza'. ¹⁶ Chnabid' Chioza' yiyesh'lallile' Onesíforona' len xiin xoole'na', la' zan shii bidtipe' lallaa na' bi bido'ile' bidwie' nad' loo lillyani. ¹⁷ To ka bidze' Rómani, lii biyiljdotie' nad' axt ki billelile' nad'. ¹⁸ Chnabid' Xanchona' yiyesh'lallile'ne' kat' illin llana' wchogloe' che beŋ'. Nezkzilo' dii xen goklene' cho' Éfesona'.

2

¹ Na' li', naa, xiindawaa, gok wal daa chaklen Cristo Jesús'a' li'. ² Daa ba benilo' bli' bsemi' beŋ', bzajniin beŋ'ka' nxenlalloo, beŋ'ka' nezteilo' wak wli' wsedgakile'n beŋ' yoblə kon ka nakan.

³ Wzoachech btil' yel' zak'zi'ka' chllaglo' lega beŋ' chon xshin Cristo Jesús'a', ka chon' nad'. ⁴ Ni to beŋ' zeje' lo wdila' aga dii yoblə zeze' wneyi, san chiyal' kwey yichje' yog'lo'lte kwenche gone' daa yiyoolallii beena' wleje' le' gake' soldad. ⁵ Lekzka' beena' chxonj, bibi gone' gan shi bi chzoe' dill' gone' yog'lo'lte daa llia bia' gone'. ⁶ Na' beena' cheeni yizi' yilape' chiyal' wwa'gaxje' llin cheyin. ⁷ Wze wneyi dga nia' li', na' Xanchona' wzajni'chile'n li' kwaslöl.

⁸ Jadini Jesucristona', beena' biban ladj ben' wetka', beena' nak xiin dia che dii Davina', kon ka na dill' wen dill' kob che'na' daa chli' chsedid'. ⁹ Na' ni cheyinnan' chzak'zi'a, axt ba wdixjgake' nad' lillyani ka to ben' wen dii mal. Per aga len cho'a xtilleenan' nej lillyani, san zejchlə chliljan. ¹⁰ Daan chzo chzakid' yog' yel' zak'zi' dii chak cha', kwenche ben'ka' ba wlej Chioza' gagkake' lall' nee gonlilall'gake' Jesucristona' na' yilagake' kwenche bi kwiayi'gake', na' lljazoalengake'ne' zejli kani.

¹¹ Dillii nakan dii wxenlall'cho:

Shi ba witlencho Crístoná', lekzka' wbanlenchone'.

¹² Na' shi so sakicho lao bittezə yel' zi' yen ile'icho daa nakchone' txen, lekzka' inabia'lenchone'.

Shi cho' bi wchebcho nakchone' txen, ka'kzə le' ine' bi nake' cho' txen.

¹³ La'kzi cho' bi choncho daa chchebcho, le' chone' ka ba bchebe',

la' toshiizi chone' kon ka chchebe' gone'.

¹⁴ Bi guetlalloo yisoo dga lall' ben'ka' chli' chsedilo'. Na' kon yel' wñabia' che Chioza' daa ba bene' li' bsi'ngakile' bi chiya' gagkuedlenzə ljwellgake' ni cheyi diika' bibi zakii. La' bi chaklenan ben', san chliayi'lan ben'ka' chzenagan. ¹⁵ Ben to dii byen gono' ka chazlall' Chioza' kwenche bibi wsi'n li' yel' zto' lo xshine'na', na' bli' bsemi dill' li che'na' kon ka nakan. ¹⁶ Bi wzenago' dill'ka' bi yejni'alallii na' bite bi zakgakan, la' ben'ka' choe' dill' ka diika' zizikli chongake' daa bi choollall' Chioza'. ¹⁷ La' daa chli' chsedgakile' nakan ka to yillwe' dii nak lech na' chliayi'n ben'. Ka' ben Himenewa' len Filétona', ¹⁸ bilaala'ogake' dill' li che Chioza' na' nazgake' ba bisbanle' ben' wetka'. Na' chonllejgakile' ben'ka' ba nonlilall'gake' Crístoná'. ¹⁹ San dill' li che Chioza' nakan ka to len yoo dii zoachech. Na' dill' li che'na' nan ki: “Xanchona' nombi'e ben'ka' nak lall' nee.” Na' lekzka' nan: “Nottezə beena' na nake' Crístoná' txen, chiya' yikwase' lawi dii mala'.”

²⁰ To loo yoo lill ben' wni'a aga chchine' shgal' dii nak de or wa de plat, san nchixgakan de yag len de yo. Balan naki gana' chchine'n, na' balan chonan llin gattez. ²¹ Ka'kzan beena' chon daa chazlall' Chioza', saklebile' diika' nak de or wa de plat, na' zakee wchin Chioza'ne' gone' dii zan dii wen.

²² Bi gono' txen ni to dii malka' cheeni beli chenna' kat' zoan lo yel' wewaa. Na' ben to dii byen gako' ben' li ben' shao', na' gonlilalloo Crístoná', na' gakilo' ben', na' soaleno' bish' ljwello'ka' mbalaz, ka chon yog' ben'ka' nxi nyech yichjlalldoe'ka', ben'ka' choe'ljwillgake' Xanchona'. ²³ Bi wzenago' dill'ka' biz chon chna, dill'ka' bibi zak', la' ba nezczilo' chxegakan wdil. ²⁴ To ben' nlane' chone' xshin Xanchona' bi chiya' wshagdile' ben', san chiya' gonile' yog'lol ben' wen. Na' chonan byen gak wli' wsedile' ben', na' chiya' gape' yel' chxenlall'. ²⁵ Na' chiya' we'lene' dill' xochi ben'ka' chzoshi' daa nak dill' li daa chli' chsedile', na' gone' lez shicholə Chioza' gaklene' legake' kwenche yiyaj yilengakile' na' gombia'gake' daa nak dii li, ²⁶ na' yiyeen yiyeenigakile' na' yilagake' lo ni'a na' dii xiwaa daa ntakw nchejan legake' daa chongake' ka cheenin.

3

¹ Lekzka' chiya' inezilo' dga: kat' ba zoa te che yell-lioni, dii zan dii nxoll gat'. ² La' ben' zan che to kwinzgake' segake' wneyi, na' lillinzi selall'gake' gat' kwe'gakile' mech, na' gagkake' ben' llalj na' ben' chep cha'lall'. Biz gon inagake' che Chioza', na' bi wzoagake' xtill' xaxneeka', ni bi we'gake' yel' choxken ben' gaklen legake', na' ni bi yoo yichjgake' gongake' ka cheeni Chioza'. ³ Na' bi yiyesh'lall'gakile' ben', ni bi si'xen che bish' ljwellgake', na' le chilj sangake' dill' che ben'. Na' bi sakgakile' inabia' kwingake', na' le yibagakile' wchi' wsak'gake' ben', na' gakzbangakile' yog'lolte daa nak wen. ⁴ Gagkake' ben' chop cho'a dill', na' ben' bibi nalli, na' gon kwingake' ben' choo ben' xen. Na' le yibachgakile' gongake' kon ka chzelall'gake' latjin dii nan gongake' ka cheeni Chioza'. ⁵ La'kzi gonzgake' ka ben' le nxenilall' Chios, na' to kwinzgake' wli' wze chegake' nan bin' we'gake' latj wshaa Chioza' yichjlalldoe'eka'.

Na' li' naa, bi chiyal' gono' ni to ben'ki txen. ⁶ La' kan' nak ben' wxiye'ka' chda to to yoo, na' chziye'gake' noolka' bi nteyi, ben'ka' lall' lao saaxyana' na' chongake' biya dii mal. ⁷ Noolki tlizi chzenaggake' daa chli' chsedi nottezə ben' legake' na' biga lia chombia'gake' daa nak dii li. ⁸ Ka ben ben'ka' le Janes na'ch Jambres, wzoshiy'gake' dii Moiséza', kan' chon ben'ki chsej chllongake' cheyi daa nak dii li daa nxinj nlen yichjlall'do'eka'. Na' bi nde ben'ki kwent lao Chioza' la'kzi nazgake' nonlilall'gake'ne'. ⁹ Na' aga wgol daa chongake', la' yog' ben' gakbe'i nakgake' ben' bi yejni'alallii, ka gok che ben'ka' chop, ben'ka' wzoshiy' dii Moiséza'.

¹⁰ Na' li', naa lla, ba nezki' ka nak daa chli' chsedid', ka nsa' cha', ka nak daa lliallalaa gon', ka nonlilalalaa Chioza', na' ka nak yel' chxenlallaa na' yel' chakina' nap', na' ka chtip lallaa kwenche chzo chzakid' yel' zak'zi'ki chtil'. ¹¹ Na' nezilo' ka nak yel' zak'zi'ka' diika' ba bllagloa', ka diika' btil' Antioquíana', na' Icóniona', na'ch Lístrana'. La'kzi dii zan dii ba bllagloa', Xanchona' ba bisle' nad' lao yog'lolten. ¹² Dii li, yog'lol ben'ka' cheengakile' gongake' ka cheeni Chioza' daa nakgake' txen Cristo Jesúza', wsak'zi' ben' legake'. ¹³ Na' ben' wen dii malka' len ben' wxiye'ka', zizikli gongake' mal, na' gaklelagakile' siye'chgake' ben' na' axt kwingake' ba chiyajle'gake' che yel' wxiye' che'ka'.

¹⁴ Na' li', naa, wzoachech lawi daa ba nsedo' na' ba wyajli'o. La' nombia'kzo' ben'ka' bli' bsemi li'. ¹⁵ Jadini kana' naktio' bi'do' nombi'o Cho'a Xtill' Chioza', na' lennan' gonan li' yel' sin'na' daa chsedin li' gonlilalloo Cristo Jesúza' kwenche yilo' na' bi kwiayoo. ¹⁶ Kwin Chioza' bzajniile' dii ben'ka' bzej doxen Cho'a Xtilleena', na' zakaan wli' wsedin ben', wsheshlenen ben' bi chon wen, yigoon shli lall' ben' nakleji, na' wzajniin ben' kwenche gake' ben' li ben' shao', ¹⁷ kwenche beena' chon ka cheeni Chioza' zizikli gakchache' na' gak gone' yog' diika' nak wen.

4

¹ Lao Chioza' na' lao Cristo Jesúza', beena' yiyede' inabi'e na' wchogloe' che to to ben', ka ben' ni mban na' ka ben' ba wit, chon dga lo no': ² Be'len ben' Cho'a Xtill' Chioza', na' toshiizi benan kat' de xlatjin gono'n, laa cheengakile' wzenaggake'n laa bi cheengakile'. Ben ka yiyakbe'i ben' nan ba bxinj blene', bsheshlen beena' bi zej shli, na' btip lall'gake' gongake' wen, na' wdap yel' chxenlall' chegake' na' bli' bsemi legake'. ³ La' wllin lla kat' ben' yell-lioki bich gaklall'gake' wzenaggake' daa nak dii licha. Na' daa cheengakile' gongake' kon ka nan yichjlall'do'eka', yiyiljgake' wde wdeli ben'ka' chli' chsedi daa chiyoolall'gake' wzenaggake'. ⁴ Na' yilaala'ogake' daa nak dii li na' wzenaggake' bizə dill' gol. ⁵ Per li', gokto lega ben' nyeen nyeeniyi lao yog'lolte dii chak, na' so sakilo' wtiloo yel' zak'zi'ka'. Ben ka dii le be' dill' wen dill' kob che Crístona', na' ben xshin Chioza' daa ba nak lall' no'.

⁶ La' ba zoa witgake' nad' daa chon' xshin Crístona', na' ba zoa gaoshosh lljazoalenee. ⁷ Ba ben' ga zeelo bizoid', na' ba biyoll ben' daa ben Chioza' lo na' gon', na' toshiizi wzoachech' benlilallaane'. ⁸ Na' naa ba chbez' llana' ikaa daa chidolaa daa ba ben' dii wenna'. Na' Xanchona', beena' chchoglo che ben' kon ka nakan, gone'n nad', na' aga toz nad', san len yog' ben'ka' do yichj do lall'gake' nongake' lez llana' yiyede' sto shii.

⁹ Ben to dii byen lii yidwiatezo' nad', ¹⁰ la' Démaza', daa ngoo yichje' daa de yell-lioni, ba wchoonlallee nad' na' ba ziyaje' Tesalónicana'. Na' Crescéntena' zeje' zji'e cho'a xtill' Chioza' Galáciana', na' Títona' zeje' Dalmáciana'. ¹¹ Tochga Lúcazi zoalene' nad'. Jadilj Márcona' na' dalene' ni kwenche gaklene' nad' lo xshin Crístona'. ¹² Ba bselaa Tíquiconá' Éfesona'. ¹³ Kat'ka' tio' Tróaza' ikaasho' xachela' chdob' daa bkwaan' lill Cárpona'; na' lekzka' bej' librka', na' dii lliallote goxoo libr de yidka'.

¹⁴ Alejandro, ben' wichekw yana', le michian bene' cha', na' Xanchona' wi'ene' daa chidolee. ¹⁵ Lekzka' li', wsako' ki gone' cho' ka', la' le chakzbanile' daa chli' chsedicho.

¹⁶ Dii nech ka bdegake' nad' lao beṅ'ka' chṅabia' ni, ni to beṅ' bish'choka' bi gok-lengake' nad'; yog'zgake' wchoonlall'gake' nad'. Chṅabid' Chioza' si'xene' chegake'.

¹⁷ Per Xanchona' goklene' nad' gok' wal kwenche bia' cho'a xtilleena' lao beṅ'ka' biṅ' gonlilall'gake'ne', na' bisle' nad' lao yeḷ' wita'. ¹⁸ Na' Xanchona' yisle' nad' lao yog'lol dii mal, na' lljazoalenee yabana' gana' chṅabi'e. Len' chidoḷee sho'e balaan zejli kani. Kan' nakan.

¹⁹ Bwapsha nad' chiox Priscana' len Aquilana', na' yog' beṅ' lle' loo yoo lill Onesíforona'.

²⁰ Erástoná' bigaane' Coríntona', na' bkwaana' Trófimona' Milétona' daa bi shawee.

²¹ Btalalloo yido' ka zi' yizolo' dii zaga'. Eubúloni, Pudénteni, Línoni, Cláudiani, na' yog'lol beṅ'ki nakcho txen nonlilall'cho Jesucristona', chwapgake' li' chiox.

²² Xancho Jesucristona' soalenshgue' li'. Na' gone' ka gak wen che yog'le.

Kart daa bzej Páblona' na' bseleen lao Títona'

¹ Nad' Pablo chzej' li', nak' wen llin che Chioza' na' nak' postl che Jesucrístona', na' bselee nad' kwenche gaklen' ben'ka' ba wlej Chioza' gonlilall'gake'ne' na' gombia'gake' daa nak dii li daa chzajniin cho' goncho ka cheenile'. ² Na' zoacho noncho lez to yel' mban zejli kani. Kana' zi' wx̄e wsiltie' yell-lioni, Chios, beena' biga chziye', bchebe' gone'n cho'. ³ Na' naa ba bllin lla, Chioza', beena' chisla cho' kwenche bi kwiayi'cho, chzenile' yog' ben' cho'a xtilleena' daa bene' lall' na' chyixji'a, kon ka wne' gon'. ⁴ Chzej' li', Tito, nako' ka dowalj xiin' daa nakcho toz chonlilall'cho Jesucrístona'. Xacho Chioza' na' Jesucrístona', beena' bisla cho' lao saaxya chechoka' kwenche bi kwiayi'cho, gaklenshgagake' li' na' gongake' ka so' mbalaz.

⁵ Bkwaana' li' Crétana' kwenche wzeelo' koo x̄nezi daa bi biyollichō, na'ch kwejo' ben' koo lo na'gake' ben'ka' nakgake' t̄xen nonlilall'gake' Crístona' to to yell, kon ka ba wnia' li' gono'. ⁶ Beena' gak lall' nee ben'ka' nonlilall' Crístona' chiyal' wsa' che' wen kwenche bibi de ina ben' che', na' gake' ben' zoa toz xoolin, na' gonlilall' xiine'ka' Crístona', na' bi gagakb' bi' mal ni bi' widenag kwenche bi wx̄a'gakb' cho'alao ben'. ⁷ Daa ngoo lall' nee xshin Chioza', chiyal' gake' dowalj ben' wen, ben' bibi de ina ben' che', na' bi gake' ben' chep cha'lall', ni bi gake' ben' lok, ni weezo, ni wishagdil, ni ben' wzelall'. ⁸ San chiyal' wi'e ga yigaan ben', na' yibaile' gone' dii wen, na' gake' ben' nyeen nyeeniya, na' ben' nxi nyech, na' ben' ch̄nabia' kwiniin. ⁹ Chiyal' gonlene' x̄till' Chioza' daa nak dii li daa ba nsede', kwenche wtipe' lall' ben' yobl̄ daa wli' wsedile' legake' daa nak dii li, na' gone' ka shajle' ben'ka' nagake' aga kan' nakan.

¹⁰ La' ben' zan inleeb ben' widenag zoa, ben' biz̄a chon chna, na' ben' chziye', na' zangake' nakgake' ben' Israel, ben'ka' na' yog'lōl̄te ben' byoka' chonlilall'gake' Crístona' chiyal' sho'gake' sēn daa le circunciśiōn. ¹¹ Ben'kan' bi chiyal' we'cho latj wli' wsedgakile' ben', la' daa chzelall'gake' gongake' gan mechan' chdagake' to to yoo chli' chsedgakile' daa bi nak shli, na' chonllejgakile' do bx̄oontegake'.

¹² To ben' Creta, ben' ch̄neyaa, wne' che ben' wlall' che'ka': "Ben' Cretaki nakgake' ben' wxiye', ben' mal ga zeelo, ben' cheej chao ka n̄la' ka nte, na' ben' lia." ¹³ Na' dii likz̄a ka nakannan'. Daan, bsheshlengake' ka chiyal' kwenche shajni'gakile' daa nak dii li daa ba wyajle'gake', ¹⁴ na' bich wzenaggake' che dill' golka' daa wdiljlall' ben' Israelka', ni bi wzenaggake' daa naz̄a ben'ka' chzoa ka'l̄a daa nak dii li.

¹⁵ Ben'ka' ba nxi nyech yichjlall'do'eka' lao Chioza', ni daa cheej chaogake' ni daa chox̄gake' bi chsej chllonan gak yichjlall'do'eka' dii nxi nyech. San ben'ka' nxiñj yichjlall'do'eka' na' bi chajle'gake' che Crístona', bibi dii nxi nyech de lawe'ka', la' yichjlall'do'eka'ten lle' lla' dii mala', na' ni bi chao chdian legake' kat' ch̄xiñj ch̄lengake'. ¹⁶ Nazgake' nombia'gake' Chioza', per diika' chongake' chili'n laogake' bi nombia'gake'ne'. La' nakgake' ben' mal ga wdelawin, na' nakgake' ben' bi chzoa dill', na' biga gakkz̄a gongake' daa nak dii wen.

2

¹ Na' li' naa, bli' bsedi ben' daa nak dii li. ² Bzajniin ben' golka' gagake' ben' nsa' cheyin wen, ben' chidol' gap ben' legake' balaan, ben' nyeen nyeeniya, na' soachehgake' gonlilall'gake' Crístona', na' gagakile' ben', na' so sakgakile' bittez dii yen ile'gakile'. ³ Lekzka' nool golka' chiyal' gall illebgake' Chioza', na' bi gakkz̄gake' ben' w̄ichitj dill', ni bi we'gake' latj gonz̄a yel' weezona' legake' gan, san chiyal' gongake' wen kwenche ile'i ben' ka chiyal' gongake'. ⁴ Na' wli' wsedgakile' nool xkwid'ka' gaki ben' che'ka' na' gaki xiine'ka', ⁵ na' gagake' ben' nyeen nyeeniya, ben' bi nda' nchen dii mal, na' gap wwia' loo

yoo lillgake', gakgake' ben' chiyesh'lallii, na' wlexj yichjgake' lao ben' che'ka' kwenche kono ine zban che xtill' Chioza' ni chegake'.

⁶Na' lekzka' goll bi' wew'ka' gakgakb' bi' nyeeñ nyeeniyi. ⁷Li'yen'an chiyal' wli'o chono' wen lao yog'lołte daa chono'. Na' wsa' cho' bash bal kat' wli' wsedilo' ben' na' benan do yichj do lalloo, ⁸na' wsako' wi'o dill' kwenche bibi de ina ben' cheyin. Na' yido'i ben'ka' chakzbani cho' daa bibi de gon inagake' checho.

⁹Bzajñii ben'ka' yoo xanin wlexj yichjgake' lao xane'ka', na' gongake' ka yiyoolall'gake', na' bi yilliizgake' legake' dill'. ¹⁰Na' bibi si' kwangake' che xane'ka', san soa do lall'gake' kwenche wli'gake' lao yog'loł daa chongake' nan le wen nak cho'a xtill' Chioza', beena' bisla cho' kwenche bi kwiayi'cho.

¹¹Chioza' ba bliile' yog'loł ben' yel' goklen che'na' kwenche yilagake' na' bi kwiayi'gake'. ¹²Na' yel' goklenna' daa bene' checho chli' chsedin cho' kwej yichjcho daa bi nak wen na' diika' chzelall' beli chenna', na' soacho yell-lioni nyeeñ nyeeniyicho, goncho ka chiyoolall' Chioza', na' gall illebchone', ¹³shlak noncho lez illin lla choo lla xenna' yila' Jesucristona', beena' nak ben' choo ben' xen, na' nake' Chios checho na' bisle' cho. ¹⁴Len' bzani yel' mban che'na' ni checho kwenche bisell bilee cho' lao yog'loł dii mala', na' bixis biyibe' cho' kwenche gakcho lall' nee na' selall'cho goncho daa nak wen.

¹⁵Dgan chiyal' wli' wsedilo' ben', na' wtip'o' lall'gake' gongake' ka cheeni Chioza', na' wsheshleno' ben'ka' bi chon wen, na' benan lega ben' nzoa Chioza'. Na' kono chiyal' gonzi li' nakzi.

3

¹Bisa'lall'gake' wlexj yichjgake' lao ben'ka' chñabia', na' gakgake' ben' wizoa dill', na' segake' wñeyi gongake' daa nak wen. ²Bibi gon inazgake' che ben', san soalengake' ben' mbalaz na' gongakile' legake' wen, na' gakgake' ben' gaxjlall' lao yog'loł ben'.

³Lekzka' cho', kana' gokcho ben' bi nteyi na' ben' bi bzoa dill', na' gosh' wlall'cho lao dii mala', na' btakw bchej biya diika' bibayi beli chen chechona' cho', na' gokcho ben' xe'. Gokzbani ben' cho' na' gokzbani ljwellcho ganga. ⁴Na' Chioza', beena' bisla cho' kwenche bi kwiayi'cho, bliile' cho' yel' ben' wen che'na' len yel' chaki che'na'. ⁵Aga inacho daa bencho dii wennan' bisle' cho', san daa biyesh'lall'lile' cho'n. Na' bixis biyibe' yichjlall'do'chona' kwenche biyakcho ben' wen, na' Espiritu Santo che'na' bikobe' yel' mban chechona'. ⁶Na' daa wit Jesucristona', beena' bisla cho', Chioza' bzoe' Espiritu Santo che'na' loo yichjlall'do'choki. ⁷Na' daa biyesh'lallile' cho', biyone' cho' ben' li' ben' shao' kwenche goncho lez ikaacho yel' mbanna' nak zejli kani.

⁸Dillii nakan dii wxenlall'cho. Na' cheenid' gono' to dii byen wli' wsedilo'n ben'ka' chajle' che Chioza' kwenche segake' wñeyi gongake' wen. Diikin nakgakan wen na' gaklennan yog' ben'. ⁹Bi gakguedlenzo' ben' ni che cho'a dill'ka' chyiljlall'gake', ni daa nazgake' ben dii xozxtoe'ka' daa bi chiyoll chido, ni bi gaklebil'o' ben'ka' chakguedz ni che leya' daa bzej dii Moiséza'. La' bi chaklengakan ben' na' bibi zak'gakan.

¹⁰Na' shi no chgoo ben'ka' dill' kwenche gakgake' choplə, chiyal' we'leno'ne' dill' bich gone' ka', na' shi ba gollo'ne' ka' to chop shii na' bi chzenagkze', bkwaschokle' ka'la. ¹¹La' nezicho to kwinzen' chlliayi' kwine' daa nxinj yichjlall'do'ena' na' chontie' dii mala'.

¹²Kat' wselaa Artémaza' wa Tíquicon'a' gana' zo', ben to dii byen yidwio' nad' yell Nicópolisa', la' na' ba nchoglallaa ljsoa' shlak te beo'ka' chbe' dii zaga'. ¹³Goklengach ga zeelo gako' Zénaza', beena' nsed ley che Rómána', na'ch Apóloza'. Be'gake' daa chyalj chchingakile' kwenche koochgake' nez na' bibi iyalljgakile'. ¹⁴Na' lekzka' ben'ka' nakcho toz chiyal' sho'logake' gongake' daa nak wen na' gaklengake' ben' shi bi chyalj chchingakile' kwenche ka' wgongake' llin daa ba nsedgake'.

¹⁵ Yog'lo_l be_n'ki zoalen nad' ni chwapgake' li' chiox. Bwapgach chiox yog'lo_l be_n'ka' lle' na', be_n'ka' chakgakile' cho' daa nakcho txen chon_lilall'cho Crístona'. Chioza' gaklen-shgue' yog'lo_l-le. Ka' gakan.

Kart daa bzej Páblona' na' bseleen lao Filemónna'

¹ Nad' Pablo, dia' lillyani daa chyixji'a xtil' Cristo Jesúsza', chzej' li' Filemón. Na' len beñ' bish'cho Timotewi chwapnto' li' chiox, daa le chakinto' li', na' daa nakcho txen choncho xshin Chioza'. ² Na' lekzka' chwapnto' chiox beñ' zanchó Ápiana', na' beñ' bish'cho Arquípona', beena' nakcho txen chdil-lencho dii mala' daa choncho xshin Chioza', na' beñ'ka' chdop chllag lillo'na' choe'la'ole Crístona'. ³ Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

⁴ Toshiizi kat' choe'lwill' Chioza' chjadinid' li' na' cho'ane' yel' choxken ni cho', ⁵ la' ba nezid' ka nonlilalloo Xancho Jesucrístona' na' chakilo' yog' beñ'ka' nak lall' na' Chioza'. ⁶ Chñabid' Chioza' gaklene' li' gono' ka dii le we'leno' beñ' cho'a xtilleena' daa ba wyajli'o kwenche shajni'chilo' kwaslo' ka nak dii wenka' naki checho daa nakcho Crístona' txen. ⁷ Beñ' bish', chiba chizakid' daa chakilo' bish' ljwello'ka', na' dii xen chtipan lallaa, la' nezid' chtipo' lall' beñ'ka' nak lall' na' Chioza'.

⁸ Na' daan, la'kzi nap' yel' wñabia'na' beñ' Crístona', na' wak gon' byen inia' li' daa chiya' gono', shel'ka', ⁹ chakid' wenlan gat'yoid' li' gono' daa cheenid' daa chaki ljwellcho. Nad' Pablo ba nak' beñ' gol na' dia' lillyani daa chyixji'a xtil' Cristo Jesúsza', ¹⁰ chñabid' li' to goklen che Onésimoni, beeni nak ka xiin' daa be'lenee xtil' Crístona' shlak dia' lillyani.

¹¹ Kana' wzoalene' li' bi bene' ka dii le gone' xshino'na', san naa wak gaklene' li' ka chaklene' nad'. ¹² Na' chiselaane' lawo'na', la'kzi le chakyeshii lall'dawaani yizee daa chakchgaidee. Na' li' naa, bilebshe', kon gakilo' nad'kzan' chilebo'. ¹³ Goklallaa wkwaana'ne' gaklene' nad' lo xlatjo' shlak dia' lillyani ni che dill' wen dill' kob che Crístona'. ¹⁴ Per bi goklallaa wkwaana'ne' shi bi wchegaxjo', kwenche yel' goklen daa gono' cha' bi gonyaadiazo'n, san gono'n do yichj do lalloo. ¹⁵ Shi bizee lillo'na' shloll kwenche naa gake' lall' no' toshiizi. ¹⁶ Na' bich gake' to beñ' ndoo lla yel chone' xshin beñ' san gake' beñ' bishoo, beñ' gakilo'. Nad' le chakidee, na' li' chiya' gakchilo'ne' aga ka bish' ljwellzo', san ka dowalj beñ' bishoo daa nakle toz nonlilall'le Xancho Jesucrístona'.

¹⁷ Na' shi nako' nad' txen lo xshin Crístona', bilebshe', kon gakilo' nad'kzan' chlebo'. ¹⁸ Na' shi bi bene' cho' wa shi bi chbaguee cho', na' wchixjo'n nad'. ¹⁹ Kwin nad', Pablo chzej' dga, na' nia' li': Nad' chixjaan. Na' bi nia' li' lekzka' chbagoo cha' daa ba napo' yel' mban zejli' kaní. ²⁰ Beñ' bish', chñabid' li' yel' goklenni daa chakicho Xancho Jesucrístona'. Ben ka soa' mbalaz daa nakcho toz nxenilall'cho Crístona'.

²¹ Chzej' li' daa nezid' nako' beñ' wízoa dill', na' nezid' ax't dii xenchlə gono' aga ka daa chñabid' li'. ²² Na' lekzka' nia' li', beshao'sha gana' soa', la' daa choe'lwill'-le Chioza' ni cha', non' lez yichej' ni na' wi'e latj yidwia' le'.

²³ Chwap Epáfrazi li' chiox, beeni nak' txen dento' lillyani ni che xtil' Cristo Jesúsza'. ²⁴ Na' lekzka' Márconi, Aristárconi, Démazi, na'ch Lúcazi, beñ'ki chaklen nad' lo xshin Chioza', chwapgake' li' chiox.

²⁵ Xancho Jesucrístona' soalenshgue' le' na' gaklene' le'.

Kart daa bseḷ' to beṇ' lao beṇ' hebreoka', beṇ'ka' nonḷilall' Jesucrīstona'

¹ Kani'yi zan shii Chioza' bchine' dii beṇ'ka' wdixjee daa golle' legake' na' aga toz ka bchine' to toe' kwenche be'lene' dii xozxto'choka' dill'. ² Na' naa ba zoa te che yell-lioni, Chioza' bselee Xiine'na' be'lene' cho' cho'a xtilleena', na' len' nzoe' gak lall' nee yog'te dii de, na' lekzen' bene' yabana' len yell-lioni, diika' bllia Chioza' bia' gak.

³ Len' chli'e ka beṇ' choo beṇ' xen inleeb nak Chioza', na' chli'e ka nakyen' Xe' Chioza'. Na' len' chone' kwenche yabana' len yell-lioni na' yog'loḷ diika' lle' lla' lawinka' chongakan kon ka bllie' bia' gongakan daa nape' yel' wak kwenche chak kon ka ne'. Na' len' bixis biyibe' yichjlall'do'chona' ka bikwase' saaxya chechoka', na' biyolla' biyep'e yabana' gana' chi'e shḷaa de shḷi che Xe' Chioza', beena' nak beṇ' choo beṇ' xen, na' chnabia'lene'ne'.

⁴ Na' daa bene' dga, bli'e nake' beṇ' zak'chi aga ka anjlka', na' lekzka' daa goll Chioza'ne' "Xiin'", nakbia' nake' beṇ' zak'chi aga ka legake'. ⁵ La' Chioza' biga golle' ni to anjlka' ka dga golle' Xiine'na':

Li' nako' Xiin',
na' naa daa solo inabi'o inezi beṇ' nadaan nak' Xo'.
Na' ni to anjlka' bi' golle':
Nad' gak' Xo',
na' li' gako' Xiin'.

⁶ Na' lekzka' ka bseḷ' Chioza' Xiine'na', beena' nak tlish' tyaj, lo yell-lioni, wne':
We'la'oshga yog'loḷ anjl cha'ka' le'.

⁷ Na' Cho'a Xtill' Chioza' cho'en dill' che anjlka', nan:
Chone' anjl che'ka' beṇ'ka' chon xshine'na',
ka be' na' ka beḷ' yi'.

⁸ San che Xiin' Chioza' nan:
Li' nako' Chios na' inabi'o zejli kaṇi.
Na' yel' wṇabia' cho'na' nakan dii zej shḷi.

⁹ Chibailo' yel' li' yel' shawaa na' chwiilo' daa nak mal.
Daan Chioza', beena' nak Chios cho', ba bzoe' li' kwenche inabi'o,
na' ba bene' ka soacho' mbalaztech aga ka beṇ'ka' nako' txen.

¹⁰ Na' lekzka' nan:
Lin' nako' Chios, na' lin' bxe bsilo' yell-lioni ka wzolon,
na' li'kzan bxe bsilo' yabana'.

¹¹ Yog' diika' te chegakin, san li' zoakzo' zejli kaṇi.
Na' yog' diika' yiyigakan ka chiya to xalaan beṇ'.

¹² Na' yikwasgako'n,
na' yikobgako'n ka to beṇ' chikob xalaane'.
San li', toz ka zo' zejli kaṇi;
biga llia te cho'.

¹³ Ni shlin bin' ye' Chioza' ni to anjl che'ka':
Wche' kwit' de shḷi ni, shlak wzoa' xni'ona' beṇ'ka' chakzbani li'.

¹⁴ San yog' anjlka' nakgake' wen llin che Chioza', na' chselee legake' chaklengake' cho' nakcho beṇ' yisle' kwenche bi' kwiayi'cho.

2

¹ Daan, chonan byen wzenagchcho do yichj do lall'cho dill' wen dill' koba' daa ba benicho kwenche bi' laacho lo xneze'na'. ² La' diika' bllia Chioza' bia' goncho, diika'

wdixjee anjlka', gokgakan to dii zakii, na' yog' ben'ka' wdishjgake' cho'a xtilleena' na' bi bzenaggake'n wxak'zi'gake' kon ka chiyal' gak chegake'. ³ ¿Alechlə naa aga wilacho lao yel' zak'zi'na' shi gonicho nakzi daa nak to dii zakii nleb daa ba ben Chioza' checho kwenche yisle' cho' na' bi kwiayi'cho? Zigaate Xancho Jesúsza' wdixji'e daa yisle' cho', na'tech ben'ka' bzenag che' bizchopgake' dillaa bi'e. ⁴ Na' lekzka' Chioza' bli'e nan nakan dii li daa bene' ka ben ben'ka' dii zan yel' wak na' dii chon ka chibanicho, na' bselee Espíritu Santo che'na' bene' wde wdeli dii gak gon to tocho kon ka chaklall' Chioza'.

⁵ Aga bllia Chioza' bia' inabia' anjlka' lo yell-lío koba' daa ba ngwee xnezin gone', dga cho'a dill' cheyin naa. ⁶ San nakan ka wna to ben' bzej Cho'a Xtill' Chioza' kani'yi daa na: ¿Nora naknto', neto' ben' yell-lío, chi' yichjzo' neto', na' zezo' wneyi che neto' naknto' xiin benech?

⁷ Zi lat'zə ki beno' neto' ka anjl cho'ka',

na' nono' neto' to balaan xen wal.

Na' bzo' neto' inabia'nto' lao yog'te diika' beno'.

⁸ Na' beno' yog'lolten lall' na'nto'.

Na' daa bene' lall' na' ben' yell-lioni yog'lol dii de, zevin aga bi de dii bi gak lall' na'cho, la'kzi naa bin' ile'icho gak yog'lol dii de lall' na'cho. ⁹ Per nezicho Jesúsza' ba yo'e to balaan xen wal, la'kzi bi bllin sakee ka anjlka' shlak wde' lo yell-lioni goke' benech kwenche wxak'zi'e na' wite' ni checho. La' daa nak Chioza' ben' wenan, bzanile'ne' ble'ile' yel' wita' lo laz yog'lol ben'.

¹⁰ Dii li, Chioza', beena' bxe bsil yog'lolte dii de na' nakgakan che', cheenile' ben' be ben' zil gagkake' xiine' kwenche yichi'e legake' gana' de balaan xen che'na'. Daan, benan byen bzanile' Jesúsza' wxak'zi'e na' wite' kwenche bisle' cho'. Na' ka', biyoll bido bene' yog'lol daa nllia Chioza' bia' gone'. ¹¹ Jesúsza', beena' ba bixis biyibe' cho', na' cho' ba bixi biyechcho, toz Xachon nak. Daan, bi chiyiyi Jesucristona' ine' nakcho bish' ljwelle'. ¹² Na' chi'e Chioza':

Wi'a dill' cho' lao bish' ljwell'ka',

na' gol inia' li' ladj ben'ka' chdop chllag choe'la'ogake' li'.

¹³ Na' wizne':

Nad' wxenilallaa Chioza'.

Na' sto shii chi'e:

Ni zoalen' ben'ki nak xiin Chioza', ben'ki bene' lall' na'.

¹⁴ Na' daa nak xiine'ka' ben' de beli chen, lekzka' Jesúsza' golje' goke' ben' de beli chen kwenche wite' ni checho. Na' ka wite', bsol bnite' yel' wñabia' che dii xiwaa daa gok lall' na'yin wlliai'n ben'. ¹⁵ Na' bisle' cho' ben' yell-lío, cho' nakcho ka ben' ndoo lao yel' wita' shlak mbancho daa chllebcho guetcho. ¹⁶ La' dii li, aga bid Jesúsza' kwenche gaklene' anjlkan', san kwenche gaklene' xiin dia che dii Abrahaman'. ¹⁷ Daan, benan byen goke' ben' de beli chen doxen ka nakcho, cho' bish' ljwelle', kwenche yiyesh'lallile' cho' na' soe' gone' ka ben Chioza' lo nee gone' daa nake' bxoz choo bxoz xen checho. Na' bzani kwine' wite' kwenche bizi'xen Chioza' saaxya chechoka'. ¹⁸ Na' daa bizo bizakile' btilé' daa nan kooyelaan le' bi gone' ka cheeni Chioza', wak gaklene' cho' kat' za' daa cheenin kooyelaan cho' goncho daa bi chazlall' Chioza'.

3

¹ Na' naa, le' ben' bish' na' le' ben' zan', le' ba nxi nyech yichjlall'do'lena' na' ba gox wñab Chioza' le' kwenche nakle lall' nee, li se wneyi ka nak daa ben Cristo Jesúsza', beena' choe'cho dill' nonilall'chone'. Nake' beena' bsel' Chioza' na' naktie' bxoz choo bxoz xen checho. ² Len' bene' yog'lol daa goll Chioza'ne', kon ka ben dii Moiséza' ladj ben'ka' nak yell che Chioza'. ³ Na' chidol'ch Jesúsza' balaan xench aga ka dii Moiséza', ka chak che to ben' chone' to yoo chooche' balaan xench aga ka yooná' daa bene'. ⁴ Yog'z yoo zoa ben' bene'n, per Chioza' nake' beena' ben yog'lolte dii de. ⁵ Dii Moiséza', beena' gok wen llin

che Chioza', bene' yog'lol diika' golle' gone' ladj ben'ka' nak yell che Chioza'. Na' diika' bene' chaklenan kwenche shajniicho diika' zi' we' Chioza' dill' cheyin. ⁶ Per Crístona', beena' nak Xiin Chioza', lekzka' bene' yog'lol diika' golle'ne', na' ngoo lall' nee ben'ka' nak lall' na' Chioza'. Na' chon', nakcho lall' na' Chioza' shi soachecho gonlilall'chone' na' yibaicho daa noncho lez ljazoalenchone'.

⁷ Daan, Espíritu Sátona' wne':

Shi chenile daa na Chioza' naanlla,

⁸ bi gakte ben' lall'do' wal ka gok dii xozxto'leka' na' bshaagake' Chioza' daa bi wyajle'gake' gone' ka bchebe' kana' wdagake' gana' bibi chashj chleb.

⁹ Na' wna Chioza': Kana' dii xozxto'leka' gokgake' ben' widenag daa bi wyajlegake' gon' daa bcheb' gon' chegake', la'kzi choa yiz ble'gakile' diika' ben' chegake'.

¹⁰ Daan, bllaa legake',

na' wnia': "Toshiizi chongake' kon ka nazan chegake', na' bi chzenaggake' cha'."

¹¹ Daan, lo yel' chllaa cha'na' bcheb', wnia':

Nezgan' wi'a latj gaki chegake' yel' wixi'lall' cha'na'.

¹² Le' ben' bish' na' le' ben' zan', li wsak' kwenche ni tole bi xin'z yichjlall'do'lena' na' gonan ka bich shajle'le na' yilaala'ole Chios yaa Chios banna'. ¹³ San li wtip lall' ljwell'le yog' lla shlak naa ni de latj wzenagle che Chioza', kwenche bi siye' dii mala' le' na' yiyonan le' lall'do' wal. ¹⁴ Nakzcho Crístona' txen shi shnon mbancho soachecho wxenilall'chone' kon ka wzoacho kana' zi' bxenilall'chone'.

¹⁵ Kon ka na Cho'a Xtill' Chioza':

Shi chenile daa na Chioza' naanlla,

bi gakte lall'do' wal ka gok dii xozxto'leka' kana' wdagake' gana' bibi chashj chleb, kana' biyechj bibiitezgake' Chioza'.

¹⁶ ¿Nora ben'ka' beni daa goll Chioza' na' biyechj bibiitezgake'ne', lla? Yog' ben'ka' bibej dii Moiséza' Egíptonan' ben ka'. ¹⁷ Na' ¿nora ben'ka' bllaa Chioza' choa yiz, lla? Ben'ka' bxinj b'lenan, ben'ka' wit gana' bibi chashj chleb. ¹⁸ Na' ¿nora ben'ka' wna Chioza' chegake' bat ljazi'lall'gake' lo yell-liona' bchebe' wi'e legake', lla? Legaken' ben'ka' gok ben' widenag lawe'na'. ¹⁹ Na' nezicho bi gok yillingake' gana' yizi'lall'gake' daa bi wyajle'gake' che'.

4

¹ Daan, shlak ni de latj idolicho yel' wixi'lallaa daa ba bcheb Chioza' gone' cho', chiya'l goncho byen kwenche idol' illonichon na' ni tocho bi igaanzcho ka'z. ² La' cho' ba benicho dill' wen dill' kob che Chioza', ka daa beni dii xozxto'choka'. Per la'kzi bengakile'n, bi goklenan legake' daa bi wyajle'gake' cheyin. ³ San cho' ba wyajle'cho cheyin ba nakten gon Chioza' cho' yel' wixi'lallaa daa bllonile' ben'ka' kana' wne':

Daa bllaa legake' na' wnia':

nezgan' wi'a latj gaki chegake' yel' wixi'lall' cha'na'.

Per ka nak Chioza', wzoloe' chizi'lallee ka biyoll bxe bsile' yell-lioni. ⁴ La' Cho'a Xtilleena' cho'en dill' che lla gall llana', gana' nan:

Ka bllin lla gall llayina', ba biyoll ben Chioza' yog'lol daa bene', na' bizi'lallee.

⁵ Na' lekzka' cho'en dill' kana' wne':

Nezgan' wi'a latj gaki chegake' yel' wixi'lall' cha'na'.

⁶ Per ni de latj gat' to yel' wixi'lall' che zi bal' ben' cheeni, la' ben'ka' bengakile' dii nech dill' wen che Chioza' bi gok yillingake' gana' yizi'lall'gake' daa bi bzenaggake' che'. ⁷ Daan, bllia Chioza' bia' che sto lla, na' wde zan yiz wnie' dii Davina' kwenche wi'e dill' che llani naa, na' wne':

Shi chenile daa na Chioza' naanlla,

bi gakte lall'do' wal.

⁸ Shel' dii Josuéna' bene' ka yizi'lall' dii xoxto'choka' ka bcheb Chioza' gone' chegake', aga bliia Chioza' bia' sto lla yoblə gat' yel' wixi'lall', shel'ka'. ⁹ Daan, nezicho ni de latj idol' ben'ka' nak lall' na' Chioza' yel' wixi'lall' che'na'. ¹⁰ La' beena' ba bdolj yel' wixi'lallaa daa bcheb Chioza', ba chizi'lallee ka bizi'lall' Chioza' kana' biyoll bxe bsile' yog'lol' dii de. ¹¹ Na' cho' chiyal' goncho byen idolicho yel' wixi'lallaa daa bcheb Chioza' kwenche ni tocho bi gackho ben' widenag ka gok ben'ka' kani'yi.

¹² Na' cho'a xtill' Chioza' nsa'n yel' mban na' yel' wak, na' nakan ka to dii chchogch aga ka to spad dii nlatit chop laa. La' chazan ga zeelo loo yichjlall'do'chona'. Na' chli'n lao daa chza'lall'cho loo yichjlall'do'chona' shi nakan wen wa shi nakan mal. ¹³ Ni to diika' bxe bsil Chioza' bi ngashaan lawe'na'. Yog'lolte nez nle'i beena' yizi'e cho' kwent.

¹⁴ Jesús, Xiin Chioza', beena' billin yabana', nake' bxo'z choo bxo'z xen checho, na' daan chiyal' soachechcho gonlilall'cho beena' choe'cho xtilliinna'. ¹⁵ Na' bxo'z choo bxo'z xen chechona' chiyesh'lallile' cho' daa nakcho ben' yell-lioz, la' lekzka' btil'e' daa nan kooyelaan le' wxinj wlene' ka chak checho, per le', wzo wzakile' bi bxinj blene'. ¹⁶ Daan, do lall'cho chiyal' ibig'cho xni'a Chioza', beena' chnabia' na' nake' ben' chiyesh'lallii, kwenche yizi'xene' checho na' gaklene' cho' kat' bittezə dii chak checho.

5

¹ Chioza' chbeje' yog' bxo'z choo bxo'z xenka' ladj ben' Israelka', na' chzoe'ne' kwenche inabe' gaklene' ben' wlall' che'ka' na' lljwee lawe'na' yog' daa chzangakile', na' chite' bayix'ka' kwenche chizi'xen Chioza' saaxya che'ka'. ² Na' beena' nak bxo'z choo bxo'z xen nape' yel' chxenlall' che ben'ka' chxinj chlen daa bi ntegakile', la' lekzka' zoe' dii nxoll wxinj wlene' daa nake' ben' de beli chen. ³ Daan, chonan byen chite' bayix'ka' kwenche yizi'xen Chioza' saaxya che'na', na' ka'kz chone' che ben' wlall' che'ka'.

⁴ Na' kono chzoa kwiniin gake' bxo'z choo bxo'z xen tobialoze', san Chiozan' chbeje' beena' gak bxo'z choo bxo'z xen che', ka bene' che dii Aarónna'. ⁵ Na' lekzka' Crístona', aga tobialozen' ben kwine' bxo'z choo bxo'z xen, san Chiozan' wlo'ene' balaan daa bzoe'ne' nake' bxo'z choo bxo'z xen. Na' kwine' golle'ne':

Li' nako' Xiin',

na' naa daa solo inabi'o inezi ben' nad' nak' Xo'.

⁶ Na' lekzka' Cho'a Xtill' Chioza' nan:

Li' nako' bxo'z zejli kani,

ka bxo'z Melquisedeca'.

⁷ Na' Crístona', shlak wbane' yell-lioni, wchelle' na' wnie' zilljə, wnable' Chioza', beena' nap yel' wak kwenche yisle'ne' lao yel' wita', na' daa goke' ben' wizoa dill', Chioza' bzenague' che'. ⁸ Na' la'kzi goke' Xiin Chios, diika' bllagloe' benan ka wyajniile' daa nak yel' wizoa dill'. ⁹ Na' ka', biyoll bido goke' ka chiyal' gake' kwenche wi'e yel' mban daa bi te cheyin ben'ka' chzoa xtilleena'. ¹⁰ Na' Chioza' bzoe'ne' goke' bxo'z choo bxo'z xen ka gok Melquisedeca'.

¹¹ Dii zanch de dii we'len' le' dill' che diiki ba wnia', per chonan lallj wzajniida'n le' daa bi chonle ka dii le. ¹² Naa ba gok ssha nombia'le cho'a xtill' Chioza', len' ba chiyal' wli' wsedilen ben' yoblə, shel'ka'. Per le'lə ni chyaljzile no wzajni'chi le' diika' bi chontek lallj shajniile' che cho'a xtill' Chioza' daa ba bsedle. Ni chonzle ka bi'do' ni chall' na' bin' gag gaob' yel' wao. ¹³ Na' nottezə ben' bin' shajniile' bi daa nak wen na' bi daa nak mal nake' ka bi'do' ni chall'. ¹⁴ San ben'ka' chzoachech chzenaggake' che Chioza', chakbe'gakile' daa nak wen na' daa nak mal. Legaken' nakgake' ka ben' ba cheej chao yel' wao, aga ka bi'do'na' ni chall'.

6

¹ Daan, chiyal' goncho ka dii le gakchachcho lo xnez Crístona', na' bi yiyeçhj yibiilenz-cho diika' ba ñezkzicho: ka daa chiyaj chilenicho dii malka' bencho daa nsa' yel' wit, daa gonlilall'cho Chioza', ² daa chchoa ben' nis, daa chxoa na'choka' yichj ben' kat' chñabcho gaklen Chioza'ne', daa yiban ben' ladj ben' wetka', na' daa wçhoglo Chioza' che ben' ga idol' to toe' zejli kañi. ³ Chioza' gaklene' cho' kwenche goncho ka dii le gakchacho.

⁴ Ben'ka' ba yoo beeni' che Chioza' loo yichjall'do'eka', na' ba bnix bliiagake' dii wenna' cho'e ben'ka' nak lall' nee, na' zoalen Espíritu Sántona' legake', ⁵ na' ba bnix bliiagake' dill' wen che Chioza' na' yel' wak che'na' daa yiyoll yido ile'icho kat' illin llana', ⁶ shi yilaala'ogake' lo xnez Chioza', bich inan yiyaj yilengakile' sto shii. La' lengake' ba chongake' ka ben ben'ka' betgake' Xiin Chioza' lee yag cruza' na' chsi'gake'ne' yel' zto' ladj lkwe' ben'. ⁷ Benecha' zaklebile' to yell-lío dii chiyaalli kat' cheejan nis yeja' daa chxop zekizezi lawinna'. Shi nakan yell-lío wen, beena' chaz chaan yitope' daa yeej gawe' lawinna', na' Chioza' gone' ka gashj ilebchan dii wenka'. ⁸ San shi chashj chlebzan no yag yesh' na' no yag ley, aga bi zakii yell-liona' na' chishj Chioza' bia' blag' cheyin na' wzey wtie'n.

⁹ Na' le' ben' bish'dawaa na' le' ben' zandawaa, la'kzi ba wnia' ka', ñezid' kwasloj gonle wen lega ben' ba bisla Chioza'. ¹⁰ Na' Chioza' nake' ben' li ben' shao', na' bi gal-lallee dii wenka' ba benle na' daa ba bli'le chakilene' daa goklenle ben'ka' naklenle lall' nee, kon ka ni chonle ñaa. ¹¹ Na' cheenid' to tole soale gonchle wen do yichj do lall'le shnon mbanle, kwenche gak chele ka ba nonle lez. ¹² Bi gake' ben' lia, san li gonto ka ba chon ben'ka' zoatezi zoagake' chonlilall'gake' Chioza' na' chzi'gake' banez daa bchebe' wi'e legake'.

¹³ Ka bcheb Chioza' gone' wen che dii Abrahama', bzoa kwine' de taschiw gone' ka bchebe', la' koch no zoa ben' zak'chi ka le' wzoe' de taschiw. ¹⁴ Na' golle': "Dii li gonleey' li' na' gon' ka shesh shan xiin dia cho'ka'." ¹⁵ Na' dii Abrahama' wdape' yel' chxenlall' wleze' axt ki bllin lla gok ka bcheb Chioza' gone' che'. ¹⁶ Kat'ka' ben' yell-lioki chchebgake' to dii gongake', chzoagake' to ben' zak'chi ka legake' kwenche chakbal daa chchebgake', na' len chonan ka shajle' ben' chegake'. ¹⁷ Na' ka'kzə Chioza', goklallee inezi ben'ka' ikaa dii wenna' zi' gone' nan aga wde daa bchebe', san dii li, gonkze' ka wne'. Daan, bzoa kwine' de taschiw. ¹⁸ Na' ka nak daa bchebe' gone' len daa bzoa kwine' de taschiw zejin aga wishee daa wne' gone', ni bi chziyee. Na' daa ñezicho dga, chtipan lall'cho, cho' ba wbig'cho lawe'na' na' ba nxenilall'cho gone' ka ba bchebe'. ¹⁹ Ka chak che barkwa' chchinan to dii chbekwan daa tozga, kan' chon daa ba noncho lez Crístona', chaklenan cho' chajle'chacho na' bi gak choplall'cho. Loo lill xlatj Chioza' wze lechaa daa bkwashaan latja' gana' wzoe' na' bi gok sho'gake', san cho' ba noncho lez sho'cho ²⁰ gana' ba wyoo Jesús'a' na' chñabe' checho, cho' zi' yillincho na'. Na' nake' bçoz choo bçoz xen checho zejli kañi ka bçoz Melquisedeca'.

7

¹ Melquisedeca' goke' ben' wñabia' che yella' le Salem na' goke' bçoz che Chioza', beena' liizelozi nak ben' choo ben' xen. Na' ka ziza' dii Abrahama' lo wdila' gana' bene' gan ben' wñabia'ka', jatil Melquisedeca' le' na' wñabe' ka gak wen che'. ² Na' dii Abrahama' bene' shi kwen yog' diika' bikee che ben' wñabia'ka' lo wdila' na' wleje' tkwenan* bi'en Melquisedeca'. Na' Melquisedec zejin Ben' wñabia' ben' chon daa nak shlich'a. Na' lezkka' nake' ben' wñabia' che yell Salema', na' zejin ben' wñabia', beena' chon ka soalen ljwellin mbalaz. ³ Kono ñezi no gok xaxnee ni no gok dii xozxto'e, ni kono ñezi bat golje' na' bat wite'. Daan nake' bçoz zejli kañi ka nak Xiin Chioza'.

⁴ Li wwia ka ben' zakii nleb gok Melquisedeca', la' kwini dii xozxto'cho Abrahama' bi'ene' tkwen che de shi kwen che yog' diika' bikee che ben'ka' bene' gan lo wdila'.

* 7:2 Bene' shi kwen yog' diika'...na' wleje' tkwenan: Literalmente la décima parte.

⁵ Ley che dii Moiséza' nan ben'ka' nak xiin dia che dii Levína', ben'ka' nak b̄xoz, chiyał' ikaagake' tkwen che de shi kwen che yog' daa chon to to ben' wlall che'ka' gan, ben'ka' nak bish' l̄jwellgake', la'kzi lengake' nakgake' xiin dia che dii Abrahama'. ⁶ Per Melquisedeca', la'kzi bi goke' dia che dii Levína', dii Abrahama' bi'ene' tkwen de shi kwen che yog' diika' bikee che ben'ka' bene' gan lo wdila'. Na' Melquisedeca' w̄nabe' gak wen che dii Abrahama', beena' b̄cheb Chioza' shesh shan xiin dia che'na' na' gaki che' yelliona' gana' wzoe'. ⁷ Na' nezicho kwas̄l̄l beena' ch̄nabe' ka gak wen che ben', nakche' ben' zak'chi aga ka beena' ch̄nab gak wen che'. ⁸ Na' ka nak b̄xozka' chkaa tkwen che de shi kwen che yog' diika' chat' chbe' che ben' wlall che'ka', nakgake' ben' chet. San che b̄xoz Melquisedeca', Cho'a Xtill' Chioza' cho'en dill' mbane' toshiizi. ⁹ Na' b̄xozka', ben'ka' chkaagake' tkwen che de shi kwen che yog' diika' chon ben' wlall che'ka' gan, nakgake' xiin dia che dii Levína', na' wak in̄acho lenkzgaken' be'gake' Melquisedeca' daa be' dii Abrahama' le', ¹⁰ la' kana' jatił Melquisedeca' dii Abrahama', ba nakkzan galj dii Levína' na' gake' xiin dia che dii Abrahama'.

¹¹ Chioza' wleje' dii Aarónna', beena' nak xiin dia che dii Levína', gake' b̄xoz kana' bi'e dii x̄ozxto'choka' ley che'na'. Per b̄xozka' wzoa lo dia che dii Aarónna' bi gok yiyongake' cho' ben' li ben' shao' lao Chioza'. Daan, benan byen soa sto b̄xoz yobl̄, beena' gak ka b̄xoz Melquisedeca'. ¹² Na' kwenche to ben' bi nak xiin dia che dii Levína' gake' b̄xoz, lekzka' chonan byen yilla' leya'. ¹³ La' b̄xoz chechona', beena' choe' Cho'a Xtill' Chioza' xtillee, aga golje' lo dia che dii Levína', san golje' lo dia che dii Judána', beena' konon b̄xoz ichej lo dia che'na'. ¹⁴ Nezteicho kwas̄l̄l Xancho Jesúsza' golje' lo dia che dii Judána', na' Moiséza' bi bzetje' dia che Judána' ka bi'e dill' no xiin dia cheyin gak b̄xoz.

¹⁵ Wyajni'chicho dga ba wnia' shi ichej to b̄xoz kob, beena' gak ka b̄xoz Melquisedeca', ¹⁶ to ben' bi nake' b̄xoz daa golje' lo dia che dii Levína' kon ka wna leya', san nake' b̄xoz daa bibi de dii gak wlliyi'n yel' mban che'na'. ¹⁷ La' ki wna Chioza' che':

Li' nako' b̄xoz zejli kañi,
ka b̄xoz Melquisedeca'.

¹⁸ Na' daa golle' ka', zejlin ba wde che leya' daa bi gok gaklenan ben'. ¹⁹ La' leya' bi gok yiyonan cho' ben' li ben' shao' lao Chioza', na' bich chiyał' goncho lez gaklenan cho'. San goncho lez beena' ba bzoa Chioza' yiyone' cho' ben' li ben' shao', na' ka' gak ibig'cho lawe'na'.

²⁰ Na' Chioza' bzoa kwine' de taschiw ka b̄chebe' gone' ka'. Ka wleje' ben'ka' nak xiin dia che dii Levína' gagake' b̄xoz bi bzoa kwine' de taschiw gagake' b̄xoz toshiizi. ²¹ Per ka nak Xancho Jesúsza', Chioza' bzoa kwine' de taschiw ka b̄chebe' wzoe'ne' gake' b̄xoz, la' cho'a xtilleena' cho'en dill' chi'ene':

Nad' Chios ba bzoa' kwine' de taschiw na' aga wiyajid' cheyi dga nia':

“Li' nako' b̄xoz zejli kañi,
ka b̄xoz Melquisedeca'.”

²² Na' daa bzoa' Jesúsza' nake' b̄xoz zejli kañi, nxenlall'cho gon Chioza' checho sto dii wentech aga ka daa b̄chebe' gone' dii nech. ²³ Ben' zan ba gok b̄xoz choo b̄xoz xen, la' daa chetgake' benan byen yizoa lwaagake'. ²⁴ San ka nak Jesúsza', daa mbane' zejli kañi, nake' b̄xoz choo b̄xoz xen toshiizi. ²⁵ Daan, wak yisle' cho' toshiizi, la' daa nonl̄lall'chone' wak ibig'cho lao Chioza', la' len' zoe' toshiizi ch̄nabe' gaklen Chioza' cho'.

²⁶ Na' Jesúsza', leyen'en' beena' chyalljicho gake' b̄xoz choo b̄xoz xen checho. Nake' ben' nxi nyech, ben' bibi saaxya bene', ben' bi nda' nchene' ni to dii mal, ben' bi wlall' lao dii mala' chon ben' saaxyaka', na' biyep'e' jazoe' yabana' gana' chgoogake'ne' balaan. ²⁷ Na' bi chone' ka ben b̄xoz choo b̄xoz xenka', ben'ka' benan byen betgake' bayix'ka' yog' lla na' bzeygake'b lao Chioza' kwenche zigaate legake' chiyakxen saaxya daa chongake', na' lekzka' betgake' bayix'ka' kwenche chiyakxen saaxya che ben' wlall che'ka'. San Jesúsza', shlin shlaxjzan bzani kwine' wite' ni che saaxya chechoka', na' daa bene' shlinz chonan

llin zejli kani. ²⁸ Ley che dii Moiséza' bzoan ben' goke' b̄xoz choo b̄xoz xen la'kzi bi gokgake' dowalj ben' wen. Per ka ba gok ssha chon b̄xozka' llin, Chioza' wne' wzoe' Xiine'na', beena' toshiizi nak dowalj ben' wen, gake' b̄xoz choo b̄xoz xen, na' bzoa kwine' de taschiw gak ka wne'.

8

¹ Dga nak dii llialoch lao diiki cho'a dill' cheyin: b̄xoz choo b̄xoz xen chechona' zoe' zejli kani na' ba chi'e shlaa de shli che Chioza' yabana' gana' chnabi'e. ² Na' nake' b̄xoz yabana' gana' non Xancho Chioza' dowalj lill xlatje', na' aga nakan dii ben ben' yell-lioni. ³ Yog' b̄xoz choo b̄xoz xenka' chzoa Chioza' legake' kwenche chjwa'gake' lawe'na' yog' daa chzani ben' wi'ene', na' chitgake' bayix'ka' lawe'na'. Daan, lekzka' benan byen b̄xoz choo b̄xoz xen chechona' bzanile' daa bi'e Chioza'. ⁴ Shel' zoe' yell-lioni aga nake' b̄xoz, shel'ka', la' zoakz b̄xozka' choe'gake' Chioza' diika' nllia leya' bia' we'gake'. ⁵ Diika' chon b̄xozka' bi nakan dowalj ka daa de yabana'. Daan, ka zi' gon dii Moiséza' lill xlatj Chioza', Chioza' bzajniile'ne', chi'ene': "Ben byen gonle yog'te diika' kon ka ba bzajniid' li' lo yaana'." ⁶ Daa chon b̄xoz choo b̄xoz xen chechona' naa zak'chin aga ka daa chon b̄xozka' sto. Na' daa ba bizoe' cho' wen kon Chioza', Chioza' ba bchebe' gone' to dii zak'chi checho aga ka daa bchebe' lao dii xozxto'choka'.

⁷ Shel' daa bcheb Chioza' dii nech gone' che dii xozxto'choka' benan ka yiyakgake' ben' li ben' shao', bi benan byen bchebe' gone' sto dii yoblə, shel'ka'. ⁸ Per Chioza' ble'ile' bi ben ben'ka' ka bllie' bia', na' bene' ka wna dii beena' wdixjee xtilleena':

Xancho Chioza' ne': Wllin lla
kat' wcheb' sto dii kob dii gaklenan le',
le' zoale Israela' na' le' zoale Judána'.

⁹ Na' aga gakan ka daa bcheb' gon' che dii xozxto'leka'
llana' bibej' legake' Egíptona'.

La' legake' bi bengake' daa bchebgake' gongake',
na' daan wchoonlall'gakee, na' Xancho Chioza'.

¹⁰ Na' naa de sto dii wcheb' gon' kat' illin llana' kwenche gaklen' ben' Israelka'.

Gon' ka kwe' yichjgake' diika' ba bllia' bia' gongake',
na' gon' ka kooshao'gake'n loo yichjlall'do'eka'.

Na' nad' gak' Chios chegake',
na' legake' gake' yell' cha'.

¹¹ Na' bich gonan byen no wli' wsedi bish' ljwellin,
ni bich gonan byen no wli' wsedi ben' dialla cheyin, ye'ze'ne':

"Chiyal' gombi'o Xancho Chioza'",
la' yog'z ben' gombi'e nad', ka bi'do' ka ben' gol.

¹² "Nad' yizi'xen' xtoleeka',
na' bich lljadinid' saaxya che'ka'."

¹³ Na' daa wna Chioza' gone' to dii kob dii gaklenan legake', zejlin daa bchebe' gone' kani'yi
ba nakan dii wde cheyin. Na' daa ba nakan dii gol dii ba wde cheyin ba zoa yinitlon.

9

¹ Kana' bcheb Chioza' dii nech gaklene' ben' Israelka', bllie' bia' ka chiyal' we'la'ogake'ne', na' lekzka' bllie' bia' gongake' to lill xlatje' ga we'la'ogake'ne' lo yell-lioni. ² Na' ki nak lill xlatj Chioza' daa bengake': bengake' lo'inna' choplə, na' latj necha' bsi'gake'n Latj che Chios, na' bzoagake' to candeler na' to mes gana' bkwa'gake' yetxtilka' lao Chioza'. ³ Na' lechaa daa bzegake' loo lill xlatj Chioza' kwenche bengake'n choplə bkwashaan latja' sto daa bsi'gake' Latj Ga Zoa Chios, ⁴ gana' bzoagake' to diido' nongake' ka mes de or gana' bzeygake' yala', na' sto yiin dii nwazjgake' or ka loolə ka koll'lin, na' bsi'gake'n yiin daa yoo daa chonli daa bcheb Chioza'. Na' lo'inna' wyooshao' to xwag de

or daa yoo yel' wawa' be' Chioza' legake' daa le maná, na' lekzka' loo yiina' wyoo bar che dii Aarónna' daa bigaa, na' yaj taaka' gana' nyoj daa nllia Chioza' bia' gongake'. ⁵ Na' koll' yiina' bzoagake' lwaa lsak' anjlka' le kerubin kwenche chli'n zoa Chioza' na', beena' yoo balaan xen. Na' xil anjlka' zen chxolgakan kolliinna' gana' chxit' bxoza' xchen bayix'ka' kwenche chizi'xen Chioza' saaxya che'ka'. Per aga diikiyen'an cheenid' wsees'chid' le' naa.

⁶ Na' ka ba nzoagake' yog' diika', na'ch bxozka' wzolo choogake' lle' zil loo latj necha' kwenche chongake' ka bllia Chioza' bia' gongake' kat' we'la'ogake'ne'. ⁷ Per latj wchopina' tohga bxoz choo bxoz xenna' de lsens sho'e shlin non twiz. Na' kat' cho'e, chonan byen lljwee xchen bayix'ka' daa wxitee loo latja' kwenche yizi'xen Chioza' xtoleena' na' xtol' ben' wlall che'ka' daa bi chakbe'gakile' chongake'. ⁸ Na' Espíritu Sántona' chzajniile' cho' daa chon bxoza' ka' zejin shlak ni chon lill xlatj Chioza' llin daa bengake' yell-lioni, bin' gat' lsens sho'cho Latja' Gana' Zoa Chioza'. ⁹ Na' yog' diiki chzajniin cho' zoacho naa nan la'kzi be'gake' diika' bzangakile' lao Chioza' na' betgake' bayix'ka' na' bzeygake'b lawe'na' kwenche be'la'ogake'ne', diika' bengake' bi bizogakin yixis yiyibgakan yichjlall'do'eka' kwenche gongake' lez ba bizi'xen Chioza' xtoleeka' toshiizi. ¹⁰ Diiki zeelo bengakan llin che to beli chen che'ka'chga: ka che no dii bi gag yeej gaogake' wa ka che daa chiyal' gongake' kwenche yixis yiyib kwingake'. Na' yog' diiki bengake' benan llin shlak bin' gon llin dii koba' bcheb Chioza' gone'.

¹¹ Per naa ba bid Crístona', beena' nak bxoz choo bxoz xen checho, na' nsee dii wenka' chbezcho gak. Na' lill xlatj Chioza' gana' billin Crístona' nakan dii zak'chi na' dowalj daa aga no ben' yell-lion bxe bsile'n, la' bi nakan che yell-lioni. ¹² Na' Crístona', aga bexee no xchen shib wa no xchen goon ka wyo'e Latja' gana' zoa Chioza', san daa wlalj xchene'nan' wyo'e shlin shlaxjz, na' che toshiizin wdixje' xtol'choka'. ¹³ Bxoza' bchine' xchen goon na' xchen shib, na' de che bakdo'na' chzeygake', na' bxiteen ben'ka' bi nxi nyech lao Chioza', la' kan' na leya' chiyal' gak kwenche bixi biyech kwerp che'ka' lao Chioza'. ¹⁴ Na' shi kan' nakan, ¿alechlə xchen Crístona', beena' ni to dii mal bi nda' nchene', nsa'chan yel' wak? Espíritu Sántona', beena' zoa zejli kani, goklene'ne' kwenche ben kwine' lall' na' Chioza' na' wlalj xchene'na' daa yixis yiyib diika' nda' nchen yichjlall'do'choka', diika' chon ka kwiayi'cho. Na' ka', inezicho ba biyakxen xtol'choka' na' gak goncho daa cheeni Chioza', beena' nak ben' yaa ben' ban.

¹⁵ Daan, Crístona' bxie' dii koba' daa bcheb Chioza' gone' checho, cho' gox wñabe'. La' daa bi'e yel' mban che'na' wite' ni checho, wdixje' saaxyaka' bencho shlak ben leya' llin, kwenche gak ikaacho daa bcheb Chioza' gone' checho zejli kani. ¹⁶ Shi to ben' ba bene' lishi daa yikwaanlene' to ben', aga wak ikaa beena' diika' chwal' yisha' shi bin' guet beena' chikwaan. ¹⁷ La' yisha' daa bene' solo gonan llin kat' ba wite', na' bibi zakiin shlak ni mbane'. ¹⁸ Daan, ka bxe Chioza' dii necha' bchebe' gone', bene' byen betgake' bayix'ka' blalj xchemka'. ¹⁹ La' biyoll bzajni dii Moiséza' dii xozxto'choka' yog' diika' nllia leya' bia', na'ch bexee lat' xa xil' dii mben dii xna na' txis daa le hisopo na' bleeje'n loo chen che shibka' na' che goonka' betgake' na' zi lat' nis, na' bxiteen lee libra' gana' nyoj leya', na' lekzka' bxiteen yog'lol' ben'ka' lle' na'. ²⁰ Na' golle' legake': "Chennin chonan ka chakli daa ncheb Chioza' gone' checho na' lekzka' zejin chiyal' goncho yog' daa nllie' bia' goncho." ²¹ Na' lekzka' bxit' dii Moiséza' chenna' lill xlatj Chioza' daa bengake' de lech' na' yog' diika' bchingake' lo'inna' ka be'la'ogake'ne'. ²² Leya' bllian bia' nan de dii zan daa chiyal' wxit'gake' xchen bayix'ka' kwenche yixi yiyechgakan lao Chioza'; na' kono yiyakxen cheyin shi bi lalj chenna'.

²³ Benan byen wlalj xchen bayix'ka' kwenche bixi biyech diika' ben llin lill xlatj Chioza' yell-lioni, diika' nak ka bxen che diika' de yabana'. Per diika' de yabana', byalljin lalj to chen dii zak'chi aga ka xchen bayix'ka'. ²⁴ La' Crístona' aga wyo'e loo lill xlatj Chioza' daa ben ben' yell-lioni daa bi nakan dowalj ka daa de yabana', san yabanan' wyo'e kwenche

chṇabile' Chioza' yizi'xene' checho. ²⁵ Na' aga zekizezin wyo'e be' kwine' blalj xchene'na', ka ben bṁoz choo bṁoz xenna' ze twiz wej wyo'e gana' le Latj Ga Zoa Chios kwenche bṁitee xchen bayix'ka'. ²⁶ Shel' byalljin gone' ka chon bṁozka', ba be' kwine' wite' zan shii, shel'ka', wzolozan ka wxē wzil yell-lioni. Per aga kan' nakan. San ṇaa llaki zeelo, shlin shlaṁjzan bzani kwine' wite' ni checho kwenche bsol bṁite' saaxya chechoka'. ²⁷ Na' kon ka llia bia' gak che to to beṇ' yell-lioni guete' shlinz, na'tech wchoglo Chioza' nak gak che to toe', ²⁸ ka'kzə Crístona' be' kwine' wite' shlinzə kwenche bsol bṁite' xtol' beṇ' yell-lioki. Na' ka yiyede' de wchop shiyi, aga yiyede' kwenche wsol wṇite' xtol' beṇaan, san yidixi'e beṇ'ka' chbezgake'nen'.

10

¹ Ley che dii Moiséza' chzajniin cho' lat' che dii wenka' zi' za' gon Chioza', na' bi nakan ka daa nak dowalj. Daan, bi chzaki leya' yiyonan beṇ' li beṇ' shao' beṇ'ka' yog' yiz chitgake' bayix'ka' chzangakile' we'gake' Chioza' ka nllian bia' gongake'. ² Shel' daa chitgake' bayix'ka' gok bixis biyiban saaxya che'ka', aga wyooch yichjgake' nan nakgake' beṇ' saaxya na' bich betgake' bayix'ka', shel'ka'. ³ Per daa betgake' bayix'ka' lao Chioza' ze twiz wej bisa'lan lall'gake' saaxya che'ka', ⁴ la' xchen goonka' na' xchen shibka' bi gak yisol yinitan saaxyaka'.

⁵ Daan, ka bid Crístona' yell-lioni, golle' Chioza':
Aga cheenchilo' no wit bayix' lawo'na' wa izangakile' bichlə dii gongake' li',
san ba beno' nad' beṇ' de beli chen kwenche izanid' kwinq' lo lazgakin.

⁶ Bi chibailo' no wit bayix'ka' wa wzeygake'b lawo'na' kwenche wsol wṇito' saaxya che'ka'.

⁷ Na'ch wnia' li': "Ka choe' libr cho'na' xtillaa,
Chios cha', ni zoa' kwenche gon' daa cheenilo'."

⁸ Na' zigaate wne': "Aga cheenchilo' no wit bayix' na' wzeygake'b lawo'na' wa gongake' bichlə dii gongake' li' kwenche yizi'xeno' xtoleeka'", la'kzi nakgakan daa nllia leya' bia' gongake'. ⁹ Na'tech chi'ene': "Chios cha', ni zoa' kwenche gon' daa cheenilo'." Na' daa golle' ka' zejīn bzoe' ka'lə dii gola' ben bṁozka' na' bxie' to dii kob lwaayi daa bzoe' ka'lə.

¹⁰ Na' daa ben Jesucrístona' ka cheeni Chioza', be' kwerp che'na' na' wite' shlin shlaṁj ni checho, kwenche bixi biyech yichjlall'do'chona' lao Chioza'.

¹¹ Bṁozka' chilaḡakile' choe'la'ogake' Chioza' yog' lla, na' zekizezi chitgake' bayix'ka' lawe'na', la'kzi biga gak yisol yinigtakan saaxya che'ka'. ¹² San Crístona' bzani kwine' wite' shlin shlaṁj kwenche bsol bṁite' xtol'choka'. Na' ka bibane', jachi'e shlaa de shli che Chioza' gana' chṇabia'lene'ne'. ¹³ Na' na' zoe' chbeze' shlak wzoa Chioza' beṇ'ka' chwiyi le' xṇi'ena'. ¹⁴ Na' daa bzani kwine' wite', biyone' beṇ'ka' bene' lall' na' Chioza' beṇ' li beṇ' shao' zejli kaṇi. ¹⁵ Na' lekzka' Espíritu Sántona' bi'e dill' cheyi dga, kana' wne':

¹⁶ Ki nak daa chcheb' gon' chegake' kat' illin llana', na' Xancho Chioza':
Gon' ka kooshao'gake' loo yichjlall'do'eka' diika' nllia' bia' gongake',
na' gon' ka kwe' yichjgake'n.

¹⁷ Na' wnache':
Bichga lljadinid' saaxya che'ka' ni xtoleeka'.

¹⁸ Na' shi Chioza' ba bizi'xene' xtol' beṇ', aga chyalljch witgake' bayix'ka' kwenche yiyakxenan.

¹⁹ Le' beṇ' bish' na' le' beṇ' zan', daa ba wit Jesucrístona' na' blalj xchene'na' ni checho, wak sho'cho do lall'cho Latja' Gana' Zoa Chioza'. ²⁰ Daa bi'e kwerp che'na', bsalje' to nez kob dii lljwa'n cho' gana' de ye'l' mban zejli kaṇi. La' kwerp che'na' zaklebin lechaa daa ze loo lill xlatj Chioza' daa bchez' ka wite', na' zejīn byalj latja' gana' zoa Chioza' kwenche gak sho'cho. ²¹ Na' Jesucrístona', beena' nak liizelozi bṁoz choo bṁoz xen, nake' bṁoz checho, cho' nakcho lall' na' Chioza'. ²² Daan, chiya'l' ibig'cho lao Chioza' do yichj do lall'cho, na'

wx̄enilall'cho wlebe' cho', la' nezicho ba nxi nyech yichjall'do'chona' daa ba bsol bn̄ite' xtol'choka', na' ba bixi biyechi kwerp chechoki nis xtila'. ²³ Chiyal' soachehcho goncho lez lljazoalencho Chioza', kon ka choe'cho dill', la' nezicho chone' ka nchebe'. ²⁴ Na' chiyal' yiyiljall'cho nakl̄a ka goncho gaklen ljwellcho kwenche to tocho gakchi ljwellcho na' gonchcho dii wen. ²⁵ Bi chiyal' kwej yichjcho daa chdop chllagcho choe'la'ocho Chioza' ka chonz bal' ben', san chiyal' wtip lall' ljwellcho, ¿alechli naa daa chakbe'icho ba zoa yiyed X̄anchona'?

²⁶ Na' shi ni chonchcho dii mala' daa nezicho bi chiyal' goncho kat' ba nombia'cho dill' li che Chioza', bich bi de we'cho Chioza' kwenche yizi'xene' xtol'choka'. ²⁷ Lechoz̄a kwezcho do chall chllebzcho wchoglo Chioza' checho llana' wzalee ben'ka' chakzbangakile'ne' lo yi'na' chal'nin daa wlliyai' legake'. ²⁸ Kat' to ben' bi chzenague' che ley che dii Moiséza', shi zoa chop shon ben' ble'gakile' daa bene', na' chchoglo guete' na' kono gak yiyesh'lallii le'. ²⁹ ¿Alechlin ki gak yel' zak'zi'na' idol' beena' chonile' nakzi Xiin Chioza' na' xchene'na' daa blalje', na' chnie' zban che Espiritu Sántona' beena' chiyesh'lallii cho'? La' xchene'nan' bixis biyiban yichjall'do'chona', na' ka blalje'n bx̄ie' dii koba' daa bcheb Chioza' gone' checho. ³⁰ Na' nezicho Chioza' wne': "Nad' yizi'a wzon che beena' chon dii mala', na' wsak'zi'ane' ka chiyal' gak che'." Na' lekzka' wne': "Nad' X̄anle wchogloa' chele, le' nakle yell cha'." ³¹ ¡Nyesh'laz wal inlleb gak che beena' wchoglo Chios yaa Chios banna' che' sak'zi'e!

³² Li lljadini ka nak dii lalljka' ble'ile ka bleble beeni' che Chioza' loo yichjall'do'lena', na' bizo bizakile' yel' zak'zi'ka' bdil bllagle. ³³ Bal-le biya dii ben wna ben' le' na' biya dii bchi' bsak'gake' le' lao lkwe' ben'. Na' zi bal-le goklenle ben'ka' biya dii gok chegake'. ³⁴ Na' biyeshile' ben'ka' got' lillyana', na' wzoale mbalaz la'kzi bikaa ben' bi dii de chele, daa nezile de to dii wench chele yabana' daa bi te cheyin. ³⁵ Daan, bi kwej yichjle daa n̄xenilall'le Chioza', la' to banez choo banez xen si'le cheyin. ³⁶ Chiyal' so sakile diika' chen chle'ile kwenche yiyoll yido gonle ka cheeni Chioza' na' gaki chele daa nchebe' gone'. ³⁷ La' Cho'a Xtill' Chioza' nan:

Ba zoa gaoshosh yiyed beena' chiyal' yiyed,
na' aga wllachile'.

³⁸ Na' beena' nak ben' li ben' shao' daa nonlilallee nad' ibane' zejli kani.

Na' shi bich gonlilallee nad', bich ile'shiidee.

³⁹ Per cho', aga nakcho ka ben'ka' kwiayi' daa chibiigake' bich chonlilall'gake'ne', san cho' zoacho nonlilall'chone' yilacho bi kwiayi'cho.

11

¹ Daa nonlilall'cho Chioza', l̄ennan' chonan kwenche chakliyicho daa noncho lez na' chajle'chacho cheyi daa bin' ile'icho. ² Daa benlilall' dii xozxto'choka' Chiozan', ble'shiile' legake'.

³ Na' daa nonlilall'cho Chioza', nezicho len' bx̄e bsile' yabana' len yell-lioni na' ka bene'n aga bi bchine', san kon ka wnie' wx̄e wzil yog' diika' chle'icho.

⁴ Daa benlilall' dii Abela' Chiozan', bi'ene' to dii zak'chi aga ka daa be' dii Caínna'. Na' daa benlilalleene', Chioza' wne' che' goke' ben' li ben' shao' na' bibaile' diika' bi'ene'. Na' la'kzi ba wit dii Abela', daa benlilallee Chioza' ni chzajniin cho' ka chiyal' goncho.

⁵ Na' daa benlilall' Enoca' Chiozan', bi ble'ile' yel' wita', san Chioza' bikeene' shi'a shbane' na' koch no ble'i le'. Na' ka zi' yikaa Chioza'ne' wzeyi che' chone' ka chazlall' Chioza'. ⁶ Na' shi bi gonlilall'cho Chioza', aga wak goncho ka ile'shiile' cho', la' chonan byen beena' cheenile' gombi'e Chioza' chiyal' shajli'e che' nan zoakze' na' chone' wen che ben'ka' chiyilj le'.

⁷ Daa benlilall' dii Noéna' Chiozan', wyajli'e ka bsi'nile'ne' che yejsiwaa daa zi' za' gak daa konon' yen ile'i. Na' daa bblebe' Chiozan', bzenague' che' na' bene' barkwa' gana'

wyoo do bxoone' kwenche bilagake'. Na' daa benlilallee Chioza' na' bzoe' xtilleena', bli'n ben'ka' wlliyi' yell-lioni gokgake' ben' mal. Na' Chioza' ble'ile'ne' ben' li ben' shao' daa benlilalleene'.

⁸ Na' ka'kzə dii Abrahamama', daa benlilallee Chiozan', bzenague' ka goxe' le' na' golle'ne' shaje' lljsoe' to latj dii bchebe' wi'ene' gakin che'. Na' wzee lalle'na' zeje' la'kzi bi wnezile' gan illine'. ⁹ Na' daa benlilallee Chiozan', jsoe' ka ben' zit' lo yell-liona' bcheb Chioza' wi'ene'. Na' bene' lille'na' de lech', ka'kzə dii Isaaca' na' dii Jacoba', ben'ka' lekzka' goki chegake' daa bcheb Chioza' lao dii Abrahamama'. ¹⁰ Na' dii Abrahamama' jsoe' na', la' nezile' wllin lla lljazoalene' Chioza' to latj wen daa ben kwin Chioza', daa bi te cheyin.

¹¹ Na' lekzka' daa benlilallee Chiozan', wyajli'e gon Chioza' ka soa xiine' la'kzi ba nake' ben' gol na' nakte dii xooole' Sárana' nool will. ¹² Ka' gok wzoa ben' zan inlleb xiin dia che', ka beljka' llia xan yabana' na' ka yoxa' chi' cho'a nisdona' daa kono ibabi, la'kzi ba nake' ben' gol ka wzoa xiine'na'.

¹³ Yog' ben'ki ni nonlilall'gake' Chioza' ka witgake' la'kzi lo yell-lioni bi wxi' wkaagake' diika' bcheb Chioza' wi'e legake'. Per wnezgakile' wllin lla gak ka wne', na' bibagakile' daa zi' gak. Na' wnagake' nakgake' ka ben' zit', ben' za' xtit shlollz lo yell-lioni. ¹⁴ Na' daa wnagake' ka', zejın ni chbezgake' gana' gak dowalj lallgake'. ¹⁵ La' shel' gokgakile' yella' gana' wza'gake' nakan dowalj lallgake', zak biyajgake' na' dii yoblə shel'ka'. ¹⁶ San legake' wzelall'gake' yillingake' yabana' gana' zoa to lallgake' dii wench. Daan, Chioza' bi chiyiile' daa nagake' nake' Chios chegake', na' ba nonshawee gana' lljazoagake'.

¹⁷ Na' dii Abrahamama', beena' bcheb Chioza' gak xiin dia che'na' ben' zan, daa benlilalleenen' bzenague' che' kana' golle'ne' izani xiine'na', bi'na' nak tlish' tyaj, wite'b lao Chioza' kwenche gakbia' shi dii li nxenilalleene', ¹⁸ la'kzi ba goll Chioza'ne': "Xiin dia cho'ka' galjgake' lo xiin dia che dii Isaaca'." ¹⁹ Na' daa wyajle' dii Abrahamama' nap Chioza' yel' wak yisbane' ben' wetka', wak inacho Chioza' bisbane' xiine'na' ladj ben' wetka' daa biz bi'e latj wite'b'.

²⁰ Na' lekzka' dii Isaaca', daa benlilallee Chiozan', wnable'ne' gone' ka gak wen che xiine' Jacoba' na' Esaúna' llaka' zi' za'. ²¹ Na' lekzka' dii Jacoba', daa benlilallee Chiozan', ka ba zoa guete' wnable'ne' gone' ka gak wen che chopte xiin dii Joséna', na' de nchish'zi yag bar che'na' be'lawee Chioza'. ²² Na' lekzka' dii Joséna', daa benlilallee Chiozan', kana' ba zoa guete', bi'e dill' wllin lla yichej ben' Israelka' Egíptona', na' golle' legake' yisa'gake' llit wet che'na' kat' yilleshgake'.

²³ Na' lekzka' daa benlilall' dii xaxna' dii Moiséza' Chiozan', ka goljb' bkwash'gakeeb' shon beo' daa ble'gakile' ka xochi gokb'. Na' bi bllebgake' daa bchoglo faraónna' guet bdo'ka'. ²⁴ Na' lekzka' daa benlilall' dii Moiséza' Chiozan', ka bgole' bi goonile' ina ben' nake' xiin bi' nool che faraónna'. ²⁵ Wyazlall'che' biya dii sak'zi'lene' ben' wlall che'ka', ben'ka' nak yell che Chioza', aga ka daa gone' dii malka' nak toldezə daa chibayi ben'. ²⁶ Gokbe'ile' zak'chi kwell ine ben' che' ni che Crístona', aga ka daa si'e banez che yel' wni'ana' de Egíptona', daa bzoa yichje' dii wenna' we' Chioza'ne'. ²⁷ Daa benlilall' dii Moiséza' Chiozan', bizee Egíptona' na' bi bllebe' illaa faraónna' le', san goke' wal daa wnezile' Chioza', beena' kono chle'i, wzoalene' le'.

²⁸ Na' daa benlilallee Chiozan', bene' Inı Paskwa'. Na' golle' ben' wlall che'ka' witgake' twej xil'do' na' wxit'gake' xchema' yichj puert che'ka' kwenche anjla', beena' lljet bi' byo nechka', bi wite' bi' byo nech che'ka'. ²⁹ Na' daa benlilall' ben' Israelka' Chiozan', gok bidegake' loo nisdona' le Nisdona' Xna, la' Chioza' bene'n chop laalə kwenche gok bidegake' lo yo billa'. Na' ka nan te ben' Egíptoka', to biyejzan na' wche'gake' yel.

³⁰ Lekzka' daa benlilall'gake' Chiozan', bene' ka billee zeeka' nechj yell Jericóna' ka biyoll wyechjgake'n gall lla. ³¹ Na' lekzka' nool wdana' wle Rahab, daa benlilallee Chiozan', blebe' ben' Israelka' lille'na' ka bllingake' jawia jayigake' lalle'na' na' bi wlliyi'lene' ben' Jericóka' ben'ka' bi bzenag che Chioza'.

³² Dii zanch dii de inia', per bich bi latj de wi'a dill' ka ben dii Gedeónna', dii Baráca', dii Sansónna', dii Jefténa', dii Davina', dii Samuela' na' dii ben'ka' wdixjee daa goll Chioza' legake'. ³³ Daa benlilall'gake' Chiozan', wkaagake' yell-lío che ben'ka' wdil-lengake', na' wnabia'gake' xochi ka wyazlall' Chioza', na' goki chegake' daa bcheb Chioza' wi'e legake'. Na' Chioza' bisle' balgake' lao bell zniaka', ³⁴ na' zi bale' bene' kwenche bi bzey yi' wala' legake', na' zi bale' bilagake' bi witgakile' spada'. Na' bal ben' blan'ka', ben Chioza' legake' ben' wal, na' ka wdil-lengake' soldadka' nak ben' zit', bengake' legake' gan. ³⁵ Na' Chioza' goklene' bal noolka', bisbane' no xiin che'ka' ba wit.

Na' zi bal ben' biya dii bchi' bsak' ben' legake' axt ka witgake' na' bi goklall'gake' kwej yichjgake' Chioza' kwenche yilagake' lao yel' zak'zi'na', daa bengake' lez gak wen chegake' kat' yisban Chioza' legake'. ³⁶ Na' zi balgake' btitjgakile' na' bet wdingake' legake', na' bchejgake' legake' gdenna' na' wdixjgake' legake' lillyana'. ³⁷ Na' zi balgake' betgakile' yaj, na' zi balgake' wlejjgake' choplə kon sierra', na' zi balgake' betgakile' spad. Na' zi balgake' biga wzoa lill xlatjgake' na' bchingake' no xa xil'ka' no xa shibka' lwaa xagake', na' gokgake' ben' yesh'do' na' dii zan dii ben ble'gakile' daa bchi' bsak' ben' legake'. ³⁸ Wdagake' latja' gana' bibi chashj chleb na' do yaa yaoka', na' bigaangake' do xan blejka'zə na' no loo yech. Na' ben'ka' kana', ni lat' bi nan chidol'gake' soa ben' wenka' ladje'ka', shel'ka'. ³⁹ Na' la'kzi Chioza' wyazlallee ka benlilall'gake'ne', ni togake' shlak wzoagake' yell-lioni bi ble'gakile' gak daa bchebe' gone' chegake'. ⁴⁰ La' wlo'e xnezin kwenche aga to lezgake' yizi'gake' banez ka nak daa bchebe' gone', san cheenile' lencho yizi'cho banez che to dii zak'chi kwenche yog'cho yiyakcho kwaslol' ka cheenile'.

12

¹ Na' daa nezicho ben' zan ben'ka' wzoachehgake' benlilall'gake' Chioza', lekzka' cho' chiyal' kwej yichjcho yog' dii chllonan goncho ka cheeni Chioza' na' kwej yichjcho saaxyana' daa chombegui cho', na' soachehcho gonchcho ka dii le koochcho nez lo xneze'na' ka to ben' chxonj na' chgooyibe' kwenche gone' gan. ² Chiyal' soacho wwiacho ka ben Jesúsza', beena' chon ka chonlilall'cho Chioza', na' lekze' gaklene' cho' kwenche yiyoll yido gonlilall'chone' kwaslol'. La' le' bizo bizakile' ka betgake'ne' lee yag cruza', na' bi bene' kwent che yel' zto'na' wxi'e daa nezile' ka yiyoll ile'ile' yel' zak'zi'na', yiba yizakile'. Na' naa chi'e gana' chnabia' Chioza' shlaa de shli che'na'.

³ Chiyal' koo yichjcho ka bizo bizakile' biya daa beni ben' malka' le' kwenche bi lljxakicho ni bi wshe'lall'cho gonlilall'chone'. ⁴ Na' ka nakle le', aga bin' xchenle wlalje ni cheyi daa chdil-lenle dii mala'. ⁵ Ba gol-lall'le daa wna Chioza' cho' daa nakcho xiine', ka wne':

Xiindawaa, bi gonilo' nakzi yel' zak'zi'na' chselaa kwenche wzajniid' li,
na' bi yidinjilo' kat' chon' ka yiyakbe'ilo' daa chono'.

⁶ La' nad' Chios, chigwaa shli lall' ben'ka' chakid',
na' chsak'zi'a ben'ka' nak xiin'.

⁷ Chtil-le yel' zak'zi'ka' kwenche yigooshlilall'le, la' Chioza' chonile' le' ka' daa nakle xiine'. La' aga ga zoa to bi'do' bi chsak'zi' xabaa leb' kwenche yigooshlilall'b'. ⁸ Na' shi Chioza' bibi gonile' le' kwenche yigooshlilall'le, ka chone' che yog' xiine'ka', zejín nakle ka ben' bi wyoo xayin. ⁹ Kana' nakcho bi'do', xachoka', ben'ka' bisgol cho', bsak'zi'gake' cho' na' wdapchogake' balaan. Na' llialotech wzexj yichjcho wzenagcho che Xacho Chioza', beena' zoa yabana', kwenche gat' yel' mban checho zejli kani. ¹⁰ Na' xachoka', shlak bisgolgake' cho' bsak'zi'gake' cho' kon ka gokgakile' nakan wen. Per Chioza' chsak'zi'e cho' kwenche gaklene' cho' gakcho ben' li ben' shao' ka nake' le'. ¹¹ Aga no chibayi kat' chllagloe' yel' zak'zi'na', san le chakyeshile'. Per beena' yiyakbe'i cheyi daa chllagloe' na' yigooshlilallee, yisa' che wen na' soe' mbalaz.

¹² Li gondiplall', na' li gon ka dii le gonlilall'le Chioza'. ¹³ Li gon ka cheeni Chioza' kwenche beena' ba chshe'lall' ile'ile' ka chonle na' yiyondiplatee na' bi kwej yichje' Chioza'.

¹⁴ Li gon byen soalenle yog'te ben' mbalaz, na' li wsa'to chele lega ben' nxi nyech lao Chioza', la' kono yillin lawe'na' shi bi nxi nyech yichjlall'do'ena'. ¹⁵ Li gon byen gap wwia ljwell-le kwenche ni tole bi gonle daa wllonan si'le banez daa ba ben Chioza' chele yel' ben' wen che'na', na' kwenche bi galj xe loo yichjlall'do'leka' dii mala' daa wxinj wlenan ben' zan. ¹⁶ Na' ni tole bi talenle no xiin xool ben'. Na' bi gonile nakzi daa nak che Chioza', ka ben dii Esaúna'. Tyeenz yel' wawa' bsha'ile' daa nan gaki che' daa nake' ben' nech. ¹⁷ Na' nezczile ka wde, goklallee inab xe'na' gak wen che' daa nake' ben' nech, na' bich gokan. La'kzi le wchelle' wnable'n xe'na', bich bi gok gongake'.

¹⁸ Aga ka gok che dii xozxto'chokan' chak chele. Legake' wbig'gake' kwit yaa Sinaína' na' ble'gakile' chal'ninan, ax't wche' chola'n, na' wzen to be' wal, ¹⁹ na' bengakile' wchell trompeta' na' wne Chioza' legake'. Na' ka bengakile' shi'ena' got'yogakile'ne' bich inie' legake', ²⁰ daa le bllebgake' daa goll Chioza': "Nottez yidlej lo yaani chiya'l wítilene' yaja', laa ben' laa bayix'." ²¹ Daa ben ble'gakile' le bsheban legake', ax't kwín Moiséza' wne': "Ax't chxiztit' daa le chllebchga'."

²² San le' ba wbig'le gana' zoa Chios, ben' yaa ben' banna', gana' le yaa Sión na' Jerusalén daa zoa yabana', gana' lle' lla' ben' zan inleeb anjl che'ka', ²³ gana' ndop nllag ben'ka' nak xiin' Chioza', ben'ka' nak ka bi' nech, na' ba da' lie'ka' lee libr che'na' de yabana'. Na' ba wbig'le lao Chioza', beena' yizi'e kwent che yog'lol ben'. Na' ba nakcho txen ben' li ben' shao'ka' ba wit, ben'ka' ba biyon Chioza' dowalj ben' li ben' shao'. ²⁴ Lekzka' ba wbig'le lao Jesúsza', beena' be' yel' mban che'na' kwenche bxie' dii koba' daa ncheb Chioza' gone' checho. Na' xchene'na' daa blalje' ni checho chaklenlan cho', aga chonan ka xchen dii Abela' daa wdao xya che dii ben' bisheena'.

²⁵ Li wsak' kwenche bi gakte widenag lao Chioza', beena' chne cho'. La' shi ben' Israelka' bi bilagake' lo yel' zak'zi'na' daa bi bzenaggake' daa goll Chioza' legake' lo yell-lioni, zalechl cho', aga wilacho lo yel' zak'zi'na' shi yizechj koll'cho beena' zoa yabana' na' bi wzenagcho xtilleena'? ²⁶ Ka wne Chioza' ben'ka' kani'yi, shi'ena' benan ka wxo' wnib yell-lioni, per naa ne': "Sto shii gon' ka xo' inib yell-lioni, na' aga toz yell-lioni, san lente yabana'." ²⁷ Na' daa ne' "sto shii gon' ka xo' iniban", zevin yinit yog' diika' bene', diika' te cheyin, na' yigaan diika' biga te cheyin. ²⁸ Na' yel' wñabia' daa gon Chioza' cho' gana' zoe', biga te cheyin. Daan, chiya'l we'chone' yel' choxken na' we'la'ochone' ka chazlallee na' gall illebc'hone'. ²⁹ La' Chios chechona' nake' ka to yi' wal daa chzey chte.

13

¹ Li soatezi soa gaki ljwell-le ka chakile to ben' bish' goljle. ² Na' bi gal'lall'le wleble ben' loo yoo lill-le na' we'le legake' ga yigaangake', la' bal ben'ka' ben ka' blebgake' anjlka' lille'ka', la'kzi bi gokbe'gakile'.

³ Li lljadini gakenle ben'ka' de lillyana', na' li gaktezi lenkzlen chak chele ka'. Li gaken ben'ka' chiya dii chchi' chsak' ben' legake', na' li gaktezi lenkzlen chak chele ka'.

⁴ Dii wen inleeb daa ne' nkaa che', na' le' nshagna'le bi chiya'l talenle ben' yoblə, la' Chioza' wsak'zi'e nottez ben'ka' soalengake' nool bi nak nool chegake' wa ben' byo bi nak ben' chegake'.

⁵ Bi chiya'l selall'cho yel' wni'ana', san goncho banez ka'k' dii de checho, la' Chioza' ba wne': "Biga wsan' li' ni bi kwej yichj' li'." ⁶ Daan, wak inacho do yichj do lall'cho: Xancho Chioza' zoe' chaklene' nad'. Na' bi gall illeeb' shi bi goni ben' nad'.

⁷ Na' li lljadini ka ben ben'ka' bli' bse di le' cho'a xtill' Chioza'. Li wwia ka wzoa wlezgake' benlilall'gake' Crístona' toshiizi, na' li gonlilallee ka benlilall'gake'ne'.

⁸ Jesucristona' biga chillee, lekzen' kani'yi, lekzen' naa na' lekzen' zejli kani. ⁹ Bi we'le latj no wli' wsedi le' dii yoblə dii chyiljall' ben' dii gonan ka yilaale lo nez li che Chioza'. Wenchan wzoachech yichjlall'do'choni lo yel' chaki che Chioza', aga ka daa sho'z yichjcho cheyi diika' na ben' bi chiyal' yeej gaocho. La' ben'ka' chinal' chinogake'n bi chaklenan legake'.

¹⁰ Daa ba wit Crístona' ni checho, ba chizi'cho to banez daa bi bizi' b̄xozka' bet bayix'ka' gana' wzoa lill xlatj Chioza' daa bengake' de lech'. ¹¹ B̄xoz choo b̄xoz xenna' jwee xchen bayix'ka' Latja' Gana' Zoa Chioza' kwenche yizi'xene' xtoleeka', per bchejgake' latja' gana' wchengake' kwenche jazeygake' kwerp che bayix'ka'. ¹² Na' ka'kzan gok che Jesúza', lezkka' wlejgake'ne' yella' ka betgake'ne'. Na' wlalj xchene'na' kwenche yisol yinite' saaxya che ben'ka' gonlilall'gake'ne'. ¹³ Na' cho' naa, chiyal' nocho Crístona' la'kzi le gakzbani ben' cho' ka gokzbangakile'ne'. ¹⁴ La' yell-lioni gani zoacho nakan dii te cheyin, per noncho lez yillincho gana' soacho zejli kani. ¹⁵ Daan, chiyal' we'la'ocho Chioza' toshiizi daa wit Crístona' ni checho, na' koochone' balaan kon cho'a loll'choni we'cho dill' len' nake' Xancho, la' lennan' nakan ka dii chzanicho we'chone'. ¹⁶ Bi gal'-lall'cho goncho dii wenna' na' izanicho bi de checho we'chon ben' chyallj chchinile'n, la' lennan' chazlall' Chioza' na' daa choncho ka', len' choe'la'ocho.

¹⁷ Li wzenag che ben'ka' chli' chsedi le' na' li wlexj yichjle lawe'ka', la' legaken' chap chwiagake' le' daa yoo yichjgake' wllin lla yidegake' kwent lao Chioza' daa bengake'. Li wzenag daa nagake' kwenche yibagakile' gon xshine'ka' na' bi gakgakile'n to dii lallj. La' shi bi wzenagle che daa chli' chsedgake', bibi banez cheyin si'le.

¹⁸ Li inabi Chioza' gaklene' neto', la' nezyen'into' chonnto' ka cheenile', na' cheeninto' wsa' chento' wen lao yog'lolte. ¹⁹ Na' chat'yoid' le' inabile Chioza' ni cha' kwenche yob gak yid' sto shii gana' zoale.

²⁰ Chioza', beena' chzoe' cho' mbalaz, bisbane' ladj ben' wetka' Xancho Jesucristona', beena' chap chwia cho' ka chon xan xilaa, beena' choe'la'ochga xil' che'ka'. Na' lekzen' beena' b̄xe daa b̄cheb Chioza' gone' checho zejli kani kana' blalj xchene'na' na' wite'. ²¹ Na' Chioza'kzə gonshgue' ka gak gonle doloł dii wenna' ka cheenile' gonle, na' gonshgue' ka gaken Jesucristona' le' gake ka chazlallee. ¡Sho'shgue' balaan zejli kani! Ka' gakan.

²² Chat'yoid' le' ben' bish' na' le' ben' zan', li koo yichjle diiki chnabid' le' gonle, diiki to chop cho'a ba bzej'. ²³ Na' cheenid' inezile ba bichej ben' bish'cho Timotewa' lillyana', na' shi ba wdaile' yide' ni, na' wchi'ane' yidwianto' le'.

²⁴ Li wwap chiox yog' ben'ka' chli' chsedi le' na' yog' ben'ka' nakle txen nakle lall' na' Chioza'. Na' ben' Itáliaki nakcho txen chwapgake' le' chiox.

²⁵ Chioza' gaklenshgue' yog'lol-le.

Kart daa bzej Santiágoná

¹ Nad' Santiago,* nongake' nak' wen llin che Chioza' na' wen llin che Xancho Jesu-crístona', chwap' le' chiox, ka le' nakle ka shllin kwen xiin dia che dii Israela' daa nakle lall' na' Chioza' na' neslesle doxen yell-lioni.

² Le' ben' bish'dawaa na' le' ben' zandawaa, li yiba yizaki kat' ile'ile yiya yel' zak'zi'.
³ La' ba nezke' kat' chzak'zi'cho daa nonlilall'cho Chioza', chaklenan cho' soatipchcho gonlilall'chone'. ⁴ Na' li gap yel' chxenlall' lao bittez daa gak chele kwenche yiyoll yido gakchale kon ka chazlall' Chioza'.

⁵ Shi nole chyalljile yel' sin'na', li inabin Chioza' na' gone'n. La' Chioza' cho'en nottezə ben' chnabe'n, aga no chlilonile'n. ⁶ Li inaban na' li gonyen' lez gone'n na' bi gakchoplall'le. La' beena' chonchoplall' nake' ka bli che nisdo'na' daa choa' be'na' to ni to na'lə. ⁷ Beena' chakchoplall', bi gone' lez we' Xancho Chioza' daa chnabe', ⁸ la' chiya dii na yichjall'do'ena' gone', na' sha'l ki sha'l ka'lə chake' lao yog'lol daa chone'.

⁹ Ben' bish'chona', beena' nak ben' yesh'do', chiya' yiba yizakile' daa nake' ben' zakii lao Chioza'. ¹⁰ Na' ben' bish'chona', beena' nak ben' wni'a, chiya' yibaile' daa ba biyakbe'ile' aga no nake' lao Chioza'. La' ka chde che yejdo'ka' lli lyixaa ka'kzan te che ben' wni'aka'. ¹¹ Kat' chla' wbilldo'na' na' chna'n zi'bia' na' chbill yag yeja', na' chllib yeja' llian na' yel' mba cheyinna' chbiayi'n. Ka'kzan ben' wni'ana', yiyol yinite' lao delgens che'na' chone'.

¹² Chakomba beena' chzo chzaki chtile' bittez dii mal. La' kat' ba wdie' lawinna', Chioza' wi'ene' yel' mban zejli kani daa bchebe' wi'e ben'ka' chakgakile'ne'. ¹³ Nottez ben' kat' chza'lallee gone' dii malka', bi chiya' ine': "Chioza' bzoe' dii mali lawa'ni". La' Chioza' aga bi dii mal chone' ni bibi dii mal chzoe' lao ben' kwenche gone'n. ¹⁴ San daa chzelall'cho goncho dii malan', lennan' chgooyelaan cho' kwenche ixopcho lawinna'. ¹⁵ Na' daa chzelall'cho dii mala', chxopcho lao saaxyana', na' saaxyana' daa choncho chlliyi'n cho'.

¹⁶ Le' ben' bish'dawaa na' le' ben' zandawaa, bi siye'z kwinle. ¹⁷ Chioza', beena' zoa yabana' na' bxe bsile' yog' diika' chzeeni' xan yabana', len' chone' cho' yog'lol daa nak dii wen dii shao' na' toshiizi zoe' chone' wen na' biga chillee. ¹⁸ Len' wyazlallee gone' yel' mban checho zejli kani daa wyajle'cho dill' li che'na', kwenche ladj yog' ben'ka' bxe bsile' gokcho ben' nech ben' biya'o bizi'e, na' zaklebicho diika' chizi' chilapgabe' dii nech daa chzangakile' choe'gabe' Chioza'.

¹⁹ Le' ben' bish'dawaa na' le' ben' zandawaa, li wzoa yichjle dga: yog'lol ben' chiya' wsede' wzenague', na' wsakee bin ine', na' gape' to yel' chxenlall' bi illaa iloke'. ²⁰ La' yel' chllaa chloka' chlilonan goncho ka cheeni Chioza'. ²¹ Daan, li choonlall' yog'lol dii zbanka' chonle na' yog'lol dii malka' chonle, na' li wlexj yichjle wzenagle cho'a xtill' Chioza' daa ba nezile. La' lennan' napan yel' wak yislan le' kwenche bi kwiayi'le.

²² Aga to wzenagzcho cho'a xtill' Chiozan', san chiya' goncho ka nan. Na' shi bi goncho ka nan, chziye'zə kwinchon, shi naa. ²³ Beena' to chzenagz cho'a xtill' Chioza' na' bi chone' ka nan, chone' ka beena' chwia cho'alawe'na' lo wanna', ²⁴ na' ka chikwase' chiyoll chwia cho'alawe'na', li chal-lall'tie' nakan nake'. ²⁵ Beena' bi chal-lall' dii wenna' nllia Chioza' bia' gone' daa yisell yilaan le' lao dii mala', na' zie'n wneyi, na' toshiizi zoa'tip zoashoshe' chone' ka nan, beenan' zoa mbalaz.

²⁶ Shi no chakzi chone' ka cheeni Chioza', per bi chak gox' cho'a lolleena', chziye'z kwinen' na' bibi zakii daa ne' chone' ka cheeni Chioza'. ²⁷ Daa cheeni Xacho Chioza' goncho na' nxi'n lawe'na', len dga: yiyesh'lalicho bi' wizebdo'ka' na' nool wizebka' lao

* 1:1 Santiago Lekzen' Jacóbona'.

dii lalljka' chen chle'gakile', na' gap wwia kwincho bi goncho txen dii malka' de yell-lioni.

2

¹ Le' beñ' bish' na' le' beñ' zan', ka le' chonlilall'le Xancho Jesucristona', beena' yoo balaan xenna', aga nakzi beñ' gakile. ² Shi gana' ndop nllagle yidə to beñ' nllin xbene'na' niy de or na' nakw xalaane' dii wen, na' lekzka' yidə to beñ' yesh'do' na' nakwe' xalaane' dii ba bida' bichollee, ³ na' chle'shi'chile beena' le nak xalaaninna', na' che'lene': "Wche' latji gani nak wen", na' che'le beñ' yesh'do'na': "Na'zə wze, li'", wa ba che'lene': "Lo yo na'tezə wche'", ⁴ ¿aaga nakzin ba chle'ile bañ beñ' daa chwia chyile nak nake', na' ba chza'lall'le chegake'?

⁵ Le' beñ' bish'dawaa na' le' beñ' zandawaa, li wzenag dga: Chioza' ba wleje' beñ'do'ka' nak beñ' yesh' yell-lioni kwenche do yichj do lall'gake' gonlilall'gake'ne' na' soalengake'ne' gana' chñabi'e, kon ka ba bchebe' gone' che beñ'ka' chakgakile'ne'. ⁶ Na' le', chonzile legake' nakzi. ¿Aaga beñ' wnia'kan' chsak'zi'gake' le' na' chjtaogake' xya chele lao beñ'ka' chñabia'? ⁷ ¿Aaga legaken' chbell chñegake' mal che Xanchona', beena' nakcho lall' nee, beena' le zakii?

⁸ Dii wen inlleban chonle shi dii li chonle daa llialote nllia Cho'a Xtill' Chioza' bia' gonle daa nan: "Goki bish' ljwello'na' ka chaki kwino'." ⁹ Per shi nakzi beñ' gakile, chxinj chlenle, na' ba de xtol'le daa bi chonle ka na ley che Chioza'. ¹⁰ Shi to beñ' zeje' chone' yog'te daa nllia ley che Chioza' bia', per shi ton bi gone', doxente leya' chawan xya nape' dol'. ¹¹ Chios, beena' wna: "Bi chiyañ' ineleno' beñ' yoblə", lekzka' wne': "Bi wito' beñ'." Na' shi chito' beñ', la'kzi bi chñeleno' beñ' yoblə, chyishjo' daa nllia ley che'na' bia'. ¹² Chiyañ' wshalje wen na' wsa' chele wen kon ka nllia leya' bia', lega beñ' nezi wllin to lla leya' daa chisell chila' cho' lao dii mala', wchoglon checho. ¹³ Beñ'ka' bi chiyesh'lallii beñ', lekzka' Chioza' bi yiyesh'lallile' legake' llana' wchogloe' che beñ'. San beñ'ka' chiyesh'lallii beñ', Chioza' yiyesh'lallile' legake'.

¹⁴ Le' beñ' bish' na' le' beñ' zan', bibi zjanayin inaz beñ' nonlilallee Chioza' shi bi nla' dii wenna' chone'. ¿Awak to daa nonlilall'ze' yislan le' shi bi chone' wen? ¹⁵ Inatezcho to beñ' byo wa to noolə, beñ' nakcho txen nonlilall'cho Jesucristona', bibi xalaane' de na' chyalljete dii yeej gawe' ka naa ka wxə. ¹⁶ Na' tole ye'lene': "Soashgo' mbalaz, na' gat'shga xalaano' na' dii yeej gawo'", na' bi we'lene' daa chyalljile', bibi zejín ye'zlene' ka'. ¹⁷ Ka'kzan beena' nonlilallee Chioza', shi bi chone' daa nak wen, bibi zjanayin ne' nonlilalleene'.

¹⁸ Zoa beñ' ine': "Li' no' nonlilalloo Chioza', na' nad' chon' daa nak wen. Aga wakbe'i beñ' shi nonlilalloo Chioza' shi bi chono' daa nak wen. San nad', daa chon' daa nak wen chli'a nonlilallaa Chioza'." ¹⁹ Li' chajli'o toz Chiozan' zoa, na' wenkzan chono' chajli'o. Lekzka' dii xiw'ka' chajle'gakan na' le chllebgakan. ²⁰ Bi gono' ka beñ' bi nteyi. Chiyañ' gakbe'ilo' shi bi chono' daa nak wen, bibi zjanayin no' chajli'o che Chioza'. ²¹ Daa bzani dii xoxxto'cho Abrahamama' xiine' Isaaca', bchi'eb' lo yaana' nan lljete'b' ka goll Chioza'ne' gone', na' wna Chioza' nak dii Abrahamama' beñ' wen lawe'na'. ²² ¿Abi chakbe'ilo' daa benlilall' dii Abrahamama' Chiozan', bzani'le' xiine'na'? Na' daa bene' ka', bli'en nan dii licha nonlilallee Chioza'. ²³ Na' billinin daa nyoj lee Cho'a Xtill' Chioza' daa nan: "Abrahamama' wyajli'e che Chioza', na' Chioza' wne' nake' beñ' li beñ' shao' lawe'na'." Na' wnagake' che' goke' to beñ' bllagui Chioza'.

²⁴ Na' chakbe'ile beena' chonlilallee Chioza' nake' beñ' wen lawe'na' shi chone' ka cheenile', na' aga to daa inaze' nonlilalleene'. ²⁵ Ka'kzə gok che noolə wdana' wle Rahab. Chioza' wne' nake' beñ' li beñ' shao' daa bkwashee loo lille'na' beñ'ka' jawia jayi lalle'na', na' bigwee legake' to nez yoblə ka bichejgake' lalle'na' kwenche kono bet legake'. ²⁶ Ka chak che to kwerp, shi bi yoon bishbe, netan, ka'kzan beena' to nonlilall'ze' Chioza' na' bi chone' ka cheenile', bibi zjanayin nonlilalleene'.

3

¹ Le' beṇ' bish' na' le' beṇ' zan', bi shanzle selall'le gakle beṇ' chli' chsedi, la' ba nezkzile' kat' yizi' Chioza' cho' kwent wsak'zi'che' neto' chli' chsedinto' beṇ' shi bi gonnto' ka cheenile'. ² Yog'lolcho chxinjcho. Na' beena' bi chxinje' de cho'a dill' nake' to beṇ' li beṇ' shao', na' lekzka' chak inabi'e doxen kwerp che'na'. ³ Kat' chgoocho dona' cho'a kabaya' kwenche gom ka cheenicho, chzakicho chgoochob neza' gana' cheenicho shajb. ⁴ Na' lekzka' li wwiakachi barkwka', la'kzi nakgakan dii xen wal na' chde be' wala' chlligaan diika', beṇ'ka' chsa' legakan chdagake' toz yagdo' xaninka' na' chajgakan gana' cheengakile'. ⁵ Ka'kzan chak che loll'choni. La'kzi nakan to diido'zə, dii zan dii chshalj chshonan. Nezicho toz bzeyi'do' wak wzeyan to yix' diṇ xen wal. ⁶ Na' loll'choni nakan ka to yi'. Na' nakan to dii liashesh' chiya dii mal na' chxinj chlenan do ka nak benecha' shlak mbane' daa chzenague' che dii xiwaa. ⁷ Benecha' chak gonmaxe' yog'te bayix', ka ba ze xan yabana', ka ba chxob le'in, ka ba yoo loo nido'na'. Per la'kzi chnabi'e legakb, ⁸ bi chak inabi'e lolleena'. Nakan to dii mal dii bi cheeni no inabia' len, na' nakan ka yierb dii chitan beṇ'. ⁹ Chchincho loll'choni chole'la'ocho Xacho Chioza', beena' nak Xancho, na' lekzka' chchinchon chyishjcho bia' blag' che beṇ'ka' bxe bsile', beṇ'ka' bene' lwaa lsakee. ¹⁰ Cho'a loll'choni chole'la'olenchon Chioza' na' lekzka' len chyishjan bia' blag' che beṇ'. Le' beṇ' bish' na' le' beṇ' zan', bi chiyal' goncho ka'. ¹¹ To ga chal nis, aga wak galan nis dii gak yeejcho na' galten nis zxi'. ¹² Le' beṇ' bish'dawaa na' le' beṇ' zandawaa, nezile to yag yixwew aga wbian daa ne' aceituna, na' yag uvana' aga wak kwian yixwew. Na' ka'kzə gana' chal nis zxi'na' aga walan dii gak yeejcho.

¹³ Shi ladjlana' zoa beṇ' sin', beṇ' chajinii, chiyal' wli'en wsa' che' wen na' wlexj yichje' gone' kon ka na' yel' sin'na' daa noe' Chioza' le'. ¹⁴ Na' shi we'le latj wxinj wlen yel' xe'na' yichjlall'do'lena', na' gonile beṇ' nakzi, bi chiyal' wshalj wshonle inale napple yel' sin' daa chon Chioza'. La' shi ka' chonle aga dill' lin chole'. ¹⁵ Ka nak yel' sin'na' daa nale napple, bi nakan dii beṇ' Chioza', san nakan de yell-liozə dii chalj yichjlall'do'lena', na' nakten che dii xiwaa. ¹⁶ Gana' zoa beṇ'ka' chakxe'i ljwellgake' na' chakdilgake' nogaken' mbejlawi, nan' chxe wdil wishesh na' chiya dii mal. ¹⁷ Beṇ'ka' nap yel' sin' daa chole' Chioza', nakgake' beṇ' chon ka cheenile', na' bi nakgake' beṇ' wishagdil. Nakgake' beṇ' wen, beṇ' wizoa dill', beṇ' chiyesh'lallii beṇ', na' aga nakzi beṇ' chakgakile', na' nakgake' beṇ' chda do lallii. ¹⁸ Beṇ'ka' chon to dii byen soalen ljwellgake' mbalaz, na' lekzka' chongake' ka soalen ljwell beṇ' yoblə mbalaz, si'gake' banez goni beṇ' legake' wen, na' soagake' mbalaz.

4

¹ ¿Bi'che chakile de wdil wshesha' ladjlana' shi aga dii malka' lle' lla' loo yichjlall'do'lanan' chnabiagakan le'? ² Chzelall'le bi gat' chele na' bi chatilen. Shel' wx'e'ile witle beṇ' na' ikaale bi de che', na' chakxe'ile' bi de che beṇ'. Na' daa bi chat' chbe'ile daa chzelall'le gat' chele, chdil chsheshlen ljwell-le. Na' bibi chat' chbe'ile daa bi chnabilen Chioza'. ³ Na' kat' chnabilene'n, bi chone'n daa nezile' chnablen kwenchez gonditjlen we'le cho'a xbayi beli chen chelena'. ⁴ Le' beṇ' bi yootli lallin. ¿Abi nezile daa nonle txen dii mala' de yell-lionin chonan ka chakzbanile Chioza'? Nottezə beṇ' cheenile' gone' txen dii mala' de yell-lioni chakzbanile' Chioza'. ⁵ Bi gakilo' nazə Cho'a Xtill' Chioza' daa nan: "Daa ba ngoo Chioza' Espiritu che'na' loo yichjlall'do'chonin lialallee toze' le' wzenagcho che'." ⁶ Per dii xen chaklene' cho', na' Cho'a Xtilleena' nan: "Chioza' bi chle'shiile' beṇ'ka' chep cha'lall', per chaklene' beṇ'ka' nak beṇ' gaxjlall'." ⁷ Daan, li wlexj yichjle lao Chioza'. Na' li soachech bi we'zle latj che dii xiwaa, na' yikwasan ka'la. ⁸ Li wxenilall' Chioza' na' soalene' le'. Le' beṇ' saaxya, li yiyaj yilene' che dii malka' chonle. Na' ka le' cheenile' gonlilall'le Chioza' na' gontele txen dii mala' de yell-lioni, li we' latj yixis yiyib Chioza' yichjlall'do'lena'. ⁹ Li gakyeshii na' li kwellyesh'.

Lwaa wxill-le li kwellyesh'. Li yisha' yel' chiba chizaki chelena' yiyakan yel' chakyeshii.
¹⁰ Li gak ben' gaxjlall' lao Xanchona', na' gone' le' ben' choo ben' xen.

¹¹ Le' ben' bish', bi kwell ine che ljwell-le. Beena' chbell chne che to ben' nakcho txen nonlilall'cho Chioza' wa chiya chiyilje'ne', che ley che Chioza'n chbell chnie' na' chiya chiyilje'n. Na' shi ka' chono', lwaa wzenago' daa na leya', ba chzoaz kwino' chchoglo' cheyin. ¹² Toz beena' zoa, beena' wdixj leya', na' naktie' ben' chchoglo che ben'. Na' len' wak yisle' ben' wa wlliaeeene'. Na' li', naa, znora nako' yiya yiyiljo' bish' ljwello'na'?

¹³ Li wzenag, ka le' nale: "Naa wa wxē shajcho yell yoblə na' lljsoacho twiz lljencho delgens na' goncho gan mech." ¹⁴ Ni bi nezile bi gak chele ka wxē. Yel' mban chelena' nakan ka gopaa daa chbe' xtitz na' lii chinitten. ¹⁵ Kin chiyal' inale: "Shi Chioza' wi'e latj ibanchcho, na' goncho dga cheenicho goncho." ¹⁶ Per latjin dii inale ka', chshalj chshonləle, na' daa chshalj chshonle nakan mal. ¹⁷ Beena' nezi chiyal' gone' wen na' bi chone'n, nakan xya lao Chioza'.

5

¹ Li wzenag dga, le' ben' wni'a. Li gosyaadia kwell-le, daa ba za' yel' zi'ka' yen ile'ile!
² Yel' wni'a chelena' ba gooll' bteban; na' bel' zidaa ba blliaiyib xalaanleka'. ³ Or plat cheleka' ba chasgakan bej. Na' daa nakgakan ka', chaogakan xya chele na' wlliaiyi'gakan le' ka chon yi'na' chzey chten. La' ba bkwa' bti'azle yel' wni'ana' naa ba zoa kwiaiyi' yell-lioni. ⁴ Daa bi be'le laxj ben'ka' bizi' bilap cheleka' chawan xya chele. Na' Xancho Chioza', beena' zeelo nap yel' wak choo yel' wak xen, ba bzenague' xyana' daa chao wen llinka'. ⁵ Yell-lioni ba weej wdaoshao'le na' ba be' cho'a xba beli chen cheleka'. Ba be'la'o kwinle ka ben' choe'la'o to bayix' kwenche wite'b gawe'b, na' kan' gak chele, ba zoa kwiaiyi'le. ⁶ Ba bchoglole che ben'do' bibi ben, na' ba betle legake', la'kzi bibi bengake' chele.

⁷ Na' le' ben' bish' na' le' ben' zan', li gap yel' chxenlall' axt kat' yiyedch Xancho Jesucristona'. Ben' goz goona' none' lez yizi' yilape', na' nape' yel' chxenlall' chbeze' gak yeja'. ⁸ Ka'kzə le', chiyal' gaple yel' chxenlall' na' soachehle gonlilall'le Xancho Jesucristona', la' ba zoa yiyede'. ⁹ Le' ben' bish' na' le' ben' zan', bi gaoz xya che ljwell-le kwenche bi wchoglo Chioza' chele. La' ba zoa gaoshosh yiyed beena' wchoglo che ben'. ¹⁰ Le' ben' bish' na' le' ben' zan', li wwia ka ben dii ben'ka' wdixjee daa goll Xancho Chioza' legake' kani'yi, wdapgake' yel' chxenlall' la'kzi chiya dii wxak'zi'gake'. ¹¹ Dii li, chakomba ben'ka' chizo chizaki yel' zak'zi'ka'. Ba benzkile ka ben dii Joba', bizo bizakile' wdie' lo yel' zak'zi'ka'. Na' nezckile ka ben Xancho Chioza' che' biyoll wxak'zi'e, la' Xanchona' nake' liizelozi ben' chiyesh'lallii.

¹² Le' ben' bish' na' le' ben' zan', dii llialote dga: bi wzoazle de taschiw yabana' ni yell-lioni, ni sto dii yoblə kwenche shajle' ben' chele. Kat' inale: "wakan", ka'kzan gonle. Na' kat' inale: "bi gakan", la' bi gakkzannan', kwenche bi gat' xtol'le lao Chioza'.

¹³ Shi nole chak dii chak chele, li we'llwill Chioza'. Na' shi nole zoa mbalaz, li gol inie'. ¹⁴ Shi to ben' bi shawee, chiyal' gaxe' ben'ka' ngoo lall' na'gake' ben'ka' nonlilall' Crístona' kwenche we'llwillgake' Chioza' ni che', na' chebgake' yichje'na' seta' na' inabgake' yiyakile' kon yel' wak che Xancho Jesucristona'. ¹⁵ Na' kat' we'llwillgake' Chioza' na' shajle'gake' gone' daa chnabgake', na' yiyaki beena' bi shao', la' Xanchona' yiyone'ne'. Na' shi ba bxinj blene' na' yiyakxen che'. ¹⁶ Daan, li yixoadol' lao ljwell-le na' li we'llwill Chioza' inab che ljwell-le kwenche yiyakile. Chioza' chzenague' che beena' nak ben' li ben' shao', na' chone' daa chnabile'ne'. ¹⁷ Elíaza', beena' wdixjee daa goll Chioza'ne' kani'yi, goke' ben' de beli chen ka cho', na' ka be'llwille' Chioza' do yichj do lallee wnable'ne' bi gak yeja', na' bi gok yeja' lo yell-lioni shon yiz yo gashjə. ¹⁸ Na' be'llwille'ne' sto shii, na' bizolo yeja' na' biyashj bileb lo yell-lioni dii weej wdaogake'.

¹⁹ Le' ben' bish' na' le' ben' zan', shi tole yilaale lo nez li che Chioza', na' sto ben' yoblə yigwee le' sto shii, to dii wenan chone'. ²⁰ La' chiyal' inezile beena' yigoyoe' to ben' saaxya

lo nez mala' na' yigweene' lo nez lina', ba chaklene'ne' yile' lo yel' wita' na' yiyakxen
saaxya çhe'na' la'kzi nakan dii zan.

Kart nech daa bzej Pédróna'

¹ Nad' Pedro nak' postl che Jesucristóna', chzej' le', ka le' ba wlej Chioza' gakte lall' nee na' neslesle zoale do Póntóna', Galáciana', Capadóciána', Ásiana' na' Bitíniana', gana' bi naki lall-le. ² Kon ka wlo'e xnezin gone' chele kani'teyi, Xacho Chioza' ba wleje' le' na' Espíritu che'na' ba bikobe' yichjall'do'léna' kwenche soale wzenagle che Jesucristóna' na' gakte ben' nxi nyech ni che xchene'na' daa bixis biyib le'. Chioza' gaktenshgue' le' dii xen wal na' gonshgue' ka soale mbalaz inleeb.

³ We'la'ocho Chioza', Xa Xancho Jesucristóna'. Daa ba biyesh'lallile' cho', ba bene' sto yel' mban kob checho daa bisbane' Jesucristóna' ladj ben' wetka', na' soacho gonchon lez toshiizi. ⁴ Na' ikaacho daa ba ngooshawee yabana' daa biga kwiayi', na' daa bibi nda' nchen, na' daa biga te che yel' mba cheyinna'. ⁵ Daa nonlilall'cho Chioza' lekze' wkwash' wkweejléne' cho' yel' wak che'na' kwenche idol' illonicho yel' mbanna' daa ba nakten gone' cho' kat' illin lla te che yell-lioni.

⁶ Na' ni cheyi dgan chiba chizakile, la'kzi llaki naa wde wdeli dii chdil chllagle tolde. ⁷ Ka nak ora', chiyal' ten lo yi'na' kwenche wli'lawin shi nakan dowalj. Ka'kzan le', kat' chtil-le yel' zak'zi'ka' chli'lawin shi dowaljkzan ba nonlilall'le Jesucristóna'. Na' daa nonlilall'léne' zak'chan ka ora', la' ora' wllin lla kwiayi'n. Per le' zoachechle nonlilall'le Jesucristóna', kat' ba biyoll wdele lo yel' zak'zi'ka', na' shajla'ole na' sho'le to balaan xen kat' yiyede'.

⁸ La'kzi bin' ile'iléne', le chakiléne'. Na' la'kzi bi chle'iléne' naa, chajle'le che' na' dii xen wal chiba chizakile axt bichkz bi dill' chillelile we'le cheyin, ⁹ daa ba nezile gat' yel' mban chele zejli kani daa nonlilall'léne'.

¹⁰ Dii ben'ka' wdixjee daa goll Chioza' legake' kani'yi, be'gake' dill' ka nak yel' chiyesh'lalli che'na'. Na' biyiljyollgake' daa golle' legake' kwenche shajni'gakile' nakan gone' yisle' cho' na' gone' yel' mban checho zejli kani. ¹¹ Na' Espíritu che Crístonakzan be'léne' legake' dill' che yel' zak'zi'ka' ile'ile' na' che balaan xenna' daa sho'e ka yiyoll tie' yel' zak'zi'ka'. Na' goklall'gake' inezgakile' nakan gak yide' na' bi lla bi goran' gak dga. ¹² Na' Chioza' bzajniile' legake' nan aga legaken' yen ile'gakile' diika' be'gake' xtiliin, san len' yen ile'ilen. Na' lennan' dill' wen dill' kob che Crístona' daa benile ka be'len ben'ka' le' dill' kon yel' wak che Espíritu Sántóna', beena' bsel' Chioza'. Na' axt anjlka' cheengakile' inezhgakile' cheyi diiki.

¹³ Na' ni che daa ba ben Chioza' chele, chiyal' se kwasle na' gakte ben' nyeen nyeeniya. Li gonyen' lez dii wenna' gon Chioza' le' kat' yiyed Jesucristóna'. ¹⁴ Daa nakle xiin Chioza' na' chzoale xtilleena', bich chiyal' gonle dii mala' wzelall'le kana' bin' gombia'léne'. ¹⁵ San chiyal' soale gakte dowalj ben' li ben' shao'. La' Chioza', beena' gox wñabe' le', nake' dowalj ben' li ben' shao'. ¹⁶ La' Cho'a Xtilleena' nan: “Li gak dowalj ben' li ben' shao', ka nad' nak' dowalj ben' li ben' shao'.”

¹⁷ Daa che'le “Xa”, beena' chchoglo che ben' kon ka chidol' to toe', chiyal' gall illebléne' shlak zoale yell-lioni gani nakle ka ben' zit'. ¹⁸ Chioza' ba bisle' le' lo yel' mban daa bi nxe bi nzak' daa bkwaanlen dii xozxto'leka' le'. Na' nezile daa bisle' le' aga wdixjile'n or wa plat, diika' chbiayi', ¹⁹ san xchen Crístona' daa zak'chgayi, lennan' biya'o biziile' le' kana' betgake'ne' ka to xil'do' ba bibi nda' nchen. ²⁰ Kana' zi' xe silte yell-lioni, Chioza' wleje' Crístona' sak'zi'e. Na' naa ba zoa te che yell-lioni ba bide' ni checho. ²¹ Na' ni che Crístonan' ba nonlilall'le Chioza', beena' bisbane'ne' ladj ben' wetka' na' wlo'ene' balaan xen. Daan, ba chonlilall'le Chioza' na' ba nonléne' lez.

²² Na' le' naa, daa ba chonle ka na dill' li che Chioza' ba bixi biyechle, na' do lall'le chaki ljwell-le. Na' chiyal' gakchi ljwell-le do yichj do lall'le axt ga zeelo. ²³ La' nakle ka ben' ba golj dii yoblə, per aga de beli chen daa chde cheyi, san Chioza' ba bikobe' yel' mban

chelena' daa wyajle'le cho'a xtilleena' daa nsa' yel' mban na' biga te cheyin. ²⁴ Cho'a Xtill' Chioza' nan:
 Yog'lol ben' yell-lioki nakgake' ka yixaa,
 na' balaan che'ka' nakan ka yejka' ze lyixaa.
 Yixaa chbillan na' chllib yejdo' cheyinna',
²⁵ san cho'a xtill' Chioza' zejli kani den, na' biga te cheyin.
 Na' lennan' dill' wen dill' koba' daa ba wdixje'gakile' le'.

2

¹ Daan, chiyal' choonlall'le yog'lol dii mal, yog'lol de wxiye', na' yel' xe', na' yel' chbell chne che ben'. ² Ka chon to bdo' cheendo' chdom' nillaa, kan' chiyal' ibil' idonle cho'a xtill' Chioza' daa nak dowalj, kwenche gaklenan le' gonlilall' chlene' na' idol'le yel' mbanna' daa gone'. ³ La' ba bnix blliatele ka ben' wen nak Xanchona'.

⁴ Li ibig' lao Xancho Crístoná', beena' nap yel' mban, beena' zaklebi yaja' daa bi wyoolallii wen yooka', la'kzi lao Chioza' nake' to ben' zakii nleb na' wleje'ne' kwenche gone' ka chazlallee. ⁵ Na' lekzka' le', Chioza' ba bene' to yel' mban kob chele daa nonlilall'le Crístoná', na' zaklebile ka yajka' daa chkwaagake' ljwellin kwenche gakan to yoo ga sho' Chioza' balaan. Na' gake bxoz che', na' Jesucrístoná' gaklene' le' kwenche soale we'la'ole Chioza' ka chazlallee. ⁶ Cho'a xtill' Chioza' nan:
 Wselaa to ben' yell Siónna',
 na' zaklebile' yaja' daa mbejlawin dii wlejkakile' kwenche gakan yaja' daa wchejcha yooná'.

Na' beena' wxenilalleene', biga si'e yel' zto'.

⁷ Ka le' ba nonlilall'le beena' zaklebi yaja', chakbe'ile nake' ben' zakii. San ben'ka' bi nonlilall'gake'ne' chongake' ka chillini Cho'a Xtill' Chioza' daa na:
 Yaja' daa bi wyoolall' wen yooka',
 leyen'lannan' yaja' daa ba nchejcha yooná'.

⁸ Na' lekzka' nan:

Zaklebile' to yaj dii chgoo chchew' ben' na' chchixan legake'.

Chbixgake' daa bi chzenaggake' cho'a xtill' Chioza', na' ka'kzan chiyal' gak chegake'.

⁹ San le', nakle ben' wlej Chioza' kwenche gonlilall'lene', na' nakle bxoz che beena' chnabia', na' yell che', to yell dii biya'o bizi'e. Na' wleje' le' kwenche we'le dill' ka nak yel' wak choo yel' wak xen che beena' bibej le' gana' nak shgasj shchoj kwenche biyoole lo beeni' choo beeni' xen che'na'. ¹⁰ Kana', bi gokle lall' na' Chioza', san naa ba nakle lall' nee. Kana', bi biyesh'lallii Chioza' le', san naa ba chiyesh'lallile' le'.

¹¹ Le' ben' bish'dawaa na' le' ben' zandawaa, daa nakle ka ben' zit' yell-lioni, chat'void' le' bi we'le latj we' cho'a xbayi beli chen chelena' daa cheeni inabia' yichjlall'do'lena'. ¹² Li wsa' chele wen ladj ben'ka' bi nonlilall' Chioza', kwenche llana' wchoglo Chioza' che to to ben', gakbe'gakile' benle wen na' we'la'ogake'ne', la'kzi naa chnegake' chele nan nakle ben' mal.

¹³ Daa ba nonlilall'le Xancho Jesucrístoná', chiyal' wlexj yichjle lao yog'lol ben'ka' chnabia': ka lao beena' liizelozi chnabia', ¹⁴ na' ka'kz lao ben'ka' chselee kwenche wdezi'gake' ben'ka' chon dii mala' na' kwee balaan ben'ka' chon wen. ¹⁵ Chioza' cheenile' gonle wen kwenche idap cho'a ben'ka' biz chon chna chele, ben'ka' bi nteyi ni bi chajni'gakile'.

¹⁶ Li soato lega ben' ba biyell bila', na' aga ni che ba biyell bila'le na' gonle kon daa nan chele. Li soato lega ben' chon ka cheeni Chioza'. ¹⁷ Li gap balaan yog'lol ben'. Li gaki bish' ljwell-leka'. Li gall illeb Chioza'. Na' li gap balaan ben' wnabia'na'.

¹⁸ Ka le' chonle xshin ben', li wlexj yichjle lao xanleka' do yichj do lall'le. Aga to ben'ka' chonzi le' wen gonile ka', san ka'kzə li goni ben'ka' chsak'zi' le'. ¹⁹ La' wenan no gon banez kat' no chsak'zi' le' la'kzi bibi dol' nape' daa ba ngoo yichje' daa cheeni Chioza'.

20 Per shi le' chzak'zi'le ni che to dii mal dii benle, bibi zakiin lao Chioza' gonlen banez. San shi chzak'zi'le ni che dii wenna' chonle na' chonlen banez, lennan' zakii lao Chioza'.
 21 Kwenche gonle dgan gox wñab Chioza' le'. La' Crístona' wxak'zi'e ni chele na' bliile' le' nakan chiyał' gonle. 22 Aga bi saaxya ben Crístona', ni bibi dill' wxiye' bi'e. 23 Kana' biz ben wñagake' che', bi biyechj bibi'e, na' ka bsak'zi'gake'ne' bi bwall bshebe' legake', san ben kwine' lall' na' Chioza', beena' chçhoglo che ben' ka chiyał'. 24 Crístona' biyoni che' saaxya chechoka' ka wite' lee yag cruza' kwenche bich goncho txen saaxyana', san soacho goncho ka cheeni Chioza'. Na' daa wxak'zi'en, zoale shi'a shao'. 25 Kani'yi wdale ka xil'do' ba wnit. Per ñaa ba nakle lall' na' Crístona', beena' chap chwia le' ka ben' chap chwia xil' cheyin, na' zie' wñeyi chele.

3

1 Le' noolə zoa ben' chele, li wlexj yichjle lawe'ka' kwenche shi bi chajle'gake' cho'a xtilł' Chioza', gakbe'gakile' nakan dii wen ka ile'gakile' nsa' chele wen. Na' aga chini gat'yoile legake' shajle'gake' cheyin, 2 san daa wwiagake' chonle wen lega ben' chall chlleb Chios shajle'gake'. 3 Bitek sele wñeyi naklə gon kwinle xochi: ka no naklə yipaa yichjle, na' wchinze no bga no niy de or, wa gakwle lech' dii zakii nleeb. La' aga diikin dii lliälote. 4 San dii lliälote gakshao' loo yichjlall'do'lena' kwenche gakle ben' gaxjlall' na' ben' lall'do' xen, la' lennan' nakan yel' xochi dii bi te cheyin na' zak'chgayin lao Chioza'. 5 La' kan' ben noolka' kani'yi, ben'ka' gok ben' li ben' shao'. Bxenilall'gake' Chioza' na' blexj yichje'ka' bzenaggake' che ben' che'ka'. 6 Ka ben dii Sárana', bzoe' xtilł' dii ben' che', Abrahama', na' golle'ne' "xan". Na' le' nakle dia che' shi gonle wen ka bene' na' bi illeble bi gak chele.

7 Na' ka le' ben' byo, li goni xool-leka' wen. Li gapshiigake' daa bi nakgake' chech ka cho' ben' byo, na' daa ñezile lengaken' chidol' ikaa yel' mbanna' daa gon Chioza' chele. Li gon dga kwenche bibi wsej wllonan wzenag Chioza' chele kat' choe'łwill-lene'.

8 Na' sto dii nia' le', yog'loltele chiyał' soalen ljwell-le wen, na' gakle ben' lall'do' yesh', na' gaki ljwell-le ka chakile' to ben' bish' goljle. Li yiyesh'lallii ben', na' li gak ben' gaxjlall'. 9 Bi yizi'zle wzon che beena' chon mal chele wa beena' chbell chne chele. San li inabi Chioza' gak wen che', daa ñezile gox wñabe' le' kwenche gak wen chele. 10 La': Beena' cheeni idie' lo yell-lioni na' gakte wen che',
 chiyał' wsakee kwell inie',
 na' bi wi'e latj ichej dill' wxiye' cho'a lolleena'.

11 Chiyał' yilaalawee dii mala', na' gone' daa nak wen.
 Chiyał' sie' wñeyi soalene' ben' mbalaz.

12 La' Xancho Chioza' chap chwie' ben'ka' nak ben' li ben' shao',
 na' chzenague' kat' chñabgake' yel' goklen che'na',
 per bi chle'shiile' ben'ka' chon mal.

13 Aga no bi goni le' shi toshiizi zele chonle dii wenna'. 14 Per shi yel' chon wen chelena' wtil'le yel' zak'zi'ka', chakomba le'. Na' bi gall illebzle bi goni ben' le', na' bi gakshejlall'le.

15 San do yichj do lall'le li koo Crístona' balaan, beena' nak Xancho. Na' toshiizi li se wñeyi che dill'ka' yilliile lao nottezə ben' inabile' le' cheyi daa ba nonle lez. Na' xochi li we'lengake' dill'. 16 Na' li gon daa ñezile nak wen daa nakle Crístona' txen, kwenche ben'ka' naz chele bi chonle wen si'gake' yel' zto'. 17 Wenchlan sak'zi'cho daa choncho wen, shi ka' cheeni Chioza', aga ka daa sak'zi'cho daa choncho mal.

18 La' shlin shlaxjzan wxak'zi' Crístona' ni che saaxya chechoka'. Aga bi xtolee got', per wxak'zi'e ni checho cho' ben' mal, kwenche bizoalencho Chioza' wen. La'kzi beli chen che'na' ble'in yel' wita', Espíritu che Chioza' bisbane'ne' ladj ben' wetka'. 19 Na' wyaje' latja' gana' nej ben' malka'* jtixje'ile' legake' daa bene' gan dii mala' na' yel' wita'.

* 3:19

²⁰ Legaken' gokgake' widenag kana' wzoa dii Noéna', na' wdap Chioza' yel' chxenlall' chegake' shlak ben dii Noéna' barkwa'. Na' xon'chga ben'ka' wyoo loo barkwa' bi wlliyi'gake' loo nisa'. ²¹ Na' daa bila ben'ka' loo nisa' kani'yi, zaklebin daa chchoacho nisa' naa. Na' daa chchoacho nisa' aga chixis chiyiban kwerp chechoni, san chli'n ba wñabicho Chioza' yixis yiyibe' yichjlall'do'choni kwenche sho' yichjcho bich bi xtol'cho de. Na' de yel' mban checho zejli kani daa biban Jesucristona' ladj ben' wetka'. ²² Na' biyepé' yabana', jachi'e shlaa de shli che Chioza' na' chñabi'e lao anjlka' na' lao bichlè yel' wñabia' dii de.

4

¹ Na' kon ka gok che Crístona' wxak'zi'lene' beli chen che'na', ka'kzan chiyal' izani kwintle. La' beena' ba wxak'zi' beli chen che'na' bich chñabia' saaxyana' le'. ² Na' bich gonze' daa nazan che beli chen che'na' shlak ni mbane', san gone' ka cheeni Chioza'. ³ Ba gok to ka't' chonle txen ben'ka' biñ' gombia' Chioza', choe'gake' cho'a xbayi beli chen che'ka', chongake' kon daa nazan chegake', chzoll chnitgakile', chaoxatgake', biz chegake' chon, na' choe'la'ogake' no yaj yag, diika' chakzbani Chioza'. ⁴ Na' dii xen chakllejgakile' naa daa bich chonle legake' txen lawi diika' bi yejni'alallii, na' chiya dii chon chnagake' chele. ⁵ Per wllin lla yidegake' kwent lao beena' ba ze kwas wchogloe' che yog'lol' ben', ka ben' ni mban ka ben' ba wit. ⁶ Daan, ben'ka' bengakile' dill' wen dill' kob che Chioza' na' wyajle'gake'n, la'kzi witgake' ka ba nchogbia' gak che yog' ben' yell-lío, ni mbankzgake' lao Chioza'.

⁷ Daa ba zoa gao kwiayi' yog'lolte dii de, chiyal' gake ben' nyeen nyeeniyi na' sele wneyi we'llwill-le Chioza'. ⁸ Na' dii lialote, gaki ljwell-le, la' beena' nap yel' chakina' chonxenlallee ka'k'tezə dii choni ben' le'. ⁹ Li wleb ljwell-le loo yoo lill-le do lall'le. ¹⁰ To tole chiyal' wgonle llin wde wdeli diika' non Chioza' gak gonle kwenche kon ga chyalljan wchinlen gaklenle ben' yoblə. ¹¹ Beena' naki che' wi'e cho'a xtill' Chioza', chiyal' ine' kon ka nan. Na' beena' naki che' gaklene' gone' to llin, chiyal' wchine' doxente fuerza' be' Chioza' le'. Na' yog'lol' daa gonle, li gonan kwenche shajla'o Chioza' daa nakle Jesucristona' txen. La' le' chidolee sho'e balaan na' inabi'e zejli kani. Kan' nakan.

¹² Le' ben' bish'dawaa na' le' ben' zandawaa, bi gakllejile na' yibanzile daa chle'ile yel' zak'zi'ka', la' bi nakan ka dii yibanicho. ¹³ San li yibayi daa lenle chzak'zi'le ka diika' wxak'zi' Crístona', kwenche lekzka' yiba yizakile kat' ile'ile ziza'lene' balaan xen che'na'. ¹⁴ Chakomba le' shi no ine zban chele daa nakle Crístona' txen, la' Espirituna', beena' nak ben' choo ben' xen che Chioza', zualene' le'. ¹⁵ Shi nole chzak'zi'le, wenlan sak'zi'le daa chonle dii wenna' aga ka daa sak'zi'le daa nakle wen xya, wa jlanle, wa benle bichlè dii mal, wa jalalli chele ga bi chak che ben'. ¹⁶ Na' shi chzak'zi'le daa nakle Crístona' txen, bi chiyal' yiyii yido'ile, san li we'la'o Chioza' daa naklene' txen.

¹⁷ Ba bllin lla solo gon Chioza' yel' joschis che ben'ka' nonlilall'gake'ne'. Na' shi solon ladjchoni, çnakla gak che ben'ka' bi chzenag dill' wen dill' kob che Chioza', lla? ¹⁸ Na' shi ben'ka' zej shli dii zan dii chen chle'gakile' na' axt kayaadia yilagake' lawinka', çalechli ki gak che ben'ka' bi chall chlleb Chioza' na' ben' saaxyaka'? ¹⁹ Na' ben'ka' chzak'zi' kon ka nllia Chioza' bia' gak chegake', toshiizi chiyal' gongake' dii wenna' na' gon kwingake' lall' na' Chioza', beena' bxe bsile' legake', na' gaklene' legake' ka bchebe' gone'.

5

¹ Le' ngoo lo na'le bish' ljwellchoka' nonlilall' Crístona', lekzka' nad' nlan' ka daa nlanle, na' ble'teid' ka wxak'zi' Crístona', na' len' chidolaa ikaa balaan xenna' kat' yilee. Daan, chat'yoid' le': ² Gap wwiale ben'ka' ba nonlilall' Chioza', ben'ka' ba none' lall' na'le. Li gonan lega ben' chibayi gon ka chazlall' Chioza'. Na' aga gonyaadiazen, ni bi gonle lez gaxjle dii xen, san li gonan do yichj do lall'le. ³ Na' bi gonze' ka chñabia'tegal lao ben'ka'

nak lall' na'le, san chiyal' wli'le chonle wen lawe'ka'. ⁴ Na' kat' yila' Jesucristona', beena' chnabia' yog'lol' ben'ka' chap chwia ben'ka' nonlilall'gake'ne', na' gone' le' to balaan xen daa biga te cheyin.

⁵ Na' lekzka' le' bi' xkwid', wlexj yichjle lao ben' golka'. Na' yog'lol'-le chiyal' wlexj yichjle lao ljwell-le ganga, na' gake ben' gaxjlall', la':
Chioza' bi chle'shiile' ben'ka' chep cha'lall',
san chaklene' ben'ka' nak gaxjlall'.

⁶ Li gake ben' gaxjlall' lao Chioza', beena' nap yel' wak choo yel' wak xen, kwenche kwee le' balaan kat' illin llana'. ⁷ Li gon lall' na' Chioza' yog'lol' dii chak chele, la' le' zie' wneyi chele.

⁸ Li gakte ben' nyeen nyeeniyi na' li se kwas. La' dii xiwaa daa chakzi' chakzbani cho' chdan ka to bell znia, ba chbil' chdon, na' chyiljan no wlliyi'n. ⁹ Li soatip li soashosh gonlilall'le Crístoná' na' bi we'zle latj che dii xiwaa, la' nezkzile' doxenæ yell-lioni yog'lol' ben'ka' nakcho txen ba chle'gakile' yel' zak'zi'ka' ka diika' chen chle'ile. ¹⁰ Na' ka ba biyoll wdele yel' zak'zi'ka' shloll, Chioza', beena' nap yel' chiyesh'lall' xen, yiyone' le' ka chazlallee na' gone' ka gakchachle na' yizoatip yizoashoshe' le'. La' lekzen' gox wñabe' cho' kwenche yidol'cho balaan xen che'na' daa bi te cheyin daa nakcho Crístoná' txen.

¹¹ Len' chidolee sho'e balaanna' na' inabi'e zejli kani. Kan' nakan.

¹² Ben' bish'cho Silvánoni, beeni nezid' zoatip zoashoshe' nonlilallee Crístoná', goklene' nad' bzej' le' to chop cho'a dill' kwenche wtip' lall'le. Na' dga nia' le' chli'n dii licha chaki Chioza' cho'. Li soatip li soashosh lo yel' chaki che'na'.

¹³ Ben'ki nonlilall' Crístoná' yell Babilóniani, ben'ki ba gox wñab Chioza' ka gox wñabe' le', na' lekzka' Márconi, bi'ni nak ka dowalj bi' cha', chwapgake' le' chiox. ¹⁴ Li wwap chiox ljwell-le lega ben' chaki ljwellin.

Soashgale mbalaz yog'lol'-le le' nakle Crístoná' txen.

Kart wchopi daa bzej Pédróna'

¹ Nad' Pedro, nak' wen llin che Jesucristóna' na' nak' postl che'. Chzej' le', ka le' ba nonlilall'cho Jesucristóna', beena' nak Chios checho na' ba bene' cho' yel' mban zejli kani daa nake' ben' li ben' shao'. Na' daa nonlilall'chone' nakan to dii zakii. ² Gaklenshga Chioza' le' na' gone' ka soale mbalaz inleeb daa ba nombia'lene' na' nombia'tele Xancho Jesúsza'.

³ Kon yel' wak che'na' ba none' cho' yog'lol daa chyalljicho kwenche soacho goncho ka cheenile' daa nombia'chone', na' lo yel' ben' wen che'na', daa nak dii xen inleeb, gox wñabe' cho'. ⁴ Na' daa nake' ben' wen inleeban, bchebe' gone' ka gake ben' wen ka nake' le', na' yilale lao daa chxinj chlenan ben' yell-lioni daa chongake' daa nazan chegake'. Na' daa bchebe' gone' checho nakan dii wen inleeb na' dii xen zaka'n. ⁵ Daan, le' ba chonlilall'lene' chiyal' gonle ka dii le kwenche gonle wen, na' gapchle yel' sin', ⁶ na' inabia' kwinle, na' gaple yel' chxenlall' kat' bi chak chele, na' gonle ka cheenile', ⁷ na' ile'shii ljwell-le na' gakile yog' ben'.

⁸ Shi zizikchli gonle yog' diiki, gonan ka gakbia' lo yel' mban chelena' bi bembia'dadzle Xancho Jesucristóna'. ⁹ Per beena' bi chon diiki, nake' ben' bi nteyi daa ba gol-lallee ba bixi biyech saaxya che'na' bene'. ¹⁰ Daan, le' ben' bish'dawaa na' le' ben' zandawaa, daa ba gox wñab Chioza' le', li gon ka dii le soachechle gonle diiki. La' kat' ba chonle diiki bibi de wchixan le', ¹¹ na' le shajla'ole kat' yillinle gana' chñabia' Xancho Jesucristóna', beena' bisle' cho'.

¹² Daan, toshiizi yisaa lall'le diiki, la'kzi ba nezilen na' ba zoachechle chajle'le dill' li che Chioza' daa ba nombia'le. ¹³ Shlak ni mban', chakid' chiyal' yisaa lall'le diiki, ¹⁴ la' nezid' ba zoa gaoshosh guet' kon ka ba wna Xancho Jesucristóna' gak cha'. ¹⁵ Na' gontekz' to dii byen we'len' le' dill' naa ni mban' kwenche lekzka' kat' ba wit' lljadinile' diiki ba wnia' le'.

¹⁶ Diika' ba bli' bsedinto' le' che yel' wak che Xancho Jesucristóna' na' cheyi daa yiyede', aga nakan dii biyiljall'zə ben', san chopshosh jalaonto'kin ble'into' yel' ben' choo ben' xen che'na'. ¹⁷ Ble'into' ka wloo Xacho Chioza'ne' balaan len yel' chey cheeni' che'na' ka wñie' yabana' gana' nak liizelozi mbalaz, na' wne': "Beenin xiinaa, le chakidee na' chazlall'chgaid' ka chone'." ¹⁸ Neton' zelennto'ne' lo yaa che Chioza' na' kwinnton' beninto' shii Chioza' ka wñie' yabana'te.

¹⁹ Na' daa ble'into' dga, bichop cho'a dill' daa bzej dii ben'ka' wdixjee daa goll Chioza' legake' kani'yi. Na' le', chiyal' sele wñeyi xtilleeka', daa nakan ka to yi' daa chzeeni' ga nak shgasj shchol, axt ki illin lla yiyed Jesucristóna', beena' chzaklebi belj xsila', na' kooche' beeni' che'na' loo yichjlall'do'leka'. ²⁰ Na' dii llialote shajniile dga: ni to cho'a dill'ka' bzej dii ben'ka' wdixjee daa goll Chioza' legake' kani'yi bi nakan dii wdiljall'zgake'. ²¹ La' dii ben'ka' wdixjee daa goll Chioza' legake' kani'yi, biga wnegake' tobia'lall'zgake', san Espiritu Sántonan' bzajniile' legake' kwenche be'gake' xtille' Chioza'.

2

¹ Per lekzka' ladj ben' Israelka' wzoa ben' wxiye', wnazgake' chyixje'gake' daa goll Chioza' legake'. Na' ka'kzə ladjlena' soa ben' wli' wsedi de wxiye'ka'. Na' wli' wsedgakile' le' ka ki gakbe'zile' de wxiye' che'ka' daa chliayi' ben'. Na' wzoagake' ka'lə Xanchona', beena' wdixj saaxya che'ka'. Na' daa gongake' ka', tolbe' kwiayi'gake'. ² Ben' zan gongake' txen dii mal che'ka' na' gongake' dii zban daa nazan chegake'. Na' ni chegake' ine ben' zban che dill' li che Chioza' daa nocho. ³ Daa selall'gake' gat' kwe'gakile', wli' wsedgakile' le' daa chyiljall'zgake'. Kani'teyi ba nchogbia' chegake' kwiayi'gake', na' bich gakxen chegake'.

⁴ Chioza' bi wxi'xene' che anjlka' bxinj, san btakw bcheje' legake' lo yel chola' latja' gana' nseje' legake', na' nan' nkweze' legake' axt kat' illin lla wchogloe' chegake'. ⁵ Ni bi wxi'xene' che ben' yell-lioka' kani'yi, san bene' yejsiw' wala' bliayee ben' malka'. Per dii Noéna', beena' wdixje'i ben' nan' chiyal' gongake' wen, Chioza' bisle'ne' len zi gall ben'. ⁶ Lekzka' Chioza' bchogloe' che ben'ka' lle' yell Sodómana' na'ch yell Gomórrana', na' bzey btié' yellka' axt ka biyakgakan de, kwenche ile'i ben' ka' kak che ben' malka'. ⁷ Per bisle' dii Lota', beena' gok ben' wen, beena' bwiyi dii zbanka' ben ben' malka'. ⁸ Na' ben' wenni wzoa ladje'ka', gokyeshii loo yichjall'do'ena' ni cheyi dii malka' ble'ile' bengake' yog' lla. ⁹ Yog'lol diiki chli'gakan nan Xanchona' nezile' nak gone' yisle' ben'ka' chon ka chazlallee lawi bittezə dii lallj. Na' lekzka' nezile' nak wkweze' ben' malka' axt kat' illin lla wchogloe' che yog'lol ben'.

¹⁰ Na' dii lliarote wsak'zi'ch Xanchona' ben'ka' choe' cho'a xbayi beli chen che'ka' daa nxinj yichjall'do'eka', na' bi cheentegakile' no inabia' legake'. Ben'ka' bibi nalli na' nakgake' ben' cha'sib, na' ni bi chlebgake' inegake' che anjlka'. ¹¹ San anjlka', la'kzi nakchgake' ben' walch na' napchgake' yel' wak xench, bi chiyaxjgakile' inegake' che anjlka' bi bzenag kwenche gaogake' xya chegake' lao Chioza'.

¹² Per ben'ki chnetezgake' zban che diika' bi chajni'gakile'. Nakgake' ka bayix'ka' baka' bi nteyi, baka' chaljgacb na' chzen ben' legakb na' chitgake'b. Ka'kzan gak che ben'ka', lekzka' kwiayi'gake'. ¹³ Na' ikaagake' laxji dii mala' ba bengake'. Ben'ki chakgakile' zix sia choe'gake' cho'a xbayi beli chen che'ka' axt tellatekzə. Na' kat' chlehgake' le' cheej chaole, bi nxe bi nzak' nakgake' daa chibagakile' chongake' daa nazan chegake'.

¹⁴ Nottezə noolə ile'gakile' chzelall'gake'ne', na' bi chelj chlla'gakile' gongake' saaxyana'. Na' chgooyel'gake' ben'ka' bin' gakcha lo xnez Chioza' kwenche gongake' dii mala', na' le chzelall'gake' gat' kwe'gakile'. Ben'ki chon ka' ba nakten kwiayi'gake'. ¹⁵ Ba wlej yichjgake' nez li che Chioza' na' ba zejgake' lo nez daa wyoo Balaama' xiin Beora', beena' wyoolall' sho' laxje' che dii mala' bene'. ¹⁶ Na' ni che dii mala' nan gone', to burr, ba bi chak ine, wneb ka ben' na' bsheshlem le' kwenche bi gone' dii mala' ba ngoo yichje' gone' daa nchol nitile'.

¹⁷ Ben' malki zaklebgakile' beja' daa bich bi nis chal, na' ka bejka' choa' be'na'. Ba nchoglo chegake' soagake' zejli kani' gana' liizelozi nak shgasj shchol. ¹⁸ Chnegake' cha'sibə choe'gake' dill' dii bibi zakii, na' chgooyel'gake' ben'ka' kayaadia ba bichejgake' ladj ben'ka' chon dii mala' kwenche sto shii yizologake' yiyoe'gake' cho'a xbayi beli chen che'ka'. ¹⁹ Na' che'gake' wak gongake' daa nazan chegake', la' aga bi xya che dii mala' de, na' le'yen'gaken' ntakw nchej dii mala'. La' nottezə ben' chone' kon ka na daa chnabia' le', ba ndo'e lawinna'. ²⁰ Na' ben'ka' ba biyell bila'gake' lao dii mala' daa de yell-lioni daa ba ben'ilall'gake' Xancho Jesucristona', beena' bisla cho', shi sto shii yitakw yichej dii mala' legake', gaktechlə mal chegake' aga ka gok chegake' dii nech kana' bin' gon'ilall'gake'ne'. ²¹ Wenchlan shel' bi bembia'kzgake' nez li che Chioza' aga ka daa bembia'gake'n na' bilaala'ogake' cho'a xtilleena' daa bli' bsemi ben' legake'. ²² Na' daa bengake' ka', billinin che dillaa de daa na: "Bekwaa chiyaob daa biyebb, na' kusha', bana' zi' gozj, chibix chitolb loo benja' sto shii."

3

¹ Le' ben' bish'dawaa na' le' ben' zandawaa, dgan de wchop shii chzej' le'. Na' chopten choe'len' le' dill' kwenche chisaa lall'le sele wneyi che dii wenna' daa ba nezile. ² Lilljadini dill'ka' be' dii ben'ka' wdixjee daa goll Chioza' legake' kani'yi, na' daa bliia Xanchona' bia', beena' bisla cho', daa ba bli' bsemi postlka' le'.

³ Dii lliarote chiyal' inezile, kat' ba zoa te che yell-lioni, na' ichej ben' gongake' daa nazan chegake' na' gonlegake', ⁴ inagake': "¿Berache bin' yiyed Cristona' ka bchebe' gone'? Ba wit dii xaxna'choka' na' toz ka ni chak naa ka kana' wxw wzilte yell-lioni." ⁵ Ben'ka'

na ka', bi cheengakile' yisa'lall'gake' daa gok kani'yi, kana' to ka wneza Chioza' na' wya' wbin yabana', na' biyak nisdoka' toz na' bli'lao yell-liona'. ⁶ Na' lekzka' len' bllie' bia' gok yejsiwaa kwenche blliyi' nisa' yell-lioni kani'yi. ⁷ Na' yabana' len yell-lioni, diiki chle'icho naa, ba nllia Chioza' bia' chegakin wzey wte yi'na' legakan llana' wchogloe' kwiayi' yog' ben' malka'.

⁸ Na' le' ben' bish'dawaa na' le' ben' zandawaa, bi gal-lall'le Xanchona' chle'ile' tlla ka to mil yiz na' to mil yiz ka tllaza. ⁹ Zoa ben' ne' chshe'lall' Xanchona' gone' ka bchebe'. Aga chshe'lalleen', san nape' yel' chxenlall' daa bi cheenile' no kwiayi', na' cheenile' yog' ben' yiyaj yileni.

¹⁰ Llana' yiyed Xanchona' tokonganzan yilee, ka chon to ben' wban tokonganz cho'e loo yoo lill ben'. Na'ch gak to sshag wal na' yinitlo yabana' na' diika' llia xaninna', wzey yi'na' legakan na' kwiayi'gakan, na' yell-lioni na' yog' dii de lawinna' sheygakan.

¹¹ Daa nezicho yog'lolte dii de kwiayi'gakan, chiya' goncho ka dii le gakcho ben' li ben' shao' na' soacho goncho ka cheeni Chioza' ¹² shlak chbezcho llana' wchogloe' che ben', na' goncho to dii byen kwenche yob gakan. Llana' gak ka', yi'na' wlliyi'n yabana' na' diika' llia xaninna' yilengakan na' kwiayi'gakan. ¹³ Na' cho', chbezcho to yaba kob na' sto yell-lio kob daa bcheb Chioza' gone' cho' gana' she' shgal' ben' li ben' shao'.

¹⁴ Daan, le' ben' bish'dawaa na' le' ben' zandawaa, shlak zoale chbezle diiki, li gon to dii byen kwenche soalenle Chioza' wen, na' bibi xtol'le gat' ni bibi nda' nchen yichjall'do'lena' kat' lljazele lawe'na'. ¹⁵ Na' chiya' shajniile' dga: Xanchona' nape' yel' chxenlall' checho daa bi cheenile' kwiayi'cho, san cheenile' yog'cho yilacho. Na' lekzka' ben' bish'cho Páblona', beena' le chakicho, bzeje' xtilii diiki kon yel' sin' daa be' Chioza'ne'. ¹⁶ To to ka bzej Páblona', bi'e dill' che diiki. Na' bal' diika' bzeje' le lallj shajniichon, na' ben'ka' bi nteyi len ben'ka' bin' gakcha lo xnez Chioza' chajni'gakile'n klela, ka chongake' che bichla daa na Cho'a Xtil' Chioza', chajni'gakile'n klela, na' chlliyi' kwingake'.

¹⁷ Na' le' ben' bish'dawaa na' le' ben' zandawaa, daa ba nezile dga, li wsak' kwenche ki gonlleji ben' malka' le' na' yilaale lo xnez Chioza'. ¹⁸ San li gon ka dii le shajni'chile ka chaklen Xancho Jesucristona' cho', na' li gombia'ch beena' bisle' cho'. Len' chidolee sho'e balaan naa na' zejli kani. Kan' gakan.

Kart nech daa bzej Juanna'

¹ Chzejnto' le' kwenche inezile che beena' ba zoa kana' zi' xe sil yell-lioni, beena' bzenagnto' bi'e dill' na' chopshosh jalaonto'kin ble'into'ne'. Bwianto' ka nake' na' beḡ'nto'ne' kon na'nto'ki kana' wde' yell-lioni. Len' nake' Xtill' Chioza' na' len' cho'e beḡ' yel' mban zejli kani. ² Na' beeni nsa' yel' mban zejli kani bide' yell-lioni, na' ble'into'ne' na' choe'nto' dill' che'. Na' chyixje'into'n le' kwenche inezile ba zoalenkze' Xacho Chioza' kana' zi' xe silte yell-lioni na' ba bidsoe' ladjchoni. ³ Chyixje'into' le' che beeni ble'into' na' bzenagnto' bi'e dill', kwenche yiyoll yido gagle neto' txen. Na' dii li ba nakkzcho txen Xacho Chioza' na' Xiine' Jesucristona'. ⁴ Chzejnto' le' diiki kwenche yiyoll yido soale mbalaz.

⁵ Diikin bli' bsemi Jesucristona' neto', na' chyixje'into'n le': Chioza' nake' ka beeni' daa nake' liizelozi beḡ' li beḡ' shao', na' bibi dii mal ni de wxiye' nsee, diika' nak ka yel chol. ⁶ Shi inacho nakchone' txen na' chdatecho lo yel chol'a, chziye'zchon na' bi zejlencho daa nak dii li. ⁷ San shi zoacho lo beeni'na' ka zoa Chioza' lo beeni'na', na' ba nakcho toz, na' xchen Xiine' Jesucristona' chixis chiyiban yichjlall'do'chona' kwenche bibi saaxya nda' nchenan.

⁸ Shi inacho bibi saaxya napcho, chziye'z kwinchon, shi naa, na' nakbia' bi nombia'cho dii lina'. ⁹ San shi yixoadol'cho saaxya chechoka' lao Chioza', beena' toshiizi chon ka chchebe' na' nake' beḡ' li beḡ' shao', wizi'xene' saaxya chechoka' na' yixis yiyibe' cho' che yog'lol' dii malka' ba bencho. ¹⁰ Shi inacho bin' goncho saaxya, ba chtobicho Chioza' de wxiye'na', na' nakbia' bin' gombia'cho cho'a xtilleenan', shi naa.

2

¹ Le' xiindawaa, chzej' le' dga kwenche bi wxinj wlenle. Na' shi nocho ba bxinj blencho, zoa to beḡ' inabe' cho' lao Xacho Chioza', len' Jesucristona', beena' nak dowalj beḡ' li beḡ' shao'. ² Na' len' wdixje' saaxya chechoka' kon yel' mban che'na', na' aga che to cho'zan wdixje', san len che yog' beḡ' lle' zbii zkaan yell-lionin.

³ Shi choncho ka nllia Chioza' bia' goncho, nezicho ba nombia'chone'. ⁴ Na' shi zoa beḡ' ne': "Nombi'ane'", na' bi chone' daa nllie' bia', nake' to beḡ' wxiye' na' nakbia' bi nombi'e dii lina'. ⁵ San shi ba choncho ka na cho'a xtill' Chioza', dii li ba chakichone' ka chiyali. Na' kan' chakbe'icho ba nakchone' toz. ⁶ Beena' ne' ba nake' Chioza' tozə chiyal' wsa' che' ka bsa' che Jesucristona'.

⁷ Le' beḡ' bish'dawaa na' le' beḡ' zandawaa, ka nak dga chzej' le' bi nakan dii kob, lekzannan' bzenagle dii nechte. Nakan dii nllia Chioza' bia' kani'teyi na' bakzə yoon nagle. ⁸ La'kzi ka', wak inacho dga chzej' le' nakan dii kob, la' dii li nakan ka ben Cristona' na' ka chonle. Na' dii mala' daa nak ka yel chol' zej chiyol chinitan, na' beeni' che Chioza' ba chzeeni'n.

⁹ Shi to beḡ' ne' zoe' lo beeni' che Chioza', na' chakzbanile' bish' ljwelle'na', lo yel chol'an' ni zoe'. ¹⁰ Beena' chaki bish' ljwelle'na' ba zoe' lo beeni' che Chioza', na' bibi de wchixan le'. ¹¹ San beena' chakzbani bish' ljwelle'na' chde' lo yel chol'a' na' bi nezile' galan zeje', la' dii mala' chone' ba nonan le' ka to beḡ' lchol'.

¹² Le' xiindawaa, chzej' le' dga, daa ba bizi'xen Chioza' saaxya cheleka' daa wit Jesucristona'. ¹³ Le' zoa xiin chele, chzej' le' dga daa nombia'le beena' ba zoa kana' zi' xe silte yell-lioni. Le' bi' wew', chzej' le' dga daa choile bi chzenagle che dii xiwaa.

Le' xiindawaa, chzej' le' dga daa nombia'le Xacho Chioza'. ¹⁴ Le' zoa xiin chele, chzej' le' dga daa nombia'le beena' zoa kana' wxw wzil yell-lioni. Lekzka' chzej' le' bi' wew', daa nakle bi' wal na' ba bleble Cho'a Xtill' Chioza' loo yichjlall'do'lena', na' bi chzenagle che dii xiwaa.

¹⁵ Bi gaktekile yell-lioni, ni daa de lawinna'. Nottezcho shi chakicho daa de yell-lioni, bi chakicho Xacho Chioza'. ¹⁶ La' yog'lol diiki de yell-lioni: dii mala' daa chzelall' beli chenna', na' daa chzelall'cho bi dii chle'icho, na' yel' cha'siba'. Aga legakannan' chshab Xacho Chioza', san nakan dii chshab yell-lioni. ¹⁷ Na' yell-lioni chde cheyin len dii malka' chzelall'cho lawinna', san beena' chon ka chazlall' Chioza' de yel' mban che' zejli kani.

¹⁸ Le', xiindawaa, ba zoacho llaka' zeelo. Na' ba benile za' Beena' gatzbanile' Crístona'.* Na' naa ba chle'icho ben' zan ben'ka' chakzbangakile'ne'. Daan, ba nezicho ba zoacho llaka' zeelo. ¹⁹ Legake' ba bengake' cho' txen la'kzi aga dii li gokgake' cho' tozə. La' shel' dii li gokgake' cho' tozə, ni nakgake' cho' txen, shel'ka'. Na' daa bikwasgake', bli'gake'n kwaslol aga do lall'gake'n gokgake' cho' txen.

²⁰ Per beena' nak liizelozi ben' wen ben' shao' ba bene' kwenche zoa Espíritu Sántona' loo yichjlall'do'lena'. Na' daan, yog'le chajniile dill' li che Chioza'. ²¹ Aga chzej' dga daa inacho bi nombia'le dii linan', san chzeja'n daa ba nombia'lennan', na' nezicho bibi dill' wxiye' nchix dill' li che Chioza'.

²² ¿Noran ben' wxiye'na'? Len' beena' na che Jesús'a' aga len' Crístona', beena' chbezcho wsel' Chioza'. Beena' na ka', len' chakzbanile' Crístona', na' chzoe' Xacho Chioza' ka'lə len Xiine' Jesucrístona'. ²³ Beena' chzoe' Xiin Chioza' ka'lə lenkz Xe' Chiozan' chzoe' ka'lə. San beena' ina chonlilallee Xiin Chioza', lenkz Xe'nan' nake' txen.

²⁴ Daan, li kooshao' loo yichjlall'do'lena' yog'lol daa wzolo chsedle ka wyoole lo xnez Chioza'. Na' shi ba wlooshao'len loo yichjlall'do'lena', toshiizi gake tozə Xacho Chioza' len Xiine'na'. ²⁵ Na' dgan ba bcheb Jesucrístona' checho: gone' yel' mban zejli kani.

²⁶ Chzej' le' dga, daa chda ben'ka' cheengakile' siye'gake' le'. ²⁷ Na' ka nakle le', ba nzoa Jesucrístona' Espíritu Sántona' loo yichjlall'do'lena', na' aga chyalljchile no wsedi le' daa nak dii li. La' kwin Espíritu Sántona' ba chsedile' le' yog' diika', na' daa chli' chsedile' le' nakan dii li, bi nakan de wxiye'. Na' toshiizi li gak Crístona' tozə, ka ba bli' bsedi Espíritu Sántona' le'.

²⁸ Na' naa, xiindawaa, chiya' gakcho Crístona' toz toshiizi kwenche kat' yiyede' yibaicho na' bi yiyii yido'icho lawe'na'. ²⁹ Na' daa ba nezile nake' ben' li ben' shao, lekzka' chiya' inezile yog' ben'ka' chongake' daa nak shlich'a' nakgake' xiin Chios.

3

¹ Li gakbe'i ka chaki Xacho Chioza' cho' daa ne' nakcho xiine'. Na' dii li ba nakkzcho xiinen'. Daan, ben'ka' bi nonlilall'gake' Chioza' bi chle'shi'gakile' cho', la' bi nombia'gake'ne'. ² Le' ben' bish'dawaa na' le' ben' zandawaa, ba nakcho xiin Chios. Na' la'kzi bin' inezyen'icho nakan yiyakcho, nezicho kat' yila' Jesucrístona' yiyakcho ka nake', la' ile'ichone' do ka nake'. ³ Na' nottez beena' ba none' lez dga, bich chone' txen dii mala' kwenche gake' ka nak Jesucrístona', beena' bibi dii mal nda' nchene'.

⁴ Na' beena' chxinj chlen chyishje' daa nllia Chioza' bia', la' kat' chxinj chlencho, xtilleenan' chyishjcho. ⁵ Le' ba nezile bid Jesucrístona' yell-lioni kwenche bikwase' saaxya chechoka', na' nezteile bibi saaxya che' de. ⁶ Na' yog' ben'ka' nakgake'ne' toz bi chdagake' lao saaxyana'. San yog' ben'ka' chda lao saaxyana' bin' gakbe'gakile' non nak Crístona', ni bi nombia'gake'ne'. ⁷ Le' xiindawaa, bi we'le latj no siye' le'. Beena' chon daa nak shli nake' ben' li ben' shao' ka Jesucrístona' nake' ben' li ben' shao'. ⁸ Na' beena' chxinj chlen nake' xiin dii xiwaa, la' dii xiwaa bxinj bnenan kana' zi' xe silte yell-lioni. Na' ni cheyi dgan bid Xiin Chioza', kwenche wllia yee yog'lol daa chon dii xiwaa.

⁹ Beena' ba nak xiin Chios bich chde' lao saaxyana', la' Chioza' ba bikobe' yel' mban che'na'. Na' daa ba nake' xiin Chioza', bich gak te' lao saaxyana'. ¹⁰ Na' nakbia' ben'ka' dii licha nakgake' xiin Chios na' ben'ka' nak xiin dii xiwaa. La' nottez beena' bi chon daa nak shli na' bi chakile' bish' ljwelle'na' bi nake' xiin Chios.

* **2:18** Beena' gatzbanile' Crístona': xtila' nagake' El Anticristo. Lekzka' bwia 1Jn. 2:22; 4:3; 2Jn. 1:7, na' 2Tes. 2:3.

11 Kana' wzolotele bzenagle xtil' Crístona' benile dga: chiyal' gaki bish' ljwellcho. 12 Bi chiyal' goncho ka ben dii Caínna', bene' dii xiwaa txen na' bete' ben' bisheena'. Na' ¿biche betze'ne'? Bete'ne' daa bentezi ben Caínna' dii mala', na' ben' bisheena' bene' daa chiyoolallii Chioza'.

13 Le' ben' bish'dawaa na' le' ben' zandawaa, bi gakklejile shi ben'ka' bi chajle' che Chioza' chakzbangakile' le'. 14 Daa chakicho bish' ljwellchona' nezicho bich chdacho lo neza' gana' kwiayi'cho, san ba de yel' mban checho zejli kaní. La' beena' bi chaki bish' ljwelle'na' ni zeje' lo neza' gana' kwiayee. 15 Nottez ben' chakzbanile' bish' ljwelle'na', lebzín chonlene' ben' wen xyana'. Na' nezile ni to wen xya bi de yel' mban che' zejli kaní. 16 Crístona' bliile' cho' ka nak yel' chakina' daa bzani yel' mban che'na' ni checho. Na' lekzka' cho' chiyal' izani yel' mban chechoni ni che bish' ljwellchona'. 17 Shi ga zoacho chaj chdecho mbalaz na' chwiacho bish' ljwellchona' chyallj chchinile' na' bi chiyesh'lallichone', ¿nakran goncho inacho chakicho Chioza'? 18 Le' xiindawaa, bi chiyal' gaki ljwellcho de cho'a dill'z, san chiyal' wli'cho dii li chaki ljwellcho.

19 Na' nezicho shi ba chaki ljwellcho, na' wli'n ba zejcho lo nez lina', na' nezicho Chioza' chibaile' ka choncho, 20 la'kzi yichjlall'do'choni inan nakcho ben' saaxya. La' Chioza' nakche' ben' choo ben' xench ka cho' na' nezile' yog'lolte. 21 Le' ben' bish'dawaa na' le' ben' zandawaa, shi yichjlall'do'choni chakbe'in bibi xtol'cho de, na' bi gall illebcho we'llwillchone', 22 na' gone' bittezə daa inabichone', la' chzenagcho daa nllie' bia' goncho na' choncho ka chazlallee. 23 Na' dgan nllie' bia' goncho: gonlilall'cho Xiine' Jesucristona', na' gaki ljwellcho ka ba bllie' bia' goncho. 24 Ben'ka' chongake' ka nllia Chioza' bia' ba nakgake'ne' toz na' zoalene' legake'. Na' nezicho zoalene' cho' daa ba bene' Espiritu che'na' zoe' loo yichjlall'do'choki.

4

1 Le' ben' bish'dawaa na' le' ben' zandawaa, bi shajle'le che nottez ben' ine': “Ba chne Chioza' nad’”, san li wwiagaxjə shi leile' Chioza' chnie'ne' wa shi naze'n. La' yell-lioni ba chas chda ben' zan ben' chziye' nazgake' chyixje'gake' daa na Chioza'. 2 Dgan gonan ka gakbe'ile beena' chyixjee daa na Espiritu che Chioza': yog'lol ben'ka' cho'e dill' nan Jesucristona' nake' Chios na' bide' golje' goke' ben' de beli chen ka cho', beenan' zoalen Espiritu che Chioza'ne'. 3 Na' nottez beena' ina Jesucristona' bi goke' ben' de beli chen, bi zoalen Espiritu che Chioza'ne' na' chakzbanile' Crístona'. Na' ba nezile ba zoa wli'lao beena' gakzbanile' Crístona', na' naa ba chdakz ben' chon ka yell-lioni.

4 Le' xiindawaa, ba nakle Chioza' tozə, na' bich chajle'le che ben' wxiye'ka', la' beena' zoalene' le' napche' yel' wak xench aga ka dii xiwaa daa chda yell-lioni. 5 Ben' wxiye'ka' nogake' diika' na ben' yell-lioki, daan, zle che yell-lionizə choe'gake' dill', na' ben'ka' bi nombia'gake' Chioza' chzenaggake' xtilleeka'. 6 San cho' ba nakcho Chioza' tozə, na' ben'ka' nombia'gake' Chioza' chzenaggake' checho. Na' ben'ka' bi nakgake' Chioza' tozə, bi chzenaggake' checho. Na' kan' chnezicho non cho'e dill' li daa chzajni Espiritu che Chioza'ne' na' non cho'e dill' wxiye' daa chzajni dii xiwaane'.

7 Le' ben' bish'dawaa na' le' ben' zandawaa, chiyal' gaki ljwellcho, la' kan' chon Chioza' chakile' ben'. Nottezə ben' zoe' chaki ljwelle', nakbia' dii li nake' xiin Chios na' nombi'e Chioza'. 8 Na' beena' bi chaki bish' ljwelle'na' bin' gombi'e Chiozan', la' Chioza' zoe' chakile' cho'. 9 Chioza' bli'e ka chakile' cho' daa bselee Xiine'na' tlish' tyaj yell-lioni kwenche gonlilall'chone' na' gat' yel' mban checho dii bi te cheyin. 10 Kin nak yel' chaki daa nak dowalj: aga inacho cho'lan gokicho Chioza', san daa chaki Chioza' chon' bselee Xiine'na' wite' kwenche wdixje' saaxya chechoka'.

11 Na' le' ben' bish'dawaa na' le' ben' zandawaa, shi kan' chaki Chioza' cho', ka'kzan chiyal' gaki ljwellcho. 12 Ni to ben' bin' ile'ile' Chioza', per shi chaki ljwellcho, Chioza' zoalene' cho' na' yel' chaki che'na' ba chonan llin lo yel' mban chechoki ka chiyali.

¹³ Nezicho zoalencho Chioza' na' le' zoalene' cho' daa ba nzoe' Espíritu che'na' loo yichjlall'do'choki. ¹⁴ Na' neto' ble'into' Xiin Chioza' na' choe'nto' dill' nan Xacho Chioza' bselee Xiine'na' kwenche yisle' ben' yell-lioni na' bi kwiayi'gake'. ¹⁵ Nottezə ben' chajli'e na' cho'e dill' ne' Jesúza' nake' Xiin Chioza', Chioza' zoalene'ne' na' le' zoalene' Chioza'.

¹⁶ Cho' ba nezicho na' ba chajle'cho chaki Chioza' cho'. Chioza' zoe' chakile' cho', na' shi zoacho chakichone' na' chaki ljwellcho, zoalencho Chioza' na' le' zoalene' cho'. ¹⁷ Na' shi ba chaki ljwellcho, chli'cho yel' chaki che Chioza' ba chonan llin lo yel' mban chechoki ka chiyałi, na' bi illebcho llana' yizi'e cho' kwent, la' ka wda Jesucristona' ka'kzan chdacho chakicho ben' yell-lioni. ¹⁸ Gana' zoa yel' chaki che Chioza' bibi yel' chlleb de. Na' shi dii li napcho yel' chakina' aga wllebcho yel' zi'na' wsel' Chioza'. La' beena' chlleb, bin' gon xshin yel' chaki che Chioza' lo yel' mban che'na' ka chiyałi'.

¹⁹ Cho' chakicho Chioza', la' zigaate len' gokile' cho'. ²⁰ Shi zoa ben' ne': "Chakid' Chioza'", per chakzbanile' bish' ljwelle'na', chziye'ze'n. ¿Nakran gone' gakile' Chioza', beena' bi chle'ile', len chle'itele bish' ljwelle'na' na' bi chakile'ne'? ²¹ Dgan nllia Jesucristona' bia' goncho: Beena' chakile' Chioza', lezkka' chiyałi' gakile' bish' ljwelle'na'.

5

¹ Yog'lol ben'ka' chajle'gake' Jesúza' nake' Cristona', beena' bsel' Chioza', legaken' ba nakgake' xiin Chios. Na' yog' ben'ka' chakgakile' Xacho Chioza' lezkka' chakgakile' ben'ka' nak xiine'. ² Nezicho shi chakicho Chioza', choncho daa nllie' bia' goncho, lezkka' chakicho yog'lol ben'ka' ba nak xiin Chios. ³ Shi choncho daa nllia Chioza' bia' goncho, ba chakichonen', shi naa. Na' diika' nllie' bia' goncho bi nakan zii sshab. ⁴ Na' yog' ben'ka' ba nakgake' xiin Chios chizogakile' bich chongake' dii mala' de yell-lioni. Na' daa chonlilall'cho Jesucristona', chizoicho bi choncho dii mala' de yell-lioni. ⁵ Ben'ka' chajle' Jesúza' nake' Xiin Chios, legaken' chzogakile' bi chongake' dii mala' de yell-lioni.

⁶ Ka bid Jesucristona' yell-lioni wchoe' nisa' na' blalj xchene'na' kana' betgake'ne'. Aga to wchoaze' nisan', san bene' diiki chopte, wchoe' nisa' na' blalj xchene'na'. Na' Espíritu che Chioza' choe' dill' ka daa gokə, la' len' zeelo cho'e dill' daa nak dii li. ⁷ Na' shon diika' choe'n dill' che Jesucristona': ⁸ Daa bidsoalen Espíritu che Chioza' le', na' daa wchoe' nisa', na' daa blalj xchene'na'. Na' toz ka choe'gakan dill'. ⁹ Chajle'cho dillaa choe' ben', per zak'chi dillaa daa choe' Chioza', na' len' cho'e dill' che Xiine'na'. ¹⁰ Beena' chajle' che Xiin Chioza', nezile xtill' Xacho Chioza' daa bi'e che Xiine'na' nakan dill' li. Na' beena' bi chajle' che Chioza' ba chone' Chioza' ka to ben' wxiye' daa bi chajli'e che dillaa bi'e che Xiine'na'. ¹¹ Na' dillaa bi'e nan: ba bene' cho' yel' mban zejli kañi, na' bene'n daa nonlilall'cho Xiine'na'. ¹² Beena' nake' Xiin Chioza' tozə, de yel' mban che' zejli kañi, na' beena' bi nake' Xiin Chioza' tozə, bi gat' yel' mban che' zejli kañi.

¹³ Chzej' le' dill'ki, ka le' nonlilall'le Xiin Chioza', kwenche inezile ba de yel' mban chele zejli kañi.

¹⁴ Nxenlall'cho wzenag Chioza' checho kat' bin inabichone' shi nakan daa cheenile' gakə. ¹⁵ Na' daa nezicho chzenague' checho bin chnabichone', lezkka' nezicho gone' daa chnabichone'.

¹⁶ Na' shi chle'icho to bish' ljwellcho chone' dii mala' daa bi nak dii kwiayi'lene', chiyałi' inabicho Chioza' gaklene'ne', na' Chioza' gone' ka yiyakshao' yichjlall'do'ena'. Kan' goncho shi chone' dii mala' daa bi kwiayi'lene'. De dii mala' daa chon ben' daa wlliaiyi'n le', na' bi nia' inabile Chioza' gaklene' beena' chon daa nak ka'. ¹⁷ Yog' dii mala' nakan saaxya, per de saaxyana' daa bi wlliaiyi'n cho'.

¹⁸ Nezicho beena' ba biyax xiin Chioza' bich zoe' chone' dii mala', la' Jesucristona', Xiin Chioza', chap chwie'ne' kwenche dii xiwaa bich gak gox' wnizan le'.

¹⁹ Nezicho nakcho lall' na' Chioza', na' yog' ben'ka' bi chzenag che Chioza' nakgake' lall' na' dii xiwaa.

²⁰ Na' lekzka' nezicho ba bid Xiin Chioza' na' bidzajniile' cho' kwenche nombia'cho beena' nak dowalj Chios. Na' ba nakcho lall' nee daa nonlilall'cho Jesucristona'. La' Jesucristona' nake' dowalj Chios, na' chone' yel' mban checho zejli kani. ²¹ Le' xiindawaa, mara gonlilall'le chioska' chon benecha'.

Kart wchopi daa bzej Juanna'

¹ Nad' ngoo lall' na' bish' ljwellchoki nonlilall' Crístona' chzej' li', noolə ba wlej Chioza' gako' lall' nee len xiino'ka'.* Na' le chakid' le', na' aga toz nad' chakid' le' san len yog' beñ'ka' ba nombia' daa nak dii lin. ² Le chakid' le' daa ba nombia'cho daa nak dii li daa yoo loo yichjlall'do'choka' naa, na' soalenan cho' toshiizi. ³ Chioza', beena' nak Xacho, len Xiine' Jesucrístona', gongake' ka gak wen checho, na' yiyesh'lall'gakile' cho', na' gongake' ka soacho mbalaz kwenche zejch gombia'cho daa nak dii li na' gaki ljwellcho.

⁴ Dii xen biba bizakid' ka wnezid' bal xiino'ka'† chdagake' lo nez li che Chioza', kon ka na Xachona' goncho. ⁵ Na' naa, nia' le' chiyal' gaki ljwellcho ganga. Dga nia' le' aga nakan dii zi' benicho, san dezd nechte wnezicho dga. ⁶ Dgan yel' chakina': goncho daa non Chioza' mandad. Na' dgan cheenile' goncho: soacho gakichone' na' lekzka' gaki ljwellcho kon ka ba benicho dezd nech.

⁷ Beñ' zan beñ' wxiye'ka' ba chda yell-lioni, na' bi chajle'gake' nan ba bid Jesucrístona' yell-lioni goke' beñ' de beli chen. Beñ'ka' bi chajle', legaken' beñ' wxiye'ka', beñ'ka' chakzbangakile' Crístona'. ⁸ Wsak'gale kwenche bi gakedadz llinna' ba benle, san yizi'le banez do ka nak daa chidol'le.

⁹ Nottezə beena' yilaa nez li che Chioza' na' bich zejlene' daa bli' bsemi Crístona', bi zoalen Chioza'ne'. Na' beena' zejlen daa bli' bsemi Crístona', zoalen Xacho Chioza'ne' na' lekzka' Xiine'na'. ¹⁰ Shi no za' gana' zoale zidye'lene' le' dill' daa bi chidilin daa bli' bsemi Crístona', bi wleblene' loo yoo lill-lena', ni bi wwaplene' chiox. ¹¹ La' beena' chlebe'ne', chone' txen dii mala' chone'.

¹² Dii zan dii cheenid' inia' le', per bi chaklallaa gona'n yishzə. San chbez' gat' latj yidkz' gana' zoale kwenche ile'i ljwellcho na' we'cho dill', na' yiyoll yido soacho mbalaz.

¹³ Beñ'ka' nak xiin beñ' bilo'na',‡ beena' wlej Chioza' gake' lall' nee, chwagake' le' chiox.

* **1:1** Noolə ba wlej Chioza' gako' lall' nee len xiino'ka': beñ'ka' nsemi nagake' daa na Juanna' ka' zejin beñ'ka' chdop chllag choe'la'ogake' Crístona' gana' bselee karta'. † **1:4** Bal xiino'ka': beñ'ka' nsemi nagake' zejin beñ'ka' chdop chllag choe'la'ogake' Crístona' gana' bselee karta'. ‡ **1:13** Xiin beñ' bilo'na': Llekzka' beñ'ka' nsemi nagake' zejin beñ'ka' chdop chllag choe'la'ogake' Crístona' gana' zoa Juanna'.

Kart wyoni daa bzej Juanna'

¹ Nad' ngoo lall' na' bish' ljwellchoki nonlilall' Crístona', chzej' li', Gayo, nako' ben' chakid' do yichj do lallaa.

² Ben' bish'dawaa, chnabid' Chioza' kon ka mbalaz nak yichjlall'do'na' lawe'na', ka'kz gak wen cho' lao yog'lolte na' so' shi'a shao'. ³ Le biba bizakid' ka bid bal ben' bish'choka' na' wnagake' zoachecho' lo nez li che Chioza'. ⁴ Bich bi de dii chonan ka yiba yizakchid' ka daa inezid' nan ben'ka' nak ka xiin' zejgake' lo nez li che Chioza'.

⁵ Ben' bish'dawaa, le wen chono' daa chakleno' bish' ljwellchoka' chon xshin Crístona', la'kzi nakgake' ben' zit' ben' bi nombi'o. ⁶ Lao ben'ki lle' ni nonlilall'lenchogake' Crístona' ba be'gake' xtilloo daa le chakilo' legake'. Ben goklen, be'gake' daa chyallj chchingakile' kon ka chaklall' Chioza' goncho, kwenche koochgake' nez. ⁷ La' legake' ba wloogake' nez kwenche gongake' xshin Jesucristona', na' bibi bex'gake' che ben'ka' bi nonlilall'gake'ne'.

⁸ Daan, chiya' we'cho daa chyallj chchingakile' kwenche gaklenchogake' we'gake' dill' li che Chioza'.

⁹ Ba bzej' le', le' chdop chllagle choe'la'ole Crístona', per Diótrefeza' bi chzenague' daa nia' le' daa cheenile' toze' inabi'e. ¹⁰ Na' daan shi ba gokan yid' gana' zoale na' wsheshlenee, la' chde' biz chon chne' cha'. Na' leyi bi chlebe' bish' ljwellchoka' chla' gana' lle'le. Na' ben'ka' cheeni wleb legake', chsej chllone', na' chibeje' legake' bich cho'e latj idop illaglengake' le' txen.

¹¹ Li' bish'dawaa, bi leno' gono' dii mala', san ben daa nak wen. Beena' chon daa nak wen nake' Chioza' txen, san beena' chon dii mala' bin' gombi'e Chiozan'.

¹² Yog'zə ben' choe' xtill' Demétriona' daa chone' wen, na' nakbia'cha chzenague' dill' li che Chioza'. Na' lezkka' neto' choe'nto' dill' ka wen chone', na' nezczilo' dill' lin choe'nto'.

¹³ Na' dii zan dii cheenid' inia' li', per bi cheenid' gona'n yishzə, ¹⁴ la' chbez' yob gat' latj yidkz' gana' zo' kwenche ile'i ljwellcho na' we'cho dill'.

¹⁵ Chioza' gone' ka soashgo' mbalaz. Ben'ki nllaguicho chwapgake' li' chiox. Bwapgach chiox to to ben'ka' nllaguicho gana' zo'.

Kart daa bzej Júdaza'

¹ Nad' Judas, nak' wen llin che Jesucristona' na' lekzka' nak' ben' bish' Jacóbona'. Chzej' le', ka le' chaki Xacho Chioza', le' ba gox wñabe', na' chap chwia Jesucristona' le'. ² Chioza' yiyesh'lall'shgaile' le', na' gonshgue' ka soachle mbalaz na' gone' ka gakbe'chile' ka chakile' le'.

³ Le' ben' bish'dawaa na' le' ben' zandawaa, le ba goklall'chga' wzej' le' na' we'len' le' dill' ka nak daa ba ben Chioza' bisle' cho'. Per chonchan byen wzej' le' kwenche gonle ka dii le shajle'le kwasloł dill' li che Chioza' daa bkwaanlene' cho' che toshiizi, ka cho' nakcho lall' nee. ⁴ La' ladjlena' do ngash'zə ba chda bal' ben', na' legaken', kani'teyi ba nchogbia' chegake' kwiayi'gake' daa nakgake' ben' mal. Na' nagake' daa chiyesh'lalli Chioza' cho' wak goncho kon daa nan checho. Na' chzoagake' ka'lə Xancho Jesucristona', beena' zeelo chñabia' cho'.

⁵ La'kzi le' ba nezilen, cheenid' yisaa lall'le ka biyoll bibej Xancho Chioza' ben' Israelka' Egíptona', blliyee ben'ka' bi wyajle' che'. ⁶ Na' lekzka' bene' che anjlka', ben'ka' wlej yichjgake' yel' wñabia' che'ka' daa bene' lall' nagake', na' bchejgake' latj gana' lle'gake'. Chioza' ntakw ncheje' legake' zejli kani' gana' shgasj shchol, na' nan' nkweze' legake' axt kat' illin lla choo lla xenna' wchogloe' che yog'loł ben'. ⁷ Lekzka' ben'ka' wlle' yell Sodómana' na' yell Gomórrana', na' yellka' nllaggakan, bengake' daa wnaz beli chen che'ka', na' wñelen ljwellgake', na' axt ben' byoka' biyat'len ljwellgake' na' bengake' dii zban ka daa bi chiyal' gonlencho beli chen chechona'. Na' Chioza' bselee yi'na' bzey bten legake'. Na' daa bene' chegake' ka', chsi'nile' yog'loł ben' nan de yel' zak'zi' zejli kani' che ben'ka' bi chon wen.

⁸ Na' kan' chon ben' wxiye'ka' chda ladjlena', nazgake' chle'do'gakile', na' choe'gake' cho'a xbayi beli chen che'ka', na' bi cheengakile' no inabia' legake' na' bi nallgakile' chnegake' che anjlka'. ⁹ Kana' anjla' le Miguel, beena' nak ben' choo ben' xen ladj anjlka', gokdil-lenile' dii xiwaa kwerp che dii Moiséza', bi biyaxjile' chishje' bia' blag' che dii xiwaa, san golle'n: "Chioza', beena' nak Xan', wsheshlene' li." ¹⁰ San ben' wxiye'ka', chnegake' che dii bi chajni'gakile'. Na' chontezgake' diika' na' beli chen che'ka', ka chon bayix' ba bi nteyi. Na' diika' chongake', leyeñ'gakannan' chlliyai'n legake'.

¹¹ Nyesh'laz gak che ben'ki', daa chongake' ka ben dii Caínna', na' daa chongake' dii mala' ni che yel' wzelall' che'ka', ka ben dii Balaama'. Na' daa nakgake' widenag ka dii Coréna', kwiayi'gake'. ¹² Ben'ki' nakgake' ka dii bi nxe bi nzak' lengake' ladjlena' kat' chonle lnina' chole'la'o ljwell-le, na' lengake' le' cheej chaogake' ni bi chiyi' chido'gakile'. Na' nakgake' ka to ben' chap bayix' na' bi zie' wñeyi chegakb, san legake' chap chwia kwingake'. Na' nakgake' ka bejka' ze xan yabana' diika' bibi nis yollə na' choa' be'na' legakan. Na' nakgake' ka yag zix' dii bi chbia kat' chllin lla kwian. Latjin dii nan kwian, chilleelan chlall'te do loyin na' chbillan. Na' ben'ka' chon ka' axt chop shiilə ba mbiayi'gake'. ¹³ Na' nakgake' ka bli che nisdo'na' daa chas chat', na' yel' zto'ka' chongake' nakgakan ka bllin' besja' daa chchoon bli che nisdo'na'. Na' lekzka' nakgake' ka beljka' diika' chlaa xñezinka'. Na' daa chongake' ka' ba nchoglo chegake' soaga

ke' gana' zeelo nak shgasj shchol zejli kani.

¹⁴ Beena' wle Enoc, goke' ben' de galli lo dia che Adánna'. Wdixji'e daa goll Chioza' che ben'ki' chon dii mala', wne': "Li wwiakachi, za' Xanchona' nchi'e ben' zan wal inlleb anjl che'ka' ¹⁵ kwenche wchogloe' che yog'loł ben', na' wsak'zi'e ben' malka' ni che yog' dii malka' bengake' yel' ben' mal che'ka', na' ni che yog'loł daa wchell wnegake' che'." ¹⁶ Ben'ki' bibikzə chazlall'gake', na' lillinzi chwia chyigake' che ben', na' toshiizi choe'gake' cho'a xbayi beli chen che'ka'. Na' chshalj chshon che kwingake', na' chole'la'o choe' dill'gake' ben' kwenchezə gongake' ben' gan.

¹⁷ Na' le' beṅ' bish'dawaa na' le' beṅ' zandawaa, li lljadini dill'ka' be' postlka', beṅ'ka' ben Xancho Jesucristona' lall' na'gake' we'gake' cho'a xtilleena'. ¹⁸ Wnagake' le', "Kat' ba zoa te che yell-lioni, yid beṅ' wtitgakile' che cho'a xtill' Chioza' daa chajle'cho, na' gongake' kon daa nazan chegake'." ¹⁹ Legaken' chongake' choplā beṅ'ka' nonlilall' Chioza', na' chongake' daa na beli chen che'ka' na' bi yoo Espíritu che Chioza' loo yichjlall'do'eka'.

²⁰ Na' le' beṅ' bish'dawaa na' le' beṅ' zandawaa, li soachech gonlilall'chle Chioza', na' li inabi Espíritu Sántona' gaklene' le' we'llwill-le Chioza'. ²¹ Li gon ka cheeni Chioza', beena' le chaki le', na' li gon lez llana' gon Xancho Jesucristona' cho' yel' mban zejli kaṅina' daa chiyesh'lallile' cho'.

²² Li yiyesh'lallii beṅ'ka' chakchopi. ²³ Na' zi bale', li yislagake' lawi dii mala' kwenche bi lljayaake' lo yi' gabilā'. Na' li yiyeshlallii zi bal beṅ' chon dii malka', per li gakzbani saaxya che'ka' na' li wsak' ki gonle ka chongake'.

²⁴ Shajla'oshga Chioza', beena' nap yel' wak gap wwie' le' kwenche bi ibixle lao dii mala', na' gone' ka lljazele lawe'na' gana' yoo balaan xen che'na' na' yiba yizakile daa bibi xtol'le de. ²⁵ La' zeelo len' nake' Chios, na' bisle' cho' daa bselee Xancho Jesucristona', na' chidolee koochone' balaan na' we'cho xtillee nake' beṅ' choo beṅ' xen, beṅ' liizelozi chṅabia', na' beṅ' yel' wak choo yel' wak xen, naa na' zejli kaṅi. Kan' nakan.

Jesucrístona' bliile' Juanna' che diika' zi' gak

¹ Dgan blii Chioza' Jesucrístona' kwenche bliile' ben'ka' nonlilall' le' daa ba zoa gaoshosh gak. Na' Jesucrístona' bselee anjl che'na' kwenche bidzajniile' nad' Juan, nak' wen llin che'. ² Na' cho'a dill' che yog'lol daa ble'id', na' nezid' nakan dowalj daa wna Chioza' na' daa bli'yi Jesucrístona' nad'.

³ Chakomba beena' chlab dill'ki, diiki na Chioza' zi' gak, na' chakomba ben'ka' chzenaggake' na' zegake' wneyi cheyin, la' ba zoa gaoshosh gaggakan.

Juanna' chwape' chiox ben'ka' nonlilall' Crístona' gana' mbani Ásiana'

⁴ Nad' Juan chwap' le' chiox, ka le' chdop chllagle choe'la'ole Jesucrístona', le' lle'le yel-lka' gall gana' mbani Ásiana'. Chioza', beena' zoa ka wxw wzil yell-lioni, na' zoakze' naa, na' ni zoakze' kat' te cheyin, na' espírituka' gall lle' gana' zoe' chnabi'e, gaklenshgagake' le' na' wzoagake' le' mbalaz. ⁵ Na' lekzka' Jesucrístona' gaklenshgue' le' na' wzoe' le' mbalaz. Len' beena' choe' dill' li che Chioza', na' len' ben' necha' biban ladj ben' wetka' na' bich bi yel' wit ile'ile', na' nape' yel' wnabia' lao yog'lol ben' wnabia'ka' lle' yell-lioni. Len' chakile' cho' na' ba bisle' cho' lao saaxya chechoka' daa blalj xchene'na', ⁶ na' ba bene' cho' yel' wnabia'na', na' ba none' cho' bxoz che Xe' Chioza'. Len' chidolee sho'e balaan na' inabi'e zejli kani. Kan' nakan.

⁷ Crístona' yiyede' ladj bejka' ze xan yabana', na' yog'lol ben' ile'gakile'ne', lente ben'ka' betgake'ne'. Na' yog'lol ben' lle' yell-lioni kwellyesh'gake' ka ile'gakile'ne'. Kan' nakan.

⁸ “Nadaan zaklebid' letr necha' le A* daa ba zoakz' ka wxw wzil yell-lioni, na' daa zoakz' kat' te cheyin zaklebid' letra' chiyollin daa le Z”,† kan' na Xancho Chioza', beena' zoa ka wxw wzil yell-lioni, na' zoakze' naa, na' ni zoakze' kat' te cheyin, beena' nak ben' yel' wak choo yel' wak xen.

Juanna' ble'do'ile' Jesucrístona'

⁹ Nad' Juan, nak' le' txen, na' chnabia' Chioza' cho' daa nakcho Crístona' txen na' la'kzi dii zan dii chen chle'icho daa chonlilall'chone', lekzen' chaklene' cho' chizo chizakicho diika' chen chle'icho. Na' daa chyixji'a xtill' Chioza' na' xtill' Jesucrístona' bengake' nad' pres na' bsel'gake' nad' yell-liodo'ni le Patmos, dga lliia lo niso'ni. ¹⁰ Na' gok to lla, llana' nak lla che Xanchona', Espiritu che Chioza' bene' ka benid' wne to ben' zillj inleeb koll'la', ka ga chbell to trompet. ¹¹ Na' wne' nad':

—Bzej dga chle'ilo' to lee yish, na' bselaan lao ben'ka' chdop chllag choe'la'ogake' Jesucrístona' yellka' gall gana' mbani Ásiana': Éfesona', Esmírnana', Pérgamona', Tiatírana', Sárdiza', Filadélfiana', na' Laodiceana'.

¹² Na' biyechj' kwenche ile'id' non chne nad', na' ka biyechj' ble'id' gall candeler de or chal'gakan. ¹³ Na' ladj candelerka' gall ble'id' to ben' nake' ka cho' benech, na' nakwe' to xe' dii ton dii ze koll' ni'ena'te, na' ngoo li'ena' to bad' de or blinten ka de cho'alcho'ena'. ¹⁴ Yish' yichje'na' nakan xtil ka xa xil' wa ka beyaa, na' jalawe'na' chzeeni'n ka bel'yi'. ¹⁵ Na' ni'ena' chep yesan ka daa ne' bronce dii ba benschawee lo yi'na'. Na' shi'ena' nenan sshag wal ka nen to yao xen daa chxop cho'a bnanja'. ¹⁶ Nee de shlina' noxee gall belj, na' cho'ena' chchejan to spad dii nlatit chop laa. Na' cho'alawe'na' chna'titan ka chna'tit wbilla'.

¹⁷ Ka ble'idee, na' bgoonaa ka ben' wet xni'ena'. Na' bikwise' nad' kon nee de shlina', na' wne' nad':

—Bi illebo'. Nadaan zoa' kana' wxw wzil yell-lioni na' nad'kzan ni zoa' kat' te cheyin.

¹⁸ Na' nad'kzan ben' yaa ben' banna'. Betgake' nad', per biban' na' mban' zejli kani. Na'

* 1:8 Letr necha' le A: de dill' griegona' letri len alfa. † 1:8

nap' yel' wak yisla' beñ' lo yel' wita'. ¹⁹ Bzej dga ba ble'ilo', dga chak naa, na' daa zi' gak. ²⁰ Kin zeji che beljka' gall daa noxaa lo na' de shłini na' che candlerka' gall diika' nak de or: beljka' gall zaklebin gall beñ'ka'† chap chwiagake' beñ'ka' chdop chllag choe'la'ogake' nad' yellka' gall. Na' candlerka' gall zaklebin beñ'ka' gall kwen.

2

Daa golle' beñ'ka' lle' yell Éfesona'

¹ 'Bzej dga inia' li' na' bsełaan lao beena' chap chwia beñ'ka' chdop chllag choe'la'ogake' nad' yell Éfesona': "Ki na beena' nox' beljka' gall lo nee de shłina', na' zie' ladj candlerka' gall, diika' nak de or: ² Nad' nez nle'id' yog' dii wenna' chonle, ka chonchgale xshin'na' na' ka zoachechle. Na' nezid' bi chleble beñ'ka' bi nsa' cheyin wen, na' ba biyiljni'ale ka chon beñ'ka' nazə nakgake' postl cha' na' ba gokbe'ile beñ' wxiye'zgakan. ³ Dii xen ba benxenlall'le lao diika' ba ben ble'ile ni cha', na' bichga bshe'lall'le. ⁴ Per de to dii bi chazlallid' chele: bich napele yel' chakina' ka daa wdaple dii nechte. ⁵ Li yiyakbe'i bich chonle dii wenna' benle kana'. Na' li yiyaj yileni na' li yiyon sto shii ka benle dii nechte kana' wzolole benlilall'le nad'. Shi bi yiyaj yilenile, na' yid' yikaa candeler chelena' gana' zoale. ⁶ De to dii ni chazlallid' chele: daa chakzbanile daa chon nicolaítaka', diika' lekzka' chakzbanid'. ⁷ Beena' cheni, chiyał' wzenagyenee daa che' Espíritu che Chioza' beñ'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad', wi'a latj gawe' daa llia lo yaga' daa nsa' yel' mbanna', daa zoa latj che Chioza' gana' nak mbalaz inleeb."

Daa golle' beñ'ka' lle' yell Esmírnana'

⁸ 'Na' lekzka' bzej dga inia' li' na' bsełaan lao beena' chap chwia beñ'ka' chdop chllag choe'la'ogake' nad' yell Esmírnana': "Ki na beena' zoa ka wxe wzil yell-lioni, na' ni zoakze' kat' te cheyin, beena' wit na' bibane': ⁹ Nad' nezid' yel' zak'zi'ka' chen chle'ile na' yel' yeshaa daa chak chele. Per de to dii zak'chi chele aga ka yel' wni'ana'. Na' nezid' dii mala' daa chbell chne beñ' chele, beñ'ka' nazgake' nakgake' beñ' Israel, la'kzi dii licha lao Chioza' aga nakgake' beñ' Israel, san nakgake' xonj beñ' chzenag che dii xiwaa. ¹⁰ Bi gall illeble yel' zak'zi'ka' yen ile'ile. Dii xiwaa gonan ka koogake' bal-le lillyana' kwenche gonan ka bich gonlilall'le nad', na' tele lo yel' zak'zi'na' shi lla. Li soachech gonlilall'le nad' axt ni ka guetle, na' nad' gon' yel' mban chele zejli kani. ¹¹ Beena' cheni, chiyał' wzenagyenee daa che' Espíritu che Chioza' beñ'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad' bi ile'ile' yel' wit wchopina'."

Daa golle' beñ'ka' lle' yell Pérgamona'

¹² 'Na' lekzka' bzej dga inia' li' na' bsełaan lao beena' chap chwia beñ'ka' chdop chllag choe'la'ogake' nad' yell Pérgamona': "Ki na beena' nox' spada' daa nlatit chop laate: ¹³ Nad' nezid' zoale gana' chnabia' Satanáza', per ni zoachechle nonlilall'le nad'. Na' bi wlej yichjle daa nonlilall'le nad', ni kana' betgake' Antípaza', beena' bi bsan wi'e cho'a xtillaana', beena' betgake' lall-lena' gana' zoa Satanáza'. ¹⁴ Per de to chop dii bi chazlallid' chele: ni lenzə ladjlena' bal beñ' bi cheengakile' yilaala'ogake' daa bli' bsemi dii Balaama' dii Balaca' kwenche wlooyelee beñ' Israelka' bxinj blengake', na' wdaogake' yel' waoka' daa bliagake' lao lwaa lsak' diika' be'la'o beñ'ka', na' wnelen ljwellgake'. ¹⁵ Lekzka' ladjlena' ni len bal beñ' bi cheengakile' yilaala'ogake' daa chli' chsemi nicolaítaka'. ¹⁶ Na' daan, chiyał' yiyaj yilenile cheyi diika' chak ladjlena'. Na' shi bi yiyaj yilenile, lli za'tia' yidtil-len' le' kon spada' daa chchej cho'ani. ¹⁷ Beena' cheni, chiyał' wzenagyenee daa che' Espíritu che Chioza' beñ'ka' gall kwente chdop chllag choe'la'ogake' nad'. Na' beena' so saki

† 1:20 Beñ'ka': Dill' griegona' nan angeloi. Zoa kat' dillii zejin anjl, na' zoa kat' zejin to beñ' nsel' beñ' lljwee rson wa lljtixji'e to dii lljtixji'e.

soacheche' gonlilallee nad', na' wwawee daa le maná daa ngash'. Na' lekzka' wi'a to yaj llyish che' gana' da' to le kobe' daa kochno nombia', san toz beena' ikaan gombi'en."

Daa golle' ben'ka' lle' yell Tiatira

¹⁸ Na' lekzka' bzej dga inia' li' na' bsełaan lao beena' chap chwia ben'ka' chdop chllag choe'la'ogake' nad' yell Tiatirana': "Ki na Xiin Chioza', beena' chzeeni' jalawe'na' ka bel yi', na' ni'ena' nakan ka de bronce dii chnachga: ¹⁹ Nad' nez nle'id' yog' dii wenna' chonle. Nezd' naple yel' chaki na' nonlilall'le nad', na' chaklenle ben', na' chzo chzakile bittezə dii chen chle'ile. Na' nezd' ba chonchle dii wenna' naa aga ka benle kana' zi' benlilall'le nad'. ²⁰ Per de to dii bi chazlallid' chele: choe'zle latj zoa noola' le Jezabel ladjlena', beena' chonz ka ben' chyixjee daa che' Chioza' le'. Na' daa chli' chsedile' chziye'lene'n ben'ka' chonlilall' nad', na' chone' ka chnelengake' ben' na' chaogake' yel' wawa' daa chllia ben' lao lwaa lsak' diika' choe'la'ogake'. ²¹ Nad' ba bi'a latj che' kwenche yiyaj yilenile' daa chnelene' ben', per bi cheenile' kwej yichje'n. ²² Na' ni cheyin wsak'zi'ane', na' lekzka' wsak'zi'chga' ben'ka' chongake'ne' txen chxinj chlēngake' shi bi yiyaj yilengakile' cheyi daa chonlengake'ne'. ²³ Na' wit' ben'ka' nak ka xiine' daa chongake'ne' txen. Na' yog' ben'ka' chdop chllag choe'la'ogake' nad' to to yell inezgakile' nan nadaan nombi'a do ka nak yichjlall'do' ben', na' gonid' to tole kon ka nak daa chonle. ²⁴ Na' ka le' lle'le Tiatirana' na' bi chonle txen diika' chli' chsedi noola' ni diika' nagake' chzajni Satanáza' legake' daa kochno nezi, bich bi dii yoblə inia' le' chiyał' gonle. ²⁵ Kon li se wneyi gontezi gonle daa nak wen axt kat'ch yiyed'. ²⁶ Na' beena' so saki soacheche' gonlilallee nad' na' soe' gone' ka chazlallaa axt ni ka yiyed', na' wi'ane' yel' wñabia' kwenche inabi'e lao yog' yellka' lle' yell-lioni, ²⁷ ka ben Xa'na', bene' nad' yel' wñabia'na'. Na' inabi'e legake', na' bi si'xene' che nottez ben' bi chzenag che', na' wliayee legake' ka ben' chxoxj chtin to yes' yo. ²⁸ Na' lekzka' wi'ane' belj xsila'. ²⁹ Beena' cheni, chiyał' wzenagyenee daa che' Espiritu che Chioza' ben'ka' gall kwente chdop chllag choe'la'o nad'."

3

Daa golle' ben'ka' lle' yell Sárdiza'

¹ Bzej dga inia' li' na' bsełaan lao beena' chap chwia ben'ka' chdop chllag choe'la'ogake' nad' yell Sárdiza': "Ki na beena' ngoo lall' nee gall espírituka' nak che Chioza' na' noxee beljka' gall: Nad' nez nle'id' yog' daa chonle. Na' la'kzi zeyi chele le wen chonle, lawa'ni bibi zakii daa chonle. ² Li yiyakbe'i, na' li yiyon ka dii le kwenche bi yiyoll yido kwej yichjle dii wenna' ni chonle. La' nez nle'id' daa chonle bi nakan kwasloł ka cheeni Chios cha'na'. ³ Li lljadini diika' ba bli' bsdgakile' le' na' li wzenag cheyin, na' li yiyaj yileni. Shi bi chonle ka dii le, tokonganzə yidsak'zi'a le', ka chon to wban aga no chsi'nile' kat' chjlane'. ⁴ Na' la'kzi chonle ka', ni len bal' ben' ladjlena' yell Sárdiza' ben' bi nda' nchen yichjlall'do'ena' dii mala'. Na' chidoł'gake' soalengake' nad' na' gakwgake' to lech' xtil. ⁵ Beena' so saki soacheche' gonlilallee nad', na' wi'ane' to lech' xtil gakwe'. Na' biga yisol' lie'na' lee libr cha'na' gana' nda' le yog' ben'ka' napgake' yel' mban zejli kañi. Na' we'len' Xa'na' dill' len anjl che'ka', yepgakee nake' nad' txen. ⁶ Beena' cheni, chiyał' wzenagyenee daa che' Espiritu che Chioza' ben'ka' gall kwente chdop chllag choe'la'ogake' nad'."

Daa golle' ben'ka' lle' yell Filadélfiana'

⁷ Bzej dga inia' li' na' bsełaan lao beena' chap chwia ben'ka' chdop chllag choe'la'ogake' nad' yell Filadélfiana': "Ki na beena' nak dowalj ben' li' ben' shao', beena' nap yel' wñabia' ka daa wdap dii Davina'. Daa chsalje', kono gak yisejan, na' daa chseje', kono gak yisaljan. ⁸ Nad' nez nle'id' yog' dii wenna' chonle. Na' ba bsalj' ka to puert chele na' kono gak wsej wllon sho'le. Na' la'kzi xonjchgale nak, chonle ka na cho'a xtilaana' na' toshiizi chcheble nakle nad' txen. ⁹ Ka nak ben'ka' chzenag che Satanáza' na' chziye'gake' nazgake' nakgake' ben' Israel, nad' gon' ka yidchek' xibe'ka' laolena' na'

gakbe'gakile' nad' chakid' le'. ¹⁰ Daa ba benle banez wzoachechle benlilall'le nad', na' gapshii gapshawaa le' kat' illin lla yen ile'i yog'lol ben' yell-lioni yel' zak'zi'ka' kwenche wli'lawin non chzenag cha'. ¹¹ Ba zoa gaoshosh yiyed'. Li se wneyi gontezi gonle daa nak wen kwenche bi wnitle daa ba non' lkwez chele. ¹² Beena' so saki soacheche' gonlilallee nad', ka zoa pilarka' nox'gakan lill Chios cha'na', ka' soe' gana' zoa Chioza' na' yigaanlene'ne' zejli kani. Na' wda' le Chios cha'na' le', na' le yell che Chios cha'na', yell Jerusalenna' daa nak dii kob daa za' yaba che Chios cha'na', na' lekzka' wda' lia'na' le' daa nak dii kob. ¹³ Beena' cheni, chiyal' wzenagyenee daa che' Espiritu che Chioza' ben'ka' gall kwente chdop chllag choe'la'ogake' nad'."

Daa golle' ben'ka' lle' yell Laodicéana'

¹⁴ 'Bzej dga inia' li' na' bseñaan lao beena' chap chwia ben'ka' chdop chllag choe'la'ogake' nad' yell Laodicéana': "Ki na beena' na' gakshga yog' daa na Chioza', beena' toshiizi choe' dill' kon ka nak dill' li che Chioza', beena' chñabia' lao yog'lolte daa bxe bsil Chioza': ¹⁵ Nad' nez nle'id' yog' daa chonle, nezid' bi chonle ka chazlallaa na' ni bi chbej yichjle nad'. Wenchlan shel'ka' gonle tozan. ¹⁶ Na' daa ni ton bi chchoglall'le gonle, kweyjichjchokl' le'. ¹⁷ Le' nazle nakle ben' wni'a, na' nale le wen chak chele na' bich bi de dii chyalljile. Na' bi chakbe'ile lao Chioza' nakle ka ben' bi chak wen cheyin, ka ben' yesh', ka ben' lchol, ka ben' chda gal'yid gal'bel'. ¹⁸ Na' daan, nia' le' chiyal' si'le lawa'na' or daa ba gokshao' lo yi'na', kwenche gakle dowalj ben' wni'a; na' si'le lawa'na' lech' xtila' gakwle kwenche bich si'le zto' tale gal'yid gal'bel'le; na' si'le' rmecha' kaale jalaoleka' kwenche ile'ile. ¹⁹ Nad' chsheshlen' yog' ben'ka' chakid', na' chsak'zi'a legake' kat' bi chongake' wen. Na' daan, li gon ka dii le, na' li yiyaj yileni. ²⁰ Nad' chñia' le' ka to ben' ze to cho'a yoo. Shi zoa ben' guenile' chñia' na' wsalje', na' sho'a na' gaolenee txen. ²¹ Beena' so saki soacheche' gonlilallee nad', na' wi'a latj inabia'lene' nad', ka ben' nad', wzoachech' wzo wzakid' daa btil' na' ba chñabia'len' Xa'na'. ²² Beena' cheni, chiyal' wzenagyenee daa che' Espiritu che Chioza' ben'ka' gall kwente chdop chllag choe'la'ogake' nad'."

4

Choe'la'ogake' Chioza' yabana'

¹ Ka biyoll bzej diika' wne' nad', na' ble'do'id' nyalj to puert xan yabana'. Na' bizenid' bishbena' daa benid' dii nech daa nen ka ga chbell to trompet, na' wne' nad':

—Nilə wyep, na' wliid' li' diika' zi' za' gak.

² Na' ka wñie' nad', Espiritu che Chioza' bene' ka ble'id' yabana' gana' llia to ben' chñabi'e. ³ Na' beena' llia na', chey cheeni'chgue' ka yaj wan daa le jaspe na' daa le cornalina. Na' tcho'a tlawi gana' llie' ze to betyaa na' chña'titan ka yaj wan daa le esmeralda. ⁴ Na' gana' llie', ble'id' nechj zi tapichoa ben' lliagake' chñabia'gake', na' zoagake' do xtil na' nzoa twej corona de or yichje'ka'. ⁵ Na' gana' llia ben' necha' chep yes, na' chashj chtin, na' chak sshag inleeb. Na' lawe'na' ze gall yi' chal'ninan na' legakannan' espírituka' gall che Chioza'. ⁶ Lekzka' lao beena' llia chñabia' de to dii nak katekzə nisdona' na' nakan ka de vidr.

Na' gchol' gana' chi'e chñabi'e lle' tap ben' de yel' mban cheyin, na' dii zan jalaogake' llia, ka laoləgake' na' ka koll'əgake'. ⁷ Ben' necha' nake' ka bell, na' ben' wchopina' nake' ka goon, na' ben' wyonina' nak cho'alawe'na' ka che benech, na' ben' wdapina' nake' ka bsia, ba chzo. ⁸ To to ben'ki zoa xop wej xilgake', na' zoa dii zan jalaogake' ka loolə na' ka koll'ə xile'ka'. Na' bi chsangake' ka wal' ka tella nagake':

Dowalj ben' li ben' shao', dowalj ben' li ben' shao', dowalj ben' li ben' shao', nak Xancho Chioza',

beena' nap yel' wak choo yel' wak xen,
beena' zoa ka wxw wzil yell-liona',
na' lekzen' zoe' naa, na' zoakze' zejli kani.

⁹ Na' ben'ka' tap chgoogake' balaan beena' llia chnabia', beena' mban zejli kani. Na' choe'gake' xtillee nake' ben' zakii nleeb na' choe'gake'ne' yel' choxken. Na' to to ka chongake' ka', ¹⁰ ben'ka' tapichoa chchek' xibe'ka' lao beena' mban zejli kani na' choe'la'ogake'ne'. Na' chzal'gake' corona che'ka' lawe'na', nagake':

¹¹ Chios, li' nako' Xannto', na' chido_{loo} koonto' li' balaan na' we'nto' xtilloo nako' ben' zakii nleeb,
na' ben' yel' wak choo yel' wak xen.
Lin' bxe bsilo' yog'lo_{lte} dii de,
na' daa goklalloo soagakan, bxe bsilgako'n.

5

Yisha' daa ndos' gall sey

¹ Na' beena' llia chnabia' noxee lo nee de shlina' to yish dii ndobə, na' chop laaten' nyoj. Na' gana' biyoll bidoban ndosa'n gall sey. ² Na' ble'id' to anjl, ben' nap yel' wak xen, na' wnie' zillj inleeb, chnabe':

—¿Notg zakii wxoxje' seyka' na' wselle' yisha'?

³ Na' kono bllel yabana' ni lo yell-liona', ni xan yell-liona', ben' gak wzeshe'n na' wwie' bin da'n. ⁴ Na' le wchellchga' daa kono bllel ben' zakii wzeshe' yisha' na' wwie' bin da'n.

⁵ Na' ch to beena' len ben'ka' tapichoa wne' nad':

—Bich kwello', la' beena' nsi'gake' Bell che Judá daa mbejlawe' lo dia che dii Judána', beena' nak xiin dia che dii Davina', ba bene' gan dii mala' na' wak wxoxje' seyka' gall na' wzeshe' yisha'.

⁶ Na' ch ble'idee zie' gchol gana' llia beena' chnabia' na' gana' nechj ben'ka' tap na' ben'ka' tapichoa. Na' ble'idee ka to xil'do', ba betgake'. Na' llia gall lozb na' zi gall jalaob, diikan' nak espíritu'ka' gall daa nak che Chioza' daa nselee doxen yell-lioni. ⁷ Na' ch beena' ble'id' ka xil'do' wbiguee lao beena' llia chnabia' na' wdoyoe' yisha' daa ndobə daa noxee lo nee de shlina'. ⁸ Na' kon ka wdoyoe' yisha' daa ndobə, ben'ka' tap na' ben'ka' tapichoa bchek' xibe'ka' lao beena' ble'id' nak ka xil'do'. To togake' nox'gake' twejə arpa, na' lekzka' nox'gake' barser de or yoogakan yala' daa chzeygake', na' llen yala' zaklebin xtil' ben'ka' nak lall' na' Chioza', dill'ka' choe'lengake'ne' kat' choe'lwillgake'ne'. ⁹ Na' belgake' to dii kob dii chgoon le' balaan, na' ki nan:

Lin' chido_{loo} goxoo yishi ndobə na' wxoxjo' seyka', daa betgake' li',

na' daa blalj xcheno'na' biya'o bizi'o

ben' za' yog' dia, yog' yell na' yog' nación,

na' ben' chne wde wdeli dill',

kwenche nakgake' lo na' Chioza'.

¹⁰ Na' ba nono' lall' na'gake' inabia'gake' lo yell-liona'

na' gaggake' b_{xoz} che Chios chechona'.

¹¹ Na' ch ble'id' anjl zan, na' benid' shi'eka'. Nechjgake' gana' llia beena' chnabia' len ben'ka' tap na' ben'ka' tapichoa. Na' daa nakgake' ben' zan inleeb ni bi wbadid'gake'.

¹² Na' wnagake' zillj nleeb:

Beena' nak ka xil'do', beena' betgake',

chido_{lee} we'nto' xtillee nape' yel' wnabia' xen,

na' naki che' yog'lo_l yel' wni'a dii de,

nape' yel' sin' xen na' yel' wak choo yel' wak xen,

nake' ben' zakii nleeb,

na' chido_{lee} we'la'onto'ne' na' koonto'ne' balaan.

¹³ Na' benid' wne yog'lo_l dii de yel' mban cheyin na' yog'lo_l diika' bxe bsil Chioza' yabana' na' yell-lioni, na' xan yell-lioni, na' loo niso'na', nagakan:

Beena' llia chnabia' len beena' nak ka xil'do',

chidol'gake' we'la'ocho legake' na' koocho legake' balaan zejli kani,
na' we'cho xtill'gake' nakgake' ben' zakii nleeb, na' napgake' yel' wak choo yel' wak xen.

¹⁴ Na' ben'ka' tap nechj le', nagake':

—jKan' nakan!

Na' ben'ka' tapichoa bchek' xibe'ka' be'la'ogake' legake'.

6

Bxoxje' seyka'

¹ Na' ble'id' Beena' Zaklebi to Xil'do' bxoxje' sey necha' lawi diika' gall, na' benid' wne to ben'ka' tap lle' na', na' shi'ena' nenan ka ga chashj chtin. Na' wne' nad':

—Nilə da, na' bwia dga.

² Na' ble'id' to kabay llyish, na' beena' llia koll'ba' noxee to xis wixit'. Na' bzoagake' to corona yichje'na', na' bcheje' lega ben' ben gan lo wdil na' zeje' sto shii lljene' gan.

³ Na' ka bxoxj Beena' Zaklebi to Xil'do' sey de wchopina', benid' wna ben' wchopina', beena' len ladj ben'ka' tap:

—Nilə da, na' bwia dga.

⁴ Na' ble'id' bchej sto kabay, ba xna. Na' beena' llia koll'ba' gok loo nee gone' ka bich soalen ljwell ben' yell-lioni mbalaz na' wit ljwellgake'. Na' bi'ene' to spad xen.

⁵ Na' ka bxoxj Beena' Zaklebi to Xil'do' sey de wyonina', benid' wna ben' wyonina' len ladj ben'ka' tap:

—Nilə da, na' bwia dga.

Na' bwia' na' ble'id' to kabay gasj. Na' beena' llia koll'ba' noxee to xig'libr. ⁶ Na' benid' wne to ben' ladj ben'ka' tap, chi'e:

—Gono' ka sak' chop ya trigona' che shlla llin, na' xop ya cebadana' che shlla llin, na' bi wwal' wsilo' seta' ni vinona'.

⁷ Na' ka bxoxj Beena' Zaklebi to Xil'do' sey de wdapina', benid' wna ben' wdapina':

—Nilə da, na' bwia dga.

⁸ Na' bwia', na' ble'id' to kabay, ba te, na' beena' llia koll'ba' lie' Yel' Wit. Na' daa le Hades* zjanon le'. Na' gok lo nagake' witgake' to kwart ben'ka' lle' yell-lioni lo wdil, lo wbin, lo yillwe' na' lao ba zniaka'.

⁹ Na' ka bxoxj Beena' Zaklebi to Xil'do' sey de gayi'na', ble'id' to dii nak ka gana' chzeygake' diika' chjwa'gake' lao Chioza', na' xni'ayinna' lle' ben'ka' betgake' ni che cho'a xtill' Chioza', na' daa bi bsangake' we'gake' xtilleena'. ¹⁰ Na' wnegake' zillj inleeb, che'gake':

—Chios, li' nako' Xannto'. Nako' dowalj ben' li ben' shao' na' nako' ben' chon yog' dii chchebo', ¿bat gono' yel' joschis che ben'ka' lle' yell-liona' na' yizi'o wzon daa betgake' neto'?

¹¹ Na'ch bi'e twej xa xtilgake', na' golle' legake' kwezgake' zi' xtit ax̄t ki yizaa yibab ben'ka' nakgake' txen, ben'ka' zi' witgake' daa choe'gake' xtill' Chioza'.

¹² Na' ka bxoxj Beena' Zaklebi to Xil'do' sey de wxopina', ble'id' gok to bedxo' xen wal. Na' wbillā' biyakan dii gasj ka lech' gasj daa chakw ben' kat' chet to bish' ljwelle'. Na' doxen beo'do'na' biyakan dii xna ka chen, ¹³ na' bllib beljdo'ka' llia xan yabana', bxopgakan lo yell-liona' ka chxop yixwew yaa kat' chta be' wala' xyaguinna'. ¹⁴ Na' yabana' bidoblolan ka chidob to yish, na' yog'lol yaaka' na' yog'lol yell-liono'ka' llia lo nisdo'na' blla' xishna'inka'. ¹⁵ Na' ben'ka' chnabia' lo yell-lioni, na' no ben' zakii, na' no ben' wni'a, na' no xan soldadka', na' no ben' mbejlawin, no ben' ndoo lla yel chone' xshin ben' na' no ben' chon xshinkze', jakwash'gake' no loo blej, no ladj yajka' lle' lo yaaka'.

¹⁶ Na' che'gake' yaa yaaka' na' yajka':

* 6:8

—Li idakwtega neto', na' li wkwash' neto' lao beena' llia chñabi'e na' lao yel' zak'zi' daa chon Beena' Zaklebi to Xil'do', ¹⁷ la' ba bllin lla wsak'zi'gake' beñ', na' aga no so saki yel' zak'zi'na'.

7

Ben'ka' nak to guiyoa tapiyona mil

¹ Ka biyoll ble'id' diiki, bizle'id' tap anjl zechagake' tap laate yell-lioni, chzag'gake' be'na' za' tap laate kwenche bibi be' se lo yell-lioni ni lo nido'na' na' ni lo yagka'. ² Lekzka' ble'id' sto anjl zee gana' chla'lə wbillā', na' noxee sey che Chios yaa Chios banna'. Na' besyaa anjli zillj inleeb wñie' anjlka' tap, beñ'ka' gok lo na'gake' yel' waka' kwenche gak wlliyi'gake' diika' de lo yell-liona' na' loo nido'na', na' chi'e legake':

³ —Bibi gonile yell-lioni, nido'na', ni yagdo'ka' shlak bin' wda'cho seya' loxga beñ'ka' nonlilall' Chios chechona'.

⁴ Na' benid' ka'k' beñ'ka' wda' seya' loxgue'ka', na' nakgake' to guiyoa tapiyona mil beñ', beñ'ka' nak shllin kwen dia che dii Israela'. ⁵ Shllina mil beñ'ka' nak dia che dii Judána', shllina mil beñ'ka' nak dia che dii Rubénna', shllina mil beñ'ka' nak dia che dii Gada', ⁶ shllina mil beñ'ka' nak dia che dii Asera', shllina mil beñ'ka' nak dia che dii Neftalína', shllina mil beñ'ka' nak dia che dii Manaséza', ⁷ shllina mil beñ'ka' nak dia che dii Simeónna', shllina mil beñ'ka' nak dia che dii Levína', shllina mil beñ'ka' nak dia che dii Isacara', ⁸ shllina mil beñ'ka' nak dia che dii Zabulónna', shllina mil beñ'ka' nak dia che dii Joséna', na' zi shllina mil beñ'ka' nak dia che dii Benjamínna'.

Ben' be beñ' zil beñ'ka' zoa do xtil

⁹ Ka biyoll dga, na'ch bwia' na' ble'id' beñ' zan inleeb, beñ' za' doxen yell-lioni, na' lo wde wdeli dia, na' beñ' chñe wde wdeli dill', na' beñ' za' yog' yell. Zegake' lao beena' llia chñabia' na' lao Beena' Zaklebi to Xil'do', na' kono ibabi legake' daa nakgake' beñ' be beñ' zil inleeb. Na' nakwgake' twej xagake' dii xtil na' nox'gake' twej zin. ¹⁰ Na' yog'lolz'gake' chosyaagake' zillj inleeb, nagake':

Chios chechona', beena' llia gana' chñabi'e,
na' Beena' Zaklebi to Xil'do'
ba bislagake' cho'.

¹¹ Na' yog'lol' anjlka' nechjgake' beena' llia chñabia', na' beñ'ka' tapichoa len beñ'ka' tap, bchek' xibe'ka' lawe'na' axt lo yona' bllin loxgue'ka', na' be'la'ogake' Chioza', ¹² nagake':
¡Kan' nakan! Toshiizi we'la'ocho Chios chechoni, na' koochone' balaan,
na' we'cho dill' ka nak yel' sin' che'na', na' we'chone' yel' choxken,
na' we'cho dill' nake' beñ' zakii nleeb, beñ' chñabia' doxen, na' beñ' yel' wak choo yel' wak xen. ¡Kan' nakan!

¹³ Na' to beena' len beñ'ka' tapichoa wñabile' nad':

—¿Nora beñ'ki nakw lech' xtila'? ¿Gara za'gake', lla?

¹⁴ Na' goshee:

—Li'kz nezilo' daa, beñ'do'.

Na' le' wne' nad':

Beñ'kin ba bichej lo yel' zak'zi' xenna', na' ba biyib bixisi xe'ka' xchen Beena' Zaklebi to Xil'do', na' daan nakwgake' lech' xtila'. ¹⁵ Daan, zegake' lao Chioza' gana' zoe' chñabi'e na' ka wal' ka tella choe'la'ogake'ne'. Na' Chioza', beena' llia chñabi'a soalene' legake' na' gap wwie' legake'. ¹⁶ Bich ibil' idongake', ni bich wzey wbilldo'na' legake', ni bich gaggakile' zey', ¹⁷ la' Beena' Zaklebi to Xil'do', beena' zoa gana' chi' Chioza' chñabi'e, gap wwie' legake'. Na' wchi'e legake' gana' chal nisa' daa nsa' yel' mbanna'. Na' Chioza' wkwase' yog'lol' daa chkwellyshaan legake'.

8

Bxoxje' sey de gállina'

¹ Na' ka bxoxj Beena' Zaklebi to Xil'do' sey de gállina', goklli yabana' ka do gashj gor.

² Na'ch ble'id' gall anjlka' zegake' lao Chioza', na' bi'e legake' gall trompet. ³ Na'tech bla' sto anjl noxee to barser de or, na' jsie' kwit daa nak ka mes de or gana' chzeygake' yala' daa zoa lao beena' chnabia'. Na' bi'ene' yal zan kwenche wzeye'n lawinna', na' gakan toz xtill' beñ'ka' nak lall' na' Chioza' kat' choe'lwillgake'ne'. ⁴ Na' llen che yala' daa yoo loo barsera' nox' anjla' wyasan zejan lao Chioza' nakan txen xtill' beñ'ka' choe'lwillgake'ne'. ⁵ Na' anjla' bexee barsera', wlo'en yi' galja' daa chi' gana' chey yala', na' bzaleen lo yell-lioni. Na' goshj wtin, na' gok sshag, na' wyep yes, na' wxo' wñib yell-lioni.

Trompetka' gall

⁶ Na' anjlka' gall, beñ'ka' nox' trompetka', wze kwasgake' wkwel'gake'n.

⁷ Na' anjl necha' bkwelle' trompet che'na', na' bxop lo yell-lioni yaj yaba na'ch yi' na' nchixgakan chen. Na' schoo yell-lioni wyey, zi lat'zə ki gokan gashjə, * na' wyeylenan dii zan inleeb yag, na' doxen gana' de shga'.

⁸ Na' anjl wchopina' bkwel' trompet che'na', na' bxop loo nido'na' to dii nak ka to yaa xen dii chal'nin. Na' zi lat'zə ki gok gashjə nido'na' biyakan chen. ⁹ Na' zi lat'zə ki gok gashjə bado'ka' lle' loo nido'na' witgakb, na' lekzka' zi lat'zə ki gok gashjə barkwka' chda lo nido'na' wlliayi'.

¹⁰ Na' anjl wyonina' bkwel' trompet che'na' na' bxop to belj xen chal'ninan, na' bxopan gana' de yaoka' na' gana' chal niska'. ¹¹ Na' belj xenna' len Dii Zla'. Na' zi lat'zə ki gok gashjə nisa' gokan zla', na' beñ' zan wit ni che nis zla'na'.

¹² Na' anjl wdapina' bkwelle' trompet che'na', na' zi lat'zə ki gok gashjə wbillla' na' beo'do'na' na'ch beljdo'ka' wnit beeni' cheyinka'. Na' bich bzeeni'gakan zi lat'zə ki gok shgobill na' gashj yel.

¹³ Na'ch ni zej chwia' na' benid' to bsia chzob gchol xan yabana' na' wñeb zillj inleeb, nab:

—iNyesh'laz gak che beñ' yell-lioka' kat' wkwel' anjlka' tompetka' zi shon!

9

¹ Na' anjl, beñ' gayi'na', bkwelle' trompet che'na', na' ble'id' to belj dii bxop xan yabana' jet'an lo yell-liona'. Na' be'gake'ne' xiinya che yecha' daa bi chiyoll chido nak zitj. ² Na' bsalje' cho'a yecha' daa bi chiyoll chido nak zitj na' bchej lo'inna' llen ka che to gorn xen. Na' llenna' daa bchej lo'inna' bkwashaan wbillla' na' xan yabana'. ³ Na' loo llenna' bllesh ba zan inleeb bish'zo na' bliljgakb doxen lo yell-lioni. Na' bene' kwenche gak gad'gakb ka chad' bexjoni'ka'. ⁴ Na' bi bi'e latj bi gongakib yix ga'na' daa de yell-lioni, ni tlish' dii nak shi'a shga', ni tlish' yag, san toz beñ'ka' bi da' sey che Chioza' loxgue'ka' bzoazi'yaagakb. ⁵ Na' bi bi'e latj witgakb legake', san to wzoazi'yaazgakb legake' gay' beo'. Na' gana' god'gakb wlan ka chla gana' chad' bexjoni'na'. ⁶ Na' kat'ka' gak dga, beñ' yell-lioka' gaklall'gake' guetgake' per bi guetgake'; na' selall'gake' bich soagake' per yel' wita' wxonj wkwashiin legake'.

⁷ Na' bish'zoka' nakgakb ka kabay ba shaj lo wdil. Na' yichjbka' zoa twej dii nak ka corona de or, na' cho'alaobka' nakan ka cho'alao beñ'. ⁸ Na' yish' yichjbka' nakan ka yish' yichj noolə, na' leybka' nakan ka ley bell. ⁹ Na' daa nakwgakb nakan de ya na' chkweejan kwerp chebka'. Na' xilbka' chongakan sshag inleeb ka ga za' zan kabay ba ngoyo karret dii zej lo wdila'. ¹⁰ Na' lo xbambka' zoagakan ka lew bexjoni', na' wchingakban kwenche wzoazi'yaagakb beñ' yell-liona' gay' beo'. ¹¹ Na' anjla', beena' nak lall' nee yech zitja',

* 8:7 Zi lat'zə ki gokan gashjə: literalmente la tercera parte.

chḡabi'e bish'zoka', na' dill' hebrewa' lie' Abadón, na' dill' griegona' lie' Apolión, na' zejin Williayi' Williade.

¹² Na' biyoll yeḷ' zak'zi' necha', per ni chyallj zi ḡchopan.

¹³ Na'ch anjl, beḡ' wxopina', bkwel trompet ḡhe'na', na' benid' wḡe to beḡ' gana' zoa daa nak ka mes de or gana' ḡzeygake' yala' daa lia ka lozdo'in to to ḡchin daa zoa lao Chioza'. ¹⁴ Na' golle' anjl, beḡ' wxopina', beena' noḡ' trompeta':

—Bsell anjlka' tap, beḡ'ka' nchej cho'a yao xenna' le Éufrates.

¹⁵ Na' bselle' tapte anjlka', beḡ'ka' nzoe' kwenḡhe witgake' beḡ', na' zi lat'zə ki gok gashjə* beḡ' yell-liona' betgake'. Ḳa' ba nllie' bia' gongake' ka' ka lo gora', lo llana', lo bewaa, na' lo yiza'. ¹⁶ Na' benid' nak ḡchop guioa millón soldadka' lliagake' kabay.

¹⁷ Na' ki nak kabayka' ble'do'id' na' beḡ'ka' lia koll'bka': daa nkweej cho'alḡho'eka' nakan dii xḡa ka yi'na', na'ch de azul ka yaj wan daa le zafiro, na' dii gush ka bishte daa ne' azufre. Na' yichj kabayka' nakgakan ka yichj bell, na' loo cho'abka' ḡchchej yi' dii nḡchix azufre na'ch llen. ¹⁸ Zlat'zə ki gok gashjə† beḡ' yell-lioka' witgake' ni ḡhe shon yeḷ' zi'ki: yi'na', llenna', na'ch azúfrena' diika' bchej cho'a kabayka'. ¹⁹ Na' kabayka', bḡchingakb cho'abka' na' xbambka' kwenḡhe betgakb beḡ', la' xbambka' nakgakan ka beḷ, na' yichji daa zoa xbamka' daa nak ka beḷ bzoazi'yaagakan beḡ'.

²⁰ Na' beḡ'ka' bi biya gueti diiki, bi biyaj bilengakile' dii malka' chongake', ni bi wlej yichjgake' we'la'ogake' dii xiw'ka' na' diika' nongake' de or, de plat, de bronce, na' de yaj na' de yag, diika' bi chle'i ni bi chengakin, ni bi chak sa'gakan. ²¹ Ni bi biyaj bilengakile' daa chitgake' beḡ', daa nḡlangake' yeḷ' willa'na', ni daa ḡḡelen ljwellgake', ni daa ḡzhi' ḡhbangake'.

10

Anjla' noḡee to yish dii ba biyesh

¹ Na'ch ble'id' sto anjl, beḡ' nap yeḷ' wak xen, chetje' yabana' zindobe' to bej. Yichje'na' xoa to betyaa, na' cho'alawe'na' chep cheeni'n ka wbilla', na' ni'eka' nakgakan ka beḷ yi' dii ḡzolla'. ² Na' noḡee to yish dii ba biyesh, na' bzoe' ni'e de shḡina' lo nido'na' na' de robesaa' bzoe'n lo yell-liona'. ³ Na' besyaadie' zillj inleeb ka chosyaa to bell. Na' ka besyee, wḡe wziwaa gall shii. ⁴ Na' ka biyoll wḡe wziwaa gall shii, na'ch nan wzej' daa wnagakan. Per benid' wḡe to beḡ' yabana', na' wne' nad':

—Bi wzejo' daa wna wziwaa, san wlooshawaan loo yichjlall'do'na'.

⁵ Na' anjla', beena' ble'id' nzoa ni'ena' ḡḡaa lo nido'na' na' daa zi ḡḡaa lo yell-liona', blis nee de shḡina' yabalə ⁶ na' bzoe' de taschiw beena' zoa zejli kani, beena' bḡxe bsil yabana' na' yog'loḷ daa lia xaninna', na' yell-lioni na' yog'loḷ daa de lawinna', na' nido'na' na' yog'loḷ daa lle' lo'inna', na' wne':

—Aga chllach gak daa lia bia' gak. ⁷ San kat' wkwel anjl, beḡ' gállina', trompet ḡhe'na', na' yiyoll yido gak yog'loḷ daa bllia Chioza' bia' gak, kon ka golle' dii beḡ'ka' wdixjee daa wne' kani'yi.

⁸ Na' sto shii benid' shii beena' wḡe yabana', na' wne' nad':

—Wyaj kwit anjla', beena' nzoa ni'ena' lo nido'na' na' lo yell-liona', na' jaxi' yisha' daa noḡee.

⁹ Na' wya' kwit anjla' na' binabidee yisha'. Na' wne' nad':

—Ni den, wdawan. Na' idawilon' zix sia ka shin basera', per loo li'ona' yiyakan zichj zḡa'.

¹⁰ Na' bikaa yisha' lo na' anjla' na' wdawa'n. Na' bdawidaan zix sia ka shin basera', per ka bidon wdaw' na' biyakan zichj zḡa' loo li'ana'. ¹¹ Na' wne' nad':

* **9:15** Zi lat'zə ki gokan gashjə: literalmente la tercera parte. † **9:18** Zi lat'zə ki gokan gashjə: literalmente la tercera parte.

—Chonan byen wi'o dill' daa na Chioza' gak che beñ'ka' lle' yellka', na' naciónka', na' beñ' chne wde wdeli dill', na' beñ' wñabia'ka'.

11

Chop beñ' wi'e dill' daa che' Chioza' legake'

¹ Na' bene' nad' to ya dii gak wchixid', na' wne':

—Wyaj na' jachix ka'k' nak yoodo' che Chioza' na' ka'k' nak gana' chzeygake' yala', na' blab ka'k' beñ'ka' choe'la'o Chioza' na'. ² Na' bi wchixo' lesh' chyoodo'na', la' ba nakan lall' na' beñ'ka' bi nombia' Chioza', beñ'ka' wlej wshoshjgake' yell che Chioza' chopiyon beo'. ³ Na' wselaa chop beñ' wi'e cho'a xtilaana', na' gakwgake' lech' zeshaa, na' to mil chop guiyoa guiyon lla chixje'gake' daa yepgakee.

⁴ Beñ'ki chop zaklebgake' chop yag olívoka' na' chop candelerka' zoa lao Chioza', beena' nak Xan yell-lioni. ⁵ Na' shi no bi goni legake', loo cho'eka' ichej yi' na' wlliaiyi'n beñ'ka' chakzbani legake'. Na' ka' kwiayi' nottezə beñ' gaklallee bi gonile' legake'. ⁶ Beñ'ka' chop napgake' yel' wak kwenche bi gak yeja' shlak chixje'gake' daa ye' Chioza' legake'. Na' lekzka' napgake' yel' wak yiyongake' nisa' chen, na' gongake' yiya dii wsak'zi'n beñ' yell-lioki kon ka'k'to cheengakile'. ⁷ Na' kat' yiyoll chixje'gake' cho'a xtill' Chioza', daa nak ka bayix' zña daa ichej loo yecha' daa bi chiyoll chido nak zitj, goxaan legake' na' gonan gan witan legake'. ⁸ Na' kwerp che'ka' gat'gakan yawi nez che yell xenna' gana' bda'gake' Xancho Jesucristona' lee yag cruza', daa zaklebi Sodómana' na'ch Egíptona'. ⁹ Na' beñ' wde wdeli yell, na' wde wdeli dia, na' beñ' chne wde wdeli dill', na' beñ' wde wdeli nación wwiagake' kwerp che'ka' shon lla shgobill, na' bi we'gake' latj no wkwash' legake'. ¹⁰ Na' beñ'ka' zoa lo yell-lioni yiba yizakgakile' daa ba witgake'. Na' daa le yiba yizakgakile' we' ljiwellgake' dii chiza'lall'gake', la' beñ'ka' wdixjee daa goll Chioza' legake' chiya dii bengake' kwenche bsak'zi'gake' legake'. ¹¹ Na' ka gok shon lla shgobill, Chioza' bisbane' legake', na' biyagake' sto shii. Na' yog' beñ'ka' ble'gakile' legake' le bllebgake'. ¹² Na' beñ'ki chop bengakile' wne to beñ' yabana', chi'e legake':

—Li yiyep nilə.

Na' biyepgake' yabana' to lo bej, chwiate beñ'ka' gokzi' gokzbani legake'. ¹³ Na' ka chiyepgake' gok to bedxo' xen, na' bchinjan lat'* yella', na' wit galla mil beñ'. Na' beñ'ka' bi wit le bllebgake' na' be'la'ogake' Chioza', beena' llia yabana'.

¹⁴ Na' biyoll yel' zak'zi' de wchopina', per lii za'te de wyonina'.

Bkwelle' trompet de gállina'

¹⁵ Na' anjl, beñ' gállina', bkwelle' trompet che'na', na' benid' wne beñ' zan zillj inleeb yabana', wnagake':

Yel' wñabia'na' de yell-liona'
ba nakan che Xancho Chioza' len Crístona',
beena' wleje' kwenche inabi'e;
na' inabi'e zejli kani.

¹⁶ Na' beñ'ka' tapichoa, beñ'ka' llia lao Chioza', bchek' yichje'ka' axt lo yona', be'la'ogake'ne', ¹⁷ nagake':

Chonnto' li' yel' choxken, Chios,
beñ' liizelozi nap yel' wak choo yel' wak xen, beñ' nak Xannto'.
Li'kzan zo' naa, na' li'kzan zo' ka wxw wzil yell-liona', na' zejli kani zo'.
Na' ba wzolo chñabia'leno' yel' wak choo yel' wak xen cho'na'.

¹⁸ Beñ'ka' lle' yell-liona' ba blaa blokgake',
na' ba bllin lla wsak'zi'gako'ne'.
Na' naa gono' yel' joschis che beñ' wetka',

* 11:13 Lat': literalmente la décima parte.

na' wi'o daa chidol' ben'ka' wdixjee daa gollo' legake',
 na' ben'ka' nak lall' no', len ben'ka' chgoo li' balaan,
 ka ben' zakii ka ben' bi zakii;
 na' wliayoo ben'ka' chlliyai' ben' yell-liona'.

¹⁹ Na'ch byalj yoodo'na' zoa yabana', na' loo yoodo'na' nla' yiina' gana' lle' yaj taaka' gana' bzej Chioza' diika' bllie' bia' gon ben' Israelka'. Na' wyep yes, na' gok sshag, na' goshj wtin, na' gok to bedxo' wal, na' wche'chga yaj yabana'.

12

Noola' na' bayixaa nak ba xna

¹ Na' xan yabana' ble'id' to dii chonan ka yibanicho. Ble'id' to nool ndobə beeni' che wbillā' le', na' zoa beo'do'na' xni'ena', na' nzoa to corona yichje'na' na' lian shllin belj. ² Na' noa' noola' to bdo', na' chosyee daa chllagloe' chaz besa' sane'b'. ³ Na'ch bizle'id' xan yabana' sto dii chon ka yibanicho. Ble'id' to bayix' xen inleeb, ba xna, na' lliā' gall yichjb na' zi shi lozb, na' twej corona zoa to to yichjba'. ⁴ Na' bta xbama' bshibb zan beljdo'ka' lliā' xan yabana', zi lat'zə ki gokan gashj, * na' bzal'b legakan lo yell-lioni. Na' wze bayixaa lao noola' beena' san, kwenche guebb xiine'na' kate galjb'. ⁵ Na' noola' wxane' to bi' byodo', bi'na' inabia' doxen zbii zkaan yell-lioni na' gom' byen wzenaggake' cheb'. Na' Chioza' lii bigoyotie'b' ziyajb' gana' chi'e chnabi'e. ⁶ Na' bxonj noola' zeje' gana' bibi chashj chleb, gana' ba nonshao' Chioza' to latj che', na' we'gake' dii gawe' to mil chop guiyoa guiyon lla.

⁷ Na'tech gok to wdil yabana'. Anjl, beena' le Miguel, na' anjlka' ngoo lall' nee wdil-lengake' bayix' xnana'. Na' bayix' xnana', daa nak dii xiwaa, len anjl cheyinka' wdil-lengakan legake', ⁸ per bi wzogakin gongakan gan. Na' bich bi latj chegakin got' yabana'. ⁹ Na' wlejgake' bayix' xnana', daa nak bel kani'teyi, daa le dii xiw' na' Satanás, daa chziye' doxen yell-lioni. Bzal'gake'n yell-lioni len anjl cheyinka'.

¹⁰ Na' benid' wne to ben' zillj inleeb yabana', wne':

—Ba bllin lla bisla Chios chechona' ben' yell-liona', ba bli'e yel' wak choo yel' wak xen che'na' na' yel' wñabia' che'na', na' yel' wñabia' che Crístona', beena' wleje' inabia'lene' txen. La' ba bibejgake' dii xiwaa daa chao xya che ben'ka' nakcho txen, daa chao xya chgake' lao Chios chechona' ka tella ka wal. ¹¹ Ba bengake'n gan daa chonlilall'gake' Jesucristona', Beena' Zaklebi to Xil'do', beena' blalj xchene'na' ni chgake'. Na' bi bllebgake' be'gake' xtilleena', san bzani kwingake' guetgake'. ¹² ¡Ka le' zoale yabana', li yiba yizaki! Per jnyesh'laz gak chele, le' lle'le yell-liona' na' lo nido'na'! La' dii xiwaa ba betjan gana' zoale na' chllaa chlokan nall inleeb daa nezín bich bi latj xen cheyin de.

¹³ Na' ka gokbe'i bayix' xnana' ba bzal'gake'b lo yell-liona', na' blagdob noola' wxan bi' byodo'na'. ¹⁴ Na' bzoa Chioza' chop xil noola', ka xil bsia xen, kwenche bxonjile' dii xiwaa na' lljsoe' gana' bibi chashj chleb, gana' ba nonshao' Chioza' to latj che', na' we'gake' dii gawe' shon yiz yoo gashjə. ¹⁵ Na' dii xiwaa, daa nak bayix' xnana', bem ka bchej nis zil loo cho'aba' gokan to yao kwenche nan wa'n noola'. ¹⁶ Per yell-liona' byaljan kwenche goklenan noola', na' wdeban yawa' daa bchej loo cho'aba'. ¹⁷ Na' daa gok ka', bllaa blokchga bayix' xnana' noola' na' wyajb jtil-lem xiin dia che'na' bgaan, ben'ka' chzoa dill' daa nllia Chioza' bia' gongake', ben'ka' zoachech chajle'gake' cho'a xtill' Jesucristona'. ¹⁸ Na' wze bayix' xnana' cho'a nido'na'.

13

Bayixaa bchej loo nido'na'

* **12:4** Zi lat'zə ki gokan gashjə: literalmente la tercera parte.

¹ Na' ble'id' bchej loo niso'da' to bayix' lliā gall yichjb na' zi shi lozb. Na' to to lozba' zoan twej corona, na' to to yichjba' llian leba' daa zeji chon kwim ka Chioza'. ² Na' bayixaa ble'id', nakb katekzə bell tigr*, na' ni'a naba' nakan ka ni'a na' oso, na' cho'aba' nakan ka che bell lión. Na' bayix' xnana' be'b leb yel' wak na' yel' wnabia' cheba' kwenche inabia'b. ³ To yichj bayixaa zoalejan byaljan to we' daa nan guetib, na' we'na' biyakin. Na' yog' ben' yell-lioka' bibangakile' na' bengake' bayixaa txen. ⁴ Na' be'la'ogake' bayix' xnana', daa be' yel' wnabia' cheba' bayixaa nak ka bell tigr, na' lekzka' be'la'ogake' bell tigra, nagake':

—Kono zoa sto ka bayixii, na' kono so saki til-lem.

⁵ Na' kono bsej blon be'b dill' cha'sibə na' wneb zban che Chioza', na' wnabia'b chopiyon beo'. ⁶ Wneb zban che Chioza', na' biz ben wnab che', na' che yabana' gana' zoe', na' che ben'ka' zoa yabana'. ⁷ Na' gok lo na'b til-lem ben'ka' nak lall' na' Chioza', na' bem legake' gan. Na' lekzka' gok lo na'b inabia'b lao yog'lol ben' za' yog' dia, ben' lle' yog' yell, ben' lle' yog' nación, na' ben' chne wde wdeli dill'. ⁸ Na' yog'lol ben'ka' lle' yell-lioni, ben'ka' bi da' leinna' lee libr che Jesucristona', we'la'ogake' bayixaa. La' kana' wxe wzilte yell-lioni, Jesucristona', Beena' Zaklebi to Xil'do' daa betgake'ne', bzeje' lee libr che'na' le yog' ben'ka' gat' yel' mban cheyin zejli kani.

⁹ Beena' cheni dga nia', chiyal' wzenagyeneen. ¹⁰ Beena' wche'gake' wsejgake', shajshaze' gatee lillyana'. Na' beena' ba nakan guetile' yesyana', guetshazile'n. Na' daan, ben'ka' nak lo na' Chioza' chiyal' soachehgake' gonlilall'gake'ne'.

¹¹ Na'tech ble'id' sto bayix' bchejb loo yell-liona' na' lliā chop lozb dii nak ka che to xil'do', per chneb ka bayix' xnana'. ¹² Na' wdapb do ka nak yel' wnabia' che bayix' necha', na' ba necha' be'b latj wnabia'b kwenche bem byen yog' ben' lle' yell-lioni be'la'ogake' ba necha', bana' biyaki we' cheba' daa nan guetib. ¹³ Na' lekzka' bana' bchej loo yell-liona' bem yel' wak xen daa benan ka bibani ben', axt bem ka betj yi' xan yabana' bxopan lo yell-lioni chwiāte ben' yell-lioka'. ¹⁴ Na' ni' che yel' wakki gok lo na'b gom gana' lliā ba necha', wxiye'b ben'ka' lle' yell-lioni kwenche bzenaggake' che ba necha', na' bem byen bengake' to lwaa lsak' ba necha' bana' biyaki we' cheba' daa bsalj yesyana'. ¹⁵ Na' bayix' wchopina' wdapb yel' wak kwenche wloob bishbe daa nak lwaa lsak' bayix' necha', kwenche gak inen na' gonan ka witgake' yog' ben'ka' bi we'la'o len. ¹⁶ Na' lekzka' bem byen yog'lol ben' sho' nee de shlina' wa loxgue'na' to sen, ka ben' zakii ka ben' bi zakii, ka ben' wni'a ka ben' yesh', ka ben' ndoo lla yel chone' xshin ben' na' ka ben' chon xshinkze'. ¹⁷ Na' kono gok wit' wde bi dii de che' wa si'e bi dii chyaljile' shi bi yo'e sen che bayixaa daa nak leb wa número daa zeji leba'. ¹⁸ Chyaljicho yel' sin' kwenche shajniicho dga. Beena' shajniile'n na' yiyiljni'e número che bayixaa daa nak to número che ben'. Na' número na' nakan xop guiyoa guiyon xop.

14

Daa bel ben'ka' to guiyoa tapiyona mil

¹ Na' ble'id' Jesucristona', Beena' Zaklebi to Xil'do', zie' lo yaana' le yaa Sión. Na' lene' to guiyoa tapiyona mil ben', na' da' loxgue'ka' le Jesucristona', Beena' Zaklebi to Xil'do', na' le Xe'na'. ² Na'ch benid' to sshag wal za'n yabana', na' sshaga' nenan ka nen yao xenna' daa chxop cho'a bnanja' na' ka nen kat' chashj chtin. Daa benid', nenan ka shii dii zan arpa dii chsillgake'. ³ Na' cholgake' to dii kob lao beena' lliā chnabi'a na' lao ben'ka' tap zoa xilin, na' lao ben'ka' tapichoa. Na' koch no ben' yoblə gok gol daa cholgake', san toz ben'ka' nak to guiyoa tapiyona mil, ben'ka' bisla Chioza' ladj ben'ka' lle' yell-lioni. ⁴ Ben'kin wdapshii kwingake' na' bi bdi'gake' nool, na' nogake' Jesucristona', Beena' Zaklebi to Xil'do', gattezə zeje'. Na' bisla Chioza' legake' ladj ben' yell-lioka' kwenche gagake' lo

* **13:2** Bell tigr: literalmente leopardo.

nee na' lo na' Jesucristona'. Na' zaklebgakile' ka to dii nech dii chizi' chilap ben' cho'en Chioza'. ⁵ Na' biga bchej dill' wxiye' cho'eka', na' ni to bibi nda' nchengake' lao Chioza'.

Dill' daa be' anjlka' shon

⁶ Na' ble'id' sto anjl chzoe' xan yabana', na' chyixji'e dill' wen dii kob che Chioza' daa bi te cheyin lao ben'ka' lle' yell-lioni, ben'ka' lle' yog' naciónka', yog' yell, ben'ka' za' yog' dia, na' ben'ka' chne' wde wdeli dill'. ⁷ Na' wñie' zillj inleeb, chi'e:

—Li illeb Chioza' na' li kwee balaan, la' ba bllin lla gone' yel' joschis che to to ben'. Li we'la'o beena' ben yabana' len yell-liona', na' nisdona', na' gana' chal niska'.

⁸ Na' no sto anjl le', na' ne':

—Ba williayi' Babilóniana', yella' le' wzeyi cheyi, yella' gana' wlle' ben'ka' zaklebi noola' chsollu ben' kwenche gonlen ljwellgake' bittez dii zbanka' cheeni beli chen che'ka', daa wlooyel'gake' ben'ka' lle' yog' naciónka' kwenche gongake' dii malka' bengake'.

⁹ Na' jano sto anjl legake', ben' wyoni, na' wñie' zillj inleeb, wne':

—Nottezə ben' we'la'o bayixaa na' lwaa lsak'ba', na' wi'e latj sho' sen cheba' loxgue'na' wa neena', ¹⁰ yen ile'ile' do ka nak yel' chllaa che Chioza'. Na' sak'zi'e lo yi' gabila' daa nak ka yina' nchix azúfrena' chwiate ben'ka' nak anjl che Chioza' na' Jesucristona', Beena' Zaklebi to Xil'do'. ¹¹ Na' llen che yi'na' gana' sak'zi'gake' chasan zejli kani. Na' ben'ka' choe'la'o bayixaa na' lwaa lsak'ba' na' ben'ka' we'gake' latj sho'gake' sen cheba', bibi yel' wixi'lall' gat' chegake' ka tella ka wal. ¹² Na' daa gak ka', ben'ka' nak lall' na' Chioza' na' chzoagake' xtilleena', na' zoatezi zoagake' chonlilall'gake' Jesúsza', chiyal' so sakgakile' daa yen ile'gakile'.

¹³ Na' benid' wne to ben' yabana', na' wne' nad':

—Bzej dga: “Chakomba ben'ka' nak Xancho Jesucristona' txen, ben'ka' guet naa na' ben'ka' zi' guet ni che.” Kan' nakan, —na Espiritu che Chioza'—, legaken' yizi'lall'gake' che yog' dii ben ble'gakile', na' yog' dii wenka' bengake' bi gal-lalii Chiozan'.

Chioza' yitope' ben' yell-liona' ka ben' chizi' chilap

¹⁴ Na' bwia' na' ble'id' to bej llyish, na' lo beja' chi' to ben' nake' ka benech. Na' nzoa to corona de or yichje'na' na' noxee to garbat dii nlatit. ¹⁵ Na' bchej sto anjl loo yoodo' che Chioza', na' chosyee zillj inleeb chi'e beena' chi' lo beja':

—Bchin garbata' daa noxoo na' bizi' bilap, la' ba gol' yizi' yilapo' daa de yell-liona'.

¹⁶ Na' beena' chi' lo beja' bizi' bilape' daa de lo yell-lioni.

¹⁷ Na'ch bchej sto anjl loo yoodo' che Chioza' zoa yabana', lekzka' noxee sto garbat dii nlatit. ¹⁸ Na' bchej sto anjl gana' zoa daa nak ka mes de or gana' chzeygake' yala', na' nak lo nee yi'na'. Na' wñie' zillj beena' nox' garbata' daa nlatit, chi'ene':

—Bichogui garbata' noxoo uvana' de yell-liona', la' ba wegakan.

¹⁹ Na' anjla' bichoguile' garbata' uvaka' de lo yell-liona' na' bizi' bilape'n, na' blléen gana' chsigake'n. Na' zejin Chioza' bitope' ben' yell-lioka' bi nakgake'ne' txen, na' wlo'e legake' gana' sak'zi'gake', gana' yen ile'gakile' yel' chllaa che'na'. ²⁰ Na' ben'ka' zaklebi uvaka', wzak'zi'gake' cho'a yella'. Na' gana' bllée legake' wlalj dii zil inleeb xchene'ka' na' wyasan ka to ze cho'a kabaya' na' blliljan shon guiyoa kilómetro.

15

Anjlka' gall

¹ Na' ble'id' yabana' sto dii wal, dii chonan ka yibanicho. Ble'id' gall anjl, ben'ka' nak lall' na'gake' wisgake' zi gall yel' zak'zi'ka' gat' lo yell-lioni kwenche yiyoll yido yel' chllaa che Chioza'.

² Na' lekzka' ble'id' daa nak ka nisdona' de vidr nchixan yi'. Na' ble'id' ben'ka' bizo bizaki bi be'la'ogake' bayixaa na' lwaa lsak'ba' na' bi be'gake' latj sho'gake' sen cheba', zegake' cho'a nisdona' de vidra' na' nox'gake' twej arpa daa be' Chioza' legake'. ³ Na' cholgake' to dii

bel dii Moiséza', beena' ben ka cheeni Chioza', na' daa bel Jesucristona', Beena' Zaklebi to Xil'do', nagake':

Le nak diika' chono' na' chongakan ka chibaninto',
Chios, ben' nak Xannto', ben' yel' wak choo yel' wak xen.

Yog' diika' chono', chono'n ka chiya',
li' nako' ben' wñabia' che yog' ben' yell-lío.

⁴ Biga zoa ben' bi gall illebe' li', Xan'.

Biga zoa ben' bi kwe' li' balaan.

La' tozo' lin' nako' dowalj ben' li ben' shao'.

Na' ben'ka' lle' doxen yell-lioni yidgake' we'la'ogake' li',
daa ble'gakile' diika' chono' nakan shlichá.

⁵ Na' ka biyoll dga, bizle'id' byalj yoodo' che Chioza' yabana', latj gana' yooshao' ley che Chioza' daa bzeje' lee yaj taaka'. ⁶ Na' loo yoodo'na' bchej gall anjl, ben'ka' nak lall' na'gake' wisgake' gall yel' zak'zi'ka' gat' lo yell-liona'. Nakwgake' twej lech' xtil dii chey cheeni' na' ngoo li'eka' twej bad' de or blinten ka de cho'alcho'eka'te. ⁷ Na' to ben'ka' tap, ben'ka' zoa xilinna', bi'e to to anjlka' twej kop de or nakgakan tolla' yel' zak'zi' che Chioza', beena' zoa zejli kani. ⁸ Na' loo yoodo'na' gokan tolla' llenna' ni cheyi balaan xen che Chioza' na' yel' wak choo yel' wak xen che'na'. Na' kono gok yiyoo loo yoodo'na' axt ki biyoll bido gallte yel' zak'zi'ka' daa nak lo na' anjlka' gall.

16

Yel' zak'zi'ka' gall daa yoll loo kopka'

¹ Na' benid' wne to ben' zillj inleeb loo yoodo'na', chi'e anjlka' gall:

—Li shaj na' li lljalatj lo yell-liona' yel' zak'zi' che Chioza' diika' yoll loo kopka' gall.

² Na' wyaj anjl necha', jalatje' yel' zak'zi' daa yoll loo kop che'na' lo yell-liona' na' yog'lol ben'ka' yoo sen che bayixaa na' be'la'ogake' lwaa lsak'ba' byalgake' we' dii wyoll guull' na' wyey wlagake'.

³ Na' anjl, ben' wchopina', jalatje' yel' zak'zi' daa yoll loo kop che'na' lo niso'na', na' niso'na' biyakan ka xchen ben' witi yesya, na' wit yog'lol dii de yel' mban cheyin loo niso'na'.

⁴ Na' anjl, ben' wyonina', jalatje' yel' zak'zi' daa yoll loo kop che'na' loo yaoka' na' yog' ga chal nis, na' biyagakan chen. ⁵ Na' benid' wne anjla' blalj yel' zak'zi'na' lo nisa', wne':

—Chios, lin' nako' dowalj ben' li ben' shao'. Lin' zo' naa, na' li'kzan zo' ka wxw wzil yell-lioni. Lin' chono' daa nak shlichá daa ba bchoglo' che ben'ki kon ka chiya' gak. ⁶ La' legake' blalgake' xchen ben'ka' nak lall' no' na' ben'ka' wdixjee daa gollo' legake', na' ba be'gako'ne' chenna' yeejgake', ka chidol'kzə gak chegake'n.

⁷ Na' lekzka' benid' wna beena' ze kwit daa nak ka gana' chzeygake' diika' chjwa'gake' lao Chioza', ne':

—Kan' nakan Chios, ben' nak Xannto', ben' yel' wak choo yel' wak xen, li' ba beno' yel' joschis kon ka chiya' gakan.

⁸ Na' anjl, ben' wdapina', jalatje' yel' zak'zi' daa yoll loo kop che'na' lo wbilldo'na', na' bzeyan ben' yell-liona'. ⁹ Na' yog'lolgake' wyeygake' nall inleeb. Per bi biyaj bilengakile' lao Chioza', ni bi be'la'ogake'ne', san wnelgake' zban che' daa bi'e latj chak yel' zak'zi'ka'.

¹⁰ Na' anjl, ben' gayi'na', jalatje' yel' zak'zi' daa yoll loo kop che'na' gana' llia bayixaa chñabia'b, bana' bchej loo niso'na', na' gok shgasj shchol doxen gana' chñabia'b. Na' ben' yell-lioka' non leb txen wdaoyaa lolleeka' daa le wyey wlagake'. ¹¹ Na' wnelgake' zban che Chioza', beena' zoa yabana', daa chey chlagake' ni che we'ka' lliagake', na' bi biyaj bilengakile' dii mala' chongake'.

¹² Na' anjl, ben' wxopina', jalatje' yel' zak'zi' daa yoll loo kop che'na' loo yao xenna' le Éufrates, na' biyeej yao xenna' kwenche gok wde ben' wñabia'ka' za' gana' chla'lə wbillá.

¹³ Na' ble'id' shon̄ dii x̄iw' dii nak ka bloll. Ton bchej loo cho'a bayix̄' xn̄ana', na' ston bchej lo cho'a bayix̄aa bana' be'la'o beñ' yell-liona', na' ston bchej loo cho'a bana' chziye' beñ', cho'eb dill' daa che' bayix̄aa sto leb. ¹⁴ Na' dii x̄iw'ki chongakan yel' wak. Na' bchejgakan jatopgakan beñ' wñabia'ka' lle' doxen yell-lioni kwenche yiyakgake' toz til-lengake' Chioza', beena' zeelo nap yel' wak choo yel' wak xen, kat' illin lla choo lla xen che'na'. ¹⁵ “Li se wñeyi, nad' zizaa tokonganzi, ka chon to beñ' wban aga no chsi'nile' kat' chjlane'. Chakomba beena' ze wñeyi na' nakw xe'na' kwenche bi te gal'yid gal'bel'ze' na' si'e yel' zto'.” ¹⁶ Na' dii x̄iw'ka' btopgakan beñ' wñabia'ka' latja' le Armagedón de dill' hebreo.

¹⁷ Na' anjl, beñ' gállina', blatje' yel' zak'zi' daa yoll loo kop che'na' lo llazə. Na' loo yoodo'na' zoa yabana', gana' llia Chioza' chñabi'e, wñie' zillj, wne':

—Ba gok daa chiyal' gak.

¹⁸ Na'ch wyep yes, na' gok sshag, na' goshj wtin, na' bn̄ib yell-liona' ni che to bedxo' xen inleeb dii nakch zibia' ka yog' bedxo'ka' ba gok shlak wzoa beñ' lo yell-lioni. ¹⁹ Na' yell daa le zeyi cheyin gokan shon̄ laalə, na' yellka' lle' yell-lioni wliayi'gakan. Na' ngoo yichj Chioza' wsak'zi'e Babilóniana', yella' le zeyi cheyin, kwenche beñ'ka' lle' na' yen ile'gakile' yel' zak'zi' xen che'na' daa le bshaagake' le'. ²⁰ Na' yog' yell-liodo'ka' llia lo nisdo'na' na' no yaaka' binitlogakan. ²¹ Na' xan yabana' bxop yaj yaba dii yel' inleeb na' ziigakan wdeli choa kil. Na' beñ' yell-lioka' wnelgake' zban che Chioza' ni che yaj yabana' daa gokan to yel' zak'zi' xen inleeb.

17

Nool wdana' beena' llia koll' bayix̄' xn̄ana'

¹ To anjla', beena' len beñ'ka' gall, beñ'ka' nox̄gake' kopka', bide' gana' zia' na' wne' nad':

—Da, wliid' li' yel' zak'zi'na' ile'i noolə wdana', beena' zaklebi yella' le zeyi cheyin daa llia gana' chde yao zan. ² Beñ' wñabia'ka' lle' yell-liona' ba benlengake'ne' txen lo yel' wdana', na' beñ'ka' lle' yell-liona' ba lenzgake' nak ka beñ' chzoll chniti daa chongake' dii malka' chone'.

³ Na' anjla' bchi'e nad' latja' gana' bibi chashj chleb na' Espíritu che Chioza' bene' ka ble'do'id' to noolə llie' koll' to bayix̄' xn̄a, na' doxem da' dill' daa chne zban che Chioza', na' llia gall yichjb na' zi shi lozb. ⁴ Na' noola' nakwe' to lech' de morad na' dii xn̄alil, na' le nonilen' nchine' or, yaj wan na' perla. Na' noxee to kop de or daa nak tolla' dii zbanka' na' yel' wdana' chone'. ⁵ Na' loxgue'na' da' to lie' daa kono wyajni bin zejín, na' nan: “Babilóniana', yella' le zeyi cheyin, xaxna' yel' wdana' na' yog'lol dii zban daa chak doxen lo yell-lioni.” ⁶ Na' gokbe'id' wzolli noola' daa weeje' xchen beñ'ka' bete', beñ'ka' benlilall' Chioza' na' beñ'ka' be' cho'a xtill' Jesúsza'. ⁷ Na' anjla' wne' nad':

—¿Biche chibanzilo? Na' inia' li' bi zeji daa ble'ilo' noola' na' bayix̄aa, bana' llie', bana' llia gall yichjin na' zi shi lozb. ⁸ Bayix̄' xn̄ana' ble'ilo', leban wzoa kani'yi, na' bich zoab naa. Na' wiyedb sto shii ichejb loo yecha' daa bi chiyoll chido nak zitj kwenche kwiayi'b toshiizi. Na' beñ'ka' lle' lo yell-lioni, beñ'ka' bi da' lie'ka' lee libra' gana' da' le beñ'ka' de yel' mban chegake' zejli kani kana' zi xe silte yell-lioni, yibangakile' ile'gakile' bayix̄aa, bana' wzoa kana', na' bich zoab naa, per wibam sto shii.

⁹ Nin chyalljicho yel' sin'na' na' yel' chajniina'. Yichjbka' gall, zaklebin gall yaaka' gana' llia noola', ¹⁰ na' lekzka' nakgakan gall beñ'ka' chñabia'. Gay'gake' bich chñabia'gake', toe' chñabi'e naa, na' beena' sto zi' solo inabi'e. Na' kat' solo inabi'e, xtitzan inabi'e. ¹¹ Na' bayix̄aa, bana' wzoa kani'yi na' bich zoab naa, leban' beñ' wñabia' de wxoni'na'. Na' lene' beñ'ka' gall, na' ba nakten kwiayi'tekze'.

¹² Na' lozbka' shi, diika' ba ble'ilo', zaklebigakan shi beñ'ka' zi' solo inabia', per shollzan inabia'lengake' bayix̄aa. ¹³ Na' beñ' wñabia'ki shi gagkake' toz, na' we'gake' bayix̄aa yel'

wṇabia' che'ka'. ¹⁴ Na' til-lengake' Jesucristona', Beena' Zaklebi to Xil'do', na' Jesucristona' gone' legake' gan, la' len' Beena' zeelo nak Xan yog'loḷ ben', na' Beena' liizelozi chṇabia' lao yog'loḷ ben'. Na' ben'ka' zejlen le' txen nakgake' ben' wlej Chioza' na' zoachehgake' nonlilall'gake'ne' do yichj do lallgake'.

¹⁵ Na' lekzka' wna anjla' nad':

—Yaoka' ble'ilo' gana' llia noolə wdana', zejin ben' zan inleeb, ben' za' yog' yell na' yog' nación, na' ben' chne wde wdeli dill'. ¹⁶ Na' bayixaa na' ben' wṇabia'ka' zaklebi lozba' shi gakzbangakile' nool wdana'. Na' gakgake' txen choonlall'gake'ne' gal'yid gal'belee na' gaogake' xpeleena', na' leyi wzeygake'ne' lo yi'na'. ¹⁷ Chioza' ba bzoe' loo yichjlall'do'eka' daa cheenile' gongake', na' gakgake' toz we'gake' yel' wṇabia' che'ka' bayixaa na' yiyoll yido gak daa wna Chioza' gak. ¹⁸ Na' noola' ba ble'ilo', len' zaklebi yell daa le zeyi cheyin, yella' chṇabia' lao yog'loḷ ben' chṇabia' yell-lioni.

18

Kwiayi' yell Babilóniana'

¹ Ka biyoll ble'id' dga, na'ch ble'id' sto anjl chetje' yabana', na' nsa'chgue' yel' wṇabia' xen inleeb, na' beeni' che'na' bzeeni'n doxen yell-lioni. ² Na' besyaadie' ne':

—¡Ba wlliyi' Babilóniana', yella' le wzeyi cheyi! ¡Ba wlliyi'n! Ba biyakan lill xlatjə dii xiw'ka'. Ba biyakan ga lle' lla' chiya dii xiw' na' ga lle' lla' yog'loḷ ba chda xan yabana' ba nak zban, ba chpani ben'. ³ La' yella' wle' ben'ka' zaklebi noola' chsolli ben' kwenche gonlen ljwellgake' bittez dii zbanka' cheeni beli chen che'ka', daa wlooyel'gake' ben'ka' lle' yog' naciónka' len ben'ka' chṇabia' legake' kwenche gongake' dii malka' bengake'. Na' ben'ka' chit' chde lo yell-lioni biyakgake' ben' wni'a ni che yella' daa chit' chdegake' diika' zeelo chibayi ben'ka' lle' na'.

⁴ Na' benid' wne sto ben' yabana', ne':

—Li yichej yell Babilóniana', ka le' nakle lall' na', kwenche bi gonle txen saaxyaka' chongake', na' bi ile'ile' yel' zak'zi'ka' ile'i ben'ka' lle' na'. ⁵ La' saaxyaka' chak yella' nakan dii zan inleeb, na' ngoo yichj Chioza' dii malka' chongake'. ⁶ Ka ba bsak'zi'gake' ben', ka'kzan sak'zi'gake'. Yel' zak'zi' xench yen ile'gakile' aga ka daa ba bengakile' ben', ax̄t choplə ka daa bchi' bsak'gake' ben' yen ile'gakile'. ⁷ Ka to ba be'la'o kwingake' na' ka to ba biba bizakgakile' bengake' daa nazan chegake', ka'kzan illaglogaken' na' kwellyesh'gake' lao yel' zak'zi' che'ka'. La' loo yichjlall'do'eka' nan: “Ni zoanto' ka ben' wṇabia'. Bi naknto' ka ben' ba bzeb na' biga kwellyesh'nto'.” ⁸ Na' daa nagake'ka', shllazə yen ile'gakile' yel' zak'zi'ki: balgake' guet, na' ben'ka' yigaan kwellyesh'gake' na' ibil idongake', na' sheygake' lo yi'na', la' ben' yel' wak choo yel' wak xen nak Xancho Chioza', beena' ba bchogloe' chegake'.

⁹ Na' ben' wṇabia'ka' lle' yell-lioni ben'ka' ben' legake' txen bengake' yel' wdana' na' biba bizakgakile' lawi daa na' beli chen che'ka', kwellyesh'gake' ni che yell Babilóniana' kat' ile'gakile' chasan llenna' daa cheyan. ¹⁰ Na' segake' zit'lə daa chlebgake' yel' zak'zi'na' chllaglo ben'ka' lle' na', na' inagake':

—¡Nyesh'laz inleeb chak cho', yell Babilonia, li' le zeyi cho' chṇabi'o! La' tolbe' ba bla' yel' zak'zi' cho'ni.

¹¹ Na' ben'ka' chit' chde lo yell-lioni lekzka' kwellgake' na' gakyesh'gakile' ni cheyin, la' kochno zoa no si' diika' chit' chdegake', ¹² diika' nak de or, de plat, yaj wan, perla, lech' shao' de lino na' de sed, lech' morad na' dii xnalil, na' biya yagla' dii chla' zix, no diika' chongakile' loshj lefantka' na' de yagla' diika' nak mbalaz inleeb, na'ch de ya, na' de yajes. ¹³ Na' lekzka' chit' chdegake' canel, clab pimient, yal, set zix, nill' che yag dii chla' zix, vino, set, yezj widi, trigo, bayix' ba choa' yoa', xil', kabay na' karret daa chgoyogakb, ga biyollin ax̄t chit' chdetegake' ben' gon xshin ben'. ¹⁴ Na' ye'gake' ben'ka' lle' yella':

—Bichbi yel' shao' cheleka' de, diika' bibaile. Ba binit yel' wni'a cheleka' na' bichga ile'ile' dii wen dii shao'ka'.

¹⁵ Na' ben'ka' bet' bde chiya diika' bsa'gake' na' bni'agake' daa bet' bdegake'n yella', zit'la segake' daa chllbegake' yel' zak'zi'na' chllaglo ben'ka' lle' na', na' kwellyesh'gake'.

¹⁶ Na' inagake':

—iNyesh'laz inleeb chak che yella' le wzeyi cheyi, gana' gokwgake' lech' shao'ka' nak de lino, na' lech' morad na' dii xnalil, daa da' or, perla na'ch yaj wan! ¹⁷ iLa' tolbe' binit yel' wni'a cheyinna'!

Na' yog' ben'ka' chsa' barkwka', na' yog' ben'ka' choogake'n, na' ben'ka' chon llin loo barkwka', na' yog' ben'ka' chon llin lo niso'dna' kwenche cheej chaogake', segake' zit'la wwiagake'n. ¹⁸ Na' ka ile'gakile' chey yella' na' gosyaagake', inagake':

—iBichga zoa sto yell dii zaklebin yelli dga le zeyi cheyin!

¹⁹ Na' yillee bishte yona' yichje'ka', leyi kwellyesh'gake', na' gosyaagake' inagake':

—iNyesh'laz inleeb chak che yelli dga le zeyi cheyin! Yog' ben'ka' wdalen barkwka' lo niso'dna' bni'alengake' yel' shao' cheyinna'. iNa' tolbe' ba wliayi'n!

²⁰ Ka le' lle'le yabana', le' nakle lall' na' Chioza', na' ka le' bselee we'le xtilleena', na' ka le' nakle ben' wdixjee daa wna Chioza' le', li yiba yizaki, la' Chioza' ba bizi'e wzonna' daa bchi' bsak'gake' le'.

²¹ Na'ch to anjl, ben' wal, blise' to yaj xen inleeb na' bzaleen loo niso'dna', na' chi'e:

—Kan' gak che yell Babilóniana' daa le zeyi cheyin, na' bichga llia ile'i ben' len. ²² Bichga yeni ben' chsillgake' árpana', ni ben' chkwell no blej no trompet lawinna'. Ni bichga soa ben' wlan wde wdeli llin, ni bich gak sshag che yaj molinna'. ²³ Bich bi beeni' che yi' kandil gat' lawinna', ni bich bi lni che wishagna' gat' lawinna'. La' ben'ka' bet' bde bi de cheyin lawinna' gokgake' ben' choo ben' xen yell-lioni, na' ben' Babilóniaka' wxiye'lengake' yel' willa' che'ka' yog' ben' lle' yell-lioni. ²⁴ Na' lawinna' betgake' ben'ka' wdixjee daa goll Chioza' legake' len ben'ka' nak lall' nee, na' ndobgakile' yel' wit che yog' ben' ba betgake' doxen lo yell-lioni.

19

¹ Ka biyoll ble'id' diiki, benid' chosyaa ben' zan yabana', nagake':

iWe'la'ocho Chioza'!

Xancho Chioza', beena' chisla ben'ka' nonlilall'gake'ne',

chidolee sho'e balaan na' inabi'e toshiizi,

² la' len' chone' yel' joschis kon ka chiyal' gakan.

Ba bliayee yella' daa le wzeyi cheyi.

Yelli zaklebin nool wdana' daa wlooyel'gake' ben' yell-liona' bengake' legake' txen bxinj blengake'.

Ba bizi'e wzon che ben'ka' nak lall' nee, ben'ka' betgake'.

³ Na'ch wiznagake' sto shii:

—iWe'la'ocho Chioza'! Ba wliayi' wliade yella' toshiizi.

⁴ Na' ben'ka' tapichoa len ben'ka' zi tap, ben'ka' zoa xilin, bchek' xibe'ka' na' yichje'ka' bllinan axt lo yona' be'la'ogake' Chioza', beena' llia gana' chnabi'e. Na' nagake':

—Kan' nakan. We'la'ocho Chioza'.

⁵ Na' gana' llie' chnabi'e benid' wne to ben', na' ne':

Li we'la'o Chios chechona',

yog'lol-le le' nakle lall' nee na' chall chlleblene',

ka ben' zakii ka ben' bi zakii.

Yel' wishagna' che Beena' Zaklebi to Xil'do'

⁶ Na' benid' shii ben' zan inleeb, na' nenan ka nen to yao xen daa chxop cho'a bnanja' na' ka ga chne to wziw' xen inleeb, nagake':

iWe'la'ocho Chioza'!

Xancho Chios, ben' yel' wak choo yel' wak xenna', ba wzoloe' chnabi'e.

⁷Yiba yizakicho dii xen wal na' koochone' balaan.

La' ba bllin lla wshagna' Beena' Zaklebi to Xil'do'.

Na' ben'ka' nonlilall' le' ba ze kwasgake' chbezgake'ne' ka chon noola' llana' wshagnee.

⁸Na' ba bi'e twej xagake' de lech' shao' dii nxi nyech na' chep cheeni'n.

Na' lech' shawaa zaklebin dii wenka' bengake'.

⁹Na' wna anjla' nad':

—Bzej dga: “Chakomba ben'ka' gox wñab Jesucristona' soagake' kat' gak yel' wishagna'na'.”

Na' wne':

—Diikin dill' li che Chioza'.

¹⁰Na' bçhek' xibaa lao anjla' kwenche nan we'lawaane', na' wne' nad':

—;Bi gono' ka'! La' lekzka' wen llin che Chioza' nad', ka nako' li' na' ka bish' ljwello'ka', ben'ka' zoachehgake' chajle'gake' che Jesús'a'. ;Be'la'o Chioza'!

La' ben'ka' choe' dill' li che Jesús'a', zoa Espíritu che Chioza' chzajniile' legake' kwenche we'gake' xtilleena'.

Beena' llia koll' kabay llyisha'

¹¹Na' ble'id' nyaljə yabana' na' bli'lao to kabay llyish. Na' beena' llie'b lie' Ben' Chon Kon Ka Ne' na' Cho'e Dill' Li. Na' chçhogloe' che ben' kon ka chido' gone' chegake', na' chdil-lene' ben'ka' chido' til-lene'. ¹²Jalawe'na' chzeeni'gakan ka bel' yi', na' nllin yichje'na' dii zan corona. Na' da'n to lie' daa toze' le' nombi'e. ¹³Na' nakwe' to xe' dii nak ka dii wleej chen, na' lie' Cho'a Xtill' Chios. ¹⁴Na' nchi'e wen wdil' che'ka', ben'ka' lle' yabana', na' nakwgake' lech' shao' daa nxi nyech, na' kabayka' lliagake' nakgakb ba llyish. ¹⁵Na' chchej cho'ena' to spad dii nlatit kwenche wlliaiylene'n ben'ka' lle' yell-lioni. Na' inabi'e legake', na' bi si'xene' che nottez ben' bi chzenag che'. Na' lo yel' chllaa che Chios, ben' yel' wak choo yel' wak xenna', wsak'zi'e legake' gonile' legake' ka chon to ben' chlej chshoshj uvana' kwenche chzin. ¹⁶Lee lechaa nakwe' ka do lee xichje'na' da'n lie'na', nan: “Ben' zeelo nak Xan yog'lol' ben', na' Ben' liizelozi chnabia' lao yog'lol' ben'.”

¹⁷Na' ble'id' to anjl zie' lo wbilldo'na', na' chosyee, chi'e yog' baka' ze xan yabana':

—Li yidop yillag kwenche yeej gaole to xshe' xen daa ba ben Chioza' chele. ¹⁸Na' gaole xpel' ben' wñabia'ka', na' che ben'ka' ngoo lall' na' wen wdilka', na' che ben' walka', na' gaole xpel' kabayka' na' che ben'ka' chbiab. Na' gaole xpel' yog'lol' ben', ka ben' ndoo lla yel chone' xshin ben' ka ben' chon llin chekze', ka ben' zakii ka ben' bi zakii.

¹⁹Na' ble'id' bayixaa, bana' bchej loo niso'na' len ben' wñabia'ka' chnabia' lo yell-lioni na' wen wdil' che'ka' bidop billaggake' kwenche til-lengake' beena' llia kabaya' na' wen wdil' che'ka'. ²⁰Na' be'x'gake' bayixaa bchej loo niso'na' len bana' chyixjee xtil'ba', bana' ben' chiya yel' wak gana' llia bayixaa. Na' daa bem ka' wxiye'b ben'ka' be' latj sho'gake' sen che bayixaa na' be'la'ogake' lwaa lsak'ba'. Na' shi'a shbangakb bzalee chopteb lo yi'na' chal'nin daa nchix azúfrena'. ²¹Na' ben'ka' len legakb, beti beena' llia kabaya' legake' spad daa chchej cho'ena', na' yog'lol' baka' ze xan yabana' belj blla'gakib xpeleeka'.

20

Wseje' dii xiwaa' to mil yiz

¹Na' ble'id' to anjl chetje' yabana', na' noxee xiinya che yecha' daa bi chiyoll chido nak zitj na' noxee sto gden xen. ²Na' anjla' bcheje' bayix' xnana', bana' nak bel' kani'teyi, leban dii xiwaa na' Satanáza', na' bcheje'n to mil yiz. ³Na' bzaleen loo yecha' daa bi chiyoll chido nak zitj, na' bsejtipe'n kwenche shejan to mil yiz na' bich siye'n ben' yell-lioka'. Ka yiyoll gak to mil yiz na' yiselle'n xtit.

⁴Na' ch ble'id' gana' llia ben'ka' gok lo na'gake' gongake' yel' joschisa'. Na' lekzka' ble'id' ben'ka' bhoggake' yene'ka' ni cheyi daa be'gake' xtil' Jesús'a' na' cho'a xtil' Chioza'.

Legaken' bi be'la'ogake' bayixaa bchej loo nisdona' ni bi be'gake' latj ta' sen cheba' loxgue'ka' wa neeka'. Na' bibangake' sto shii na' wñabia'lengake' Crístona' to mil yiz. ⁵ Legaken' beñ' nechka' yiban ladj beñ' wetka'. Na' beñ' wetka' sto, ka biyollch bza' de to mil yiza' bibangake'. ⁶ Chakomba beñ'ka' yiban nech ladj beñ' wetka', la' beñ'kan' nak lall' na' Chioza'. Na' bi ile'gakile' yel' wit wchopina', san gake' bxo'z che Chioza' na' che Crístona' na' inabia'lengake'ne' to mil yiz.

⁷ Kat' yiyoll iza' de to mil yiza', yiselle' Satanáza' gana' ncheje'n. ⁸ Na' tan siye'n beñ'ka' lle' tap laate yell-lioni, beñ'ka' zaklebgake' beñ'ka' lle' yellka' le Gog na' Magog, na' wtopan legake' kwenche shajlengake'n lo wdila', na' gake' beñ' be beñ' zil ka yoxa' chi' cho'a nisdona'. ⁹ Na' bllesh bcheengake' doxen lo yell-lioni na' wye'chjgake' yella' daa le chaki Chioza', gana' lle' beñ'ka' nak lall' nee, nan wllia'yigake' legake'. Per Chioza' bletje' yi'na' xan yabana' bisya bislenan legake'. ¹⁰ Na' bzalee dii xiwaa, daa wxiye'n legake', lo yi' gabilá' daa nchix' azúfrena', gana' bzalee bayixaa bchej loo nisa' na' bana' wdixjeeb xtill'ba'. Nan' illaglogakan yel' zak'zi'na' ka tella ka wal zejli kani.

Chioza' gone' yel' joschis che beñ' wetka'

¹¹ Na' ble'id' gana' lliá Chioza' chñabi'e, nakan to dii llyish na' to dii xen. Na' lawe'na' binitlo yell-lioni len yabana', na' koch no ble'i legakan. ¹² Na' ble'id' beñ' wetka', ka beñ' zakii na' ka beñ' bi zakii, zegake' lao Chioza' gana' llie' chñabi'e. Na' bsalje' librka', na'tech bsalje' sto libr yoblə gana' da' le beñ'ka' de yel' mban cheyin zejli kani. Na' bene' yel' joschis che beñ' wetka' kon ka choe' librka' dill' ben to toe'. ¹³ Na' biban yog' beñ'ka' wit loo nisdona', na' beñ' wetka' lle' latj che yel' wita' gana' le Hades,* na' yog'lolgake' gok yel' joschis che'ka' kon ka ben to toe'. ¹⁴ Na'ch lekzka' bzal' Chioza' yel' wita' na' latja' le Hades lo yi' gabilá'. Na' lo yi' gabilan' nakan yel' wit wchopina'. ¹⁵ Na' bzalee lo yi' gabilá' beñ'ka' bi da' lie'ka' lee libra' gana' da' le beñ'ka' de yel' mban cheyin zejli kani.

21

To yaba kob na' sto yell-lío kob

¹ Na'ch ble'id' to yaba kob na' sto yell-lío kob, la' yaba necha' na' yell-lío necha' binitlogakan na' lekzka' nisdona'. ² Na' ble'id' yell che Chioza', yell koba' le Jerusalén chetjan yabana' gana' lliá Chioza'. Ba none'n xochi ka to noolə beñ' ba nakwe' xe'na' kwenche wshagna'lene' beñ' che'na'. ³ Na' gana' lliá beena' chñabia', benid' wne to beñ' zillj inleeb, ne':

—Chioza' ba zoe' ladj beñ' yell-lioka' naa. Na' soalene' legake', na' gake' yell che', na' kwín Chioza' soalene' legake' na' we'la'ogake'ne'. ⁴ Na' gone' ka bich gat' daa gonyeshiin legake'. Bich bi yel' wit gat', ni kochno kwell, ni koch no gakyeshii, ni koch no shey la, la' ba wde che yog' diika' got' lo yell-lío necha'.

⁵ Na' beena' lliá gana' chñabi'e wne' nad':

—Nadaan chikob' yog'lolte.

Na' lekzka' wne' nad':

—Bzej dill'ki, la' nakgakan dii li na' nakgakan dii gak wxenilall' beñ'.

⁶ Na' lekzka' wne' nad':

—Ba gok daa chiyal' gak. Nadaan zaklebid' letr necha' le A* daa ba zoakz' ka wxw zil yell-lioni, na' daa zoakz' kat' te cheyin zaklebid' letra' chiyollin daa le Z.† Nad'kzan bxe bsil' yog'lol dii de, na' nad'kzan gon' ka te chegakin. Na' beena' chbili, wi'ane' nis daa nsa' yel' mbanna' na' bibi sakile'n. ⁷ Beena' so saki soacheche' gonlilallee nad', gaki che' dii wen dii shao' daa ba wnia' gaki che', na' nad' gak Chios che' na' le' gake' bi' cha'. ⁸ San ka nak beñ'ka' blleb gon nad' txen, na' beñ'ka' bi wyajle' cha', na' beñ'ka' chongake'

* 20:13 * 21:6 Letr necha' le A: de dill' griegona' letri len alfa. † 21:6 Letra' chiyollin daa le Z: de dill' griegona' letri len omega.

daa chakzbanid', na' ben' wen xyaka', ben'ka' chñelen ljuwellin, ben'ka' nlan yel' willa'na', ben'ka' choe'la'o yaj yagka', na' yog'loł ben' wxiye'ka', legaken' chidol'gake' shajgake' lo yi' gabila' daa nchix azúfrena', na' lennan' yel' wit wchopina'.

Yell Jerusalénna' daa nak dii kob

⁹ Na' gana' zia' bid to anjl beena' len anjlka' gall, ben'ka' nox' gall kopka' nakgakan tolla' yel' zak'zi'ka' zeelo, na' wne' nad':

—Da, wliid' li' xool Beena' Zaklebi to Xil'do'.

¹⁰ Na' Espíritu che Chioza' bene' kwenche wyaalen' anjla' to lo yaa xen na' dii sibə, na' bliile' nad' yell Jerusalénna' daa nak yell che Chioza', chetjan yabalə gana' zoe'. ¹¹ Na' yella' chey cheeni'n daa yoon yel' chey cheeni' che Chioza', na' chña'titan ka to yaj wan daa zakii daa le jaspe, daa chep yes ka vidr. ¹² To zee xen dii sibə nechjan yella' na' zoan shllin puert xen, na' to to cho'a puertka' ze twej anjl. Na' lekzka' to to lee puertka' llia le tkwen dia che dii Israela'. ¹³ Na' tap laate zeena' nechj yella' zoan shon wej puertka'. ¹⁴ Loo len zee xenna' nechj yella' yoon shllin yaj, na' da'gakan le shllinte postl che Jesucristona', Beena' Zaklebi to Xil'do'.

¹⁵ Na' anjl, beena' bshaljlene' nad', noxee to dii nak ka xis de or kwenche wchixile'n yella' len puertka' na'ch zee daa nechjan. ¹⁶ Na' yella' toz ka nakan de tonlə na'ch de zlag'lə. Na' bchix anjla' yella' na' nakan chop a mil chop guiyoa kilómetro, na' toz ka nakan ka de tonlə, ka de siblə, na'ch ka de zlag'lə. ¹⁷ Na'ch bchixe' zeena' na' chillan to guiyoa tapiyon llit.† Kon ka chchixə nottezə ben', ka'kzə bchix anjlan'.

¹⁸ Na' zeena' daa nechj yella' nakan de yaj wan daa le jaspe, na' yella' nakan de or dowalj daa chep yes ka vidr. ¹⁹ Na' yajka' yoo loo len zeena' nakan xochi, nakan de biya yaj wan. Dii necha' nakan yaj wan daa le jaspe, de wchopina' nakan yaj wan daa le zafiro, de wyonina' nakan yaj wan daa le ágata, de wdapina' nakan yaj wan daa le esmeralda, ²⁰ de gayi'na' nakan yaj wan daa le ónice, de wxopina' nakan yaj wan daa le cornalina, de gállina' nakan yaj wan daa le crisólito, de wxoni'na' nakan yaj wan daa le berilo, de gayina' nakan yaj wan daa le topacio, de shiyina' nakan yaj wan daa le crisoprasa, de shnejina' nakan yaj wan daa le jacinto, na'ch de shllinina' nakan yaj wan daa le amatista. ²¹ Na' puertka' shllin nakgakan shllin perla, to to puertka' nakan de toz perla. Na' nez daa chde yella' nakan de or dowalj daa chep yes ka vidr.

²² Na' ni to yoodo' bi ble'id' yella', la' kwin Xancho Chioza', beena' nak liizelozi ben' yel' wak choo yel' wak xen, len Jesucristona', Beena' Zaklebi to Xil'do', zoagake' ladj ben'ka' lle' na'. ²³ Na' yella' bi byalljin wbillá' ni beo'do'na' kwenche wzeeni'gakan lawinna', la' yel' chey cheeni' che Chioza' na' che Jesucristona', Beena' Zaklebi to Xil'do', chzeeni'n lawinna'. ²⁴ Na' ben'ka' za' doxen lo yell-liona' soagake' lao beeni' che Chioza' de yella'. Na' ben'ka' chñabia' yell-lioni wsa'gake' yel' zakii che'ka' na' balaan che'ka' yella'. ²⁵ Na' puertka' zoa yella' toshiizi iyaljgakan, la' bichbi wal gat' na'. ²⁶ Na' yisa'gake' yella' do ka nak balaan na' yel' zakii che naciónka'. ²⁷ Na' biga sho' ni to dii nda' nchen dii mal, ni nottez ben' chon dii chakzbani Chioza', ni ben' chziye', san toz ben'ka' da' lie'ka' lee libr che Beena' Zaklebi to Xil'do', gana' da' le ben'ka' de yel' mban cheyin zejli kañi.

22

Yao daa nsa'yel' mbanna'

¹ Na' bli'yi anjla' nad' to yao dii nxi nyech yollan nis daa nsa' yel' mbanna', na' nakan nis xtil inlleb ka'kzə vidr. Na' chchejan gana' llia Chioza' chñabi'e len Jesucristona', Beena' Zaklebi to Xil'do', ² na' chden gchoł neza' daa chde yella'. Na' chop laate cho'a yawa' zoa yagka' nsa' yel' mbanna', na' ze tbeo' wej chbiagakan dii zixka', na' shllin shii chbiagakan twiz. Na' xlaguiinka' nakgakan bell rmech che ben' yell-lioka'. ³ Na' bibi daa nashj bia'

† 21:17 To guiyoa tapiyon llit: nakan ka do guiyon gay' metr.

blag' cheyin gat'ch yella', la' nan' kwia Chioza' inabia'lene' Jesucristona', Beena' Zaklebi to Xil'do'. Na' yog' ben'ka' lle' na' we'la'ogake'ne'. ⁴ Na' ile'gakile'ne' kon ka nakyenee, na' ta' lie'na' loxgue'ka'. ⁵ Aga bich bi wal' gat', ni bich bi yi' kandil iyalljgakile' ni beeni' che wbilldo'na', la' beeni' che Xancho Chioza' wzeeni'n gana' soagake', na' inabia'gake' zejli kani.

Ba zoa yila' Jesucristona'

⁶ Na' wna anjla' nad':

—Dill'ki nakgakan dii li na' nakgakan dii gak wxenilall' ben'. Xancho Chioza', beena' chxoaxtilleena' cho'a lol' ben'ka' chyixjee daa chi'e legake', ba bselee nad' nak' anjl' che' kwenche wliid' ben'ka' nak' lall' nee daa ba zoa gaoshosh gak.

⁷ —jBa zoa gaoshosh yiyed'!

Chakomba beena' ze wneyi dill'ki llia lee libri cheyi diika' ba wna Chioza' gak.

⁸ Nad', Juan, ben'ble'id' diiki. Na' ka biyoll ben'ble'ida'n, bchek' xib' nan' we'lawaa anjla', beena' bli'yi nad' diika'. ⁹ Na' le' wne' nad':

—jBi gono' ka'! Nad' nak' wen' llin' che Chioza' ka li' na' ka bish' ljwello'ka', ben'ka' cho'e cho'a xtil' Chioza', na' ka yog' ben'ka' zegake' kwent' wneyi daa llia lee libri. Toz Chiozan' chiyal' we'lawoo.

¹⁰ Na' lezkka' wne' nad':

—Bi wkwashoo dga ba bzejo' lee libri, dga chyixje'n che diika' wna Chioza' gak, la' ba zoa gaoshosh gakan. ¹¹ Ben' mala' shajlenshaze' dii mala' chone', na' beena' nda' nchen saaxyana' shajlenshaze' saaxya che'na'; na' ben' wenna' soatezi soe' gone' wen, na' beena' nak' lall' na' Chioza' soatezi soe' gonche' daa cheeni Chioza'.

¹² —jBa zoa gaoshosh yiyed'! Na' wi'a daa chidol' to to ben' kon ka nak' daa ben' to toe'. ¹³ Nadaan zaklebid' letr' necha' le A* daa ba zoakz' ka wxwzil yell-lioni, na' daa zoakz' kat' te cheyin zaklebid' letra' chiyollin daa le Z,† Nad'kzan bxe bsil' yog'lol' dii de na' nad'kzan gon' ka te cheyin.

¹⁴ Chakomba ben'ka' chnabgakile' nad' yixis yiyib' yichjlall'do'eka', kwenche idol'gake' gaogake' dii zixa' llia lo yaga' daa nsa' yel' mbanna', na' sho'gake' cho'a puert' che yella'.

¹⁵ San bi gak sho' ben' malka', ben'ka' nlan yel' willa'na', ben'ka' chnelen ljwellin, ben' wen xyaka', ben'ka' choe'la'o lwaa lsak' diika' non chios' chegake', na' ch' yog' ben'ka' chibayi siye'.

¹⁶ Nad', Jesús, ba bse'laa anjl' cha'na' kwenche bzajniile' li' diiki ba bzejo' na' wi'on dill' lao ben'ka' chdop chllag' choe'la'ogake' nad'. Nad' nak' xiin' dia che dii Davina', na' zaklebid' belj' xsila' daa chna'tit.

¹⁷ Na' Espíritu che Chioza', na' cho' zaklebicho noola' wshagna'lene' Jesucristona' daa non' lilall' chone', che' chone':

—jBida!

Na' beena' yeni dill'ki yeene':

—jBida!

Nottez' ben' chbili, wak yide' na' yeeje' nisa' daa nsa' yel' mbanna', na' aga bi sakile'n.

¹⁸ Nad' chsi'nid' yog' ben' yeni dill'ki llia lee libri cheyi diika' wna Chioza' gak: Shi no chixoatelə cheyin lo dill'ki, Chioza' wdie'ne' lao yel' zak'zi'ka' ba bzetje' lee libri. ¹⁹ Na' shi no yikwas bal' dill'ki llia lee libri cheyi diika' wna Chioza' gak, Chioza' bi wi'e latj' gawe' dii zixa' llia yaga' daa nsa' yel' mbanna', ni bi wi'e latj' sho'e yell' che'na', diiki choe' libri dill' cheyin.

²⁰ Jesúsza', beena' bzajni' nad' diiki, ne':

—Dii li, ba zoa gaoshosh yiyed'.

Kan' nakan. jBidagach, Xan' Jesús!

* **22:13** Letr' necha' le A: de dill' griegona' letri len alfa. † **22:13** Letra' chiyollin daa le Z: de dill' griegona' letri len omega.

²¹ Na' yel' goklen che Xancho Jesucristona' soalenshgan yog'loltele. Kan' gakan.